



KAKAI HAEU

Seimat New Testament



Contents

Kakai Haeu	1
Matiu	2
Mak	39
Luk	62
Jon	103
Aposel	132
Rom	167
1 Korin	186
2 Korin	205
Galasia	217
Epesus	224
Pilipai	230
Kolosi	235
1 Tesalonika	240
2 Tesalonika	244
1 Timoti	247
2 Timoti	252
Taitus	256
Pilemon	259
Hibru	261
Jeims	276
1 Pita	281
2 Pita	287
1 Jon	290
2 Jon	295
3 Jon	296
Jud	297
Hahatakei Haeu	299
BAK	318
Haxewai...	328

KAKAI HAEU

The New Testament in the Seimat language, The Ninigo Islands, Manus
Province, Papua New Guinea

Nupela Testamen long tok ples Seimat, Manus Provins, Niugini

copyright © 2012 Wycliffe Bible Translators, Inc.

Language: Seimat

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright information.

You do not sell this work for a profit.

You do not change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-10-14

ISBN 978-1-5313-0604-5

PDF generated on 21 Sep 2016 from source files dated 21 Sep 2016

9fa179b2-dd20-5dbd-9745-1fb6d5f9b415

This print-on-demand edition of Scripture is designed, produced, and provided at cost by the Digital Bible Society. This is made possible through partnerships with the Bible League of Canada, Open Doors International and other missions and translation agencies. We are deeply grateful for the sacrifices made in translating this edition of Scripture and the generosity of others in making this Bible available to you.

To order additional copies of this Bible or hundreds of translations like it or to learn more about our ministries and the mission of Scripture distribution in every language, we invite you to visit www.DBS.org (USA), www.BibleLeague.ca (Canada), and www.OpenDoors.org (Europe). May God bless your work in sharing and teaching these Scriptures, until, as it is written, the earth is “*filled with the knowledge of the glory of the LORD, as the waters cover the sea.*” (Habakkuk 2:14)

Kakai Haeu

The New Testament in the Seimat language of Papua New Guinea

Nupela Testamen long tokples Seimat long Niugini

Kakai Haeu

The New Testament in the Seimat
language, The Ninigo Islands, Manus
Province, Papua New Guinea
[ssg]

Translation by Wycliffe Bible Translators

© 2012, Wycliffe Bible Translators, Inc.

Print publication, 2012 by Wycliffe Bible
Translators

Web version

© 2014, Wycliffe Bible Translators, Inc.
www.Wycliffe.org

<http://pngscriptures.org>

www.ScriptureEarth.org

This translation is made available to you
under the terms of the Creative Commons
license (Attribution-Noncommercial-No
Derivative Works).

[http://creativecommons.org/licenses/by-
nc-nd/4.0](http://creativecommons.org/licenses/by-nc-nd/4.0)

Your are free to share — to copy, dis-
tribute and transmit the text under
the following conditions:

- Attribution. You must attribute the
work to *Wycliffe Bible Translators* (but
not in any way that suggests that they
endorse you or your use of the work).
- Noncommercial. You may not use this
work for commercial purposes.
- No Derivative Works. You may not
alter, transform, or build upon this
work.
- In addition, you have permission to port
the text to different file formats, as

long as you don't change any of the
text or punctuation of the Bible.

Notice — For any reuse or distribution, you
must make clear to others the license terms
of this work.

Tok Orait

Dispela Buk Baibel i kam wantaim tok
orait na lo bilong Creative Commons
Attribution-Noncommercial-No Derivative
Works license. Em i tok olesem yu ken
givim kopi long narepela manmeri. Yu ken
wokim kopi na givim long husat i laikim.
Tasol, yu mas tok klia dispela samting i
kam long <http://tokplesbaibel.org>. Yu no ken
kisim mani na salim dispela. Yu mas givim
nating. Na tu, yu no ken senisim Tok.
Ol piksa i kam wantim ol Baibel na narapela
buk i stap long dispela sait i gat tok orait
long usim wantaim dispela samting tasol.
Sapos yu laik narapela tok orait, yu mas
askim husat i papa bilong copyright long
dispela ol piksa.

Sapos yu laik stretim samting i no orait long
dispela tok orait, stretim tok, salim Buk
Baibel, o tainim Tok bilong God long nupela
tok ples, yu ken askim mipela.

Olgeta tok orait na lo long tok ples En-
glish i stap long <http://creativecommons.org/licenses/by-nc-nd/4.0/legalcode>.

Sapos yu gat askim long dispela, plis askim
mipela.

Kakai Haeu

Matiu

Meng solian ti Jises tataiai

Matiu

Kakain ti haxewai tenen

meng ie

Matiu tel aposel tai tenen meng solian ie sai ahang 35 muhin ti Jises moih aliawa ape Haeu waxy i hani tesol tonan. Matiu axan liai tenen Livai. Pupuasan waxiai moni ti teka akikin Ju hani teka masiwi ti Rom. I lioi tenen puasan ien ti Jises kilamiwa i tel ti tesol huopanum hua aposel. Matiu tai tenen meng solian ie nake pahan i haxewa hani teka akikin Ju ka Jises i se Krais tetel laha to atetengi na Haeu taloma. Teka masiwi ti teka Ju laha kum aile ukek ka i tel Masiwi ti laha. Aile ape leili tenen meng solian ie Matiu uke hina kakain ti teka kuluiak kakai Haeu ti imat taiwen. I haxewa hani teka Ju ka puase Jises i hapoponowi hawane waliko ti Haeu namiloiwen i aile hani teka seilon. Matiu tin i tai hahaxewa ka teka na laha sohot kahikahi Jises, Haeu neini laha ape laha hatesol se akikin ti hahitake axe Krais.

Teka matahaun ti Jises Krais

Lk 3:23-28

¹ Ie se sale nenex ti Jises Krais. Jises Krais i nakuama ti David a David nakuama ti Abraham.

² Abraham tel tame Aisak,
Aisak tel tame Jekop,
Jekop tel tame Juda ma tesol ukalan.
³ Juda tel tame Peres ma Sera, tinalalu
Tamar.

Peres tel tame Hesron,
Hesron tel tame Ram.
⁴ Ram tel tame Aminadab,
Aminadab tel tame Nason,
Nason tel tame Salmon.
⁵ Salmon tel tame Boas, tinan Rahab.
Boas tel tame Obed, tinan Rut.
Obed tel tame Jesi.

⁶ Jesi tel tame tel masiwi David.
David tel tame Solomon, tel tini Solomon
tel axoi Uraia axan Batseba.

⁷ Solomon tel tame Rehoboam,
Rehoboam tel tame Abija,
Abija tel tame Asa.

⁸ Asa tel tame Jeosapat,
Jeosapat tel tame Jeoram,
Jeoram tel tame Usaia.

⁹ Usaia tel tame Jotam,

Jotam tel tame Ahas,

Ahas tel tame Hesekaia.

¹⁰ Hesekaia tel tame Manase,
Manase tel tame Amon,
Amon tel tame Josaia.

¹¹ Josaia tel tame Jehoiakin ma tesol
ukalan.

Tataen ien teka Israel kalabus hani Ba-
bilon.

¹² Muhin ti lato kalabus kewa ti Babilon:

Jehoiakin tel tame Sealiel,
Sealiel tel tame Serubabel.

¹³ Serubabel tel tame Abiud,
Abiud tel tame Eliakim,

Eliakim tel tame Asor.

¹⁴ Asor tel tame Sadok,
Sadok tel tame Akim,

Akim tel tame Eliud.

¹⁵ Eliud tel tame Eleasar,
Eleasar tel tame Matan,

Matan tel tame Jekop.

¹⁶ Jekop tel tame Josep, tel axoi Mary,
tel tini Jises,

tel Krais Haeu taloma.

¹⁷ Tataen Abraham hanima David,
nakuale huopanum hinalo. David hanima
tataen ti lato kalabus hani Babilon, nakuale
tin huopanum hinalo ape huopanum hinalo
hani tataen takahe Krais.

Takahe Jises Krais

¹⁸ Sale takahe Jises Krais. Tel tinan Mary
lahi kilami hani axoi Josep, tuah imat ti
lalu sal, liai i petiwen akaik ti pohe Holi
Spirit. ¹⁹ Josep se seilon sawisawin, i watakai
hahienai Mary ti puli lawe seilon. Aile ape
i namiloi na i tua lioi hakokol Mary.

²⁰ Lokon ti i to nanamiloi, tel engel, spirit
solian ti tel Masiwi Haeu, sohot hani i ti
paxangongo, i ukek, "Josep, tel kahi nat
David, kum maamata waxiai axoam Mary.
Tel akaik he tian i pet ti pohe Holi Spirit.
²¹ I hatakaha tel akaik wawan, o axaiwa axan
Jises nake i awai seilon ti kawate saun lialun
ti laha."

²² Hatesol waliko ie i sohot hapoponowi
hawane kakai Haeu masin ti tel seilon ku-
luiak kakaian kakawen, i ukek,

²³ "Tel hehin tenen i tai eng akakati tel na
wawan
i pet akaik ape i hatakaha tel akaik
wawan,
laха axai axan Imanuel.

Tenen kakain Imanuel i ukek, 'Haeu
kapi kaha.' " (Isa 7:14; 8:8, 10)

²⁴ Muhin ti Josep haiwa, i waxi Mary
hanowi ti tel engel ti Haeu kaakane i.

²⁵Tuahe Josep tai eng akati i hani tataen tel akaik takah. Ape Josep axai axan Jises.

2

Tesol soliwa ti angiba

¹Jises takah leili taon Betlehem ti Judia, lokon ti Herod masiwi. Lokon ien, tesol seilon ti sai angiba tahia hani Jerusalem. Lato aneso mumuh ti kohot. ²Ape lato kamea, “Ia tetel akaik i takahale masiwi tapein ti teka Ju? Amite ningahi tehu kohot ti sai angiba i kola takahan ape amite nahima lotuian.”

³Ti tel masiwi Herod hongoa, namilon sihukuk hawane hetekie teka seilon ti Jerusalem. ⁴I tiloi teka masiwi tuah ti hukuminia Haeu ma seilon, ma teka hanauui nauna ti Moses ape i kamei lato, “Tel Krais i takah tetesol ia?”

⁵Lato ukek, “Leili taon Betlehem ti Judia masin ti tel kuluiai kakai Haeu taiwen ukek,

⁶“Betlehem, taon ti Judia,

o kumahe tehu taon tap axan ti Judia
nake o tetesol tel masiwi i po sohot
ti ngahatiai teka seilon tetak ti Is-
rael.” (Mic 5:2; 2 Sam
5:2)

⁷Ape Herod tiloi tesol soliwa ti angiba. I kamei hakokol lato lokon wanen ti tehu kohot sohot. ⁸Ape i talo lato hani Betlehem i ukek, “Amuto nahiwa ape puas nihehi upia aluini hawanewa tel akaik. Na amuto tunahi, hahongo aliakema nga lehe tin nga nahihi lotui i.”

⁹Muhi kakai Herod ape lato nahihi. Ti lato luluanwiwa, tehu kohot i sohot alia ape i to neneiniwa aweisalulato hani tataen tesol tel akaik takah. ¹⁰Ti lato ningahiwa tehu kohot pate lato amuam hawane. ¹¹Ti lato soh haniwa leili ing, lato ningahi tel akaik ma tel tinan Mary. Lato lokuha lotui tel akaik. Lato heiwa kakulato ape axi i waliko tuah: gol, sanda ma mer, paura tenen poun pate solian. ¹²Ti leili paxangoalato Haeu hahongo lato ukek, “Kum alia hahani kapi Herod.” Ape lato non aweisal liiai alia hani xuxulato.

Josep oxake lato hani texux xux Igip

¹³Muhin ti tesol soliwa aliawa, Josep i paxangong. Leili paxangoan tel engel ti Haeu hone i ukek, “Xahatawal! Waxiwa tel akaik ma tel tinan ape ox haniwa Igip nake Herod i upiup tel akaik lehe i telei. Amuto toa ien atengi tataen na nga hahongo aliakewa amuto.” ¹⁴Josep xahat waxi

tel akaik ma tel tinan ti ipong tutuen ape lato ox hani Igip. ¹⁵Lato to ien atengi tataen Herod mat. Waliko ien i sohot hapoponowi hawane waliko ti Haeu kaxiwen leili pepai tel kuluiai kakaian i ukek, “Nga tiloi ahutu tel Natuk ti Igip.” (Hos 11:1)

Laha telei teka akaik

¹⁶Ti Herod tioiwa ka tesol soliwa ti angiba pisiwen i, lon lialu hawane. I hani kakain ahian ti teleiai hatesol akaik wawan ti Betlehem ma xux ti xohixohin, akaik ti ahangun huohu hanima itan. I usima menge tesol soliwa ti angiba ka lato ningah tehu kohot ahang huohu tamusuen. ¹⁷I sohot hapoponowi hawane waliko ti tel kuluiai kakai Haeu, Jeremaia ukek,

¹⁸“Tangitangi lapal ma kinax ti tatahan

i sohot ti tehu taon Rama.

Rakel i tangixi tesol natun.

I watakai laha hasoli i nake tesol natun mat hatapoen.” (Jer 31:15)

Aliaialato ti Igip

¹⁹Muhi matei Herod, tel engel ti Haeu sohot hani Josep ti leili paxangoan lokon ti i Igip. ²⁰I ukek, “Xahatawa, waxiwa tel akaik ma tel tinan ape alia haniwa xux ti Israel pake teka lehe leha telei tel akaik ape laha matewen.”

²¹Josep xahat waxi tel akaik ma tel tinan ape lato alia hani Israel. ²²Tuahe ti Josep hongoa Akilaus kewen totone tel taman Herod masiwi ti Judia, i mamata na i sosoa. Haeu hone ulea i leili paxangoan ka sos haniwa Galili texux xux leili Israel. ²³Ape Josep aile tonalato tewau toan Nasaret. I haponowia hawane kakai tesol kuluiai kakai Haeu, lato ukek, “Laha axai i Nasarin.”

3

Jon Baptis apeseni aweisali tel Masiwi
Mk 1:1-8; Lk 3:1-17

¹Hina ahang tamusua Jon Baptis i hutui ahutiai kakai Haeu ti i nahihi hahaniwa he lohong ti Judia. ²I ukek, “Towiahua ti saun lialun ti amuto nake nenein ti Haeu i xohiwen!” ³Jon se tetel seilon Aisaia kakak imat, i ukek,

“Tel seilon i titilol he lohong,

‘Towiahua ti lialui woumuto

lehe tel Masiwi neini amuto taen i tahiamal’” (Isa 40:3)

⁴Jon, sonos ma puxuaun uli kamel, teik tahan tin tuahe uli manihuh a anan kukanualel ma xuni awe nini. ⁵Seilon ti laha

nahih hani kapin, teka ti Jerusalem, ti hatehu Judia ma kakalini toan ti xohixohin kan Jodan. ⁶Laha kaxi ahuti lialui woulaha ape i baptaisi laha leili tehu kan Jodan.

⁷Tataen ti Jon ningahiwa kilai teka Parisi ma teka Sadusi nahih hahanima kapin ti ukei baptaisi, i kakane lato ukek, “Amuto seilon tenen lehomoto huoka! Aita hone amuto ka amuto salia uke ti kaui kawatan ti Haeu hani amuto? ⁸Ailewa saun tenen ti i kola ka amuto lioiwen saun lialun. ⁹Kum ukek amuto salia uke ti kaui kawatan nake amuto nakuama ti Abraham. Nga kakane amuto, Haeu pon kolitiniwa tesol pot ie hani kahi natu Abraham! ¹⁰Haeu apesenewen tea ngolapung. Pata tenen i kum hua alua, i koti hamahuwu ape i towi lui hani leili ah.

¹¹“Nga baptaisi teka seilon ani kan ti kolaian ka laha lioiwen saun lialun tuuhe Jises Krais, tel i sohotuma muhik, i hani laha Holi Spirit ti kapititalaha. Jises pamu masiwan tetak, masiwanian ala i kum pon nga unauan. ¹²I hiniti seilon masin tel na i hapuasa nuhinuh ti i selai api ti penun. I apuhini api wanen ape i lui xoini penun. Tin masin Jises i towi xoini teka seilon lialun hani leili tehot ah tap tahi pehoan.”

Jon baptaisi Jises

Mk 1:9-11; Lk 3:21-22

¹³Lokon ien Jises nahih ti Galili hani kapi Jon ti ukei baptais he kan Jodan. ¹⁴Tuahe Jon towiahuh lali namilon. I ukek, “Lehe nga baptaisi o? Ala o baptaisi nga.”

¹⁵Jises hone i, “Tilimuen masin ie. Kalu tua aile usi waliko ti namili Haeu.” Ape Jon sowini.

¹⁶Muhin ti Jises baptais kewa, i xahele. Maun i hea ape i ningahi Spirit ti Haeu mos hani kapin hanowi tok pux. ¹⁷Tataen ien teik kakain ahuma ti tone Haeu, “Le se tel Natuk wanen nga waheni, nga amuke hawane i.”

Satan tohongi Jises

Mk 1:12-13; Lk 4:1-13

¹Muhin Holi Spirit kapiti Jises hani he lohong lehe Satan tohongi haputaian. ²Jises tai angiang leili 40 ngaini ma ipong ape pate i hitol. ³Satan nahih hani kapin ape i ukek, “Na o tel Nati Haeu, kolitiniwa tesol pot ie haniwa bret.”

⁴Jises pahoi i, “Leili pepai Haeu i kak ukek,

“Seilon ala i hana hatapo namilon hani kakai Haeu kumahe an.”” (Deut 8:3)

⁵Muhin Satan hakahita Jises hani Jerusalem ape hatuhi i he teik tumi Ingj Haeu patul wanen. ⁶Ape Satan kakane i, “Na masin salan o tel Nati Haeu, tautit haniwa itan. Ti leili pepai Haeu i kak ukek, “Haeu talo tesol engelaun tengeni awaiam he minalato

lehe kalak taen aem pot kum hamange.””

(Ps 91:11-12)

⁷Jises hone i, “Leili pepai Haeu tin i kak ukek, ‘Kum totohongi Haeu tel Masiwi.’” (Deut 6:16)

⁸Satan hakahita ulei Jises hani tehu maunten patul wanen ape kola hani i hatesol xux ma soliai waliko ti tehu pon itan ie. ⁹Satan hone Jises, “Hatesol waliko ie nga hani tetam na o lokuha lotui nga.”

¹⁰Jises kak pahoi i, “Nahih xaxaua Satan! Teik pepai Haeu i kak ukek, “Lotuwi mewenae Haeu tel Masiwi ma ailewa mewenae puasan.”” (Deut 6:13)

¹¹Ape Satan nahih salili Jises. Teka engel ti Haeu tahia hani kapi Jises ape lato ngahati i.

Jises hutui puasan leili Galili

Mk 1:14-15; Lk 4:14-15; Jn 4:43-45

¹²Ti Jises hongoa ka Jon kalabusawen, i nahih alia hani texux xux Galili. ¹³I salili Nasaret ape aile tonan Kapenaum, tehu taon xohixohin ti kanitax Galili ma xuxi teka Sebulun ma Naphtali. ¹⁴Waliko ie sohot haponowiai kakai Aisaia, masin ti i kakawen,

¹⁵⁻¹⁶“Teka seilon ti xux ti Sebulun ma Naphtali, xux ti pahoiwa kanitax Galili, pape kan Jodan, tewaok ti Galili ti teka kumahe Ju tottonai,

laha toto he tilokoan ti saun lialun tuahe laha po tunahi lalape xewai Haeu.

Laha toto he tilokoan ti matemate tuahe xewai Haeu po haxewa laha.” (Isa 9:1-2)

¹⁷Lokon ien Jises hutui pupuasan ti sawateniai kakai Haeu i ukek, “Amuto towiahuh ti lialui woumuto nake xohiwen ti Haeu neini hatesol seilon.”

Jises tike waxaini seilon hani kahikahin

Mk 1:16-20

¹⁸Ti Jises tau nanahih pape kanitax Galili, i ningahi hua seilon ti tikei xixi, Saimon Pita ma tel ukalan Andru. Lalu totowi upen puliai xixi. ¹⁹Jises hone lalu, "Kahitima nga lehe nga hanau amulu tike waxainiai seilon hani kahikahik." ²⁰Kakanua lalu hana lioi upen ape kahiti i.

²¹Jises nahih ahewa ape i ningahi hahutalin liai, Jeims ma Jon, nati Sebedi. Lalu he tea koap kapi tel tamalalu apepeseni upenaulato. Ape Jises tiloi lalu. ²²Ape salan, lalu nahih salili tea koap ma tel tamalalu ape kahiti i.

Jises kakaxi meng solian ti Haeu ma i haewia teka tinun

Mk 1:35-39; Lk 4:42-44

²³Jises nahih hani tesol tesol ti Galili hahanau teka seilon leili synagog, ing ti apuhai teka Ju. I kakaxi meng solian ti Haeu neini seilon ape i aile hasolia teka hina nax tenen tenen. ²⁴Menge waliko ti i ailele i sawat kakalini hatexux xux ti Siria. Ape teka seilon atoheni hani i hatesol teka tinun, teka hina moloan lalap, seilon teka spirit lialun kapiti hahalialu, teka lawe laha put xexex ma teka laha kum nahih uke. Jises aile haewia laha. ²⁵Kilan wanen seilon kakahiti i, teka ti Galili, seilon ti huopanim taon axan Dekapolis, Jerusalem, Judia ma teka ti liai tepaun ti tehu kan Jodan.

5

Jises hanau teka seilon he tehu maunten

Lk 6:17-26

¹Jises ningahiwa mongohe teka seilon ape i nahih hani he maunten. Teka kahikahin nahih to apuhu hani kapin. ²Ape i hutui hanau lato saun ti soliai Haeu, i ukek,

³"Haeu aile hasolia hani teka pahalahwa wan-

nen

i neini ma ngahati laha.

⁴Haeu aile hasolia hani teka laha toto ti tatahan.

I hasoli laha.

⁵Haeu aile hasolia hani teka laha tap namil ti halepelep.

I aile laha tame tehu pon ie.

⁶Haeu aile hasolia hani teka pahalahwa wan-

nen usiai

nauna tetan.

Laha pono ti waliko tenen solian.

⁷Haeu aile hasolia hani teka laha hina tatahan ti seilon liai.

I tin hina tatahan ti laha.

⁸Haeu aile hasolia hani teka laha hani hatapo namilolaha

ailei pupuasan. Imuh laha ningahi i.

⁹Haeu aile hasolia hani teka laha pupuas ti hasoliai wasole seilon. I axai laha natun wanen.

¹⁰Haeu aile hasolia hani teka seilon teteka liai aile halialu nake laha ailele pupuasan. Laha seilon tetan wanen.

¹¹"Haeu aile hasolia hani amuto na seilon kak saxuti axamuto, sului putini amuto ma aile waliko lialun hani amuto nake huak.

¹²Amuamua nake kahumuto solian Haeu apeseniven patul leili tonan. Nameniwa ka teka kuluiai kakai Haeu ti matahaun tin lato kauen kawatan ti teka seilon aile halialu lato.

Kahikahi Jises masin sol ma xewan

Mk 9:49-50; Lk 14:34-35

¹³"Amuto tuah ti hani lawe seilon masin sol ti hanamui an. Tuahne na taxiai sol i tapo, kaha kum hataxia aliake uke. I ape tap solian tetan. Seilon towi xoini ape laha tua nahih tutuhi.

¹⁴"Amuto tuah masin xewan ti kolai aweisali Haeu ti tehu pon itan ie. Amuto masin tehu taon laha atai patul he tehu maunten lehe lawe seilon ningahi. ¹⁵Tap tel i hakama tehu kamaian ape hana hani hahitake salek. Laha hakama ape hakea hani patul koukean lehe i haxewa seilon ti leili ing. ¹⁶Tin masin amuto haxewa haniwa seilon liai lehe laha ningahi saun solian ti amuto ape laha sameni Haeu tel Tamamuto.

Kakain ti sale nauna ti Moses

¹⁷"Amuto kum ukekek ka nga tahiamaxaxaweniai nauna ti Moses ma kakain ti teka kuluiai kakai Haeu kakaxi. Nga tahiamaxaponowiaian lehe seilon xeu kakai Haeu. ¹⁸Nga kakane hawane amuto, ti maun aheah ma pon itan ie tutuen, tap teik kakain ti Haeu haniwen Moses i sohia atengi lawe waliko sohot poponowi hanowi ti Haeu kakawen. ¹⁹Tel na i tahi tuahne teik nauna ti Haeu ape i hanau seilon liai tahan, Haeu namiloi ukek i tel pate naun. A tel na i puas usi ma hanau seilon liai puas usiai nauna ien, Haeu namiloi ukek i tel pate tuah. ²⁰Nga kakane hawane amuto, Haeu hani amuto tonain tuah kapin mewenae na usiai Haeu ti amuto i xoini teka Parisi ma teka hanauai nauna ti Moses.

Kakain ti sale lengelenge

Lk 12:58-59

²¹ “Amuto hongoen nauna ti Moses hani teka seilon ti kuwen i ukek, ‘Tel na i ulini ape i telei seilon i tu ti sulusulu.’ (Exod 20:13)
²² Tuahé nga kakane hawane amuto, tel na i tua lengeini lalolal seilon, i tu ti sulusulu ti puli Haeu. Ape tel na i kak halialu seilon liai i ukek, ‘O tap pupuasam,’ laha sului i hani teka masiwi. Ape tel na i kak halialu seilon liai i ukek, ‘O taxitaxia,’ i kane tehot ah lalap tap tahi pehoan.

²³⁻²⁴ “Na masin ti leili Ingi Haeu lehe o hani i teik na waliko ape o nameni tunahi ka wasolamulu tel seilon o halialuen, hana li-oimua teik akekenam he aweing, ape nahih hasawirumwa wasolamulu tel seilon ien. Na o hasawi kewa, ien, ape o haniwa Haeu teik akekenam.

²⁵ “Na tel i namiloi suluiai tel ti amuto, hasawi koseniwa wasolamulu uke i hatuhu o hani puli tel masiwi ti hongoi meng. Ape i hana o hani mini teka masiwi ti kalabusiam.
²⁶ Na i sohot ukek ien, o kum ahuta atengi o hasawi hatapoa moni. Tin masin amuto hasawiwa wasolamuto ma Haeu uke amuto kau kawatan ti lialui woumuto.

*Kakain ti sale saun lialun ti wawan hehin
Mk 9:43, 45, 47*

²⁷ “Amuto hongoen, ‘Kum ailele saun lialun ti wawan hehin.’ (Exod 20:14) ²⁸ Tuahé nga kakane amuto, tel na i paxai nahaini tel na hehin ape namlion i eliel pahan i eng akati, tel seilon ien i ailewen saun lialun ti wawan hehin leili namlion. ²⁹ Na o hapuasa tepaun pulam manau ti ailei saun lialun, xaxusi xaxaweniwal! Pamu ewian na o lioi teik ti tupuan uke laha towi xoini o hani tesol ti kawatan tap tahi tapoan. ³⁰ Na o hapuasa tepaun minam manau ti ailei saun lialun, koti xaxaweniwal! Pamu ewian na o lioi tepaun minam uke laha towi tupuan hatel hani tesol tonain ti kaui kawatan lian tehue.

*Nauna ti sale lioiai hehin
Mk 10:11-12; Lk 16:18*

³¹ “Tin Moses kakawen, ‘Tel na pahan i lioi tel axoan hehin, i tai hahongoa tel hehin sale lilioaialalu.’ (Deut 24:1) ³² Tuahé nga kakane amuto, tel seilon i tapai lioiai tel axoan hehin mewenae na tel hehin eng akati tel seilon liai. Na i lioi tel axoan ti hui waliko liai, i aile haputa tel axoan ti ailei saun lialun ti wawan hehin. Tin i aile haputa hetekie tel wawan ti i uke tetel hehin mahe axoan.

Kakain ti sale tuohain

³³ “Tin amuto hongoen, ‘Kum xaxaputi kakain ti na o tuoha haniwen Haeu.’ (Num 30:2) ³⁴ Tuahé ape nga hone amuto, kum tutuoha ukek kuinakei tone Haeu nake se tone tel Masiwi Haeu. ³⁵ Kum tutuoha ukek kuinakei tehu pon itan ie nake i ti Haeu. Kum tutuoha ukek kuinakei Jerusalem nake se taon ti Haeu. ³⁶ Kum tutuoha ukek kuinakei patum nake o kum pon aile hapolui ma hapaxaxui tok na uk. ³⁷ Na o tuoha, tua kakawa ‘se’ ma na ‘kumahe.’ Na o kak hakila kuinake ti tutuoh tetam, i ahuma ti Satan.

*Kum he kahukah saun lialun
Lk 6:29-30*

³⁸ “Imat amuto hongoen, ‘Na tel seilon i xaxusi teapaun pulam, o xaxusi aliakewa teapaun pulan. Na tel taputui hataxuxu nisum, o taputui hataxuxu aliakewa nisun.’ (Exod 21:24) ³⁹ Tuahé nga hone amuto, kum kahui aliliak waliko lialun ti seilon liai aile hani amuto. Na tel seilon aile hani amuto saun tenen pate hahien, kum aile kahui aliliak. Tiliwen i aile tuhi ulea. ⁴⁰ Na tel lehe i sului amuto ape waxi lungei tehu puxuaumuto, hani palahiwa i tehu liai. ⁴¹ Na tel i hone lungei amuto kaua teik kokol tehu kakun, amuto kau haxau ahekewa teik. ⁴² Na tel katei amuto teik na soxi, haniwa i. Na tel seilon pahan i hapuasa teik na soxi amuto, haniwa i hapuasa.

*Waheniwa teka laha pahoxai o
Lk 6:27-36*

⁴³ “Imat amuto hongoen, ‘Waheniwa teka lohumuto ma tumuiwa teka na lialun ti amuto.’ (Lev 19:18) ⁴⁴ Tuahé nga hone amuto, waheniwa teka laha pahoxai amuto. Lotu hualiwa teka laha halialu amuto. ⁴⁵ Na amuto aile ukek ien, amuto sohot hawane nat i Tel Tamamuto Haeu. Waheniwa hatesol seilon tekewe nake Haeu hani alon haxewai ati seilon solian ma lialun. Ape i hauxa akah hani seilon teka sawisawin ma teka weli ailei saun lialun. ⁴⁶ Haeu kum kahui hasolia amuto na masin amuto waheni mewenae teka laha waheni amuto. Kalak taen teka seilon waxiai moni hani teka masiwi ti Rom, lato waheni mewenae teka laha waheni lato. ⁴⁷ Na amuto kakak mewenae kapi teka lawamuto, kalahai lehe Haeu kahui hasolia amuto? Kalak taen teka laha kum tioi Haeu laha ailele saun tenen ien. ⁴⁸ Amuto kewa seilon sawisawin wanen hanowi ti tel Tamamuto Haeu i sawisawin wanen.

6

Sale hualiai teka tap soxi

¹ “Na amuto aile puasain solian, lepe-teniwa, kum ailele ti lehe laha sameni amuto. Na amuto aile kola lehe lawe seilon sameni, amuto kum uke kahumuto ti tel Tamamuto Haeu. ² Na masin amuto huali tel seilon, amuto kum aile kokola hanowi teka seilon leholaha huoka, laha ailele leili synagog ma he puli lawe seilon. Laha aile lehe teka seilon haxawa axalaha. Nga hone amuto, laha uke hatapoen kahulaha. ³ Na masin amuto huali tel seilon, amuto kum kakaxi hani tel na seilon kalak i lohumuto solian. ⁴ Na masin amuto huali tel seilon a teka liai kum tioi, tel Tamamuto Haeu lawe i ningahi ape i kahui amuto.

Jises hanau sale lotu

Mk 11:25; Lk 11:1-4

⁵ “Na amuto lotu, amuto kum aile hanowi teka seilon leholaha huoka. Pa-halahala lawe laha lotu ti leili synagog ma ti he puli lawe seilon lehe lawe seilon ningahi laha. Nga hone amuto, laha uke hatapoen kahulaha. ⁶ Na masin amuto lotu, soh haniwa leili ing, keitiwa aweing ape lotu haniwa tel Tamamuto Haeu. Kalak amuto kum ningahi i, tel Tamamuto lawe i ningahi waliko likihan ti amuto ailele ape i kahui amuto. ⁷ Na amuto lotu, kum aile hakakila kakain tenen i tua lalolal, hanowi ti teka seilon laha kum tioi Haeu. Laha sokok Haeu hong laha nake lotu ti laha pate weluwelen. ⁸ Amuto kum hahanowi ti laha. Tel Tamamuto hoi liai i tioiwen waliko tenen amuto tae, imat ti amuto kamea.

⁹ “Na amuto lotu, amuto kak kewak:

“Tel Tamamite Haeu,
amite sameni o nake o pate tuah wanen.

¹⁰ Pahamite o neiniwa ma ngahatiwa amite.
Hualima amite usiam hanowi tetesol
lato kapim
leili tonam.

¹¹ Axima amite an tapai ti ngain tehu tehu.

¹² Ooxiwa amite ti kawatan ti lialu woumite,
masin ti amite oxoxi seilon liai ti
kawatan
ti waliko lialun laha aile hani amite.

¹³ O kum hahani amite totohong ailan
lehe amite kum aile saun lialun.

Ape awaiwa amite ti Satan
ma teka spirit lialun tetan.”

¹⁴ “Na masin amuto oxoxi seilon liai ti
kawatan ti waliko lialun laha aile hani

amuto, tel Tamamuto Haeu tin i oxoxi amuto ti kawatan ti lialui woumuto.

¹⁵ Tuahne na amuto kum oxoxi seilon liai ti kawatan ti waliko lialun laha aile hani amuto, tel Tamamuto tin i kum oxoxi amuto ti kawatan ti waliko lialun amuto aislewen.

Jises hanau sale haliniae an

¹⁶ “Ti amuto halini an hualiai lotu ti amuto hani Haeu, kum aile kokola he kawamuto, hanowi ti teka seilon leholaha huoka lawe to ailele. Laha aile kola lehe hatesol seilon tioi ka laha hahalini an. Nga hone amuto, laha uke hatapoen kahulaha.

¹⁷ Tuahne na amuto halini an, nuihiwa kawamuto ma hexiwa ukumuto. ¹⁸ Amuto aile kewak ien lehe laha kum tioi ka amuto hahalini an. Pake tel Tamamuto Haeu, amuto kum niningahi, i tioi. Lawe i ningahi waliko likihan ti amuto ailele ape i kahui amuto.

Sale apuhiniae soxi

Lk 12:33-34

¹⁹ “Amuto kum apuhini hahakila waliko solian tenen tenen ti itan ie. I aneso lialu ma teka seilon ti xuxuina waxi. ²⁰ Hani hatapoa kuimuto ma namilomuto haniwa Haeu. Ie masin ka amuto apepeseni kahumuto ti tonan. Tesol ien tap tahi lialuan ma tap teka xuxuina. ²¹ Namilomuto toi waliko tuah ti amuto. Aile ape kewa Haeu kapitiae namilomuto.

Namili seilon masin tehu kamaian

Lk 11:34-36

²² “Namilomuto masin tehu kamaiamuto. Aile ape na namilomuto solian, amuto xuhai xewan ti saun solian. ²³ Tuahne na namilomuto lialun, amuto xuhai tilokoan ti saun lialun. Ien masin ka kamaiamuto i peh ape amuto leili lalape tilokoan.

O kum puas uke hahitake masiwi hua

Lk 16:13

²⁴ “Amuto kum puas uke hahitake masiwi hua, uke amuto waheni tel ape amuto watakai tel, amuto hong kakai tel ape kum hong tel. Amuto kum aile uke puase Haeu na masin namilomuto tin xoxoan ti ngahoi moni.

Kum hahakila namil

Lk 12:22-31

²⁵ “Nga hone amuto, kum namiloi hahakila an, unumamuto ma sosomuto. Sale totonamuto seilon pamu tuah ti an a tupuamuto pamu tuah ti maia. ²⁶ Paxaiwa manixux, laha kum seseini ma apupuhini an a tel Tamamuto Haeu ngangahati laha!

Nga kakane hawane amuto ka Haeu namilo i ukek amuto pamu tuah ti manixux.²⁷ Kaie amuto pon hawelu ahekei tuahe na teik totonamuto ti amuto to nanamilo?

²⁸“Ape kalahai amuto to nanamilo mai? Paxaiwa sale xexei palawa. Laha malang puas sawitiae maia sosolaha!²⁹ Tuahé nga hone amuto, kakal taen tel masiwi Solomon, sosen, maia ma hatesol soliae waliko tetan, i kum pon soliae palawa.³⁰ Haeu tel i ngangahati pahoah, i ie tetelao ape letu laha lui xoini. Kaie kumahe pamu i ngahati aluluini amuto? Amuto tap namil xoxoan ti Haeu.

³¹“Ape amuto kum namilo i ukekek, ‘Kaie anak, unumak ma sosok nga kema ia?’

³²Tesol waliko ien, teka laha kum tioi Haeu to namilo i hahakila. Tel Tamamuto Haeu tioi waliko ti amuto tap.³³Haniwa i neini amuto ape ailewa waliko tenen i hamau-mua i. Ape i hani amuto hatesol waliko ien.³⁴Kum namilo hahakila waliko ti na i sohot letu. Waliko ti letu, tiliwen ti letu. Amuto kum huhukumini kawatan ti ngain tehu tehu.

7

*Kum kak hahalialu woi seilon liai
Lk 6:37-42*

¹“Kum kak hahalialu woi seilon liai lehe Haeu kum lengeini amuto.² Haeu nam kolongeni woumuto hanowi na amuto nam kolongeni woi teka liai. Ape i aile hani amuto waliko tenen na amuto aile hani teka liai.

³“Kum hahanowi teka laha kak halialu woi seilon liai a laha kum paxai tioi puki lialui woulaha. Laha masin teka seilon laha ningahi teik masiap kokol he puli tel seilon liai a laha kum paxai tioi teik masiap lalap he puki pulalaha.⁴Lehe amuto hone ukek ia tel seilon liai, ‘Hanimä nga xaxaweni teik masiap kokol he pulam’ na masin puki amuto teik masiap lalap he pulamuto?⁵ Seilon tenen lehomuto huoka! Amuto xaxawenimua teik masiap lalap he pulamuto ape muhin ien amuto paxapax alua ti xaxaweniai teik masiap kokol he puli tel seilon liai.

⁶“Kum kaxi hahanau kakai Haeu hani teka laha watakai hawane i. Laha aile hanowi ti sinen ma pou. Na amuto towi hani lato waliko tenen tuah, lato tuhi pexi halialu ape lato towiahu atalahi amuto. Tin masin teka laha watakai hawane Haeu, laha

hil pahoi aliake amuto ape laha kak halialu kakai Haeu.

*Kamei talingoowa Haeu
Lk 11:9-13*

⁷“Amuto kamei talingoowa ape Haeu hani amuto waliko ti amuto kakamea. Upia talingoowa ape Haeu huali amuto tunahian. Kikini talingoowa kahip ape Haeu hei hani amuto.⁸Teka na laha kamea, Haeu hani laha. Tel na i upia, Haeu huali i tunahian. Teka na laha kikini talingo kahip, Haeu hei hani laha.

⁹“Na natumuto kamea an, kaie amuto hani i pot?¹⁰ Na natumuto kamea xixi, amuto hani i weiko?¹¹ Kalak woumuto lialun, amuto tioi haniai waliko solian hani natumuto. Tuahé Haeu tel Tamamuto i hani amuto pamu kilaian ti na amuto kamei i.

¹²“Aile haniwa seilon liai saun tenen pa-hamuto laha aile haniwa amuto. Tenen saun ien i salangawe nauna ti Moses ma teka kuluiai kakai Haeu.

*Aweisal omiomin ma mamanahan
Lk 13:24-25*

¹³“Nahih usiwa tewau aweisal omiomin kane tesol tonain kapi Haeu ti tap tahi tapoan. Tewau aweisal hani tesol ti kawatan tap tahi tapoan i mamanahan ma pate malimum ape pate kilan seilon nanahih ien.¹⁴ Ape tewau aweisal kane tesol tonain kapi Haeu ti tap tahi tapoan, i se omiomin a pate ailan ma pate palai seilon tunahian.

*Tea pata ma huan
Lk 6:43-45*

¹⁵“Amuto kanipetiwa teka seilon laha woinakon kuluiai kakai Haeu. Paxaialahi ti melal masin sipsip tuahé ti leilon laha masin sinen tenen tumun pate kalimen.

¹⁶Amuto paxai tioi laha ti sale pupuasalaha. Au i kum hahuama huai laku ape sawaul i kum hahuama huai ul.¹⁷Pata xexean solian, huan solian a pata xexean lialun, huan lialun.¹⁸Pata tenen xexean solian, huan kumahe lialun ape pata xexean lialun, huan kumahe solian.¹⁹Tenen pata na i kum hua alua, laha koti hamahusu ape lui xaxaweni.²⁰Aile ape amuto tioi teka seilon woinakon kuluiai kakai Haeu na amuto paxai ani pupuasalaha.

*Teka woinakon kahikahi Jises
Lk 6:46*

²¹“Teka laha axai nga Masiwi, kumahe hatesol soh hani tesol tone Haeu ti neiniae

lawe seilon, mewenae teka na laha puas usi waliko ti tel Tamak Haeu pahan.²² Tehu ngain tapeinan ti Haeu hiniti seilon, kilan teka laha kum puas usi kakai Haeu laha hone nga ukek, ‘Tel Masiwi, hahitake axam amite kului kakai Haeu, amite usi xaxaweni spirit lialun ma aile kilan waliko lalap ti i kola pohem.’²³ Ape nga kakane laha, ‘Nga kum tioi amuto. Xaxaua tetak amuto seilon lialun!'

Puas usiai kakai Jises

Lk 6:47-49

²⁴ “Na amuto hong kakaiak ape puas usi, amuto masin seilon tenen hina namilon. I atai tehu ingan he hepekeun ailan.²⁵ Akah lalap uxalih, weu lalap hutomile, aupol kuin taheilih tehu ingan tuahe i tai put manan nake i hahatuhu he hepekeun ailan.²⁶ Tuahe na amuto hong kakaiak a kum puas usi, amuto masin seilon tenen tap namilon. I atai ingan he hepekeun wakiakin.²⁷ Akah lalap uxalih, weu lalap hutomile, aupol kuin taheilih tehu ingan ape i manan. Malehe ape lialui mananaian!”

²⁸ Taen Jises kak hatapoaa, teka laha apupuha laha hong ong amuke hawane sale kakaian.²⁹ I kumahe masin teka hanau nauna ti Moses, kakaian masin ka i tel pamu masiwian ti lato.

8

*Jises haewia tel seilon naxe tinun hakaliap*i**

Mk 1:40-45; Lk 5:12-16

¹ Muhiin ti Jises hanau kewa teka seilon, i mos alalih he maunten ape kilan wanen seilon nahih kahiti i.² Tel seilon hina nax lialun he tinun nahih hani kapin, i lokuha mateiwaun ape i ukek, “Tel Masiwi, na o waheni, xaxaweniwa naxe tinuk lehe nga hau alia.”

³ Jises tulini aka soti tel seilon. I ukek, “Nga waheni. Ewiwa ma haua!” Ti i kakawa tel seilon ewi huluta.⁴ Ape Jises hone i, “Kum kaxi hahani teka seilon liai. Nahih sawi haniwa kapi tel masiwi ti hukuminiai Haeu ma seilon lehe i Paxai kalisi tinun. Kau hetekiewa huok manixux ti haniai Haeu masin ti Moses kakawen. Ien kola haniai teka seilon ka o ewiwen ape pon o hukuma hani kapi laha.”

Jises haewia tel unaui tel masiwi ti hile ti Rom

Lk 7:1-10

⁵ Ti Jises tahia haniwa Kapenaum, tel masiwi ti hile ti Rom kamei i huhual.⁶ I ukek, “Tel masiwi, tel unauk pate tinun engeeng leili ing, tupuan maten ma pate i lamani tinun.”

⁷ Jises ukek, “Nga nahima aile haewiaian,”

⁸ Tel seilon pahoi ukek, “Oie tel masiwi, kumahe. O pate masiwi kasia ti na o nahih hanima leili ingak. O tua kakawa ape tel unauk i ewi.⁹ Nga tin hina seilon pamu masiwian tetak ma tin hina seilon ti hile hahitak. Na nga hone tel, ‘Nahima,’ i nahih. Na nga hone tel, ‘Nahima,’ i nahima. Ape na nga talo tel unauk, ‘Ailewa tetenen,’ i aile.”

¹⁰ Ti Jises honga, pate i ongake ape i hone teka seilon kakahiti i, “Nga kakane amuto, ti leili Israel nga tai tutunah tel seilon i hina namil xoxoan tetak masin tel seilon ti Rom ie.¹¹ Nga kakane hawane amuto, ngain telao ti Haeu hiniti hatesol seilon, kilan laha ahuma xux tesol tesol ape to kapi Abraham, Aisak ma Jekop ti tehu angain lalap Haeu apepeseni leili tonan.¹² Tuahe teteka seilon ala ti Haeu, teka ien Haeu towi xoini hani he tilokoan. Laha tang lialu ma atalahi hamekimeki nisulaha nake moloan lalap tap tahi tapoan.”

¹³ Ape Jises hone tel masiwi ti teka seilon ti hile, “Nahih haniwa ingam. Nake o soh ka nga pon haewia tel unaum, i sohot.” Tataen ien wanen tel unauan ewi huluta.

Jises haewia kilan seilon

Mk 1:29-34; Lk 4:38-41

¹⁴ Jises nahih hani leili ingi Pita ape i paxai tunahi tel hehin ihai Pita tinun engeeng he sau. Lul tunahi i.¹⁵ Ti Jises aka sotiwa minan, tinun ewi. Ape se i xahat apeseni ani Jises.

¹⁶ Ti ape alohah, teka seilon hakahita hani Jises kilan seilon ti spirit lialun kapiti hahalialu. Kakain tehue Jises xaxaweni hatapo teka spirit lialun ape i haewia hatesol seilon tinun.¹⁷ Waliko ien i haponowi hawane waliko ti Aisaia tel kuluai kakai Haeu kak kilamiwen,
“I xaxaweni nax tenen tenen ti kaha.” (Isa 53:4)

Sale kahitiae Jises

Lk 9:51-62

¹⁸ Ti Jises ningahiya kilai teka seilon kapin, i hone tesol kahikahin lang haniai sai liai teapaun ti kanitax Galili.¹⁹ Tel seilon ti hanau nauna ti Moses, i nahih hani kapin

ape i ukek, "Tel masiwi, tesol tesol na o nahih, nga kahiti o. Nga lawe kahikahim."

²⁰ Tuahé Jises pahoi i ukek, "Sinen hina walun, manixux hina ingan a nga, tel Nati Seilon, tap tuahé tesol na tone hanawaiak."

²¹ Tel seilon liai, tel ti kahikahin, hone i ukek, "Tel masiwi, nga aunimu tel tamak atengi tataen i matewa ape nga tihini."

²² Tuahé Jises pahoi i ukek, "O kahitima nga. Teka seilon kumahe ti Haeu laha masin seilon maten. Tiliwen teka ien ti-hiniai teka maten."

*Jises hamonga tehu ahon lalap
Mk 4:35-41; Lk 8:22-25*

²³ Jises ku haniwa he tea koap ape tesol kahikahin kuoxi i. ²⁴ Tai kue, ahon lalap tunahi lato. Laman i hutomi tea koap. A Jises i mamatih. ²⁵ Tesol kahikahin hangoni i. Lato ukek, "Tel Masiwi, hualowi kako uke kako taxix mat!"

²⁶ Jises ukek, "Alahan ka pate amuto mama? Nakon amuto tap namil xoxoan ti Haeu?" I xahatawa ape i kakane aupol ma laman, "Mongawal!" Ape i tuxi.

²⁷ Tesol kahikahin pate lato tataxini, "Seilon lahan tetenen? Taen aupol ma kanitax hong usi kakaian!"

Jises haewia hua seilon spirit lialun kapiti hahaliulu

Mk 5:1-20; Lk 8:26-29

²⁸ Jises kolia hani pape kanitax Galili sai liai tepaun, hepekeun ti Gadara. Hua seilon lalu sohotuma he amal ti ien nahih pa-hoima i. Spirit lialun kapiti halialu lalu ape lalu se lengean wanen. Aile ape tap tel seilon nanahih tewau aweisal ien. ²⁹ Ti lalu ningahiwa Jises, tesol spirit lialun leilolalu ausini, "Tel Nati Haeu, o paham waliko la ti amite? O nanahima ti aile halialuamite? I tai meiwa ngainat ti Haeu kikilami."

³⁰ Xohixohin ien, kilan pou exiex. ³¹ Tesol spirit lialun kamei eliel Jises, "Na masin o usi ahuti amite, talo haniwa amite leili tesol pou."

³² Salan, Jises hone lato, "Amuto nahiwa!" Ape lato ahuta soh hani leili tesol pou. Hatesol pou ien kiliwau mosua ti he sahikekean tamus hani itax ape lato waut mat. ³³ Tesol ngahatiai pou, lato mamata kiliwau hani taon ape kaxi sawateni waliko ti i sosohot. Tin lato kaxi hetekie waliko ti i sohot hani huhua seilon spirit lialun kapiti halialu lalu. ³⁴ Ape kilan wanen seilon ti tehu taon ien, laha nahih upiai Jises. Ti laha

tunahiwa, laha kamei eliel i ti nahih salilai hepekeunaulaha.

9

*Jises haewia tel seilon tupuan maten
Mk 2:1-12; Lk 5:17-26*

¹ Jises ku haniwa he tea koap ape i luaini kotoiwa kanitax Galili hani tehu taon tonan.

² Teka seilon kau hani i tel seilon tupuan maten engeeng he sau. Ti Jises ningahiwa xoxoi namilolaha, i hone tel tinun, "Tu xoxoa tel natuk! Nga oxoxi o ti kawatan ti lialui woum."

³ Ape tesol hanaui nauna ti Moses kakak alia puki lato, "Tel seilon ie kak hanowii ka i Haeu. Mewenae Haeu pon oxoxiai seilon ti kawatan ti lialui woulaha."

⁴ Jises tioi namilolato ape i ukek, "Alahan namilomuto lialun? ⁵ Tetenen ia pamu malimuman? Nakon pamu malimuman na nga hone tel seilon tupuan maten, 'Xahatawa ape nahiwa,' ka 'Nga oxoxi o ti kawatan ti lialui woum?' Ti ailei hahuonen, mewenae seilon ti hina pohe Haeu i pon ailean. 'Nga aile kola lehe amuto tioi ka nga, tel Nati Seilon, he tehu pon ie nga hina poh oxoxiai seilon ti kawatan ti saun lialun ti laha.' Ape i hone tel seilon tupuan maten, 'Xahatawa, waxiwa enepam ape nahih haniwa tonam.'

⁶ I xahat ape i nahih hani ingan. ⁷ Ti teka seilon paxaiwa, laha ong mamata hawane ape laha sameni Haeu nake i axi poh tenen masin ien hani seilon.

*Matiu sohot kahikahi Jises
Mk 2:13-17; Lk 5:27-32*

⁸ Jises nahih salili tesol ien. Ti i nanahiwa, i ningahi tel seilon axan Matiu toto tesol tone puasan. Pupuasan waxiai moni ti teka Ju hani teka masiwi ti Rom. Jises hone i, "Kahitima nga. Pahak o kahikahik." Matiu tule ape kahiti i.

⁹ Ti Jises to angiang leili tehu ingi Matiu, kilan teka waxiai moni ma teka weli ailei saun lialun nahima to akati Jises ma tesol kahikahin. ¹⁰ Teka Parisi paxaiwa ape laha kamei tesol kahikahin, "Kalahai Jises to ang kapi seilon tetenen?"

¹¹ Jises hong lato kakak ape i ukek, "Dokta kum puasake seilon huliwi, mewenae teka tinun. ¹² Nahiwa ape paxai tioiwa waliko ti Haeu kakaxi leili pepaun i ukek, 'Nga pahak amuto hina tatahan ti seilon liai, kumahe pahak amuto telei axi nga mani-huh.' ¹³ (Hos 6:6) Kumahe ka nga he tehu pon ie upiai kahikahik seilon tenen laha

sokok laha sawisawin. Nga tahiama upiai kahikahik seilon tenen laha tioi woulaha lialun."

*Nauna wasan ma nauna haun kum he paho
Mk 2:18-22; Lk 5:33-39*

¹⁴ Imuh tesol kahikahi Jon Baptis nahih hani kapi Jises ape kamei i, "Nakon lahan teka kahikahim kum halini an ti hualiae lotu ti lato hanowi ti amite ma teka Parisi?"

¹⁵ Jises kak pahoi lato, "Taen tel seilon i sal i kapi tesol seilon ti laha ilowima ti salasala, kaie lato to ti tatahan ape kum ang? Kumahel! Lato ang amuam kapin. Tuahen ngain tehu i luluainima ti laha waxi tel seilon i sal ti lato ape tataen ien lato halini an.

¹⁶ "Tap tel ukeke teik maia haun pax-atawaiat teik maia wasan. Na i aile ukek ien, teteik hauni i lexi teik wasan ape wawan i lap ahe. ¹⁷ Seilon kum lohi hahakila patula wel hani tehu po wasan nake na i lauti, tehu po i watat ape patula tapulol. Pamu ewian na i lohi hani he tehu po haun lehe ati lalu kum lialu."

*Tel akaik hehin maten ma tel hehin tinun
Mk 5:21-43; Lk 8:40-56*

¹⁸ Ti Jises kaakane lato, tel ti tesol masiwi ti teka Ju nahih hani kapin. I lokuhu mateiwaun ape i ukek, "Tel natuk hehin i mamatewa aope. Pahak o nahih hanawa minam patul tetan lehe i moih alia." ¹⁹ Jises tu nahih kahiti i ape tesol kahikahin tin nahih usiwa i.

²⁰ Lokon ien tel hehin hina nax ti sale tapunaun leili ahang huopanum huohu, i nahih usi Jises ape soti ngixi tehu puxuaun.

²¹ Ti namilon wanen i ukek, "Kalak nga tua soti tehu puxuaun, naxe tinuk i tapo."

²² Jises tohea paxai i ape ukek, "Amuamua tel natuk. Xoxoi namilom tetak i aile haso-lia o." Ape salan, i ewi huluta.

²³ Ti Jises nahih haniwa leili tehu ingi tel masiwi, i ningahi ka teka seilon laha tangitang ma wiliwilia. ²⁴ Ape i ukek, "Amuto hatesol nahih! Tel akaik ie i tai mat, i tua mamatih." Tuahen laha hatesol mal soxeni i. ²⁵ Ti laha sohot hatapoa, Jises nahih hani kapi enepe tel akaik. I akeni minan ape tel akaik xahat. ²⁶ Menge waliko ti i ailele i sawat kakalini hatesol xux ti ien.

*Jises haewia hua seilon pulaxa
Mk 10:46-52; Lk 18:35-43*

²⁷ Jises nahih salili tesol ien. Ti i nanahih hua seilon pulaxa nahih usiusi i. Lalu

tilol ukek, "Tahanema amili, tel kahi nati David!"

²⁸ Ti Jises soh haniwa leili ing, huhua seilon pulaxa nahih hani kapin. Ape i kamei lalu, "Amulu soh ka nga pon haewiamulu?"

Lalu ukek, "A se, tel masiwi."

²⁹ Jises soti pulalalu ape i ukek, "I sohot hanowi ti xoxoi namilomulu." ³⁰ Ape pulalalu ewi. Jises kakane lalu, "Kum kakaxi wanen hani tel na seilon." ³¹ Tuahen lalu nahih kaxi sawateni hani tesol tesol ti xux ien waliko ti Jises ailewen.

*Jises haewia tel seilon i kum kak uke
Lk 11:14-15*

³² Ti lalu nahih saliliwa Jises, laha hakahita hani kapin tel seilon i kum kak uke nake spirit lialun kapiti halialu i. ³³ Tuahen tataen Jises xaxaweniuwa spirit lialun ape tel seilon kakak. Hatesol seilon laha ongake hawane. Laha kak ausini, "Amite tai papaxai waliko tetenan ti Israel hatexux!"

³⁴ Tuahen teka Parisi ukek, "Satan axi i poh ti xaxawenaiwa spirit lialun."

Jises hina tatahan ti seilon

³⁵ Jises nahih kakalini taon ma toan tewau tewau. I hanau teka seilon leili synagog. I kaxi meng solian ti Haeu neini seilon ma i aile haewia seilon ti hina nax tenen tenen. ³⁶ Ti i paxaiwa kilai seilon, i tahane hawane nake laha masin seilon tenen lioan. Laha namiloi hakila waliko tenen tenen ape laha masin sipsip tenen tap ngahatan.

³⁷ Ape i kakane tesol kahikahin ukek, "Teka seilon ie masin kilai an he kin ti i apeawen. Tuahen seilon ti apuhiniai an, teteka ti neini seilon hani Haeu, laha pate palai.

³⁸ Kameiwa Haeu tel Tame kin lehe i talo palahi seilon ti apuhiniai an ti i apeawen."

10

*Huopanum hua aposel
Mk 6:7; Lk 9:1*

¹ Jises tiloi apuhini tesol huopanum hua kahikahin ape i axi lato poh ti xaxawenaiwa spirit lialun ma haewiai seilon ti hina nax tenen tenen. ² Ie axe tetesol huopanum huhua aposel: imat Saimon (axan liai Pita) ma tel ukalan Andru, Jeims ma tel ukalan Jon, lalu nati Sebedi, ³ Pilip ma Batolomi, Tomas, Matiu, kemuk i tel waxiai moni, Jeims tel nati Alapeus, Tadeus, ⁴ Saimon, kemuk i tel ti teka Ju laha hil pahoi teka Rom, ape Judas Iskariot, tetel seilon imuh i hangaini Jises.

*Puase tesol huopanim huhua kahikahi Jises
Mk 6:8-13; Lk 9:2-6*

⁵ Jises talo tesol aposel ape i kakane lato ukek, "Amuto kum nahih hahani kapi teka kumahe Ju ma na tuuhe tehu taon ti Samaria. ⁶ Amuto nahih haniwa kapi teka seilon ti Israel, laha masin teka sipsip tap ngahatalaha. ⁷ Nahiwa ape kaxi sawateniwa ka Haeu tel neiniakako ape i xohiwen. ⁸ Haewiawa teka tinun, hamoiha ali-akewa seilon maten, haewiawa teka seilon hina naz lialun he tinulaha ma ahuti xax-aweniwa spirit lialun ti leilolahua. Masin ti amuto tua uke tap kahun, tin amuto tua haniwa, kum kakamea kahi puasamuto.

⁹ "Kum kakau moni. ¹⁰ Kum kakau kak, sohiai sosomuto, axahe aemuto ma na teik kuaiamuto. Seilon ti ailei puase Haeu, laha kum tae ti lawe waliko.

¹¹ "Na amuto tahia haniwa taon ma na toan, pax ngahoja tel na i waxy auni amuto ape amuto toa kapin atengi tataen telao amuto salili i. ¹² Ti amuto soh haniwa tehu ing, amuto kak kewak, 'Aamuam ti Haeu hani amuto.' ¹³ Na seilon ti leili ing waxy auni amuto, amuto axiwa laha amuam ti Haeu. Na laha kum waxy auni amuto, amuam ti Haeu i alia hani kapimuto. ¹⁴ Na seilon watakai amuto ma na kum hong amuto, tapahi xaxaweniwa hepekeun he anele ae-muto. Ien se kolakol ti laha kum waxy auni seilon ti Haeu. Ape nahih saliliwa tehu taon ma na tewau toan ien. ¹⁵ Nga hone amuto, tehu ngaini ti hinitiai seilon, Haeu kolongeni ka laha pamu lialuan ti teka seilon lialun ti Sodom ma Gomora.

*Kawatan ti luluainima
Mk 13:9-13; Lk 21:12-17*

¹⁶ "Hongoa! Nga talo amuto hanowi tanih hani leili teka wako. Aile ape amuto hanowiwa anesoi uxi ma hanowiwa xu ka masop. ¹⁷ Lepetawa hina seilon laha pohi xi-oti amuto ape sului amuto hani teka seilon ti hong paxaiai kakain ape laha xai amuto leili synagog. ¹⁸ Nake amuto kahikahik, laha ati lungesi amuto hani teka masiwi tenen tenen. Ape amuto kaxi meng solian ti Haeu hani laha ma teka laha kum tioi i. ¹⁹ Ti laha aka kongini amuto, kum hahakila namilomuto waliko tenen ti na amuto kak. ²⁰ Spirit ti Haeu hanamiloa amuto waliko tenen na amuto kak.

²¹ "Hahutalin, tel i hangaini tel hani laha telei. Tin masin hahutaman, tel taman i hangaini tel natun hani laha telei. Teka

akaik laha watakai hawane tamalaha ma tinalaha ape laha hangaini lato hani seilon telei. ²² Kilan wanen seilon laha watakai hawane amuto nake huak, tuahe na amuto tu xox kahikahik atengi amuto mat, Haeu waxi auni amuto lian tehue. ²³ Na teka seilon ti tewau toan aile halialu amuto, ox haniwa toan liai. Nga kakane amuto, nga, tel Nati Seilon, nga alia hani kapi tel Tamak Haeu imat ti amuto hatapo puasamuto leili Israel.

²⁴ "Tap tel seilon i xoini tel hanauan, tap tel unaui tel masiwi i xoini tel masiwi tetan.

²⁵ Laha kum aile hani tel na seilon pamu soliaian ti laha aile hani tel hanauan. Ape laha kum aile hani tel unaui tel masiwi pamu soliaian ti laha aile hani tel masiwi tetan. Na nga tel tame tehu ing laha axai Satan, pamu laha aile halialu ahekewa teka hahitak!

*Mamatawa mewenae Haeu
Lk 12:2-7*

²⁶ "Kum maamata tuahe seilon. Waliko ti i atutuha ma na mumuna aope ie, imu Haeu hatakei. ²⁷ Waliko tenen ti nga kaxi mumuneni hani amuto, kaxi ahuti haniwa teka liai. Waliko ti mewenae amuto hongohong, kaxi ahuti haniwa lawe seilon. ²⁸ Kum maamata teka laha tua telei tupuamuto, laha kum pon teleiai namilomuto ma hanawain ti Haeu haniwen amuto. Matatawa mewenae Haeu nake i pon telei xoiniai tupuamuto ma hatesol waliko leilmuto hani tesol ti kaui kawatan tap tahi tapoan. ²⁹ Moni kokol i pon kahuiai huok piakus tuahe tap tok i mat halik na Haeu ukek i mat. ³⁰ Amuto seilon, Haeu tioi hatapo mongohe uk he patumuto. ³¹ I namiloi ukek ka amuto pamu tuah ti piakus. Aile, kum maamata.

*Teka laha waheni a teka laha watakai Jises
Lk 12:8-9*

³² "Na tel i namiloi waxy nga ma kakaik ape i kaxi ahuti hani seilon ka i kahikahik, nga kaxi hani tel Tamak Haeu ka i tetak.

³³ Tuahne na tel i puluhini ti puli seilon ka i kahikahik, nga hone tel Tamak Haeu ka tel seilon ien i kumaheta tetak.

*Axai wasole seilon
Lk 12:51-53*

³⁴ "Kum nanamiloi ka nga tahiamahasolaiwasole seilon ti tehu pon ie. Kumahe, kakain nga kema ti Haeu, i axi wasole teka namilolaha xoxoan hani Haeu ma teka laha kum soh kakaian. ³⁵ Aile ape akaik wawan

pahoi taman, akaik hehin pahoi tinan ape hehin pahoi ihan hehin.³⁶ Teka ti akikimuto wanen laha hilei amuto nake huak.

³⁷ “Na tel seilon pamu i waheni tel taman ma tel tinan i xoini ti i waheni nga, i kum pon kahikahik. Na tel seilon pamu i waheni tel natun i xoini ti i waheni nga, i kum pon kahikahik.³⁸ Na tel seilon pahan kum is kaui kawatan masin ti nga kakau, i kum pon hawane kahikahik.³⁹ Na tel seilon pahan kum is kahikahik nake pahan i akeni kongini totongan ti itan ie, i lioi totongan ti kapi Haeu. Tuahen na tel seilon i to kahikahik kalak na masin i lioi totongan ti itan ie, i waxi totongan ti kapi Haeu.

Haeu axi kahi teka laha ngahati teka unauan

Mk 9:41; Lk 10:16; Jn 13:20

⁴⁰ “Na tel seilon auni amuke amuto tesol kahikahik, tin masin i auni amuke nga. Na tel seilon auni amuke nga, tin masin i amuke Haeu tel i taloma nga.⁴¹ Na tel seilon waxi auni tel kuluiai kakai Haeu nake i tel unaui Haeu, i waxy kahun masin ti tel kuluiai kakai Haeu. Na tel seilon waxi auni tel seilon sawisawin nake i unaui Haeu, i waxy kahun masin ti tel seilon ien.⁴² Tioi kewak! Na tel seilon axi kalak tuahe na kaniup hani tel nake i kahikahik, i uke kahun ti Haeu.”

11

Jises ma Jon Baptis

Lk 7:18-35

¹ Muhin ti Jises hanau kewa tesol huopanim hua kahikahin, i nahih salili tesol taon ien ape i nahih hani taon ti xohixohin. I hahanau ma kakaxi meng solian ti Haeu hani teka seilon.

² Ti Jon Baptis leili kalabus, i hong waliko ti Krais ailele. I talo tesol kahikahin hani kapin. ³ Ape lato kamei i ukek, “Nakan o se Krais, tel amite to atetengi Haeu taloma, a amite atetengi tel seilon liai?”

⁴ Jises pahoi lato ukek, “Amuto nahih aliawa, honewa Jon waliko ti amuto hon-gohong ma ningahai. ⁵ Teka pulaxa, laha nahih hanima kapik ape laha paxapax, teka laha kum nanahih ape laha nahih uke, teka hina nax lialun he tinulaha, laha ewi, teka taxingalaha sutu ape laha hong uke kakain. Teka maten laha moih alia ape teka paha-laha wanen Haeu neini ma ngahati laha, laha hongohong meng solian ti Haeu. ⁶ Ape

kaxi haniwa Jon ka teka namilolaha xoxoan tutuen tetak, Haeu aile hasolia hani laha.”

⁷ Ti teka kahikahin Jon nahih aliliawa, Jises kakane teka seilon kapin sale Jon, i ukek, “Ti amuto nahih hongoi kakai Jon ti he lohong, amuto sokok amuto ningahai aita? Tel seilon namilon lawe i sohisohia?⁸ Amuto sokok ka amuto ningahai aita? Tel seilon tenen soson pate solian? Kumahe, seilon kum sosoi maia solian he lohong.⁹ Amuto kaxi hanima nga, amuto sokok amuto ningahai aita? Tel kuluiai kakai Haeu? Se, salan wanen, tuahe nga kakane amuto, Jon kumahe tuahe tel kuluiai kakai Haeu.¹⁰ Jon tel seilon Haeu kakaxi leili pepaun. Haeu kakane tel Natun i ukek,

“Nga talo tel ahutiae kakai imat tetam
ti apeseniai seilon ti sohotuan.” (Mal
3:1)

¹¹ Nga hone amuto, puase Jon ti Haeu kilami i ailean, se pamu tuah ti puase hatesol seilon liai. Tuahe kalak teka ti pate naun leili teka seilon Haeu neneini, anesoalaha sale nenein ti Haeu pamu lapani ti Jon.

¹² Lokon ti Jon kakaxi kakai Haeu hanima tataena ape ie, kilan seilon pahalahi wanen Haeu neini laha.¹³ Imat ti Jon, teka kuluiai kakai Haeu ma nauna ti Moses, hatesol kak kilamiwen taun ti nenein ti Haeu.¹⁴ Ala amuto sohoa ka Jon se masin Elaija tel kuluiai kakai Haeu, sohotuan Haeu kilami-wen.¹⁵ Na amuto hina taxing ti hongoi kakain, amuto hongoa!

¹⁶ “Kaie nga kolongeni teka seilon ti aope ie ukek ia? Laha masin teka akaik laha toto ti tone halokoin. Laha tilol ausisini hani teka liai,

¹⁷ “Amite pakui pak solian ti salasala hani amuto
tuahe amuto kum amuam.

Amite pakui pak ti tatahan
tuahe amuto kum tang.”

¹⁸ Masin Jon Baptis ti i sohotuma, i kum ang halapa ma i kum un waen, ape teka seilon ukek, ‘Spirit lialun kapiti halialu i.’

¹⁹ Ape ti nga tel Nati Seilon sohotuma, nga ang ma un waen hanowi teka seilon liai, ape teka seilon ukek, ‘Paxaiwa tel seilon ien! Puhuan wawan ma weli unum. I tin lohi teka seilon ti waxiai moni hani teka masiwi ti Rom ma lohi teka seilon woulaha lialun.’ Tuahe nga kakane amuto, anesoi Haeu ti amili Jon hahanau seilon, i sohot xeu hawane ka salan, na auha paxai soliai puasamili, tataeni ti kilan seilon ape laha aile usi hanauan ti amili.”

*Taon ti laha kum soh Jises
Lk 10:13-15*

²⁰ Teka seilon ti tesol taon ti kewi Jises hahapuasa poh ti ailei waliko lalap tenen tenen, laha kum towiahu ti lalui woulaha hani Haeu. Aile ape i kak hakawata hani laha. I ukek, ²¹ “Teka seilon ti Korasin ma Betsaida, Haeu axi amuto kawatan. Na nga aile hanila teka Taia ma Saidon waliko tenen lalap nga aile haniwen amuto, teka Taia ma Saidon laha towiahu kueiniwen ti lalui woulaha! ²² Aile ape, nga kakane amuto, tehu ngain ti hinitiai seilon, Haeu axi kawatan hani amuto i xoini kawatan ti i axi teka Taia ma Saidon.

²³ “Ape teka seilon ti Kapenaum, amuto namiloi ukek ka Haeu sameni amuto ape waxi amuto hani kapin. Tuah Haeu towi xoini amuto hani tesol ti kaui kawatan ti tap tahi tapoan. Kalak amuto ningahiwen waliko tenen lalap nga ailele, amuto kum towiahu ti lalui woumuto hani Haeu. Na nga aile haniwen teka Sodom waliko ti kui pohek nga aile hahan amuto, kaie Haeu tai halialu Sodom! ²⁴ Aile ape, tehu ngain ti hinitiai seilon, Haeu axi kawatan hani amuto i xoini kawatan ti i axi teka Sodom.”

*Jises ilowi teka seilon hani kapin
Lk 10:21-22*

²⁵ Ape Jises lotu hani Haeu ukek, “Tel Tamak Haeu, Masiwi ti lawe waliko ti patul ma tehu pon itan ie, nga kak kemulik hani o nake o mumuneni sale pohem ti teka laha sokok laha seilon aneso ape o haxewa hani teka seilon laha hana aliake laha hahitake ngahat tetam masin teka akaik. ²⁶ Nga kak kemulik hani o tel Tamak nake paham i sohot ukek ien.”

²⁷ Ape Jises hone teka seilon ukek, “Tel Tamak Haeu hani hatapoen nga pohen ma anesoan. Mewenae tel Tamak Haeu tioi hawane nga tel Natun ma mewenae nga tel Natun tioi hawane tel Tamak Haeu. Ape nga tel Natun nexi haxewa tel Tamak Haeu hani teka seilon ti nga kilami.

²⁸ “Teteka amuto kakau kawatan ma namilomuto kilan, kewa amuto kahikahik lehe nga hani amuto hanawain solian.

²⁹ Amuto puas elielihu tetak ape hong usiwa kakaiak nake nga teheni hawane nga hani ailei puase Haeu. Na amuto aile ukek ien namilomuto heh. ³⁰ Pake puasain nga hani amuto se paupaun ape usiai kakaiak se solian.”

Jises ma teka Parisi kak hapatapat sale Sabat

Mk 2:23-28; Lk 6:1-5

¹ Tai kue, telao ngain Sabat, Jises nahih kokotiwa tesol kini kon. Tesol kahikahik hitol ape asahi ani huai kon. ² Ti tesol Parisi ningahiwa, lato hone Jises ukek, “Paxaiwa, tesol kahikahim ailele waliko tenen hahalin ti telao ngain Sabat!”

³ Jises kak pahoi ukek, “Nakon amuto kum tioi waliko ti tel masiwi David ma tesol seilon hahitakan aile lokon ti pate lato hitol? ⁴ I nahih haniwa leili Ingi Haeu ape i ma teka kapin lato ani bret ti laha haniwen Haeu, kalak hahalin. Mewenae teka masiwi ti hukuminiai Haeu ma seilon pon anian. ⁵ Nakon amuto kum tioi nauna ti Moses? Teka masiwi ti hukuminiai Haeu ma seilon laha puas telao ngain Sabat leili Ingi Haeu tuahe Haeu kum namiloi ukek laha talesien. ⁶ Nga kakane amuto, nga pamu tuah ti Ingi Haeu ti Jerusalem. ⁷ Kakai Haeu i ukek, ‘Pamu nga waheni amuto aile saun ti tatahan hani seilon i xoini na amuto kau hani nga maniuh.’ (Hos 6:6) Na amuto tioi hawane puole teik kakain ie, ala amuto kum tieni halialu seilon ti laha tai aile saun lialun, hanowi tesol kahikahik. ⁸ Pake nga tel Nati Seilon, nga se Masiwi ti Sabat. Nga tel sowini haniai seilon waliko tenen i pon ma na i kum pon laha aile telao ngain Sabat.”

*Tel seilon minan maten
Mk 3:1-6; Lk 6:6-11*

⁹ Jises nahih salili tesol ien ape i nahih hani synagog. ¹⁰ Ape ti ien, tel seilon minan maten. Hina seilon pahalaha sakalois aweisal ti suluiai Jises. Aile ape laha kamei hataehu i, “Ewi na haewia seilon telao Sabat?”

¹¹ Jises pahoi ukek, “Na tel ti amuto tok tupun maniuh put hani tewau wal tahu-loun ti telao ngain Sabat, kaie i kum ahuti?

¹² Seilon i pamu tuah ti tok na maniuh. Aile ape ewi ti hualiae seilon telao Sabat.”

¹³ Jises hone tel seilon tepaun minan maten, “Hokahiwa minam!” Ti i hokahiwa, tepaun minan maten ewi hanowi tepaun liai. ¹⁴ Ti tesol Parisi ningahiwa, lato aile ngah aweisal ti teleiae Jises.

*Jises se tel Haeu kilami
Mk 3:7-12*

¹⁵ Ti Jises hongoa ka lato hina namil ti teleian, i nahih salili tesol ien. Kilan wanen seilon nahih kakahiti i. ¹⁶ I aile haewia hatapo teka tinun ape i hone hatuoha lato kum kaakane tel na seilon waliko ti ailele.

¹⁷ Waliko ti Jises ailele i haponowi hawane teik kakai Haeu leili pepai Aisaia. I ukek,

¹⁸ "Ie tel Natuk, i unaauak, tel nga kilamiwen, nga waheni ma pate nga amuke hawane i.

Nga hani i Spirit tetak,
ape i kaxi ahuti hani lawe seilon
aweisal ti nga neini hasawi laha.

¹⁹ I kum kak lungelung,
i kum tilol ma kak ausini sameniai
kakaian
mate seilon.

²⁰ I tahane teka seilon tenen masin topiu ti i kekelel.

I huali teka seilon namilolahe tetak
masin kamai ah tenen lehe i peh.

I puas tatale atengi tataen
teka seilon waheni nga neini laha.

²¹ Ape kilan seilon ti lawe xux
hana hatapo laha hani he minan." (Isa
42:1-4)

*Pohe Satan ma pohe Holi Spirit
Mk 3:20-30; Lk 11:14-23*

²² Teka seilon hakahita hami Jises tel seilon pulaxa ma i kum kak uke nake spirit lialun kapiti halialu i. Jises aile haewia tel seilon ape i pon kak ma paxapax. ²³ Teka seilon paxai tataxini waliko ti Jises ailele. Laha he kamekam alia laha, "Nakon se i Krais, tel kahi nati tel masiwi David?"

²⁴ Ti teka Parisi hongoa, laha ukek, "I xax-aweni spirit lialun nake Satan tel masiwi ti spirit lialun axi i poh ti usi xaxawenialaha."

²⁵ Jises tioi waliko ti lato nanamiloj ape i hone lato, "Na seilon ti xux texux laha tikela ape hil alia puki laha, texux xux ien i lialu tamus. Na tesol akikin lato hil alia puki lato, tesol akikin ien lato kum tu xox. ²⁶ Na masin Satan hilei aliake Satan, nenein tetan tapo tamus. ²⁷ Amuto ukek nga usi xaxawenai teka spirit lialun nake Satan hakui nga. Na masin ien, kaie Satan haniwen tesol kahikahimuto poh ti usi xaxawenaij spirit lialun? Puase tesol kahikahimuto kola ka kumahe salan nga hahapuasa pohe Satan. ²⁸ Spirit ti Haeu axi nga poh ti usi xaxawenaij spirit lialun. I kola ka Haeu tel neiniamuto ape i tahiawen.

²⁹ "Satan masin tel seilon kuin. Tap tel seilon soh uke hani ingi tel seilon kuin

ape waxi waliko tetan leili ing, halik na i xioti konginimu tel seilon kuin. Mewenae na i pamu kuiaian, i pon xoiniai tel seilon kuin. Se tin masin nga xoini Satan ape nga xaxaweni spirit lialun tetan ti seilon.

³⁰ "Tel ti na i kumahe teapaun tetak, i pahoxai nga. Tel ti na i kum huali nga neiniae teka seilon hani Haeu, i neini hasele laha ti Haeu. ³¹ Nga hone amuto, Haeu oxoxi seilon ti kawatan ti lawe saun lialun laha aile, tuahe na tel i kak halialu Holi Spirit, tap wanen Haeu oxoxi i ti kawatan ien. ³² Tel na i kak halialu nga tel Nati Seilon, Haeu oxoxi i ti kawatan ti saun lialun ien, tuahe tel na i kak halialu Holi Spirit, Haeu kum oxoxi i ti kawatan ti saun lialun ien lian tehue.

*Tea pata ma huan
Lk 6:43-45*

³³ "Pata amuto paxai tioi na amuto paxai huan. Pata tenen huan solian i pata solian. Pata tenen huan lialun i pata lialun. Tin masin ala amuto tioi seilon solian ma na lialun na amuto paxai ani pupuasan.

³⁴ Amuto masin noh! Amuto kak ukek ia kakain solian na amuto seilon lialun? Kakain ti seilon ahuti i ahutama ti namilon.

³⁵ Seilon solian hina namil solian ape i ahuti kakain solian. Seilon lialun hina namil lialun ape i ahuti kakain lialun. ³⁶ Amuto tioi kewak, telao ngain ti Haeu hiniti seilon, lawe seilon uke kahi kakain lialun ti laha kakawen. ³⁷ Puki kakaiamuto sului aliake amuto. I kola na amuto seilon solian ma na lialun."

Teka masiwi ti teka Ju kamei Jises kolai pohen

Mk 8:11-12; Lk 11:29-32

³⁸ Teka hanauai nauna ti Moses ma teka Parisi kak ukek, "Tel masiwi, kola hanima amite pohem lehe amite tioi ka salan Haeu taloma o."

³⁹ Tuahé Jises kak pahoi, "Teka seilon ti aope ie laha watakai hawane Haeu, laha kakamei nga ailei waliko tenen lalap. Tuahé Haeu kola hani amuto tenenawé kolakol ie, waliko i sohot hani nga masin ti i sohot haniwen Jona, tel kuluij kakai Haeu. ⁴⁰ Masin ti Jona to ngain tolulu leili tiai tok xixi lalap, nga tel Nati Seilon, nga tin ngain tolulu leili amal. ⁴¹ Telao ngain ti Haeu hiniti seilon, Haeu namiloi ukek teka seilon ti Niniva pamu sawisawin ti amuto nake laha towiáhu ti saun lialun hani Haeu ti Jona kaxi ahutiwa kakai Haeu hani

lahe. Tuahé amuto kum towiahu ti lialui woumuto kalak nga kaxi ahuhuti kakai Haeu hani amuto. Nga kakane hawane amuto, nga pamu tuah ti Jona.⁴² Tel hehin masiwi ti Siba luamat ti xuxun pate xauxaun hongoi soliai nauna ti tel masiwi Solomon. Telao ngain ti Haeu hiniti seilon, waliko ti i aile i sului amuto nake amuto kum hong kakaiak kakal nga pamu tuah ti Solomon.”

*Aliae spirit lialun
Lk 11:24-26*

⁴³ Jises kak ulea ukek, “Na masin tel spirit lialun ahuta ti tel seilon ape i nahih hani he lohong upiai tesol na i to. Tuahé i kum tunah.⁴⁴ I kakane aliakte i, ‘Nga alia hani leili tel seilon.’ I alia tunahi ka tel seilon aope i masin tehu ing tenen malaian ma tap tel ingangai.⁴⁵ I nahih waxi tepanim hua spirit lialun, pamu lialuan tetan ape lato soh hani leili tel seilon. Lato kapiti halialu akulai ti imat. Waliko ien tin i sohot hani teka seilon ti aope laha watakai hawane Haeu.”

*Tinan ma ukalan wanen
Mk 3:31-35; Lk 8:19-21*

⁴⁶ Ti Jises kakak tutuen, tel tinan ma tesol ukalan tahiama. Pahalato kakak kapin.⁴⁷ Ape tel ti teka seilon ien kakane i, “Paxaiwa, tel tinam ma tesol ukalam lato ie. Pahalato kakak kapim.”

⁴⁸ Jises ukek, “Aita wanen tel tinak? Aita wanen tesol ukalak?”⁴⁹ I kola tesol kahikahin ape i ukek, “Paxaiwa! Teka seilon ie se tinak ma ukalak.⁵⁰ Hatesol teka na laha aile usi waliko ti tel Tamak Haeu pahan, laha se ukalak, tuak ma tinak.”

13

*Meng ti hepekeun tenen tenen
Mk 4:1-9; Lk 8:4-8*

¹ Ngain tin tetehu Jises nahih salili tehu ing ape i nahih to hani pape kanitax Galili ti hanau teka seilon.² Kilan kasia seilon apuha kakalini i, aile ape i ku to hani he tea koap. Teka seilon tutu peixux hongoi kakaiyan.³ I kaxi kilan meng ti hanau alaha.

I ukek, “Telao tel seilon seini waki maia.⁴ Ti i totowi waki maia, hina i put hani he aweisal ape manixux ngong anii.⁵ Hina i put hani he kalamael. Waki maia i xex, tuahé hepekeun pate pakepaken.⁶ Ti alon kekelih, i mani telei supuli maia nake i tai wahai aluuni.⁷ Hina waki maia i put hani leili au. Ti i xexeal, au talini ape i kum hua.⁸ Tuahé waki maia liai i put hani hepekeun solian. I xex ape hua palahi 30, hina palahi

60 ma teka palahi 100 akulaiwen ti tel seilon seini.”⁹ Ape Jises tili kakaian ukek, “Na amuto hina taxing ti hongoi kakain, hon-goa!”

Jises kaxi haxewa salangawan ti i uke meng hanau seilon

Mk 4:10-12; Lk 8:9-10

¹⁰ Muhin tesol kahikahi Jises nahih hani kapin ape lato kamei i, “Nake lahan o uke meng ti na o hanau seilon?”

¹¹ Jises pahoi ukek, “Haeu haxewa hani amuto sale nenein tetan tuahé kumahe laha.¹² Na tel seilon hong usi kakai Haeu, Haeu axi aheke anesoan tuahé na tel seilon kum hong usi kakaian, anesoan Haeu waxi aliakte.¹³ Nga kaxi meng hani laha nake laha papaxai waliko ti nga ailele tuahé laha kum ningahi, laha hongohong waliko ti nga kakak tuahé laha kum xeu.¹⁴ Tenen ien i hapoponowi hawane waliko ti Aisaia kak kilamiwen. I ukek,

“Teka seilon laha hongohong kakai Haeu tuahé laha kum xeu,
laha papaxai waliko ti Haeu ailele
tuahé laha kum ningahi.

¹⁵ Nake patulaha pate ailan,
taxing alaha kilakilan
a pulalaha masin pulaxa.
Kiae ala laha ningahiwen ma hong xe-wawen
ma towiahuen ti lialui woulaha
ape nga aile haewiawen laha.”¹⁶ (Isa 6:9-10)

¹⁶ Ape Jises kakane tesol kahikahin ukek, “Tanusik ka amuto hong xeu kakaiake ape amuto paxai tioi waliko ti nga ailele.¹⁷ Nga kakane hawane amuto, kilan teka kuluiai kakai Haeu ma teka seilon sawisawin, pa-halaha wanen ningahiai waliko ti amuto ningahiai tuahé laha tai ningahi. Ape pa-halaha hongoi waliko ti amuto hongohong tuahé laha tai hong.”

Jises kaxi haxewa meng ti hepekeun tenen tenen

Mk 4:13-20; Lk 8:11-15

¹⁸ “Amuto hongoal! Nga kaxi haxewa hani amuto tenen meng ti seiniai waki maia.

¹⁹ Teka laha hong kakain ti Haeu neini seilon a laha kum xeu, laha masin aweisal ti waki maia put to. Laha hong kakai Haeu tuahé malimun wanen na Satan xaxaweni kakai Haeu ti leilolah. ²⁰ Kalamael ti waki maia put to, i kikilami teka seilon laha hongoa kakai Haeu ape pate laha amuke.²¹ Tuahé

masin tesol waki maia i tai wahai aluin, teka seilon ien tap namil xoxoan ti Haeu. Laha soh kakai Haeu teik kukunun. Taen kawatan ma totohong tunahiwa laha ti usiai kakai Haeu, xoxoi namilolaha ti Haeu pate i put kosea.²² Hepekeun ti hina au ti waki maia put to, i kikilami teka seilon laha hong kakai Haeu, tuahe laha namiloi kasimi waliko ti itan ie. Pahalaho soxialaha kilan. Namil tenen ien kokongini kakai Haeu ape laha kum hua.²³ Tuahe hepekeun solian kikilami teka seilon laha hong auni kakai Haeu ape laha hua. Teka laha hua 30, teka 60 ma teka liai 100 akulaiwen ti uli seinian.”

Menge peteta ma kango

²⁴ Jises kakane laha tenen meng i ukek, “Aweisal ti Haeu neini seilon masin tel seilon i seini peteta he tesol kinen.²⁵ Ipong tehu ti hatesol seilon mamatih, tel seilon lialun nahih seini kango hani he tesol kin ape i nahih salili.²⁶ Tataen ti peteta xexele i xex hetekiele kango.

²⁷ “Teka unaui tel tame tesol kin nahih hani kapin ape lato ukek, ‘Amite sokok o seseini peteta. Alahan ka hina kango leili tesol kinem?’

²⁸ “I ukek, ‘Tel seilon i watakai hawane nga i seini kango.’

“Lato kamei i, ‘Paham amite nahih sohuti hatapo kango’

²⁹ “Tuahe i ukek, ‘Kumahe, uke na amuto sohuti kango, amuto sohuti hetekie tunahii peteta.³⁰ Tiliwen lato xex hetekie atengi tataen ti tahiwai ane peteta. Ape nga talo teka unauak sohuti apuhini luumu kango. Imuh lato apuhini peteta hani tehu ing ti tone an.’”

Menge waki lilieu

Mk 4:30-32; Lk 13:18-19

³¹ Jises kaxi ulea tenen meng i ukek, “Aweisal ti Haeu neini seilon tin masin tel seilon tihini muneni waliko pate tuah leili hepekeun. Ape tel liai tahiwi tunahi. Pate i amuam hawane ape i tihini aliake. I nahih hangaini hatapo soxian ape i kahui teik hepekeun ien.”

Menge ist

Lk 13:20-21

³³ Jises kaxi ulea tenen, “Aweisal ti Haeu neini seilon tin masin ie. Tel hehin i waxy teik kokole ist ape i talini hani he palawa. Kalak teik ist kokol, i haxiwa palawa hatehu.”

Jises kaxi haxewa menge peteta ma kango

³⁴ Jises lawe kaxi meng ti hanaui teka seilon sale nenein ti Haeu. Ti lawe i kakane laha i hapuasa meng.³⁵ I aile ukek lehe i hapoponowi hawane waliko ti tel kuluiak kakai Haeu kakawen. I ukek, “Nga kaxi meng na nga kakane laha.

Nga kakane laha waliko ti laha tai tioi hutuima ti Haeu tanomi lawe waliko.”
(Ps 78:2)

³⁶ Ti Jises saliliwa teka laha apupuha, i soh hani leili ing ape tesol kahikahin kamei i, “Kaxi hanima amite salangawe menge kango ti leili tesol kin.”

³⁷ Jises pahoi lato, “Tel seilon seiniai peteta i tu kikilami nga tel Nati Seilon.³⁸ Tesol kin se lawe xux itan ie. Peteta se teka unaui Haeu a kango se teka unaui Satan.³⁹ Tel seilon i seini kango ien se Satan. Ngain ti tahiwai ane peteta i kikilami tapoi lawe xux itan ie. Teka unaui tel tame kin se teka engel, spirit solian ti Haeu.

⁴⁰ “Ti teka seilon sohuti lui kango se masin wanen na laha aile ti tapoi lawe xux itan ie.⁴¹ Nga tel Nati Seilon, nga talo teka unauak engel apuhiniai teka seilon laha aile haputa teka liai ma teka laha aile saun lialun.⁴² Ape lato towi laha hani tehot ah lalap. Tesol ien laha tang lialu ape atalahi nisulaha nake pate moloan.⁴³ Ape teka seilon ti Haeu laha kamakam hanowi alon he tesol tone Haeu. Na amuto hina taxing ti hongoi kakain, hongoal.

Menge waliko tenen pate tuah wanen

⁴⁴ “Aweisal ti Haeu neini seilon tin masin tel seilon tihini muneni waliko pate tuah leili hepekeun. Ape tel liai tahiwi tunahi. Pate i amuam hawane ape i tihini aliake. I nahih hangaini hatapo soxian ape i kahui teik hepekeun ien.”

⁴⁵ “Aweisal ti Haeu neini seilon tin masin tel seilon i upia teik waliko pate tuah.⁴⁶ Tataen ti i tunahiiwa, i nahih hangaini hatapo soxian ape i kahui teik waliko ien.”

Menge tehu ka

⁴⁷ “Aweisal ti Haeu neini seilon masin teka seilon towi tehu ka hani itax ape lato tike kilan xixi tenen tenen.⁴⁸ Lato itini hani peixux ape hiniti, xixi solian hani leili po ape xixi lialun lato xoiri.⁴⁹ Tin masin wanen taun ti tapoi lawe xux itan ie, teka engel ti Haeu hiniti seilon.⁵⁰ Ape laha towi seilon lialun hani tehot ah lalap. Tesol ien laha tang lialu ma atalahi nisulaha nake pate moloan.”

Nauna haun ma wasan

⁵¹ Jises kamei tesol kahikahin, “Amuto xewan waliko ti nga kakak?”

Lato ukek, “Se, amite xewawen.”

⁵² Ape i ukek, “Teteka hanau nauna ti Moses lato hong usi ma hanau nauna ti Haeu ti imat ma aope, lato masin tame tehu ing. I pon hapuasai waliko haun ma wasan he tesol tone auniai soxi.”

Teka Nasaret watakai hongoi kakai Jises

Mk 6:1-6; Lk 4:16-30

⁵³ Ti Jises kaxi kewa meng hani lato i nahih salili tesol ien. ⁵⁴ I alia hani tesol puki tonan ti Nasaret. I nahih soh hani synagog ape i hanau teka seilon. Teka laha hongohong laha ongake hawane waliko ti i kakak ape laha ukek, “I kekema anesoan ia? Alahan i pon aile hasohotui waliko tenen poh ti seilon kum pon ailean?” ⁵⁵ I tuahé natí tel ataaiai ing. I tel natí Mary ma ukale Jeims, Josep, Saimon ma Judas. ⁵⁶ Nakon tesol tuan kumahe tin lato toto ie? Lawe waliko ien i kema ia?” ⁵⁷ Aile ape laha watakai hongoi kakaian.

Jises hone laha, “Nga masin tel kuluiai kakai Haeu. Ti toan liai seilon sameni i tuahé ti puki tonan wanen laha watakai hongoi kakaian.”

⁵⁸ Ape Jises kum aile hakila puasain ti poh hani laha nake laha tap namil xoxoan hani i.

14

Matei Jon Baptis

Mk 6:14-29; Lk 9:7-9

¹ Lokon ien, Herod tel masiwi ti Galili hong tunahi menge Jises. ² I kakane teka masiwi laha pupuas hahitakan, “Ie se Jon Baptis i moih aliawen. Aile ape i hina poh ti ailei waliko tenen lalap ti seilon kum pon.”

³ Ti imat, Herod talo teka unauan xinoti kalabusiai Jon. Herod tel i xuina Herodias, axoi tel ukalan Pilip. ⁴ Aile ape Jon Baptis lawe i to kaakane Herod, “Kumahe wanen sawisawin o uke axoam Herodias!” ⁵ Herod pahan i telei Jon, tuahe i mamata teka Ju nake laha ukek Jon i tel kuluai kakai Haeu.

⁶ Tehu ngain i nameniai telao Herod takah, tel natí Herodias hehin denis hani teka seilon laha apupuha ti angiaian. I hamuamua hawane Herod. ⁷ Aile ape Herod kak tuoha hani i, “Waliko tenen na paham, nga hani o!”

⁸ Ape i usi namili tel tinan i ukek, “Hanimna nga pati Jon Baptis. Lohi hanima he

tehu kapi!” ⁹ Namili Herod sihukuk hawane tuahé i kak tuoha haniwen tel hehin ti puli lawe seilon ka i hani i waliko tenen na pahan. ¹⁰ I talo tel unauan nahih hani ingi kalabus ti koti xaxaweniai kinawe Jon Baptis. ¹¹ I hana pati Jon leili tehu kapi, i kau hani tel hehin ape i hani tel tinan. ¹² Imuh tesol kahikahi Jon nahima. Lato waxi mewenae tupuan ape ti hini auni. Muhiñ lato nahih hone Jises.

Jises axi ani 5,000 seilon

Mk 6:30-44; Lk 9:10-17; Jn 6:1-15

¹³ Tataea ti Jises hong tunahi waliko ti i sohot hani Jon, i ku he tea koap ape i salili tesol ien hani tesol tahain. Teka seilon leili taon hongoa, laha nahih usi i. ¹⁴ Ti Jises mosua he tea koap, i ningahi kilan wanen seilon. I tahane hawane laha ape i haewia teka tinun.

¹⁵ Ti ape alohah, tesol kahikahi Jises nahih hani kapin, lato hone i, “Pate ape alohah a tap toan ie. Taloo teka seilon hani toan lehe laha kahui analaha.”

¹⁶ Jises hone lato, “Kumahe, laha kum nahih salili kako. Amuto axiwa analaha.”

¹⁷ Lato hone i, “I kum pon! Toi amite tepanimawe bret ma huok xixi.”

¹⁸ Jises ukek, “Kau hanima nga.” ¹⁹ I hone teka seilon to hanai he pahoah. I waxi tepanim bret ma huok xixi. I pax hani patul, i kak kemulik hani Haeu ape i wiki. I hani tesol kahikahin ape lato sei hani teka seilon. ²⁰ Laha hatesol ang ahoi hawane. Ape huopanim huohu po moxe an tutuen ti tesol kahikahi Jises apuhiniwa. ²¹ Mongohe seilon laha angiang sai 5,000, tai wexe teka hehin ma akaik.

Jises nanahih patul he kanitax

Mk 6:45-52; Jn 6:16-21

²² Muhiñ Jises hone tesol kahikahin langai imat tetan hani liai tepaun ti kanitax Galili he koap. Ape i talo aliakteka kilai seilon. ²³ Mewenae i nahih hani patul he tehu maunten ape i lotu. Ti ape alohah, Jises mewenae i tutuen. ²⁴ Lokon ien tea koap ape i xauwen. Laman hapa ahahu tea koap nake aupol ah suei i.

²⁵ Sikole letu ti teik tilokoan tutuen, Jises nahiwa patul he kanitax hani kapi tesol kahikahin. ²⁶ Ti tesol kahikahin ningahija i nanahih patul he kanitax, lato mamata hawane ape lato tilol ausisini, “Tel manu!”

²⁷ Jises hone hamattua lato, “Haxoxoa namilomuto! Se nga. Kum maamata!”

²⁸Pita hone i, “Tel masiwi, na salan wanen o, honema nga nahih patul he kanitax hani kapim.”

²⁹Jises ukek, “Nahima!”

Pita mos he tea koap ape i hutui nahih patul he kanitax hani kapi Jises. ³⁰Tuahe ti i ilameniwa kuiai aupol, i mamata ape lehe i taxix. I tilol ausini, “Tel masiwi, hualima ngal!”

³¹Kiliwan wanen Jises tuliniwa minan, i akeni Pita ape i ukek, “Nake lahan namiloi wakul alia tetak?” ³²Ti lalu ku haniwa he tea koap, aupol mat.

³³Tesol kahikahin he tea koap lokuha hani Jises. Lato ukek, “Salan wanen o tel Nati Haeu!”

Jises haewia teka tinun ti texux xux Genesaret

Mk 6:53-56

³⁴Ti lato meiwa liai tepaun ti kanitax Galili, lato mos he tea koap hani Genesaret.

³⁵Ti teka seilon ti tesol ien paxai tioiwa Jises, laha sawateni kakain hani teka seilon leili lawe toan. Kilan seilon hakahita teka tinun hani kapin. ³⁶Laha kamei eliel i na ewi teka tinun tua soti ngixi puxuaun. Ape teka laha soti, laha ewi.

15

Jises hahanau sale usiai nauna ti Haeu
Mk 7:1-13

¹Lokon ien teka Parisi ma teka hahanau nauna ti Moses laha nahima Jerusalem hani kapi Jises. Laha kamei i, ²“Alahan tesol kahikahim kum aile usi nauna ti teka mata-haun? Ti lato ang, lato tai nuhi minalato.”

³Jises hone lato ukek, “A alahan amuto kum hong usi nauna ti Haeu ape amuto usi puki saun ti amuto? ⁴Haeu ukek, ‘Hong tamaniwa kakai tamam ma tinam ape aile hasolia haniwa lalu. Na o kak halialu tamam ma tinam, o laha telei.’” (*Exod 20:12, 21:17*) ⁵Tuahe amuto ukek se ewi na seilon kum huali tamalaha ma tinalaha na teik huhual ti hualialalu laha haniwen Haeu. ⁶Amuto hahanau ukek ien ape seilon kum huali tamalaha ma tinalaha. Ti amuto aile ukek ien, kumahe amuto usiusi kakai Haeu, amuto hakoutama saun tenen puki ti amuto. ⁷Amuto seilon tenen lehomuto huoka! Aisaia tel kuluiak kakai Haeu, kakai sawisawin ti i kakak amuto. I ukek,

⁸“Teka seilon sameni nga ti tuahe awalaha a namilolah pate xauxaun tetak.

⁹Kumahe salan laha lolotui nga.

Laha hanaau waliko ti puki seilon namiloi tanomi.’” (*Isa 29:13*)

Waliko tenen i haloloa seilon

Mk 7:14-23

¹⁰Ape Jises tiloi apuhini teka kilai seilon. I kakane laha ukek, “Amuto honga lehe amuto xeu. ¹¹Waliko ti i soh nonoa he awamuto, i kum haloloa amuto. Mewenae waliko tenen na i ahutama he awamuto, i haloloa amuto.”

¹²Imuh tesol kahikahin nahih hani kapin. Lato kakane i ukek, “O tioi ka waliko ti o kakak i hakawata tiai teka Parisi?”

¹³Jises hone lato ukek, “Lawe pata ma pahoah ti kumahe tel Tamak Haeu seini, i sohuti xaxaweni. ¹⁴Aile ape maluhewa lato! Lato masin seilon tenen pulaxa neiniai teka pulaxa. Na masin tel pulaxa neini tel pulaxa liai, ati lalu put hani leili wal.”

¹⁵Ape Pita ukek, “Nexi haxewa hanima amite salangawe teik kakain ti o kakak.”

¹⁶Jises ukek, “Tin amuto tai xeu tutuen?

¹⁷Nakon amuto kum tioi ka waliko tenen i soh nonoa he awamuto i tamus hani he puuhamuto? Imuh ape i ahuta hani melal.

¹⁸Tuahe lawe waliko i ahutama he awamuto i ahuma he atemuto. Ape tesol waliko ien i haloloa amuto. ¹⁹Waliko lialun ti i ahutama leilomuto se tetesol: namil lialun, na ulini ape telei seilon, xuina axoi seilon liai, saun lialun ti wawan hehin, xuxuina, puputa ma kak halialui seilon liai. ²⁰Tesol waliko ien lawe i haloloa seilon. Tuahe na seilon kum nuhi min ape i ang, Haeu kum namiloi ukek ka tenen ien i haloloa seilon.”

Jises huali tel hehin kumahe Ju

Mk 7:24-30

²¹Jises nahih salili ien ape i nahih hani tesol toan xohixohin Taia ma Saidon. ²²Tel hehin i kumahe Ju toto ien. I nahih hani kapi Jises ape i kamei eliel ukek, “Tel Masiwi kahi nati David, tahanema nga! Spirit lialun kapiti halialuen tel natuk hehin.”

²³Tuahe Jises tai kak pahoi i na tenen. Ape tesol kahikahin kamei i ukek, “Talo ali-akewa tel hehin nake i kak hakatole kako.”

²⁴Jises hone tel hehin ukek, “Tel Tamak Haeu taloma nga ti hualiai teka Ju nake laha masin teka sipsip tap ngahatalaha, a o kumahe Ju.”

²⁵Tel hehin lokuha hani kapi aen ape i ukek, “Tel masiwi, hualima nga!”

²⁶Tuahe i kakane tel hehin ukek, “Kumahe solian na tel i waxy anि natun ape towi hani ani sinen.”

²⁷ A tel hehin ukek, “Salan wanen, tel masiwi. Tuahe sinen ani peni tamalahna na i put hani itan.”

²⁸ Jises kakane tel hehin ukek, “Namilom salan xooxoan wanen tetak! Nga aile usi waliko tenen paham.” Ape tel natun i ewi huluta tataen ien.

*Jises haewia kilan seilon
Mk 7:31-37*

²⁹ Jises nahih salili tewau toan ien ape i nahih xohi hani kanitax Galili. I nahih hani patul he tehu maunten ape i to ien. ³⁰ Kilan wanen seilon hakahita hani kapin teka laha nahih tawen, teka pulaxa, teka waxosi, teka laha wix tawen ma kilan teka laia. Laha hana teka tinun hani kapi ae Jises ape i haewia laha. ³¹ Teka seilon ongake hawane ti laha ningahiwa teka laha wix tawen ape laha kak uke, teka waxosi laha ewi, teka laha nahih tawen laha nahih uke ape teka pulaxa laha paxapax. Ape laha sameni Haeu ti Israel.

*Jises axi ani seilon laha akulai 4,000
Mk 8:1-10*

³² Jises tiloi tesol kahikahin ape i ukek, “Nga tahane hawane teka seilon ie nake laha kapik kewen ngain tolulu a laha tap an. Nga kum talo aliake laha hetekie hitolo, uke laha akimatuh he aweisal.”

³³ Tesol kahikahin kamei i, “Ti he lo-hong ie, kako kema an ia ti axiai ani teka lawalawai seilon?”

³⁴ Ape Jises kamei lato, “Hil bret toi amuto?”

Lato ukek, “Tepanim huaik ma tok palai xixi kokol.”

³⁵ Jises hone hatesol seilon ka to haniwa itan. ³⁶ I waxy tesol tepanim huak bret ma tok palai xixi ape i kak kemulik hani Haeu. I wiki, i hani tesol kahikahin ape lato hani tesol kilai seilon.

³⁷ Laha hatesol ang ahoi hawane. Muhin, ti tesol kahikahin Jises apuhiniwa moxe an, i sohotua po tepanim huohu. ³⁸ Mongohe teka seilon laha angiang sai 4,000, tai wexe teka hehin ma akaik. ³⁹ Muhin ien Jises talo aliake teka kilai seilon. Ape i ku he tea koap hani texux xux Magadan.

16

*Tesol Parisi ma Sadusi kamea kolakol
Mk 8:11-13; Lk 12:54-56*

¹ Teka Parisi ma teka Sadusi nahih hani kapi Jises ape pahalahna hauhe i. Laha ukek,

“Kola hanima amite pohem lehe amite tioi ka Haeu taloma o.”

² Tuahe Jises pahoi lato ukek, “Na amuto paxai loloi al maun kakan, amuto ukek letu se hunawi ape salan. ³ Ape na amuto paxai maun kakan ma polun ti pate letu, amuto ukek tetelao hunaxa. Salan amuto tioi hunan na amuto paxai maun tuahe amuto kum tioi salangawe waliko ti sosohot aope, waliko ti nga ailele. ⁴ Teka seilon ti aope ie pate lialun maauxaun ti Haeu. Nga kum kola hani amuto kolakol ti poh. Mewenae kolakol ti Haeu kola hani amuto se waliko ti i sohot haniwen Jona tel kuluai kakai Haeu!” Ape Jises nahih salili laha.

*Ist ti Parisi ma Sadusi
Mk 8:14-21*

⁵ Tataen tesol kahikahin Jises lang haniwa liai tepaua ti kanitax Galili, lato upia tunahi ka lato maluhewen analato bret. ⁶ Jises hone lato, “Kanipetiwa! Lepeta hawanewa ist ti teka Parisi ma teka Sadusi.”

⁷ Tesol kahikahin kakak alia wasolalato ukek, “I kak ukek nake kako maliuhne anakako bret.”

⁸ Jises tioi waliko ti lato kakak, aile ape i kamei lato, “Alahan amuto kakak ka tap anamuto bret? Namilomuto kumahe xooxoan tetak. ⁹ Tin amuto tai xeu? Amuto kum nameni ti nga waxy tepanim bret hani ani teka seilon laha akulai 5,000? Amuto kum nameni hil po moxe an ti amuto apuhini? ¹⁰ Ape ti tepanim huak bret ti nga hani ani teka seilon laha akulai 4,000? Amuto kum nameni hil po moxe an ti amuto apuhini? ¹¹ Ala amuto tioiwa kumahe nga kakak sale bret. Kakaiak nga ukek amuto lepetahawanewa ist ti teka Parisi ma teka Sadusi.”

¹² Tataen ien tesol kahikahin tioi ka kumahe i kakak kanipetiai ist ti ailei bret, tuahe i kakak lato kanipetiwa teka Parisi ma Sadusi nake laha hanau puluti seilon.

*Pita tioi ka Jises i Krais
Mk 8:27-30; Lk 9:18-21*

¹³ Jises nahih hani toan leili Sisaria Pilipon ape i kamei tesol kahikahin, “Teka seilon laha ukek nga tel Nati Seilon, aita wanen?”

¹⁴ Lato ukek, “Teka laha ukek o Jon Baptis. Teka laia ukek o Elaija ape teka laia ulek o Jeremaiya ma na tel laia ti teka kuluai kakai Haeu.”

¹⁵ I kamei lato, “A puki amuto ukek nga aita?”

¹⁶ Saimon Pita ukek, “O Krais, tel Nati Haeu. Haeu tel tap tahi matean!”

¹⁷ Jises ukek, "Saimon tel nati Jona, tanusik o nake tap tel seilon kakane o nga aita. Tel Tamak Haeu hani o teik namil ien. ¹⁸ Pita, o masin teik hepekeun ailan. Masin ti tel seilon atai ingan patul he hepekeun ailan, hetekie huuhal tetam nga aile hasohotu teka seilon kahikahik hahitake axak. Ape tap tenen waliko i xoini laha, kalak pohe Satan. ¹⁹ Nga hana o tel neiniai teka seilon hani Haeu lehe laha sohot kahikahik. Waliko tenen o halini ti itan ie, Haeu tin i halini. Waliko tenen o wahleni teka kahikahik aile ti itan ie, Haeu tin i wahleni." ²⁰ Ape Jises hone tesol kahikahik kum kaokane teka seilon liai ka i Krais, tel Haeu taloma.

*Jises kak kilami matean
Mk 8:31-9:1; Lk 9:22-27*

²¹ Lokon ien Jises hutui kakane tesol kahikahik ukek, "Nga nahih hani Jerusalem. Ti ien teka masiwi ti teka Ju, teka masiwi tuah ti hukuminiai Haeu ma seilon, ma teka hanau nauna ti Moses, laha axi nga kawatan ma moloan lalap. Laha telei nga tuahe muhi ngain tolulu nga xahat alia."

²² Pita waxi siaini Jises ape kahiloloi i. I ukek, "O kum kak ukekek ien. Waliko ien kum sosohot wanen hani ol!"

²³ Jises tohea paxai tesol kahikahik ape i kak kahiloloi Pita, "Tahawa! O kak hanowi Satan! O tiehi awei saluk. Namilom kumahe i ahuma ti Haeu, i ahuma ti seilon."

²⁴ Ape Jises hone tesol kahikahik, "Na seilon pahan sohot kahikahik, laha kum namiloi wawaxi mewenae laha. Laha kaua kawatan masin ti nga kakau. Ien i kola ka laha kahikahik wanen. ²⁵ Seilon teka namilolah mewenae hasolai tonalahia ti itan ie, laha kum tunahi tonain kapi Haeu. Tuahe teka na laha hana tonalahia hahitake nenein ti Haeu nake nga, laha tunahi tonain kapi Haeu ti tap tahi tapoan. ²⁶ Na tel seilon hapono hatapo i waliko ti itan ie tuahe i lioi tonain kapi Haeu, solian la i uke? Tap. Tap tenen waliko kahui uke tonain kapi Haeu. ²⁷ Nga kakane amuto tetenen nake nga tel Nati Seilon alia hetekiema poh ma xewai tel Tamak Haeu ma teka engel, spirit solian tetan. Tataen ien nga kahui hapoponowi hani teka seilon tenen ti laha ailewen. ²⁸ Nga kakane hawane amuto, teka ti amuto ie, amuto kum matemu atengi tataen amuto ningahi nga tel Nati Seilon neini teka seilon."

*Tanome Jises sohia hawane
Mk 9:2-13; Lk 9:28-36*

¹ Muhi ngain teparanim tehu tamusua, Jises hakahita tolu kahikahin Pita ma hahutalin Jeims ma Jon hani he tehu maunten patul ti mewenae lato. ² Ti lato ien, tanome Jises i sohia. Kawan kamakam hawane hanowi alon a puxuaun paxaxu talepalep hawane.

³ Hahutulia hawane Moses ma Elaja take hani kapi lato ape lalu kakak kapi Jises.

⁴ Ape Pita hone Jises ukek, "Tel masiwi, pate ewi ti kako ie! Na o wahleni, nga atai tolulu houha, tehu tetam, tehu ti Moses ma tehu ti Elaja."

⁵ Ti Pita kakak, teik maun tenen xewan wanen man atuhu lato. Ape kakai Haeu i ahuma he maun ien, i ukek, "Tel seilon ie se Natuk pate nga wahleni. Nga amuke hawane i. Hong usiwa kakaian!"

⁶ Ti tolu kahikahin Jises hongoa, lato mama hawane ape lato eng kalunga muneni kawalato. ⁷ Jises nahih hani kapi lato. I aka soti lato ape i ukek, "Xahatale! Kum maamata!" ⁸ Ti lato xeisale, tap seilon kapi Jises, se ape mewenae i.

⁹ Ti lato momosua he tehu maunten, Jises kakane eliel lato i ukek, "Kum kakaxi hani tel na seilon waliko ti amuto ningahiwen atengi tataen nga tel Nati Seilon xahat alia ti mateak."

¹⁰ Tesol kahikahin kamei i ukek, "Nake lanan teka hanau nauna ti Moses ukek ka Elaja i sohotumu imat ti Krais?"

¹¹ Jises ukek, "Salan wanen, tel masin Elaja i sohotumu apeseniai teka seilon imat ti Krais sohot. ¹² Tuahe nga hone amuto, tel masin Elaja i sohotuen, tuahe teka seilon kum paxai tioi. Laha aile halialu i. Tin masin kawatan ma moloan ti na laha aile hani nga tel Nati Seilon." ¹³ Tataen ien tesol kahikahin hong tioi ka i kakak Jon Baptis, tel i sohotuma imat ti Krais.

Jises haewia tel akaik wawan spirit lialun kapiti hahalialu

Mk 9:14-29; Lk 9:37-43

¹⁴ Ti lato tahia haniwa itan, kilan seilon apupuha ien. Tel seilon nahih hani kapi Jises ape i lokuhu hani kapi aen. ¹⁵ I ukek, "Tel masiwi, tahanema tel natuk! Pate i lamani moloan ape i taxatxia. Hina lawe i put hani leili kan ma he ah. ¹⁶ Nga hakahitawen i hani kapi tesol kahikahim tuahe lato kum haewia uke i."

¹⁷ Jises ukek, "Amuto teka seilon ti aope ie tap namil xoxoan ti Haeu ma saun ti amuto pate lialun. Nga to kapimuto ma hanau kueiniwen amuto. Kaie kuehuan ia pahamuto nga to kapimuto lehe namilomuto xox tetak? Ati hanima nga tel akaik!"

¹⁸ Ape Jises tumei xaxaweni spirit lialun ti i aile hahalialu tel akaik. Tataen ien wanen i ewi.

¹⁹ Muhin ien tesol kahikahi Jises nahih hani kapin ti tesol mewenae i ape lato kamei, "Nake lahan amite kum xaxaweni uke spirit lialun ti tel akaik?"

²⁰ Jises pahoi lato ukek, "Nake amuto tap namil xoxoan ti Haeu. Nga kakane hawane amuto, kalak na xoxoi namilomuto ti Haeu lapan waki lilieu, amuto pon kak naxiai tehu maunten ie ape i naxia. I pon amuto aile lawe waliko!" ²¹ Ape Jises tili kakaian, "Spirit lialun tenen ien mewenae na amuto halini an hualiae lotu i pon xaxawenian."

*Jises kak ulea sale matean
Mk 9:30-32; Lk 9:44-45*

²² Ti tesol kahikahi Jises apuha haniwa Galili, Jises hone lato, "Nga tel Nati Seilon, imuh laha hana hani mini teka seilon laha watakai hawane nga. ²³ Laha telei nga ape muhi ngain tolulu nga xahat alia." Tesol kahikahin lolato tel hawane.

Towiai moni hani Ingi Haeu

²⁴ Ti Jises ma tesol kahikahin nahih haniwa Kapenaum, teka waxiai moni ti ailei puasain leili Ingi Haeu, laha nahih hani kapi Pita ape kamei i, "Jises, tel masiwi ti amuto, i totowi moni hani Ingi Haeu?"

²⁵ Pita pahoi lato "Se, i axiasi." Ape i nahih hani leili tehu ing Jises toto.

Jises kak suei non i, "Saimon o namiloi ukek ia? Ti teka masiwi waxy moni, laha waxy ti teka akikilaha ka ti teka liai?"

²⁶ Pita pahoi i ukek, "Teka seilon liai."

Ape Jises ukek, "Na masin ien, teka akikilaha kum towi moni. ²⁷ Tuah kumahe pahakalu aile halengealaha. Nahih haniwa peixux ape towiwa tehu kapetum haniwa itax. Tok xixi uli o ahetiwa, heiwa awan ape o tunahi tehu moni. Waxiwa ape kau haniwa Ingi Haeu, ati ti kalu."

18

*Aita tel pate tuah?
Mk 9:33-37; Lk 9:46-48*

¹ Ti lokon ien tesol kahikahi Jises kamei i, "Aita tel pamu tuah leili teka seilon ti Haeu neneini?"

² Jises tiloi hatuhi tel akaik matalato. ³ Ape i ukek, "Nga kakane hawane amuto, na amuto kum towiahu ti lialui woumuto ape sohot hanowi akaik kokol, amuto kum tuai uke teka seilon ti Haeu neneini. ⁴ Aile ape na tel seilon i teheni i hanowi tel akaik ie, i tel pate tuah leili teka seilon ti Haeu neneini.

⁵ "Na tel i waxy auni akaik masin ie nake nga, se i aunini nga. ⁶ Tuah na tel i aile haputa tel seilon kalak i seilon naun ma namilon kumahe xoxoan tetak, pamu ewian na laha xinoti tehu mes lapal he kinawen ape hataxixi hani ilam.

⁷ "Pate lialun wanen ti teka seilon, nake kilan waliko lialun i tohongi haputa laha. Tesol waliko ien liai i sohot, tuahne pamu lialuan ti teka seilon laha aile haputa seilon liai. ⁸ Na amuto hapuasa tepaun minamuto ma na aemuto ailei saun lialun, koti xaxaweniwa. Pamu ewian na amuto uke tonain kapi Haeu ti tap tahi tapaoan ti minamuto ma na aemuto tepaunue. I se pamu ewian ti na Haeu towi amuto hetekie minamuto ma na aemuto hupaun hani tesol ti tehot ah xekean tap tahi pehoan. ⁹ Na amuto hapuasa tepaun pulamuto ailei saun lialun, axixi xaxaweniwa. Pamu ewian na amuto uke tonain kapi Haeu ti tap tahi tapaoan ti pulamuto tepaunue. Ien se pamu ewian ti na Haeu towi amuto hetekie pulamuto hupaun hani leili tehot ah, tetesol ti kawatan tap tahi tapaoan.

¹⁰ "Amuto kum paxai wawasi seilon tenen teka liai ukek laha kaliap. Nga hone amuto, teka engel ngahatia alaha pon kaxialaha hani tel Tamak Haeu, tuahe na telao."

*Menge tok sipsip i nahih mitaxia
Lk 15:3-7*

¹¹ Jises kakane tesol kahikahin, "Nga tel Nati Seilon sohotuma neiniae teka seilon hani Haeu, teteke laha xauxaun tetan nake ti lialui woulaha. ¹² Amuto namiloi ukek ia? Na masin tel seilon i hina 100 sipsip ape tok i nahih mitaxia, hoi liai i nahih salili tesol 99 ape i nahih upia tok i mitaxiawen.

¹³ Na masin i tunahiwa, nga kakane hawane amuto, i amuke hawane i akulai amukei tesol 99 lato tai mitaxia. ¹⁴ Tim masin tel Tamak Haeu watakai wanen kalak tel seilon naun ti teka seilon tetan nahih mitaxia ape i selia tetan."

Na tel i aile saun lialun

¹⁵ Jises kak ulea ukek, "Na tel kahikahik aile saun lialun hani tel ti amuto, nahih haniwa kapin ti mewenae amulu ape kak nexi haniwa i saun lialun ti i aile. Na masin

i hong wahleni kakaiam, o aile hasoliawen wasolamulu.¹⁶ Tuahé na i hong watakai kakaiam, waxiwa tel ma na hua seilon lia lehe tel ma na hua hong paxai kakaialmulu.¹⁷ Ape na i kum hong, kakanewa teka kahikahik liai. Na tin i kum hong teka kahikahik liai, ien, paxai tioiwa ka i masin tel i kum soh ti Haeu ma tel ti woun lialun wanen.

¹⁸ “Nga kakane hawane amuto tesol kahikahik, waliko tenen amuto halini ti itan ie, Haeu tin i halini. Waliko tenen amuto wahleni seilon aile ti itan ie, Haeu tin i waheni.

¹⁹ “Ape nga kakane aheke amuto, na masin hua ti amuto kamei Haeu tenen na waliko hetekie namil teikawe, tel Tamak Haeu i aile hani amulu.²⁰ Ape na hua ma na tolou lato apuhetekie nake lato kahikahik, nga kapi lato.”

Saun ti oxoxiai seilon ti kawatan ti waliko lialun laha aile

²¹ Imuh Pita nahih kamei Jises, “Tel masiwi, na tel seilon aile saun lialun hani nga, mongohun ia nga oxoxi i ti kawatan ti lialui woun? Tepanim huohu?”

²² Jises pahoi i ukek, “Kumahe tepanim huohu, tap tahi tilian!”

²³ “Nga kaxi tenen meng haxewaim. Aweisal ti Haeu neini seilon masin tel masiwi ti pahan waxi aliakei moniun ti teka unauan.²⁴ Imat wanen laha ati hani i tel seilon i tua kemu moniun lalap wanen, i pon kahi tel seilon na i pupuas ti ahang kilan.²⁵ Tuahé i tap moni ti hamatean. Aile ape tel masiwi hone teka unauan, ‘Hangainiwa tel seilon ien, tel axoan ma tesol natun hetekie hatesol soxian lehe nga uke aliake moniuk.’

²⁶ “Tel unauan lokuhu hani kapi aen ape kamei eliel i, ‘Tahanema nga! Atengiwa pake nga hamate hatapo monium.’

²⁷ “Tel masiwi tahane i ape hone i ukek, ‘Nga oxoxi o ti kawatan tetam. Kum hahamate moniuk.’

²⁸ “Ape tel seilon ien nahih. I tunahi tel puas akatan, tel i tua kemu moniun pate kokol. Kakanua i pohi isihu kinawé tel puas akatan ape lungéi i ukek, ‘Hamate hatapo moniuk!’

²⁹ “Tel puas akatan lokuhu hani kapi aen ape kamei eliel i, ‘Tahanema nga! Atengiwa pake nga hamate hatapo monium.’³⁰ Tuahé i watakai. Kakanua i hana tel puas akatan

hani he kalabus atengi tataen na i hamate hatapo moniun.

³¹ “Ti teka puas akatan liai hongoa, lolaha lialu. Ape laha nahih hone tel masiwi walihi tenen i sohotuen.³² Tel masiwi hongoa, i tiloi tel unauan kemuk i oxoxi ti kawatan tetan. I hone i, ‘O pate seilon lialun wanen! Nga oxoxiwen o ti kawatan tetam ape nga honewen o ka kum hahamate moniuk nake o kamei eliel nga.³³ Alahan o kum tahane tel puas akatan masin ti nga tahane o?’

³⁴ Tel masiwi lon lialu hawane ape i hana tel seilon ien hani he kalabus atengi tataen i hamate hatapo moni ti i kewen.”

³⁵ Ape Jises ukek, “Tel Tamak Haeu tin i aile hani amuto ukek ien na amuto kum oxoxi teka seilon liai ti kawatan ti waliko lialun laha aile hani amuto. Haeu pahan amuto aile hawanewa ti leili atemuto.”

19

Nakon ewi na seilon lioi axoan?

Mk 10:1-12

¹ Jises kak hatapoia ape i nahih salili Galili hani toan ti sai Judia, liai tepaun ti kan Jodan. ²Kilan wanen seilon nahih kakahiti i ape i haewia teka tinun.

³ Teka Parisi nahih kamei tohongi Jises, “Nakon ewi na tel wawan i lioi tel axoan ti tuahé na tenen?”

⁴ Ape Jises pahoi lato ukek, “Nakon amuto kum tioi kakain leili pepai Haeu ka ti hutuan wanen Haeu tanomi wawan hetekie hehin?⁵ Haeu ukek, ‘Aile ape tel wawan i salili tel tamani ma tel tinan ape i hukuma hani kapi tel axoan. Ape lalu sohot hanowi seilon tel.’ (Gen 2:24)⁶ Lalu ape kumahe hua, lalu masin seilon telawé. Waliko ti na Haeu hukumini, seilon kum seselai.”

⁷ Ape teka Parisi kamei i, “A alahan Moses kakawen ka ewi na tel wawan tai teik kakain ti sale lioiai tel axoan?”

⁸ I kakané lato, “Moses sowini hani amuto sale lioiai axoamuto hehin nake hanauamuto pate ailan. Tuahé ti hutuan wanen Haeu hahalini. ⁹ Nga kakané amuto, na tel wawan lioi tel axoan ti tel axoan tai aile saun lialun ti wawan hehin ape i waxi axoan tel hehin liai, tel wawan ien i ailewen saun lialun ti wawan hehin.”

¹⁰ Tesol kahikahin hone i, “Na sale tone hahunatun pate ailan masin ien, pamu ewian kaha kum sal!”

¹¹ Jises ukek, “Kumahe hatesol seilon laha pon na laha kum sal, mewenae teka na Haeu huali laha.¹² Salangawan tenen tenen

teka na laha kum sal. Hina seilon laha kum sal nake soxi tinulaha ti tanomiai akaik lialun ti laha takahama. Teka laha kum sal nake seilon liai aile halialu soxi tinulaha ti tanomiai akaik. Ape teka liai laha kum sal nake laha hani hatapo laha ailei puase Haeu. Tel na i hong xeu teik kakaiak, i hong wahleni.”

Jises lotu huali akaik kokol
Mk 10:13-16; Lk 18:15-17

¹³ Lokon ien teka seilon hakahita teka akaik kokol hani Jises. Pahalahi i hanawa minan he teka akaik ti lotu hualialato. Tu- ahe tesol kahikahin kahiloloi teka seilon.

¹⁴ Ape Jises ukek, “Tiliwen teka akaik nahih hani kapik, kum talo xaaxaweni lato. Seilon teka laha sohot hanowi teka akaik ie, Haeu neini aweisalulaha ape laha natun wanen.” ¹⁵Jises hana minan he teka akaik ti lotu hualialato ape i nahih salili tesol ien.

Tel seilon uluhu kilan soxi
Mk 10:17-31; Lk 18:18-30

¹⁶ Tel seilon nahih hani kapi Jises ape i ukek, “Tel masiwi, nga aile waliko la tenen solian lehe nga uke tonain kapi Haeu ti tap tahi tapoan?”

¹⁷ Ape Jises kamei i ukek, “Nake lahan o kamei nga sale saun tenen solian? Na masin o kamei nga, namiloi paxaiwa nake mewenae Haeu solian ma i tioi waliko tenen solian. Na paham o uke tonain kapi Haeu ti tap tahi tapoan, hong usiwa nauna tetan.”

¹⁸ I kamea, “Nauna la?”

Jises pahoi i, “Haeu ukek, ‘Kum tetelei seilon, kum ailele saun lialun ti wawan hehin, kum xuuxuina, kum kau puputini kakain.’ ¹⁹Hongoa kakai tamam tinam ma aile hasolia hanowi lalu ma waheniwa seilon liai hanowi ti o waheni aliakte o.’” (*Exod 20:12-16; Lev 19:18*)

²⁰ Tel seilon uluhu ukek, “Nga usi hahatapo tesol nauna ien. Ape nga aile ulea waliko la?”

²¹ Jises hone i, “Na paham Haeu namiloi ukek o seilon sawisawin wanen, nahih hangaini hatapoa soxi amape moni haniwa teka seilon tap soxi lehe imuh o uke kahum ti tone Haeu. Ape nahih kahitima nga lehe o sohot kahikahik.” ²²Tel seilon uluhu hon- goa, i nahih alia hetekie tatahan, nake soxi- an pate kilan ape i watakai na i hangaini.

²³ Jises hone tesol kahikahin, “Nga kakane hawane amuto, seilon tenen kilan soxi, pate ailani wanen ti usiaw aweisal ti Haeu neneini. ²⁴Nga kakane ulei amuto, ailan-

wanen ti tok kamel na i soh non he tewau aweing laha axai nil ti sawitiae maia tuahe pamu ailiani ti seilon tenen kilan soxi ti usiaw aweisal ti Haeu neneini.”

²⁵Ti tesol kahikahin hongoa, lato ongake hawane, lato ukek, “Lehe ape aita pon usiaw aweisal ti Haeu neneini?”

²⁶Jises Paxaiwa lato ape i ukek, “Ti mewenae kui seilon i kum pon. Tuahe hetekie huhual ti Haeu, seilon pon.”

²⁷Pita ukek, “Paxaiwa, amite tesol kahikahim salili hatapoen waliko ti amite ape amite kakahiti o. Kaie amite uke waliko la?”

²⁸Jises kakane lato i ukek, “Nga kaxi haxewa hani amuto, taen ti Haeu aile sohi hasolia hatapo lawe waliko, nga tel Nati Seilon nga uke tesol tonain ti neiniae seilon hetekie poh ma xewai Haeu. Ape amuto tesol kahikahik, amuto uke tesol tonain ti kolongeniae saun ti teka seilon ti Haeu.

²⁹Ape hatesol teka laha salili tonalaha, ukalalaha, tualaha, tamalaha, tinalaha, natulaha ma na kinelaha nake laha kahikahik, laha uke pamu mongohuan, hetekie tonain kapi Haeu ti tap tahi tapoan. ³⁰Tuahe kilan teka axalaha lapal ti aope ie, Haeu Paxai ukek laha seilon tenen tap axalaha ape seilon ti tap axalaha ti aope ie, Haeu Paxai ukek laha seilon tenen axalaha lapal.”

20

Menge teka puasakei kin

¹“Aweisal ti Haeu neini seilon masin ie. Letuan tehu tel seilon nahih ngah seilon na laha puas he kinen. ²Ti i tunahawa, i hone laha ka i hani laha moni kahi puasain ti ngain tehu. Ape i talo laha puas he kin.

³“Sai letu tutuen i nahih hani tone apuhain ape i ningahi teka seilon tua tutu, tap puasalah. ⁴I hone lato, ‘Amuto tin nahih puas haniwa he kinek. Ape nga hani amuto moni kahi puasain ti na amuto aile.’

⁵Ape laha nahih puas. I nahih ulea ti lape ngain ape tehu ti al pahua teik, i aile waliko tin tetenen.

⁶“Ti sai alohah i nahih ulea hani tone apuhain ape i ningahi hina seilon tua tutu ien. I kamei laha, ‘Alahan amuto tua tutu ie ngain hatehu, tap tenen waliko na amuto aile?’

⁷“Laha ukek, ‘Tap tel seilon axiwen amite puasain.’

“Ape i hone laha, ‘Na masin ien, amuto nahih puas haniwa he kinek.’

⁸ “Ti pate alohah, tel tame tesol kin hone tel unauan, ‘Tiloima teka laha puasalaha. Hutuiwa ape haniwa laha kahi puasalaha. Hutuiwa teteka nga hapuasa laha tapeinan.’

⁹ “Teka laha hutui puasain ti sai alohah nahima ape i hani laha kahi puasain ti ngain tehu. ¹⁰ Teka laha hutui puasain imat nahima. Laha sokok kahulaha pamu lapan ti teka liai tuahe tin i hani laha kahi puasain ti ngain tehu. ¹¹ Laha waxixa kahulaha ape laha lengeini tel tame tesol kin. Laha ukek, ¹² “Teka laha nahima puas tapeinan laha puasawen teik kukunan. Amite puas eliel ngain hatehu he kekei alon tuahe kahumite tekewe.”

¹³ “Tel tame tesol kin kak pahoi laha, ‘Oie, kumahe nga aile puluti amuto. Puki amuto wahreni nga hani amuto kahi puasain ti ngain tehu. ¹⁴ Ie, waxixa kahumuto ape nahih alia haniwa tonamuto. Teka nga hapuasa tapeinan nga hani laha moni mongo-hun tekewe masin ti nga hani amuto nahe pahak nga aile ukek ien. ¹⁵ Nakon lialan na nga hapuasa moniuk usi tenen ti pahak? Nakon amuto lengeini nga nake nga ongawi hani teka seilon liai ape nga hani laha pamu i akulai lapan ti namilomuto?’”

¹⁶ Ape Jises ukek, “Kilan teka laha namiloi ukek laha seilon pate tuah ti aope ie, Haeu namiloi ukek laha seilon pate naun. Ape teka laha namiloi ukek laha seilon pate naun, Haeu namiloi ukek laha seilon pate tuah.”

*Jises kak ulea sale matean
Mk 10:32-34; Lk 18:31-34*

¹⁷ Ti Jises nahih hahaniwa Jerusalem, i kaxi hani tesol huopanim hua kahikahin waliko ti na i sohot hani i ien. I ukek, ¹⁸ “Hongoa! Ti na ape kako Jerusalem laha hana nga tel Nati Seilon hani mini teka masiwi tuah ti hukuminiai Haeu ma seilon, ma teka hanauai nauna ti Moses. Lato noseni teleiak. ¹⁹ Lato hangaini nga hani mini teka seilon ti Rom. Laha soxeni nga, heti nga ma tahi hakea nga hani he kros ape nga mat. Tuah muhi ngain toluhu nga xahat alia.”

*Katekate ti tel tini Jeims ma Jon
Mk 10:35-45*

²⁰ Tel axoi Sebedi nahih hani kapi Jises hetekie hua natun wawan. I lokuha hani mateiwaun lehe i katei i tenen. ²¹ Jises kamei i, “Paham waliko la?”

Tel hehin ukek, “Tataen o sohotua tel Masiwi ti neiniai hatesol seilon, pahak o

hanawa huhua natuk ie kapim, tel teapaun manau, tel teapaun kalamau lehe lalu sohot masiwi ti neiniai seilon.”

²² Jises hone hua natun, “Amulu kum tioi waliko tenen amulu kakamei. Nakon amulu lang pahoi uke laman ti ape nga lang pahoi?”

Lalu ukek, “Amili pon.”

²³ Jises hone lalu, “Salan imuh amulu lang pahoi laman ti nga lang pahoi. Tuah kumahe nga tel kilamiae seilon ti tone minak manau ma na kalamau ti neiniai seilon. Tonain ien Haeu tel Tamak hani teka i kilamiwen.”

²⁴ Ti tesol huopanim kahikahin hongoa, lolato lialu hawane ti hahutalin. ²⁵ Jises tilo apuhini lato hatesol ape i ukek, “Amuto tioi ka kewi teka masiwi ti he tehu pon ie, lato neini halialu teka seilon hahitakalato ape lato lungi laha ka tua hongoa lato. ²⁶ Tuah saun tenen ien kewak i kum sosohot leilomuto. Na tel ti amuto pahan ax lalap, i sohot hawanewa tel ti hualiae seilon. ²⁷ Ape na tel ti amuto pahan i sohot seilon tuah, i kewa unaumuto hatesol. ²⁸ Tataen nga tel Nati Seilon, kumahe nga toma lehe seilon to unauk, nga toma unaui seilon. Ape nga mat ti ukei kahi lialui woi seilon.”

*Jises haewia hua pulaxa
Mk 10:46-52; Lk 18:35-43*

²⁹ Ti Jises ma tesol kahikahin nahih saliliwa Jeriko, kilan wanen seilon kakahiti lato. ³⁰ Lokon ien, hua seilon pulaxa toto pape aweisal. Lalu hong ka Jises nanahima ape lalu tilol eliel, “Tel Masiwi, tel kahi nati David, tahanema amili!”

³¹ Teka seilon tumei hapangisu lalu. Tuah lalu tilol eliel ahe, “Tel Masiwi, tel kahi nati David, tahanema amili!”

³² Jises tu hamalum ape i kamei lalu, “Pahamulu nga aile waliko la hani amulu?”

³³ Lalu ukek, “Pahamili amili paxapax.”

³⁴ Jises tahane hawane lalu ape i akeni soti pulalalu. Tataen ien wanen pulalalu ewi ape lalu nahih kahiti i.

*Jises soh hani Jerusalem
Mk 11:1-11; Lk 19:28-44; Jn 12:12-19*

¹ Ti Jises ma tesol kahikahin nahih xohi haniwa Betfage, pape tehu Maunt Oliv, ti kane Jerusalem, i talo hua kahikahin imat tetan. ² Ape i hone lalu, “Amulu nahih haniwa tewau toan mateiwaukako. Amulu ningahi tok donki hehin hetekie tok natun

ien, xinotan. Amulu upatiwa ape hakahitama. ³ Na tel seilon kamei amulu kalaih amulu upati, honewa i ka tel Masiwi pahan pake i atoheni aliake koseni.” “Waliko ien i sohot hapoponowi hawane waliko ti tel kuluiak kakai Haeu kakawen. I ukek,

⁵“Honewa teka seilon ti Jerusalem, ‘Paxaiwa, tel Masiwi ti amuto i luluainima

kumahe masin seilon ti hile, i toto patul he tok donki, tok donki uluha.’” (Zech 9:9)

⁶ Huhua kahikahin nahih aile waliko ti Jises kakak. ⁷ Lalu hakahita tok donki hetekie tok natun. Lalu axaheni puxuaulaluh tehitih tok donki uluha ape Jises to.

⁸ Kilan wanen seilon axaheni puxuaulala ma kai hatoh he aweisal mateiwei Jises. ⁹ Teka seilon nanahiwa mateiwaun ma teka nanahima muhin, hatesol tilol ausini eliel ukek,

“Kako sameniwa ma amukewa tel kahi nati David, tel i nahih hehetekiema poh ma solian ti Haeu!

Kako sameniwa Haeu tel pohen tapein!” (Ps 118:25-26, 148:1)

¹⁰ Ti Jises tahiawa Jerusalem, hatesol seilon laha wiliwilia ape laha he kamekam, “Aita tel seilon ie?” ¹¹ Teka seilon kakahiti Jises laha ukek, “Le se Jises, tel kuluiak kakai Haeu. I ti Nasaret leili Galili.”

Jises usi xaxaweni teka laha hangaini soxi mate Ingi Haeu

Mk 11:12-19; Lk 19:45-48

¹² Muhih Jises nahih hani mate Ingi Haeu. Kilan seilon hahangaini soxi ma manihuhen. Hangainiai waliko ti laha pate lialun. Ti Jises ningahiwa, i usi xaxaweni laha. I aka suoteni tesol sau ti sohiai moni ma tesol sau ti teka seilon hahangaini pux. ¹³ Ape i kakane nau laha, “Kakai Haeu ukek, ‘Tehu ingak ing ti lotu.’” (Isa 56:7)

Jises kakatale, “Tuahé amuto aile hanowika ing ti tone munai teka xuxuina!” (Jer 7:11)

¹⁴ Tataen ien, teka pulaxa ma teka suxuxu nahih hani kapi Jises ape i haewia laha.

¹⁵ Tuahé teka masiwi tuah ti hukuminiai Haeu ma seilon, ma teka hanau nauna ti Moses leng hawane ti laha ningahiwa waliko tenen i aile ti kui poh ma ti laha hongoa teka akaik tilol eliel hawane mate Ingi Haeu, “Kako sameni ma amuke tel kahi nati David!”

¹⁶ Teka masiwi kamei Jises, “O hongohong waliko ti tesol akaik titilol?”

Jises ukek, “Nga hongohong. Nakon amuto kum tioi waliko ti Haeu kaakane tel Natun? I ukek, ‘Taen teka akaik ma teteka pate kokol laha sameni o.’” (Ps 8:2)

¹⁷ Ape Jises nahih salili laha ti Jerusalem. I nahih hani Betani ape i to ipong tehu ien.

Tea pata axan fig tap huan

Mk 11:12-14, 20-26

¹⁸ Pate letu ti ngain liai telao, ti Jises ma tesol kahikahin nahih alia hahaniwa Jerusalem, i hitol. ¹⁹ Ape i ningahi tea pata axan fig pape aweisal. I nahih paxai na masin hina huan, tuahe tap. Mewenae kaun. Kakanua i hone tea pata, “O kum hua lian tehue!” Tataen ien wanen tea pata mat.

²⁰ Tesol kahikahin paxaiwa, pate lato ongake hawane. Lato kamei i, “Tea pata mat kosea ukek ia?”

²¹ Jises ukek, “Nga kakane hawane amuto, na namilomuto xox hawane ti Haeu, tap kakapax, amuto pon ailei waliko masin ti nga aile haniwen tea pata ie. Kumahe mewenae tenen ien, tin amuto pon kakanei tehu maunten ie, ‘Hutawa tesol ien towia haniwa itax,’ ape i sohot ukek ien. ²² Na amuto soh hawane ti Haeu, waliko tenen tenen na amuto kamei i, i aile hani amuto.”

Aita sowini hani Jises puasatin ti i aisle?

Mk 11:27-33; Lk 20:1-8

²³ Ti Jises hahanau teka seilon mate Ingi Haeu, teka masiwi tuah ti hukuminiai Haeu ma seilon, ma teka masiwi liai nahih hani kapin ape kamei i, “Aita hone o ailei waliko ti o aile?” Aita sowini hani o?”

²⁴ Jises ukek, “Nga kameimu amuto tenen kamekame. Na amuto pahoi hani nga, nga kaxi hani amuto tetel i sowini hani nga.

²⁵ Kaxi haniima nga, aita sowini hani Jon baptaisiai seilon, Haeu ka seilon?”

Ape lato kakak wasolalato, “Kaie kako kak ukek ia? Na kako ukek Haeu sowini hani Jon, i kamei kako, ‘Na masin ien, alahan amuto kum soh Jon?’ ²⁶ Tuahé na kako ukek seilon sowini hani i, kaie waliko la i sohot? Kako lepetawa nake kilan seilon ukek Jon se tel kuluiak kakai Haeu.”

²⁷ Aile ape lato hone Jises, “Amite kum tioi aita sowini hani Jon.”

Jises kakane lato ukek, “Nga tin nga kum kaxi hani amuto aita hone nga ailei waliko ti nga ailele.”

Menge hatotaman

²⁸ Jises hone teka masiwi ti teka Ju ukek, "Hongoa, nga kaxi hani amuto tenen meng. Tel seilon ma hua natun wawan. Tel tamalalu hone tel natun pamu i ukek, 'O nahih puas haniwa he kin tetelao!' ²⁹ Tel natun watakai tuahe imuh i towiahu namilon ape i nahih puas.

³⁰ "Tel tamalalu hone ulea tel natun liai waliko tin tetenen. Tel natun ukek, 'Ewi, nga nahih puas.' Tuahe i tai nahih."

³¹ Ape Jises kamei lato, "Aita tel ti lalu i hong usi kakai tel taman?"

Lato ukek, "Tel pamu."

Jises ukek, "Nga kakane hawane amuto, teka seilon ti saun lialun masin teka waxiai moni hani tel masiwi ti Rom ma teka hehin laha eng akati wawan ukek moni, laha hong usi Haeu i xoini amuto. ³² Ti Jon Baptis kola hahani amuto aweisal sawisawin, amuto kum soh kakaian. Tuahe teka waxiai moni ma teka hehin ailei saun lialun, laha soh. Kalak amuto ningahi laha hong usi kakaian, amuto kum towiahu ti lialui woumuto hani Haeu ma amuto kum soh tetan."

*Menge teka ngahatiai tesol kin
Mk 12:1-12; Lk 20:9-19*

³³ Jises ukek, "Nga kaxi ulei tenen meng liai. Tel seilon seini tesol lalape kin ape i tiehi kalini. I tahiwi tewau wal, tone pisihu waxiai kani huai pata ape i atai tehu kokole ing patul totone teka peteniai tesol kin. Ape i hani teka seilon puas ngahatiai tesol kin lehe tin i uke aliake hina huai pata. Ape i ku hani texux xuxauxaun. ³⁴ Ti huai pata pamua, i talo teka unauan hani he kin waxiai ti tetan. ³⁵ Tuahe teka ngahatiai tesol kin pohi teka unauan. Tel lato xai, tel lato telei ape tel lato hokai pot. ³⁶ Tel tame tesol kin talo hakila aheke teka unauan tuahe teka ngahatiai kin aile waliko tin tetenen.

³⁷ "Tapeinan i talo tel natun wanen. Namilon i ukek, 'Tel ie natuk wanen ma lato aile aluini.'

³⁸ "Ti teka ngahatiai kin ningahiwa tel natun, lato kakak alia puki lato, 'Tel natun wanen nanahima. Kako telei i lehe tesol kin ape ti kako.' ³⁹ Lato pohi towi xoini i hani melal ti tesol kin ape lato telei."

⁴⁰ Ape Jises kamei teka laha hongohong tenen mengon, "Ti tel tame kin aliawa, i aile waliko la hani teka ngahatiai kin? Amuto ukek i aile la?"

⁴¹ Teka masiwi ti teka Ju ukek, "I telei tesol seilon lialun ien ape tesol kin i hani he mini

teka seilon ti laha axi aliake i hina huai pata."

⁴² Jises hone lato, "Ala amuto tioi teik kakain ie:

"Tehu kuku teka ataiai ing hilisa,
Haeu aile ape i sohot kuku
tehu pamu tuah ti kuku liai.
Haeu aile ape kako amuam hawane." (Ps 118:22-23)

⁴³ "Nga kakane hawane amuto, Haeu kum neini amuto nake amuto kum hong usi kakaian. Haeu neini teka seilon laha hong kakaian ape laha aile waliko tenen pahan.

⁴⁴ Teka seilon laha hong watakai kakaiak, laha tunahi kawatan ma moloan lapal."

⁴⁵ Teka masiwi tuah ti hukuminiai Haeu ma seilon, ma teka Parisi ti lato hongoa kakai Jises, lato tioi i kak nanami lato. ⁴⁶ Lato upiup tewau aweisal ti xotian tuahe lato mamata nake kilan seilon ukek Jises se tel kuluiai kakai Haeu.

22

*Menge tehu angiaiin lalap
Lk 14:15-24*

¹ Jises uke ulei tenen meng ti i kakane teka seilon. I ukek, ² "Aweisal ti Haeu neini seilon masin na tel masiwi hone teka unauan apeseniae tehu angiaiin lalap ti salai tel natun wawan. ³ I talo tesol unauan nahih honei teka seilon i iloweni ti nahih haniang tehu angiaiin ti sala. Tuahe laha watakai.

⁴ "Ape i talo ulei tesol unauan liai hetekie kakaian. Lato ukek, 'An ti sala i apeasawen. Laha teleiwen hina bulmakau tenen xuxu solian ma lawe waliko i apeasawen. Nahih hanimia tehu angiaiin lalap.'

⁵ "Tuahe teka seilon ti tel masiwi iloweni, laha kum hong waxi kakaialato. Laha aile waliko ti pahalaha. Teka laha nahih hani he kinelaha, teka liai nahih hani puasalahia ti hangainiai soxi. ⁶ Ape teka liai akeni pohi tesol unauai tel masiwi. Laha aile halilau hawane lato ape teka laha telei. ⁷ Tel masiwi leng hawane. I talo tesol unauan ti hile telei teka seilon laha telei tesol unauan ape i hone lato luiai tehu taon ti laha.

⁸ "I tiloi tesol unauan liai ape i hone lato, 'Angiaiin ti sala i apeasawen, tuahe teka seilon ti nga ilolowii, laha kumahe solian ti i tapai laha to ti tehu angiaiin ti sala. ⁹ Amuto nahih haniwa aweisal ti tehu taon ie ape ilowi hatapoma teka ti na amuto tunahi.'

¹⁰ Tesol unauan nahih hani he aweisal ape

lato ilowi hatapo seilon ti lato tunahi, teka seilon sawisawin ma teka seilon lialun. Lato hakahita hatesol hani leili ing ti sala ape tehu ing xuh hawane.

¹¹ “Ti tel masiwi nahih soh paxai teka seilon lato hakahitama, i ningahi tunahi tel seilon kumahe i sosoia maia tenen ti angain ti sala.” ¹² Ape i hone i, ‘Oie, o ala kumahe ie. O tap maia tenen ti angain ti sala.’ Tuahue tel seilon kum tunah pahoan.

¹³ “Tel masiwi hone tesol unauan, ‘Xi-otiwa minan ma aen ape towi xoini haniwa i melal he tilokoan, tetesol tonain laha kau kawatan ma tangike moloan.’”

¹⁴ Jises kak tili kakaihan, “Haeu ilowi kilan seilon lehe i neini laha tuahe teka palai Haeu kilami.”

Moni hani Sisa tel masiwi tapein ti Rom Mk 12:13-17; Lk 20:20-26

¹⁵ Teka Parisi apuha ape laha sakal aweisal lehe Jises kak tunahi waliko tenen na i sului aliake i. ¹⁶ Lato talo hani kapin teka kahikahi lato ma teka tepaun ti Herod. Lato ukek, “Tel masiwi, amite tioi o seilon sawisawin. Ti o hanau seilon saun ti Haeu, kakain tenen salan. Woum o aile hani teka masiwi ma teka seilon naun lawe tekewe.” ¹⁷ O namiloi ukek ia? Ewi na kako hani Sisa moni ti pahan?”

¹⁸ Jises tioi ka lato pisi totohongi i ape i hone lato, “Lehomuto huoka. Alahan amuto kamei pisi nga? ¹⁹ Kola hanima nga tehu ti tesol puli moni lawe amuto hahani Sisa.” Lato hani i tehu. ²⁰ I kamei lato, “Kawe aita ma axe aita he tehu puli moni?”

²¹ Lato ukek, “Ti Sisa.”

Ape Jises hone lato, “Ien, waliko ti Sisa haniwa Sisa, waliko ti Haeu haniwa Haeu.”

²² Ti lato hongoa pahoan tetan, lato ong hawane ape lato nahih salili i.

Na seilon mat nakon i xahat alia?
Mk 12:18-27; Lk 20:27-40

²³ Ngain tin tetehu teka Sadusi nahih hani kapi Jises. Lato soh ka seilon maten kum moih alia. ²⁴ Lato ukek, “Tel masiwi, Moses tai hanawen na masin tel wawan i mat a i tap natun, tel ukalan kewa axoan tel hehin ien lehe lalu tan natululu ape tesol akaik nati tel i matewen. ²⁵ Hongoa mengomite. Telao hatotalin lato tepanim hua. Tel pamu i sal ape i mat, tap natun. Tel ukalan usian waxi axoan tel hehin. ²⁶ Tel usiai tel pamu tin i mat tap natululu ape tel usialulu uke axoan tel hehin. Waliko tin tetenen sohot hani lato hatesol. ²⁷ Tapeinan ape tel hehin

mat. ²⁸ Taen Haeu xahateni hatapo seilon maten, tel hehin ape axoi aita? Nake ati lato ukewen tel hehin ien.”

²⁹ Jises kak pahoi lato, “Namilomuto kumahe salan ka seilon maten kum moih alia nake amuto kum tioi kakai Haeu ma pohe Haeu. ³⁰ Taen teka maten moih alia, ape tapein tenen hahunatun. Ti tone Haeu, seilon kum sal masin teka engel. ³¹ Nga kaxi haxewa hani amuto sale xahatai seilon maten. Amuto tioi waliko ti pepai Haeu kakak. I kakaxi waliko ti Haeu kakak muhin ti Abraham, Aisak ma Jekop matewa. I ukek, ³² ‘Nga Haeu tetel ti Abraham, Aisak ma Jekop lolotui.’” *(Exod 3:6)*
Ape Jises ukek, “I Haeu ti teka seilon moihin nake teka seilon tetan laha matewen, laha kumahe salan maten.”

³³ Ti teka kilai seilon hongoa kakai Jises, laha ongaihan hawane sale hanauan tetan.

Nauna tuah tapein ti Haeu
Mk 12:28-34; Lk 10:25-28

³⁴ Ti tesol Parisi hongoa ka Jises kak hatahunosoen tesol Sadusi, lato apuha ape lato nahih hani kapin. ³⁵ Leilolato, tel ti hanaui nauna ti Moses i kamei pisi Jises. I ukek, ³⁶ “Tel masiwi, ti lawe nauna ti Moses laha nauna tuah tapein?”

³⁷ Jises kak pahoi i, “‘Waheni hawanewa Haeu tel Masiwi ti amuto, xoiniwa ti amuto waheni teka seilon liai. Amukewa Haeu ti leili tiamuto, namiloi eliel hawanewa i ma aile hatapoa puasan ti hatesol kuimuto.’” *(Deut 6:5)* ³⁸ I se nauna tenen tuah tapein i xoini lawe nauna. ³⁹ Tenen nauna usian i masin, “Waheniwa seilon liai hanowti amuto waheni aliake puki amuto.” *(Lev 19:18)* ⁴⁰ Huonen nauna ien se salangawee lawe nauna ti Moses ma hatesol waliko ti teka kuluiak kakai Haeu hanauen.”

Kahi nati aita tel Krais?
Mk 12:35-37; Lk 20:41-44

⁴¹ Ti tesol Parisi tutuen ien, Jises kamei lato, ⁴² “Kiae amuto namiloi ukek ia? Krais, tel seilon Haeu taloma, i kahi nati aita?”

Lato hone i, “Kahi nati David.”

⁴³ Jises kamei lato, “Na masin ien, alahan David axai i tel Masiwi tetan? Puki Holi Spirit hanamiloa David kak kewak,

⁴⁴ “Haeu kakane tel Masiwi tetak, toma papak tepaun manau ti neiniai seilon atengi tataen nga hanawa teka seilon laha pahoxai o hani hahitakam.” *(Ps 110:1)*

⁴⁵ Na masin David axai Krais tel Masiwi tetan, i kumahe tuahe tel ti kahi natun.”

⁴⁶ Tap tel ti lato kak pahoi uke i. Muhiin ape laha mamata kamei pisiai Jises.

23

*Teka hanaui nauna ti Moses ma teka Parisi
sameni aliake lato*

Mk 12:38-40; Lk 11:43-46, 20:45-47

¹ Imuh Jises kakane teka kilai seilon ma tesol kahikahin, i ukek, ² “Teka hanaui nauna ti Moses ma teka Parisi lato kukului puase Moses ti lato hanau seilon nauna tetan. ³ Tenen na lato hone amuto, amuto puas usiwa. Tuah amuto kum puas usiusi woulato nake puki lato kum puas usi kakaialato. ⁴ Lato lungei teka seilon usiai kilai nauna ailan ti puki ti lato, tuahe lato kum solonga ti usiai tesol nauna ien ma kum hana minalato hualiae teka liai.

⁵ “Lawe waliko lato aile se lehe seilon paxai sameni lato. Teik waliko teka Ju uke lohiae kakai Haeu ape laha xinoti he kawalahia ma huipaulaha sai kalamaun, lato aile halapa. Hinaloik maia teka Ju hakea he ngixi puxuaulaha ti kolakol ka laha ailele puase Haeu, lato aile hawelu aheke lehe seilon ningahi. ⁶ Lato waheni totean tuah ti tone angiaian lalap ma leili synagog. ⁷ Pahalato seilon namiloi kewak lato tuah ti puli lawe seilon ma pahalato seilon axaiwa lato ‘masiwi tuah.’

⁸ “Tuah amuto, kum hahani laha axai amuto ‘masiwi tuah’ nake amuto hatesol tekewe masin talin ma tuan. Telawé Masiwi ti amuto. “Aile ape amuto kum lolotui tel na seilon ti tehu pon ie nake ala amuto lotui tel Tamamuto Haeu. ¹⁰ Kum hahani laha axai amuto teka neinialaha nake telawé Krais neiniae seilon. ¹¹ Tel masiwi leiomoto i kewa unaumuto. ¹² Na tel i sameni aliake i, Haeu teheni i. Ape na tel i teheni aliake i, Haeu aile i seilon tuah.

*Jises kak hokai teka hanaui nauna ti Moses
ma teka Parisi*

Lk 11:39-44

¹³ “Amuto teka hanaui nauna ti Moses ma teka Parisi, Haeu axi hawane amuto kawatan. Lehomuto huoka! Waliko ti amuto hahanau i tiehi teka seilon ti Haeu neneini laha. Puki amuto, Haeu kum neini amuto ape amuto hasele teka ti pahalahia Haeu neini laha.

¹⁴ Amuto teka hanaui nauna ti Moses ma teka Parisi, Haeu axi hawane amuto kawatan. Lehomuto huoka! Amuto

pisi teka hehin axoalaha matewen lehe amuto seseke soxialaha ma ingalahia. Ape amuto aile lotu weluwelun lehe teka seilon namiloi kewak amuto sawisawin. Hui tesol waliko ien, kawatan ti amuto pamu sean.

¹⁵ “Salan, Haeu axi hawane amuto kawatan. Lehomuto huoka! Amuto lang koti kanitax ma amuto hasunga hani kilan xuxi ti waxainiai seilon tel hani Haeu lehe i soh tetan hanowi ti amuto. Ti amuto waxainiwa, amuto aile tel seilon ien i sohot lialau hawane, pamu lialuan ti amuto.

¹⁶ “Amuto masin teka pulaxa neiniae teka seilon. Haeu axi hawane amuto kawatan. Amuto kakaxi ka na tel kak kuinakei tehu Ingi Haeu, ewi na i kum aile usi, tuahe na tel kak kuinakei teik waliko tuah leili Ingi Haeu masin gol, amuto ukek i aile usiwa.

¹⁷ Amuto masin pulaxa a taxitaxiai! Tenen ia pamu tuah, gol ka tehu Ingi Haeu? Pake i aile ape gol tuah. ¹⁸ Tin amuto hanau seilon, tap tenen na tel kak kuinakei tesol tone waliko teka seilon kau hani Haeu leili Ingan. Tuah na i kak kuinakei waliko teka seilon kau hani Haeu, amuto ukek i aile usiwa.

¹⁹ Amuto masin teka pulaxa. Tenen ia pamu tuah, waliko tenen teka seilon kau hani Haeu ka tesol tone waliko laha kau hani Haeu? Pake i aile ape teik waliko tuah. ²⁰ Na amuto kak kuinakei tesol tone waliko teka seilon hani Haeu, amuto kuinake hehetekie hatesol waliko ti laha hahana ien. ²¹ Na amuto kak kuinakei tehu Ingi Haeu, amuto kuinake hehetekie Haeu, tetel i ingai tehu ing ien. ²² Na amuto kak kuinakei tone Haeu, amuto kuinake hehetekie Haeu ma tehu tonoton.

²³ “Amuto teka hanaui nauna ti Moses ma teka Parisi, Haeu axi hawane amuto kawatan. Lehomuto huoka! Amuto hani Haeu tenen ti huopanum soxihamuto masin kai pata ti hanamui an. Tuah amuto kum usi tesol nauna tuah ti Moses masin ailei saun sawisawin hani seilon, tahanei seilon ma puas usiai waliko ti Haeu pahan. Solian amuto hani Haeu tenen ti huopanum soxihamuto tuah tin amuto usi hetekiewa tesol nauna ien. ²⁴ Amuto masin teka pulaxa neiniae teka seilon. Pate amuto haeliel usiai nauna kokol masin na amuto xaxaweni lang he unumamoto uke amuto haleke, tuahe amuto kum usi nauna tuah ti Haeu. Ien masin ka amuto haleke tunahia tok pou!

²⁵ “Amuto teka hanaui nauna ti Moses ma teka Parisi, Haeu axi hawane amuto kawatan. Lehomuto huoka! Pate amuto

haeliel nuhiai melal ti kap ma pelet tu-ahe waliko ti leilon, amuto kema ti pipis ma halepelep.²⁶ Teka Parisi, amuto masin teka pulaxa! Nuhu haunimua leilomuto. Haunimua namilomuto ma atemuto lehe waliko amuto aile ma kak mewenae solian.

²⁷ "Amuto teka hanaui nauna ti Moses ma teka Parisi, Haeu axi hawane amuto kawatan. Lehomuto huoka! Amuto masin wanen amal tenen melal tetan haun ma paxaiān solian, tuahenamilomuto ma atemuto masin leili amal xuhai kui seilon maten ma waliko kohan.²⁸ Amuto woinakon ka seilon sawisawin tuahen salan wanen amuto xuhai saun lialun a amuto putini ka amuto ailele puase Haeu.

*Jises kak kilami hani lato kawatan
Lk 11:47-51*

²⁹ "Amuto teka hanaui nauna ti Moses ma teka Parisi, Haeu axi hawane amuto kawatan. Lehomuto huoka! Amuto tanomi hasolia hahawane amali teka kuluiai kakai Haeu ma teka seilon sawisawin liai a amuto kum usi kakaialato.³⁰ Ape amuto ukek na masin amuto ien lokon ti teka tamamuto ti matahaun, amuto tai huali laha teleiai teka kuluiai kakai Haeu.³¹ Puki kakaiamuto sului aliake amuto ka amuto kahi nati teka kuewen laha telei teka kuluiai kakai Haeu.³² Ien, amuto aile tinamiwa waliko tenen lialun ti teka kuewen hutuwen.

³³ "Amuto masin noh! Amuto kum salia ti tesol kau i kawatan tenen tap tahi tapoan.³⁴ Nga kakane amuto, nga talo hani amuto teka kuluiai kakai Haeu, teka seilon aneso ma teka hanaui saun ti Haeu. Amuto telei teka, amuto tahi hakea teka he kros, teka amuto heti leili synagog ape teka amuto usi haoxa hani toan tewau tewau.³⁵ Aile ape amuto uke kawatan ti teleiai teka seilon sawisawin, hutui ti teleiai Abel hani tataen ti teleiai Sakaraia tel nati Barakaia, tetel laha telei wasole Ingji Haeu ma tone waliko ti haniai Haeu.³⁶ Nga kaxi hawane hani amuto, kawatan ti tesol matemate ien, kuan teka seilon ti aope ie."

*Wawahen ti Jises hani Jerusalem
Lk 13:34-35*

³⁷ Ape Jises ukek, "Teka seilon ti Jerusalem, amuto telei teka kuluiai kakai Haeu ma amuto hokai teka liai pot, teteka Haeu talo hani amuto. Mongohuan pahak nga apuhini aumi amuto masin mom hehin poni natun hahitake paun, tuahen amuto watakai.³⁸ Aile ape Haeu lioi amuto ma kum ingai tehu Ingan hetekie tehu taon

kapimoto.³⁹ Nga kakane amuto, amuto kum ningahi ulea nga atengi tataen amuto ukek, 'Kako amukewa tel i nahih hehetekiema poh ma solian ti Haeu.'"
(Ps 118:26)

24

Jises ukek tehu Ingji Haeu laha toi hamanagan

Mk 13:1-2; Lk 21:5-6

¹ Ti lehe Jises nahih salili tehu Ingji Haeu, tesol kahikahin kakane i sale tesol ing ti i tanomi tehu Ingji Haeu.² Ape Jises ukek, "Amuto sasameni tesol ing ie. Nga kakane hawane amuto, imuh laha toi hamanagan ape tesol pot ti tesol ing i put silahota."

*Jises ukek kilan kawatan i sohot
Mk 13:3-23; Lk 21:7-24*

³ Ti Jises toto he tehu Maunt Oliv, tesol kahikahin nahih hani kapin ti mewenae lato. Lato kamei i, "Kaxi hanima amite lokon wanen ape waliko ien sohot? Kiae kikilam la i sohot imat ti aliaiam ma tapoi tehu pon ie?"

⁴ Jises ukek, "Kanipetiwa, kum hahani laha puluti amuto.⁵ Imuh kilan seilon ukek ka laha Krais. Laha puluti kilan wanen seilon.⁶ Ti amuto hong hilehile sosohot xohixohin ma xauxaun, amuto kum maa-mata. Waliko masin hoi liai i sohot tuahen kumahe ape tapoi tehu pon ie.⁷ Hilehile i sohot wasole xux, toan tewau hilei toan liai. Hitolo lalap i sohot ma hepekeun i nuea eliel ti xux tesol tesol.⁸ Waliko ien tuahen hutuui kawatan ti i luluainima imuh.

⁹ "Tataen ien amuto laha pohi. Laha aile lehe amuto kau moloan ma laha telei amuto. Kilan seilon ti lawe xux laha watakai hawane amuto nake amuto kahikahik.¹⁰ Kilan seilon laha soh tetak laha kapaxe aliake. Laha he wawatak alia laha ma laha he hahangain alia laha.¹¹ Kilan seilon laha woinakon ka teka kuluiai kakai Haeu ape laha puluti kilan wanen seilon.¹² Saun lialun kila kasia ape kilan seilon lioi saun ti wawahen.¹³ Tuahe teka na laha tu matuha kahikahik atengi taun ti kawatan tapo, Haeu waxi auni laha lian tehue.¹⁴ Ape teka kahikahik kaxi ahuti meng solian ti Haeu neini seilon hani hatesol xux. Taen ien tehu pon ie i tapo.

¹⁵ "Amuto hong matainawa. Ngain tehu i luluainima amuto ningahi waliko ti Daniel tel kuluiai kakai Haeu kak kilamiwen. Amuto ningahi waliko pate lialun wanen ti seilon tanomi, i tetesol ti Haeu hahalini.

¹⁶ Tataen ien, teka laha toto Judia, kewak laha kiliwau muna haniwa he maunten.
¹⁷ Tel na i melal, tin i kiliwawa. I kum alia hahani leili ing waxiai soxian.
¹⁸ Tin masin na tel i he kin, liai i kum alilia hani leili ingan waxi palahai puxuaun. Tin i kiliwawa.
¹⁹ Taun tehu ien, kawatan wanen ti teka hehin tialaha hina akaik ma teka natulaha susus tutuen.
²⁰ Kameiwa Haeu lehe taun ien i kum sohot leili taun ti waiwain ma na telao Sabat nake ngain tehu ien hahalin ti puasain ma kiliwain.
²¹ Kawatan ti ien i xoini kawatan ti imat, ti ulti tanomiai tehu pon ie haniwa taen imuh.
²² Tuahé Haeu namiloi teka seilon tetan ape i koti hakukuna taun lialun ien uke tap seilon moih.

²³ “Taun tehu ien, na tel hone amuto, ‘Paxaiwa, Krais ie,’ ma na i ukek, ‘Paxaiwa, Krais io,’ kum hong sohosoh.
²⁴ Hina seilon puputa sohotuma ukek ka laha Krais ma teka ukek laha kuluiak kakai Haeu. Laha aile hashotu waliko lapal tenen tenen ape laha tohongi pulutiai teka seilon ti Haeu.
²⁵ Hongoa! Nga hahongo pepelei amuto waliko na i sohot. Amuto lepetawa!

²⁶ “Na laha hone amuto, ‘Paxaiwa, Krais io, he lohong,’ amuto kum nanahiwa. Tin masin na laha hone amuto, ‘Krais ie, leili tehu ing,’ kum sohosoh.
²⁷ Nga tel Nati Seilon sohotuak hanowi usil i xep koti maun hutuima ti angiba haniwa ahang.
²⁸ Amuto tioi xixi tetesol na amuto ningahi taliyah. Tin masin amuto tioi aliaiak ape i xohiwen taen ti amuto ningahi waliko ti naga kakanewen amuto.

*Aliai Jises ma tapoi tehu pon ie
Mk 13:24-27; Lk 21:25-27*

²⁹ “Muhi kawatan ien,
“‘al i kum kam,
pangapang i kum xeu,
kohot ti he maun i put,
hatesol waliko ti he maun i nuea.’ (Isa 13:10, 34:4)

³⁰ Tataen ien, kolakol ti aliaiak tel Nati Seilon i sohot he maun. Teka seilon ti lawe xux laha tang mamata. Ape laha ningahi nga tel Nati Seilon mosulih patul he maun hetekie lalape poh ma soliae talepaei xewaiak.
³¹ Tataen ien nge talo tesol engel, spirit solian ti Haeu. Lato kuini suhusuh ape lato waxi apuhini teka seilon Haeu kilamiwen tetan ti tesol tesol, ti sai ahang, angiba, haiup ma tola.

*Paxai kilami haniwa talil
Mk 13:28-31; Lk 21:29-33*

³² “Amuto paxai kilami haniwa talil. Ti kaun mak put, amuto tioi ka taun ti aupol angiba.
³³ Tin masin, taen amuto ningahi tesol waliko nga kakanewen amuto ape i sohot, amuto tioi kewak aliaiak ape i xohi hawanewen.
³⁴ Nga kakane hawane amuto, hina seilon ti ape ie laha kum matemu atengi tataen waliko ien i sohot.
³⁵ Maun ma xux ti ape i tapo tamus tuahe kakaiai hamalum lian tehue.

*Apeasawa ti aliai Jises
Mk 13:32-37; Lk 21:34-36*

³⁶ “Tap tel tioi ngain tetehu ma lokon wanen tesol waliko ien i sohot. Teka engel, spirit solian ti Haeu, kum tioi ma puki nga tel Natun, tin nga kum tioi, mewenae tel Tamak Haeu tioi.
³⁷ Aliaiak tel Nati Seilon i hanowi lokon taun ti Noa.
³⁸ Lokon ien, imat ti Haeu hasomu mat atuhil lawe xux, teka seilon laha ang, un ma sal amuam atengi tataen ti Noa soh hani leili tea waian.
³⁹ Laha amuam luh ape laha kum tioi waliko ti lehe i sohot. Ape ti mat somule i soheni hatapo laha. Tin masin wanen aliaiak tel Nati Seilon, i haonga seilon.
⁴⁰ Telao ngain ien hua wawan lalu pupuas he kin ape nga tel Nati Seilon waxi tel ape tel tiliwen.
⁴¹ Hua hehin lalu nunuhi api. Nga waxi tel ape tel tiliwen.

⁴² “Aile ape apeas peleawa nake amuto kum tioi lokon wanen nga, tel Masiwi ti amuto, aliamma.
⁴³ Amuto hong matainiwa, na masin tel tame tehu ing i tioiwen lokon tel seilon ti xuxuina nahima, alai i ah peteni lehe tel seilon kum soh hani leili ingan.
⁴⁴ Aile ape amuto kum luhuluh nake amuto kum tioi lokon wanen nga tel Nati Seilon aliamma.”

*Hanowiwa tel seilon puasan solian
Lk 12:41-48*

⁴⁵ Jises kak tatale ukek, “Amuto hanowiwa tel unaui tel tame tehu ing, lawe i aile aluin puasan. Tel tame tehu ing hani tel unaui ngahatiai teka unaui liai ma axiai analaha ti taun ti angiaiin.
⁴⁶ Na tel tame tehu ing aliamma ape i paxai tunahi ka tel unaui aile aluluini pupuas, i axi aluini kahun.
⁴⁷ Nga kakane hawane amuto, tel tame tehu ing hana i ngahatiai lawe soxian.
⁴⁸ Tuahé na masin tel unaui seilon lialun, i namiloi ukek, ‘Pake tel tame tehu ing aliaian kuen.’
⁴⁹ I hutui xaiiai teka unaui hahitakan ape i tua ang ma un kapi teka seilon ti unum.
⁵⁰ Imuh tel tame tehu ing alia haonga tel

unauan. ⁵¹ I axi hawane tel unauan ien kawatan. I towi i hani tesol ti teka laha woinakon ka ailei puase Haeu ape i tang atalahi nisun nake ti lalape moloan.”

25

Menge huopanim hehin uluha

¹ Jises kak ulea ukek, “Aweisal ti Haeu neini seilon masin tesol huopanim hehin uluha. Lato waxy tesol kamaialato ape lato nahih tengeni tel seilon i sal. ² Tepanim, lato hina namilolato a tepanim tap namilolato. ³ Tesol hehin tap namilolato, lato tai kau hasea wel ti kamaialato. ⁴ Tesol tepanim liai, lato kau hasea wel kamaialato. ⁵ Tel seilon ti i sal kuen tahaian, aile ape puli tesol hehin lihi ape lato matih.

⁶ “Ti luhui ipong lato hong tel seilon tititol ukek, ‘Tel seilon i sal ape i nanahima. Amuto nahih tengeniwa i.’

⁷ “Ien, hatesol hehin uluha lato xahat ape apeseni kamaialato. ⁸ Ape tesol hehin tap namilolato katei tesol hehin liai, lato ukek, ‘Tihi axima amite teik welaumuto nake kamaiamite ape lehe i peh.’

⁹ “Tuahe tesol hehin hina namilolato ukek, ‘Tap. I kum pon ti ati kamaikako. Amuto nahih kahui ngahawa.’

¹⁰ “Taen ti lato nahihia, tel seilon i sal tahiama. Tesol hehin lato apeasawen, lato soh akati i hani leili ing ti tehu angiaian lalap ti sala. Ape teka seilon kongini aweing.

¹¹ Muhiin ien tesol hehin uluha liai aliamia ape lato titiol, ‘Tel masiwi, tel masiwi, hei hanima amite kahip.’

¹² “Tuahe i kakane lato ukek, ‘Nga kum tioi amuto.’”

¹³ Ape Jises ukek, “Aile ape amuto pax petawa ma apeasawa nake amuto kum tioi lokon wanen aliaiak.”

Menge tesol seilon ngahatiai moni

Lk 19:11-27

¹⁴ Jises kak ulea ukek, “Aweisal ti Haeu neini seilon tin masin na tel seilon lehe i nenih salili tesol tonan hani tesol xauxaun. I tiloi tesol unauan ape i hani lato soxian lehe lato auni. ¹⁵ I namiloi anesoalato ti ngahatiai moni ape i sei moni hani lato. Tel i hani tepanim tomi moni, tel tom huohu, tel tom tehu. Ape i nahih. ¹⁶ Tel unauan i waxy tom tepanim, i hapuasa hulutini tesol moni ien ape kiliwan wanen i hasohotu tom tepanim liai. ¹⁷ Tel i waxy tom huohu, i hasohotu tom huohu liai. ¹⁸ Tuahe tel i waxy tom tehu, i tihini auni tesol moni.

¹⁹ “I kuewa tel tame tesol moni i aliamia. I tiloi tesol unauan lehe i upia paxai sale ngahatiai moni ti lato aunini. ²⁰ Ape tel unauan i waxy tom tepanim ukek, ‘Tel masiwi, o hani nga tepanim tomi moni. Nga hapuasa ape naga hasohotuen tom tepanim liai.’

²¹ “Tel tame moni ukek, ‘Puasam solian. O unauak solian, o auni aluini moniuk. O ngahati aluini waliko kokol, aile ape naga hani o ngahatiai waliko pamu tuah. Amuam akatima naga.’

²² “Imuh tel unauan i waxy tom huohu ukek, ‘Tel masiwi, o hani naga huohu tomi moni. Nga hapuasa ape naga hasohotuen tom huohu liai.’

²³ “Tel tame moni ukek, ‘Puasam solian. O unauak solian, o auni aluini moniuk. O ngahati aluini waliko kokol, aile ape naga hani o ngahatiai waliko pamu tuah. Amuam akatima naga.’

²⁴ “Ape tel unauan i waxy tom tehu ukek, ‘Tel masiwi, naga tioi o seilon ahian. O waxy an ti kumahe o seini. Paham o waxy moni ti seilon liai hasohotu. ²⁵ Nga mamata uke naga lioi monium ape naga tihini muneni. Monium ie.’

²⁶ “Tuahe tel tame moni ukek, ‘O seilon lialun ma nunuxa. O sokok naga seilon ahian, naga waxy an ti kumahe naga seini ma pahak naga waxy moni ti seilon liai hasohotu.

²⁷ Na o namiloi ukek ien, kaie ala o hapuasa tesol moni lehe naga uke palahi.’

²⁸ “Ape tel tame moni hone teka unauan liai, ‘Waxixa tesol moni toi i ape hanihi tel unauak i hina huopanim tomi moni. ²⁹ Tel na i aile aluini puasak, naga axi palahi waliko ti i auni ape i uke akulai kahun. Tuahe tel i kum puas alua, naga waxy aliakte teik kokolean toi i. ³⁰ Aile ape towiwa tel unauak puasan lialun haniwa tesol ti i tang atalahi nisun nake ti lalape moloan.’”

Jises hiniti seilon

³¹ Jises kak ulea ukek, “Taun ti naga tel Nati Seilon alia hetekiema hatesol engel ti Haeu, naga to Masiwi ti tesol tonain neiniae seilon hetekie poh ma xewai Haeu. ³² Seilon ti lawe xux apuha hani kapik. Ape naga sei laha uke hupaun masin tel ngahat i selai teka sipsip ti teka meme. ³³ Nga selai teka seilon sawisawin hani minak sai manau a teka liai sai kalamau.

³⁴ “Ape naga hone teka seilon minak sai manau, ‘Amuto se seilon teka tel Tamak Haeu aile hasolia hani amuto. Nahima lehe

Haeu neini amuto hani leili tesol tonain i apeseni haniwen amuto hutui ti tanoi tehu pon ie.³⁵ Ti nga hitol, amuto axi anak, ti pahak nga un, amuto axi unumak. Ti nga tel soliwa ti xuxumuto, amuto ilowi nga hani leili ing.³⁶ Ti nga tap sosok, amuto axi sosok. Ti nga tinun, amuto ngahati nga. Ti nga kakalabus, amuto nahih paxai nga.'

³⁷ "Ape tesol seilon sawisawin ukek, 'Tel Masiwi, lokon amite ningahi o hitol ape amite axi anam? Lokon paham o un ape amite axi unumam?' ³⁸ Lokon telao amite ningahi o soliwa ape amite ilowi o hani leili ingamite? Lokon amite ningahi o tap sosom ape amite axi sosom? ³⁹ Lokon amite ningahi o tinun ma na he kalabus ape amite nahih paxai o?'

⁴⁰ "Ape nga pahoi lato ukek, 'Nga kakane hawane amuto, waliko ti amuto aile haniwen tel na seilon, kalak na i tap wanen anan, tin masin ka amuto aile hahani nga.'

⁴¹ "Ape nga hone teka sai kalamau tetak, 'Amuto xaxaua kapik. Amuto teteka seilon amuto uke kawatan ti tel Tamak Haeu hani amuto. I towi amuto hani he tehot ah tap tahi pehoan i apeseni haniwen Satan ma teka spirit lialun tetan.' ⁴² Ti nga hitol, amuto tai axi anak. Ti pahak nga un, amuto tai axi unumak.⁴³ Ti nga tel soliwa ti xuxumuto, amuto tai ilowi nga hani leili ingamuto. Ti nga tap sosok, amuto tai axi sosok. Ti nga tinun ma he kalabus amuto tai nahih paxai nga.'

⁴⁴ "Ape lato pahoi nga ukek, 'Tel Masiwi, lokon wanen amite ningahi o hitol, paham kan, tel soliwa, tap sosom, tinun, he kalabus ape amite tai huali o?'

⁴⁵ "Ape nga pahoi lato ukek, 'Nga kakane hawane amuto, waliko ti amuto tai aile hani tel na seilon, kalak na i tap wanen anan, tin masin ka amuto tai aile hani nga.'

⁴⁶ "Ape tel Tamak Haeu i towi lato hani tesol kauai kawatan tap tahi tapoan ape teka seilon sawisawin i waxy hani tetesol ti lato to kapin lian tehue."

26

Upiai aweisal ti teleiai Jises

Mk 14:1-2; Lk 22:1-2; Jn 11:45-53

¹ Ti Jises kak hatapoa hatesol kakaian, i hone tesol kahikahin,² 'Amuto tioi ka Pasova, tehu angiai lalap ti laha telei sipsip wawan uluha, i hutui muhi ngain huohu. Tataen ien laha hangaini nga hani

laha telei. Laha tahi hakea nga tel Nati Seilon hani he kros.'

³ Lokon ien teka masiwi tuah ti hukuminiai Haeu ma seilon, ma teka masiwi liai, laha apuha hani leili ingi Kaiapas, tel masiwi tapein ti hukuminiai Haeu ma seilon.⁴ Laha xinoti tanomi kakain, ti tap tel seilon tioi, sale pohiai Jises ma teleian.⁵ Tuah laha ukek, "Kako kum aile ti leili Pasova uke teka seilon paxaiwa ape laha hutui hile wasolalaha."

Tel hehin tahi sanda he pati Jises

Mk 14:3-9; Jn 12:1-8

⁶ Lokon ien Jises Betani leili ingi Saimon, tel seilon kemuk hina nax lialun he tinun.

⁷ Ti lato to angiang, tel hehin kauma tehu sanda kahun pate lalap ma poun pate solian ape i tihni hani he pati Jises.

⁸ Ti tesol kahikahin paxaiwa, lolato lialu. Lato ukek, "Kalahai i tua tihni xoini tehu sanda?"⁹ Pamu ewian na hangaini waxiwen moni lalap ape hani teka seilon tap soxi."

¹⁰ Tuah Jises hone lato ukek, "Kum howowini i nakedi i ailele saun solian hani naga."¹¹ Teka seilon tap soxi laha lawe kapimuto, amuto pon hualialaha telao ti na pahamuto. Tuah nga kumahe lawe kapimuto,¹² I tihni sanda hani patuk apeseniak ti tehu tihihiak.¹³ Nga kakane hawane amuto, tesol tesol ti laha kaxi meng solian ti Haeu, tin laha kaxi waliko ti tel hehin aile hahani nga lehe seilon namen i."

Judas pahan i hangaini Jises

Mk 14:10-11; Lk 22:3-6

¹⁴ Imuh, tel ti tesol huopanim hua kahikahin axan Judas Iskariot, i nahih hani kapi teka masiwi tuah ti hukuminiai Haeu ma seilon.¹⁵ I kamei lato, "Na nga hangaini Jises hani amuto, hil moni amuto hani naga?" Ape lato hani i 30 moni silva.¹⁶ Taen ien ape Judas upia tehu taun solian na i hangaini Jises hani lato.

Apeseniai an ti Pasova

Mk 14:12-16; Lk 22:7-13

¹⁷ Ngain tehu hutuiai angiai lalap ti teka Ju ani bret tenen i tai xiu, tesol kahikahin Jises nahih hani kapin ape kamei i, "Paham amite apeseni tehu angiai ti Pasova hani ia?"

¹⁸ Jises hone lato, "Nahih haniwa Jerusalem kapi tel seilon nga kakanewen amuto ape honewa i, 'Tel masiwi ukek ka taun tetan ti Haeu kikilami ape i xohiwen, I ma tesol kahikahin ang tehu angiai ti Pasova leili ingam.'" ¹⁹ Tesol kahikahin aile

usi waliko ti Jises hohone lato ape lato apeseni an ti Pasova ien.

Jises ang tehu angiaian ti Pasova kapi tesol kahikahin

Mk 14:17-25; Lk 22:14-23; Jn 13:21-30; 1 Kor 11:23-26

²⁰Ti i alohahawa, Jises ma tesol huopanim huhua kahikahin to ang apuhu. ²¹Ti lato angiang, Jises ukek, “Nga kakane amuto, tel ti amuto hangaini nga hani minri teka laha watakai hawane nga.”

²²Ti lato hongoa, tialato kawat hawane ape tel ti lato kamei Jises, “Kaie kumahe nga?”

²³Jises kak pahoi lato ukek, “Tel na i xomi anan hani leili tehu tone an kapik, i tetel i hangaini nga.” ²⁴Nga tel Nati Seilon imuhu nga mat, masin ti kakai Haeu kakawen. Tuahé kawatan lalap tunahi tel seilon i hangaini nga hani laha telei. Pamu ewian na i tai takah!”

²⁵Judas, tel hangainian tin i kamea, “Tel masiwi, kaie kumahe o kakak nga?”

Jises pahoi i ukek, “Masin ti puki o kakawen.”

²⁶Leilon ti lato angiang, Jises waxi bret, i kak kemulik hani Haeu ape i wiki sei hani tesol kahikahin. I ukek, “Waxi anisha, se tupuak.”

²⁷I waxi tehu kap waen, i kak kemulik hani Haeu ape i hani tesol kahikahin. I ukek, “Amuto hatesol unumiwi. ²⁸Le se kakauk i xiweu ti kolakol ka Haeu oxoxi seilon ti kawatan ti lialui woulaha na laha hana namil xoxoan hani i. Mateak kola hapoponowi ka Haeu xinoti tenen namil haun’ kapi seilon. ²⁹Nga kakane hawane amuto, nga kum un ulea waen atengi tataen ti kako amuam leili tone Haeu tel Tamak.”

³⁰Muhin ien lato pakui tenen pak hani Haeu ape lato nahih ahuta hani Maunt Oliv.

Jises kak kilami ka Pita ase

Mk 14:27-31; Lk 22:31-34; Jn 13:36-38

³¹Jises hone lato, “Ti ipong tetehu amuto hatesol kiliwau salili nga, masin ti kakai Haeu kakawen, i ukek,
“Nga telei tel ngahatiai sipsip

ape teka sipsip kiliwau silahota!”
(Zech 13:7)

³²Ape Jises ukek, “Tuahé muhin ti Haeu xahateni aliakewa nga ti mateak, nga nahih hani Galili imat ti amuto.”

³³Pita hone Jises, “Nga kum ox salili wanen o, kalak na lato hatesol ox salili o.”

³⁴Jises hone Pita, “Nga kakane hawane o, imat ti tok mom wawan kokoini ipong tetehu, o putini ka o kum tioi wanen nga uke he tolulu.”

³⁵Tuahé Pita ukek, “Nga kum kak wanen ukek ien, kalak na nga mat ohoi o!” Ape hatesol kahikahin tin lato kak ukek ien.

Jises kakak kapi tel Taman Haeu he Getsemani

Mk 14:32-42; Lk 22:39-46

³⁶Jises ma tesol kahikahin tahiha hani tesol kin axan Getsemani. I hone lato, “Amuto tiliwen ie ti nga kakak kapi tel Tamak Haeu.” ³⁷I waxi Pita ma hua natu Sebedi, Jeims ma Jon. Tian pate i kawat ape i mamata xexex. ³⁸I kakane lato ukek, “Tiak pate kawatan, sikole i telei nga. Amuto tiliwen ie, ah akatima nga.”

³⁹I nahih ahewa teik kokol ape i eng kalunga hani hepekeun. I kamei eliel Haeu ukek, “Tel Tamak Haeu, na i pon, xaxaweniwa kawatan ti matemate ti lehe i tunahi ngal! Tuahé pahak nga usi namilom.”

⁴⁰Jises nahih alia hani kapi tolu kahikahin ape i ningahi lato mamatih. I kakane Pita, “Alahan pate amuto kum ah?” ⁴¹Ah kapitawa ma lotu tatalewa lehe amuto xoini totohong ti Satan na i tunahi amuto. Pahamuto ailean tuahé tupuamuto pate kawatan.”

⁴²Jises nahih ape i kakak ulea kapi tel Taman Haeu. I ukek, “Tel Tamak Haeu, na kumahe paham xaxaweniai kawatan ti matemate, nga usi namilom.” ⁴³Ti i nahih alia, i ningahi lato mamatih ulea. Lato kum kongini uke lihiai pulalato.

⁴⁴Ape he tolulu i nahih kakak kapi tel Taman. I kakak waliko tin tetenen. ⁴⁵Ti i nahih alia haniwa kapi tesol kahikahin i hone lato, “Amuto matih hahanau tutuen? Hongoa! Ape i meiwen taun ti nga tel Nati Seilon, laha hani he mini teka seilon lialun.”

⁴⁶Xahatawa! Seilon tetel hangainiak ape i nanahima. Kako nahih pahoi i.”

Laha xotí Jises

Mk 14:43-52; Lk 22:47-53; Jn 18:1-12

⁴⁷Jises kakak tutuen ti Judas tel ti tesol huopanim huhua kahikahin tahiawa. Kilan wanen seilon kakahiti i, laha akekeni ngol weluvelun ma pata ti hile. Teka masiwi tuahé hukuminiai Haeu ma seilon, ma teka masiwi liai taloa laha. ⁴⁸Judas hani peleiwun laha tenen kolakol, i ukek, “Seilon tel naga asoi taliopian se tetel ien. Amuto pohiwa!”

⁴⁹Judas nahih sawi hani kapi Jises ape i ukek,

“Tel masiwi, amuam ti Haeu hani o.” Ape i asoi taliope Jises.

⁵⁰ Jises hone i, “Tel lohuk, aile koseniwa waliko ti lehe o aile.” Laha pohi i ape akeni kongini. ⁵¹ Tel ti tesol kahikahi Jises waxi tea ngol welwelun ape i tai koti haputa taxingi tel unaui tel masiwi tapein ti hukuminiai Haeu ma seilon.

⁵² Jises hone i, “Hana aliakewa tea ngol haniwa he ingan. Seilon teka laha hil ani ngol, laha mat alia ti ngol. ⁵³ Oheak o kum tioi ka nga pon kameiai huuhal ti tel Tamak Haeu ape i pon hamosu hanima nga lawalawai teka engel ti hile? ⁵⁴ Tuahne na Haeu aile ukek ien, kakain ti kakai Haeu kaxiwen i kum sohot poponowu.”

⁵⁵ Jises hone teka seilon, “Amuto nahih hetekiema paumuto ti hile waxiak hanowi ka nga seilon lengean. Lawe ngain nga to hahanau teka seilon leili Ingi Haeu tuahne amuto tai pohi nga lokon ien. ⁵⁶ Tesol waliko ie i sohot hapoponowiai kakain ti teka kuluiak kakai Haeu taiwen.” Lokon ien hatesol kahikahin kiliwau salili i.

Teka masiwi ti teka Ju sului Jises
Mk 14:53-65; Lk 22:54-55, 63-71; Jn 18:13-14, 19-24

⁵⁷ Teka seilon laha akeni kongini Jises, laha ati i hani tehu ingi Kaiapas, tel masiwi tapein ti hukuminiai Haeu ma seilon. Teka hanaui nauna ti Moses ma teka masiwi liai hoi laha apupuha ien. ⁵⁸ Pita nahih otioti Jises tamus hani mate ingi Kaiapas. I to akati tesol peteniai Ingi Haeu. Pahan i Paxai waliko tenen na i sohot hani Jises.

⁵⁹ Kaiapas ma teka masiwi liai ti teka Ju, laha upiup teka seilon na laha aile kakain puputa ti sului Jises lehe waxi laha telei. ⁶⁰ Kilan seilon laha nahima tuahne kakaialaha i kum pon sului Jises. Tapeinan hua seilon nahima ape lalu ukek, ⁶¹ “Tel seilon ie ukek ka i pon toi hamananai tehu Ingi Haeu ape hatuhu aliakean leili ngain tolulu.”

⁶² Kaiapas tua ape i hone Jises, “Huhua seilon ie susului o. Hina kakaiam?” ⁶³ Tuahne Jises tai wix pohoi.

Ape Kaiapas hone ulei i ukek, “O tuohawa ti puli Haeu na masin o Krais tel Nati Haeu.”

⁶⁴ Jises kakane i, “Masin ti o kakawen. Nga kaxi hani amuto hatesol, imuh amuto ningahi nga tel Nati Seilon toto he tepaun min manau ti Haeu tel pohen wanen, neiniae seilon kapin ma ti nga luainima he maun.”

⁶⁵ Ti Kaiapas hongoa, i leng lexi tehu puxuaun ape i ukek, “Kako kum ngah ulea seilon suluiyan. Amuto hongoen i ukek i tel Nati Haeu. ⁶⁶ Amuto namiloi kako aile ukek ia?”

Laha pahoi ukek, “I aile hawane kakain lialun. I kakahataehu Haeu. Pon hawane telei i.”

⁶⁷ Ape laha pukeini kawan ma xai i. Teka uke maia talini puxui pulan, teka laha tapahi i ape ukek, ⁶⁸ “Na o Krais, tilawa aita tel tapahi ol!”

Pita ukek i kum tioi Jises

Mk 14:66-72; Lk 22:54-62; Jn 18:15-18, 25-27

⁶⁹ Pita toto tutuen mate ingi Kaiapas ti tel hehin unaui Kaiapas nahima ape i ukek, “O tin tel kapi Jises ti Galili!”

⁷⁰ Tuahne Pita ase he matalato hatesol, i ukek, “Nga kum tioi waliko tenen o kakak.”

⁷¹ Ape i nahih hani onote aweingti melal. Tel hehin liai unaui Kaiapas ningahi i ape hone teka seilon ien, i ukek, “Tel seilon ie i tin kapi Jises ti Nasaret.”

⁷² Pita ase ulea, i ukek, “Kuinake, nga kum tioi wanen tel seilon ien.”

⁷³ Tai kue, teka seilon laha tutu ien nahih hani kapi Pita ape laha ukek, “Salan wanen o tel ti lato, kinaxom kaxi ka o ti Galili.”

⁷⁴ Ape Pita ukek, “Nga tuoha hawane. Na nga puputa, Haeu axi nga kawatan. Nga kum tioi wanen tel seilon ien!” Tataen ien wanen tok mom wawan kokoini.

⁷⁵ Ape Pita nameni kakai Jises ti i ukek, “Imat ti mom wawan kokoini, o putini ka o kum tioi wanen nga uke he tolulu.” Pita nahih salili laha ape i tang tahane hawane.

27

Laha ati Jises hani kapi Pailat

Mk 15:1; Lk 22:66-71

¹ Ti pate letu wanen teka masiwi tuah ti hukuminiai Haeu ma seilon, ma teka masiwi liai ti teka Ju, lato aile ngah namil ti sale teleiai Jises. ² Lato hone teka unaualato xinotian ape laha ati i hani kapi Pailat, tel ti teka masiwi ti Rom.

Sale matei Judas

³ Ti Judas, tel i hangaini Jises, upia tunahiu ka teka masiwi ti teka Ju sului Jises waxi laha telei, i towiahu namiloi ape i kau atoheni aliakte tesol 30 moni silva hani laha.

⁴ Ape i ukek, “Nga aile hawane saun lialun nahe nga hangaini tel seilon tenen tap teik waliko lialun na i ailewen ape lehe amuto telei.”

Lato pahoi i ukek, “Kalahai lehe amite nam waxi? Ien soxiām.”

⁵Judas towi lioiwa tesol moni leili tehu Ingi Haeu ape i nahih hakea telei aliake i. ⁶Tesol masiwi waxiwa tesol moni ien ape lato ukek, “Le se moni ti i kahuuiwen teleiai tel seilon. Lialun na kako hana hani kapi moni ti Ingi Haeu.” ⁷Imuh lato xinotii tenen namil ukek lato hapuasa teik moni ien kahuui teik pekeun ti teka seilon laha tanomi salek. Tesol ien lato hani tihiniae seilon ti xux liai. ⁸Hanima aope seilon axai teik pekeun Pekeun ti Kaka nake kahuan teik moni ti kahi teleiai seilon. ⁹Aile ape waliko ti Jeremaia tel kuluiai kakai Haeu kakawen sale Jises i sohot poponowi. I ukek,

“Laha uke tesol 30 moni silva,
lapan ti teka seilon ti Israel kolongeni-
wen kahi teleian.

¹⁰Ape laha hapuasa tesol moni ien kahuui teik pekeun
ti teka seilon laha tanomi salek,
masin ti tel Masiwi honewen nga.” (Jer
32:6-9)

Jises tu mate Pailat

Mk 15:2-5; Lk 23:1-5; Jn 18:28-38

¹¹Jises tutu mate Pailat ape Pailat kamei i ukek, “Nakon o se tel masiwi tapein ti teka Ju?”

Ape Jises pahoi i ukek, “Se, masin ti o kakawen.”

¹²Tuahe ti teka masiwi tuah ti hukuminiai Haeu ma seilon, ma teka masiwi liai ti teka Ju kak hohokai i, Jises tai wix pahoi.

¹³Ape Pailat hone i ukek, “Nakon o hongo-hong hatesol waliko ti laha kak susului o?”

¹⁴Tuahe tap tenen na Jises kakawen, aile ape Pailat pate i ongaimi.

Laha eliel tahi hakeai Jises

Mk 15:6-15; Lk 23:13-25; Jn 18:39-19:16

¹⁵Leili taun ti Pasova, tehu angiaian lalap ti nameniai ngain ti Haeu waxi aliake teka Ju ti Igip, saun ti tel masiwi Pailat i ahuti tel ti teka kalabus, tel ti na teka seilon pahalaha. ¹⁶Ti lokon ien tel seilon leili kalabus axan Barabas, axan lalap wanen ti ailei waliko lialun. ¹⁷Ti teka kilai seilon apuhawa, Pailat kamei laha, “Pahamuto ngahuti hani amuto Barabas ka Jises, tel laha ukek Krais?” ¹⁸Puki i tioi hawane ka teka masiwi ti teka Ju atoheni Jises hani kapin nake lato watakai kilan seilon sameni i.

¹⁹Lokon ti Pailat hong papaxai kakain, tel axoan hakau hani i teik kakain i ukek, “Kum aile halhalalu tel seilon ien. Tap tenen waliko lialun na i ailewen. Ipung tehu tamusuen, nga tunahi paxangongo tenen lialun wanen sale tel seilon ien.”

²⁰Tin lokon ien, teka masiwi tuah ti hukuminiai Haeu ma seilon, ma teka masiwi liai ti teka Ju hahika teka seilon kamei Pailat ti ahutiai Barabas ma teleiai Jises. ²¹Tuahe Pailat kamei ulei teka seilon, “Pahamuto ngahuti hani amuto aita?”

Ape laha pahoi i ukek, “Barabas!”

²²Pailat kamei laha, “Ape nga aile la hani Jises tel laha ukek Krais?”

Laha hatesol pahoi i ukek, “Teleiwa il! Tahi hakeawa i he kros!”

²³Ape Pailat kamei laha i ukek, “Nake lahan? Waliko la lialun na i ailewen?”

Tuahe laha tilol eliel hawane ukek, “Tahi hakeawa i he kros!”

²⁴Ti Pailat paxaiwa ka laha kum hong waxi i, ma tehu lape hile uke i sohot wasole teka seilon, i waxi kan ape nuhi minan he pulalaha. I ukek, “Tap teik kawatan tetak ti sale matei tel seilon ie, ien se waliko ti amuto!”

²⁵Laha hatesol pahoi i ukek, “Hanima amite ma natumite kaui kawatan ti matean!”

²⁶Ape salan, Pailat ahuti hani laha Barabas ape i hone teka unauan hetiai Jises. Imuh i hani laha tahi hakeai Jises he kros.

Teka seilon ti hile soxeni Jises

Mk 15:16-20; Jn 19:2-3

²⁷Imuh teka unauai Pailat ti hile ati Jises hani leili tehu ingi Pailat ape lato tiloi tesol tuaulato. ²⁸Lato xaxaweni puxuaun ape puxui i tehu puxux weluwelun kakai ati polun. ²⁹Lato alingini ngaxe au ape nihini hana hani he patun. Lato waxi teik pata ape hana hani he tepaun minan manau aile hanowi i tel masiwi. Lato lokuhu hanowi ka lato lotui i. Lato ukek, “Tel masiwi tapein ti teka Ju tap tahi mateam!” ³⁰Lato pukeini i ape waxi teik pata he minan ape lato xai patun. ³¹Ti lato heisawa soxenian, lato naxi xaxaweni tehu puxux weluwelun ape puxui aliake i puxuaun. Lato ati i hani tesol ti lehe lato tahi hakea i hani he kros.

Tahi hakeai Jises he kros pata

Mk 15:21-32; Lk 23:26-43; Jn 19:17-27

³²Ti lato nanahiwa, lato apatuini tel seilon ti Sairini axan Saimon ape teka seilon ti hile lungei i kaui teik kros ti Jises kakau. ³³Lato tahia hani tesol axan Golgota.

Teik kakain ien ukek, "Tetesol tanoman masin kui pati seilon." ³⁴ Ti ien lato axi unumi Jises waen tenen maxaian ti hamongai moloan. Ti i namihini laliwa ape i kum unumi.

³⁵ Lato tahi hakea i hani he teik kros pata ape lato halokeni satu ti upiai tetel i uke tetenen ia ti tesol sose Jises. ³⁶ Muhiun lato to paxai peteni i. ³⁷ Teik kakain ti suluian lato tahi hahakea onote patun i kak ukek,

"IE SE JISES, TEL MASIWI TAPEIN TI TEKA JU."

³⁸ Imuh lato tahi hakea hua seilon lialun xohixohin kapi Jises, tel papan sai manau ape tel sai kalamau.

³⁹ Teka seilon ti laha nahiwa nahima laha tohutohuini patulaha ape laha kak soxeni Jises, ⁴⁰ "O ukek o toi hamanagan tehu Ingi Haeu ape o atai aliak leili ngain tolulu! Na masin o tel Nati Haeu, huali aliakewa o ape mosulih ti he teik kros ien!"

⁴¹ Teka masiwi tuah ti hukuminiai Haeu ma seilon, teka hanaua nauna ti Moses ma teka masiwi liai ti teka Ju, tin laha kak soxeni i ukek, ⁴² "I huali seilon liai tuahie i kum pon huali aliakewan! Nakon i tel masiwi tapein ti teka Israel? Na masin i mos ti he teik kros aope, kako soh tetan! ⁴³ Na masin namilon xoxoan ti Haeu ma salan ka i Natun, kako paxaimu na Haeu pahan i huali i aope!" ⁴⁴ Huhua lalu akeak kapi Jises, tin lalu kak soxeni i.

Matei Jises

Mk 15:33-41; Lk 23:44-49; Jn 19:28-37

⁴⁵ Ti lape ngain, hatehu xux i tilok ti leili auia tolulu. ⁴⁶ Ti 3 kilok alohah, Jises tilok eliel hawane, "Eloi, Eloi, lama sabatani?" Teik kakain ien i ukek, "Haeu tetak, Haeu tetak, nakon lahan o lioi hawane nga?" (Ps 22:1)

⁴⁷ Teka seilon ti laha tutu ien laha hong ape laha ukek, "I titilo Elaijal"

⁴⁸ Tel ti lato kiliwawa ape waxi teik maia. I xomi hani waen wangingian ape i hana hani tumi teik pata. I tulini hani he awe Jises lehe waxi i sumuxi. ⁴⁹ Tuahes tesol liai ukek, "Nutomu, kako paxaimu na Elaija luainima hualian!"

⁵⁰ Jises ausini eliel hawane ape i mat.

⁵¹ Tataen ien wanen Haeu lexi teik maia i akeak leili tehu Ingi Haeu, ti patul hani taen itan. Xux nuea ape pot lapal takel.

⁵² Amal hea ape teka kilai seilon ti Haeu laha matewen laha xahat alia. ⁵³ Laha salili amal ape muhin ti Jises xahat aliawa ti matean,

laha soh hani Jerusalem ape kilan seilon ningahi laha.

⁵⁴ Lokon ien, tel masiwi ti teka seilon ti hile ma tesol unauan to paxai pepeten Jises. Ti lato ningahiwa xux i nrea ma hatesol waliko ti i sosohot, lato mamata hawane ape lato ukek, "Salan wanen i Nati Haeu!"

⁵⁵ Kilan hehin laha tu sasia papaxai waliko ti i sosohot. Lato kahitima Jises Galili ngahatian. ⁵⁶ Leilolato se Mary Magdalen, Mary tel tini Jeims ma Joses ma tel tini Jeims ma Jon tetel axoi Sebedi.

Tihiniai Jises

Mk 15:42-47; Lk 23:50-56; Jn 19:38-42

⁵⁷ Ti ape alohah, Josep tel seilon kilan wanen soxi, i nahih hani kapi Pailat. I ti tehu taon axan Arimatea ma tel ti teka kahikahi Jises. ⁵⁸ I kamei Pailat na i waxi auni tupui Jises. Ape Pailat hone teka unauan haniai Josep tupui Jises. ⁵⁹ Ti Josep waxiwa, i puxui talinti i teik maia haun weluwelen. ⁶⁰ I hana tupui Jises hani leili tehu amal, kemuk teka unauan tanomi he pot patul ti hepekeun. Muhiun i hulini tehu pot lapal tiehiae tewau wal ti tesol amal ape i nahih. ⁶¹ Mary Magdalen ma tel Mary liai, lalu toto onote tesol amal papaxai waliko ti i sosohot.

Teka unaui Pailat peteni amal

⁶² Ti ngain liai telao, tehu ngain ti Sabat, teka Parisi ma teka masiwi tuah ti hukuminiai Haeu ma seilon, lato apuha hani kapi Pailat. ⁶³ Ape lato ukek, "Amite nameni ka ti lokon tel seilon ti puputa i moihin tutuen i kak ukek, 'Nga xahat alia muhi ngain tolulu.' ⁶⁴ Amite kamei o honei teka unauan ti peteni aluiniai amali Jises leili ngain tolulu, lehe teka kahikahin kum pon xuinai tupuan ape lato kum hone teka seilon ka i xahat aliawen. Tehu puputa ie i pamu lialuan, i xoini tehu imat ti i ukek i Krais."

⁶⁵ Pailat hone lato ukek, "Waxiwa teka unauk ape peteni aluiniai hawanewa amali Jises." ⁶⁶ Ape salan, lato nahih hana ngah kikilam he tehu pot lehe lato tioi na hina seilon tohongi lafi laha soh. Ape teka unaui Pailat to paxai peteni.

¹ Muhi telao Sabat, pate letu ti Sande, Mary Magdalen ma tel Mary liai nahih paxai amali Jises.

² Hepekeun i nuea eliel hahutuia hawane. Tel engel ti Haeu mosulih ape i hulini xax-aweni tehu pot laha uke sioniai amali Jises ape i to patul he tehu pot. ³ Kawan i xepaxep hawane hanowu usil, puxuaun papaxaxun wanen hanowi ole olawik. ⁴ Teka peteniai amali Jises mamata xexex hawane ape lato put hani itan masin seilon tenen maten.

⁵ Tel engel hone huuhe hehin, “Kum maa-mata. Nga tioi ka amulu paxai sasakal Jises, tel laha teleiwen. ⁶ I ape tap ie. I xahatawen masin ti i kakawen imat. Nahima paxai tesol laha hahanopi i. ⁷ Ape nahih koseawa honey tesol kahikahin ka Haeu xahateni aliakewen i ti matean. Jises nahih imat ti amuto hani Galili ape amuto ningahi i ien. Nameniwa waliko ti nga kaakane amulu.”

⁸ Talowian wanen lalu nahih salili amali Jises. Pate lalu mamata hetekie amuam ape lalu uke ani kikiliu honey tesol kahikahin. ⁹ Ti he aweisal, Jises sohot hahutuia hani kapi lalu ape i ukek, “Amuam lalap haniwa amulu!” Lalu kiliwau lokuhu akeni aen ape lalu lotui i. ¹⁰ Jises hone lalu, “Kum maamata! Honewa tesol kahikahik lawak lato nahih haniwa Galili lehe lato ningahi nga ien.”

Puputa ti teka peteniai amali Jises

¹¹ Ti hua hehin nanahiwa he aweisal, teka peteniai amal alia hani Jerusalem kakanei teka masiwi tuah ti hukuminiai Haeu ma seilon waliko ti i sosohot. ¹² Ti lato hon-go, lato apuhini hatapo teka masiwi liai ape lato taneri apeseri kakain. Lato hani teka peteniai amali Jises moni lalap wanen. ¹³ Lato ukek, “Amuto kaxiwa ka tesol kahikahin Jises nahima ipong ti amuto matatih ape xuina tupuan. ¹⁴ Ape na Pailat hong tunahi ka kumahe amuto peteni alu-luini, amite tukei awamuto.” ¹⁵ Teka peteniai amali Jises waxi moni ape lato puas usi waliko ti teka masiwi kakanewen lato. Ape kakaijalato i sawat hatapo hani teka Ju hanima tataen tetelao.

*Jises talo tesol kahikahin hani lawe xux
Mk 16:15-18; Lk 24:44-49; Jn 20:19-23; Apo*

1:6-8

¹⁶ Tesol huopanim tel kahikahin Jises nahih hani he tehu maunten leili Galili, tetesol Jises hone lato atengian. ¹⁷ Ti lato ningahiwa i, lato lotui i tuahe teka ti lato kapaxe ka i Jises.

¹⁸ Jises xohi hani kapi lato ape i hone lato ukek, “Haeu hanawen nga Masiwi ti lawe waliko ti patul ma tehu pon ie. ¹⁹ Aile ape nahih haniwa lawe xux ape aile ha-sosohot teka seilon kahikahik. Baptaisiwa laha hahitake axe tel Tamak Haeu, nga tel Natun ma Holi Spirit. ²⁰ Ape hanaua laha usi hatapoi waliko ti nga honewen amuto. Nga kakane hawane amuto, nga kapimuto lian tehue.”

Mak

Meng solian ti Jises tataiai Mak Kakain ti haxewai tenen meng ie

Mak tel aposel tai tenen meng solian ie sai ahang 30 muhin ti Jises moih aliawa ape Haeu waxy i hani tesol tonan. I tel ti teka kahikahi Jises tuahe i kumahe leili tesol huopanym huhua aposel ti uli Jises kilamiwa. Mak axan tenen liai Jon. I lapale Jerusalem. Meng ti i tatai ie i kema ti Pita, tel ti tesol huopanym hua aposel. Hina ngain i huali Pol ma Banabas ailei puase Haeu. Mak tai nake pahan i haxewa hani teka seilon ti Rom ka Jises se tetel Nati Haeu. Ti lokon ien teka seilon ti Rom namiloi ukek ka poh pate waliko tuah. Aile ape Mak kaxi hani laha sale pohe Jises ma kilai waliko tenen lalap ti i aislewen. I kaxi haxewa hani laha ka pohe Jises i xoini pohe Satan, tel masiwi ti teka spirit lialun a Jises i se tel awaiai teka seilon ti kawatan ti lialui woulaha. Kalak Jises i Masiwi tapein, i lua hanima tehu pon itan ie hualiae seilon.

Jon Baptis apeseni aweisal ti sohotui tel Masiwi

Mt 3:1-12; Lk 3:1-18; Jn 1:19-28

¹Hutuiai meng solian ti Jises Krais tel Nati Haeu. ²Leili pepai Aisaia, Haeu kakane tel Natun ukek,

“Nga talo tel ahutiai kakaiak imat tetam
ti apesenai seilon ti sohotuam.

³I titiol he lohong,

‘Towiahua ti lialui woumuto

lehe tel Masiwi neini amuto taen i
tahiam.’” (*Isa 40:3*)

⁴ Ape salan, ti Jon Baptis tahia haniwa he lohong, i hone teka seilon nahima lehe i baptaisi laha. Teteka laha uke baptais, i kola ka laha towiahuen ti lialui woulaha hani Haeu lehe i oxoxi laha ti kawatan ti saun lialun. ⁵ Lokon ien kilan wanen seilon ti Jerusalem ma ti Judia laha nahih hong kakai Jon. Teteka seilon laha kaxi ahuti lialui woulaha, Jon baptaisi laha leili tehu kan Jodan. ⁶ Jon, soson ma puxuaun tuahe uli kamel, teik tahan tin tuahe uli manihuh a anan kukunalel ma xuni awe nini. ⁷ I kakane teka seilon ukek, “Tetel i luluanimma muhik i pamu masiwian tetak. Masiwiaian ala i kum pon nga unauan. ⁸ Nga baptaisi amuto

ani kan tuahe taen i baptaisi amuto, i hani amuto Holi Spirit ti kapitiamuto.”

Jon baptaisi Jises

Mt 3:13-4:11; Lk 3:21-22, 4:1-13

⁹ Lokon ien Jises nahima Nasaret, tehu taon ti Galili ape Jon baptaisi i he tehu kan Jodan. ¹⁰ Ti Jises xaheale, i ningahi maun hea ape Holi Spirit mos hani kapin hanowi tok pux. ¹¹ Ape tenen kinax wixima ti tone Haeu i ukek, “O se Natuk pate nga waheni, ngam amuke hawane o.”

¹² Taen ien wanen Holi Spirit kapiti hulu-tini Jises hani he lohong. ¹³ 40 ngain Jises he lohong kapi teka manihuh lensegan ape Satan tohongi haputaian. Ti ien teka engel, spirit solian ti Haeu, mosulih ape ngahati i.

Jises tike waxaini hinalo seilon hani kahikahin

Mt 4:12-22; Lk 4:14-15, 5:1-11

¹⁴ Muhiin ti Herod Antipas hanawa Jon leili kalabus, Jises nahih hani Galili ape i kaxi ahuti tenen meng solian ti Haeu. ¹⁵ I ukek, “Taun ti nenein ti Haeu ape i xohi-wen. Towiahua ti saun lialun ti amuto ape hong sohoa tenen meng solian ie!”

¹⁶ Ti Jises nanahih peixux ti Galili, i ningahi hua seilon ti tikei xixi, Saimon ma tel ukalan Andru. Lalu totowi upen puliai xixi. ¹⁷ Jises hone lalu, “Kahitima nga ape nga hanau amulu sale tike waxainiai seilon hani kahikahik.” ¹⁸ Taen ien wanen lalu hana lioi upen ape kahiti i.

¹⁹ Jises tai nahih xau ape i ningahi hahutalin Jeims ma Jon, nati Sebedi. Lalu xoxoi upen leili koap. ²⁰ Jises hone lalu kahitian. Lalu nahih salili tel tamalalu ma teka seilon laha pupuas ti lato ape lalu nahih usi Jises.

Jises xaxaweni spirit lialun

Lk 4:31-37

²¹ Jises ma tesol kahikahin nahih hani tehu taon Kapenaum. Telao Sabat, i nahih hani leili synagog, tehu ing ti apuhai teka Ju, ape i hanau teka seilon. ²² Ti teka seilon hongoa pate laha ongake sale kakaian nake i kumahe masin teka hanau nauna ti Moses. Kakaian masin ka i tel pamu masiwian ti lato.

²³ Lokon ien, tel seilon spirit lialun kapiti haliallu, i tilol ausisini leili synagog. ²⁴ I ukek, “Jises ti Nasaret, paham la ti amite? Nakon o ie ti halialuamite? Nga tioi o tel seilon sawisawin Haeu taloma!”

²⁵ Jises tumei spirit lialun ukek, “Minginiwa awam ape ahuta xaxaua ti tel seilon iel!” ²⁶ Spirit lialun haxexe eliel tel seilon ti i ahuta ape i ausini eliel hawane.

²⁷ Teka seilon ongake hawane ape he kakak alia laha, “Nakon waliko la tetenen? Tetel seilon ie i ahuti kakain tenen haun. Kakaian masin tel seilon masiwi wanen. I tumei spirit lialun ape laha hong usi kakaian!” ²⁸ Ape axe Jises i sawata leili Galili hatexux.

Jises haewia kilan seilon

Mt 8:14-17; Lk 4:38-41

²⁹ Ti Jises ma tesol kahikahin sohotua leili synagog, i hetekie Jeims ma Jon lato nahih sawi hani ingi Saimon ma Andru. ³⁰ Tini tel axoi Saimon tinun. I engeeng he sau, tinun pate ahian. Ape laha kaxi hani Jises. ³¹ I nahih haniwa kapi tel hehin, i akeni minan ape xahateni. Kiliwan wanen tinun xo ewiwa ape i apesenai analato.

³² Ti al loloa, laha hakahita hani Jises kilan seilon tinun ma teka ti spirit lialun kapiti hahalilau. ³³ Kilan wanen seilon ti Kapenaum apupuha hanima mate ing. ³⁴ Jises haewia kilan teka tinun ti nax tenen tenen ma i xaxaweni kilan spirit lialun leili teka seilon. Teka spirit lialun tioi ka Jises se Nati Haeu, aile ape i halini na lato kaxi.

Jises kaxi meng solian leili Galili

Mt 4:23-25; Lk 4:42-44

³⁵ Pate letu ti teik tilokoan tutuen, Jises xahat nahih ahuta ti taon hani tesol ti tap seilon ape i kakak kapi tel Taman Haeu. ³⁶ Saimon ma tesol tuaun nahih upia i. ³⁷ Ti lato tunahiwa, lato ukek, “Lawe seilon upiup ol”

³⁸ Jises kak pahoi lato ukek, “Kako tin hina kane toan liai lehe nga kaxi ulei meng solian ti Haeu. Pake nga ie ti ailei teik puasain ien.” ³⁹ Ape Jises nahih kakalini Galili ti kaxi ahutiai kakai Haeu leili synagog ma i xaxaweni spirit lialun leili kilan seilon.

Jises haewia tel seilon naxe tinun hakaliapie

i

Mt 8:1-4; Lk 5:12-16

⁴⁰ Telao tel seilon hina nax lialun he tinun nahih hani kapi Jises ape i lokuhana hani kapi aen. I kamei eliel Jises ukek, “Na o waheni, xaxaweniwa naxe tinuk lehe nga hau alia!”

⁴¹ Jises xuhai tatahan. I tulini aka soti tel seilon ape i ukek, “Nga waheni, ewiwa ma haua!” ⁴² Kiliwan wanen naxe tinun tapo ape i ewi.

⁴³ Jises kakane eliel i ukek, ⁴⁴ “Kum kaxi hahani teka seilon liai. Nahih sawi haniwa kapi tel masiwi ti hukuminiai Haeu ma seilon lehe i Paxai kalisi tinum. Kau hetekiewa huok manixux ti haniai Haeu masin ti Moses kakawen. Ien kola haniai teka seilon ka o ewiwen ape pon o hukuma hani kapi laha.” ⁴⁵ Tuahen ti tel seilon nahiwa, i kaxi sawateni ka tinun ape i ewiwen. Aile ape Jises kum nahih hani taon ti leili seilon kilan. I tua nanahih melal ti taon tuahe seilon nahih tatale hani kapin.

2

Jises haewia tel seilon tupuan maten

Mt 9:1-8; Lk 5:17-26

¹ Ngain hina tamusua ape Jises alia hani Kapenaum. Kakain sawata ka Jises tahia aliawen. ² Kilan seilon apupuha tehu ing ti Jises heheuta. Leili ing ma melal kilan wanen seilon. ³ Ti Jises kakaxi kakai Haeu hani laha, hinalo seilon tahia haniwa ien. Lato kakau tel seilon tupuan maten. ⁴ Lato kum tapauake uke i hani kapi Jises nake pate kilan seilon. Lato haneke i hani hongin onotan ti Jises tutu. Lato hawaiwape halaha i hetekie enepan hani kapi Jises. ⁵ Ti Jises ningahiwaa xoxoi namilolato, i hone tel tinun, “Tel natuk, nga oxoxi o ti kawatan ti saun lialun ti o ailewen.”

⁶ Leili teka seilon ien hina teka hanau nauna ti Moses. Lato kakak alia puki lato, ⁷ “Kalihai i kak ukek? I kak hanowi i Haeu! Aita pon oxoxiakako ti kawatan ti saun lialun? Mewenae Haeu!”

⁸ Jises tioi namilolato ape i hone lato, “Nakon lahan amuto namiloi namil tenen ien? ⁹ Tetenen ia pamu malimum? Nakon pamu malimum na nga hone tel seilon tupuan maten, ‘Xahatawu ape nahiwa,’ ka ‘Nga oxoxi o ti kawatan ti lialui woum?’ Ti ailei hahuonen, mewenae seilon ti hina pohe Haeu i pon ailean. ¹⁰ Nga aile kola lehe amuto tioi ka nga tel Nati Seilon, he tehu pon ie nga hina poh oxoxiai seilon ti kawatan ti saun lialun ti laha.” Ape i hone tel seilon tupuan maten, ¹¹ “Nga hone hawane o, xahatawu, waxiwa enepam ape nahih haniwa tonam.”

¹² Ti puli lawe seilon i xahat, i waxi enepan ape i nahih. Laha Paxai ongake hawane ape laha ukek, “Amite tai ninginah waliko tetenen i sohot ukek!” Ape laha kak kemulik hani Haeu.

*Matiu Livai sohot kahikahi Jises**Mt 9:9-13; Lk 5:27-32*

¹³ Liae telao ulea Jises tau nanahih peixux ti kanitax Galili. Kilan seilon nahih hani kapin ape i hanau laha kakai Haeu. ¹⁴ Ti i nanahih i ningahi Matiu Livai, tel natu Alapeus, i to wawaxi moni ti teka seilon. Pupuasan waxiai moni ti teka Ju hani teka masiwi ti Rom. Jises hone i ukek, "Kahitimana! Pahak o kahikahik." Livai tule ape kahiti i.

¹⁵ Imuh Jises to angiang kapi Livai leili ingan. Kilan seilon pupuasalah masin puase Livai, hetekie teka seilon woulaha lialun, laha angiang kapi Jises ma tesol kahikahin. Kilan seilon tenen tenen kakahiti Jises lawe ngain. ¹⁶ Ti teteka Parisi hanau nauna ti Moses, ningahiwia Jises angiang kapi teka woulaha lialun, lato hone tesol kahikahin, "Kalahai i ang akati seilon tetenan?"

¹⁷ Jises hong lato kakak ape i ukek, "Dokta kum puasake seilon huliwi, mewenae teka tinun. Kumahe ka nga he tehu pon ie upiai kahikahik seilon tenen laha sokok laha sawisawin. Nga tahiamma upiai kahikahik seilon tenen laha tioi ka woulaha lialun."

*Nauna wasan ma nauna haun kum he paho**Mt 9:14-17; Lk 5:33-39*

¹⁸ Hina ngain taun ti tesol kahikahi Jon Baptis ma tesol Parisi halini an ti hualiai lotu ti lato. Teka seilon nahih hani kapi Jises ape kamei i, "Nakon lahan tesol kahikahim lato kum halini an ti hualiai lotu ti lato hanowi tesol kahikahi Jon Baptis ma tesol kahikahi teka Parisi?"

¹⁹ Jises kak pahoi lato ukek, "Na tel seilon i sal i kapi tesol seilon ti laha ilowi ti angiai ti salasala, kaie lato kum ang? Kumahe! Lato ang akati i. ²⁰ Tuahé ngain tehu i luluainima, laha waxy xaxaweni tel seilon i sal ti lato. Tataen ien lato halini an."

²¹ "Tap tel ukeke teik maia haun paxatawai teik maia wasan. Na i aile ukek ien, teteik haun i lexi teik wasan ape wawan i lap ahe.

²² "Seilon kum lohi hahakila patula wel hani tehu po wasan nake na i lauti, tehu po i watat ape patula tapulol. Pamu ewian na i lohi hani tehu po haun lehe ati lalu kum lialu."

*Jises i Masiwi ti Sabat**Mt 12:1-8; Lk 6:1-5*

²³ Telao ngain Sabat Jises nahih kokotawa tesol kini kon hetekie tesol kahikahin. Ape tesol kahikahin asahi ani huai kon. ²⁴ Tesol

Parisi kakane Jises, "Paxaiwa! Nakon lahan lato aile saun tenen hahalin ti telao ngain Sabat?"

²⁵ Jises kak pahoi lato ukek, "Amuto se teka hanau kakai Haeu. Ala amuto tioi waliko ti tel masiwi David ma tesol seilon hahitakan aile ti pate lato hitol. ²⁶ Lokon ti Abiata tel masiwi tapein ti hukuminiai Haeu ma seilon, David nahih soh hani Ingi Haeu ape i waxy bret, kalak hahalin. Ape i ma teka kapin lato ani."

²⁷ Jises kakane lato ukek, "Haeu tanomi Sabat ti hualiai seilon, kumahe i tanomi kaha seilon hualiai Sabat. ²⁸ Ape nga tel Nati Seilon, nga se Masiwi ti Sabat. Nga tel sowini haniai seilon waliko tenen i pon ma na i kum pon laha aile telao ngain Sabat."

3

*Jises haewia tel seilon telao Sabat**Mt 12:9-14; Lk 6:6-11*

¹ Telao Sabat Jises nahih alia hani leili synagog ape i ningahi tel seilon minan maten. ² Hina seilon ien laha sasakal aweisal ti suluiiai Jises. Aile ape laha paxai otioti na i aile haewia tel seilon lehe laha sului i ti aile saun tenen hahalin telao Sabat. ³ Jises hone tel seilon ukek, "Nahih hanima mateiwa!"

⁴ Ape i kamei teka seilon, "Nakon saun la ewi na kako aile telao Sabat? Saun ti hasoliai seilon ka halialualaha? Saun ti hualiai seilon ka hamangealaha?" Tuahé laha tai wix pahoi i.

⁵ Jises pax kakalini laha ape lon lialu hawane nake laha kum tahane tel seilon. Ape Jises hone i ukek, "Hokahiwia minam!" I hokahiwia teapaun minan ape i ewi. ⁶ Tesol Parisi nahih sohot ti synagog ape nahih apuha hani kapi tesol teapaun ti Herod. Lato aile namil ti sale teleiai Jises.

*Kilan seilon kahiti Jises**Mt 12:15-21*

⁷ Jises ma tesol kahikahin nahih salili teka seilon lehe lato nahih hani kanitax Galili. Kilan seilon kahitiwa lato. ⁸ Ti laha hongoa waliko tenen kuin ti i ailele, kilan ti laha nahih hani kapin. Laha ti Galili, Judia, Jerusalem, Idumea, pape kan Jordan sai liai teapaun ma kakalini toan ti Taia ma Saidon. ⁹ Seilon pate kilan kasia, aile ape Jises hone tesol kahikahin apeseniai tea koap lehe seilon kum tu pisipis hani kapin. ¹⁰ I haewia kilan seilon, aile ape teka seilon tinun nahih tatale hani kapin. Pahalahé wanen laha soti i. ¹¹ Lawe seilon ti spirit lialun kapiti hahalialu, laha ningahiwia Jises, laha

put hani mateiwaun ape tilol ausisini ukek, “O se tel Nati Haeu!”¹² Tuahé Jíses halini laha ti kaxi haniai teka seilon liai ka i tel Nati Haeu.

*Jíses kilami huopaním hua aposel
Mt 10:1-4; Lk 6:12-16*

¹³ Imuh Jíses han hani he tehu maunten ape i tiloi teka seilon lehe i kilami teteka ti pahan. Ape laha hatesol nahih hani kapin.¹⁴ I kilami huopaním hua aposel, tesolos lato lawe kapin. I hone lato ukek, “Nga kilami amuto hamalum kapitama kapik. Tin nga talo amuto kaxi ahutiai kakai Haeu.¹⁵ Ape nga hani amuto poh ti xaxaweniam spirit lialun.”¹⁶ Teteka i kilami se Saimon, tetel Jíses axai axan Pita,¹⁷ Jeims ma tel ukalan Jon, lalu nati Sebedi (Jíses axai lalu Seilon ti kuhuh),¹⁸ Andru, Pilip, Batolomiu, Matiu, Tomas, Jeims tel nati Alapeus, Tadeus, Saimon tenen axan liai Selot,¹⁹ ma Judas Iskariot, tetel seilon imuh i hangaini Jíses hani laha telei.

*Pohe Satan ma pohe Holi Spirit
Mt 12:22-32; Lk 11:14-23*

²⁰ Ti Jíses nahih alia haniwa tehu ing ti i heheuta, kilan seilon apuha uleawa ape Jíses ma tesol kahikahin kum ang uke.²¹ Ti tesol akiki Jíses wanen hongoa, lato nahih upia i nake lato sokok ka i taxitaxiawen.

²² Teka hanau nauna ti Moses nahima ti Jerusalem lato ukek, “Jíses spirit lialun kapiti halialuwan! Satan axi i poh ti xaxaweniam spirit lialun.”

²³ Jíses tiloi lato hani kapin ape i kakane lato, “Satan i xaxaweni ukek ia Satan?” Ape i kak kolongeni hani lato i ukek,²⁴ “Na seilon ti xux texux laha tikela ape hil alia puki laha, texux xux ien i lialu tamus.²⁵ Na tesol akitkin lato hil alia puki lato, tesol akitkin ien lato kum tu xox.²⁶ Na Satan hilei aliae Satan, nenein tetan tapo tamus.²⁷ Satan masin tel seilon kuin. Tap tel seilon soh uke hani ingi tel seilon kuin ape waxy waliko ti leili ing, halik na i xiotti konginimu tel seilon kuin. Mewenae na i pamu kuiyai, i pon xoiniai tel seilon kuin. Se tin masin nga xoini Satan ape nga xaxaweni spirit lialun tetan leili teka seilon.

²⁸ “Nga kakane amuto waliko salan. Haeu i oxoxi seilon ti kawatan ti hatesol lialui woulaha hetekie ti na tel seilon kak halialui tel liai.²⁹ Tuahé na tel i kak halialui Holi Spirit, tap wanen Haeu po oxoxi i ti kawatan ien nake i aile saun lialuan ti kawatan tetan tap tahi tapoan.”³⁰ Jíses kak

ukek ien nake teka seilon kakaxi ka spirit lialun kapiti hahalialu i.

*Tinan ma ukalan wanen
Mt 12:46-50; Lk 8:19-21*

³¹ Muhin ien tel tinan ma tesol ukalan tahia hani tehu ing ti Jíses hahanau teka seilon. Lato tua tutu melal ape hakouta hani i kakain.³² Kilan seilon to kakalini Jíses ape tel ti laha hone i, “Paxaiwa, tel tinam ma tesol ukalam atetengi o melal.”

³³ Jíses kak ukek, “Aita wanen tel tinak? Aita wanen tesol ukalak?”³⁴ I Paxai teka seilon kapin ape i ukek, “Teka seilon ie se tinak ma ukalak.³⁵ Hatesol teka na laha aile usi waliko ti Haeu pahan, laha se ukalak, tuak ma tinak.”

4

*Meng ti hepekeun tenen tenen
Mt 13:1-17; Lk 8:4-10*

¹ Lai telao Jíses kak hahanau teka seilon pape kanitax Galili. Pate kilan seilon apuha kakalini i, aile ape i ku to hani he tea koap. Teka seilon tutu peixux.² Jíses hapuasa meng ti i hanau waliko kilan. I kakane laha ukek,³ “Hongoa! Tel seilon ti ailei kin i nahih seini waki maia.⁴ Ti i totowi waki maia, hina i put hani he aweisal ape manixux ngong anii.⁵ Hina i put hani he kalamael, tesol ti hepekeun pakepaken. Waki maia i xex. ⁶ Tuahé ti alon kekelih, i mani telei tesol supuli maia nake wahan pate pakepaken.⁷ Hina waki maia i put hani leili au. Ti i xexe, au talini ape i kum hua.⁸ Tuahé waki maia liai i put hani hepekeun solian. I xex ape hua palahi 30, hina palahi 60 ma teka palahi 100 akulaiwen ti tel seilon seini.”

⁹ Jíses ukek, “Na amuto hina taxing ti hongoi kakain, hongoa.”

¹⁰ Ti ape mewenae Jíses, tesol huopaním huhua kahikahin ma teka liai kamei i salang-gawe tenen meng i kakaxi.¹¹ I kakane lato ukek, “Pahak nga kaxi haxewa hani amuto waliko tenen amuto kum xeu sale nenein ti Haeu, tuahe teka laha kum soh ti Haeu, nga hapuasa meng ti nga hahanau laha ape laha kum hong tioi aluinii.¹² Masin ti leili pepai Aisaia i ukek,

“Laha papaxai he tange pulalaha waliko ti Haeu ailele
tuahe laha kum ningahi,
laha hongohong kakai Haeu tuahe
laha kum xeu.

Na masin ala laha hong tioila kakai Haeu,

laha towiahu haniwen i ape i oxoxiwen
laha
ti kawatan ti lialui woulaha.’” (Isa 6:9-10)

Jises kaxi haxewa meng ti hepekeun tenen

Mt 13:18-23; Lk 8:11-15

¹³ Jises kakane tesol kahikahin ukek, “Na amuto kum xeu ti tenen menge hepekeun, tin amuto kum xeu ti meng liai. ¹⁴ Tel seilon seiniai waki maia i tu kikilami tel kaxiai kakai Haeu. ¹⁵ Seilon hina masin aweisal ti waki maia put to, laha hong kakai Haeu tuahe malimun wanen na Satan xaxaweni kakain ien ti leilolah. ¹⁶ Kalamael ti waki maia put to, i kikilami teka seilon laha hongoa kakai Haeu ape pate laha amuke. ¹⁷ Tuahe i kum wahai aluinai ape i kum xex kue. Taen kawatan ma totohong tunahiwa laha ti usiai kakai Haeu, xoxoi namilolaha ti Haeu pate i put kosea. ¹⁸ Teteke seilon laha masin hepekeun ti hina au waki maia put hani leilon, laha hong kakai Haeu. ¹⁹ Tuahe laha namiloi kasini waliko ti itan ie. Pahalaha sozialaha kilan ma laha nahaini waliko ti seilon liai. Namil tenen ien kokongini kakai Haeu ape laha kum hua. ²⁰ Tuahe teka liai masin hepekeun solian. Laha hong auni kakai Haeu ape laha hua. Teka laha hua 30, teka 60 ma teka liai 100 akulaiwen ti uli seinian.”

Kakai Haeu haxewa namili seilon

Mt 5:15-16; Lk 8:16-18

²¹ Ape Jises kamei tesol kahikahin ukek, “Na amuto hakama tehu kamaiamuto, kaie amuto hana hahitake po ma na sau? Kumahé, amuto hakea hani patul koukeun lehe i haxewa leili ing. ²² Waliko ti i mumuna aope, i kouke. Waliko tenen amuto kum xeu ti kakai Haeu aope ie, Haeu haxewa hani amuto imuh. ²³ Na amuto hina taxing ti hongoi kakain, hongoal!”

²⁴ Jises hone lato ukek, “Kakain ti amuto hongohong, hong matainiwa lehe amuto xeu! Saun ti amuto aile hani seilon liai, tin Haeu hani aliakte amuto tuahe tetan pamu sean. ²⁵ Na tel seilon i hong usi kakaiak, Haeu axi aheke anesoan tuahe na tel seilon kum hong usi kakaiak, anesoan Haeu waxi aliakte.”

Meng ti seiniai waki komem

²⁶ Jises kak ulea ukek, “Nenein ti Haeu masin ti tel seilon i seini waki komem leili kin. ²⁷ Kalak tel seilon kum tioi i sohot ukek ia, supuli komem i xex ipong ma ngain, ti

tel seilon mamatih ma na i tau nanahih. ²⁸ Hepekeun haxexe waki komem ma hahua. Imat i supulamu, imuh i tan kaun ma huan, ²⁹ Tataen huai komem pamua, tel tame tesol kin uke ngol kotian nake an he kin i apeasawen.”

Menge waki lilleu

Mt 13:31-32; Lk 13:18-19

³⁰ Jises ukek, “Nga kak kolongeni haxewa hani amuto sale nenein ti Haeu. ³¹ Ien masin tehu kokole waki lilleu tel seilon seini. ³² Kalak i pate kokol, i xex lap ape i sohot tea pata lapalap wanen. Ngaxon lap hawane ape manixux atai ingalahi ien.”

³³ Kilan meng Jises hapuasa hanau seilon. I kak kolongeni kakai Haeu hani tenen ti lehe seilon hong tioi kakaian. ³⁴ Ti i kaxi kakai Haeu hani seilon liai, lawe i hapuasa meng, tuahe taen mewenae i ma tesol kahikahin, i kaxi haxewa hawane hani lato.

Jises hatapo tehu ahon

Mt 8:23-27; Lk 8:22-25

³⁵ Alohalah telao ien Jises hone tesol kahikahin ukek, “Kako lang hani pape kanitax liai tepaun.” ³⁶ Tesol kahikahin ku haniwa he tea koap ti Jises toto ape lato lang salili teka kilai seilon apupuha. Tin hina koap liai ien. ³⁷ Tai kue ahon tunahi lato. Aupol kuin ma laman lalap tenen i hu mamatit, hin i matit hani leili koap. Sikole wanen lato kaxox. ³⁸ Jises matih lululung he teik lulungan muhiwai tea koap. Kakanua lato hangoni i ape lato ukek, “Tel masiwi, nakon o kum nam waxi na kako kaxox ape kako mat?”

³⁹ Jises tule i kakane aupol, “Mongawa!” Ape i kakane laman, “Hamalumual!” Aupol mat ape i tuxi.

⁴⁰ Jises hone lato ukek, “Alahan ka amuto mamata? Nakon amuto tap namil xooaan tetak?”

⁴¹ Pate lato mamata ape lato he kamekam alia puki lato, “Seilon tenen lahan ka aupol ma laman hong usi kakaian?”

5

Jises haewia tel seilon spirit lialun kapiti halialalu

Mt 8:28-34; Lk 8:26-39

¹ Jises ma tesol kahikahin tahiia hani liai teapaun ti kanitax Galili, xux ti teka Gerasa.

² Ti Jises mosua he tea koap, tel seilon sohotuma he amal ape kiliwau pahoi i. Tel seilon ien spirit lialun kapiti halialua. ³ Tonan leili amal. Tap tel pon xiotti konginian. ⁴ Laha

xioti hakilawen minan ma aen. Laha uke sen tuahe lawe i xaputi. I pate kuin wanen, tap tel kongini uke i.⁵ Ngain ma ipong i nahih lolilolia he amal tilol ausisini ma i uke hat tahai hanaxo lalolal tinun.

⁶Ti i xauxaun tutuen, i ningahi Jises ape i kiliwau lokuba hani itan kapi aen. ⁷Tel spirit lialun tilol eliel ukek, "Jises, tel Nati Haeu pate tuah! Lehe o aile la hani nga? Nga kamei hawane o ti puli Haeu, o kum aile hahalialu nga!"⁸I kak ukek nake imat Jises honemu i, "Ahutawa ti tel seilon ien!"

⁹Jises kamei i, "Axam la?" I pahoi ukek, "Axak Kilan nake amite pate kilan."

¹⁰Ape spirit lialun leili tel seilon kamei talingoi Jises, "Kum usi xaaxaweni amite!"

¹¹Tesol kilai pou exiex ngixi maunten xohixohin tewau toan ien.¹²Tesol spirit lialun kamei eliel Jises, "Talo haniwa amite leili tesol pou!"¹³Jises sowini hani lato. Tesol spirit lialun ahuta ti leili tel seilon ape lato soh hani leili tesol pou. Mongohe tesol pou 2,000. Lato kiliwau hanahi hani he sahikek, lato put hani itax ape lato waut mat.

¹⁴Tesol ngahatiai pou kiliwau kaxi hani teka seilon leili taon ma tesol tesol. Ti teka seilon hongoa, laha nahih Paxai waliko ti i sosohot.¹⁵Ti laha nahih haniwa kapi Jises, laha ningahi tel seilon kemuk kilan spirit lialun kapiti hahalialu. I hina puxux ma namilon tin ape solian. Ape laha mamata.¹⁶Tesol seilon lato ningahiven waliko ien, lato kaxi hani laha waliko ti i sohot haniwen tel seilon ma tesol pou.¹⁷Ti laha hongoa, laha kamei eliel Jises na masin i lua salit tonalaha.

¹⁸Ti Jises ku haniwa he tea koap, tel seilon kemuk spirit lialun kapiti hahalialu, kamea eliel na i kahiti Jises.¹⁹Jises ukek, "Kumahe, alia haniwa tonam kapi tesol akikim ape kaxiwa waliko solian tel Masiwi aile haniwen o nake ti lalape tatahan tetan."²⁰Ape salan, i nahih hani tesol huopanum taon axalato Dekapolis. I kaxi hani laha waliko ti Jises aile haniwen i. Laha hatesol ongake hawane.

*Tel nati Jairus ma tel hehin tinun
Mt 9:18-26; Lk 8:40-56*

²¹Muhin ien, Jises lang alia hani liai tepaun ti kanitax Galili. Kilan wanen seilon apuha kalini i peixux.²²Lokon ien Jairus tahiama. I tel ti tesol masiwi ti synagog. Ti i ningahiva Jises, i lokuba hani itan kapi aen.²³I kamei eliel Jises, "Tel natuk hehin pate

tinun sikole i mat. O nati kahitima nga ape hanawa minam patul tetan lehe i ewi!"

²⁴Ape salan, Jises nahih kahiti Jairus. Kilan wanen seilon nahih pisipis kapin.²⁵Leili teka seilon ien, tel hehin hina nax ti sale tapunaun leili ahang huopanum huohu.²⁶I paxaiwen kilan dokta. Moniun tua tapo ti ukek huhual tuahe i to lialu tatalewa.²⁷Ti tel hehin honga ka Jises nahih tamusuen, i nahih usiwa muhin ape ti leili teka seilon i akeni soti puxuaun.²⁸I aile ukek ien nake xoxoi namilon i ukek, "Kalak nga tua soti puxui Jises, tinuk i ewi."²⁹Ape salan, kiliwan wanen naxe tinun i tapo ape i ilameni ka leili tirun ewiwen.

³⁰Taen ien Jises ilameni ka pohen i puasawan. I toheawa ape i kamei teka seilon, "Aita tel i soti puxuauk?"

³¹Tesol kahikahin kakane i, "O ningahi ka seilon pate laha pisipis, nake lahan o kamea tetel i soti o?"

³²Tuahé Jises pax upiup tutuen tel i soti puxuaun.³³Tel hehin ilameni tioi i ewiwen ape i mamata xexex lokuba hani itan kapi ae Jises. I kaxi waliko tenen i sohot haniwen i.³⁴Jises kakane i ukek, "Tel natuk, xoxoi namilom tetak i aile tinum ewi. Nahih hetekiewa amuam he tiam. Naxe tinum ape i tapoen."

³⁵Leilon ti Jises kakak, teka seilon leili ingi Jairus hakauma kakain hani Jairus ukek, "Tel natum i matewen, kum hakalakala nanahiae tel masiwi."

³⁶Kalak Jises hongoen waliko ti lato kakak, i hone Jairus, "Kum namiloi hahalapa, o kewa hina namil xoxoan tetak."

³⁷Jises hone teka seilon ka laha kum kakahiti i ape i hakahita mewenae Pita, Jeims ma tel ukalan Jon, tesol kahikahin.³⁸Ti lato tahiya haniwa ingi Jairus, lato hong seilon tangitang "nieilit," teka laha tang ausisini.³⁹Jises soh haniwa leili ing ape i hone laha, "Alahan pate amuto tang ausisini? Tel akaik kumahe maten, i tua mamatih."

⁴⁰Tuahé laha mal soxeni i. Jises talo hasohotu laha. I waxy tel tame tel akaik, tel tinan ma tolu kahikahin ape lato soh hani tesol laha hahanopi tel akaik.⁴¹Jises akeni mini tel akaik ape kakane i, "Talita kum!" Teik kakain ien i ukek, "Tel kokole akaik, xahatale!"⁴²Taen ien wanen i xahat ape i tau nanahih. Teka seilon ongake hawane ka i moih aliawen. Ahangi tel akaik hehin ien huopanum huohu.⁴³Jises kakane eliel lato, "Axiwa ani tel akaik. Ape kum kaxi

sasawateni hani seilon liai waliko ti nga ailewen."

6

*Teka Nasaret watakai hongoi kakai Jises
Mt 13:53-58; Lk 4:16-30*

¹Jises ma tesol kahikahin nahih salili tewau toan ien ape lato nahih hani tesol tonan ti Nasaret. ²Telao Sabat i hutui hanau teka seilon leili synagog. Kilan seilon ti ien laha hongoa kakai Jises, laha ongaini hawane ape kumahe laha amuam.

Laha kamea, "I kema ia kakain tenen masin? Anesoin tenen lahan i hina? I aile ukek ia poh tenen ti seilon kum aile uke?" ³I tel tuahe ataaing. I tel nati Mary, ukale Jeims, Josep, Judas ma Saimon. Nakon tesol tuan kumahe tin lato toto ie?" Ape laha watakai hongoi kakaian.

"Jises kakane laha ukek, "Nga masin teka kuluiai kakai Haeu. Ti toan liai seilon sameni laha tuahe ti puki tonalaha wanen seilon watakai hongoi kakaialaha." ⁵Aile ape, nake laha kum soh ti Jises, i tai aile hakila puasain ti poh hani laha. Pate palai teka seilon tinun i haewia. I hana minan patul ti laha ape laha ewiwen. ⁶Pate i ongaini hawane ka lato tap namil xoxoan hani i.

*Jises talo tesol huopanim hua kahikahin
Mt 10:1-15; Lk 9:1-6*

Ape Jises nahih hani toan tewau tewau hanau teka seilon. ⁷I tilio apuhini tesol huopanim hua kahikahin ape i talo lato uke hua hua. I hani lato poh ti xaxaweniai spirit lialun. ⁸I kakane lato ukek, "Kum kau hahakila soxi, tataen bret, kak ma moni, mewenae kuaiamuto. ⁹Hanawa axahe ae-muto tuahe kum kau hahasea sosomuto." ¹⁰Ape i kakane ulei lato, "Na amuto tahi haniwa tewau toan, heutawa ing tehue atengi tataen amuto nahih salili tewau toan ien. ¹¹Na hina toan kum amuke amuto ma kum hong amuto, tapahiwa anele aemuto ape nahih saliliwa toan ien. I kola ka teka seilon ien puki laha aile axi laha kawatan nake laha kum hong kakai Haeu."

¹²Muhi kakai Jises tesol huopanim huhua kahikahin nahih kaxi ahuti meng solian ti Haeu hani teka seilon lehe laha towiahu ti lialui woulaha. ¹³Lato xaxaweniai spirit lialun ti leili kilan seilon ma ahui wel he kawekilan teka tinun ape laha ewi.

*Matei Jon Baptis
Mt 14:1-12; Lk 9:7-9*

¹⁴Herod tel masiwi ti Galili i hong ka axe Jises sawat hani tesol tesol. Hina seilon laha soh ukek Jon Baptis moih aliawen nake laha paxai ka Jises hina poh tenen seilon kum pon hashotuan.

¹⁵Seilon teka laha ukek, "I Elaija."

Ape teka liai ukek, "I tel kuluiai kakai Haeu masin teka kuluiai kakai Haeu ti kuewen."

¹⁶Ti Herod hongoa, i ukek, "I Jon Baptis, tetel nga koti xaxaweniwen kinawen ape i moih alia!"

¹⁷Herod tetel i uke axoan Herodias, axoi tel ukalan Pilip. I talo teka seilon kalabusiai Jon. ¹⁸Imati ti Herod kalabusi i, Jon Baptis to kaakane Herod, "Nakon o sokok saun solian ti o uke axoi tel ukalam?" ¹⁹Herodias lon mewenae lialun ti Jon, pahan i telei tuahe i kum pon. ²⁰Herod mamata aile halialui Jon nake i tioi ka Jon seilon sawisawin, lawe i ususi nauna ti Haeu. Aile ape Herod awai i ti Herodias. Kalak kakai Jon tuhuke halialui i, Herod hong waheni kakaian.

²¹Telao Herod hone laha ailei tehu angain lapal ti namenai tehu ngain i takah. I ilowi teka masiwi laha pupuas hahitakan, masiwi ti hile ma masiwi ti toan tewau tewau ti Galili. Tel axoan Herodias namiloi ukek, "Taun tetak ie ti teik waliko nga to nanamiloi."

²²Ti tel hehin nati Herodias dedenisama, i hamuamua hawane Herod ma teka seilon kapin. Ape Herod hone i, "Waliko tenen na paham, nge hani o." ²³I kakane tel hehin ien ti puli lawe seilon, "Na o kamei nga tuahe na tenen, tataen tepaun soxi ti nga ngangahati, nge hani o."

²⁴Ape tel hehin nahih kamei tel tinan, "Kaie nge kamei i waliko la?"

Herodias ukek, "Pati Jon Baptis."

²⁵Kiliwan wanen tel hehin nahih alia hani kapi Herod ape i ukek, "Pahak aope ie o hanima nge pati Jon Baptis. Hana haniwa leili tehu kapi ape kau hanima nge."

²⁶Namili Herod sihikuk hawane tuahe i kum kapitini uke nake i kak tuohawen ti puli teka seilon kapin ka i hani tel hehin waliko ti na i kamea. ²⁷Ape se i talo tel unauan nahih hani ingi kalabus ti kota xaxaweniai kinawe Jon Baptis. ²⁸I hana pati Jon leili tehu kapi ape kau hani tel hehin lehe i hani tel tinan. ²⁹Ti tesol kahikahi Jon hongoa, lato kau tihini auni tupuan.

*Akulai 5.000 seilon Jises axi analaha
Mt 14:13-21; Lk 9:10-17; Jn 6:1-15*

³⁰Tesol huopanim huhua aposel tahiia alia hani kapi Jises ape kaxi hani i waliko ti lato ailewen ma hanauen seilon. ³¹Lokon ien kilan wanen seilon nahiwa nahima. Aile ape Jises ma tesol kahikahin kum ang uke. Jises hone lato, “Kako nahihi hani tesol mewenae kako lehe amuto hanawamu teik.”

³²Ape lato lang he tea koap hani tesol tahain. ³³Tuahe kilan seilon ningahi ti lato ku ape seilon ti lawe toan laha kiliwau tahiama imat ti Jises ma tesol kahikahin. ³⁴Ti Jises mosua he koap, i ningahi teka kilai seilon ape lon i tel. I tahane laha nake laha masin teka sipsip tap ngahatalaha. Ape i hutui hanau laha kilan waliko ti saun ti Haeu.

³⁵Al ape sikole i lol. Tesol kahikahin nahihi hani kapin, lato ukek, “Pate ape alohah a tap toan ie.” ³⁶Taloa teka seilon hani tesol toan na palieh lehe laha kahui analaha.”

³⁷Tuahe Jises ukek, “Puki amuto axiwa analaha.”

Lato namiloil ukek, “Malehe kilai seilon, kaie amite pon? I tapai ti kahi tel seilon na i puas ti pangapang tepanimtoluhi! Nakon paham amite towi halapa moni ti kahuiai bret ape hani teka kilai seilon ie?”

³⁸Jises kamei lato, “Hil bret toi amuto Niahih Paxaimua.”

Ti lato tioiwa, lato ukek, “Tepanimawee bret ma huok xixi.”

³⁹Jises hone tesol kahikahin ti hatona seiai seilon hani tesol tesol ti he pahoah.

⁴⁰Ape laha to apuha 100 ma 50 ti tonain tesol tesol. ⁴¹Ti laha toa, Jises akeni tepanim bret ma huok xixi. I pax hani patul ape i kak kemulik hani Haeu. I wiki bret uke teik teik hetekie xixi ape i hani tesol kahikahin sei haniai teka seilon. ⁴²Laha hatesol ang ahoi hawane. ⁴³Tuahe kilan moxe an tutuen, Huopanim huohu poi bret ma xixi tesol kahikahin apuhini. ⁴⁴Mongohe seilon ti Jises axi analaha 5,000, tai wexe teka hehin ma akaik.

Jises nanahih patul he kanitax

Mt 14:22-23; Jn 6:16-21

⁴⁵Muhin Jises hone tesol kahikahin nahihi haniwa he tea koap ape lalangawa imat hani Betsaida. Ape i talo aliakateka kilai seilon. ⁴⁶I kak tapeiniwa teka seilon ape i nahihi hani patul he maunten. Ti ien i kakak kapi tel Taman Haeu.

⁴⁷Ti alohahawa, tea koap ape ilam patalal. Jises tutuen ixux. ⁴⁸I paxai tesol kahikahin

pate lato makeh xoxeiai tea koap nake lato xoxei papahoi aupol. Pate letu ti teik tilokoan tutuen, i nahihi patul he kanitax hani kapi lato. Sikole i nahihi akulai lato. ⁴⁹Tuahe lato ningahi i nanahih patul he kanitax. Lato sokok ka tel manu. Ausisinalato. ⁵⁰Lato mamata hawane.

Ape Jises kakane lato ukek, “Haxoxoa namilomuto! Kum maamata. Se nga.” ⁵¹I ku haniwa he tea koap ape aupol tuxi. Tesol kahikahin pate lato ongainsi. ⁵²Kalak lato ningahiwen ti Jises axi ani kilai seilon i akulai 5,000, namilolato tai xeu tutuen Jises i seilon tetenen.

Jises haewia teka tinun ti Genesaret
Mt 14:34-36

⁵³Ti lato takana haniwa texux xux Gene-saret, lato xuoti tea koapaulato. ⁵⁴Ti lato mosua, teka seilon ila tioi Jises. ⁵⁵Tataen teka seilon ti lawe toan hongoa ka Jises tahiawen, laha kau talowike hawane teka seilon tinun hani kapin. ⁵⁶Tesol tesol ti i nahiwa, toan larlap ma kokol, teka seilon kaua teka tinun hani tesol tone apuhain. Ape laha kamei eliel Jises na laha tua soti puxuaun. Teka laha soti, laha ewi.

7

Jises haxewa nauna ti Haeu
Mt 15:1-9; Lk 11:37-40

¹Telao tesol hanau nauna ti Moses nahiima Jerusalem. Lato ma tesol Parisi apuha kalini Jises. ²Lato ningahi tesol kahikahin tai nuhi minalato ti lato ang.

³Tesol Parisi ma teka Ju liai, laha kum ang na laha tai nuhi minalaha ti usiai saun ti teka matahaun. ⁴Na laha aliamma ti tesol tone hangainiai waliko, laha kum ang atengi laha ailemu saun ti nuhi haunialaha. Kilan saun tutuen, masin sale nuhiai kap, salek ma pelet.

⁵Ape tesol Parisi ma tesol hanau nauna ti Moses kamei Jises, “Alahan tesol kahikahim kum aile usi nauna ti teka matahaun? Ti lato ang, lato tai nuhi minalato.”

⁶I kak pahoi lato ukek, “Amuto seilon tenen lehomuto huoka! Kakai Haeu ti Aisaia taiwen pate salan ti i kak kilami woumuto. Haeu kakane Aisaia ukek, “Teka seilon sameni nga ti tuahe awalaha a namilolaha pate xauxaun tetak.

⁷Kumahe salan laha lolotui nga.

Laha hanau waliko ti puki seilon namiloi tanomi.’” *(Isa 29:13)*

⁸ Ape Jises kakane lato, "Amuto aka lioi nauna ti Haeu ape akeni kongini saun tenen puki ti amuto.

⁹ "Amuto pate aneso wanen nexi haselei nauna ti Haeu lehe amuto akeni kongini saun tenen puki ti amuto. ¹⁰ Ala amuto tioi waliko ti Moses hahanau seilon. I ukek, 'Hong tamaniwa kakai tamam ma tinam ape aile hasolia haniwa lalu. Na o kak halialu tamam ma tinam, o laha telei.' (Exod 20:12, 21:17) ¹¹ Tuahé amuto ukek se ewi na seilon kum huali tamalaha ma tinalaha na teik huuhul ti hualialu laha haniwen Haeu. ¹² Amuto hanau ukek ien ape seilon kum huali tamalaha ma tinalaha. ¹³ Ti amuto aile ukek ien, kumahe amuto usiusi kakai Haeu, amuto hakoutama saun tenen puki ti amuto. Kilan waliko liai tenen masin ien amuto ailele."

Waliko tenen i haloloa seilon

Mt 15:10-20

¹⁴ Muhin ien Jises tiloi teka lawalawai seilon hani kapin ape i ukek, "Amuto hatesol, heiwa taxingamuto lehe amuto hong tioi kakaiak. ¹⁵ Waliko ti i soh nonoa he awe seilon i kum haloloa i. Mewenae waliko tenen na i ahutama he awe seilon i haloloa i. ¹⁶ Na amuto hina taxing ti hongoi kakain, hongoa."

¹⁷ Ape i nahih salili laha hani leili ing. Tesol kahikahin kamei i ti haxewai teik kakaian. ¹⁸ I kamei lato, "Tin amuto kum xeu? Nakon amuto tai titioi ka tap waliko ti melai i soh hani leili seilon i haloloa i? ¹⁹ Kumahe i soh hani leili aten, i soh hani leili puuhuan. Imuh i ahuta." Ape Jises kakane lato ka Haeu namiloi ukek hatesol an haun. ²⁰ I ukek, "Waliko ti i ahutama leili seilon, tetenen ien i aile haloloa seilon. ²¹ Waliko lialun ti i ahutama leili seilon se tetesol: namil lialun, saun lialun ti wawan hehin, xuxuina, na ulini ape telei seilon, xuina axoi seilon liai, ²² saun ti halepean, saun ti halialui seilon liai, puputa, tap saun ti hienain, wiwilik, mimisah, hanasanasa ma tua aile lalolal waliko. ²³ Haeu ukek tesol waliko lialun ien i ahutama leili seilon ape aile haloloa i."

Jises huali tel hehin kumahe Ju

Mt 15:21-28

²⁴ Jises salili tesol ien ape i nahih hani tesol toan xohixohin Taia. I nahih soh hani tehu ing. Kumahe pahan seilon ningaha i tuahé i kum muna uke. ²⁵ Tel hehin spirit lialun kapiti hahalialu tel natun hehin, hong tunahi sale puase Jises. Aile ape i

nahih kosea hani kapi Jises ape i lokuhu hani kapi aen. ²⁶ Tel hehin ien i kumahe Ju, i hehin Grik, i takah Penisia taon ti Siria. Pahan wanen Jises xaxaweniwa spirit lialun ti leili tel natun.

²⁷ Jises kakane tel hehin ien ukek, "Kumahe solian na tel i waxi ani natun ape towi hani ani sinen. Ala nga hualimu teka Ju."

²⁸ Tel hehin i hong tioi waliko ti Jises kakak ape i ukek, "Salan wanen, tel masiwi, tuahé sinen ani perni ani akaik na i put hani itan."

²⁹ Jises kakane i, "Pahoan tetam pate solian. Nahih hetekiewa amuam nake nga xaxaweniwen spirit lialun ti tel natum."

³⁰ Ape salan, tel hehin nahih alia hani leili ingan. I ningahi ka tel natun engeeng he sau ape i ewiwen. Spirit lialun saliliwen i.

Jises haewia tel seilon taxingan sutu ma kum kak alua uke

³¹ Jises nahih salili tesol toan xohixohin Taia. I nahih sahi Saidon ma Dekapolis ape i tamus hani kanitax Galili. ³² Teka seilon hakahita hani i tel seilon taxingan sutu ma i kum kak alua uke. Laha kamei eliel Jises na i hana minan patul tetan.

³³ Jises aka waxi tel seilon hani kapin. I soti leili taxingan mai i pukeini ngaxe minan ape i soti lehe tel seilon. ³⁴ Lon tel hawane ape i pax hani patul. I hone tel seilon, "Epatal!" Teik kakain ie i ukek, "Heawa!" ³⁵ Taen ien, taxingan hea, lehon tin i puas ape kakaian i xeu.

³⁶ Jises hone laha, "Kum kakaxi wanen hani teka seilon liai." Tuahé laha kum puluhini uke, laha kaxi tatale.

³⁷ Ti teka liai hongoa, laha ongake hawane. Laha ukek, "Kalak taxing sutu ma seilon kum kak uke, i pon haewian. Waliko ti i aile, se hatesol solian."

8

Jises axi ani 4,000 seilon

Mt 15:32-39

¹ Tai kue kilan ulea seilon nahih hani kapi Jises. Ti laha apupuha ien, analaha tapo. Jises tiloi tesol kahikahin hani kapin. ² Ape i ukek, "Nga tahane teka seilon ie nake laha kapik kewen ngain tolulu a tap analaha.

³ Na nga talo aliakte laha hetekie hitolo, teka ti tonalaha xauxaun laha tua akimatu luhui aweisal."

⁴ Tesol kahikahin kamei i, "Ti he lohong ie kako kema an ia ti axiai ani teka lawalawai seilon?"

⁵Jises kamei lato, “Hil bret toi amuto?”

Lato ukek, “Tepanim huaik.”

⁶I hone hatesol seilon ka to haniwa itan. I waxi tepanim huaik bret ape i kak kemulik hani Haeu. I wiki ape i hani tesol kahikahin sei hani teka seilon ape tesol kahikahin aile usi. ⁷Tin hina palaiai kokole xixi. Jises kak kemulik hani Haeu ape i hani tesol kahikahin sei ulea hani teka seilon.

⁸Hatesol seilon ang ahoi hawane. Ti tesol kahikahin apuhiniwa moxe an i sohotu po tepanim huohu. ⁹Mongohe seilon hatesol 4,000. Jises talo aliake laha hani tonalah. ¹⁰I ma tesol kahikahin nahih ku hani he tea koap ape lato lang hani texux xux Dalmantua.

Tesol Parisi kamea kolakol ti poh

Mt 16:1-4; Lk 11:16

¹¹Ti tesol Parisi hongoa Jises tahiawen, pahalato lato kamei tohongi i. Lato nahih hani kapin ape lato lungesi i ukek, “Kola hanima amite pohem lehe amite tioi ka salan Haeu taloma o.”

¹²Tuahe Jises tioi waliko ti lato nanamiloj ape i ukek, “Alahan lawe pahamuto nga aile kolawa pohek? Nga kaxi hawane hani amuto, nga kum kola hani teka seilon ti aope ie kolakol ti Haeu.” ¹³Muhin ien Jises nahih salili lato. I ku hani he tea koap ape i lang hani liai tepaun ti kanitax Galili.

Teka Parisi ma Herod masin ist nake lato neini hakalala seilon

Mt 16:5-12

¹⁴Tesol kahikahin maluhe analato bret, teikawe toi lato he koap. ¹⁵Jises kakane hawane lato, “Kanipetiwa amuto ti tesol Parisi ma Herod nake laha masin ist.”

¹⁶Tesol kahikahin he kakak alia lato, “I kak ukek nake kako tap bret.”

¹⁷Jises tioi waliko ti lato kakak ape i hone lato, “Alahan amuto to kak hahakila ka amuto tap bret? Amuto tai titioi? Amuto kum xeu? Patumuto nakon pate ailan ukek?” ¹⁸Nakon pulamuto pulaxa ma taxingamuto sutu? Amuto tai ningahia ma tai hongohong? Amuto kum nameni? ¹⁹Ti nga wiki tepanim bret waxeniai teka seilon laha akulai 5,000, hil po moxe an amuto waxi?”

Lato ukek, “Huopanim huohu.”

²⁰“Ape ti nga wiki tepanim huaik bret waxeniai teka seilon kilaialaha 4,000, hil po moxe an amuto waxi?”

Lato ukek, “Tepanim huohu.”

²¹Ape Jises hone lato, “Nakon amuto tai xewaxeus?”

Jises haewia tel seilon pulaxa

²²Jises ma tesol kahikahin tahiha hani Bet-saida. Hina seilon ati tel pulaxa hani kapi Jises ape laha kamei eliel i ti akeni sotiai tel seilon ien. ²³Jises akeni mini tel pulaxa ape ati hani melal ti toan. Muhin ti i pusuniwa pulan, i hana minan he puli tel seilon ape kamei i, “O ningahi uke waliko?”

²⁴Tel seilon paxawa ape i ukek, “Se, nga ningahie seilon nanahih, tuahe tanomalah masin pata.”

²⁵Jises hana ulea minan hani he puli tel pulaxa. Tataen ien pulan xeu hawane ape i paxapax alua. ²⁶Jises kakane i, “Nahih sawi haniwa ingam, kum nanahih leili toan.”

Pita tioi ka Jises i Krais

Mt 16:13-20; Lk 9:18-20

²⁷Jises ma tesol kahikahin nahih hani toan ti kapi Sisaria Pilipai. Ti lato nanahih aweisal, Jises kamei lato, “Kaxi hanima nga, teka seilon laha ukek nga aita?”

²⁸Lato pahoi ukek, “Teka laha ukek o Jon Baptis, teka laha ukek Elaija ape teka liai ukek o tel kuluiai kakai Haeu.”

²⁹Jises kamei lato, “A amuto? Amuto ukek nga aita?”

Pita pahoi ukek, “O Krais, tel Haeu taloma.”

³⁰Jises kakane eliel lato ukek, “Kum kakaxi ka nga Krais.”

Jises kak kilami matean

Mt 16:21-28; Lk 9:21-27

³¹Muhin Jises hutui hanau tesol kahikahin, i ukek, “Nga tel Nati Seilon, nga tunahi lalape kawatan ma moloan ape teka masiwi ti teka Ju, teka masiwi tuah ti hukuminiai Haeu ma seilon, ma teka hanau nauna ti Moses, laha watakai hawane nga. Laha telei nga tuahe muhi ngain tolulu nga xahat alia.” ³²I kaxi haxewa hawane haniwa lato ape Pita waxyi tahaini Jises hani kapin ape kahiloloi i nake i kum ukek waliko ien i sohot hani Jises.

³³Jises tohea paxai tesol kahikahin liai ape i kahiloloi Pita, “Tahawa! O kak hanowi Satan! Namilom kumahe i ahuma ti Haeu, i ahuma ti seilon.”

³⁴Ape Jises tiloi teka kilai seilon ma tesol kahikahin hani kapin. I ukek, “Na seilon pahan sohot kahikahik, laha kum namiloi wawaxi mewenae laha. Laha kaua kawatan masin ti nga kakau lehe i kola laha kahikahik wanen.” ³⁵Seilon teka pahalahi

laha akeni kongini totonalaha ti itan ie, laha kum tunahi tonain kapi Haeu. Tuah teka laha to kahikahik kalak na masin laha lioi totonalaha ti itan ie nake ti usiai kakai Haeu, laha tunahi tonain kapi Haeu ti tap tahi tapoan.³⁶ Na tel seilon hapono hatapo i waliko ti itan ie tuahe i lioi tonain kapi Haeu, solian la i uke? Tap.³⁷ Tap tenen waliko kahui uke tonain kapi Haeu.³⁸ Na tel seilon hieni puluhini nga ma kakaiak aope ie, leili taun ti teka seilon to ailele saun lialun, nga tel Nati Seilon tin nga hieni puluhini i taen ti nga alia hetekiema poh ma xewai tel Tamak Haeu ma tesol engel, spirit solian tetan.”

9

¹Jises kak tatale ukek, “Nga kaxi hawane hani amuto, teka ti amuto ie, imat ti amuto mat, amuto ningahi nenein ti Haeu sohot hetekiema lalape kui pohen.”

Tanome Jises sohia hawane

Mt 17:1-13; Lk 9:28-36

² Ngain tepanim tehu tamusua Jises hakahita Pita, Jeims ma Jon hani he tehu maunten patul, mewenae lato. Ti lato ien, tanome Jises sohia hawane.³ Tehu puxuaun i xeu papaxaux hawane, paxauxuan i xoini na seilon nuhi.⁴ Moses ma Elaija take hahutuia hani kapi lato ape lalu kakak kapi Jises.

⁵ Pita kakane Jises, “Tel masiwi, pate ewi ti kako ie. Amite atai tolulu houha, tehu tetam, tehu ti Moses ma tehu ti Elaija.”⁶ I kak ukek ien nake i ongake hawane ape i kum tioi tenen na i kak.

“Lokon ien, teik lihui maun atuhi lato ape tenen kinax i wixima he maun ien i ukek, “Tel seilon ie se Natuk pate nga wahleni. Hongoa i.”⁷ Muhin ien lato pax ahuahu tuahé lato kum ningayah Moses ma Elaija, mewenae Jises.

⁸ Ti lato nahih momosua he maunten Jises kakane lato ukek, “Kum kakaxi hani seilon liai waliko ti amuto ningahiwen. Atengiwa tataen ti nga tel Nati Seilon xahat ti mateak.”⁹ Lato hong tamani kakaian. Tuahé ti puki lato, lato to kakak tutuen salangawe teik kakain “xahat ti matemate” ti Jises kakak.

¹⁰ Ape lato kamei Jises, “Nake lahan teka hanau nauna ti Moses ukek ka Elaija i sohotumu imat ti Krais?”

¹¹ Jises ukek, “Salan wanen tel masin Elaija i sohotumu apeseniai teka seilon imat

ti Krais sohot. Tuahé nake lahan kakai Haeu i ukek ka tel Nati Seilon i tunahi kawatan ma moloan lapalap wanen ma laha watakai hawane i?¹² Nga kaxi hani amuto, Jon Baptis, tel masin Elaija, i sohotuen tuahe laha aile hani i waliko ti pahalahá. Laha aile halialu i masin ti kakai Haeu kaxiwen leili peapaun.”

Jises haewia tel akaik spirit lialun kapiti halialu

Mt 17:14-21; Lk 9:37-43

¹⁴ Ti Jises ma tolu kahikahin nahih aliawa he maunten, lato ningahi kilan seilon kapi tesol kahikahin liai. Teka hanau nauna ti Moses lato kak he lungelung kapi tesol kahikahin ien.¹⁵ Ti teka seilon ningahiwa Jises, pate laha ongake ape kiliwau tengeni amuke i.

¹⁶ Jises kamei tesol kahikahin, “Amuto kak hapatapat waliko la?”

¹⁷ Tel seilon ti leiolaha ukek, “Tel masiwi, nga nahike hanima o tel natuk wawan. Spirit lialun kapiti halialu ape i kum kak uke.¹⁸ Lawe na spirit soh haniwa tel natuk, i haputa i hani he hepekeun. Pok sal he awan, i hahakiki nisun ape tupuan tua wakowako. Nga kamei tesol kahikahim ti xaxawenai spirit lialun tuahe lato kum pon.”

¹⁹ Jises ukek, “Nakon lahan amuto seilon ti aope ie pate tap namil xoxoan? Nga to kapimoto ma tin nga hanau kueiniwen amuto. Kaie kuehuan ia pahamuto nga to kapimoto lehe namilomuto i xox tetak? Ati hanima nga tel akaik!”²⁰ Ape lato hakahita i hani Jises. Ti spirit lialun ningahiwa Jises, i aile hahaxexe tel akaik. Tel akaik put huhulil he hepekeun ape pok sal ulea he awan.

²¹ Jises kamei tel taman, “Lokon wanen tenen waliko ie tunahi i?”

Tel taman ukek, “Lilian ti kokolen.²² Spirit lialun lawe i tohongi lalali teleian. I haputa i hani he ah ma leili kan. Tahanema amili. Na o pon, hualima amili!”

²³ Jises ukek, “Na nga pon? Alahan o ukek na nga pon? Tel na i hina namil xoxoan ti Haeu, lawe waliko i pon.”

²⁴ Tel tame tel akaik tilol eliel ukek, “Teik kokole namilok xoxoan tuahe i kum tapai. Hualima nga lehe nga uke aheke!”

²⁵ Ti Jises ningahiwa ka teka seilon to kila aheahema, i tumei spirit lialun ti hasutui taxing ma sioniai au, i ukek, “Nga hone

o, ahutawa ti tel akaik. O taha xaxau hawanewa! Kum soh ulelea hani i.”

²⁶ Spirit lialun ausisini. I hahaxexe tel akaik ape i sohot ahuta tetan. Lawe seilon sokok tel akaik mat tamusuen nake tanoman masin ka maten. ²⁷ Tuah Jises akeni xahateni tel akaik ape i tu.

²⁸ Muhim ien Jises ma tesol kahikahin alia hani tonalato ape ti mewenae lato wanen, lato kamei i, “Nake lahan amite kum pon xaxaweniai tenen spirit lialun ien?”

²⁹ Jises ukek, “Spirit lialun tenen ien mewenae na amuto lotu eliel kamei poh ti Haeu, i pon xaxawenue.”

Jises kakak ulea sale matean

Mt 17:22-23; Lk 9:44-45

³⁰ Imuh Jises ma tesol kahikahin nahih tamus hani Galili. Kumahe pahan teka seilon liai tioi lato tetesol. ³¹ Pahan i hanau tesol kahikahin. I ukek, “Nga tel Nati Seilon, laha hangaini hani teka seilon ape laha telei. Tuah muhi ngain tolulu nga xahat alia.” ³² Lato kum xeu waliko ti Jises kakak. Tuah lato mamata kamean.

Aita tel pamu tuah?

Mt 18:1-5; Lk 9:46-48

³³ Jises ma tesol kahikahin nahih tahi hani tehu taon Kapenaum. Ti lato leili ing Jises kamei lato, “Ti kako nanahima aweisal, amuto kak lungelung waliko la?” ³⁴ Lato tai wix pahoi i nake ti he aweisal lato kak hapatapat aita tel pamu tuah ti lato.

³⁵ Jises to ape i kakane huopanim huhua kahikahin ukek, “Na pahamuto amuto to masiwi, teheniwa amuto ape hualowi seilon liai.”

³⁶ Jises aka hatuhi tel akaik matalato. I akeni aumi tel akaik ape i kakane lato ukek, ³⁷ “Na tel i waxi aumi akaik masin ie nake nga, se i aumini nga. Ape tel i waxi aumi nga, i waheni tel Tamak Haeu, tetel i taloma naga.”

Seilon teteka tepaun ti Jises

Lk 9:49-50

³⁸ Jon tel kahikahi Jises ukek, “Tel masiwi, amite ningahi tel seilon i xaxaweni spirit lialun leili teka seilon hahitake axam. Tuah i kumahe tel ti kako ape amite honewen i ka kum ailele.”

³⁹ Jises hone tesol kahikahin ukek, “Kum hahalini i. Na tel seilon aile hasohotu waliko tenen lalap hahitake axak, i kum pon kak halialuak. ⁴⁰ Na tel seilon i kum pahoxai kako ti pupuasakako, i tepaun ti kako. ⁴¹ Nga kakane hawane amuto, na tel seilon axi

amuto kalak tuahe na kaniup nake amuto tetak, i uke kahun ti Haeu.”

Nauna ti sale saun lialun

Mt 18:6-9; Lk 17:1-2

⁴² Jises hahanau tutuen lato ukek, “Pate lialun wanen ti tel seilon na i aile haputa tel seilon liai kalak i seilon naun ma namilon kumahe xoxoari tetak. Pamu ewian laha xioti tehu mes lalap hani he kinawen ape hataxixi hani ilam. ⁴³ Na o hapuasa tepaun minam ti ailei saun lialun, koti xaxawenue. Pamu ewi na o uke tonain kapi Haeu ti tap tahi tapoan minam tepaunue. Ien se pamu ewian ti na o sohot hani tesol ti kawatan tap tahi tapoan hetekie minam hupaun. ⁴⁴ Tetesol ien, tehot ah xekean tap tahi pehoan. ⁴⁵ Na o hapuasa tepaun aem ti ailei saun lialun, koti xaxawenue. Pamu ewi na o uke tonain kapi Haeu ti tap tahi tapoan kalak o mangei. Ien se pamu ewian ti na laha towi o hani tesol ti kawatan tap tahi tapoan hetekie aem hupaun. ⁴⁶ Tetesol ien ‘ul ani laha lian tehue ape tin laha kum tipehi uke ah.’

(Isa 66:24)

⁴⁷ Na o hapuasa tepaun pulam ti ailei saun lialun, xaxusi xaxawenue. Pamu ewi na o sohot hani tone Haeu pulam tepaunue. Ien se pamu ewian ti na laha towi o hani leili tesol ti kawatan tap tahi tapoan hetekie pulam hupaun. ⁴⁸ Tetesol ien ‘ul ani laha lian tehue ape tin laha kum tipehi uke ah.’

(Isa 66:24)

⁴⁹ “Totohong ma kawatan masin ah na i lui amuto. Tuah na amuto waxaini, amuto masin sol ti hanamui an. ⁵⁰ Sol solian tuahe na namun tapo, o aile ukek ia aliakei namun? Amuto hanowiwia sol uke tap pupuasamuto ti Haeu. Tin haeliel hawanewa lehe waxi wasolamuto tel tel mewenae solian.”

10

Nakon ewi na seilon lioi axoan?

Mt 19:1-12; Lk 16:18

¹ Imuh Jises nahih salili Kapenaum ape i nahih hani texux xux Judia. I kolia hani pape kan Jodan. Kilan seilon nahih apuha hani kapin ape i hanau laha kakai Haeu hanowi ti lawe i to ailele.

² Teka Parisi nahih hani kapi Jises ape kamei tohongi i ukek, “Nakon ewi na tel wawan lioi tel axoan?”

³ Jises kamei lato, “Moses kakane amuto waliko la?”

⁴ Lato ukek, "Moses kakawen ka ewi na tel wawan tai teik kakain ti sale lioiai tel axoan."

⁵ Jises hone lato, "Moses ukek ewi nake hanauamuto pate ailan. ⁶ Tuahe ti uli tanomiai tehu pon ie, Haeu 'tanomi wawan hetekie hehin.' (Gen 1:27) ⁷ 'Aile ape tel wawan i salili tel taman ma tinan ape i hukuma hani kapi tel axoan. ⁸ Lalu sohot hanowi seilon tel.' (Gen 2:24) Lalu ape kumahue hua, lalu masin ka telawé. ⁹ 'Aile ape waliko ti na Haeu hukumini, seilon kum seselai."

¹⁰ Ti lato nahih alia haniwa leili ing, tesol kahikahin kamei Jises sale teik kakain i kakak. ¹¹ I kak pahoi lato ukek, "Na tel wawan i lioi tel axoan ape i waxi axoan tel hehin liai, i ailewen saun lialun ti wawan hehin. ¹² Tin masin na tel hehin i lioi tel axoan ape i waxi axoan tel wawan liai, tin i ailewen saun lialun ti wawan hehin."

Jises lotu huali akaik kokol

Mt 19:13-15; Lk 18:15-17

¹³ Telao teka seilon hakahita teka akaik kokol hani kapi Jises lehe i lotu huali lato tuahe tesol kahikahin kahiloloi laha. ¹⁴ Ti Jises paxaiwa, lon i lialu ape i hone tesol kahikahin, "Tiliwen teka akaik nahih hani kapik, kum talo xaxaweni lato. Teteka seilon laha sohot hanowi teka akaik ie, Haeu neini aweisalulaha. ¹⁵ Nga kakane hawane amuto, Haeu neini mewenae teteka laha hana xoxoi namilolaha hani i masin teka akaik laha hana xoxoi namilolaha hani tamalaha ma tinalaha." ¹⁶ I akeni aumi akaik tel tel ape i hana minan patul ti lato ti lotu hualialato.

Tel seilon uluhu kilan soxi

Mt 19:16-30; Lk 18:18-30

¹⁷ Ti Jises hutui i nahih, tel seilon kiliwama ape i put lokuhu hani itan kapi ae Jises, ukek, "Tel masiwi solian, nga aile la lehe nga uke tonain kapi Haeu ti tap tahi tapoan?"

¹⁸ Jises kamei i, "Nake lahan o ukek nga solian? Na masin o ukek nga solian, namiloai paxaiwa nake mewenae Haeu solian. ¹⁹ O tioi nauna tetan: 'Kum tetelei seilon, kum ailele saun lialun ti wawan hehin, kum xuxuina, kum kau puputini kakain, kum aile pipisi seilon liai ma hongoa kakai tamam tinam ape aile hasolia haniwa lalu.' (Exod 20:12-16)

²⁰ Tel seilon ukek, "Tel masiwi, nga usi hatapo tesol nauna ien lilian ti nga akaik."

²¹ Jises paxai tioi namili tel seilon ien. Ape hetekie tatahan i ukek, "O tai aile teik waliko. Nahih hangainiwa hatesol soxiama ape haniwa teka seilon tap soxi lehe imuh o uke kahum ti tone Haeu. Ape o nahih kahitima nga lehe o sohot kahikahik."

²² Ti tel seilon hongoa kakai Jises, tian kawat hawane ape i nahih alia hetekie tatahan nake soxian pate kilan.

²³ Jises paxai aliaka tesol kahikahin ape i kakane lato, "Seilon tenen kilan soxi, pate ailan wanen ti usiai aweisal ti Haeu neneini!"

²⁴ Tesol kahikahin ongaigni hawane kakai. Tuahe Jises kak tuhi ulea, "Tesol natuk, pate ailan wanen ti seilon tenen laha hana soxi mateiwa ti laha ti usiai aweisal ti Haeu neneini. ²⁵ Kumahe malimun ti tok kamel na i soh nom he tewau aweing laha axai nil ti sawitiae maia. Tuahe pamu ailaian ti seilon tenen kilan soxi ti usiai aweisal ti Haeu neneini."

²⁶ Tesol kahikahin pate lato hong ongaigni hawane. Lato he kakak puki lato, "Lehe ape aita pon?"

²⁷ Jises paxai lato ape i ukek, "Ti mewenae kui seilon i kum pon. Tuahe hetekie huhual ti Haeu, lawe waliko i pon."

²⁸ Pita ukek, "Kaien amite pon nake amite saliliwen lawe waliko ape amite nahih usiusi o."

²⁹ Jises hone lato, "Nga kakane hawane amuto. Tel na i salili tonan, ukalan, tuan, tinan, taman, natun ma na soxian nake ti usiai kakai Haeu, i uke waliko pamu kilaian.

³⁰ Ti aope ie, i kilan ukalan, tuan, tinan, akaik, soxi ma na tonan. Tuahe tin i tunahi kawatan ma moloan. Ape ngain ti lulainima, i uke tonain kapi Haeu ti tap tahi tapoan. ³¹ Tuahe kilan teka axalahalalap ti aope ie, Haeu paxai ukek laha seilon tenen tap axalahalap ape seilon ti tap axalahalap ti aope ie, Haeu paxai ukek laha seilon tenen axalahalalap."

Jises kakak ulea sale matean

Mt 20:17-19; Lk 18:31-34

³² Jises ma tesol kahikahin nahih hahaniwa Jerusalem. Jises nanahiwa imat. Tesol kahikahin ilameni ox tuhi lato. Teteka laha nahih usiusi lato, laha mamata waliko tetenen na i sohot Jerusalem. Jises waxi selai tesol huopanum huhua kahikahin hani tesol mewenae lato ape i kaxi hani lato waliko tetenen na i sohot hani i. ³³ Jises hone lato ukek, "Kako ape nahih hahaniwa Jerusalem. Ti ien, nga tel Nati Seilon, laha

hangaini nga hani mini teka masiwi tuah ti hukuminiai Haeu ma seilon, ma teka hanaui nauna ti Moses. Lato noseni teleiak ape lato hangaini nga hani mini teka seilon ti Rom. ³⁴Laha soxeni, pukeini, heti ma telei nga tuahe muhi ngain toluluu nga xahat alia."

Katekate ti Jeims ma Jon

Mt 20:20-28

³⁵ Muhin ien Jeims ma Jon, hua nati Sebedi, nahih hani kapi Jises. Lalu ukek, "Tel masiwi, pahamili o aile hanima amili teik waliko."

³⁶ Jises kamei lalu, "Waliko la pahamulu nga aile hani amulu?"

³⁷ Lalu hone Jises, "Tataen o sohotua tel Masiwi ti neiniai hatesol seilon, pahamili o hatonama amili kapim, tel tepaun manau, tel tepaun kalama lehe tin amili sohot masiwi ti neiniai seilon."

³⁸ Jises ukek, "Amulu kum tioi waliko tetenan amulu kakamei. Nakon amulu lang pahoi uke laman ti ape nga lang pahoi? Nakon amulu pon kaui kawatan ti nga kau kalak na amulu mat?"

³⁹ Lalu pahoi ukek, "Amili pon." Jises hone lalu, "Salan imuh amulu lang pahoi laman ti nga lang pahoi. ⁴⁰Tuahe kumahe nga tetel kilamai seilon ti tone minak manau ma na kalama ti neiniai seilon. Tonain ien Haeu hani teka i kilamiwen."

⁴¹ Ti tesol huopanim kahikahin liai hon-goa, lolato lialu ti Jeims ma Jon. ⁴² Jises apuhini lato hatesol ape i ukek, "Amuto tioi ka kewi teka masiwi ti he tehu pon ie lato neini halialu teka seilon hahitakalato ape lato lungei laha ka tua hongoa lato. ⁴³Tuahe kumahe pahak i sohot ukek ien leilomuto. Na tel ti amuto pahan ax lalap, i kola hawanewa ka i tel ti hualiae seilon. ⁴⁴Tin masin na tel ti amuto pahan i sohot seilon tuah, i kewa unaumuto hatesol. ⁴⁵Tataen nga tel Nati Seilon, kumahe nga toma lehe seilon to unauak, nga toma unaualaha. Ape nga mat ti ukei kahi lialui woi seilon."

Jises haewia Batimeus tel seilon pulaxa

Mt 20:29-34; Lk 18:35-43

⁴⁶ Ti lato nahih sasaliliwa Jeriko hani Jerusalem, Jises ma tesol kahikahin hetekie kilai seilon, lato apatuini tel seilon pulaxa axan Batimeus, nati Timeus. Lawe i toto ngixi aweisal kameiai huuhal. ⁴⁷Ti i hongoa ka Jises ti Nasaret ien, i tilol, "Jises, tel kahi nati David, tahanema nga!"

⁴⁸ Kilan seilon tumei i ka minginiwa awan. Tuahe i tilol eliel ahe, "Tel kahi nati David, tahanema nga!"

⁴⁹ Jises tu hamalum ape i ukek, "Taloma i."

Ape laha tilol hone tel seilon pulaxa, "Aamuamua! Tua! Jises titilo i o!"

⁵⁰ Amuamui Batimeus i hana lioi tehu atuhiae puxuauna, i tit tu ape i nahih hani kapi Jises.

⁵¹ Jises kamei i, "Paham nga aile hani o waliko la?"

Tel pulaxa ukek, "Tel masiwi, pahak o haewiama pulak."

⁵² Jises hone i, "Nahiwa, xoxoi namilom ti Haeu aile haewiawen o." Tataen ien wanen, pulan ewi ape i nahih kahiti Jises.

11

Jises soh hani Jerusalem

Mt 21:1-11; Lk 19:28-44; Jn 12:12-19

¹ Jises ma tesol kahikahin nahih hani huowau toan Betfage ma Betani, pape tehu Maunt Oliv, xohixohin Jerusalem. I kilami hua ti lato ti ailei tenen puasain. ² I hone lalu ukek, "Nahih haniwa tewau toan mateiwaukako. Na amulu tahiawa, amulu tunahi tok donki uluha xinotan ien. Tap tel seilon kikiliwakewen i. Upatiwa ape hakahitama. ³Na tel seilon kamei amulu, 'Kalahai amulu upati tok donki?' honewa i, 'Tel Masiwi pahan pake i atoheni aliake koseni.'

⁴ Ti lalu nahiwa, lalu tunahi tok donki tutu pape aweisal, xinotan he kukui ing.

⁵ Ti lalu upapat, teka seilon ien kamei lalu, "Kalahai amulu upati?" ⁶Lalu kakane laha hanowi ti Jises hohone lalu ape laha sowini hani lalu waxiai tok donki. ⁷Lalu hakahita tok donki hani kapi Jises ape lalu axaheni puxuaulalu he tehiton. Jises to patul ape tok donki kiliwake i.

⁸ Kilan seilon axaheni puxuaulala he aweisal ti i luluainiwa. Ape teka liai axaheni kai hatoh ti laha kotima he kin. ⁹Teka seilon nanahiwa mateiwa Jises ma teka nanahima muhin, hatesol tilol ausisini ukek, "Kako haxawawa axe Haeu.

Kako amukewa tel kahi nati David, tel i nahih hehetekiema poh ma solian ti Haeu!

¹⁰ Tel seilon ie lehe i neini kako masin ti tel masiwi David neiniwen! Kako sameniwa Haeu tel pohen tapein!" (Ps 118:25-26, 148:1)

¹¹ Ti Jises tahiawa Jerusalem, i nahih soh hani tehu Ingi Haeu. I paxai kalini hatapo

lawe waliko ape i nahih ahuta alia hani
Betani hetekie huopanim huhua kahikahin
nake pate ape alohah.

*Jises usi xaxaweni teka laha hangaini soxi
mate Ingi Haeu*
Mt 21:12-17; Lk 19:45-48

¹² Ngaini liai telao ti lato nahih sasaliliwa Betani, Jises ilameni ka i hitol. ¹³ Ti i pax haniwa mateihi, i ningahi tea pata axan fig hina kaun. I nahih paxai na hina huan. Ti i tahiawa i tunahi ka tap huan, mewenae kaun nake kumahe taun ti huai fig. ¹⁴ Ape i kakane tea pata ukek, “Tap o po huaulea.” Tesol kahikahin hongoen kakain ti ikakawa.

¹⁵ Ti lato tahiawa Jerusalem, lato nahih hani mate Ingi Haeu. Kilan seilon hahangaini soxi ma manihuh ien. Hangainiai waliko ti laha pate lialun. Ti Jises ningahiwa, i usi xaxaweni laha. I aka suoteni sau ti sohiai moni ma sau ti teka seilon laha hahangaini pux. ¹⁶ I halini teka seilon kau koti mate Ingi Haeu soxi ti hangaini. ¹⁷ Ape i kakane nau laha, “Kakai Haeu ukek,
“Tehu ingak ing ti lotu ti lawe seilon.” (Isa 56:7)

Ape Jises ukek, “Tuahne amuto aile hanowi ka ing ti tone munai teka xuxuina.” (Jer 7:11)

¹⁸ Teka masiwi tuah ti hukuminiai Haeu ma seilon, ma teka hanauai nauna ti Moses, lato hongoa waliko ti Jises ailewen ape lato upiup aweisal ti teleian. Lato mamata i nake kilan seilon sameni waliko ti i hanau laha.

¹⁹ Ti ape alohah, Jises ma tesol kahikahin nahih ahuta ti Jerusalem.

Sale matei tea pata fig
Mt 21:18-22

²⁰ Pate letu ti liai telao, ti lato tau nanahih aweisal, lato ningahi ulea tea pata axan fig. I ape maten, mat tamus haniven taen puolan. ²¹ Pita nameni aliakte kakai Jises ape i ukek, “Tel masiwi, paxaiwa! Tea pata ti o kakane ka i kum huhua ape i matewen! Alahan pate i mat kosea?”

²² Jises hone lato ukek, “Haxoxoa namilomo ti Haeu! ²³ Nga kaxi hawane hani amuto, na tel seilon hina namil xoxoan, tap kakapax, ape i kakane tehu maunten ie, ‘Hutawa ie ape towia haniwa itax,’ hoi liai i sohot. ²⁴ Nga kakane hawane amuto, na amuto kamei Haeu tenen na waliko ape amuto soh hawane ka Haeu hani amuto,

amuto uke tetenen ti amuto kamekam. ²⁵ Ti na amuto lotu, hasawimua lialui lomuto ti seilon liai lehe tel Tamamoto Haeu i oxoxi amuto ti kawatan ti saun lialun ti amuto. ²⁶ Tuahne na amuto kum hasawi lialui lomuto ti seilon liai, tel Tamamoto Haeu kum oxoxi amuto ti kawatan ti saun lialun ti amuto.

Aita sowini hani Jises puasain ti i ailele?
Mt 21:23-27; Lk 20:1-8

²⁷ Muhiin ien lato ape alia haniwen Jerusalem. Ti Jises tau nanahih mate Ingi Haeu, teka masiwi tuah ti hukuminiai Haeu ma seilon, teka hanauai nauna ti Moses ma teka masiwi liai ti teka Ju, lato nahih hani kapin. ²⁸ Lato kamei i, “Aita hone o ailele waliko ti o ailele? Aita sowini hani o?”

²⁹ Jises kak pahoi lato, “Nga kameimur amuto tenen kamekame. Amuto pahoinmuma nga ape nga kaxi hani amuto tetel i sowini hani nga. ³⁰ Kaxi hanima nga, aita sowini hani Jon baptaisiai seilon, Haeu ka seilon?”

³¹ Lato kak namiloi papaxai puki lato, “Kaie kako kak ukek ia? Na kako ukek Haeu sowini hani Jon, i kak ukek, ‘A alahan amuto kum soh Jon?’ ³² Tuahne na kako ukek seilon sowini hani i, kae waliko la i sohot?” Lato mamata uke lato halenge teka kilai seilon laha namiloi ukek Jon i tel kuluiai kakai Haeu. ³³ Aile ape lato kak pahoi Jises ukek, “Amite kum tioi aita sowini hani jon.”

Jises ukek, “Nga tin nga kum kaxi hani amuto aita hone nga ailei waliko ti nga ailele.”

12

Menge teka ngahatiai tesol kin

Mt 21:33-46; Lk 20:9-19

¹ Muhiin ien Jises hutui kakaian hanau teka seilon. I kaxi tenen meng i ukek, “Tel seilon seini tesol lalape kin ape i tiehi kalini. I tahiwi tewau wal, tone pisihai waxiai kani huai pata ape i atai tehu kokole ing patul, totone teka peteniai tesol kin. I hani teka seilon puas ngahati tesol kin lehe tin i uke aliakte hina huai pata. Ape i ku hani texux xux xauxaun. ² Ti huai pata pamua, i talo tel unauan hani kapi teka ngahatiai tesol kin waxiai ti tetan. ³ Tuahne teka ngahatiai tesol kin pohi xai i ape tua talo aliakte. ⁴ Tel masiwi ti tesol kin talo ulei tel unauan liai hani kapi lato. Tuahne lato xai patun ma aile halialu i. ⁵ Tel masiwi ti tesol kin talo ulei tel unauan liai ape tetel ien lato telei. I talo uleiwa teka muhin, teka lato xai, teka lato telei. ⁶ Tapeinan i talo telawé natun pate i

waheni. I ukek, ‘Tel ie natuk wanen ma lato aile aluini.’

⁷ “Tuahe teka ngahatiai kin he kakak alia puki lato ukek, ‘Tel elie se tel natun wanen, ien, kako telei i lehe tesol kin ape ti kako.’ ⁸ Lato pohi telei ape towi xoini i hani melal ti tesol kin.”

⁹ Ape Jises kamei teka laha hongohong tenen mengon, “Tel masiwi ti tesol kin kaiae ape i aile waliko la? Nga kakane hawane amuto, na i tahiawa, i telei lato ape tesol kin ien i hani he mini teka seilon liai. ¹⁰ Ala amuto tioi teik kakain ie:

“Tehu kuku teka ataiai ing hilisa,
Haeu aile ape i sohot kuku
tehu pamu tuah ti kuku liai.

¹¹ Haeu aile ape kako amuam hawane.’” (Ps 118:22-23)

¹² Tesol masiwi ti teka Ju lato tioi ka meng ti Jises kakaxi i kak nanami lato. Aile ape lato upiui aweisal ti pohian tuahe lato mambata teka kilai seilon kapin ape lato nahih salili i.

Moni ti hani Sisa tel masiwi tapein ti Rom Mt 22:15-22; Lk 20:20-26

¹³ Muhin teka masiwi ti teka Ju talo teka Parisi ma teka kahikahi Herod hani kapi Jises ape lato kamei tohongi i. Lato sasakal na Jises kak tunahi waliko tenen na i sului aliake i. ¹⁴ Lato ukek, “Tel masiwi, amite tioi ka kakaiam mewenae salan. Woum o aile hani teka seilon masiwi ma teka seilon naun lawe tekewe. Ti o hanau seilon kakai Haeu, kakain tenen salan, tap puputa leilon. Kaxi hanima amite, ewi na kako hani Sisa teik moni pahan? ¹⁵ Kaie kako hani?”

Tuahe Jises tioiwei namilolato. Ape i kamei aliake lato ukek, “Alahan amuto kamei tohongi nga? Kau hanima nga tehu puli moni lehe nga paxai.” ¹⁶ Lato hani i tehu ape i kamei lato, “Kawe aita ma axe aita he tehu puli moni?”

Lato ukek, “Ti Sisa.”

¹⁷ Jises hone lato ukek, “Waliko ti Sisa haniwa Sisa, waliko ti Haeu haniwa Haeu.”

Pate lato ongaini sale pahoan tetan.

Na seilon mat, nakon i xahat alia?
Mt 22:23-33; Lk 20:27-40

¹⁸ Teka Sadusi kapaxe ka seilon maten moih alia. Lato nahih hani kapi Jises ape lato ukek, ¹⁹ “Tel masiwi, Moses tai hanawen na tel wawan mat salili tel axoan a tap natulalu, tel ukalan kewa axoan tel hehin ien. Ape na lalu tan akaik, tesol akaik ien nati tel i matewen. ²⁰ Hongoa mengomite.

Telao hatotalin lato tepanim hua. Tel pamu i sal ape i mat salili tel axoan, tap natulalu. ²¹ Tel usiai tel pamu uke tel hehin ape tin i mat, tin tap natulalu. Tin masin tel usiai tel i matewen, tin i mat. ²² Lato hatesol tepanim huuha talin ien mat a tap natulalu. Tapein anape tel hehin mat. ²³ Taen Haeu xahateni hatapo seilon maten, tel hehin ape axoi aita? Nake ati lato ukewen tel hehin ien.”

²⁴ Jises pahoi lato ukek, “Kakafamuto kumahe salan nake amuto kum tioi kakai Haeu ma pohe Haeu. ²⁵ Taen Haeu xahateni aliake lawe seilon laha matewen, ape tapein tenen hahunatun. Ti tone Haeu, seilon kum sal masin teka engel. ²⁶ Nga kaxi haxewa hani amuto sale xahatai seilon maten. Amuto tioi meng ti Moses taiwen. I kakaxi waliko ti Haeu kakanewen i ti leili teik sisihan ti ah xekexek. Haeu hone i ukek, ‘Nga Haeu tetel ti Abraham, Aisak ma Jekop lolotui.’ (Exod 3:6) ²⁷ I Haeu ti teka seilon moihin nake teka seilon tetan laha matewen laha kumahe salan maten. Namilomuto kumahe salan ka seilon maten i kum moih alia.”

Nauna tuah tapein ti Haeu
Mt 22:34-40

²⁸ Muhin ien tel hanaui nauna ti Moses nahih hani kapi lato. I hong ka Jises kak pahoi hapoponowi hawane tesol Sadusi ape i kamei Jises, “Ti lawe nauna ti Haeu, lahe nauna tuah tapein?”

²⁹ Jises pahoi i ukek, “Nauna tuah tapein tenen ie, ‘Amuto teka Israel hongoa! Telawé Haeu i Masiwi ti kaha, tap tel tutuen. ³⁰ Wahleni hawanewa Haeu tel Masiwi ti amuto, xoiniwa ti amuto wahleni teka seilon liai. Amukewa Haeu ti leili tiamuto, namiloi eliel hawanewa i ma aile hatapo puasan ti hatesol kuimuto.’ (Deut 6:5) ³¹ Tenen nauna usian masin: ‘Wahleni teka seilon liai hanowi ti amuto wahleni aliake amuto.’ (Lev 19:18) Tap nauna liai i pamu tuah ti huuhoen.”

³² Tel seilon ukek, “Tel masiwi, kakaiam pate sawisawin. Salan ti o ukek Haeu i telawé, tap tel tutuen. ³³ Salan ti o ukek kaha amukewa Haeu ti leili tiakaha, namiloi eliel hawanewa i, aile hatapo puasan ti hatesol kuikaha ape wahleni teka seilon liai hanowi ti kaha wahleni aliake kaha. Saun masin ien i xoini na kaha kau soxi ma manixux hani Haeu ape i xoini na kaha lelei manixux hani i.”

³⁴ Jises hong tioi ka kakaian pate sawi-sawin. Ape i ukek, “O pate xohixohin kapi Haeu tel neiniam.” Muhin tap tel seilon pa-han i kamei uelei Jises tenen na kamekame.

Krais kahi nati aita?
Mt 22:41-46; Lk 20:41-44

³⁵ Ti Jises to hahanau teka seilon mate Ingi Haeu, i kamei laha ukek, “Nake lahan tesol hanauai nauna ti Moses ukek ka Krais, tel Haeu taloma, i kahi nati David? ³⁶ Puki Holi Spirit hanamiloa David ape i kak ukek, “Haeu kakane tel Masiwi tetak,

“Toma papak tepaun manau ti neiniani seilon
atengi tataen nga hanawa teka
laha pahoxai o hani hahitakam.” (Ps 110:1)

³⁷ Paxaiwa, puki David axai Krais Masiwi tetan. Na masin ien, i kumahe tuahe kahi natun.” Teka laha hongohong kakai Jises pate laha hong amuke.

Kanipetiwa teka hanauai nauna ti Moses
Mt 23:1-12; Lk 20:45-47

³⁸ Jises kakane teka seilon ien i ukek, “Amuto lepetawa. Kum usiusi saun ti teka hanauai nauna ti Moses. Lato hana puxux weluwelun ape tau nanahih ti puli lawe seilon lehe laha paxai tioi ka lato seilon tuah. Ape pahalato hatesol seilon kak sameniwa lato. ³⁹ Pahalato ukei totean tenen tuah leili synagog ma tone angain lalap. ⁴⁰ Lato pisi teka hehin axoalahaa matewen lehe lato seseke soxialaha ma ingalahaa. Lato aile lotu weluwelun lehe teka seilon paxai sameni. Teka hanauai nauna ti Moses ien, Haeu hani lato kawatan lalap wanen.”

Moni kokol i sohot moni pamu lapan
Lk 21:1-4

⁴¹ Muhin ien Jises toto onote tehu lohe moni ti Ingi Haeu. I ningahi kilan seilon kau lolohi moniulaha. Teka seilon moniulaha kilan, laha hana halapa moni. ⁴² Ape tel hehin axoan matewen i tap moni, nahima ape i hana huohu puli moni pate kokol.

⁴³ Jises ilowi apuhini tesol kahikahin ape i hone lato ukek, “Nga kakane hawane amuto, tel hehin ie i hana moni pamu lapan ti teka liai. ⁴⁴ Teka laha hana hahalapa, moniulaha pate kilan tutuen, tuahe tel hehin ie moniun pate kokol wanen, i hana hatapoen ti i hina.”

Jises kak kilami waliko tenen na i sohot imuh

Mt 24:1-51; Lk 21:5-38

¹Ti Jises nahih salili Ingi Haeu, tel ti tesol kahikahin hone i ukek, “Oie! Tel masiwi, paxaimua lalape pot ti tesol Ingi Haeu! Laha atai hasolia hawane tanoman.”

²Jises pahoi i ukek, “Salan i pate solian tuahe imuh laha toi hamanana ape tesol pot ie put silahota.”

³Muhin ien Jises han to hani he tehu Maunt Oliv onote Ingi Haeu. Pita, Jeims, Jon ma Andru kamei i ti ape mewenae lato, ⁴“Kaxi hanima amite lokon wanen tesol waliko ti o kakaxi sohot? Kaie kikilam la i sohot imat ti tesol waliko ien?”

⁵Jises hone lato, “Lepetawa uke teka seilon puluti amuto. ⁶Imuh kilan seilon tahaima ape laha ukek laha Krais. Laha puluti hakila seilon. ⁷Na amuto hong hile-hile i sosohot, amuto kum maamata. Tesol waliko ien hoi i sohot tuahe i tai meiwa ti tapoi tehu pon ie. ⁸Seilon ti xux texux texux hilei seilon ti xux liai. Seilon ti toan tewau hilei seilon ti toan liai. Xux ti tesol tesol i naea ape kilan seilon laha mat ti hitolo. Tesol waliko ien tuahe hutuiak kawatan imat ti tapoi tehu pon ie.

⁹“Amuto lepetawa! Amuto laha hana hani mini teka masiwi ti toan ape laha xai amuto leili synagog. Laha sului amuto hani teka masiwi ti puasain tenen tenen nake amuto kahikahik. Ien se aweisal ti amuto kaxi nga hani laha. ¹⁰Ape imat ti tapoi tehu pon ie, teka kahikahik kaxi ahutimeng solian ti Haeu hani seilon ti lawe xux. ¹¹Na laha xotti ma sului amuto, kum hahakila namilomuto waliko tenen ti na amuto kak. Pake Holi Spirit hanamiloa amuto kakain.

¹²“Taun tehu ien kumahe solian. Hahutalin, tel i hangaini tel hani laha telei. Tin masin hahutaman, tel taman i hangaini tel natun hani laha telei. Teka akaiahangaini tamalaha ma tinalaha hani seilon telei. ¹³Kilan seilon watakai hawane amuto nake amuto kahikahik. Tuahe na amuto tu matuha atengi tataen kawatan tapo, Haeu waxi auni amuto lian tehue.

¹⁴“Tuah wanen na amuto xeu waliko ti nga kakak. Na amuto ningahi waliko tenen lialun wanen ti seilon aile tanomi i tetesol ti Haeu hahalini, amuto teka toto Judia kiliwau muna haniwa he maunten. ¹⁵Tel na i melal, i kiliwawa. I kum alia hahani leili ing waxiai soxian. ¹⁶Tin masin tel

na i pupuas he kinen, i kum tohea alilia hani leili ingan waxi palahiae puxuaun, tin i kiliwawa. ¹⁷ Tataen ien, kawatan wanen ti teka hehin tialaha hina akaik ma teka natulaha susus tutuen. ¹⁸ Kamei elielia Haeu lehe taun masin ien i kum sohot leili hunan lialun ma taun ti waiwain. ¹⁹ Kawatan ien i xoini kawatan ti imat, ti uli tanomiai tehu pon ie haniwa taen imuh. ²⁰ Tuahae Haeu namiloi teka seilon tetan ape i koti hakukuna taun lialun ien uke tap seilon moih.

²¹ “Taun tehu ien, na tel hone amuto ukek, ‘Paxaiwa, Krais ie,’ ma na i ukek, ‘Paxaiwa, Krais io,’ kum hong sohosoh. ²² Hina seilon ti puputa sohotuma ukek ka laha Krais ma teka ukek laha kuluiai kakai Haeu. Laha aile hasohotu waliko lalap tenen tenen ape laha tohongi pulutiai teka seilon ti Haeu. ²³ Nga kakane hahatapo amuto waliko imat ti i sohot. Amuto lepetawa!

²⁴ “Muhi kawatan ien,
“al i kum kam,
pangapang i kum xeu,
²⁵ kohot ti he maun i put,
hatesol waliko ti he maun i nuea.” (Isa 13:10, 34:4)

²⁶ “Taen ien hatesol seilon ningahi nga tel Nati Seilon mosulih patul he maun hetekie lalape poh ma soliai talepai xewaiak. ²⁷ Ape nga talo tesol engel, spirit solian tetak waxi apuhiniai teka seilon nga kilamiwen tetak ti tesol tesol, ti sai ahang, angiba, haiup ma tola.

²⁸ “Amuto namiloi paxaiwa talil. Ti kaun mak put, amuto tioi ka taun ti aupol angiba. ²⁹ Tin masin, taen amuto ningahi tesol waliko nga kakanewen amuto i sohot, amuto tioi kewak aliaiak ape i xohi hawanewen. ³⁰ Nga kakane hawane amuto, hina seilon ti aope ie laha kum matemu atengi tataen waliko ien i sohot. ³¹ Maun ma xux ti aope i tapo tamus. Tuahe kakaiak hamalum lian tehue.

³² “Tap tel tioi ngain tetehu ma lokon wanen tesol waliko ien i sohot. Teka engel ti Haeu kum tioi ma puki nga tel Natun tin nga kum tioi, mewenae tel Tamak Haeu tioi. ³³ Lepetawa ma apeas peleawa nake amuto kum tioi lokon wanen sohotuan.

³⁴ “Pate masin na tel seilon nahih salili tesol tonan ape i nahih hani tewau toan xauxaun. Tehu ingan i hani he mini tesol unauan ape i axi puasalato. I hone tel ngahatiai ing, ‘O peteniwa aliaiak.’ ³⁵ Tin

amuto pax petawa nake amuto kum tioi loke aliai tel masiwi ti tehu ing. Uke na alohah ka luhui ipong ka ti mom wawan kokoini ma na ti i ninitinile. ³⁶ Amuto kum matih luhuluh, uke i sohot haonga amuto. ³⁷ Waliko ti nga kaakane amuto, nga kakane lawe seilon. Amuto peteniwa aliaiak!”

14

*Tel hehin tih i sanda hani he pati Jises
Mt 26:1-13; Jn 11:55-12:1-8*

¹ Lawe ahang teka Ju aile angiaiin lalap ti nameniai ngain ti lokon Haeu waxi aliale teka tamalahia ti matahaun leili Igip. Ngain tehu hutuan laha ani sipsip wawan uluha, tenen angiaiin ien laha axai Pasova. Ape tesol ngain muhin laha ani bret tenen i tai xi. Ngain huohu imat ti Pasova, teka masiwi tuah ti hukuminiai Haeu ma seilon, ma teka hanau nauna ti Moses, lato sasakal aweisal ti seilon kum tioi lehe lato xoti Jises ape hakahita hani teka teleian. ² Lato ukek, “Kako kum ailemu leili taun ti angiaiin lalap uke teka seilon hil pahoi kako.”

³ Lokon ien Jises tewau toan ti Betani, leili ingi Saimon, tel tel kemuk tinun hina nax lialun. Ti lato to angiang, tel hehin kauma tehu sanda kahun pate lalap ma poun tin pate solian. I hei tehu peti sanda ape i tihi hani pati Jises.

⁴ Ti teka seilon ien paxaiwa, lolaha lialu ape laha he kakak alia puki laha, “Kalaha i tua tihi xoini tehu sanda? ⁵ Pamu ewian na hangaini waxiwen moni lalap ape hani teka seilon tap soxi.” Ape laha kahiloloi i.

⁶ Tuahe Jises ukek, “Kum hohowini i nake i ailele saun solian hani nga. ⁷ Teka seilon tap soxi laha lawe kapimuto, amuto pon hualialaha telao ti na pahamuto. Tuahe nga kumahe lawe kapimuto. ⁸ Ti i tihi sanda hani patuk, se i apepeseni nga ti tehu tihiniak. I aile hani nga waliko tenen ti i pon. ⁹ Nga kakane hawane amuto, tesol tesol ti laha kaxi meng solian ti Haeu tin laha kaxi waliko ti tel hehin aile hahani nga lehe seilon nameni i.”

*Judas sakal aweisal ti hangainiai Jises
Mt 26:14-16; Lk 22:3-6*

¹⁰ Taeri ien Judas Iskariot, tel ti tesol huopanum hua kahikahi Jises, i nahih hani kapi teka masiwi tuah ti hukuminiai Haeu ma seilon ape hone lato ka pahan i hangaini Jises hani minalato. ¹¹ Ti lato hongoa, pate lato amuam hawane. Ape lato kakane Judas

ka lato axi i moni. Ien, Judas ape i sakal tehu taun solian ti na i hangaini Jises hani minalato.

*Apesenai an ti Pasova
Mt 26:17-19; Lk 22:7-13*

¹² Ngain tehu hutuiai angiaiin lalap ti laha telei sipsip wawan uluha, tesol kahikahi Jises kamei i, “Paham amite apeseni tonain ti tehu angiaiin lalap hani ia?”

¹³ Ape Jises talo hua kahikahiin i ukek, “Amulu nahih haniwa leili Jerusalem. Ti ien, amulu apatuini tel wawan kakau tehu peti kan. Kahitiwa i. ¹⁴ Na i soh hani leili ing, soh usiwa ape honeawa tel tame tehu ing kewak, ‘Tel maswi kamekam tetesol na i ma tesol kahikahiin lato to ang tehu angiaiin ti Pasova.’ ¹⁵ I kola hani amulu tesol tonain ti leili ing teke patul, lawe waliko ti angiaiin leilon. Apesenwa anakako ien.”

¹⁶ Ti huhua kahikahiin nahih haniwa leili taon, lalu tunahi lawe waliko masin ti Jises kakawen. Ape lalu apesenai an ti nameniai lokon ti Haeu waxi ahuti tesol tamalaha teka Ju ti Igip.

Jises ang tehu angiaiin ti Pasova kapi tesol kahikahiin

Mt 26:20-29; Lk 22:14-23; Jn 13:21-30; 1 Kor 11:23-25

¹⁷ Ti ape alohah, Jises ma tesol huopanim huhua kahikahiin tahiha hani tesol ien. ¹⁸ Ti lato angiang, Jises hone lato, “Nga kakane hawane amuto, tel ti amuto hangaini nga, kalak i to angiang kapik.”

¹⁹ Tialato kawat hawane ape lato tel tel kamei i, “Kaie kumahe nga?”

²⁰ I hone lato, “Se tel ti amuto tesol huopanim huhua kahikahik. I tetel i xomi anan hani leili tehu tone an kapik. ²¹ Nga tel Nati Seilon, imuh nga mat masin ti leili pepai Haeu kakawen. Tuahé kawatan lalap tunahi tel seilon i hangaini nga hani laha telei. Pamu ewian na i tai takah.”

²² Leilon ti lato angiang, Jises waxi teik bret, i kak kemulik hani Haeu ape i wiki sei hani tesol kahikahiin. I ukek, “Waxi aniva, se tupuak.”

²³ Muhin i waxi tehu kap waen, i kak kemulik hani Haeu ape i hani lato hatesol unumi. ²⁴ I kakane lato, “le se kakauk i xiweu ti kolakol ka Haeu oxoxi seilon ti kawatan ti lialui woulaha na laha hana namil xoxoan hani i. Mateak kola hapoponowi ka Haeu xinoti tenen namil haun kapi seilon. ²⁵ Nga kakane hawane amuto,

nga kum un ulea waen atengi taun ti amuam leili tone Haeu.”

²⁶ Muhin ien lato pakui tenen pak hani Haeu ape lato nahih ahuta hani Maunt Oliv.

Jises kak kilami ka Pita ase

Mt 26:31-35; Lk 22:31-34; Jn 13:36-38

²⁷ Jises kakane tesol kahikahiin ukek, “Amuto hatesol kiliwau salili nga masin ti leili pepai Haeu kakawen,

“²⁸ Nga telei tel ngahatiai sipsip ape teka sipsip kiliwau silahota.’ (Zech 13:7)

²⁹ “Tuahé taen nga moih aliawa, nga tahiha imat ti amuto hani Galili.”

³⁰ Pita hone i, “Kalak na lato hatesol kiliwau salili o, nga tiliwen kapim.”

³¹ Jises hone Pita, “Nga kakane hawane o, imat ti tok mom wawan kokoini uke he huohu ipong tetehu, o putini ka o kum tioi wanen nga uke he toluhu.”

³² Tuahé Pita kak eliel ahe ukek, “Kalak na nga mat ohoi o, nga kum kak wanen ka nga kum tioi o.” Ape hatesol kahikahiin tin lato kak ukek ien.

Getsemani

Mt 26:36-46; Lk 22:39-46

³³ Imuh lato tahiha hani tesol kin axan Getsemani. Jises hone teka ti tesol kahikahiin ukek, “Amuto tiliwen ie, nga kaakamu kapi tel Tamak Haeu.” ³⁴ Ape i waxi Pita, Jeims ma Jon kahitian. I ilameni kawatan lalap wanen ape i mamata xexex, mapuke hetekie. ³⁵ I hone lato, “Lalape tatahan tetak ma matauak i nisohi hawane hanawaiak. Amuto tiliwen ie ape pax petawa.”

³⁶ I nahih ahewa teik ape i eng kalunga hani hepekeun. I kamei eliel Haeu na masin i xaxaweni kawatan ti matemate. ³⁷ I ukek, “Tel Tamak Haeu, o pon ailei lawe waliko. Xaxaweniwa kawatan ti matemate ti lehe i tunahi nga. Tuahé pahak nga usi namilom.”

³⁸ Jises nahih alia hani kapi tesol kahikahiin ape i tunahi ka lato mamatih. I hone Pita, “Saimon, amuto mamatih! Alahan pate amuto kum ah?” ³⁹ Ah kapitawa ma lotu tatalewa lehe amuto xoini totohong ti Satan na i tunahi amuto. Pahamuto ailean tuahé tupuamuto pate kawatan.”

⁴⁰ Jises nahih ulea ape i kamei tel Taman Haeu waliko tin tetenen. ⁴¹ Ti i nahih alia haniwa kapi tesol kahikahiin, i tunahi lato mamatih ulea. Pulalato pate lihian. Lato kum tioi waliko tenen na lato kak.

⁴¹ Ti aliaian kewa he tolulu, i hone lato, “Tin amuto mamatih tutuen! Tapan matihu! Hongoa! Ape i meiwen taun ti nga tel Nati Seilon, laha hani he mini teka seilon lialun. ⁴² Xahatawa! Tel hangainiak i nanahima. Kako nahih pahoi i.”

Laha xoti Jises

Mt 26:47-56; Lk 22:47-53; Jn 18:1-11

⁴³ Ti Jises kakak tutuen, Judas tahiawa. I tel ti tesol huopaniruhuhua kahikahin. I kakahiti kilan seilon liai hetekie ngol weluwelun ma pata ti hile. Teka masiwi tuah ti hukuminiai Haeu ma seilon, teka hanauui nauna ti Moses ma teka masiwi liai taloma laha.

⁴⁴ Judas hani peleiwen laha tenen kolakol, i ukek, “Seilon tel na nga asoi taliopan se telten ien. Pohi hakahitawa ma peteniwa.”

⁴⁵ Judas nahih sawi hani kapi Jises ape i ukek, “Tel masiwi, amuam ti Haeu hani o.” Ape i asoi taliopre Jises. ⁴⁶ Tataen ien laha pohi kongini i ape hakahita. ⁴⁷ Tuahae tel seilon leilolato waxy tea ngol weluwelun ape i tai koti haputa taxingi tel unaui tel masiwi tapein ti hukuminiai Haeu ma seilon.

⁴⁸ Jises hone laha, “Amuto nahih hetekiema paumutu ti hile waxiak hanowu ka nga seilon lengean. ⁴⁹ Lawe ngain nga to hahanau seilon leili Ingi Haeu a amuto tai pohi nga. Tuahae kakai Haeu i sohot poponowi hani nga.” ⁵⁰ Lokon ien hatesol kahikahin kiliwau salili i.

⁵¹ Leilolaha tel seilon uluhu, i soosoi teik maia ti matihu. I nahih kakahiti Jises ape lehe teka seilon pohi hetekie i. ⁵² Ti tel seilon mamata kiliwawa, teik maia toia ape i kiliwawa makahul.

Laha sului Jises

Mt 26:57-68; Lk 22:54-55, 63-71; Jn 18:13-14,

19-24

⁵³ Laha hakahita Jises hani kapi Kaiapas tel masiwi tapein ti hukuminiai Haeu ma seilon ape hatesol masiwi liai ti teka Ju apuha hani kapi. ⁵⁴ Pita nahih otioti Jises tamus hani mate ingi Kaiapas. I to akakati tesol peteniai Ingi Haeu ma hahahia tinun pape ahilato.

⁵⁵ Hatesol masiwi ti teka Ju upiup aweisal ti teleiai Jises, tuahae lato kum tunah. ⁵⁶ Kilan seilon kak sului putini Jises a kakai alaha kumahe tenenawé. ⁵⁷ Hina seilon tule ape kak tanomii kakain puputa ti sului Jises.

⁵⁸ Laha ukek, “Amite hong i kak ukek, ‘Nga toi hamanagan tehu Ingi Haeu ape leili ngain tolulu nga hatuhi tehu Ingi Haeu

liai, kumahe ing tenen mini seilon atai.’”

⁵⁹ Tuahae kakaialaha tin kumahe tenenawé.

⁶⁰ Tel masiwi tapein ti hukuminiai Haeu ma seilon tule ape hone Jises, “Teka seilon ie laha susului o. Hina kakaiam?” ⁶¹ Tuahae Jises tai wix pahoi.

Kaiapas kamei ulei i, “Nakon o Nati Haeu, tel Krais Haeu taloma?”

⁶² Jises ukek, “Se nga. Imuh amuto ningahi nga tel Nati Seilon toto he teapaun mini Haeu sai manau neiniai seilon kapin ma tin amuto ningahi nga luainima he maun.”

⁶³ Kaiapas hongoa ape i leng lexi tehu puxuaun. I ukek, “Kako kum ngah ulea seilon suluiyan. ⁶⁴ Amuto hongoen i ukek i tel Nati Haeu. Kaie kako aile ukek ia?” Lato hatesol xinoti namil tenenawé ti teleiai Jises.

⁶⁵ Teka seilon pukeini i ape uke maia talini puxuai pulan. Lato taputui i ma kak soxeni i ukek, “Na o Krais, tilawa aita xai o!” Ape tesol peteniai Ingi Haeu xai halialu i.

Pita ukek i kum tioi Jises

Mt 26:69-75; Lk 22:54-62; Jn 18:25-27

⁶⁶ Lokon ien Pita toto tutuen kapi teka seilon mate ingi Kaiapas ape tel hehin unaui tel masiwi nahima. ⁶⁷ Ti i ningahiwa Pita toto pape ah, i ila mataini ape i ukek, “O tel ti teka lawe kapi Jises ti Nasaret.”

⁶⁸ Tuahae Pita ase ukek, “Nga kum tioi tel seilon ien.” Ape i nahih hani onote aweing ti melal.

⁶⁹ Tel hehin ningahi ulei i ape kakane tesol seilon lato tutu kapin ukek, “I tel ti teka hakahita Jises.” ⁷⁰ Tuahae Pita ase ulea.

Tai kue, teka seilon tutu xohixohin kapi Pita ukek, “Salan, o tel ti lato nake o ti Galili.”

⁷¹ Pita ukek, “Kuinake, nga kak hahawane nga kum tioi tel seilon amuto kakak.”

⁷² Tataen ien tok mom wawan kokoini uke he huohu. Ape Pita nameni aliale kakain ti Jises kaakane i ka imat ti tok mom wawan kokoini uke he huohu, i kak uke he tolulu ka i kum tioi Jises. Pita nameniwa ape i tang tahane hawane.

15

Laha hakahita Jises hani kapi Pailat

Mt 27:1-2, 11-26; Lk 23:1-5, 13-25; Jn 18:28-

19:16

¹ Pate letu wanen, hatesol masiwi ti teka Ju apuha ailei namil ti waliko tenen na lato aile hani Jises. Lato xioti i ape hakahita

hani kapi Pailat, tel ti teka masiwi ti Rom kiliwakei Judia.

² Pailat kamei Jises, “Nakon o tel masiwi tapein ti teka Ju?”

Jises kak pahoi ukek, “Masin ti o kakawen.”

³ Teka masiwi tuah ti hukuminiai Haeu ma seilon lato kak susului Jises hani Pailat ti kilan waliko tenen puputa. ⁴ Ape Pailat kamei ulei i, “Tap pahoan tetam? Hongoa, kilan waliko laha susului o.” ⁵ Tuahie tin Jises tai wix pahoi. Pailat pate i ongainen.

⁶ Leili taun ti angain lalap ti nameniai ngain ti Haeu waxy aliakateka Ju ti Igip, saun ti Pailat i ahuti tel ti teka kalabus, tetel na teka seilon pahalahua. ⁷ Ti lokon ien tel seilon axan Barabas i kakalabus kapi teka seilon tuaun nake lato hil pahoi teka masiwi ti kiliwakei xuxulaha. Ti leili hile-hile lato teleiwen hina seilon. ⁸ Kilan seilon nahih hani kapi Pailat kameian ti ahutiai tel na kalabus.

⁹ Pailat kamei laha, “Pahamuto nga ahuti hani amuto tel masiwi tapein ti teka Ju?”

¹⁰ Pailat pate i tioi ka teka masiwi tuah ti hukuminiai Haeu ma seilon hangaini Jises hani i tuahe ti wawatak nake kilan seilon sameni i. ¹¹ Tuahe teka masiwi tuah ti hukuminiai Haeu ma seilon kak hahika teka seilon ti laha apupuwa ien kameiai Pailat ti ahuti hanialaha Barabas, kumahe Jises.

¹² Pailat kamei ulei laha, “Pahamuto ape nga aile waliko la wanen hani tetel seilon amuto ukek i tel masiwi tapein ti teka Ju?”

¹³ Laha tilol pahoi Pailat, “Teleiwa! Tahi hakeawa i he kros!”

¹⁴ Pailat kamei laha, “Nake lahan? Waliko la pate lialun i aile talesiwene?”

Laha tilol ausini aheke, “Tahi hakeawa i he kros!”

¹⁵ Pailat pahan i hamuamua teka seilon. Aile ape i ahuti Barabas. I hani tesol unauan ti hile heti Jises ape hakahita lehe waxy lato tahi hakea i hani he kros.

*Teka unaui Pailat ti hile soxeni Jises
Mt 27:27-31; Jn 19:2-3*

¹⁶ Tesol unaui Pailat ti hile ati hasoho Jises hani tehu ing lalap, ingi Pailat, ape lato tiloi tesol tuaulato. ¹⁷ Lato waxy teik maia tenen kakai ati polun ape sosoi hani Jises. Lato alingini ngaxe au ape nihini hana hani he patun. ¹⁸ Ape lato soxeni i ukek, “Tel masiwi tapein ti teka Ju tap tahi mateam!” ¹⁹ Lato uke teik pata xai tuhitihu patun ape lato pukeini i. Lato lokuba hanowi ka lato lotu sameni i. ²⁰ Ti lato heisawa soxenian, lato

naxi xaxaweni teik maia. Lato sosoi aliaktek puki soson ape ati i lehe lato tahi hakea i hani he kros.

*Laha tahi hakea Jises he kros pata
Mt 27:32-44; Lk 23:26-43; Jn 19:17-27*

²¹ Ti lato hakahitawa Jises, lato apatuini tel seilon axan Saimon nahih hahaniwa taon. Teka unaui Pailat ti hile lungei i kau teik kros ti Jises kakau. Saimon akiki tehu taon lalap axan Sairini, tarne Aleksanda ma Rupus. ²² Lato hakahita Jises hani tesol axan Golgota. Teik kakain ien i ukek, “Tetesol tanoman masin kui pati seilon.” ²³ Ape lato axi i unum ti hamongai moloan tuahe Jises kum unumi. ²⁴ Lato tahi hakea Jises he teik kros pata ape lato sei puxuaun wasolalato. Lato halokeni satu ti upiai tetel i uke tete-nen ia ti tesol sose Jises.

²⁵ Ti 9 kilok letu lato hakea Jises. ²⁶ Teik kakain ti suluwan lato tahi hahakea onote patun i kau ukek,

“TEL MASIWI TAPEIN TI TEKA JU.”

²⁷ Tin lato tahi hakea hua seilon ti xuxuina xohixohin kapi Jises, tel sai manau ape tel sai kalamau. ²⁸ Kakai Haeu i poponowi hawane ti i ukek, “Laha aile hanowi i seilon tenen woun pate lialun.” (*Isa 53:12*)

²⁹ Teka seilon ti laha nahih sahiwa Jises, laha tohutoh ape kak soxeni ma kak halialu i ukek, “Se o tel seilon o ukek o toi tehu Ingi Haeu ape muhi ngain tolulu o hatuhu aliak! ³⁰ Awai aliakewa o. Na o pon, mosulih he teik kros ien!”

³¹ Teka masiwi tuah ti hukuminiai Haeu ma seilon, ma teka hanaui nauna ti Moses, tin lato tutu ien papaxai Jises ape lato he kakak ukek, “I huali uke seilon liai tuahe i kum pon huali aliakian. ³² Na kako paxai ka tel Krais ie, tetel masiwi tapein ti Israel, i mosulih he teik kros, kako soh tetan.” Huhua lalu akeak kapi Jises tin lalu kak halialu i.

Matei Jises

Mt 27:45-56; Lk 23:44-49; Jn 19:28-30

³³ Ti lape ngain, hatehu xux i tilok ti leili sua tolulu. ³⁴ Ti 3 kilok alohah, Jises tilok eliel hawane, “*Eloi Eloi, lama sabatani?*” len i ukek, “Haeu tetak, Haeu tetak, nakon lahan o lioi hawane nga?” (*Ps 22:1*)

³⁵ Teka seilon xohixohin kapin, laha ukek, “Hongoa, i titilo Elaija.”

³⁶ Tel i kiliwau waxy teik maia, i xomi hani he waen tenen wanggingan ape i hana hani tumi teik pata. I tulini hani he awe Jises lehe waxy i sumuxi. I ukek, “Nutmou, kako

paxaimu na Elaija mosulih ape hamosu i he teik kros."

³⁷ Jises ausini eliel hawane ape i mat. ³⁸ Tataen ien wanen Haeu lexi teik maia i akeak leili tehu Ingi Haeu, ti patul hani taen itan. ³⁹ Tel ti teka unaui Pailat ti hile tutu mate Jises. I paxai otioti sale matei Jises ape i ukek, "Salan wanen tel seilon ie Nati Haeu!"

⁴⁰ Teka hehin tu siasia paxaiai Jises. Leilo-lato Mary Magdalen, Salome ma Mary, tel tini Joses ma Jeims tel uluha. ⁴¹ Lokon ti Jises tutuen Galili tesol hehin ien lawe lato kakahiti ma huhuali i. Kilan hehin liai laha kahitima Jises hani Jerusalem, laha tin ien.

Sale tihiniae Jises

Mt 27:57-61; Lk 23:50-56; Jn 19:38-42

⁴² Sai alohah ti tehu ngain ti apeseniai Sabat. ⁴³ Josep ti Arimatea i nahih hani kapi Pailat ape i matut kamean na i waxy auni tupui Jises. Josep i tel ti tesol masiwi ti teka Ju. I to mon atetengi ngain ti Haeu neini lawe seilon. ⁴⁴ Pailat pate i kum amemene ti i hongoa kiliwai matei Jises. I tiloi tel unauan ti hile ape kamei i na salan Jises matewen. ⁴⁵ Ti i hongoa ka salan, i hani Josep waxi tupui Jises. ⁴⁶ Josep kahui teik maia ti auniaseilon maten. I hamosu Jises hani itan ape i puxui talini tupuan. I hana auni hani leili amal tenen laha tanomi he pot patul ti hepekeun. Muhiin i hulini tehu pot lalap siponiai tehu amal. ⁴⁷ Mary Magdalen ma Mary tel tini Joses ma Jeims, lalu ningahai tesol ti Josep hahana tupui Jises.

16

Xahatai Jises

Mt 28:1-7; Lk 24:1-12; Jn 20:1-10

¹ Ti Sabat tapoa, Mary Magdalen, Salome ma Mary tel tini Joses ma Jeims, lato kahui sanda tenen poun solian lehe lato ahui hani tupui Jises. ² Sande ti pate letu, lato nahih hahaniwa amali Jises. ³ Lato he kamekam alia puki lato, "Kaie aita tel na i hulini xaxaweni hani kako tehu pot lalap he aweingi amal?"

⁴ Ti lato xeisawa, lato ningahai tehu pot lalap ape hulinan. ⁵ Lato sohoa ape lato ningahai tel seilon uluha i toto sai manau, puxuaun weluwelun a papaxaxun. Ape lato mamata hawane.

⁶ I hone lato, "Kum maamata! Nga tioi ka amuto upiu Jises ti Nasaret, tetel laha telei. I kumahe ie, i moih aliawen! Paxaiwa,

i tap tetesol laha hahana i. ⁷ Aope ie amuto nahih kaxi haniwa Pita ma tesol kahikahin liai ka Jises nahiwen imat ti amuto hani Galili. Amuto ningahai i en masin ti i kakanewen amuto."

⁸ Tesol hehin nahih ahutawa ape lato kiliwau salili tesol ien. Lato tataxini hetekie ox tuhi tinulato ma lato xexex. Lato tai kakanewen amuto.

Jises take hani teka kahikahin

Mt 28:9-10; Jn 20:11-18

⁹ Muhiin ti Jises moih aliawia ti Sande pate letu, i take hani Mary Magdalen, tetel imat Jises xaxaweni tapanim hua spirit lialun leilon. ¹⁰ Mary Magdalen nahih hani kapi tesol kahikahin Jises lawan. Lato hatesol tang tahane hawane matei Jises. Ape i kakanewen amuto.

¹¹ Ti lato hongoa ka Mary ningahai Jises ape moihin, lato kapaxe hawane.

¹² Imuh Jises take hani kapi huuah kahikahin lalu nanahih ti Jerusalem hani tesol tahain. Pala lalu kum ila tioi i nake tanoman sohiawen.

¹³ Lalu nahih alia ape kaxi hani tesol liai, tuahe tin lato kapaxe.

¹⁴ Tapeinan Jises take hani kapi huopanip

tel kahikahin ti lato angiang. Jises tumei

lato nake lato kapaxe i ma lato kum hong

soh teka laha ningahai Jises ka i moih ali-

awen.

Jises talo tesol kahikahin ape Haeu waxi i hani tesol tonan

Mt 28:16-20; Lk 24:44-52; Jn 20:19-23; Apo 1:6-11

¹⁵ Jises kakane tesol kahikahin ukek, "Lua tapaiwa lawe xux ti itan ie ape kaxi sawateniwa meng solian ti Haeu haniwa lawe seilon. ¹⁶ Na tel seilon i soh tetak ti amuto kakaxi tenen meng solian ien ape amuto baptaisi i, tel seilon ien i to kapi Haeu lian tehue. Tuahe na tel seilon i kum soh, Haeu selai xaxaweni i kapin lian tehue. ¹⁷ Teka laha hong soh, nga hani laha poh ti ailei tesol waliko ie. Ti hahitake axak laha xaxaweni spirit lialun leili seilon. I pon laha kakakain ti kumahe kakaialaha. ¹⁸ Na laha akeni weiko tenen i hamange seilon ma unumi unum tenen hina suhasuh, i kum halialu laha. Ape na laha lotu hana minalaha patul ti teka tinun, laha ewi."

¹⁹ Muhiin ti Jises kak kewa kapi tesol kahikahin, Haeu waxi i hani patul ti tesol tonan ape i to sai tepauna mini Haeu manau ti neiniai lawe seilon. ²⁰ Tesol kahikahin lato kaxi sawateni meng solian tetan hani

tesol tesol. Pohe Haeu pupuas hualalato.
Haeu haxoxo tenen meng ti lato kakaxi ape
i kola ka kakaian salan wanen, usiwa waliko
tenen lato ailele ti kui pohen.

Luk

Meng solian ti Jises tataiai Luk Kakain ti haxewai tenen meng ie

Luk tai tenen meng solian ie sai ahang 30 muhin ti Jises moih aliawa ape Haeu waxy i hani tesol tonan. Luk i tel kahikahi Jises, tuahe kumahe tel ti tesol huopanum huhua aposel ti uli Jises kilamiwa. I tel dokta. I kumahe Ju, i Grik. I tai tenen meng ie lehe teka Grik tioi puase Jises Krais ape laha soh hawane tetari. I kaxi hahani kako ka kumahe Jises luama ti hualiai mewenae teka Ju. I telet awaiai lawe seilon ti kawatan ti lialui woukaha. Tin i tai kakaxi sale larape wawahen ma tatahan ti Jises, sale pohe Holi Spirit ma sale lotu ti seilon hani Haeu. Luk tai ningahi waliko ti Jises ailele. I tatai waliko ti teka kahikahi Jises liai ningahi ma kakaxi. Luk tin tetel i tai teik pepa “Puase tesol aposel.”

Hutuiai meng

¹ Nga tua tai hahongo o tel masiwi Teopilus, kilan seilon laha tohongiwen taiai menge Jises ti lawe waliko ti i sohotuen leilomite teka kahikahi Jises. ² Laha usiusi kakain ti teka laha ningahiwen waliko ti i sohotuen ma teka hanau meng solian ti Jises kakaxi. ³ Aile ape nga upia mataini menge Jises ti hutuan wanen ape nga namiloi ukek ka solian na tin nga tai haxewa hani o waliko ti i sohotuen. ⁴ Nga aile ukek lehe o tioi hawane ka waliko ti teka kahikahi Jises hanauen o, salan wanen.

Tel engel kak kilami takahe Jon Baptis

⁵ Lokon Herod masiwi ti Judia, Sakaraia tel masiwi ti hukuminiai Haeu ma seilon, i pupuas leili Ingi Haeu hetekie tesol tuaun. Axalato Abijaya. Tenen ax ie lato kema axe tel masiwi ti hukuminiai Haeu ma seilon ti matahaun. Tel axoi Sakaraia Elisabet i kahi nati Aron tel masiwi tapein ti hukuminiai Haeu ma seilon. ⁶ Haeu namiloi ukek lalu hauhua seilon sawisawin. Lawe lalu puas usi mataini hatapo hatesol nauna ti Haeu tel Masiwi. ⁷ Lalu tap natulalu naake Elisabet i lieheh hetekie lalu tin ape salaimat.

⁸ Ngaini tehu, Sakaraia ma teka tuaun lato pupuas leili Ingi Haeu naake taun ti lato ti puas leili puasain tehu ien. ⁹ Usiai saun ti teka masiwi ti hukuminiai Haeu ma seilon,

lato kilami tel ti leiolato soh hani leili Ingi Haeu ti luihai sanda hani Haeu ma lotu hualiai teka seilon. Telao ien lato kilami Sakaraia. ¹⁰ Ti tehu sanda lulua, kilan seilon laha tu lolotu melal.

¹¹ Leili Ingi Haeu tel engel, spirit solian ti Haeu, i take hani Sakaraia. I tutu sai manau ti tone luihai sanda. ¹² Ti Sakaraia ningahiwa, i tataxini ma i mamata hawane. ¹³ Tuahe tel engel kakane i ukek, “Kum maa-mata, Sakaraia! Haeu hongoen kamekame tetam. Tel axoam Elisabet hatakaha tel akaik natum. Axaiwa axan Jon. ¹⁴ Amulu ma kilan seilon liai amuke hawane i. ¹⁵ Amuto hatesol amuam naake Haeu nampiloi ukek Jon i sohot tel seilon pate tuah. I kum un unum ailan. Tataen ti uli takahan, Haeu hani i Holi Spirit ti kapitian. ¹⁶ Ape i neini kilan ti amuto Israel lehe amuto towiahu ti lialui woumuto hani Haeu tel Masiwi ti amuto. ¹⁷ I sohotuma imat ti Krais, tel Haeu taloma. Ape Holi Spirit hapohea i hanowi ti i hapohea Elaija tel kuluiai kakai Haeu. Jon huali seilon ti apeselialaha ti sohotui Krais. I hukuminini aliake akaik ma taman ma huali teka tahitah ti usiai nauna ti Haeu.”

¹⁸ Sakaraia kakane tel engel ukek, “Lehe nga tioi ukek ia ka teik waliko ti o kakak i sohot? Amili tel axoak ape salaimat.”

¹⁹ Tel engel ukek, “Nga Gabriel, tel unaui Haeu pate tuah. I taloma nga hahongoam tenen meng solian ien. ²⁰ Tuahe nake o hong kapaxe kakaiak, o kum wix uke atengi taen tel natum takah. Waliko ti nga kakane o i po sohot onoten i hawane taun ti Haeu kikilami.”

²¹ Lokon ien teka seilon melal atetengi Sakaraia ape laha nam tataxini ti i pate kuen leili Ingi Haeu. ²² Ti i ahutama i kum kakane uke laha. I tua hapuasa minan kakanealaha ape laha paxai tioi ka tenen waliko tuah take haniwen i.

²³ Tataen puasain tehu ti puase Sakaraia leili Ingi Haeu tapoa, i nahih alia hani tonan. ²⁴ Muhi ien tel axoan Elisabet pet akaik ape i tai sosohot melal ti pangapang tepanim. ²⁵ I ukek, “Ti soliai Haeu i huali nga ape i xaxaweni hatapo hienain ti na lieheh. Teka seilon ape laha kum paxai teheni nga.”

Tel engel kak kilami takahe Jises

²⁶ Muhi pangapang tepanim tehu ti Elisabet petiwa akaik, Haeu talo tel engel Gabriel hani tehu taon Nasaret leili Galili. ²⁷ I hak-outa kakain hani tel hehin axan Mary i tai engeeng kapi tel na wawan. I tel laha otei

haniwen axoi Josep, kahi nati tel masiwi David. ²⁸ Tel engel hone Mary, “Haeu aile hasolia hawanewen o. I kapim.”

²⁹ Mary namiloi taxiake hawane kakai tel engel ape i namiloi papaxai haxewai teik kakain ien. ³⁰ Tel engel kakane Mary ukek, “Kum maamata, Haeu aile kola soliaian hani o. ³¹ O hanatua tel akaik wawan. Na i takahawa, axiwa axan Jises. ³² I sohot tel seilon pate tuah ma pohe Haeu toi i ape laha axai i Nati Haeu. Haeu hana i tel masiwi ti teka Ju masin tel masiwi David, tetel Jises nakuama tetan. ³³ Ape i neini teka Israel ma i to Masiwi lian tehue.”

³⁴ Mary kakane tel engel ukek, “Nga tai engeeng kapi tel na wawan, aile ape i sohot ukek ia?”

³⁵ Tel engel kak pahoi i ukek, “Ti pohe Haeu, Holi Spirit atuhu halihu o ape o pet akaik. I hani hatapo tupuan ailei puase Haeu ape laha axai i Nati Haeu. ³⁶ Nam pax-aiwa tel akikim Elisabet. Kalak i salaimat i petiwen akaik. Kemuk i lieveh ape ape ie pangapangau tepanim tehu. ³⁷ Tap tenen waliko Haeu kum aile uke.”

³⁸ Mary ukek, “Nga unaui Haeu tel Masiwi. Ewi i sohot hani nga masin ti o kakawen.” Ape tel engel salili i.

Mary nahih paxai Elisabet

³⁹ Muhih Mary nahih kosea hani tehu taon ti leili Judia he maunten. ⁴⁰ I nahih soh hani leili ingi Sakaraia ape i kak amuke Elisabet. ⁴¹ Ti Mary kakak tutuen, tel akaik leili tiai Elisabet pixewa. Ape Holi Spirit hanamiloa Elisabet kakain.

⁴² Ape i kak eliel hani Mary ukek, “Haeu aile hasolia hani o, akulai lawe hehin liai. Tin i aile hasolia hani tel akaik na o hatakaha. ⁴³ Lehe lahan ka tel tini tel Masiwi tetak nahih paxai nga? Se pate tuah wanen!

⁴⁴ Nga tioi ka o tini tel Masiwi nake tel akaik leili tiak pix amuam hawane ti nga hongoa kakaiam. ⁴⁵ Haeu aile kola hani o lalape soliaian nake o hong soh ka i aile hawane waliko ti i kakawen.”

Mary lotu sameni Haeu

⁴⁶ Mary ukek,

“Tupuak hatel hetekie namilok
nga sameni hawane Haeu tel Masiwi.

⁴⁷ Pate nga amuam hawane nake Haeu tel awaiak
ti lawe waliko lialun.

⁴⁸ I kum maluhe nga ma i ngahati nga tel unauan

kalak axak pate itan leili teka seilon. Seilon telok aope ie ma telok imuh laha ukek ka Haeu aile kola hani nga lalape soliaian.

⁴⁹ I tel pate pohen ma i aile waliko lalap hani nga.

I pate solian ma pate tuah xoini lawe seilon
ma lawe waliko.

⁵⁰ I aile kola tatahan tetan hani teka laha sameni
ma hong tamani i leili teka seilon ti aope ie ma imuh.

⁵¹ Ti pohen i aile kilan waliko lalap
ape i usi xaxaweni teka seilon ti hanasanas.

⁵² Hina teka masiwi i hatapo laha ti neiniai seilon
a teka seilon laha teheni aliak laha ti usiai namilon
i aile laha seilon tuah.

⁵³ Haeu axi waliko solian hani teka pahalahwa wanen
usiai aweisalun ape i tua hanahi lioi teka laha
kilan waliko ma pahalahwa kum is usian.

⁵⁴ Haeu to huhuali teka seilon ti Israel,
teteka unauan.

⁵⁵ I namiloi i aile kola tatale tatahan hani Abraham
ma teka laha nakuama tetan masin ti i kakawen laha.”

⁵⁶ Mary to pangapang tolulu kapi Elisabet ape i nahih alia hani tonan.

Takahe Jon Baptis

⁵⁷ Ti ape Elisabet pangapangau kewa tepanim hinalo i hatakaha tel akaik wawan.

⁵⁸ Teka laha toto xohixohin kapin ma teka akikin hong waliko solian ti Haeu tel Masiwi aile hani Elisabet ape laha hatesol amuam akati i.

⁵⁹ Muhih puasain tehu ti tel akaik takahawa, teka akikin apuha ti ailei teik kikilam ti kotiai uli walikoi tel akaik ti kolakol ka i seilon ti Haeu. Pahalato uliae i Sakaraia masin axe tel taman. ⁶⁰ Tuah Elisabet kak eliel ukek, “Kumahe! Tel taman lehe i axai axan Jon!”

⁶¹ Lato kakane Elisabet, “Tuah tap tel akikim axan Jon.”

⁶² Lato kamei tel taman ax tetenen pahan i uliae hani tel natun. Lato tua hapusa minalato nake i kum kak uke ape lato sokok ka tin i kum hong kakain. ⁶³ Sakaraia aile kola ka pahan i tai waliko. Ti lato haniwa

i teik patiu ti taiai kakain i tai ukek, "Axan Jon." Lato hatesol ongaini hawane.⁶⁴ Lokon ien wanen Sakaraia pon i wix ulea ape i kak sameni Haeu.

⁶⁵ Teka seilon laha toto xohixohin kapi Sakaraia ma Elisabet laha hatesol ong mamaata hawane. Ape laha kaxi sawateni waliko tenen i sohot hani lalu hani teka seilon ti lawe toan he maunten ti leili Judia.⁶⁶ Teka ti laha hongoa ien, laha to nanamiloi ape laha ukek, "Tel akaik ie liai i sohot tel seilon pate tuah nake Haeu tel Masiwi hoi kapin."

Sakaraia kak kilami waliko ti Haeu aile

⁶⁷ Muhiin Holi Spirit hanamiloa Sakaraia tel tame Jon kaxiai tenen kakai Haeu ie,⁶⁸ "Kako sameniwa Haeu tel Masiwi ti kako teka Israel.

I tahiamti hualiakako teka seilon tetan
ma oxoxiakako ti kalabus ti saun
lialun.

⁶⁹ I haniwen kako Krais, tetel ti lalape pohen
i awai kako
ti kawatan ti lialui woukako.

I kahi tel masiwi David, tel unaui Haeu.

⁷⁰ Teka kuluiua kakai Haeu laha hani hatapo
laha
ti ailei puasan,
laha kaxiwen ti kuewen waliko ti Haeu
aile.

⁷¹ I awai kako ti teka laha watakai hawane
kako.

I huali kako na pahahaha aile halialu-
akako.

⁷² I aile kola tatahan hani teka tamakako ti
matahaun
nake i nameni ti i xinoti namil kapi
lato ka i Haeu
tel Masiwi ti lato ape lato seilon tetan.

⁷³ Tenen kakain ien imat i kaxi haniwen
Abraham
tel tamakako.

⁷⁴ I awai kako ti teka laha watakai hawane
kako
lehe kako aile puasan ma lotui i het-
ekie tap mamata.

⁷⁵ I huali kako sohot seilon sawisawin ti usiai
nauna tetan
ma ti ailei lawe waliko ti i Paxai wa-
heni."

⁷⁶ Ape Sakaraia kakane tel natun ukek,
"Tel natuk, o sohot tel kuluiua kakai
Haeu.

O hutui puasam imat ti Krais tel Haeu
taloma
ape o huali seilon ti apesenialaha ti
sohotui Krais.

⁷⁷ O kaxi hani teka seilon tewau aweisal ti
Haeu awai laha
ti kawatan ti lialui woulaha
ma oxoxi laha ti kawatan ien.

⁷⁸ Ti lalape tatahan ti Haeu, Krais luainima
ti tone Haeu
hani kapi kako masin sasaai al.

⁷⁹ Masin xewan ti i haxewa tilokoan,
Krais kaxi waliko salan hani teka
seilon
laha leili tilokoan ti lialui woulaha.
Ape i neini kako lehe wasolakako ma Haeu
i sawi."

Tataen ie Sakaraia tili kakaian.

⁸⁰ Tel natun Jon lapale ape Holi Spirit
hapohea i. I heheuta he lohong atengi
tataen i kaxi ahuti kakai Haeu hani teka
seilon ti Israel.

2

Takahe Jises

Mt 1:18-2:1

¹ Lokon ien Augustus tel masiwi tapein
ti Rom, hone teka unuanan waxy hatapoi
axe seilon ti Rom ma lawe xux hahitake
ngahat ti Rom lehe i tioi mongohe seilon
towiai moni hani Rom. ² Tetehu se uli
waxiai axe seilon. I po sosohotua lokon
Kwirinius i tel masiwi ti texux xux Siria.³
Lawe seilon lula hani tone tamalaha hanai
axalaha. ⁴Aile ape Josep lula salili Nasaret
leili Galili ape i nahih hani Betlehem leili
Judia, taon tetehu tel masiwi David takah.
Josep lula hana axan ien nake i nakuama ti
tel masiwi David. ⁵ Josep hakahita hetekie
Mary, tel hehin laha otei haniwen axoan
ape i hana ati axalalu. Lokon ien Mary hoi i
petiwen aakaik.

⁶ Lokon ti lalu Betlehem, taun tetan ti
hatakahai tel akaik. ⁷Ien uli hatakahai akaik
tetan. Tel akaik ien se wawan. I puxui he
teik maia ape i hanopi hani leili tone anai
manihuh nake leili ing ti tone soliwa pate
xuhan.

Tesol ngahatiai sipsip ma teka engel ti Haeu

⁸ Ipong tehu ien hina seilon ngangahati
sipsip xohixohin Betlehem, tetesol ti kilan
pahoah solian. ⁹Tel engel, spirit solian ti
Haeu, i take hahutuia hani lato ape xewai
Haeu i xeu kakalini lato. Pate lato mama-
mata. ¹⁰Tuahe tel engel hone lato ukek,
"Kum maamata! Nga tahiakema meng soli-
an ti hamuamuai lawe seilon. ¹¹Hongoa!
Ngain tetelao leili Betlehem, tehu taon ti
tel masiwi David takah, tel awaiakaha i
takahawen. I awai kaha ti kawatan ti lialui

woukah. I Krais tel Masiwi, tetel Haeu taloma. ¹² Amuto paxai tioi tel akaik na amuto tunahiwa i engeeng leili tone ani manihuh pupuxua leili maia.”

¹³ Tataen ien, kilan wanen engel ti Haeu take ulea hani kapi tel engel ien ape lato pak sameni Haeu ukek,

¹⁴ “Haeu, tel tonan patul wanen,
i pate tuah ma pate solian!

I aile hasolia wasolakaha hani i
ma wasole teka seilon i amumuke!”

¹⁵ Ti teka engel alia haniwa tone Haeu, tesol ngahatiai sipsip he kakak alia puki lato, “Kako nahih hani Betlehem lehe kako paxai waliko ti i sohotuen masin ti tel engel ti Haeu tel Masiwi kakanewen kako.”

¹⁶ Lato nahih kosea hani Betlehem ape lato tunahi Mary ma Josep hetekie tel akaik i engeeng leili tone ani manihuh. ¹⁷ Ti tesol ngahatiai sipsip ningahiwa tel akaik, lato kaxi hani teka seilon waliko ti tel engel kakanewen lato sale tel akaik ien. ¹⁸ Ti laha hatesol hongoa, laha ongake hawane.

¹⁹ Mary nameni lawe waliko ti i sohotuen ape i to namiloi haweluvelu. ²⁰ Tesol ngahatiai sipsip nahih alia hani kapi tupulato sipsip ape kak sasameni Haeu ti lawe waliko lato hongoen ma ningahiwen masin wanen ti tel engel kakanewen lato.

Mary ma Josep kau Jises hani Ingi Haeu

²¹ Muhi ngain tepanim huohu ti tel akaik takahawa, teka masiwi ti teka Ju aile teik kikilam ti kotiai uli walikoun ti kolakol ka i seilon ti Haeu. Ape Josep uliai i Jises, tetenen ax ti tel engel uliaiwen imat ti i pet.

²² Ien taun ti Josep ma Mary aile saun ti haunialalu ti puli Haeu usiai nauna ti Moses. Aile ape lalu kau tel akaik hani Ingi Haeu leili Jerusalem ape lalu hani i hahitake ngangahat ti Haeu. ²³ Masin ti teik kakain leili pepai Haeu tel Masiwi i ukek, “Lawe akaik wawan pamu laha selai haniwa ailei puase Haeu.” (Exod 13:2) ²⁴ Ape lalu hani Haeu huok pal ti lalu aile saun ti haunialalu ti pulan, usiwa nauna ti Moses.

Simeon kak kilami sale Jises

²⁵ Lokon ien tel seilon toto Jerusalem axan Simeon. Holi Spirit kakapiti i ape lawe i aile waliko sawisawin ti puli Haeu ma i usi hahatapo hatesol nauna tetan. Masin teka Ju liai, tin i monomon atengiai Krais tel Haeu taloma ti awaialato ma hualifato. ²⁶ Ti imat Holi Spirit kola haxewa hani Simeon ka i kum matemu atengi i ningahiwa Krais,

tel Haeu taloma. ²⁷ Ti Mary ma Josep atoheniwa kokole Jises hani Ingi Haeu lehe lalu hani i hahitake ngangahat ti Haeu, Holi Spirit kapiti Simeon nahih haniwa ien.

²⁸ Simeon akeni aumi kokole Jises ape i kak sameni Haeu i ukek,

²⁹ “Haeu tel Masiwi, o puas usiwen kakaim, aile ape namilok i heh hawanewen ape ewi na nga mat.

³⁰ Pake ti puki pulak wanen nga ningahiwen tel awaiamite,
tel i awai amite ti kawatan ti lialui woumitem seilon.

³¹ O kilamiwen i tel awaiamite lawe seilon ti xux texux texux.

³² I masin xewai alon,
i kaxi haxewa o hani teka seilon kumahe Ju
ma i aile hasohotu teka Israel seilon pate tuah
nake puki i nakuama ti lato.”

³³ Josep ma Mary hong ongaini hawane waliko ti Simeon kakak sale tel natululu.

³⁴ Ape Simeon kamei Haeu ti hanialalu soliaian. I hone Mary ukek, “Tel akaik ie Haeu kilamiwen, kilan seilon kum soh ka i Krais ape Haeu teheni ma paxai lioi laha. Ape kilan seilon liai laha soh ka i Krais ape Haeu namiloi ukek laha seilon tuah. Jises masin kolakol ti Haeu tuahie kilan seilon pahoxai i. ³⁵ Aweisal tewau ien Haeu hatakei namil hatesol seilon. Ape o Mary, moloan ma tatahan lap wanen tunahi o masin ka tea ngol melomelon i tapuhi pele atem.”

Ana kak kemulik hani Haeu ti Jises

³⁶ Ana, tel hehin kuluiak kakai Haeu, i tin leili Ingi Haeu. I nati Panuel, akiki Aser tel nati Jekop tel matahaun ti lato. I hehin salaimat. I hina axoan leili ahang tepanim huohu. ³⁷ Muhiun ti tel axoan matewai i tai sal ulea. Aope ie ahangun 84. Lawe i nahih hani Ingi Haeu. Ngain ma ipong lawe i lotu ma halini an ti hualiai lotu tetan. ³⁸ Ti Simeon kak hatapoa, Ana nahih xohi hani kapi lato ape i kak kemulik hani Haeu ti Jises. Ape i kaxi sale Jises hani hatesol seilon ti laha monomon atengiai Krais tel Haeu taloma awaiai teka Israel ti kawatan ti lialui woulaha.

³⁹ Ti Josep ma Mary aile hatapoa lawe waliko ti nauna ti Moses kakak, lalu alia hani tonalalu ti Nasaret leili Galili. ⁴⁰ Ti ien Jises lap ape i kui. I uke anesoin ti sale aweisali Haeu ma Haeu aile kola soliaian hani i.

Jises leili Ingi Haeu

⁴¹ Lawe ahang tehu tehu ti taun ti Pasova, tel tame Jises ma tel tinan lalu lua hani Jerusalem naake ngain ti namenai lokon Haeu waxy aliake teka Ju ti Igip. ⁴² Ti Jises ahangun kewa huopanim huohu, lato lua hani ien ti tehu Pasova usiwa saun ti teka Ju. ⁴³ Tataen Pasova tapoa, lalu alia hahaniwa tonalalu tuahe Jises tutuen Jerusalem. Taman tinan kum tioi. ⁴⁴ Lalu sokok i kakahiti teka kilai seilon tuaulalu ape lalu lua tatalewa ngain hatehu. Ti ape alohah i tai tahiamma kapi lalu ape lalu upia i leili teka akikilalu ma lohulalu. ⁴⁵ Lalu tai tunahi i ape lalu alia hani Jerusalem upiaian. ⁴⁶ Ngain tololu tamusua lalu tunahi i leili Ingi Haeu, toto kapi teka hanauki kakai Haeu ma saun ti teka Ju. I hongohong lato ma kakamei hina kamekame. ⁴⁷ Tesol lato hongohong Jises, pate lato hong ongaini sale anesoan ti i kakak kapi lato. ⁴⁸ Tel taman ma tel tinan pate lalu ongaini ti lalu ningahiwi i ien ape tel tinan hone i, “Jises, kalahai o aile hani amili ukek? Amili tel tamam to nanamiloi o ape amili puas lialu hawane upiaiam.”

⁴⁹ I ikak pahoi lalu ukek, “Ala amulu kum upiup ngal. Ala amulu tioiwa ka nga ie ailei puase Haeu tel Tamak.” ⁵⁰ Tuahe lalu kum hong xeu kakaian.

⁵¹ Jises kahiti aliake lalu hani Nasaret ape lawe i hong usi kakaialalu. Tel tinan namiloi kakapitini waliko ti i sosohot. ⁵² Jises lap hetekiele anesoin ti sale Haeu. Amukean ti Haeu ma ti seilon hani i to lap ahe tatalele.

3

Jon Baptis kaxi meng solian ti Jises

Mt 3:1-12; Mk 1:1-8; Jn 1:19-28

¹ Leili ahang 15 ti Taiberius masiwi tapein ti Rom, Pontius Pailat i masiwi ti Judia, Herod Antipas i masiwi ti Galili, tel ukalan Pilip i masiwi ti Iturea ma Trakonitis ape Lisanias i masiwi ti Abilene. ² Anas ma Kaiapas lalu hauhua masiwi tapein ti hukuminiai Haeu ma seilon. Lokon ien Jon tel nati Sakaraia toto he lohong. Haeu hani i kakaian lehe i kaxi ahuti hani teka seilon.

³ Ape Jon nahih hani tesol tesol ti pape kan Jodan. I kaxi hani teka seilon ka laha uke baptais na laha towiahu ti lialui woulaha hani Haeu lehe i oxoxi laha ti kawatan ti saun lialun ti laha. ⁴ I seilon tetel Aisaia tel kuluiak kakai Haeu kakaxi ti kuwen, i ukek, “I titiol he lohong,

‘Towiahua ti lialui woumuto
lehe tel Masiwi neini amuto taen i
tahiama!

⁵ Towiahua haniwa Haeu ma teheniwa amuto
lehe i kapiti hasolia amuto!
Hasawiwa namilomuto ti hasoliai wasola-
muto ma Haeu
hanowi ti laha taneni aweisal suxas-
uxan
lehe nanahihi soli.

⁶ Ape lawe seilon paxai tioi sale Haeu awai
laha
ti kawatan ti lialui woulaha.” <sup>(Isa
40:3-5)</sup>
I tiliai kakai Aisaia ti i kak kilami sale
Jon.

⁷ Ti kilai seilon nahih haniwa kapi Jon
lehe i baptaisi laha, i hone teka woinakon
pahalaha lehe laha towiahu ti lialui
woulaha, “Amuto lehomuto huoka! Aita
hone amuto ka amuto salia uke ti kawatan
ti na Haeu hani amuto? ⁸ Ailewa saun tenen
ti i kola ka amuto lioiwen saun lialun. Kum
ukekek ka amuto salia uke ti kaui kawatan
nake amuto nakuama ti Abraham. Nga
kakane amuto, Haeu pon kolitinai tesol
pot ie hani kahi nati Abraham! ⁹ Haeu
apeseniwen tea ngolapung. Pata tenen i
kum hua alua, i koti hamahusu ape i towi
lui hani leili ah.”

¹⁰ Teka seilon kamei i, “Ape amite aile la?”

¹¹ I pahoi laha ukek, “Teka ti amuto na
puuxuaumuto huohu, tehu haniwa tel na i
tap wanen ape na amuto hina an, sei axiwa
teka laha hihitol.”

¹² Tataen teka seilon ti waxiai moni ti teka
Ju hani teka masiwi ti Rom, tin laha nahima
lehe Jon baptaisi laha. Ape laha kamei i,
“Tel masiwi, amite aile la lehe amite salia
ti kawatan ti Haeu?”

¹³ I hone lato, “Kum pupuluti teka seilon.
Kum waxy hahasea moni lapan ti teka
masiwi kilamiwen.”

¹⁴ Ape teka seilon ti hile tin laha kamei i,
“A amite ape lahan? Amite aile la?” I hone
aliake lato, “Kum lulungei seilon waxiai
moniulaha. Kum hahamatau laha ka amuto
aile halialu laha ma na amuto sului laha na
la laha kum hani amuto moni. Amukewa lape
kahumuto ti amuto kewen.”

¹⁵ Jon tioi ka kilan ti teka Ju laha to
monomon atengiai Krais, laha sokok ka i
uke tetel Krais Haeu taloma. ¹⁶ Ape Jon
kakane laha, “Nga baptaisi amuto ani kan
tuahetel i luluainima muhik, taen i baptaisi
amuto i hani amuto Holi Spirit ti kapitia-
muto. I pamu masiwian tetak. Masiwiaian

ala i kum pon nga unauan.¹⁷ I hiniti seilon masin tel na i hapuasa nuhinuh ti i selai api ti penun. I apuhini api wanen ape i lui xoini penun.”¹⁸ Jon hapuasa kakain tenen tenen ti kaxi haxewai meng solian ti Jises Krais hani teka seilon ape i kak eliel ka laha hong tamaniwa kakai Haeu.

¹⁹ Tin i kak nanami Herod tel masiwi ti Galili nake i waxy axoaan Herodias, axoi tel ukalan, ma i aile hakilawen saun lialun.

²⁰ Muhiin Herod aile ulea tenen saun lialun, i hana Jon hani kalabus.

Jon baptaisi Jises

Mt 3:13-17; Mk 1:9-11

²¹ Ngain tehu ti Jon baptaisi teka seilon, tin i baptaisi hetekie Jises. Leilon ti Jises lolotu, maun hea.²² Lokon ien Holi Spirit mos hani kapin hanowi tok pux. Ape tenen kinax wixima ti tone Haeu i ukek, “O se Natuk pate nga waheni, nga amuke hawane o.”

Teka matahaun ti Jises

Mt 1:1-17

²³ Ti Jises hutui ailei puasain tenen Haeu kilamiwen i ailean, ahangun sai 30.

Jises nati Josep. Ti Jises he tehu pon ie teka seilon
namiloi ukek ka i tel nati Josep.
Josep tel nati Heli.

²⁴ Heli nati Matat.

Matat nati Livai.

Livai nati Melki.

Melki nati Janai.

Janai nati Josep.

²⁵ Josep nati Matatias.

Matatias nati Amos.

Amos nati Nahum.

Nahum nati Esli.

Esli nati Nagai.

²⁶ Nagai nati Maat.

Maat nati Matatias.

Matatias nati Semein.

Semein nati Josek.

Josek nati Joda.

²⁷ Joda nati Joanan.

Joanan nati Resa.

Resa nati Serubabel.

Serubabel nati Sealtil.

Sealtil nati Neri.

²⁸ Neri nati Melki.

Melki nati Adi.

Adi nati Kosam.

Kosam nati Elmadam.

Elmadam nati Er.

²⁹ Er nati Josua.

Josua nati Elieser.

Elieser nati Jorim.

Jorim nati Matat.

Matat nati Livai.

³⁰ Livai nati Simeon.

Simeon nati Juda.

Juda nati Josep.

Josep nati Jonam.

Jonam nati Eliakim.

³¹ Eliakim nati Melea.

Melea nati Mena.

Mena nati Matata.

Matata nati Natan.

Natan nati David.

³² David nati Jesi.

Jesi nati Obed.

Obed nati Boas.

Boas nati Salmon.

Salmon nati Nason.

³³ Nason nati Aminadab.

Aminadab nati Ram.

Ram nati Hesron.

Hesron nati Peres.

Peres nati Juda.

³⁴ Juda nati Jekop.

Jekop nati Aisak.

Aisak nati Abraham.

Abraham nati Tera.

Tera nati Nahor.

³⁵ Nahor nati Serug.

Serug nati Reu.

Reu nati Peleg.

Peleg nati Eber.

Eber nati Sela.

³⁶ Sela nati Kainan.

Kainan nati Arpakad.

Arpakad nati Sem.

Sem nati Noa.

Noa nati Lamek.

³⁷ Lamek nati Metusela.

Metusela nati Enok.

Enok nati Jared.

Jared nati Mahalalel.

Mahalalel nati Kenan.

³⁸ Kenan nati Enos.

Enos nati Set.

Set nati Adam

ape Adam nati Haeu.

4

Satan tohongi haputai Jises

Mt 4:1-11; Mk 1:12-13

¹ Muhiin ti Jises baptais kewa, i nahih salili tehu kan Jodan. Holi Spirit hapohea i ape kapiti i hani he lohong.² Ti ien Satan tohongi haputaian, Jises tai angiang leili 40 ngain ape pate i hitol.

³ Satan hone i, “Na o tel Nati Haeu, kolitiniwa tehu pot ie haniwa bret.”

⁴ Jises pahoi i ukek, “Kakai Haeu ukek, ‘Seilon ala i hana hatapo namilon hani kakai Haeu kumahe an.’” (*Deut 8:3*)

⁵ Satan hakahita i hani patul tehu maunten ape kola hani i hatesol xux ti itan ie lape tehue. ⁶Satan kakane i, “Nga hani hatapo o lawe soliai waliko ti hatesol xux ie ma nga hana o masiwi ti laha nake Haeu haniwen he minak ape nga pon haniai tuahe tel na pahak. ⁷Lawe waliko ie tetam na masin o lokuhu lotui nga.”

⁸Jises kak pahoi i, “Kakai Haeu ukek, ‘Lotuiva mewenae Haeu tel Masiwi ma ailewa mewenae puasan.’” (*Deut 6:13*)

⁹ Muhin Satan hakahita Jises hani Jerusalem ape hatuhi i he teik tumi Ingi Haeu patul wanen. Ape kakane i, “Na o tel Nati Haeu, tit haniwa itan. ¹⁰Pake kakai Haeu i ukek,

“Haeu talo teka engel tetan
ti awaiam ma ngahatiam.

¹¹Ape lato akeni o he minalato
lehe pot kum hamange o kalak taen
aem.” (*Ps 91:1*)

¹²Jises pahoi i ukek, “Tuahe kakai Haeu tin i ukek, ‘Kum totohongi Haeu tel Masiwi tetam.’” (*Deut 6:16*)

¹³Ti Satan tohongi kewa Jises, i nahih salili i atengi tehu taun solian tetan.

Teka Nasaret watakai kakai Jises
Mt 4:12-17, 13:53-58; Mk 1:14-15, 6:1-6

¹⁴Jises alia hani Galili hetekie xuhai pohe Holi Spirit. Meng ti sale Jises sawata hani lawe toan ma taon ti Galili. ¹⁵I hanau teka seilon sale Haeu leili synagog, ing ti apuhai teka Ju, ape kilan seilon amuke i.

¹⁶Muhin ien Jises tahiia hani Nasaret, tehu taon ti i lapale. Telao Sabat i nahih hani tehu synagog hanowi ti lawe i ailele. I tule lehe i ridai kakai Haeu. ¹⁷Ape laha hani i teik pepai Aisaia, tel kuluiak kakai Haeu. I holaiwa teik pepa ape i onoteni tesol ti i ukek,

¹⁸“Spirit ti Haeu tel Masiwi i kapik
nake i kilamiwen nga kaxi ahutiae
meng solian ti Haeu
hani teka laha tae ti usiae aweisali
Haeu.

I taloma nga hetekie kakain ka nga ahutiae
teka
kalabus ma oxoxiai seilon ti kawatan ti
lialui woulaha.

Nga haewia teka pulaxa
ma haxewa seilon ti sale aweisali
Haeu.

Nga awai seilon ti teka liai aile halialu laha.

¹⁹Tataen ien teka seilon tioi ka taun ti Krais
i tahiawen
ape Haeu aile kola lape soliaian hani
laha.” (*Isa 61:1-2*)

²⁰Jises lumini aliake teik pepa. I hani tel hualiai ailei lotu ape i to. Lawe seilon leili synagog paxai kapitini i. ²¹I kakane lato, “Teik kakai Haeu amuto hongoen aope ie, i sohot poponowi hawane tetelao.”

²²Teka seilon ien kak amuke i ma sameni soliai kakai. Tuahe teka ti laha kakak alia puki laha ukek, “I se tetel natii Josep. I sohot ukek ia k i Krais?”

²³I hone laha, “Nga sixi ka lehe amuto hone nga ukek, ‘Kolawa pohem. Ailewa waliko tenen lalap puki leili tonam masin ti amite hongohong o ailewen leili Kape-naum.’” ²⁴Jises kak ahe ukek, “Tuahe nga kakane hawane amuto, ti toan liai seilon sameni tel kuluiai kakai Haeu tuahe ti puki tonan wanen laha wiliki i. Ien se masin ti i sohot hani nga.”

²⁵“Salan lokon ti Elaija tel kuluiai kakai Haeu, kilan hehin ti Israel axoala ha matewen, pahalahu huuhalu nake tap akah leili ahang tolulu tewaok ape seilon lialu hahawane ti hitolo leili xux hatexux.

²⁶Tuahe Haeu tai talo Elaija hualiai teka hehin ien. I talo non hani tel hehin kumahe Ju axoan matewen, i toto Sarepat xohixohin kapi tehu taon lalap axan Saidon. ²⁷Tin masin lokon ti Elaisa, kilan wanen seilon ti Israel naxe tinulaha lialun, pahalahu huuhalu tuahe Elaisa tai haewia laha, i haewia non Naman tel kumahe Ju, i ti texux xux Siria.”

²⁸Ti teka Ju leili tehu synagog hon-goa, lolaha lialu hawane. ²⁹Kakanua laha itini ahuti Jises hani melal ti Nasaret ape hakahita i hani ngixi tehu maunten kokol. Laha namiloi na laha sipeli i hani he sahikek. ³⁰Tuahe Jises non alia wasole teka kilai seilon ape i nahih salili laha. Tap tel hamangewen i.

Jises xaxaweni spirit lialun
Mk 1:21-28

³¹Muhin ien Jises nahih hani Kapenaum, tehu taon leili Galili. Telao ngain Sabat i hanau teka seilon leili tehu synagog. ³²Pate laha ongake sale kakai nake masin kakai tel masiwi wanen.

³³ Ti leili synagog, tel seilon spirit lialun kapiti hahalialu, i tilol leng ausisini, ³⁴ “Jises ti Nasaret, paham la ti amite? Nakon o ie ti halialuamite? Nga tioi o tel seilon sawisawin Haeu taloma!”

³⁵ Jises tumei spirit lialun ukek, “Minginiwa awam ape ahuta xaxaua ti tel seilon ie!” Spirit lialun towi xoini tel seilon hani itan ti puli lawe seilon tuahie i tai mange. Ape spirit lialun ahuta salili i.

³⁶ Hatesol seilon hong ongake ape laha kakak alia puki laha, “Nakon waliko la teten-en? Masiwian ma pohen i ke nonoma ia ka spirit lialun hong tamani i ape lato ahuta xaxau?” ³⁷ Mengen waliko ti Jises ailele sawata hani tesol tesol ti ien.

Jises haewia kilan seilon

Mt 8:14-17; Mk 1:29-34

³⁸ Jises nahih salili synagog ape i nahih hani ingi Saimon. Tini tel axoi Saimon tinun pate ahian ape teka seilon ien kamei eliel Jises haewian, ³⁹ Jises tu pape enepe tel tinun ape i tumei xaxaweni nax. Ti naxe tinun tahawa, tel hehin xahat hahutuia ape i apeseni analato.

⁴⁰ Ti ape alohah laha hakahita teka hina nax tenen tenen hani kapi Jises. I hana minan patul ti laha tel tel ti haewialaha ape laha ewi. ⁴¹ Teka ti laha spirit lialun kapiti hahalialu. Kakai Jises tehue ape spirit lialun ox ahuta titolil, “O tel Nati Haeu!” Jises watakai teka spirit lialun kaxi hani teka seilon ka i Krais, aile ape i halini na lato kaxi.

Jises kaxi meng solian ti Haeu hani teka Ju
Mt 4:23-25; Mk 1:35-39

⁴² Pate letu Jises nahih salili tehu taon ape i nahih hani tesol ti tap seilon. Teka seilon to upiup i ape ti laha tunahiwa, laha hakongu i ka kum nahih sasalili laha.

⁴³ Tuahie i hone laha, “Meng ti Haeu neini seilon tin nga kaxi hani toan ma taon liai nake Haeu taloma nga ailei teik puasain ien.” ⁴⁴ Ape i kaxi ahuti tatale kakai Haeu hani teka Ju leili synagog ti Judia.

5

Jises tike waxaini seilon hani kahikahin
Mt 4:18-22; Mk 1:16-20

¹ Ngain tehu Jises tutu peixux ti kanitax Galili ape kilan seilon pungei hapisipisi i hongoi kakai Haeu. ² I ningahi hua koap peixux tetesol teka seilon ti telei xixi mos saliliwen ape lato nunuhi upen. ³ Jises ku

haniwa he tea koapai Saimon ape hone i uhi siainai teik tea koap. Jises to ape i hanau teka seilon.

⁴ Ti i kak kewa, i hone Saimon, “Sulini tea koap haniwa sai ilam ape o ma tesol mahoam haputawa upen puliai xixi.”

⁵ Saimon pahoi i ukek, “Tel masiwi, amite puas eliel hawanewen ipong hatehu tuahie tap onamite. Tuahie nake o kak ukek ien, amite haputawa upen.”

⁶ Lato haputawa ape lato tiuk kila hawane xixi moxemoxe tehu upen xaputa. ⁷ Lato alohi teka tuaulato he tea koap liai hualialato. Lato hatesol lohi haxuhaxuha xixi hani koap hauhua ape sikole lalu kaxox.

⁸ Ti Saimon Pita ningahiwa tenen waliko i sohot ien, i lokuha mateiwai Jises hetekie mamata ape i ukek, “Tel Masiwi, siawa tetak nake wouk pate lialun!” ⁹ I kak ukek ien nake i ma tesol liai ongake hawane mongohe xixi lato tikewen. ¹⁰ Hua tuaun Jeims ma Jon, nati Sebedi tin lalu ongake hawane.

Ape Jises hone Saimon, “Kum maamata! Tataen ie ahua, ape o tiuk seilon hani kahikahik!” ¹¹ Ti lato uhi koap hanile ixux, lato hana lioi hatesol waliko ti lato ape kahiti Jises.

Jises haewia tel seilon naxe tinun hakaliapae i

Mt 8:1-4; Mk 1:40-45

¹² Telao Jises leili tehu ti tesol taon ape tel seilon naxe tinun lialun nahih hani kapin. I lokuha hana kawan itan ape i kamei eliel Jises, “Tel masiwi, na o waheni, xaxaweniwa naxe tinuk lehe nga hau alia.”

¹³ Jises tulini aka soti tel seilon. I ukek, “Nga waheni, ewiwa ma haua!” Tataen ien wanen tenen nax salili i.

¹⁴ Jises hone i, “Kum kaxi hahani teka seilon liai. Nahih sawi haniwa kapi tel masiwi ti hukuminiai Haeu ma seilon lehe i paxai kalisi tinum. Kau hetekiewa huok manixux ti haniai Haeu masin ti Moses kakawen. Ien kola haniai teka seilon ka o ewiwen ape pon o hukuma hani kapi laha.”

¹⁵ Tuahie meng ti sale puase Jises sawat ahe tatale hani tesol tesol ape kilan seilon nahih hani kapin hongoi kakaian ma lehe i haewia laha. ¹⁶ Leili pupuasan hina ngain Jises nahih hani tesol mewenae i lehe i lotu.

Jises haewia tel seilon tupuan maten
Mt 9:1-8; Mk 2:1-12

¹⁷ Ngain tehu ti Jises hahanau teka seilon, teka Parisi ma teka hanau nauna ti Moses

laha toto ien. Laha luama ti Jerusalem, Ju-dia ma kilan toan ti Galili. Haeu tel Masiwi hapohea Jises ti haewiai teka tinun.¹⁸ Ape teka seilon kau hani i tel seilon tupuan maten engeeng he sau. Lato sisixeh hani kapi Jises.¹⁹ Tuahé lato kum pon nake husele kilai seilon. Aile ape lato haneké i hani hongin. Lato hawai'i ape halahe i he tehu enepan hani wasole teka seilon mateiwei Jises.

²⁰ Jises tioi namilolato xoxoan ka i pon haewian ape i hone tel tinun, “Tel natuk, nga oxoxi o ti kawatan ti lialui woum.”

²¹ Teka Parisi ma teka hanauí nauna ti Moses laha he kakak alia puki laha, “Kalahai i ukak ukek? I kak hanowi i Haeu! Aita pon oxoxiakako ti kawatan ti saun lialun? Mewenae Haeu!”

²² Jises tioi namilolaha ape i hone laha, “Nakon lahan amuto namiloi namil tenen ien?²³ Tetenen ia pamu malimuan? Nakon pamu malimun na nga hone tel seilon tupuan maten, ‘Xahatawa ape nahiwa,’ ka ‘Nga oxoxi o ti kawatan ti lialui woum?’ Ti ailei hahuonen, mewenae seilon ti hina pohe Haeu i pon ailean.²⁴ Nga aile kola leh amuto tioi ka ngl tel Nati Seilon, he tehu pon ie nga hina poh oxoxiai seilon ti kawatan ti saun lialun ti laha.” Ape i hone tel seilon tupuan maten, “Nga hone hawane o, xahatawa, waxiwa enepam ape nahih haniwa tonam nake ape o ewiwen!”

²⁵ Tuhan tehue tel seilon xahat waxiwa enepan. Ti i nahih hahaniwa tonan i sameni amumu ke Haeu.²⁶ Laha hatesol ong mamata pohe Haeu. Laha sasameni Haeu ukek, “Waliko tenen lalap kako paxaiwen tetelao!”

*Matiu Livai sohot kahikahi Jises
Mt 9:9-13; Mk 2:13-17*

²⁷ Muhiñ Jises nahih salili tehu taon ape i ningahi Matiu Livai, i to wawaxi moni ti teka seilon. Pupuasan waxiai moni ti teka Ju ti haniai teka masiwi ti Rom. Jises hone i, “Kahitima nga. Pahak o kahikahi.”²⁸ Livai tule, i lioi lawe waliko ape kahiti i.

²⁹ Imuh Livai aile tehu angiaiñ lalap hani Jises leili ingan. I ilowi teka tuaun puasalahua masin puasan ma teka seilon liai.

³⁰ Tuahé teka Parisi ma teka hanauí nauna ti Moses laha kahiloloi teka kahikahi Jises, laha ukek, “Kalahai amuto ang ma un akati teka waxiai moni ti teka puki akikilahua ma teka woulaha lialun?”

³¹ Jises hone laha, “Dokta kum puasake seilon huliwi, mewenae teka tinun.

³² Kumahe ka nga he tehu pon ie upiai kahikahik seilon tenen laha sokok laha sawisawin. Nga tahiamma upiai kahikahik seilon tenen laha tioi ka woulaha lialun.”

*Nauna wasan ma nauna haun kum he paho
Mt 9:14-17; Mk 2:18-22*

³³ Teka seilon kamei Jises, “Nakon lahan tesol kahikahim lato kum halini an ti hualiai lotu ti lato hanowi tesol kahikahi Jon Baptis ma tesol kahikahi teka Parisi?”

³⁴ Jises kak pahoi lato, “Na tel seilon i sal i kapi tesol seilon ti laha ilowi ti angiaiñ ti salasala, kaie lato kum ang? Kumahe! Lato ang akati i.³⁵ Tuahé ngain tehu i luluainima, laha waxi xaxaweni tel seilon i sal ti lato ape taaen ien lato halini an.”

³⁶ Jises kak kolongeni hani lato ukek, “Tap tel ukeke teik maia haun paxatawaaiai teik maia wasan. Na i aile ukek ien, teteik haun i lexi teik wasan ape wawan i lap ahe.

³⁷ “Seilon kum lohi hahakila patula wel hani tehu po wasan nake na i lauti, tehu po i watat ape patula tapulol.³⁸ Pamu ewian na i lohi hani he tehu po haun lehe ati lalu kum lialu.

³⁹ “Tuahé kilan seilon laha waheni usiai saun ma nauna wasan nake laha namiloi ukek ka saun ma nauna wasan pamu soli-anian.”

6

*Jises se Masiwi ti Sabat
Mt 12:1-14; Mk 2:23-3:6*

¹ Telao ngain Sabat Jises nahih kokotiwa tesol kini kon hetekie tesol kahikahin. Ape tesol kahikahin asahi ani huai kon.² Teka Parisi kamei, “Nakon lahan amuto aile saun tenen hahalin ti telao ngain Sabat?”

³ Jises pahoi lato, “Oheak amuto tai hong xeu waliko ti tel masiwi David ma tesol lawan aile ti pate lato hitol?⁴ I nahih soh hani Ingi Haeu ape i waxi bret hahalin. Mewenae teka masiwi ti hukuminiai Haeu ma seilon pon anian. Tuahé i ma tesol lawan ani.”⁵ Ape Jises tili kakaian, “Nga tel Nati Seilon, nga se Masiwi ti Sabat. Nga tel sowini haniai seilon waliko tenen i pon ma na i kum pon laha aile telao ngain Sabat.”

⁶ Tehu ngain Sabat liai Jises nahih hani tehu synagog ape i hanau teka seilon kakai Haeu. Ti ien tel seilon minan tepauna maten.⁷ Teka hanauí nauna ti Moses ma teka Parisi laha sasakal aweisal ti suluiiai

Jises. Aile ape laha paxai otioti na i aile haewia tel seilon lehe laha sului i ti aile waliko tenen laha hahalini telao Sabat.

⁸ Tuahé Jises tioiwen namilolaha ape i hone tel seilon minan maten, "Tua ape nahih hanima mateiwa ie." Ape tel seilon nahih hani kapin. ⁹ Jises hone laha, "Nga hina tenen kamekame hani amuto. Nakon saun la ewi na kako aile telao Sabat? Saun ti hasolai seilon ka halialualaha? Saun ti hualiai seilon ka hamangealah?"

¹⁰ I pax kakalini laha hatesol ape i hone tel seilon, "Hokahiwa minam." I aile usi ape tepaun minan i ewi. ¹¹ Teka hanau nauna ti Moses ma teka Parisi lolaha manomano hawane ape laha he kakak alia puki laha sale aile halialui Jises.

*Jises kilami huopanim hua aposel
Mk 3:13-19*

¹² Lokon ien Jises nahih lotu hani he maunten ape i kakak kapi Haeu ti ipong hatehu. ¹³ Ti i letule, i tiloi hatesol kahikahin. I kilami huopanim hua ti leilolato ape axai lato aposel. Axalato ie: ¹⁴ Saimon tel i axai Pita ma tel ukalan Andru, Jeims, Jon, Pilip, Batolomiu, ¹⁵ Matiu, Tomas, Jeims tel nati Alapeus, Saimon tetel axan liai Selot, ¹⁶ Judas tel nati Jeims ma Judas Iskariot, tetel seilon imuh i hangaini Jises.

*Jises hanau ma haewia teka seilon
Mt 5:1-12*

¹⁷ Muhin ti Jises ma teka kahikahin mos aliawa he maunten, i tu teke nahonahon ape teka kilai kahikahin ma kilai seilon liai tu kalini i. Teka seilon ien laha ti Judia, Jerusalem ma taon Taia ma Saidon xohixohin peixux. ¹⁸ Laha luama hongoi kakaiyan ma kameiiai Jises ti haewiay teka tinun. Teka ti spirit lialun kapiti hahalialu, i xaxaweni spirit lialun ti leilolaha. ¹⁹ Lawe seilon ien tohongi sotiai Jises nake Haeu hapohea ia haewiay teka seilon tinun.

Solian ma kawatan ti Haeu hani seilon

²⁰ Jises paxai teka kahikahin ape i kakane laha hatesol, "Haeu aile hasolia hani teka pahalaha wanen i neini ma ngahati laha."

²¹ Haeu aile hasolia hani teka pahalaha isian wanen usiai namilon. Laha pono ti lawe waliko. Haeu axi waliko solian hani teka laha toto ti tatahan.

Haeu hasoli laha ape laha amuam ulea.

²² Haeu aile hasolia hani teteka seilon teka liai watakai hawane, kak saxuti laha ma hana laha kaliap nake laha kahikahik wanen.

²³ "Amukewa na tenen ien sohot hani amuto ape tautit amuamua nake kahumuto solian Haeu apesenewen patul leili tonan. Nameniwa ka teka kuluiay kakai Haeu ti matahaun tin laha kauen kawatan ti teka seilon aile halialui laha.

²⁴ "Tuahé Haeu axi kawatan hani teka pahalaha kum is i neini ma ngahati laha.

Haeu kum axi laha waliko solian nake laha ukek laha pono ti lawe waliko ti aope ie.

²⁵ Haeu axi kawatan hani teka pahalaha kum is usiai namilon. Laha tae ti lawe waliko. Haeu axi kawatan hani teka namilolaha mewenae ti hamuamuaialaha.

Imuh laha tunahi tatahan ma tangitangi. ²⁶ Haeu axi kawatan hani teka pahalaha wanen seilon sameniwa laha.

Ien masin teka woinakon ka kuluiay kakai Haeu teka seilon ti matahaun sasameni."

*Waheniwa teka laha pahoxai o
Mt 5:43-48, 7:12*

²⁷ Jises kak tatale, "Nga kakane amuto teka amuto hongohong nga, waheniwa teka laha pahoxai amuto ma ailewa saun solian hani laha. ²⁸ Kameiwa Haeu axiai waliko solian hani teka laha sai halialu amuto ma kameiwa i hualiai teka laha aile halialu amuto. ²⁹ Na tel seilon aile hani amuto saun tenen pate hahien, kum aile kahui aliliakie. Tiliwen i aile tuhi ulea. Na tel seilon waxi lungi tehu puxuaumuto, hani palahiwia i tehu liai. ³⁰ Axiwa laha waliko na laha kamei amuto. Na tel xuina waliko ti amuto, kum lungelung waxi aliliakian. ³¹ Aile haniwa seilon liai masin ti pahamuto laha aile haniwa amuto.

³² "Haeu kum kahui hasolia amuto na amuto waheni mewenae teka seilon ti laha waheni amuto. Kalak teka seilon ti aile saun lialun, lato waheni teka seilon ti laha waheni lato. ³³ A na masin amuto aile saun solian mewenae hani teka laha aile saun solian hani amuto, kalahai lehe Haeu kahui hasolia amuto? Kalak teka seilon ti aile saun lialun, tin laha ailele tenen ien.

³⁴ "Haeu kum sameni amuto na amuto axi moni mewenae hani teteka ti amuto pon

waxi aliakean. Kalak teka seilon ti ailei saun lialun, laha axi kakali moni hani teteka ti i pon hani hahamahuli aliake laha.

³⁵ “Tuahé amuto kewa liai tenen ti laha. Wahlenwa teka seilon laha watakai amuto ma ailewa saun solian hani laha. Axixa seilon moni ape kum amemene lehe laha aliake hani amuto. Na amuto aile ukek ien, i kola ka amuto salan wanen nati Haeu ape Haeu kahui halapa hani amuto. Aile kolawa solian ti amuto haniwa teka laha watakai amuto nake Haeu tin i aile kola soliaian hani teka seilon lialun ma teka laha kum nam waxi soliaian. ³⁶ Kewa amuto aile kola tatahan hani seilon liai hanowowi tel Tamamuto Haeu.

Kum kak hahalalu woi seilon liai
Mt 7:1-5

³⁷ “Kum kak hahalalu woi seilon liai lehe Haeu kum lengeini halialu amuto. Kum tieni hahalalu seilon liai lehe Haeu kum namiloi ukek ka amuto uke kawatan ti woumuto. Oxoixa seilon liai ti kawatan ti lialui woulaha hani amuto lehe Haeu tin i oxoxi amuto ti kawatan ti lialui woumuto.

³⁸ Amuto kewa ongawi lehe Haeu aile hasolia hawane hani amuto. Saun ti amuto aile hani seilon liai tin Haeu aile aliake hani amuto.”

³⁹ Ape Jises kak haxewa hani teka seilon ukek, “Na tel seilon pulaxa ati tel pulaxa liai, ati lalu put hani leili wal. Teka masiwi laha kum usi nauna tetak, laha masin tel seilon pulaxa neneini tel pulaxa liai. Kum hahanowi ti laha. ⁴⁰ Tap tel seilon xoini tel hanauan. Na masin tel hanauan hanau aluini tel kahikahin, tel kahikahin ien i sohot hanowi tel hanauan.

⁴¹ “Na amuto kahikahik, kum hahanowi teka seilon laha kak halialu woi seilon liai a laha kum paxai tioi puki lialui woulaha. Laha masin teka seilon laha ningahi teik masiapi kokol he puli tel seilon liai a laha kum paxai tioi teik masiapi lalap he puki pulalaha. ⁴² Amuto kum hone uke tel seilon liai, ‘Hanima nga xaxaweni teik masiapi kokol he pulam’ na masin puki amuto teik masiapi lalap he pulamuto. Seilon tenen lehomuto huoka! Amuto xaxawenimua teik masiapi lalap he pulamuto ape muhin ien amuto paxapax alua ti xaxaweniai teik masiapi kokol he puli tel seilon liai.”

Tea pata ma huan
Mt 7:15-20, 12:33-35

⁴³ Jises hanau tatale teka seilon ukek, “Pata tenen solian, huan kumahe lialun.

Pata tenen lialun, huan kumahe solian.

⁴⁴ Amuto paxai tioi pata na amuto paxai huan. Au kum hahuama huai laku ma koila kum hahuama huai maia. ⁴⁵ Tin masin seilon solian i ahuti kakain solian nake namilon solian. Ape seilon lialun i ahuti kakain lialun nake namilon lialun. Ie se salan wanen nake kakain ti seilon ahuti i ahutama ti namilon.”

Puas usiak kakai Jises
Mt 7:24-29

⁴⁶ Ape Jises kak tatale ukek, “Kalahai amuto axai nga Masiwi na amuto kum hong tamani kakaiak? ⁴⁷ Tuahé tel na i hong ma puas usi kakaiak nga kaxi haxewa hani amuto i seilon tetenen. ⁴⁸ I masin tel seilon i tahiwi hatahulou hepekeun ailan tuhi kukueun ti i atai tehu ingan. Na kanitax som ape wei tehu ingan, i kum manan nake tutuhan xooaan.

⁴⁹ “Tuahé tel seilon i hong kakaiak a kum puas usi, i masin tel seilon i atai ingan he hepekeun wakiakin ape kukui ingan wax-ueuxen. Ti weu wei tehu ingan i tua mahus. Malehe ape lialui mananaian!”

7

Jises haewia tel unaui tel masiwi ti hile ti Rom

Mt 8:5-13

¹ Ti Jises ahuti hatapoaka kakaihan haniwa teka seilon, i alia hani tehu taon Kapenaum. ² Ti ien tel masiwi ti hile ti Rom. Tel unauan tuahate tinun sikole i mat. ³ Ti tel masiwi hongoa sale puase Jises, i talo teka masiwi ti teka Ju kameiai Jises ka nahima haewia tel unauan. ⁴ Lato nahih hani kapi Jises ape kamei eliel i, ‘Kahitima amite ape hualiwia tel masiwi ti hile nake i tel seilon solian tapai hawane ti o huali. ⁵ I waheni hawane kako teka Ju ape i hatuhu tehu synagog hani amite ti Kapenaum.’

⁶ Ape Jises nahih kahiti lato. Tuahé imat ti lato tahia, tel masiwi ien talo teka lohun kakanean. Lato hone Jises, “Tel masiwi ukek, ‘O pate masiwi kasia ti na o nahih hanima leili ingak. ⁷ Aile ape puki nga kum nahima kakaneam. O tua kakawa ape tel unaauak i ewi. ⁸ Nga kak ukek nake tin hina seilon pamu masiwan tetak ma hina seilon ti hile hahitakak. Na nga hone tel, ‘Nahima,’ i nahih. Na nga hone tel, ‘Nahima,’ i nahima. Ape na nga talo tel unaauak, ‘Ailewa tetenen,’ i aile.’”

⁹ Ti Jises hongoa i ongake hawane. I xeisale ape i hone teka seilon kakahiti i, “Nga kakane amuto, ti leili Israel nga tai tutunah tel seilon i hina namil xoxoan tetak masin tel seilon ti Rom ie.” ¹⁰ Teka kau i kakain alia hani ingi tel masiwi ti hile ape lato tunahi ka tel unauan i ewiwen.

Jises hamoiha nati tel hehin axoan matewen

¹¹ Tai kue, Jises ma tesol kahikahin nahi hani tehu taon Nain ape kilan seilon kahiti lato. ¹² Jises tahia hani aweingi tehu taon onoten i teka seilon kakau tel seilon maten ti tihinian. Tel seilon maten ien i telaweh wanen nati tel hehin axoan matewen. Kilan seilon ti tehu taon ien kakahiti tel hehin. ¹³ Ti Jises tel Masiwi paxaiwa tel hehin, i tahane hawane. Ape kakane i, “Kum tangitang.” ¹⁴ Jises nahih soti teik patiu ti tel maten engeeng ape teka seilon kauan laha tu hamalum. Jises ukek, “Tel wawan uluhu, xahatale!” ¹⁵ Ape tel seilon kemuk maten xahat to. I hutui kakak kapi teka seilon. Ape Jises aliake i hani tel tinan.

¹⁶ Teka kilai seilon ongake hetekie mama ape laha kak sameni Haeu, laha ukek, “Tel kuluiai kakai Haeu pate tuah tahiawen kapi kako! Ie i kola ka Haeu huali kako teka seilon tetan!” ¹⁷ Meng ti sale puase Jises sawata hani hatexux Judia ma xux ti xohixohin kapin.

Jises ma Jon Baptis

Mt 11:2-19

¹⁸ Teka kahikahai Jon Baptis kaxi hani i lawe waliko ti Jises ailele. Ape Jon hone hua ti lato nahih hani kapin. ¹⁹ I talo lalu hani kapi Jises tel Masiwi kameian na i se Krais, tetel teka Ju to atetengi na Haeu taloma, ka lato atengi tel seilon liai.

²⁰ Ti lalu tahia haniwa kapi Jises, lalu ukek, “Jon Baptis taloma amili kameiam na o se Krais, tetel amite to atetengi na Haeu taloma, ka amite atengi tel seilon liai?”

²¹ Lokon ien Jises haewia kilan seilon laha hina nax tenen tenen, teka ti spirit lialun kapiti hahalialu ma teka pulaxa. ²² Ape i pahoi huuah kahikahai Jon i ukek, “Amulu alia honewa Jon waliko ti amulu hongohong ma ningahai. Teka pulaxa laha nahih hanima kapik ape laha Paxapax, teka laha kum nanahih ape laha nahih uke, teka hina nax lialun he tinulaha ape laha ewi, teka taxingalahala sutu ape laha hong uke kakain.

Teka maten laha moih alia ape teka paha-laha wanen Haeu neini ma ngahati laha, laha hongohong meng solian ti Haeu. ²³ Ape kaxi haniwa Jon ka teka namilolaha xoxoan tutuen tetak, Haeu aile hasolia hani laha.”

²⁴ Muhin ti huuah kahikahai Jon nahihi, Jises kakane teka seilon sale Jon. I ukek, “Ti amuto nahihi hongoi kakai Jon ti he lohong, amuto sokok amuto ningahai aita? Tel seilon namilon lawe i sohisohia? ²⁵ Amuto sokok ka amuto ningahai aita? Tel seilon tenen soson pate solian? Kumah, seilon kum sosoi maia solian he lohong. ²⁶ Nakon amuto sokok ka amuto ningahai tel kuluiai kakai Haeu? Salan wanen, tuahe nga kakane amuto, Jon tel seilon pamu tuah ti tel kuluiai kakai Haeu. ²⁷ Jon i tel seilon Haeu kakaxi leili pepaun. Haeu kakane tel Natun i ukek,

“Nga talo tel ahutiai kakaiak imat tetam ti apeseniai seilon ti sohotuam.” (Mal 3:1)

²⁸ Jises kakulea ukek, “Nga kakane amuto, puase Jon ti Haeu kilami i ailean se pamu tuah ti puase hatesol seilon liai. Tuahe kalak teka ti pate naun leili teka seilon Haeu neneini, anesoalaaha sale nenein ti Haeu pamu lapan ti Jon.”

²⁹ Kilan teka seilon naun, tataen teka waxiai moni ti teka Ju, ti laha hongoa, laha paxai tioi ka waliko ti Haeu namilo peleiwen pate sawisawin. Aile ape laha towiahu ti lialui woulaha hani Haeu ape Jon baptaisi laha. ³⁰ Tuahe teka Parisi ma teka hanau nauna ti Moses lato kum nam waxi waliko ti Haeu namilo peleiwen ti lato. Aile ape lato kum towiahu ti lialui woulato ape Jon tai baptaisi lato.

³¹ Jises kakulea ukek, “Kaie nga kolongeni teka seilon ti aope ie ukek ia? Laha masin waliko la?” ³² Laha masin teka akaik laha toto ti tone halokoin. Laha tilol ausisini hani teka liai, “Amite pakui pak solian ti salasala hani amuto

tuahe amuto kum amuam.

Amite pakui pak ti tatahan,
tuahe amuto kum tang.”

³³ Masin Jon Baptis ti i sohotuma, i kum ang halapa ma i kum un waen ape amuto ukek, ‘Spirit lialun kapiti halialu i.’ ³⁴ Ape ti nga tel Nati Seilon sohotuma, nga ang ma un waen hanowi teka seilon liai ape amuto ukek, ‘Paxaiwa tel seilon ien! Puhuan wawan ma weli unum. I tin lohi teka seilon ti waxiai moni hani teka masiwi ti Rom ma lohi teka

seilon woulaha lialun.’³⁵ Tuahe nga kakane amuto, anesoi Haeu ti amili Jon hahanau seilon, i sohot xeu hawane ka salan, na seilon paxai soliai puasamili, tataen ti na kilan seilon aile usi waliko ti amili hahanau laha.”

*Tel hehin tih i sanda he ae Jises
Mt 26:6-13; Mk 14:3-9; Jn 12:1-8*

³⁶ Tel Parisi axan Saimon ilowi Jises hani tehu angiaiin. Jises nahihi hani leili ingan ape i to ang.³⁷ Ti tehu taon ien tel hehin ti ailei saun lialun i hong tunahi ka Jises angiang leili ingi Saimon ape i kauma tehu sanda kahun pate lapal ma poum pate solian.³⁸ Ape i tu tehitii Jises sai aen. I tang ape kani pulan tuh hawaxexa ae Jises. I uke ukun umeni hapaxean ape i to asaoasoi aen ma i tih i tehu sanda hani he aen.

³⁹ Ti Saimon ningahiwa, i kakane aliake i, “Tel seilon ie i liai kumahe tel kuluiak kakai Haeu nake i hani lioi tetel hehin sotin tinun. Na i tiolia ka tel hehin ien weli ailei saun lialun ala i hakonguen.”

⁴⁰ Jises hone i ukek, “Saimon, nga teik kakain kakaneam.”

Saimon ukek, “Tel masiwi, kakain la?”

⁴¹ Ape Jises hutui kaxi hani i tenen meng. I ukek, “Hua seilon lalu hahapuasa moniai tel seilon liai, tel hahapuasa moni pate lapal ape tel moni kokol. Taun ti lalu ti ape hamatean.”⁴² Tuahe tap tel ti lalu pon hamatean ape tel seilon ien oxoxi ati lalu ti kawatan ti lalu. I hone lalu ka lalu kum hahamatean moniun. O namiloi ukek ia? Kiae aita ti lalu pamu i amuke tel seilon ien?”

⁴³ Saimon pahoi ukek, “Nga namiloi ukek tetel i uke moni pamu lapan.”

Jises ukek, “Salan wanen.”⁴⁴ Jises xeisa paxai tel hehin ape i hone Saimon, “Paxaiwa tel hehin ie. Ti nga tahia hanima leili ingam o tai hani nga kan nuhiai aek, tuahe i nuhi aek kani pulan ape i uke ukun umenian.”⁴⁵ O tai asoi taliopak ti tengeniek tuahe i asoaso aek lilian ti nga tahiam.⁴⁶ O tai ahui wel hani patuk ti kolakol ka o waxi auni nga tuahe i tih i hani aek tehu sanda kahun pate lapal.⁴⁷ Nga kakane hawane o, tel hehin ie waheni hawane nga. Nake ti tetenen, nga oxoxiwen i ti kawatan ti kilan saun lialun i ailewen. Tuahe tel seilon nga oxoxi i ti kawatan ti palaiai saun lialun ti i ailewen, i waheni nga pamu kolean.

⁴⁸ Ape Jises hone tel hehin, “Nga oxoxiwen o ti kawatan ti lialui woum.”

⁴⁹ Teka liai laha to angiang kapin laha he kakak alia puki laha, “Nakon i ukek i aita ka i oxoxi seilon ti kawatan ti lialui woulaha? Mewenae Haeu pon.”

⁵⁰ Ape Jises kakane tel hehin, “Haeu awai o ti kawatan ti lialui woum nake namilom xooxan tetak. Nahih hawanenewa.”

8

Teka hehin kakahiti Jises

¹ Muhih ien Jises lua hani taon ma toan tewau tewau kaxiai meng solian ti sale Haeu neini seilon. Tesol huopanis huuah aposel nahihi kakahiti i.² Tin hina hehin kapin. Kemuk i haewia lato ma xaxaweni spirit lialun ti lato. Leilolato Mary Magdalene, tetel Jises xaxaweni tepanim hua spirit lialun leilon.³ Susana ma Joana tin kapi Jises. Tel axoi Joana axan Kusa i tetel ngahatiai hatesol soxai tel masiwi Herod. Kilan hehin liai tin laha kakahiti Jises. Hatesol hehin ien laha hapanusa moniulaha hualiai Jises ma tesol aposel.

*Meng ti hepekeun tenen tenen
Mt 13:1-9; Mk 4:1-9*

⁴ Telao, ti kilan wanen seilon ti taon tehu tehu nahihi apuha hani kapi Jises, i kaxi hani laha tenen meng.⁵ I ukek, “Telao tel seilon nahihi towi seini waki maia. Hina i put hani aweisal. Imuh teka seilon nahihi tuhi ma manixux ngong ani hatapo.”⁶ Hina i put hani he kalamael. Tuahe waki maia ti i supulale lato aleal nake kan ti hepekeun i tae.⁷ Hina waki maia i put hani leili au. Ti i xexele, au talini ape i kum hua.⁸ Tuahe hina waki maia i put hani he hepekeun solian. I xexele ape i hua palahi 100 ulea akulai ti tel seilon seini.” Jises tilawa kaxiai tenen meng ape i ukek, “Na amuto hina taxing ti hongoi kakain, hongoa!”

*Jises kaxi haxewa meng ti hepekeun tenen tenen
Mt 13:10-23; Mk 4:10-20*

⁹ Tesol kahikahi Jises kamei i ti kaxi haxewa hanialato salangawe tenen meng ien.

¹⁰ Ape i ukek, “Haeu haxewa hani amuto teka kahikahik sale nenein tetan kumahe hani seilon liai. Teka seilon kumahe kahikahik nga kaxi meng ti hanaualah lehe waliko ti Aisaia kaxiwen i sohot poponowi. I ukek,

“Teka seilon papaxai waliko tenen ti nga ailele,
tuahe laha kum ningahi,
laha hongohong kakaik

tuahe laha kum xeu.” (Isa 6:9)

¹¹ Jises ukek, “Ie salangawe tenen meng nga kaxiwen. Waki maia kikilami kakai Haeu. ¹² Aweisal ti waki maia put to, kikilami teka seilon laha hong kakai Haeu. Tuah Satan tahiama ape i xaxaweni kakain ien ti laha lehe laha kum soh Haeu ape Haeu kum awai laha ti kawatan ti lialui woulaha. ¹³ Kalamael ti waki maia put to, i kikilami teka seilon pate laha hong amuke kakai Haeu tuahe laha tap namil xoxoan ti Haeu. Laha soh kakai Haeu teik kunkunun. Taen kawatan ma totohong tahiama, xoxoi namilolaha ti Haeu pate i put cosea. ¹⁴ Hepekeun ti hina au waki maia put to, i kikilami teka seilon laha hong kakai Haeu tuahe laha namiloi kasini waliko ti itan ie. Pahalaho soxialaha kilan ma laha nahaini waliko ti seilon liai. Namil tenen ien kokongini kakai Haeu ape laha kum hua nake namilolaha ti Haeu kumahe xoxoan. ¹⁵ Tuahe hepekeun solian kikilami teka seilon sawisawin laha hong auni kakai Haeu ape laha hua hakila nake laha usi kapitini nauna ti Haeu.”

*Kakai Haeu masin haxewaxeu
Mk 4:21-25*

¹⁶ Jises kak tatale ukek, “Tap tel i hakama tehu kamaian ape i atuh i ma na hana hahitake sau. Mewenae i hakama hakea hani patul koukean lehe i haxewa leili ing. ¹⁷ Waliko ti i mumuna aope i sohot kouke. Waliko ti amuto kum xeu ti kakai Haeu aope ie, imuh Haeu haxewa hani amuto.

¹⁸ “Aile ape amuto hong matainiwa kakai Haeu lehe amuto xeu. Na tel seilon i hong usi kakaia, Haeu axi aheke anesoan, tuahe na tel seilon kum hong usi kakaia, anesoan Haeu waxi aliake.”

*Tinan ma ukalan wanen
Mt 12:46-50; Mk 3:31-35*

¹⁹ Ngain telao ti Jises hahanau teka seilon, tel tinam ma tesol ukalan nahima paxai i. Tuahle laho kum ngasoha uke hani kapin nake huselo kilai seilon. ²⁰ Tel ti laha hone Jises, “Tel tinam ma tesol ukalam tutu melal. Pahalato paxaim.”

²¹ Ape Jises ukek, “Teteka laha hong usi hatapo kakai Haeu laha se tinak, ukalak ma tuak.”

*Jises hamonga tehu ahon
Mt 8:23-27; Mk 4:35-41*

²² Ngain tehu Jises ku hani he tea koap hetekie tesol kahikahin ape i hone lato

ukek, “Kako lang hani liai tepaun ti kanitax Galili.” Ape lato lang. ²³ Leilon ti lato langalang, Jises pulan lihi ape i matih. Tai kue tehu ahon taheimma. Laman hutomi tea koap ape sikole lato kaxox.

²⁴ Tesol kahikahin hangoni i ape lato ukek, “Tel masiwi, tel masiwi! Sikole kako mat!”

Jises haiwa ape i kakane aupol ma laman, “Mongawa!” Ape i tuxi. ²⁵ Jises hone lato ukek, “Nakon amuto tap namil xoxoan tetak?”

Tuahe lato mamata ma ongake hawane ape lato he kakak alia lato, “Seilon tenen lahan ka aupol ma laman hong usi kakaian?”

Jises haewia tel seilon spirit lialun kapiti hahalialu

Mt 8:28-34; Mk 5:1-20

²⁶ Jises ma tesol kahikahin lang hani texux xux Gerasa, i liai tepaun ti kanitax Galili onote texux xux Galili. ²⁷ Ti lato tahi haniwa peixux, Jises mosua ape i apatuini tel seilon spirit lialun kapiti hahalialu. Pate kuewen i tai sosos maia ma tin i kum toto ixux, totonan he amal. ²⁸ Ti i ningahiwa Jises, i tang ausini ape i lokuha mateiwaun. I tilol ukek, “Jises, tel Nati Haeu pate tuah, lehe o aile la hani nga? Nga kamei eliel o, kum aile hahalialu ngal” ²⁹ I kak ukek nake Jises kakanewen spirit lialun ien ka i ahuta xaxaua ti tel seilon. Kemuk spirit lialun ien kapiti halialu hakilawen i. Kalak na laha peteni tel seilon ien ma xinoti kongini minan ma aen ani sen, i xaputi uke. Ape spirit lialun kapiti hakiliwawa i hani he lohong.

³⁰ Jises kamei i, “Axam la?”

I pahoi ukek, “Axak Kilan.” I kak ukek nake kilan spirit lialun ingangai tel seilon ien. ³¹ Teka spirit lialun kamei talingoi Jises, “Kum towi xoxoini amite hani tesol ti hahitake tehu pon ie ti kaui kawatan.”

³² Tesol kilai pou exiex ngixi maunten xohixohin kapi tesol ien. Ape tesol spirit lialun kamei eliel Jises, “Talo haniwa amite leili tesol pou!” Salan, i sowini hani lato. ³³ Lato ox sohotua ti tel seilon ape lato soh hani leili tesol pou. Hatesol pou ien kiliwau mosua ti he sahikekean tamus hani itax ape lato waut mat.

³⁴ Teka ngahatiai tesol pou ningahiwa, lato kiliwau kaxi sawateni waliko ti i sosohot hani teka seilon ti taon ma toan tewau tewau ti ien. ³⁵ Teka seilon nahih paxai waliko ti i sosohot. Ti laha xohi haniwa

kapi Jises, laha ningahi ka tel seilon kemuk spirit lialun kapiti hahalalu, i toto kapi ae Jises. I hina puxux ma namilon tin ape solian. Ape laha mamata.³⁶ Teka seilon laha ningahiwen ti Jises haewia tel seilon spirit lialun kapiti hahalalu, laha kaxi harai teka seilon liai laha nahir paxaiai waliko ti i sosohot.³⁷ Ti laha hongoa, teka seilon ti Gerasa kamei Jises ti ku salilialaha nake laha mamata hawane. Kakanua Jises ma tesol kahikahin ku hani he koap ape lato apepeas ti lang.

³⁸ Tel seilon teka spirit lialun ox sasaliliwa, i kamei eliel Jises na i kuoxi lato. Tuah Jises hone i ukek,³⁹ “Kumahe, alia haniwa tonam ape kaxiwa waliko solian Haeu aile haniwen o.” Tel seilon hong usi kakai Jises ape i nahir kaxi hani lawe seilon leili tehu taon waliko ti Jises aile haniwen i.

*Nati Jairus ma tel hehin tinun
Mt 9:18-26; Mk 5:21-43*

⁴⁰ Ti Jises tahia alia haniwa liai tepaun ti kanitax Galili, teka seilon pate laha amuan nake hoi laha to atetengi i.⁴¹ Ti ien tel seilon axan Jairus tahiamma. I tel ti tesol masiwi ti synagog. I lokuha hani itan kapi ae Jises ape kamei eliel i ka kahitiwa i hani ingan.⁴² Natun telawe hehin ahangun huopanum huohu, i pate tinun sikole i mat. Ape Jises nahir kahiti Jairus.

Kilan wanen seilon nahir pisipis kapin.⁴³ Ti leili kilai seilon, tel hehin i hina nax ti sale tapunaun leili ahang huopanum huohu. I paxaiwen kilan dokta. Monium tua tapo ti ukei huhual tuahe i to lialu tatalewa.⁴⁴ I ngasoha hani muhiwai Jises ape i soti ngixi puxuaun. Hahutuia hawane naxe tinun tapo.

⁴⁵ “Aita tel soti nga?” Jises kameawa. Teka laha hong ti i kamekam laha ukek laha tai soti i.

Ape Pita hone i, “Tel masiwi, kilan seilon nahir pisipis kapim.”

⁴⁶ Tuah Jises ukek, “Tel seilon sotiwen nga, kumahe ka i tua soti nake nga ilameni hina poh i ahutawen tetak.”⁴⁷ Ti tel hehin paxai tioiwa ka Jises tioi ka i tetel i soti puxuaun, i mamata xexex ape i lokuha hani itan kapi ae Jises. Ti puli lawe seilon i kaxi hani Jises salangawan ti i soti puxuaun ma ti i ewi hahutuia.⁴⁸ Jises hone i ukek, “Tel natuk, o ewiwen nake ti xoxoi namilom tetak. Nahir hawanenewa.”

⁴⁹ Ti Jises kaakane tutuen tel hehin, tel seilon tahiamma ti ingi Jairus ape i hone

Jairus ukek, “Tel natum i matewen, kum hakalakala nanahiai tel masiwi.”

⁵⁰ Ti Jises hongoa, i hone Jairus, “Kum namiloi hahalapa, tua sohoa tetak lehe tel natum i moih alia.”

⁵¹ Ti Jises tahia haniwa ingi Jairus, lon kum al seilon kilan kahiti i hani leili ing mewenae tolu kahikahin Pita, Jeims, Jon ma tel tame tel akaik ma tel tinan.⁵² Kilan seilon laha tang tatahane tel akaik. Jises ukek, “Kum tatangixi tel akaik, i tai mat, i tua mamatih.”

⁵³ Tuah laha hatesol mal soxeni Jises nake laha tioi ka tel akaik i matewen.⁵⁴ Jises akeni mini tel akaik ape i ukek, “Tel natuk, xahatale!”⁵⁵ Tataen ien wanen tel akaik moih alia ape i xahat. Jises hone laha, “Axiwa anan.”⁵⁶ Tel taman ma tel tinan ningahiwa, lalu ongake hawane. Ape Jises hone lalu, “Kum kakaxi hani tel na seilon waliko ti i sohotuen ie.”

9

*Jises talo huopanum hua aposel
Mt 10:1-15; Mk 6:7-13*

¹Jises ilowi apuhini huopanum hua aposel ape i axi lato poh ti xaxaweniai spirit lialun ma nax tenen tenen ti teka seilon.² Ape i talo lato kaxiai meng solian ti Haeu neini seilon ma haewiai teka tinun.³ I hone lato ukek, “Kum lua hehetekie tenen na soxi. Kum kakau kuiamondo, moni, kak, an ma sohiai sosomuto.⁴ Amuto toa leili ing teteahu na laha waxy auni amuto atengi tataen amuto nahir salili tesol ien.⁵ Na teka seilon kum waxy auni amuto ma kum hong amuto, tapahiwa anele aemuto ape nahir saliliwa tesol ien. I kola ukek ka teka seilon ien imuh laha kau kawatan nake laha kum hong kakai Haeu.”

⁶ Ape tesol aposel nahir kakaxi meng solian ti Jises hani toan tewau tewau ma hahaezia teka seilon tinun.

*Herod Antipas tataxini
Mt 14:1-12; Mk 6:14-29*

⁷ Ti Herod tel masiwi ti Galili hong tuanahiai waliko ti Jises ma tesol aposel ailele, pate i tataxini nake hina seilon ukek ka Jon Baptis moih aliawen.

⁸ Teka liai ukek ka Elajja take aliawen ma teka liai ulea ukek ka tel ti teka kuluiai kakai Haeu liai ti kuewen moih aliawen.

⁹ Herod ukek, “Nga tioi ka Jon Baptis matewen nake nga honewen tel unauk koti xaxaweniai kinawen. Lehe aita ulea tel

nga hongohong i ailele tesol waliko lalap?"
Ape pahan i paxai Jises.

*Jises axi ani seilon akulai 5,000
Mt 14:13-21; Mk 6:30-44; Jn 6:1-14*

¹⁰ Tesol huopanim huhua aposel tahiia aliamma ape lato kaxi hani Jises lawe waliko ti lato ailewen. Muhin ien i hakahita lato hani tesol xohixohin ti tehu taon Betsaida lehe mewenae lato. ¹¹ Tuahé kilan seilon laha hongoen tetesol Jises ma tesol aposel lua hahaniwa ape laha kahiti lato. Jises paxai amuke laha. I haewia teka tinur ma hanau teka seilon sale nenein ti Haeu. ¹² Ti ape alohah, tesol huopanim huhua aposel nahih hani kapin ape lato kakane i ukek, "Taloa teka seilon hani toan ti palieh lehe laha ngah an ma tone matihuun nake tap toan ie."

¹³ Jises hone lato ukek, "Puki amuto axiwa analaha."

Ape lato ukek, "I kum pon! Toi amite ie tepanimawe bret ma huok xixi. Nakon paham amite towi halapa moni ti kahuiai an ape hani teka kilai seilon ie?" ¹⁴ Mongohe teka seilon ien 5,000, tai wexe teka hehin ma akaik.

Jises hone tesol kahikahin ukek, "Hatona seiwa teka seilon hani 50 ti tesol tesol."

¹⁵ Ape hatesol seilon to. ¹⁶ Jises waxi tepanim bret ma huok xixi. I pax hani patul ape i kak kemulik hani Haeu ti tesol an. I wiki ape i hani tesol kahikahin sei haniwa lawe seilon. ¹⁷ Laha hatesol ang ahoi hawane ape huopanim huoho po moxe an ti tesol kahikahin Jises apuhiniwa.

*Pita tioi ka Jises i Krais
Mt 16:13-20; Mk 8:27-30*

¹⁸ Ngain tehu Jises lolotu mewenae i ti i kapi tesol kahikahin. I lotu kewa ape i kamei lato, "Kaxi hanima nga, teka seilon laha ukek nga aita?"

¹⁹ Lato pahoi i ukek, "Teka ukek o Jon Baptis, teka liai ukek o Elaija ape teka laha ukek ka o tel ti teka kuluiai kakai Haeu liai ti kuewen i moih aliawen."

²⁰ Ape Jises kamei lato, "A puki amuto? Amuto ukek nga aita?"

Pita pahoi i ukek, "O Krais, tel Haeu taloma."

*Jises kak kilami matean
Mt 16:21-28; Mk 8:31-9:1*

²¹ Muhin ien Jises hone tesol kahikahin ukek, "Kum kakaxi hani tel na seilon ka nga se Krais." ²² Tin i kakane lato ukek, "Nga tel Nati Seilon, nga kau kilan kawatan ma

moloan lalap. Ape teka masiwi ti teka Ju, teka masiwi tuah ti hukuminiai Haeu ma seilon, ma teka hanaui nauna ti Moses, laha watakai hawane nga. Laha telei nga tuahé muhi ngain tolulu xahat alia."

²³ Ape Jises kakane hatesol seilon ien ukek, "Na seilon pahan sohot kahikahik, laha kum namiloi wawaxi mewenae laha. Laha kaua kawatan masin ti nga kakau. Ien i kola ka laha kahikahik wanen. ²⁴ Seilon teka namilolaha mewenae hasolai tonalahi ti itan ie, laha kum tunahi tonain kapi Haeu. Tuahé teka na laha hana tonalahi hahitake nenein ti Haeu nake nga, laha tunahi tonain kapi Haeu ti tap tahai tapoan. ²⁵ Na tel seilon hapono hatapo i waliko ti itan ie tuahe i liio tonain kapi Haeu, solian la i uke? Tap. Tap tenen waliko kahui uke tonain kapi Haeu. ²⁶ Na tel seilon hien puluhini nga ma kakaiak, nga tel Nati Seilon tin nga hien puluhini i taen ti nga alia hetekiema poh ma xewai tel Tamak Haeu ma tesol engel, spirit solian tetan. ²⁷ Nga kaxi hawane hani amuto, teka ti amuto ie, imat ti amuto mat amuto ningahi Haeu i neini seilon."

*Tanome Jises sohia hawane
Mt 17:1-13; Mk 9:2-10*

²⁸ Muhi puasain tehu kewa, Jises hakahita tolu kahikahin Pita, Jeims ma Jon hani he tehu maunten patul lehe lato lotu. ²⁹ Ti Jises kakak kapi tel Taman Haeu, kawan sohia ma tehu puxuaun i xeu papaxaxu hawane.

³⁰ Moses ma Elaija take hahutuia hani kapi lato. Puxuaulalutin xeu papaxaxu hawane.

³¹ Ape lalu kakak kapi Jises sale matean leili Jerusalem ti i hapoponowi namili tel Taman Haeu.

³² Pita ma huhua tuaun matih luhuen. Ti lato haiwa, lato ningahi xewai kamai Jises hetekie Moses ma Elaija. ³³ Ti lehe lalu salili Jises, Pita kak ukek, "Tel masiwi, pate ewi ti kako ie. Amite atai tolulu houha, tehu tetam, tehu ti Moses ma tehu ti Elaija." I kak ukek ien nake i ongake hawane ape i kum tioi tenen na i kak.

³⁴ Lokon ti Pita kakak tutuen, teik maun man atuhu lato ape tolu kahikahin Jises lato mamata hawane.

³⁵ Ape kakai Haeu i ahuma he maun ien i ukek, "Tetel se Natuk, tel nga kilamiwen. Hong usiwa kakaian." ³⁶ Ti Haeu kak kewa, lato ningahi mewenae Jises tutu. Tolu kahikahin kum kaxi hanimu tel na seilon waliko ti lato ningahiwen.

Jises haewia tel akaik spirit lialun kapiti hahalalu

Mt 17:14-21; Mk 9:14-29

³⁷ Ngaini liai tehu, Jises ma tolu kahikahin nahih mosulih he tehu maunten. Kilan wanen seilon apuha hani kapi Jises. ³⁸ Tel ti laha tiloa, “Tel masiwi, nga kamei eliel o tahanema tel natuk wawan, natuk se telawé ien! ³⁹ Lawe na spirit lialun soh haniwa tel natuk, i haxexe hangaxangaxa ape pok sal he awan. Spirit lialun ien lawe i to aile hahalalu tel natuk. ⁴⁰ Nga kamei eliel hawane tesol kahikahim ti xaxaweniai spirit lialun ien tuahe lato kum pon.”

⁴¹ Jises hone laha hatesol ukek, “Amuto teka seilon ti aope ie, tap namil xoxoan ti Haeu ma woumuto pate lialun! Nga hanau kueiniwen amuto. Kaie kuehuan ia pahamuto nga to kapimuto lehe namilomuto i xox tetak? Ati hanima nga tel akaik!”

⁴² Ti tel akaik nahih xohi haniwa kapi Jises, spirit lialun aile haputa hahaxexe i. Tuahé Jises usi xaxaweni spirit lialun ien ape i haewia tel akaik. Muhiñ ien i aliakte tel akaik hani tel taman. ⁴³ Ape teka seilon paxai ongainen hawane pohe Haeu.

Jises kak ulea sale matean

Mt 17:22-23; Mk 9:30-32

Ti teka seilon ongangake tutuen lawe waliko ti Jises ailewen, Jises hone tesol kahikahin ukek, ⁴⁴ “Hong konginiwal! Nga tel Nati Seilon, laha hangaini hani he mini teka seilon laha watakai hawane nga.” ⁴⁵ Tuahé tesol kahikahin kum xeu waliko ti i kakak. Haeu tai haxewa hani lato salang-gawe kakain ien. Lato mamata kameiai Jises waliko tetenen.

Aita tel pate tuah?

Mt 18:1-6; Mk 9:33-37

⁴⁶ Tesol kahikahi Jises he hapatapat aita tel pamu tuah ti lato. ⁴⁷ Jises tioi waliko ti lato nanamiloí ape i waxi hatuhu tel akaik hani papan. ⁴⁸ I ukek, “Tel na i waxi auni akaik masin ie nake nga, se i aumini nga. Ape tel i waxi auni nga, i waheni tel Tamak Haeu, tetel i taloma nga. Tel na i teheni i ape i huali seilon liai, tel seilon ien Haeu namiloí ukek ka i pate tuah.”

Seilon tepaun ti Jises

Mk 9:38-41

⁴⁹ Jon tel kahikahi Jises kakane i, “Tel masiwi, amite ningahi tel seilon i xaxaweni spirit lialun hahitake axam. Tuahé i

kumahe tel ti kako ape amite honewen i ka kum ailele.”

⁵⁰ Jises ukek, “Kum hahalini i nake tel na i kum pahoxai kako ti pupuasakako, i teapaun ti kako.”

Teka Samaria kum waxi auni Jises

⁵¹ Pate ape i xohiwen ti Haeu waxi aliakte Jises hani tonan. Aile ape namili Jises i xox ka i lua hani Jerusalem. ⁵² I talo teka seilon nahiwa imat tetan hani tewau toan ti Samaria, apeseniai lawe waliko pake i ma tesol kahikahin tahiawa. ⁵³ Tuahé teka seilon ti tewau toan ien, laha kum waxi auni Jises ma tesol kahikahin nake laha tioi ka lato nahih hahaniwa Jerusalem. Teka Samaria laha watakai na teka Ju lotu leili Jerusalem. ⁵⁴ Ti hua kahikahin Jeims ma Jon paxaiwa woulaha, lalu ukek, “Tel masiwi, nakon o waheni na amili kamei Haeu hamosulih ah ti tonan lehe i lui laha?” ⁵⁵ Tuahé Jises kahiloloi lalu. ⁵⁶ Ape Jises ma tesol kahikahin nahih hani tewau toan liai.

Sale kahitiae Jises

Mt 8:19-22

⁵⁷ Lokon ti Jises ma tesol kahikahin nanahiwa he aweisal, tel seilon hone Jises, “Tesol tesol na o nahih, nga kahiti o. Nga lawe kahikahim.”

⁵⁸ Tuahé Jises hone i, “Sinen hina walun ma maniux hina ingan, tuahe nga tel Nati Seilon, tap tuahe tesol na tone hanawaiak.”

⁵⁹ Ape i hone tel seilon liai, “Kahitima nga. Pahak o kahikahik.”

Tuahé tel seilon ien hone i, “Tel masiwi, nga aumini tel tamak lehe na i matewa nga tihini.”

⁶⁰ Jises ukek, “Teka seilon kumahe ti Haeu laha masin seilon maten. Tiliwen teka ien tihiniai teka maten. Tuahé o nahih kaxi sawateniwa meng solian ti Haeu neini seilon.”

⁶¹ Tel seilon liai ukek, “Tel masiwi, pahak nga kahikahim tuahe imat nga to tapein-imu tesol akikik.”

⁶² Tuahé Jises hone aliakte i, “Tel na i kum aile matuhini puase Haeu, liai i kum tapai ailei tenen puasain ien ma kaxi sawateniai meng solian ti Haeu neini seilon.”

10

Jises talo 72 kahikahin

¹ Muhiñ tel Masiwi Jises kilami 72 kahikahin liai ape i talo lato hua hua imat tetan hani lawe taon ma toan ti i namiloí na i nahiwa. ² I kakane lato, “Kilan seilon laha xohixohin ti lehe laha sohot

kahikahik. Laha masin kilai an ti he kin i apeasawen. Tuahē seilon ti apuhiniae an, teka ti neinialaha hani Haeu, laha pate palai. Kameiwa Haeu lehe i talo palahi seilon ti neiniae seilon liai lehe laha sohot kahikahik.³ Ape nahiwa! Nga talo amuto hanowi sipsip uluha hani leili teka sinen tumulaha kalimen.⁴ Na amuto nahiwa, kum kakau moni ma kak. Tin kum ngah hahasea axahe aemuto. Kum tu kak kukue kapi seilon ti na amuto apatuini he aweisal.

⁵ “Na amuto soh hani ing tehu, amuto kak kewak, ‘Amuam ti Haeu hani amuto.’⁶ Na seilon ti leili ing tehu ien waxy auni amuto, amuto haniwa laha amuam ti Haeu. Na laha kum waxy auni amuto, amuam ti Haeu i alia hani kapimuto.⁷ Na tel seilon waxy auni amuto, toa leili ingalah, kum sos ahahu. Kum wawatakai aniae an ma unumiai unum ti na laha hani amuto nake seilon ti laha pupuas laha aka kahulaha.

⁸ “Ti na amuto tahia haniwa tehu taon ape laha ilowi amuto, tua aniae an tenen na laha axi amuto.⁹ Haewiawa teka tinun leili tehu taon ien ape kaxi haniwa laha ka taun ti Haeu neini laha ape i xohiwen.¹⁰ Tuahē na laha kum ilowi amuto, nahi saliliwa laha ape kaxi hatakei haniwa lawe seilon ti tehu taon ien kewak,¹¹ ‘Amite tapahi xaxaweni hepekeun he anele aemite. I kola ka amuto kum waxy auni seilon ti Haeu, aile ape i axi kawatan hani amuto. Amuto hasaliawen nenein ti Haeu.’¹² Nga kakane hawane amuto, tehu ngaini ti hinitiae seilon, Haeu axi kawatan hani laha, i xoini kawatan ti i hani teka seilon lialun ti Sodom.”

Taon ti laha kum soh Jises

Mt 11:20-24

¹³ Ape Jises kakak sale tolulu taon i aile kilan waliko tenen lalap. I ukek, “Teka seilon ti Korasin ma Betsaida, Haeu axi kawatan hani amuto. Na nga aile hanila teka Taia ma Saidon waliko tenen lalap ng aile haniwi amuto, teka Taia ma Saidon laha towiahu kueiniwen ti lialui woulaha kalak laha kumahe Ju.¹⁴ Aile ape tehu ngaini ti hinitiae seilon, Haeu axi kawatan hani amuto i xoini kawatan ti i axi teka Taia ma Saidon.¹⁵ Ape teka seilon ti Kapenaum, amuto namilo i ukek ka Haeu samenii amuto tuahē Haeu towi xoini amuto hani tesol ti kauai kawatan tap tahi tapaoan. Kalak amuto ningahien waliko tenen lalap ng ailele, amuto kum towiahu ti lialui woumuto hani Haeu.”

¹⁶ Jises kakane tatale teka kahikahin ukek, “Tel ti na i hong usi kakaiamuto, tin masin i hong usi kakaiak. Tuahē tel ti na i kum nam waxyi kakaiamuto, tin masin i kum nam waxyi kakaiak. Ape tel ti na i kum nam waxyi kakaiak, i kum nam waxyi Haeu tetel i taloma nga.” Jises tiliwa kakaian ape 72 kahikahin lato nahih aile waliko ti Jises tatalo lato ailean.

Aliae teka 72 kahikahi Jises

¹⁷ Imuh teka 72 kahikahi Jises alia hani kapin. Hetekie lalape amuam lato ukek, “Tel Masiwi, taen spirit lialun laha hong amite na amite xaxaweni laha leili seilon ti hahitake axam.”

¹⁸ Jises hone lato, “Ti amuto xaxaweni spirit lialun, i kola ka Haeu to xoxoini Satan. Ien masin wanen usil xepalih he maun.¹⁹ Nga axiwen amuto pohe Haeu. Aile ape kalak amuto tuhi tunahi noh ma na mini anepapap, i kum hamange amuto. Tin masin amuto xoini pohe Satan ape tap tenen i pon konginiae hatesol waliko Haeu namilo peleiwen hani amuto.²⁰ Solian ti spirit lialun hong usi kakaiamuto tuahē pamu amuto amuamua nake Haeu hana konginiwen axamuto ti ukei tonain kapin ti tap tahi tapaoan.”

Jises kak kemulik hani Haeu

Mt 11:25-27, 13:16-17

²¹ Holi Spirit hanamiloa Jises ape i kak hetekie amuam i ukek, “Tel Tamak Haeu, Masiwi ti lawe waliko ti patul ma tehu pon itan ie, nga kak kemulik hani o nake o mumuneni pohem ti teka laha sokok laha seilon aneso ape o haxewa hani teka laha hana laha hahitake ngahat tetam masin teka aikaik. Nga kak kemulik hani o tel Tamak Haeu nake paham i sohot ukek ien.”

²² Jises hone teka seilon ukek, “Tel Tamak Haeu hani hatapoen nga pohen ma anesoan. Mewenae tel Tamak Haeu tioi hawane nga tel Natun ma mewenae nga tel Natun tioi hawane tel Tamak Haeu. Ape nga tel Natun nexi haxewa tel Tamak Haeu hani teka seilon ti nga kilami.”

²³ Ape Jises kakane mewenae tesol kahikahin i ukek, “Tanusik amuto ka Haeu hani amuto ningah waliko tenen lalap.

²⁴ Nga kakane hawane amuto, kilan teka kuluiai kakai Haeu ma teka masiwi ti teka Ju, pahalahaa paxaai waliko tenen lalap ti amuto ningahien nga ailele tuahē laha tai ningahie. Tin pahalahaa hongoi waliko ti

amuto hongohong nga kakaxi tuahe laha laha tai hong.”

Menge tel seilon solian ti Samaria

²⁵ Lokon ien tel ti teka hanau nauna ti Moses kamei pisi Jises. I ukek, “Nga aile la lehe nga uke tonain kapi Haeu tenen tap tahi tapoan?”

²⁶ Jises kak pahoi ukek, “Tesol nauna ti Moses kak ukek ia sale ukei tonain kapi Haeu tenen tap tahi tapoan? O namiloi ukek ia kakain ien?”

²⁷ Tel seilon pahoi ukek, “Nauna ti Moses kak ukek, ‘Waheni hawanewa Haeu tel Masiwi ti amuto, xoiniwa ti amuto waheni teka seilon liai. Amukewa Haeu ti leili tiamuto, namiloi eliel hawanewa i ma aile hatapoa puasam ti hatesol kuimuto. Ape waheniwa seilon liai hanowi ti amuto waheni aliake amuto.’” (*Deut 6:5; Lev 19:18*)

²⁸ Jises ukek, “Kakaiam salan. Aile kewak ien ape o uke tonain kapi Haeu tenen tap tahi tapoan.”

²⁹ Tel hanaui nauna ti Moses i tioi hawane ka kumahe i waheni lawe seilon ape i kamei Jises, “Tuahe aita tel seilon liai o ukek nga waheniwa hanowi ti nga waheni aliake nga?”

³⁰ Jises hapuasa tenen meng ti pahoiai tel seilon ien. I ukek, “Telao tel seilon nanahih ti Jerusalem hani Jeriko. Teka seilon lialun kouihahutua i ape laha waxy hatesol monium ma soxian. Laha xai hakimatura i ape nahih salili i he aweisal.

³¹ “Imuh tel Masiwi ti hukuminiai Haeu ma seilon nanahih he aweisal ien. I paxaiwa tel seilon engeeng ien ape i non salia hani liai tepaun. I tai huali.” ³² Muhin tel puase leili Ingi Haeu nahima, i ningahi tel seilon ien ape tin i non salia hani liai tepaun. I tai huali.

³³ “Tapeinan tel ti Samaria nahima. Amuto tioi wasole teka Ju ma teka Samaria kumahe ewi. Ti i ningahiwa tel Ju mangein, i tahane hawane.” ³⁴ I kiliwau tamus hani kapin. I tihii wel ma waen hani he naxonaun ape i pulai. Muhin ien i hana tel seilon hani patul’ he tok tupun donki. I hakahita hani leili tehu ingti tone hanawain ape i auni.

³⁵ “Ngain liai telao i hani tel tame tehu ing moni ape i ukek, ‘Auniwa tel seilon mangein. Na o hapuasa akulai lape moni ti nga hani o, nga saiti na nga aliama.’”

³⁶ Ape Jises tili kakaian ukek, “O namiloi ukek ia? Aita tel ti tolu seilon ien kola

ka i waheni tel seilon mangein hanowi ti i waheni aliake i?”

³⁷ Tel hanaui nauna ti Moses pahoi ukek, “Tel i kola tatahan tetan.”

Ape Jises ukek, “Nahiwa ape aile ukenewa.”

Jises lawai Mata ma Mary

³⁸ Ti Jises ma tesol kahikahin lua hahaniwa Jerusalem, lato tahia tewau toan. Ti ien tel hehin axan Mata ilowi lato hani ingan. ³⁹ Tel tuai Mata axan Mary i to onote ae Jises tel Masiwi ape i to hongohong mengon. ⁴⁰ Tuah Mata pate i namiloi halapa apeseniai an ape i hone Jises, “Tel masiwi, nakon o kum nam waxi ka Mary hani lioi nga ailei hatesol puasain? Ewi na o hone i nahima hualiaik?”

⁴¹ Tuah Jises tel Masiwi ukek, “Mata, pate o namiloi kasini lawe waliko.” ⁴² Tuah tenenawé waliko pate tuah. Aope ie Mary ailele. Aile ape nga kum kongini i.”

11

Jises hanau sale lotu

Mt 6:9-13, 7:7-11

¹ Ngain tehu Jises nahih lotu hani tesol ti mewenae i. Ti i heisawa, tel ti teka kahikahin nahima ape i ukek, “Tel masiwi, Jon Baptis hanau teka kahikahin sale lotu. Pahamite tin o hanaua amite sale lotu hani Haeu.”

² Jises hone lato, “Na amuto lotu, amuto kak kewak:

“Tel Tamamite Haeu,
amite sameni o nake o pate tuah wanen.

Pahamite o neiniwa ma ngahatiwa amite.
Hualima amite usiam hanowi tetesol lato
kapim
leili tonam.

³ Axima amite an tapai ti ngain tehu tehu.

⁴ Oxoxiwa amite ti kawatan ti lialui woumite
masin ti amite oxoxi seilon liai ti
kawatan
ti waliko lialun laha aile hani amite.

O kum hahani amite totohong ailan
lehe amite kum aile saun lialun.

Ape awaiwa amite ti Satan ma
teka spirit lialun tetan.”

⁵ Ape Jises hanau aheke lato sale lotu ape i kaxi hani lato tenen meng ie. I ukek, “Na tel ti amuto nahih hani ingi tel lawan ti luhui ipong ape i ukek, ‘Aximuma nga teik na an.

‘Tel lawak tahiawen leili ingak a nga tap wanen an na nga axi i.’”

⁷ “Tuahe tel lawan wixima leili ing ukek, ‘Kum hakałakala nga. Aweing ape konginan ape amite hatesol mamatih. Nga kum hualim o teteuh.’ ⁸ Nga kakane amuto, kalak i kum xahat hualian nake se lawan, i huali na i kamei talingo.

⁹ “Tin masin na amuto lotu, amuto kamei talingo iape Haeu hani amuto waliko ti amuto kakamea. Upia talingo iape Haeu huali amuto tunahian. Kikini talingo iape kahip ape Haeu hei hani amuto. ¹⁰ Teka na laha kamea, Haeu hani laha. Teka na laha upia, Haeu huali laha tunahian. Teka na laha kikini talingo iape kahip, Haeu hei hani laha.

¹¹ “Na natumuto kamea lato ang xixi, kaie amuto axi lato weiko? ¹² Na natumuto kamea analato peteta, kaie amuto axi lato wasiwasin? ¹³ Kalak woumuto lialun, amuto tioi, haniai waliko solian hani natumuto. Tuahe tel Tamamuto Haeu pate pamu soliani, aile ape i hani Holi Spirit kapitiae teka seilon laha kamei i.”

Pohe Satan ma pohe Holi Spirit

Mt 12:22-30; Mk 3:22-27

¹⁴ Ngain tehu Jises apatuini tel seilon i kum kak uke nake spirit lialun kapiti halialu i. Ti Jises xaxaweniwa spirit lialun leili tel seilon ien, ape i kak uke. Ti teka seilon ien ningahiwa laha ongake hawane. ¹⁵ Tuahe teka ti laha ukek, “I xaxaweniwa spirit lialun nake i kema poh ti Satan, tel masiwi ti spirit lialun.” ¹⁶ Teka liai laha kamei hataehu Jises ailei waliko tenen lalap lehe i kola ka Haeu taloma i.

¹⁷ Tuahe Jises tioi waliko ti laha nanamilo i ape i hone laha, “Na seilon ti xux texux laha tikela ape hil alia puki laha, texux xux ien i lialu tamus. Na tesol akikin lato hil alia puki lato, tesol akikin ien lato kum tu xox.

¹⁸ Amuto ukek ka nga hahapuasa pohe Satan ti xaxawenaiwa spirit lialun tetan. Tuahe na Satan hilei aliak i, nenein tetan i kum tu xox. ¹⁹ Amuto ukek ka nga usi xaxawenaiwa teka spirit lialun nake Satan hakui nga. Na masin ien, kaie Satan haniwen tesol kahikahimuto poh ti usi xaxawenaiwa spirit lialun. Puase tesol kahikahimuto i kola ka amuto puputa ka nga hahapuasa pohe Satan. ²⁰ Kumahae nga hahapuasa pohe Satan. Spirit ti Haeu axi nga poh ti usi xaxawenaiwa spirit lialun. I kola ka Haeu tel neiniamuto ape i tahiawen.

²¹ “Satan masin tel seilon kuin. Na paun tonawi ti peteniai tehu ingan, tap tel waxi

uke soxian. ²² Tuahe na tel ti pamu kuaian hilei tel seilon kuin ape i tike, i waxi hatapo paun ti peteniai ingan ape i sei soxi hani teka seilon liai. Se tin masin nga xoini Satan ape nga xaxaweni spirit lialun tetan ti leili seilon.

²³ “Tel na i kumahe tepaun tetak, i pa-hoxai nga, i tepaun ti Satan. Tel na i kum hualim iha neiniai teka seilon hani Haeu, i huuhiali Satan neini haselealaha ti Haeu.”

²⁴ Ape Jises kak tatale ukek, “Na tel spirit lialun ahuta ti tel na seilon, i nahih hani he lohong upiai tesol na i to. Tuahe i kum tunah. I kakane aliak i, ‘Nga alia hani leili tel seilon.’ ²⁵ Ape i alia tunah tel seilon ien, ape i masin tehu ing malaian ma tap tel ingangai. ²⁶ Ape i nahih waxi tepanim hua spirit lialun liai, pamu lialuan tetan ape lato hatesol soh hani leili tel seilon ien. Lato kapiti halialu i akulai ti imat.”

²⁷ Ti Jises kakak tutuen, tel hehin ti leili teka seilon ien tilol ukek, “Liai tel tinam amuam hawane nake o tel natun seilon pate tuah.”

²⁸ Ape Jises kak ukek, “Salan. Tuahe teka seilon laha hong ape usi kakai Haeu pamu laha amuam.”

Teka seilon pahahaha Jises kola pohen

Mt 12:38-42, 16:4; Mk 8:11-12

²⁹ Ti seilon kila tatalema, Jises kakane laha, “Amuto seilon lialun ti aope ie, amuto to lulungei nga ailei waliko tenen lalap lehe i kola ka Haeu taloma nga. Tuahe Haeu kola hani amuto tenenawe kolakol ie, waliko tenen i sohot hani nga masin wanen ti i sohot haniwen Jona tel kuluiai kakai Haeu.

³⁰ “Masin ti Jona to ngain tolulu leili tiai tok xixi lalap, nga tel Nati Seilon nga tin ngain tolulu leili amal. Waliko ti i sohot haniwen Jona, i kola hawane hani teka Niniva ka Haeu talo i hani laha kaxiai kakaian. Tin masin waliko ti sohot hani nga, i kola hawane hani amuto teka seilon ti aope ie, ka Haeu taloma nga kaxiai kakaian.

³¹ “Nga kakane amuto, tel hehin masiwi ti Siba luama ti xuxun pate xauxaun hongoi soliae nauna ti tel masiwi Solomon. Telao ngain ti Haeu hiniti seilon, waliko ti i aile i sului amuto nake amuto kum hong kakaiak kalak nga pamu tuah ti Solomon. ³² Tin masin saun ti teka seilon ti Niniva, i sului amuto ti tehu ngain ien nake laha towiawu ti saun lialun tataen ti Jona kaxi ahutiwa kakai Haeu hani laha. Tuahe amuto kum

towiahu ti lialui woumuto kalak nga kaxi ahuhuti kakai Haeu hani amuto. A nga pamu tuah ti Jona.”

Namili seilon masin tehu kamaian

Mt 5:15, 6:22-23

³³ Jises kak tatale ukek, “Tap tel i hakama tehu kamaian ape i atuhi ma na hana hani hahitake po. Mewenae i hakama hakea hani patul koukean lehe i haxewa leili ing. ³⁴ Namilomuto masin tehu kamaiamuto. Aile ape na namilomuto solian, amuto xuhai xewan ti saun solian. Tuah na namilomuto lialun, amuto xuhai tilokoi saun lialun. ³⁵ Amuto eliel kewak waliko ti amuto namiloi sale Haeu se salan, uke namilomuto leili lalape tilokoan. ³⁶ Na pahamuto tioi hawane Haeu, i haxewa hatapo hani amuto masin tehu xewai kamaiamuto i haxewa amuto.”

Jises watakai saun ti teka Parisi ma teka hanaui nauna ti Moses

Mt 23:1-36; Mk 12:38-40

³⁷ Ti muhi kakai Jises, tel Parisi ilowi i hani tehu angain. Jises nahih hani leili ingan ape i to ang. ³⁸ Tel Parisi ongaini ti i ningahi ka Jises tai nuhi minan imat ti i ang. Teka Parisi ma teka Ju liai, laha kum ang na laha tai nuhi minalahi ti usiai saun ti teka matahaun.

³⁹ Jises kakane i ukek, “Amuto teka Parisi, pate amuto haeliel nuhiai melal ti kap ma pelet tuah waliko ti amuto ani ma unumi ti leilon, amuto kema ti saun ti pipis ma halepelep. Saun tenen ier i ahutama leilomuto. ⁴⁰ Amuto teka taxitaxia! Haeu tanomi hahuonen melal ma leili lawe waliko. I tanomi tupuamuto ma leilomuto. ⁴¹ Ti leili atemuto, axiwa teka seilon waliko ti laha tap. Na amuto aile ukek, i kola ka amuto kum nam waxi ka auni hauniai waliko i pate tuah. Na masin ien, Haeu namiloi ukek amuto haun ma sawisawin.

⁴² “Amuto teka Parisi, Haeu axi hawane amuto kawatan. Amuto hani Haeu tenen ti huopanim soxihamuto masin kai pata ti hanamui an. Tuah amuto watakai Haeu ma kum aile saun solian hani seilon liai. Ala amuto aile hahuonen.

⁴³ “Amuto teka Parisi, Haeu axi hawane amuto kawatan. Amuto waheni tonain tuah leili synagog ma amuto waheni seilon kak sameniwa amuto ti puli lawe seilon.

⁴⁴ “Haeu axi hawane amuto kawatan. Amuto masin amal ti kumahe kilaman ape seilon tau nanahih patul ti tesol amal ien nake laha kum tioi ka waliko kohan leilon.”

⁴⁵ Tel ti teka hanaui nauna ti Moses hone Jises, “Tel masiwi, ti o kakane teka Parisi ukek ien, o hahiena hetekie amite!”

⁴⁶ Jises kak pahoi ukek, “Amuto teka hanaui nauna ti Moses, amuto tin Haeu axi hawane kawatan. Amuto lungei teka seilon usiai kilai nauna ailan tenen puki ti amuto tuah amuto kum solonga ti usiai tesol nauna ien ma kum hana minamuto hualiae teka liai.

⁴⁷ “Haeu axi hawane amuto kawatan. Teka tamamuto ti matahaun telei teka kuluiai kakai Haeu. Amuto tanomi hasolia hahawane amalulato a amuto kum usi kakaialato. ⁴⁸ Ti amuto kum usi kakaialato, i kola hawane ka amuto waheni teletele ti teka matahaun ti amuto aile haniwen teka kuluiai kakai Haeu. ⁴⁹ Nake ti tenen ien, ti anesoi Haeu hoi i kakawen ukek, ‘Nga talo teka kuluiai kakaiak ma teka aposel hani teka Israel. Laha telei teka ma aile halialu teka.’ ⁵⁰ Aile ape amuto teka seilon ti aope ie, amuto uke kawatan ti teleiai teka kuluiai kakai Haeu hutuima lokon ti Haeu tanomi tehu pon ie. ⁵¹ Hutuan ti teleiai Abel hanima tataen teleiai Sakaraia, tel laha telei wasole Ingi Haeu ma tone waliko ti teka seilon kau hani Haeu. Salan wanen, Haeu axi amuto kawatan ti hatesol teletele ien.

⁵² “Amuto teka hanaui nauna ti Moses, Haeu axi hawane amuto kawatan. Waliko ti amuto hahanau, i tiehi teka seilon ti tioi hawanei Haeu. Puki amuto, Haeu kum neini amuto ape tin amuto neini hasele teka ti pahalahaa Haeu neini laha.”

⁵³ Ti teka hanaui nauna ti Moses ma teka Parisi hongoa, lolaha lialu hawane. Hu-tui taen ien laha watakai hawane Jises ma kamei i kilan kamekame ailan. ⁵⁴ Laha kak hahika i lehe i kak waliko tenen laha pon suluuan.

12

Nauna ti Jises hani teka kahikahin

Mt 10:26-33, 10:19-20

¹ Lokon ien kilan wanen seilon apupuha. Pahalahaa wanen laha ngasoha hani kapi Jises ape laha pisipis hawane. Jises kakanemu imat teka kahikahin. I ukek, “Lepetenwa amuto ti teka Parisi nake leholaha huoka. ² Imuh Haeu hatakei hawane namili teka laha putini ka laha sellon liai tenen ti puki alia laha. Haeu hatakei lawe waliko ti laha mumuneni.

³ Ape waliko ti amuto kak lilikoheni, imuh Haeu kak hatakei hani lawe seilon. Kilan

seilon laha tunahi waliko ti amuto kaxi mumuneni hani teka seilon liai.

⁴ "Amuto teka kahikahik, nga kakane hawane amuto, kum maamata teka paha-laha laha telei amuto. Laha tua telei tupuamuto tuahé laha kum pon teleiai hatesol waliko ti leili namilomuto ma atemuto. ⁵ Mamatawa mewenae Haeu. I pon telei xoiniamuto hani tesol ti kaui kawatan tap tahi tapoan. Nga kaxi ulea ka Haeu tel amuto mamatawa.

"Amuto tioi ka moni kokol i pon kahuiai tepanip piakus nake lato pate naun. Tuahé Haeu nanamilo i lato hatesol. ⁷ Aile ape amuto kum maamata. Haeu namiloi ukek ka amuto pamu tuah ti piakus. Kalak taen ukumuto i tioi hatapo mongohuan.

⁸ "Nga kakane hawane amuto, na tel seilon i kak hei ti puli seilon ka i kahikahik, tin nga kaxi hani Haeu ma teka engel tetan ka i kahikahik. ⁹ Tuahé na tel seilon puluhini ti puli seilon ka i kahikahik, tin nga kaxi hani Haeu ma teka engel tetan ka i kumahe kahikahik. ¹⁰ Tel na i kak halialu nga tel Nati Seilon, Haeu oxoxi i ti kawatan ti saun lialun ien, tuahé tel na i kak halialu Holi Spirit, Haeu kum oxoxi i ti kawatan ti tenen saun lialun ien.

¹¹ "Na laha sului amuto hani teka masiwi ti synagog ma teka masiwi tenen tenen, kum hahakila namilomuto waliko tenen na amuto kak ti awaiamuto. ¹² Pake tataen ien ape Holi Spirit hanamiloa amuto waliko tenen na amuto kak."

Menge tel seilon kilan soxi ma tap namilon

¹³ Muhin tel ti leili teka kilai seilon ien kakane Jises, "Tel masiwi, honewa tel ukalak ka i seiwa wasolamili soxi ti tel tamamili mat lioi haniwen amili."

¹⁴ Jises kak pahoi i, "Tap tel kilamiwen nga aile hasawai wasolamulu." ¹⁵ Ape i kakane laha hatesol, "Lepetenawa amuto kum hale-pelep ti tenen tenen. Kalak mongohe soxi ti amuto hina, i kum pon i hasolia ma i hawelu tonamuto he tehu pon ie."

¹⁶ Ape Jises kaxi hani laha tenen meng ti hanaualaha. I ukek, "Tel seilon ti pate kilan soxi, i teik hepekeun ti an pate xex soli. ¹⁷ I kakane aliake i, 'Ing ti apuhiniae anak ape xuhan. Tap tonan liai. Kaie nga aile ukek ia?"

¹⁸ "I namiloi ape i ukek, 'Nga toi ha-puta teteihu ape atau tehu ing pamu lalap lehe nga hana hatapo anak ma soxiak hani leilon. ¹⁹ Nga apuhini hapono hawane lehe i

pon ti ahang kilan. Ape nga kum puas. Nga tua ang, un ma to amuam."

²⁰ "Tuahé Haeu kakane i, 'O pate tap namilom. O mat ipong teteihu ie ape seilon liai uke hatesol soxi'am.'

²¹ Ape Jises ukek, "Salan wanen, seilon tenen tap namilon i apuhini hakila soxi mewenae tetan a i kum aile waliko tenen Haeu namiloi ukek ka pate tuah."

Jises hanau sale namiloi hakilai waliko ma sale soxi

Mt 6:25-34, 6:19-21

²² Jises hone tesol kahikahin, "Aile ape amuto kum namiloi hahakila an ma so-somuto. ²³ Sale totonamuto seilon pamu tuah ti an a tupuamuto pamu tuah ti maia. ²⁴ Namiloi paxaiwa manixux. Laha kum seseini ma kum apupuhini an tuahé Haeu ngangahati laha. Nga kakane hawane amuto ka Haeu namiloi ukek amuto pamu tuah ti manixux. ²⁵ Kaie amuto pon hawelu ahekei tuahé na teik totonamuto ti amuto to nanamilo? ²⁶ Na amuto kum pon, tap salangawan ti amuto to nanamiloi waliko liai.

²⁷ "Namiloi paxaiwa sale xexei palawa. Laha kum pupuas sawitiae maia sosolaha! Tuahé nga hone amuto, kalak taen tel masiwi Solomon, sosen maia ma hatesol waliko solian tetan, i kum pon soliae palawa. ²⁸ Haeu tel i ngangahati pahoah, i ie tetelao ape letu laha lui xoini. Kaie kumahe pamu Haeu ngaghati aluluirini amuto? Amuto tap namil xoxoan hani i.

²⁹ Ape kum nanamilo i ukek, 'Kaie anak ma unumak nga kema ia?' Kum namiloi hahakila tesol waliko ien. ³⁰ Teka laha kum tioi Haeu, laha to namiloi hahakila tesol waliko ien. Tuahé tel Tamamuto Haeu tioi waliko ti amuto tap. ³¹ Haniwa i neini amuto ape ailewa waliko tenen i hamuamua i. Ape i hani amuto hatesol waliko ien.

³² "Amuto tesol kahikahik, kalak amuto palai ma kumahe pate kuin, kum maamata. Pake tel Tamamuto Haeu hani amuto neiniai seilon kapin.

³³ "Hangainiwa soxiamoto lehe amuto axi moni hani teka seilon totonalaha lialun. Hani hatapoia kuimuto ma namilomuto haniwa Haeu. Le masin ka amuto aapepeseni kahumuto ti tonan. Tesol ien tap tahi lialuan ma tap teka xuxuina. ³⁴ Namilomuto toi waliko tuah ti amuto, aile ape kewa Haeu kapitiae namilomuto."

Teka laha to atengi tel Masiwi

Mt 24:43-51

³⁵ Jises kakane teka kahikahin ukek, "Amuto apeasawa ailei puase Haeu.³⁶ Amuto hanowiwa teka seilon laha atetengi tel tame ing ti i aliamat i tehu sala. Lai laha apepeas heiai kahip ti i tahiama.³⁷ Ti tel tame ing paxai tunahiwa ka teka unauan to atetengi aliaian, lato uke kahulato. Nga kakane hawane amuto, puki i hatona lato ma axi analato.³⁸ Kalak na i tahiama ti luhui ipong ma na sikole letu ape i paxai tunahi lato to atetengi aliaian, lato uke kahulato.

³⁹ "Amuto hong matainiwa, na masin tel tame tehu ing i tioiwen lokon tel seilon ti xuxuina nahima, ala i ah peteni lehe tel seilon kum soh hani leili ingan.⁴⁰ Aile ape amuto kum luhuluh nake amuto kum tioi lokon wanen nga tel Nati Seilon aliaian."

⁴¹ Pita ukek, "Tel Masiwi, nakon kakaiam nanami mewenae amite teka kahikahim ka i nanami lawe seilon?"

⁴² Jises pahoi ukek, "Nga kakak tel na seilon i aile puase tel masiwi tetan. I hani i ngahatiai teka unauan lai ma axiai analaha ti taun ti angiaiin.⁴³ Ti tel masiwi tahiama ape i paxai tunahi ka tel unauan aile aluluini pupuasan, i axi kahun.⁴⁴ Nga kakane hawane amuto, i hani tel unauan ngahatiai lawe soxian.⁴⁵ Tuahne na tel unauan seilon lialun, i namiloi ukek, "Tel masiwi tetak aliaian kuen."⁴⁶ I hutui xaiai teka unauai tel masiwi hahitakan ape i tua ang ma un taxitaxia.⁴⁷ Imuh tel masiwi alia haongama tel unauan ien. Ape i axi hawane i kawatan. I towi i hani tesol ti teka laha kum hong tamani Haeu, tesol ti laha kau kawatan ma moloan lalap.

⁴⁷ "Tel masiwi axi i kawatan nake kalak i tioi puasain tetenen ala i aile, i tai puas usi.⁴⁸ Tuahne tel na i kum paxai tioi ka waliko i ailele se lialun, i uke kawatan kokol. Na Haeu hani halapa tel seilon, i amemene ka tel seilon ien hani aliake i tin lalap. Na Haeu hana tel seilon ngahatiai waliko tenen pate tuah, i amemene ka tel seilon ien ngahati aluinii akulai tetel Haeu hani i puasain tenen naun."

Axaii wasole seilon

Mt 10:34-36

⁴⁹ Jises kak ukek, "Nake ti tenen puasain Haeu haniwen nga aile he tehu pon ie, teka seilon solian ma lialun laha selaiia. Nga hahaxe sohotuan.⁵⁰ Tuahne imat ti i sohot, nga kau kawatan ma moloan lalap ape nga mat. Namilok i kum to alua, atengi

taen i tinama.⁵¹ Kum naminiloi ka nga tahiama hasoliai wasole seilon ti tehu pon ie. Kumahé, kakain nga kema ti Haeu i axi wasole teka naminolaha xoxoan hani Haeu ma teka laha kum soh kakaian.⁵² Aile ape teka seilon leili ing tehu laha he lungelung huak ape laha selaiia.⁵³ Tel taman pahoi tel natun wawan, tel tinan pahoi tel natun hehin ma hahuuhan tel pahoi tel."

Teka seilon woinkon laha tioi Haeu

Mt 16:2-3

⁵⁴ Jises kakane teka kilai seilon, "Na amuto paxai maun atai sai ahang, amuto ukek i ux ape salan.⁵⁵ Na aupol ahoma sai angiba, amuto ukek kekean tahiama ape salan.⁵⁶ Lehomuto huoka! Amuto tioi hunan na amuto paxai maun. Tuahne amuto kum tioi salangawe waliko ti i sosohot aope ie ma waliko ti nga ailele nake amuto putini ka amuto tioi Haeu.

Sale hasawiai wasol

Mt 5:25-26

⁵⁷ "Aile aluiniva naminolomo ti walikoten Haeu paxai ukek sawisawin.⁵⁸ Na tel i naminiloi suluiat tel ti amuto, hasawi koseniwa wasolamulu uke i hatuhi o hani puli tel masiwi ti hongoi meng. Ape i hana o hani mini teka laha kalabus i o.⁵⁹ Na i sohot ukek ien, o kum ahuta atengi o hamate hatapoa moni. Tin masin amuto hasawiwa wasolamuto ma Haeu, uke amuto kau kawatan ti lialui woumuto."

13

Jises hone teka seilon lioi xaxaweniai lialui woulaha

¹ Lokon ien hina seilon laha kakane Jises ka Pailat, tel kiliwakei texux xux Galili, i hone teka unauan teleiati teka seilon ti ien. Laha telei lato leilon ti lato kakau waliko hani Haeu leili Ingan.² Jises kak ukek, "Kum naminiloi ukekek ka sale matealato pate lialun masin nake woulato pamu lialuan ti teka seilon liai leili Galili.³ Kumahé! Tuahne na amuto kum towiahu ti lialui woumuto hani Haeu, tin amuto mat ape wasolamuto ma Haeu kum sawi.⁴ Ape tesol 18 seilon tehu ing lalap ti Siloam mahus telei lato, kum naminiloi ukekek ka lato mat ukek ien nake woulato pamu lialuan ti teka seilon liai leili Jerusalem.⁵ Kumahé! Tuahne nga kakane ulei amuto, na amuto kum towiahu ti lialui woumuto, tin amuto mat ape wasolamuto ma Haeu tin i kum sawi."

Menge tea pata i kum hua

⁶ Muhin ien Jises kaxi hani laha tenen meng hanaualaha waliko i sohot hani teteka tap pupuasalah ti Haeu. I ukek, “Tel seilon seini tea laku leili tesol kin. Lawe i to nahih papaxai na masin i huawen tuahue i tai huuwa. ⁷ Ape i hone tel ngahatiai kin, ‘Ahang tolulu nga atengi na tea pata i hua tuahue nga kum ninginah tehu na huan. Koti hamahusu xaxaweniwa! I tua hapuasa xoini hepekeun.’

⁸ “Tuahue tel ngahatiai tesol kin ukek, ‘Tilimuen, paxai ahekemua ahang liai tehu lehe nga ngahati hasolia aheke ape nga piei. ⁹ Sohin i hua ahang tehu toma. Na i kum hua, ien, koti xaxaweni.’”

Jises haewia tel hehin telao Sabat

¹⁰ Telao Sabat Jises hahanau teka seilon leili tehu synagog. ¹¹ Ti ien tel hehin spirit lialun kapiti hahalialu. Leili ahang 18 tehiton kakawin ma i kum hokaha ukek. ¹² Ti Jises ningahiwa, i tiloi tel hehin ape i ukek, “Nga aile haewia o.” ¹³ I hanawa minan patul ti tel hehin. Hahutuia hawane tel hehin hokaha ape i sameni Haeu.

¹⁴ Tel masiwi ti tehu synagog lon lialu hawane nake Jises haewia tel hehin telao Sabat ape i kakane teka seilon ien ukek, “Ngain tepanim tehu ailei puasain. Nahima leili tesol ngain ien lehe haewia amuto, kumahe telao Sabat!”

¹⁵ Jises tel Masiwi pahoi i, “Seilon lehomo huoka! Puki’ amuto pupuas telao Sabat. Amuto upati tupumuto manihuh ape hakahita axi unumalaha telao Sabat. ¹⁶ Tel hehin ie, tel kahi nati Abraham, Satan kapiti hahalialu leili ahang 18. Nakon lialun ti oxoxiai tel hehin telao Sabat?”

¹⁷ Kakaian hahienia teka lato watakai hawane i. Tuahue teka seilon liai laha amumuке soliai puasain ti i ailewen.

Menge waki lilieu

Mt 13:31-32; Mk 4:30-32

¹⁸ Jises ukek, “Nga kak kolongeni haxewa hani amuto sale nenein ti Haeu. ¹⁹ Ien masin tehu kokole waki lilieu tel seilon seini. Kalak i pate kokol, i xex lap ape i sohot tea pata lapalap wanen. Ngaxon lap hawane ape manixux atai ingalahia ien.”

Menge ist

Mt 13:33

²⁰ Jises kak ukek, “Nga kaxi ulei hani amuto sale nenein ti Haeu. ²¹ Ien masin teik kokole ist tel hehin waxi ape i talini hani

he palawa. Kalak teik ist kokol, i haxiwa palawa hatehu.”

Tewau aweing kane tone Haeu

Mt 7:13-14, 21-23

²² Ti Jises nahih tatale hahaniwa Jerusalem, i hahanau teka seilon leili toan ma taon tehu tehu. ²³ Tel seilon kamei i, “Tel masiwi, kaie palai seilon Haeu awai ti kawatan? Ti lialui woulaha?”

Jises pahoi i, ²⁴ “Amuto elielawa sohoi tewau aweing omiomin kane tesol tonain kapi Haeu ti tap tahi tapoan. Aweisal tetewau kumahe malimun. Kilan seilon laha tohongi hani ien tuahue laha kum pon.

²⁵ Tewau aweing kane tesol ien hean tutuen. Tuahue na tel tame tesol ien i keiti kahip, amuto teka amuto kum non usi tewau aweing omiomin, amuto tu melal kikini kahip ape kamea ukek, ‘Hei hanima amite kahip.’

“Tuahue i ukek, ‘Nga kum tioi amuto ma tesol amuto luama.’

²⁶ “Ape amuto ukek, ‘A amite ang ma un akati hakilawen o ma o hahanauen seilon leili taon ti amite.’

²⁷ “Ape i ukek, ‘Nga kakane tuhi amuto, nga kum tioi amuto. Xaxaua tetak amuto teka weli ailei saun lialun.’”

²⁸ Jises kak tatale ukek, “Ape taen ien amuto ningahi Abraham, Aisak, Jekop ma teka kuluiak kakai Haeu lato hatesol kapi Haeu leili tonan, a amuto, Haeu halini amuto soh. Aile ape amuto tang ma atlali nisumuto ti lialui lomuto ma ti lalape moloan. ²⁹ Kilan seilon laha ahuma xux tesol tesol ape laha to leili tehu angain lalap Haeu aepeseni leili tonan. ³⁰ Ape teka seilon kemuk teka liai paxai ukek pate naun, tataen ien Haeu paxai ukek laha tuah. Ape teka seilon kemuk teka liai sameni laha, tataen ien Haeu paxai ukek laha pate naun.”

Wawahen ti Jises hani teka Jerusalem

Mt 23:37-39

³¹ Lokon ien teka Parisi nahima ape laha hone Jises, “Lua saliliwa ie nake Herod Antipas pahan i telei o.”

³² Jises hone lato, “Nahih honewa Herod tel weli moleiae seilon ka nga xaxaweni tatale spirit lialun ti seilon ma haewia tatale laha. Tuahue kum kue nga hatapo tenen puasain ti Haeu hani nga aile. ³³ Tap tenen i kongini nga ti ailei tenen puasain ien ti tehu luaiak hani Jerusalem. Ti ien amuto telei kilan teka kuluiak kakai Haeu ape nga masin tel ti laha.”

³⁴ Ape Jises nameni teka seilon ti Jerusalem. I ukek, “Teka seilon ti Jerusalem laha hokai telei teka kuluiak kakai Haeu pot, teteka ti i talo haniwen laha. Nga tohongi hakilawen apuhini aumialaha masin mom hehin poni natun hahitake paun, tuahela watakai.” ³⁵ Aile ape Haeu lioi laha. I kum ingai tehu Ingan ape i kum to leili tehu taon kapi laha. Nga kakane hawane amuto, laha kum ningahi ulea nga atengi tataen laha ukek, ‘Kako amukewa tel i nahih hehetekiema poh ma solian ti Haeu.’” (Ps 118:26)

14

Jises haewia tel seilon telao Sabat

¹ Ngain tehu ti Sabat, Jises nahi ang hani ingi tel ti teka masiwi ti teka Parisi ape teka seilon ien paxai oti na i aile tenen ti na i pon lato sului i. ² Tel wawan leilolato hina nax tenen i haxekaxeka tini seilon. ³ Jises kakane teka Parisi ma teka hanauai nauna ti Moses ukek, ‘Ala amuto tioiwa ka nauna ti Moses kum hahalini haewiai seilon telao Sabat.’ ⁴ Lato tai kak pahoi na tenen. Jises aka soti tel wawan ien ape aile haewia. Muhiin ien i talo aliake.

⁵ Ape i kakane lato, ‘Na tel ti amuto tel natun ma na tok tupun manihuh put hani he kan wal telao Sabat, kaie amuto kum ahuti? Se amuto aile.’ ⁶ Tuahe lato kum tunah pahoi kakaiyan.

Menge tehu angiaian lalap

Mt 22:1-14

⁷ Jises ningahi ka teka seilon lato nahima ti tehu angiaian, lato upiup tonain tua. Ape i nau lato ukek, ⁸ ‘Na tel seilon ilowi o hani tehu angiaian ti sala, o kum upiup tonain tua uke laha ilowiwen tel seilon pamu masiwan tetam.’ ⁹ Na i sohot ukek ien, tel tame tehu angiaian hone o, ‘Hatahawa tonain ien haniwa tel seilon ie.’ Na i aile ukek ien o tahuнос ape o nahih to hani tonain kaliap.

¹⁰ ‘Pamu ewian na o to hanimu tesol tonain kaliap. Na tel tame tehu angiaian ningahi o ien, uke i hone o, ‘Tel lawak, nahih to haniwa tesol tonain tua.’ Na i sohot ukek ien, hatesol seilon ien laha ningahi ka tel tame tehu angiaian pate i aile aluin i hani o. ¹¹ Nga kaxi hahani amuto waliko ie nake Haeu teheni teka seilon ti hanasanas ape teka laha teheni laha, Haeu aile laha seilon tua.’

¹² Muhin Jises kakane tel Parisi i ilowi i ukek, ‘Na o aile angiaian lalap, kum ilowi mewenae teka lohum, teka akikim wanen ma teka seilon laha kilan soxi. Teka seilon ien i pon laha kahui aliake o.’ ¹³ Na o aile angiaian lalap, o ilowi hetekiewa teka seilon tap soxi, teka waxosi ma teka pulaxa. ¹⁴ Kalak teka seilon ien kum kahui uke hani o, Haeu kahui aliake hani o taen ti i xahateni teka seilon sawisawin ti matealaha.’

¹⁵ Tel ti leilolato hongoa ape i kakane Jises ukek, ‘Amuamui teka Haeu neini laha ma laha soh leili tehu angiaian lalap ti Haeu.’

¹⁶ Jises hongoa ape i kaxi hani lato tenen meng, i ukek, ‘Tel seilon apereseni tehu angiaian lalap ape i ilowi hakila seilon.’ ¹⁷ Ti i meiwa taun ti angiaian, i talo tel unauan honei teka seilon i ilowiwen nahima nake lawe waliko apeasawen.

¹⁸ ‘Tuahe laha hatesol aile ngah kakain tenen tenen lehe laha kum nahima. Tel i ukek, ‘Nga kahuiwen teik hepekeun. Pahak nga paxai kalisimu, aile ape nga kum nahima.’

¹⁹ Tel liai ukek, ‘Nga kahuiwen 50 nati pou. Pahak nga ailemu tiehialato, aile ape nga kum nahima.’

²⁰ Tel liai ulea ukek, ‘Nga sasalawa pate aope, aile ape nga kum nahima.’ ²¹ ‘Tel unaui tel tame tehu angiaian nahih alia ape i kaxi hani i hatesol waliko ti teka seilon kakawen. Tel tame tehu angiaian lon lialu hawane ape i hone tel unauan ukek, ‘Nahih haniwa lawe aweisal ti taon ape ilowima teka seilon tap soxi, teka waxosi ma teka pulaxa.’

²² ‘Tai kue tel unauan aliama ape hone i ukek, ‘Nga ilowiwen laha tuahe kilan totoan tutuen.’

²³ ‘Ape tel tame tehu angiaian hone tel unauan ukek, ‘Nahih haniwa aweisal melal ti taon ape eliel hawanewa ilowiai teka seilon hanima tehu angiaian lalap nake pahak tehu ingak i xuh.’ ²⁴ Nga kakane amuto hatesol ka teka nga ilowimu ape laha kong, tap tuahe na tel ti lato i soh leili tehu angiaian ien.’

*Kumahé malimun puas usiai saun ti Jises
Mt 10:37-38; Mk 9:50*

²⁵ Kilan wanen seilon kakahiti Jises. I toheawa ape i kakane laha ukek, ²⁶ ‘Na tel seilon pahan i sohot kahikahik, i waheni hawanewa nga xoiniwa ti i waheni taman, tinan, axoan, natun, ukalan, tuan ma puki alia i. Na tap, i kum pon kahikahik.’ ²⁷ Tel

na pahan kum is kaui kawatan masin ti nga kakau i kum pon kahikahik.

²⁸ “Na paham o sohot kahikahik, namiloi matalinimua nake kumahe puasain mal-imun. Masin tel na i atai tehu ing. Imat i to namiloi paxaimu ka hatesol waliko ti atai tehu ing i tapai.” ²⁹ Na i kum aile ukek ien, waliko ti atai tehu ing uke i tae. I tua hutui lioi a i kum huna. Ape teka seilon soxeni i.

³⁰ Laha ukek, ‘Tel seilon ie i hutui atai tehu ing tuahue i kum hahuna uke.’

³¹ “Tin masin tel masiwi ti hile. Na unauan ti hile pamu palaian ti tel lehe i hilei, i to namiloi aluinimu kapi teka masiwi hahitakan ka i waxaini a kumahe.” ³² Na lato ukek i kum waxaini, i talo teka seilon tetan hani kapi tel masiwi ti hile ti tepuan liai ti kak hasawiai wasolalalu.” ³³ Ape Jises tili kakaian i ukek, “Tap tel ti amuto i pon kahikahik halik i hani hatapo nga neini i.

³⁴ “Teka kahikahik wanen laha masin sol. Sol solian tuahue na taxian tetan i tapo, tap aweisal ti hataxia aliakean.” ³⁵ I ape tap pupuasan. Na amuto hina taxing ti hongoi kakaia, hong matainiwa lehe amuto xeu.”

15

Menge tok sipsip i nahih mitaxia

Mt 18:12-14

¹ Teka seilon waxiai moni hani teka masiwi ti Rom ma teka seilon woulaha lialun kewi laha nahih hani kapi Jises lehe laha hong na i hanau seilon. ² Tuahue teka Parisi ma teka hanau nauna ti Moses lato howini woun. Lato ukek, “Tel seilon ie i lawai teka seilon woulaha lialun ma i ang akati laha.”

³ Telao Jises kaxi hani lato tenen meng i ukek, ⁴ “Amuto namiloi ukek ia? Na tel ti amuto hina 100 sipsip ape tok i nahih mitaxia, hoi liai i nahih salili tesol 99 ape i nahih upia tok i mitaxiawen atengi taen i tunahi.” ⁵ Ti i tunahiwa i amuam hawane ape i kau tok sipsip he wahan hani tonan. ⁶ I tiloi apuhini teka lawan ma teka seilon ingalahua xohixohin, i ukek, ‘Amuam akatima nga nake nga tunahiwen tok tupuk sipsip i mitaxia.’ ⁷ Tin masin wanen Haeu ma teteka kapin leili tonan lato amuke tel seilon lialun na i towiahue ti lialui woun, i xoini ti na lato amuke tesol 99 seilon sawi-sawin pake laha hoi liai seilon sawisawin.”

Menge tehu moni i put kaluta

⁸ Jises kak ulea ukek, “Na tel hehin hina huopanim moni ape tehu i put kaluta, liai

i hakama tehu kamaian ape i upia mataini leili ing atengi taen i tunahi.” ⁹ Ti i tunahiwa, i ilowi teka lawan ma teka ingalahua xohixohin, i ukek, ‘Amuam akatima nga nake nga tunahiwen tehu moniuk i put kaluta.’ ¹⁰ Tin masin Haeu ma teka engel, spirit solian tetan, lato amuke tuahue tel na seilon lialun na i towiahue ti lialui woun hani Haeu.”

Menge tel seilon i sos salili tel taman

¹¹ Jises kaxi ulea tenen meng, i ukek, “Tel seilon natun hua akaik wawan.” ¹² Tel komuh hone tel taman, ‘Seiwa soxiham ape hanima nga ti tetak.’ Kakanua tel tamalalu sei soxiwasolalalu.

¹³ “Tai kue, tel komuh apeseni hatesol soxiham ape i ku hani texux xux xauxaun. Ti ien i tua hapuasa xoini hatapo moniun. ¹⁴ Taen i hatapoa moniun, tehu lape hitolo tunahi seilon ti texux xux ien ape i tap wanen teik na waliko.” ¹⁵ Aile ape i nahih ngah puasan kapi tel seilon ti texux xux i toto. Tel seilon ien talo i ngahatiae teka tupun pou. Tenen puasain ien, teka Ju namiloi ukek puasain ti pate hahien.” ¹⁶ I hitol lialu hawane ape pahan is aniai taen ani pou, tuahue tap tel seilon axi anan.

¹⁷ “Ti namilon xewawa i namiloi ukek, ‘Teka unaui tel tamak analaha i tua sesea a nga hitol lialu hahawane ie.’ ¹⁸ Nga alia hani kapi tel tamak ape kakane i ukek, ‘Nga ailewen saun lialun hani o ma Haeu.’ ¹⁹ Nga kumahe solian ti i tapai o namiloi ukek nga natum. Hapuasa nga hanowiwah tel ti teka unauam.”

²⁰ “Ape salan, i nahih alia hani kapi tel taman. Tel taman ningahi i xauxaun tutuen ape lon tel hawane. I kiliwau amuam akaumi tel natun ape i asoi taliopan.” ²¹ Tel natun ukek, ‘Tel tamak, nga ailewen saun lialun hani o ma Haeu. Nga kumahe solian ti i tapai o namiloi ukek nga natum.’

²² “Tuahue tel taman hone teka unauam ukek, ‘Kau kosenima tehu puxux pate solian ape puxui haniwa i. Nihiniwa feik ring tuah he ngaxe minan ape hanawa su he aen.’ Tel taman aile ukek ti kolakol ka tel natun ukek aliakewen tototonan.” ²³ Tin i hone lato, ‘Nahih waxiwa tok bulmakau xuxu ape teleiwa lehe kako aile tehu angain lalap ti amuke tel natuk.’ ²⁴ Amuam akatima nga nake tel natuk ie, i masin tel seilon i matewen ape i moih alia. I masin tel seilon i kalutawen ape nga tunahi aliak.” Ape lato hutui tehu angain lalap.

²⁵ “Lokon ien tel ukalan pamu he kin. Ti i nahih xohi hanima leili ing i hong tunahi seilon pak amuam. ²⁶ I tiloi tel unaui tel taman ape i kamei, ‘Laha hehei la?’

²⁷ “Ape i pahoi ukek, ‘Tel ukalam aliawen ie ape tel tamam hone amite teleiai tok bulmakau xuxu nake i amuke hawane tel natun aliamma huliwi.’

²⁸ “Tel ukalan pamu lon lialu ape i kum soh hani leili ing. Tel taman sohotua ape kamei eliel i na i soh akati laha. ²⁹ Tuah i kak pahoi tel taman ukek, ‘Mongohe ahang nga puas eliel hahawane tetam ma nga tai tatahi o na tehu. Tuah o tai hahani nga tuah e tok na mom lehe nga ang amuam kapi teka lawak. ³⁰ Tuah tel lialui natum ien i tua xoini monium hani teka hehin ti aweisal. Ti i aliamma ape o telei tok bulmakau xuxu ti amukean.’

³¹ “Tel taman hone i ukek, ‘Tel natuk, o kapik lawe ngain. Waliko tetak se tetam. ³² Tuah ewi wanen kako amuam tetelao nake tel ukalam i masin tel seilon i matewen ape i moih alia. Masin ka i kalutawen ape nga tunahi aliake.’”

16

Menge tel seilon ngahatiai moni

¹ Jises kaxi hani tesol kahikahin tenen meng. I ukek, ‘Tel seilon soxian pate kilan, i tel unauan ti ngahatiai moniun. Teka unauan liai tunahi ka tel ngahatiai moni pipisi tel masiwi tetan sale hapuasai moni ape lato kaxi hani i. ² Tel masiwi tiloi tel ngahatiai moni ape i ukek, ‘Nga tunahiwén ka o pipisi nga. Aile ape liai nga xaxaweni o ti pupuasam. Tai haxewa hanima nga sale hapuasai moniuk.’

³ “Tel ngahatiai moni namiloi ukek, ‘Kaie nga aile la? Tel masiwi tetak i hatapo nga ti pupuasak. Nga tap kuik ti ailei puasain tenen ailan ma nga hienan na nga kat. ⁴ Nga tioiwen. Nga aile ngah aweisal lehe teka seilon waxi auni nga na nga tapoa pupuasak.’

⁵ “I ilowi tel tel ti teka laha kemu moniai tel masiwi. I kameimu tel, ‘O kewen hil waliko ti tel masiwi?’

⁶ “I ukek, ‘3,000 patula wel.’

“Tel ngahatiai moni hone i ukek, ‘Waxiwa teik pepa i kola mongohe waliko ti o kewen ape o tai sohiwa. Hanawa 1,500 patula wel.’

⁷ “I kamei tel liai ukek, ‘O kewen hil?’

“Tel seilon ukek, ‘16,000 tomi komem.’ Tel ngahatiai moni hone i ukek, ‘Waxiwa teik pepa i kola mongohe waliko ti o kewen ape tai sohiwa. Hanawa 12,800 tomi komem.’ Tel ngahatiai moni tin i aile hani teka liai.

⁸ “Kalak tel ngahatiai moniun pisiwen i, tel masiwi tetan sameni i ti upiai aweisal lehe teka seilon huali i na i tapo ti pupuasam.” Jises tili kakaian ukek, “Nga kaxi hani amuto tenen meng ie nake kilan seilon laha kumahe ti Haeu, laha hapuasa namilolaha ti taneniai waliko ti i sosohot tehu pon ie, i xoini teka seilon ti Haeu. ⁹ Nga hone amuto, hapuasawa moniumuto ti hualiai seilon. Na amuto aile ukek ien, amuto tunah lohummuto. Kalak na moniumuto tapo, imuh Haeu waxi auni amuto hani tesol tonan.

¹⁰ “Tel na i ngahatiai aluini waliko kokol, tel masiwi tetan soh i ti ngahatiai waliko pamu lapan. Tel na i pisi tel masiwi tetan ti waliko kokol, tel masiwi tetan kum soh i ti ngahatiai waliko pamu lapan. ¹¹ Na amuto kum ngahatiai aluini waliko ti tehu pon ie, Haeu kum soh amuto ti ngahatiai waliko tuah tetan. ¹² Na amuto kum ngahatiai aluini waliko ti Haeu haniven amuto he tehu pon ie, Haeu kum hani amuto waliko tenen pate solian ti tesol tonan.

¹³ “Amuto kum puas uke hahitake masiwi hua, uke amuto waheni tel ape amuto watakai tel, amuto hong kakai tel ape amuto kum hong tel. Amuto kum aile uke puase Haeu na masin namilomuto tin xooxi ti ngahoi moni.”

¹⁴ Ti teka Parisi hongoa waliko ti Jises kakak, lato soxeni i nake lato seilon tenen pate pahalato moni. ¹⁵ Jises hone lato, “Amuto puas eliel kolaiamuto lehe seilon sameni amuto tuah Haeu tioi hawane leilomuto. Hina waliko tenen seilon hana tuah ti laha, Haeu namiloi ukek pate lialun masin ti na seilon pate pahan moni.”

Jises nexi nauna ti Haeu

Mt 11:12; 19:9; Mk 10:11-12

¹⁶ Jises kakatale ukek, “Imat ti Jon Baptis kaxi ahuti kakai Haeu, amuto teka Israel hahitake hatesol nauna ti Moses ma kakain ti teka kuluiak kakai Haeu. Tuah aope ie, nga ma tesol kahikahik kakaxi meng solian ti Haeu neini seilon ape kilan seilon pahalaha wanen Haeu neini laha. ¹⁷ Tuah kumahe ka tesol nauna ien kumahe tuah. Nga kakane hawane amuto, maun ma tehu

pon ie i tapo tuahe tap teik ti tesol nauna ien i kumahe tuah.

¹⁸ “Tuahe kilan ti amuto, amuto hakalala nauna ti Moses masin tenen nauna sale lioiai hehin. Nga hone amuto, na tel i lioi tel axoan hehin ape i uke liao tel, Haeu namiloi ukek i ailewen saun lialun ti wawan hehin. Ape tel na i uke axoan tel hehin ti wawan liao lioi, tin masin Haeu namiloi ukek i ailewen saun lialun ti wawan hehin.”

Tel seilon kilan soxi ma Lasarus

¹⁹ Jises hahanau tutuen laha ape i kaxi tenen meng i ukek, “Tel seilon tenen kilan soxi, sosen mewenae solian. Husele kilai waliko tetan ape i ang amuam kapi teka lawan tapai ngain. ²⁰ Tel seilon axan Lasarus, tap wanen soxian ma tinun kilai naxon. Lawe laha hatona i aweingi tel seilon kilan soxi. Mewenae i to katekat an ma moni. ²¹ Pahan wanen i ani taen peni an na i put hani itan hahitake tone ani tel seilon kilan soxi. Taen teka sinen laha nahima kamoti naxonau.

²² ²⁴ “Imuh Lasarus mat ape teka engel waxi i hani tone Haeu kapi Abraham, tetesol tonain pate tuah. Tel seilon kilan soxi tin i mat ape laha tihini. ²³ I kane tesol kaui kawatan ti tap tahi tapoan. I lamani hawane moloan. I xeisa hanile patul ape i ningahi Abraham xauxaun wanen, hetekie Lasarus.

²⁴ “Ape i tilol, ‘Tel tamamite Abraham! Nga lamani hawane moloan he tehot ah ie. Tahanema nga ape taloma Lasarus lehe i soti ngaxe minan he kan ape hawai lehok.’

²⁵ “Tuahe Abraham ukek, ‘Tel natuk, na-meniwa ti imat. O hina waliko tenen solian ti paham lokon ti o tutuen he tehu pon itan a Lasarus totongan pate lialun. Tuahe ape totongan ape pate solian ma amuam tetan lalap wanen a o toto leili moloan lalap. ²⁶ Tuai tesol waliko ien, wasolakako pate xauxaun wanen. Haeu tiehiwen wasolakako lehe amite kum kolia kewa ma tin amuto kum kolia kema.’

²⁷ “Tel seilon kilan soxi ukek, ‘Na masin ien, taloa Lasarus haniwa ingi tel tamak.

²⁸ Tepanim ukalak ien. Pahak i hahongoa lato ka pate lialun wanen tesol ti nga toto ape lato towiahua ti lialui woulato lehe lato kum lua hanima kapik taen lato mat.’

²⁹ “Abraham pahoi ukek, ‘Moses ma teka kuluiai kakai Haeu hanauen lato nauna ti Haeu. Tesol ukalam ala lato hong usiwa tesol nauna ien.’

³⁰ “Tel seilon kilan soxi ukek, ‘Ien i kum pon nake lato kum soh. Tuahe na tel seilon masin Lasarus i moih alia ape kaxi hani lato nauna ti Haeu, lato towiahua ti lialui woulato.’

³¹ “Ape Abraham ukek, ‘Na lato kum hong soh kakai Moses ma teka kuluiai kakai Haeu, tin lato kum hong soh kalak na tel i moih alia ape i kakane lato.’”

17

Sale saun lialun ma oxoxiai seilon ti kawatan ti lialui woulaha

Mt 18:6-7, 21-22; Mk 9:42

¹Jises hone tesol kahikahin, “Kilan waliko ti tohongi haputai seilon ailei saun lialun tuahe Haeu axi hawane kawatan hani tel seilon i aile haputai seilon liai ailei saun lialun. ² Pamu ewian laha xinoti tehu mes lalap he kinawen ape hataxixi hani ilam. Ien pamu ewian ti na imuh i tunahi kawatan ti ailei tenen saun ien. ³ Amuto kanipetiwa. Kum ailele tenen saun ien.

“Na tel kahikahik aile saun lialun hani amuto, nesi hexewa haniwa i ka saun tenen i aile i halialu wasolamuto. Ape honewa i kum aile ulelei. Na i towiahua ti lialui woun, amuto oxoxiwa i ti kawatan ti saun i aile haniwen amuto.

⁴ “Kalak i aile hani amuto kilan saun lialun leili ngain tehu ape lawe i nahima i ukek ka i tahane hawane, amuto oxoxiwa i ti kawatan ti lialui woun.”

Xoxoi namil hani Haeu

Mt 17:20; Mk 11:22-23

⁵ Telao tesol aposel kamei tel Masiwi Jises, “Haxoxo ahekema namilomite hani Haeu.”

⁶ Jises pahoi lato ukek, “Kalak lape namilomuto hani Haeu masin waki lilie, i pon amuto hone tea pata ie, ‘Sohutawa tesol ie ape tu haniwa itax.’ Ape salan i hong usi kakaiamuto.”

Sale puase kahikahi Jises

⁷ Jises kak tatale ukek, “Na masin tel masiwi tel unauan i aliama ti i pupuas he kin, i kum tua to ang. ⁸ Lawe i apesennimu ani tel masiwi tetan, muhin ape i ang. ⁹ Tel masiwi kum kak kemulik hani tel unauan nake se liai pupuasan. ¹⁰ Tin masin amuto. Na amuto aile usi waliko ti Haeu pahan, amuto namiloi kewak, ‘Amite tuahe unaui Haeu. Amite kum namiloi ukek Haeu sameni amite pake waliko ti amite aile liai pupuasamite.’”

Jises haewia huopanim seilon tinulato hina nax lialun

¹¹ Jises ma tesol kahikahin nahih hanhniwa Jerusalem nonoa wasole huoxux xux Galili ma Samaria. ¹² Ti lato soh haniwa tewau toan, huopanim seilon tinulato hina nax tenen pate lialun, lato tu siasia xaux-aun. ¹³ Lato tilol ausisini, “Jises tel masiwi tahanema amite!”

¹⁴ Ti Jises ningahiwa lato i ukek, “Nahih kolawa tinumuto haniwa teka masiwi ti hukuminiai Haeu ma seilon lehe lato paxai kalisi tinumuto ka amuto ewiwen ma tin ape haun.” Ape ti lato nanahiwa, Jises aile haewia tinulato.

¹⁵ Ti lato paxaiwa ka tinulato ewiwen, telawe i alia hani kapi Jises ape i tilol ukek, “Nga sameni Haeu. Nga amuam hawane nake nga ewiwen.” ¹⁶ I put lokuha hani kapi ae Jises ape i kak kemulik hani i. Tel seilon ien i ti texux xux Samaria.

¹⁷ Jises kakane teka seilon kapin, “Huopanim seilon nga haewia. Tuahue telawe aliamma. ¹⁸ Mewenae tel seilon ie aliamma kak kemulik hani Haeu a i kumahe Ju.” ¹⁹ Ape Jises hone tel seilon ien, “Tua ape nahih tamusua. Xoxoi namilom hani Haeu i aile haewiawen o.”

Taun ti aliai Jises

Mt 10:39, 24:17-18, 23-28, 37-41; Mk 8:35, 13:15-16; Jn 12:25

²⁰ Telao teka Parisi kamei Jises ukek, “Lokon wanen taun ti ape Haeu neini seilon?”

Jises pahoi ukek, “Nenein ti Haeu kumahe waliko tenen lehe amuto ningahi.

²¹ Tap tel i kola uke, ‘Paxaiwa, Haeu neini teka seilon ie.’ Ape tap tel i kola uke, ‘Paxaiwa, Haeu neini teka seilon io.’ Nake ti Haeu neini seilon, i neini namilolaha ma pupuasalah.”

²² Jises kakane tesol kahikahin, “Taun i luluainima tutuen ti pahamuto wanen nga tel Nati Seilon kapimuto tuahe tataen ien i kum pon na nga kapimuto. ²³ Na teka seilon hone amuto, ‘Paxaiwa, tel Nati Seilon tahiawen,’ amuto kum soh usiusi laha. ²⁴ Amuto tioi hawane aliaiak nake nga tel Nati Seilon sohotuak hanowi usil i xep haxewa maun tetaun hani tetaun. ²⁵ Tuahue imat ti ien, nga tel Nati Seilon nga kaumu moloan pate lalap ape teka seilon ti aope ie laha pahoxai naga ma watakai waliko ti nga hahanau seilon.

²⁶ “Taun ti aliaiak tel Nati Seilon, saun ti teka seilon masin wanen lokon ti Noa tel

seilon sawisawin. ²⁷ Lokon ien, imat ti Haeu hasomu mat atuhilawee xux, teka seilon laha ang, un ma sal amuam atengi tataen ti Noa soh hani leili tea waian. Laha amuam luh ape laha kum tioi waliko ti lehe i sohot. Ape ti mat somule, i soheni hatapo laha. Tin masin wanen aliaiak tel Nati Seilon, i haonga seilon.

²⁸ “Tin masin lokon ti Lot tel seilon sawisawin. Teka seilon lialun ti tehu taon Sodom tin laha ang ma un amuam, laha kakahui ma hahangaini waliko, seseini an ma atatai ing tuahe laha kum nam waxi Haeu. ²⁹ Telao ti Lot nahih ahuta ti Sodom, Haeu haputa ah lalap ma pot pate kekean lui telei hatapo teka seilon ti Sodom.

³⁰ “Tin masin wanen aliaiak tel Nati Seilon, i haonga seilon. ³¹ Taun tehu ien kawatan lalap wanen tunahi seilon. Tel na i melal, i kiliwawa. I kum alia hahani leili ing waxiai soxian. Tin masin na tel i he kin, tin i kiliwawa. I kum alia hahani leili ingan waxiai soxian. ³² Amuto namenawa waliko ti sohot hani tel axoi Lot. Ti lalu ahuta ti Sodom, tel axoi Lot tohea alia waxiai soxian ape i mat. ³³ Nga kakane hawane amuto, na tel seilon pahan kum is kahikahik nake pahan i akeni kongini totongan ti itan ie, i lioi totongan ti kapi Haeu. Tuahue na tel seilon i to kahikahik kalak na masin i lioi totongan ti itan ie, i waxi tonain kapi Haeu.

³⁴ Tataen ti nga aliamma, ti na hua seilon matih hehetekie, nga waxi tel ape tel tiliwen. ³⁵ Hua hehin lalu nuhi hehetekie api, nga waxi tel ape tel tiliwen. ³⁶ Hua wawan lalu puas hehetekie he kin, nga waxi tel ape tel tiliwen.”

³⁷ Ti tesol kahikahin hongoa lato kamea, “Amite tioi ukek ia tetesol na i sohot?”

Jises pahoi lato ukek, “Amuto tioi xixi tetesol na amuto ningahi taliah. Tin masin amuto tioi tetesol ti aliaiak, taen ti amuto ningahi waliko ti nga kakanewen amuto.”

18

Menge tel hehin i kamea talingoi huhual

¹ Telao Jises kaxi tenen meng hani tesol kahikahin ti hanaualato ka lawe lato kamei talingoiva Haeu ma kum kakapaxe i. ² I ukek, “Leili tehu taon tel seilon puasan hong paxaiai kakain. I kum nam waxi Haeu ma seilon. ³ Tel hehin axoan matewen tin i toto taon tehu ien. Lawe i to nahih tuhituhi kameiai huhual ti tel seilon ien. I ukek, ‘O

sauma tetak nake tel seilon liai i aile hualialo
nga.’

⁴ “Kemuk tel hong paxaiai kakain i kum hong waxi i. Tuahe imuh i namiloi ukek,
⁵ ‘Kalak nga kum nam waxi Haeu ma seilon, nga huali tel hehin ie nake lawe i hakatole
nga. I hapuso nawak na nga kum huali i.’”

⁶ Ape tel Masiwi Jises ukek, “Namiloi paxaiaiwa waliko ti tel hong paxaiai kakain noseni i aile kalak i seilon lialun. ⁷ Aile ape Haeu tel pate solian, pamu i sa huali teka seilon i kilamiwen tetan na laha kamea talingoi. Kumahe i papalata hualialaha.
⁸ Pate i sa kosea hualialaha. Tuahe kaie nga tunahi kilan seilon namilolaha xoxoan tetak ti na ngal tel Nati Seilon aliamaa?”

Menge tel Parisi ma tel waxiai moni

⁹ Leili teka seilon laha hongohong Jises, teka ti laha namiloi ukek ka laha seilon sawisawin nake ti saun ti laha ailele. Laha namiloi ukek ka laha pamu ewian ti teka liai ape laha teheni seilon liai. Aile ape Jises kaxi hani laha tenen meng ie. ¹⁰ I ukek, “Hua seilon lalu nahih lotu hani Ingi Haeu, tel Parisi ma tel puasan waxiai moni ti teka Ju hani teka masiwi ti Rom. ¹¹ Tel Parisi tu ape i lotu ukek, ‘Haeu, nga kak kemulik hani o, nga kumahe masin teka seilon woulaha lialun kasini tel seilon tutu io. Nga malang pipis, nga kum ailele saun lialun ti wawan hehin ma lawe nga ailele saun solian. ¹² Lawe nga halini an hualialotu tetak ti ngain huohu leili puasain tehu. Lawe nga axi o tenen ti lawe huopanim soxi nga hina.’

¹³ “Tel waxiai moni i tu siasiia nake i namiloi ukek i seilon tenen woun pate lialun. Aile ape i kum xeisa hani patul ti i lolotu. I tui patanawan nake pate i tahane lialui woun ti i ailewen. Ape i lotu ukek, ‘Haeu tahanema nga nake nga seilon tenen ailei saun lialun.’”

¹⁴ Ape Jises tili kakaian ukek, “Nga kakane hawane amuto, muhi lotu ti lalu, tel seilon waxiai moni Haeu namiloi ukek i seilon sawisawin, kumahe tel Parisi. Na tel sameni aliake i, Haeu teheni tel seilon ien. Tuahe na tel teheni aliake i, Haeu namiloi ukek i seilon pate tuah.”

Jises waheni teka akaik

Mt 18:3, 19:13-15; Mk 10:13-16

¹⁵ Lokon ien teka seilon hakahita teka akaik kokol hani kapi Jises. Pahalahaa i hanawa minan he teka akaik lehe i lotu

huali lato. Tuahe tesol kahikahin kahiloloi teka seilon. ¹⁶ Jises tiloi teka akaik hanima kapin ape i ukek, “Tiliwen teka akaik nahih hani kapik, kum hahakongu lato. Na seilon sohot hanowi teka akaik ie, Haeu neini aweisalulaha ape laha natun wanen.
¹⁷ Nga kakane hawane amuto, Haeu neini mewenae teteka laha hana xoxoi namilolaha hani i masin teka akaik laha hana xoxoi namilolaha hani tamalaha ma tinalaha.”

Tel seilon kilan soxi

Mt 19:16-30; Mk 10:17-31

¹⁸ Telao tel ti teka masiwi ti teka Ju kamei Jises, “Tel masiwi solian, nga aile waliko la lehe nga uke tonain kapi Haeu ti tap tahi tapoan?”

¹⁹ Jises kamei aliake i, “Nake lahan o ukek nga solian? Na masin o ukek nga solian, namiloi paxaiaiwa nake mewenae Haeu solian. ²⁰ O tioi nauna tetan: ‘Kum tetelei seilon, kum ailele saun lialun ti wawan hehin, kum xuuxuina, kum kau puputini kakain, hongoa kakai tamam ma tinam ma aile hasolia haniwa lalu.’” (Exod 20:12-16)

²¹ I hone Jises, “Nga usi hahatapo tesol nauna ien lilian ti nga kokol.”

²² Ti Jises hongoa kakaian i ukek, “Tenen waliko tutuen o tai aile. Nahih hangaini hatapoa soxi amape moni haniwa teka seilon tap soxi lehe imuh o uke kahum ti tone Haeu. Ape nahih kahitima nga lehe o sohot kahikahik.” ²³ Ti tel seilon hongoa, tatahan lalap tunahi i nake i kilan soxi ape i tahane na i hangaini.

²⁴ Jises paxai i ape i ukek, “Seilon tenen kilan soxi, pate ailan wanen ti usiai aweisal ti Haeu neneini. ²⁵ Nga kakane hawane amuto, ailan wanen ti tok kamel na i soh non he tewau aweing laha axai nil ti sawitiae maia tuahe pamu ailaian ti seilon tenen kilan soxi ti usiai aweisal ti Haeu neneini.”

²⁶ Teka seilon apupuha hongoa, laha kamei i, “Lehe ape aita pon usiai aweisal ti Haeu neneini?”

²⁷ Jises pahoi ukek, “Ti mewenae kui seilon i kum pon. Tuahe hetekie huuhal ti Haeu, seilon pon.”

²⁸ Ape Pita ukek, “Paxaiwa, amite tesol kahikahim salili hatapoen waliko ti amite ape amite kakahiti o. Kaie amite uke waliko la?”

²⁹ Jises pahoi ukek, “Nga kakane hawane amuto, Haeu kahui hasolia tel na i namiloi ukek nenein ti Haeu pamu tuah ti tonan, axoan, ukalan, taman tinan ma natun.

³⁰ Haeu axi aheke i lawe waliko ti he tehu pon ie ape tin i uke tonain kapi Haeu ti tap tahi tapoan.”

Jises kak ulea sale matean

Mt 20:17-19; Mk 10:32-34

³¹ Jises hakahita huopanim hua aposel hani tesol mewenae lato ape i ukek, “Kako nahih hahaniwa Jerusalem. Lawe waliko ti teka kuluiak kakai Haeu taiwen ti i kakak nga tel Nati Seilon, i sohot poponowi hani nga ien. ³² Laha hana nga hani he mini teka seilon laha kumahe Ju. Laha soxeni nga ape aile halialu nga ma pukeini nga. ³³ Laha heti nga ape laha telei. Tuahe muhi ngain tololuha nga moih alia.”

³⁴ Tesol aposel kum xeu waliko ti Jises kakak. Salangawe teik kakaian, lato kum tioi.

Jises haewia tel seilon pulaxa

Mt 9:27-30, 20:29-34; Mk 10:46-52

³⁵ Ti Jises ma tesol kahikahin nahih xohi hahaniwa Jeriko, tel seilon pulan pulaxa toto ngixi aweisal kamekam huuhal. ³⁶ I hong ka kilan seilon nahih sahima i tatasmusua he aweisal. I kamea, “Waliko la i sosohot?”

³⁷ Hina seilon hone i ka Jises ti Nasaret nahih tatamusua. ³⁸ Ape i tilol eliel ukek, “Jises tel kahi nati David, tahanema nga!”

³⁹ Teka seilon nanahiwia mateiwai Jises laha tumei hapangisu i tuahe i tilol eliel ahe, “Tel kahi nati David, tahanema nga!”

⁴⁰ Jises tu hamalum ape i hone teka seilon ukek, “Ati hanima nga tel seilon ien.” Ti i nahih xohiwa, Jises kamei i, ⁴¹ “Paham nga aile waliko la hani o?”

Tel pulaxa ukek, “Tel Masiwi, pahak nga Paxapax.”

⁴² Jises hone i, “Aope ie ape o paxapax. Xoxoi namilom hani Haeu i haewia o.”

⁴³ Tataen ien wanen pulan ewi ape i kahiti Jises. I kak kemulik ma sameni Haeu. Ti teka seilon ningahiwia, tin laha sameni Haeu.

19

Jises ma Sakias

¹ Jises ma tesol kahikahin soh haniwa Jeriko ape lato nahih tatamusua leili taon.

² Ti ien tel seilon axan Sakias. I tel masiwi ti teka waxiai moni ti teka Ju hani teka masiwi ti Rom. Sakias kilan moniun. ³ Pahan wanen i Paxai Jises tuahe i seilon kukunun. I kum ningahiwia uke Jises nake pate kilan seilon lilikhini i. ⁴ Aile ape i kiliwau pelea han

hani he tea pata lalap lehe i pon ningahiwia Jises na i nahima.

⁵ Ti Jises mei haniwa onote tea pata, i pax haniwa patul ape i ukek, “Sakias, mos kosealih nake ngain tehu ie nga to kapim leili ingam.” ⁶ Sakias mos saxohuxoh hanilih itan, leili tian i amuam hawane ape i hakahita amuke Jises hani leili ingan.

⁷ Ti teka seilon ningahiwia, laha kak mumum hui Jises ukek, “I to akakati tel seilon woun lialun.”

⁸ Ti lato leili ing, Sakias tule ape i hone Jises ukek, “Tel Masiwi, teapaun ti lawe soxiak nga hani teka tap soxi. Na nga pisi waxiwen moniai tel na seilon, nga aliakae hani i taen hinalo akulai lapan ti nga pisiwen i.”

⁹ Jises kakane i ukek, “Aope ie Haeu oxoxi o ma teka leili ingam ti kawatan ti lialui woumuto nake o hina namil xooan hani Haeu masin Abraham, tel tamakako ti matahaun. ¹⁰ Pake salangawe luaiak tel Nati Seilon hanima tehu pon itan ie upiai teka seilon woulaha lialun masin Sakias ma awaialaha ti kawatan ti saun lialun ti laha.”

Menge tesol seilon ngahatiai moni

Mt 25:14-30

¹¹ Ti Jises ma tesol kahikahin xohi hahaniwa Jerusalem, kilan seilon laha hongohong kakaian. Kilan ti laha sokok ka taun ti Haeu neini lawe seilon ape i sohot huluta ien. Aile ape Jises kaxi hani laha tenen meng ie. ¹² I ukek, “Tel seilon tuah lua hani texux xux xauxaun lehe tel masiwi tapein ti ien hana i tel masiwi ti xuxun. ¹³ Imat ti i ku i tiloi apuhini huopanim unauan ape i hani lato tel tel tehu tomi moni. I ukek, ‘Amuto hapuasa haxexewa teik moni ie lehe nga uke palahia taen nga aliam.’

¹⁴ “Tuahe teka seilon ti xuxun laha watakai hawane i ape laha talo tesol seilon hani tel masiwi tapein hetekie teik kakain ukek, ‘Amite watakai tel seilon ien to masiwi ti amite.’

¹⁵ “Tuahe tel masiwi tapein hana i masiwi ti laha. Ti i alia haniwa xuxun, i tiloi apuhini huopanim unauan lehe i upia paxai lape moni ti lato hasohotuen.

¹⁶ “Tel imat nahima i ukek, ‘Tel masiwi, nga hasohotu palahiwien huopanim tomi monium.’

¹⁷ “Tel masiwi ukek, ‘Puasam solian. O unaauak solian, o auni aluini moniuk. O ngahati aluini waliko kokol, aile ape nga hana o masiwi ti huopanim taon.’

¹⁸ “Tel muhin nahima i ukek, ‘Tel masiwi, nga hasohotu palahiwen tepanim tomi monium.’

¹⁹ “Tel masiwi ukek, ‘Puasam solian. Nga hana o masiwi ti tepanim taon.’

²⁰ “Tel liai nahima i ukek, ‘Tel masiwi, teik monium kemuk o hanimu nga ie. Nga puxui mumuneni he teik maia. ²¹ Nga mamata o nake o seilon ahian. O waxi an ti kumahe o seini. Paham o waxi moni ti seilon liai hasohotu.’

²² “Tuahé tel masiwi kakane i ukek, ‘O pate unaauak lialun ma nunuxa. O sokok nga seilon ahian, nga waxi an ti kumahe nga seini ape pahak nga waxi moni ti seilon liai hasohotu. Puki kakaiman sului o. ²³ Na o namiloi ukek ka nga seilon ahian, kiae ala o hapuasa haxexewen moniuk lehe nga uke palahi.’

²⁴ “Ape i hone teka unauan liai ukek, ‘Waxiwa teik moni toi i ape haniwa tetel i hasohotuen huopanim tomi moni.’

²⁵ “Tuahé lato kakane i ukek, ‘Tel masiwi, i liai huopanim tomi moni toi! ’

²⁶ “Tel masiwi pahoi lato ukek, ‘Salan. Tel na i aile aluini puasak, nga axi palahi waliko ti i auni. Tuahé tel na i kum puas alua, nga waxi aliaké teik kokolean toi i. ²⁷ Ien ape taun ti nga axi kawatan hani teka laha watakai nga to masiwi ti laha. Atima laha ape teleiwa ti he pulak.’ ”

Jises soh hani Jerusalem

Mt 21:1-11; Mk 11:1-11; Jn 12:12-19

²⁸ Jises kakewa ape i nanahiwa matei-wai tesol kahikahin hani Jerusalem. ²⁹ Ti lato xohi haniwa huowau toan Betfage ma Betani, pape tehu Maunt Oliv, Jises talo hua kahikahin imat tetan. ³⁰ Ape i hone lalu, “Nahih haniwa tewau toan matei-waukako. Amulu ningahi tok donki uluha xinotan ien, laha tai kikiliwake. Upatiwa ape hakahitama. ³¹ Na tel seilon kamei amulu kalahai amulu upati, honewa i ka tel Maswi pahan i hapuasa.”

³² Lalu nahiwa ape lalu tunahi waliko masin ti Jises kakawenewen lalu. ³³ Ti lalu upapatii tok donki, teka taman kamei lalu, “Kalahai amulu upati?”

³⁴ Ape lalu ukek, “Tel Masiwi pahan i ha-puasa.” ³⁵ Ape lalu hakahita tok donki hani Jises. Lalu axaheni puxuaulalu he tehitii tok donki ape lalu hualii Jises ku to hani patul.

³⁶ Teka seilon axaheni puxuaulaha he aweisal ape Jises kikiliwawa patul tetan.

³⁷ Ti i xohi haniwa Jerusalem he tetewau aweisal i mos haniwa Maunt Oliv, kilan

wanen teka kahikahin laha tilol amuam ma sasameni Haeu ti lawe waliko lalap laha ningahi Jises ailewen.

³⁸ Laha tilol ukek,

“Kako sameniwa ma amukewa

tel kahi nati David,

tel i nahih hehetekiema poh
ma solian ti Haeu!

Kako sameniwa Haeu

tel pohen tapein,

tel i hatona hasolia tiakako.”

(Ps 118:25-26, 148:1)

³⁹ Teka Parisi leiololahe kakane Jises ukek, “Tel masiwi, tumei hapangisua teka kahikahim!”

⁴⁰ Jises ukek, “Nga kakane hawane amuto, na lato monga, tesol pot ie tilol amuam sameniak.”

Jises tang tahane Jerusalem

⁴¹ Ti Jises xohi haniwa Jerusalem i pax-aiwa tehu taon ape i tang tahane. ⁴² I ukek, “Nga hahaxe amuto seilon ti Jerusalem ha-sawiai wasolamuto kapi Haeu taen tetelao. Haeu kola haniwen amuto aweisal ti na amuto usi tuahé amuto watakai. ⁴³ Ngain ti luluainima imuh, teka seilon ti hile ti xux liai laha atai hanein kakalini Jerusalem lehe laha han kolfa hani leili taon ape hilei amuto. ⁴⁴ Laha aile halialu hawane hatehu taon ape telei hetekie teka seilon. Laha hamanana ukek ien nake amuto kum nam waxi Krais, tel Haeu taloma awaiamuto ti kawatan ti lialui woumuto.”

Jises usi xaxaweni teka laha hangaini soxi mate Ingí Haeu

Mt 21:12-17; Mk 11:15-19; Jn 2:13-17

⁴⁵ Ti Jises soh haniwa Jerusalem i nahih hani Ingí Haeu. Kilan seilon hahangaini soxi ma manihuh ien. Hangainiai waliko ti laha pate lialun. Ti Jises ningahiwa, i usi xaxaweni laha. ⁴⁶ Ape i kakane nau laha i ukek, “Kakai Haeu ukek, ‘Tehu ingak ing ti lotu.’ ” (Isa 56:7) Ape Jises kakane laha, “Tuahé amuto aile hanowi ka ing ti tone munai teka xuxuina!” (Jer 7:11)

Jises hanau seilon leili Ingí Haeu

⁴⁷ Muhin Jises hanau teka seilon leili Ingí Haeu lawe ngain. Tuahé teka masiwi tuah ti hukuminiai Haeu ma seilon, teka hanau nauna ti Moses ma teka masiwi liai, lato upiup aweisal ti teleian. ⁴⁸ Tuahé laha kum pon nake kilan seilon kapi Jises laha hong mamataini kakaian.

20

Aita sowini hani Jises puasain ti i aisle?
Mt 21:23-27; Mk 11:27-33

¹Ngain tehu ti Jises kakaxi meng solian ti Haeu hani teka seilon leili Ingi Haeu, teka masiwi tuah ti hukuminiai Haeu ma seilon, teka hanau nauna ti Moses ma teka masiwi liai ti teka Ju, lato hatesol nahih hani kapin. ²Lato ukek, “Kakanema amite, aita hone o aisle waliko ti o aisle? Aita sowini hani o?”

³Jises kak pahoi lato ukek, “Nga kameimur amuto tenen kamekame. Na amuto pahoi, nga kaxi hani amuto tetel i sowini hani nga. ⁴Kaxi hanima nga, aita sowini hani Jon baptaisiai seilon, Haeu ka seilon?”

⁵Ape lato kakak alia wasolalato, “Kaie kako kak ukek ia? Na kako ukek Haeu sowini hani Jon, i kamei kako, ‘Na masin ien, alahan amuto kum soh Jon?’ ⁶Tuahe na kako ukek seilon sowini hani i, teka seilon hokai telei kako pot nake laha ukek Jon se tel kuluiak kakai Haeu.”

⁷Aile ape lato ukek, “Amite kum tioi aita sowini hani Jon.”

⁸Jises kakane lato ukek, “Nga tin nga kum kaxi hani amuto aita hone nga aisle walikoi ti nga aisle.”

Menge teka ngahatiai tesol kin
Mt 21:33-46; Mk 12:1-12

⁹Muhin ien Jises kaxi tenen meng i ukek, “Tel seilon seini tesol lalape kini huai pata ape i hani teka seilon ngahati lehe tin i ukek aliak hina. Ape i ku to kue hani texux xux liai. ¹⁰Ti huai pata pamua, i talo tel unauan hani he kin waxiai ti tetan. Tuahe teka ngahatiai tesol kin xai halialu tel unauan ape tua talo aliak. ¹¹Tel tame tesol kin talo ulea tel, tuahe tin lato xai halialu ape tua talo aliak. ¹²Ape i talo ulea liai tel. Lato xai hamange ape towi xoini i hani melal ti he kin.

¹³“Muhin tel tame tesol kin namiloi ukek, ‘Kaie nga aisle la? Nga tioiwen. Nga talo tel natuk pate nga waheni. Sohin uke lato aisle aluini i.’

¹⁴“Tuahe ti teka ngahatiai kin ningahiwa tel natun, lato kakak alia puki lato, ‘Tel natun wanen nanahima. Kako telei i lehe tesol kin ape ti kako.’ ¹⁵Lato pohi towi xoini i hani melal ti tesol kin ape lato telei.”

Ape Jises kamei teka laha hongohong tenen mengon, “Amuto namiloi ukek ia? Ti tel tame tesol kin aliawa, i aisle walikoi la hani teka ngahatiai kin? ¹⁶Nga kakane

hawane amuto, i telei hatapo teka ngahatiai tesol kin ape i hani teka seilon liai ngahati.”

Ti laha hong kewak ien, laha ukek, “Kumahe, tap wanen i sohot ukek ien.”

¹⁷Jises paxaiwa laha ape i ukek, “Na masin ien, salangawan la teik kakai Haeu ti i ukek, “Tehu kuku teka ataaing hilisa,

Haeu aile ape i sohot kuku
tehu pamu tuah ti kuku liai.” (Ps 118:22)

¹⁸Ape Jises tili kakaian ukek, “Teka seilon laha hong watakai kakaiak, laha tunahi kawatan ma moloan lalap.”

¹⁹Teka hanau nauna ti Moses ma teka masiwi tuah ti hukuminiai Haeu ma seilon, ti lato hongoa tenen meng Jises kakaxi, lato tioi i kak nanami lato. Pahalato xoti hulutiriniai Jises tuahe lato mamata uke teka seilon hutui hile nake laha sameni i.

Moni hani Sisa tel masiwi tapein ti Rom
Mt 22:15-22; Mk 12:13-17

²⁰Teka hanau nauna ti Moses ma teka masiwi tu hukuminiai Haeu ma seilon, lato pepeteni tutuen Jises. Lato talo hina seilon ti kamei tohongiai Jises lehe waxi i kak walikoi tenen na i sului aliakte i ape lato hana hani he mini Pailat tel ti teka masiwi ti Rom kiliwakei Judia. ²¹Tesol seilon ien nahih hani kapi Jises ape lato ukek, “Tel masiwi, amite tioi o seilon sawisawin. Ti o hanau seilon sauni ti Haeu, kakain tenen salan. Woum o aisle hani teka masiwi ma teka seilon naun lawe tekewe. ²²Kaxi hanima amite, ewi na kako teka Ju hani Sisa teik moni pahan, a kumahe?”

²³Jises tioi ka lato kamei pipisi i ape i hone lato, ²⁴“Kola hanima nga tehu ti tesol puli moni lawe amuto hahani Sisa.” Lato hani i tehu. Ape i kamei lato, “Kawe aita ma axe aita he tehu puli moni?”

Lato ukek, “Ti Sisa.”

²⁵Ape Jises hone lato, “Ien, walikoi ti Sisa haniwa Sisa, walikoi ti Haeu haniwa Haeu.”

²⁶Aile ape lato kum tunah sale suluhan. Lato ong sameni pahoan tetan ape lato mangong.

Na seilon mat nakon i xahat alia?
Mt 22:23-33; Mk 12:18-27

²⁷Muhin ien teka Sadusi nahih hani kapi Jises. Lato soh ka seilon maten kum moih alia. ²⁸Lato ukek, “Tel masiwi, Moses tai hanawen na masin tel wawan i mat a i tap natun, tel ukalan kewa axoan tel hehin ien lehe lalu tan natulalu ape tesol akaik ien

nati tel i matewen. ²⁹ Hongoa mengomite. Telao hatotalin lato tepanim hua. Tel pamu i sal ape i mat, tap natun. ³⁰ Tel ukalan usian waxy axoan tel hehin. Tel usiai tel pamu tin i mat, tap natulalu. ³¹ Ape tel usialalu uke ulei axoan tel hehin, tin tap natulalu. Waliko tin tetenen sohot hani tesol talin liai. ³² Tapeinan ape tel hehin mat. ³³ Taen Haeu xahateni hatapo seilon maten, tel hehin ape axoi aita? Nake ati lato ukewen tel hehin ien.”

³⁴ Jises pahoi lato ukek, “Seilon sal meweneae ti laha he tehu pon ie. ³⁵ Tuahetaen Haeu hamoinha aliakte seilon tetan, ape seilon kum sal. ³⁶ Ape laha kum mat ulea masin teka engel, spirit solian ti Haeu. Laha nati Haeu i xahateni aliakte lehe laha to kapin lian tehue. ³⁷ Nga kaxi haxewa hani amuto sale xahatai seilon maten. Puki Moses kolawen ka teka maten laha moih alia. Amuto tioi meng ti i taiwen. I kaxi lokon ti Haeu kakane i ti leili teik sisihan ti ah xekexek. Haeu ukek ka i tetel ti Abraham, Aisak ma Jekop lolotui. (Exod 3:6) I ukek ien muhi matealato. ³⁸ Aile ape i Haeu ti teka moihin kumahe teka maten nake i nam paxai ukek seilon tetan laha lawe moihin tutuen.”

³⁹ Teka hanau nauna ti Moses hongoa ape lato ukek, “Tel masiwi, kakaiam sawisawin wanen.” ⁴⁰ Muhin ien tap tel kamei pisi ulei Jises.

Kahi nati aita tel Krais?

Mt 22:41-46; Mk 12:35-37

⁴¹ Muhin ien Jises kamei teka seilon laha hongohong kakaiam, i ukek, “Nake lahan teka seilon ukek ka Krais i kahi nati David?

⁴²⁻⁴³ Puki David i kakaxi leili kakai Haeu ti he pepai Salm,

“Haeu kakane tel Masiwi tetak,

“Toma papak tepaun manau ti neiniae seilon
atengi tataen nga hanawa teka seilon
laha pahoxai o
hani hahitakam.”’ (Ps 110:1)

⁴⁴ David axai Krais tel Masiwi tetan. Na masin ien, i kumahe tuahe tel ti kahi natun.”

Lepetawa teka hanau nauna ti Moses

Mt 23:1-12; Mk 12:38-40

⁴⁵ Ape Jises tohea kakane tesol kahikahin ti lawe seilon hongohong. ⁴⁶ I ukek, “Amuto lepetawa. Kum usiusi saun ti teka hanau nauna ti Moses. Lato hana puxux weluwelun ape tau nanahih ti puli lawe seilon lehe laha paxai tioi ka lato seilon

tuah ape sameni lato. Lato waheni totean tuah ti tone angain lalap ma leili synagog. ⁴⁷ Tuaheta lato pisi teka hehin axoalahamatewen lehe lato seseke soxialaha ma ingalah. Ape lato aile lotu weluwelun lehe teka seilon namiloi kewak lato sawisawin. Hui tesol waliko ien, Haeu axi lato kawatan lalap wanen.”

21

Moni kokol i sohot moni pamu lapan
Mk 12:41-44

¹ Imuh Jises toto onote tehu lohe moniti Ingi Haeu. I ningahi teka seilon kilan moni lolohi moniulaha. ² Ape tel hehin axoan matewen i tap moni, nahima ape i hana huohu puli moni pate kokol. ³ Ape Jises kakane tesol kahikahin ukek, “Nga kakane hawane amuto, tel hehin ie i hana moni pamu lapan ti teka liai. ⁴ Teka seilon liai, moniulaha pate kilan tutuen tuahe tel hehin ie moniun pate kokol wanen, i hana hatapoen ti i hina.”

Jises ukek tesol ing ti Ingi Haeu laha toi hamanana

Mt 24:1-2; Mk 13:1-2

⁵ Teka ti tesol kahikahin lato sasameni soliai Ingi Haeu, tesol pot laha uke ataian ma soliai waliko ti teka seilon aile hasoliai paxaian. ⁶ Ape Jises ukek, “Nga kakane hawane amuto, imuh tesol ing ie laha to hamanana ape pot ti tesol ing i put silahota.”

⁷ Lato kamei i, “Tel masiwi, lokon wanen ape waliko ien sohot? Kaie kikilam la i sohot imat ti tesol waliko ien?”

Jises ukek kilan kawatan i sohot

Mt 24:3-21; Mk 13:3-23

⁸ Jises hone lato ukek, “Lepetawa uke teka seilon puluti amuto. Imuh kilan seilon putini ka laha luama hahitake axak ape laha ukek laha Krais. Laha ukek ka taun ti Haeu neini hatesol seilon i tahiawen. Amuto kum soh usiusi laha. ⁹ Na amuto hong hilehile sosohot tesol tesol, kum maamata. Waliko masin hoi liai i sohot tuahe kumahe ka ape tapoi tehu pon ie.

¹⁰ ¹¹ Hilehile i sohot wasole xux, toan i hilel toan liai. ¹¹ Tataen ien hepekeun i nrea eliel, hitolo lalap ma nax tenen tenen i sohot tesol tesol. Teka seilon paxai waliko tenen tenen i hamatau seilon ma waliko lalap ti laha tai ningahi i sohot patul he maun.

¹² ¹³ “Tuahe imat ti lawe waliko ien i sohot, laha xoti ma aile halialu amuto. Laha

hatuhi amuto ti sulusulu leili synagog ma hana amuto he kalabus. Laha sului amuto he puli teka masiwi tenen tenen nake amuto kahikahik.¹³ Ien se aweisal ti amuto kaxi meng solian tetak hani laha.¹⁴ Amuto kum namiloi pepelein sale xengeiamuto.¹⁵ Puki nga hanamiloa amuto kakain sawi-sawin ti na amuto kak ape tap tel ti teka laha sului amuto pon kak ukek kakaiamuto kumahe salan.¹⁶ Teka ti amuto puki tamamuto, tinamuto, ukalamuto, akikimuto ma lawamuto hangaini amuto. Ape teka ti amuto laha telei.¹⁷ Tesol tesol kilan seilon laha watakai amuto nake amuto kahikahik.¹⁸ Kalak laha axi amuto kawatan tenen tenen, laha kum selai uke amuto ti hahitake ngangahat ti Haeu.¹⁹ Amuto tu xoxoa tetak lehe amuto uke tonain kapi Haeu ti tap tahi tapoan.”

²⁰ Ape Jises kak ulea ukek, “Na amuto ningahi teka seilon ti hile tu kaliniwa Jerusalem, amuto tioiwa ka ape laha aile halialu tehu taon.²¹ Taen ien, amuto teka Judia kiliwau haniwa he maunten. Teka leili Jerusalem laha oxawa ape teka laha toto melal ti Jerusalem laha kum soh hahani ien.²² Taun tehu ien, Haeu axi kawatan hani teka seilon ti Israel nake laha kum hong waxi i. Waliko ien i sohot haponowiai waliko ti teka kuluiak kakai Haeu tai kilami-wen leili pepaun.²³ Tataen ien, kawatan wanen ti teka hehin tialaha hina akaik ma teka natulaha susus tutuen. Kawatan tenen tenen tunahi teka seilon leili Israel nake Haeu lenginei hawane laha.²⁴ Teka seilon ti hile ti xux liai laha telei kilan teka Ju ape kilan laha kalabusi hani xuxulaha. Laha aile halialu tatale teka seilon ti Israel atengi tataen tehu ngain Haeu kikilami.”

Kikilam ti aliai Jises Krais
Mt 24:29-35; Mk 13:24-31

²⁵ Ape Jises kak tatale ukek, “Taen ien waliko tenen tenen i sohot hani alon, pangapang ma kohot, i hamatau seilon. Seilon ti hatesol xux laha mamata hawane ma to akiaki nake taun ti weu ma teletele.²⁶ Kilan seilon laha akimatu ma na laha mat ti mamaataulaha nake hatesol waliko he maun i nuea eliel.²⁷ Ape laha ningahi nga tel Nati Seilon mosulih patul he maun hetekie lalape poh ma soliae talepaei xewaiak.²⁸ Ti waliko ien sosohotule, amuto tu xoxoa nake Haeu tel awaiamuto i xohiwen ti ape i waxyi auni amuto lian tehue.

Lawe apeasawa ti aliai Jises

Mt 24:32-35; Mk 13:28-31

²⁹ Jises kak kolongeni hani tesol kahikahin i ukek, “Amuto namiloi paxaiwa talil.³⁰ Ti kaun mak put, amuto tioi ka taun ti aupal angiba.³¹ Tin masin, taen amuto ningahi tesol waliko nga kakanewen amuto i sohot, amuto tioi kewak taun ti Haeu neini seilon ape i xohi hawanewen.³² Nga kakane hawane amuto, hina seilon ti aope ie laha kum matemu atengi tataen waliko ien i sohot.³³ Maun ma xux ti aope i tapo tamus tuahe kakaiak hamalum lian tehue.

³⁴ ³⁴ “Amuto lepetawa. Kum namiloi ha-hakila waliko ti itan ie. Kum un taxitaxia, kum ailele saun lialun ti teka welli unum ailele ma kum namiloi hahikila waliko tenen amuto tae. Na amuto aile luhuke tesol waliko ien, aliaiak i haonga amuto hanowi hunan lialun na i tunahi amuto itax.³⁵ Nga hone amuto tetenen nake waliko ti i sohot taun ti aliaiak, i hani kawatan tenen tenen hani seilon ti xux texux texux.³⁶ Amuto kum luhuluh. Amuto lotu elieliali lawe ngain lehe Haeu huali amuto hax-oxoi namilomuto tetan leili taun ti tesol kawatan ien. Na amuto aile ukek ien, amuto kum hienake woumuto taun ti nga tel Nati Seilon aliamma ti hinitiai seilon.”

³⁷ Tesol ngain ien Jises nahih hani Ingi Haeu hanau i teka seilon ngain hatehu. Ape lawe ipong i matih he tehu Maunt Oliv.

³⁸ Lawe letu teka seilon nahih hani Ingi Haeu ti hongoi kakaian.

22

Satan hanamiloa Judas hangainiai Jises

Mt 26:2-5, 14-16; Mk 14:1-2, 10-11

¹ Ngain lalap ti teka Ju ti aniai bret tenen i tai xiu ape i xohiwen. Laha axai tehu angiai ien Pasova.² Teka masiwi tuah ti hukuminiai Haeu ma seilon, ma teka hanau i nauna ti Moses, lato upiup aweisal ti teleiai Jises. Tuahé pahalato seilon kum tioi nake lato mamata uke laha hutui hile.

³ Taen ien Satan ape i puas leili Judas Iskariot, tel ti tesol huopanum hua aposel.

⁴ Aile ape Judas nahih hani kapi teka masiwi tuah ti hukuminiai Haeu ma seilon, ma teka masiwi ti teka peteniai Ingi Haeu. Lato kak tataneni aweisal ti na Judas hangaini Jises hani lato.⁵ Teka masiwi amuam hawane ti teik namil ien ape lato kakane Judas ka lato kahui i.⁶ Judas waheni ape i atengi tehu taun solian na i hangaini Jises ti tap tel tioi.

Apeseniai an ti Pasova
Mt 26:17-19; Mk 14:12-16

⁷Ngain lalap ti teka Ju ti aniai bret tenen i tai xiu ape i tahiawen. Ngain tehu ien tin laha telei sipsip wawan uluha angiaian ti Pasova. ⁸Ape Jises talo Pita ma Jon ukek, “Nahih apesenewa angiaian ti Pasova ti kako hatesol.”

⁹Lalu kamei i, “Amili apesen hani ia?” ¹⁰I pahoi lalu ukek, “Na amulu soh haniwa Jerusalem, amulu apatuini tel wawan kakau tehu peti kan. Kahiti i haniwa tehu ing na i sohoa. ¹¹Ape kameiwa tel tame tehu ing kewak, ‘Tel masiwi kamekam, tetesol ia na i ang tehu angiaian ti Pasova kapi tesol kahikahin?’ ¹²I kola hani amulu tesol tonain ti leili ing teke patul, lawe waliko ti angiaian leilon. Apesenewa anakako ien.” ¹³Ti lalu nahih haniwa Jerusalem, lalu tunahi lawe waliko masin ti Jises kakawen. Ape lalu apesen an ti Pasova ien.

Jises ang tehu angiaian ti Pasova kapi tesol kahikahin

Mt 26:26-29; Mk 14:22-25; 1 Kor 11:23-25

¹⁴Ti ape lolohan, Jises to ang akati tesol huopanim huhua aposel. ¹⁵I hone lato, “Nga hoi pahak wanen nga ang tetehu angiaian ti Pasova ie kapimuto imat ti nga kau kawatan. ¹⁶Nga kakane hawane amuto, nga kum ang ulea angiaian ti Pasova atengi taen ti nenein ti Haeu i sohot xeu.”

¹⁷Ape Jises waxi tehu kap hina waen, i kak kemulik hani Haeu ape i ukek, “Waxiwa tehu kap ape un seiwa wasolamuto. ¹⁸Nga kum un ulea waen atengi taun ti amuam leili tone Haeu.”

¹⁹Ape i waxi teik bret, i kak kemulik hani Haeu, i wiki sei hani tesol kahikahin ape i ukek, “Ie tupuak nga hani Haeu. Nga hani i lehe nga mat ti kaui kawatan ti lialui woumuto. Amuto wiki seiwa bret masin ti koko ailele tetelao. Amuto ailele kapitiniwa ti namenai mateak.”

²⁰Ti lato ang kewa i waxi tehu kap waen ape i ukek, “Ie se kakauk i xiweu ti kolakol ka Haeu oxoxi seilon ti kawatan ti lialui woula ha na namilolaha xoxoaan tetan. Mateak i kola hapoponow ka Haeu xinoti tenen namil haun kapi seilon. ²¹Tuah lelokako ie tel seilon i hangaini nga hani teka teleiak. ²²Nga tel Nati Seilon, hoi liai nga mat masin ti Haeu namiloiwen. Tuah Haeu axi hawane kawatan hani tel hangainiak.” ²³Ape tesol aposel he

kamekam alia puki lato aita wanen lehe i aile saun tenen ien.

Aita tel pate tuah?

Mt 20:25-26; Mk 10:42-45

²⁴Muhin ien tesol aposel he lungelung aita tel pamu tuah leilolato. ²⁵Jises hone lato, “Amuto tioi ka kewi teka masiwi ti he tehu pon ie lato neini halialu teka seilon hahitakalape lato lungei laha ka tua hongoa lato. Ape teka masiwi ien namilo ukek ka lato seilon ti huhual. ²⁶Tuah amuto kum aile hahanowi woulato. Tel pate tuah leilomuto i teheni aliakewa i hualiai seilon liai ma tel masiwi i kewa masin tel unauamuto. ²⁷Aita pamu masiwi, tel i to angiang ka tel lohiai anan? Se tetel i to angiang. Tuah nga kakane amuto, kalak nga tel masiwi, nga puas hanowi tel tuah unaui seilon ti nga kapimuto. ²⁸Nga paxai tioi ka lawe amuto tu xox kapik kakal nga kau kawatan ma moloan. ²⁹Masin ti tel Tamak Haeu kilamiwen nga neiniae seilon, nga kilami ulei amuto. ³⁰Imuh amuto ang ma un amuam kapik leili tone Haeu. Ape amuto uke tesol tonain ti kolongenai saun ti teka seilon ti Haeu.”

Jises kak kilami ka Pita ase

Mt 26:31-35; Mk 14:27-31; Jn 13:37-38

³¹Jises kakane Pita ukek, “Saimon hon-goa! Haeu sowini hani Satan puas eliel tohongi lali amuto hatesol na xoxoi namilom hani Haeu i tapo. Ie masin wanen peni api laha selai ti apieun. ³²Tuah nga kamei eliel Haeu ti hualiam lehe namilom i xoxatale tetan. Ape na o towiahu ti lialui woum hani Haeu, huali haxoxoa namili teka kahikahik hani i.”

³³Tuah Pita ukek, “Xoxoi namilok hani Haeu i kum tapo kakal na laha kalabusi nga ma na telei nga ohoi o.”

³⁴Jises ukek, “Nga kakane hawane o, imat ti tok mom wawan kokoini ipong tetehu, o putini ka o kum tioi wanen nga uke he tololuhi.”

Jises kakak kawatan ti i lulainima

³⁵Ape Jises kamei tesol kahikahin ukek, “Amuto nameni ti nga talomu amuto ailei puasak, nga hone amuto kum kau hehetekie moni ma kakumuto, ma tin kum ngah hahasea axahe aemuto. Nakon hina waliko amuto tae ti lokon ien?”

Lato pahoi ukek, “Tap.”

³⁶Jises ukek, “Tuah aeope ie na amuto ailei puasak, amuto tunahi kawatan tenen

tenen. Aile ape amuto apeas aluawa.
³⁷ Waliko ti Haeu kakawen i sohot hani nga, sikole ape i sohot ti i ukek, ‘Laha aile hani i hanowi tel seilon woun lialun.’” (Isa 53:12)

³⁸ Tesol kahikahin ukek, “Amite apeas wen. Hua ngol weluwelun ti hile ie.”

Tuahe Jises ukek, “Ape tapan. Kum kakak waliko tenen ien.”

Jises lotu he Maunt Oliv

Mt 26:36-46; Mk 14:32-42

³⁹ Muhin ien Jises nahih ahuta ti Jerusalem ape i nahih hani tehu Maunt Oliv, masin ti lawe i ailele. Ape tesol kahikahin kahiti i. ⁴⁰ Taen ti lato tahiawa, i kakane lato ukek, “Amuto lotu petawa lehe totohong kum haputa amuto.”

⁴¹ Jises nahih ahewa teik, i lokuba ape i lotu. ⁴² I ukek, “Tel Tamak Haeu, na lom al, xaxaweniwa tehu lalape kawatan ti lehe i tunahi nga. Tuahe pahak nga usi namilom.” ⁴³ Taen ien tel engel, spirit solian ti Haeu, sohot hani kapin hakuian. ⁴⁴ Tian kawat eliel hawane ape i lotu eliel ahe. Mapuen masin tuhui kaka i put haniwa itan.

⁴⁵ I lotu kewa ape i nahih alia hani kapi tesol kahikahin. I tunahi lato mamatih nake tialato xuhai tatahan. ⁴⁶ I kamei lato, “Alahan amuto mamatih? Amuto xahatawa ape lotu petawa lehe amuto xoini totohong ti Satan na i tunahi amuto.”

Xotiai Jises

Mt 26:47-56; Mk 14:43-50; Jn 18:3-11

⁴⁷ Jises kakak tutuen ti Judas hakahitama teku seilon. I tel ti tesol huopanip huuha kahikahin Jises. I nahih xohiwa ape i asoi taliope Jises. ⁴⁸ Tuahe Jises ukek, “Alahan o asoi nga hanowi kalu lohun a lehe ape o hangaini nga tel Nati Seilon?”

⁴⁹ Ti tesol kahikahin paxai tioiwa ka laha tahiama pohiai Jises lato ukek, “Tel masiwi, kae amite hil pahoi lato? Amite hina ngol weluwelun ti hile.” ⁵⁰ Ape tel ti kahikahin Jises tai kota haputa taxing tepaun sai manau ti tel unaui tel masiwi tapein ti hukuminiai Haeu ma seilon.

⁵¹ Tuahe Jises ukek, “Kum hilehil.” Ape i aile hasolia aliake taxingti tel seilon.

⁵² Muhin ien i hone teku masiwi tuah ti hukuminiai Haeu ma seilon, teku masiwi ti teku peteniai Ingi Haeu ma teku masiwi ti Ju liai, i ukek, “Amuto kauma ngol ma pata ti hile hanowi ka nga seilon lengean.

⁵³ Lawe ngaini nga hahanau teku seilon leili Ingi Haeu a amuto tai xoti nga. Tuahe ie

taun ti Haeu haniwen amuto xotiak. Teik taun kukunun Haeu sowini hani Satan neini amuto aile halialuak.”

Pita ase ka i kum tioi Jises

Mt 26:57-58, 69-75; Mk 14:53-54, 66-72; Jn 18:12-18, 25-27

⁵⁴ Laha xotiwa Jises ape hakahita i hani tehu ingi Kaiapas, tel masiwi tapein ti hukuminiai Haeu ma seilon. Pita nahih paxai otioi Jises ti tesol pala xauxaun. ⁵⁵ Ti lato tahiawa, teka peteniai ingi Kaiapas hahawia tehot ah mate ing ape Pita to hah akati lato. ⁵⁶ Tel hehin unaui Kaiapas paxai kapitini Pita ape i ukek, “Tel seilon ie tin tel ti tesol kahikahin Jises.”

⁵⁷ Tuahe Pita ukek, “Oie, nga kum tioi tel seilon ien!”

⁵⁸ Tai kue tel seilon liai ningahi Pita ape i ukek, “O liai tel ti lato!”

Pita pahoi ukek, “Kumahe, nga tap.”

⁵⁹ Imuh tel liai kak ulea ukek, “Tel seilon ie liai lawe kapi Jises nake i ti Galili.”

⁶⁰ Tuahe Pita pahoi ukek, “Oie, waliko ti o kakak kumahe salan.” Ti Pita kakak tutuen tok mom wawan kokoiniwa.

⁶¹ Lokon ien wanen Jises xeisa pax sawi hani Pita ape Pita nameni aliake kakai Jises ti i ukek, “Imat ti tok mom wawan kokoini ipong tetehu, o putini ka o kum tioi wanen nga uke he tolulu.” ⁶² Pita sohot ape i tang tahane hawane.

Jises tu ti sulusulu

Mt 26:59-68; Mk 14:55-65

⁶³ Teka peteniai Jises laha mal soxeni ma xai i. ⁶⁴ Lato xioti atuhu pulan ape hone i, “Na o Krais, tilawa tetel i xaxai o!” ⁶⁵ Lato towi hakila kakain tenen pate lialun hani i.

⁶⁶ Ti letua teku masiwi tenen tenen ti teku Ju, laha apuhu hukuma. Leilolahe tesol masiwi tuah ti hukuminiai Haeu ma seilon ma tesol hanaua naura ti Moses. Ape laha ati Jises hani mateiwa laha. ⁶⁷ Ape teku ti laha ukek, “Kaxi hanima amite na salan o Krais.”

Tuahe i pahoi ukek, “Na nga kaxi hani amuto, amuto kum soh. ⁶⁸ A na nga kamei amuto nake lahan amuto kum soh nga Krais, amuto kum pahoi nga. ⁶⁹ Tuahe nga kakane amuto, tai kue nga tel Nati Seilon, nga to he tepaun min manau ti Haeu tel pohen wanen, neiniai seilon kapin.”

⁷⁰ Laha hatesol kamea, “Na masin ien, nakon o tel Nati Haeu?”

I pahoi ukek, “Puki namilomuto ukek ien.”

⁷¹ Ape laha ukek, “Kako kum ngah ulea seilon suluan. Amuto hongoen i ukek i tel Nati Haeu.”

23

*Jises tu mate Pailat ma Herod
Mt 27:1-2, 11-14; Mk 15:1-5; Jn 18:28-40*

¹ Muhin ien hatesol masiwi ti tehu apuhain ien, laha tua ape ati Jises hani kapi Pailat, tel ti teka masiwi ti Rom kiliwakai Judia. ² Ape laha aile tanomi ngah kakain ti suluan, laha ukek, “Tel seilon ie hahika teka seilon ti amite pahoiai teka masiwi ti Rom laha neneini amite. I hone laha kum hahani Sisa, tel masiwi tapein ti Rom, moni ti pahan. Ape i ukek i tel masiwi ti teka seilon ma i Krais, tel Haeu taloma.”

³ Pailat kamei i, “Nakon o tel masiwi tapein ti teka Ju?”

Ape Jises pahoi ukek, “Puki o kak ukek ien.”

⁴ Ape Pailat hone teka masiwi tuah ti hukuminiai Haeu ma seilon, ma teka laha apupuha, i ukek, “Nga tai tunah tenen na i pon suluiai tel seilon ie.”

⁵ Tuahela laha lungelung eliel ahe ape laha ukek, “I hanau hahalialu hatesol seilon ti Judia. I hutui leili Galili ape i tamus hahanima ie.”

⁶ Ti Pailat hong kewak ien, i kamea, “Nakon tel seilon ie i ti Galili?” ⁷Ti i tioiwa ka Jises i ti xux ti Herod ngangahati, i talo Jises hani kapi Herod i tin Jerusalem lokon ien.

⁸ Herod amuam hawane ti i ningahiwa Jises nake i hongoen axan. Kue hawanewen pahan i paxai. Pahan Jises aile kolawa waliko tenen lalap ti kui poh lehe i paxai.

⁹ Ape Herod kamei hakila hawane Jises kamekame tuahe i tai kak pahoi na tenen.

¹⁰ Teka masiwi tuah ti hukuminiai Haeu ma seilon, ma teka hanau nauna ti Moses tutu ien ape lato eliel hawane suluiai Jises.

¹¹ Aile ape Herod ma tesol unauan ti hile lato soxeni Jises ma lato kak teheni halialu hawane i. Lato puxui i tehu puxux pate solian hanowi ka i tel masiwi ape lato talo aliaka i hani kapi Pailat. ¹²Kemuk, Herod ma Pailat lalu he wawatak tuahe ngain tehu ien ape lalu loholoh.

¹³ Muhin ien Pailat apuhini teka masiwi tuah ti hukuminiai Haeu ma seilon, teka masiwi liai ti teka Ju ma teka tuahe seilon.

¹⁴ Ape i hone laha ukek, “Amuto ati hanima nga tel seilon ie, amuto ukek i hahika teka seilon pahoiai nenein ti amite teka masiwi

ti Rom. Nga kamei nihehi paxaiwen i he matamuto ape nga tunahi ka kakaiamuto i kum pon suluan. ¹⁵ Herod tin i tai tunah tenen waliko lialun na i ailewen, aile ape i talo aliaka i hanima kapi kako. Tap tenen waliko tel seilon ie ailewen ti i tapai na telei i. ¹⁶Aile ape nga hani teka unauak ti hile heti i ape hanahi lioi.”

*Laha eliel teleiai Jises
Mt 27:15-26; Mk 15:6-15; Jn 19:4-16*

¹⁷ Leili taun ti Pasova, tehu angiaiin lalap ti nameniai ngain ti Haeu waxi aliaka teka Ju ti Igip, saun ti tel masiwi Pailat i ahuti tel ti teka kalabus, tetel ti teka seilon pahahaha. ¹⁸Hatesol seilon laha apupuha kapin laha ausini ukek, “Teleiwa Jises ape oxoxi hanima amite Barabas!” ¹⁹Barabas i kalabus kapi teka seilon tuaun nake latō hil pahoi teka masiwi ti kiliwakei xuxulaha teka Ju. Leili hilehile i telei hina seilon.

²⁰ Pailat pahan i oxoxi Jises, aile ape i kamei ulei teka seilon. ²¹Tuahe laha tilol pahoi ukek, “Teleiwa i! Tahi hakeawa i he kros.”

²²Pailat hone tuhi ulea laha ukek, “Waliko la lialun i ailewen? Nga tai tunah tenen waliko na i ailewen ti i tapai na telei i. Aile ape nga hani teka unauak ti hile heti i ape nga hanahi lioi.”

²³Tuahe laha tilol ausini tatale ka teleiwa Jises. Titilolo ti laha i aile ape Pailat sowini hani laha. ²⁴Aile ape Pailat usi namilolahe ape i noseni ka telei Jises. ²⁵I oxoxi hani laha tel pahahaha, tetel i kalabus ti hilehile ma telei seilon. Ape i hone teka unauan ti hile tahi hakeai Jises he kros pata.

*Lato tahi hakea Jises he kros pata
Mt 27:32-44; Mk 15:21-32; Jn 19:17-27*

²⁶ Ti teka unaui Pailat ti hile hakahitawa Jises, lato apatuini tel seilon axan Saimon nahih hahaniwa taon. Ape lato lungei i kau usiai Jises teik kros ti Jises kakau. ²⁷Kilan wanen seilon nanahima muhi Jises. Leilolaha teka hehin lato tang tatahane i. ²⁸Jises paxaiwa lato ape i ukek, “Hehin ti Jerusalem, kum tangixi elielilnga, amuto tangixi elielawa puki amuto ma natumuto. ²⁹Ngain i luluanima laha aile halialu Jerusalem ape telao ien amuto ukek teka hehin tap akaik laha amas. Teka hehin liekeh ma teka laha tai hasuhu akaik laha amas. ³⁰Ti lapape kawatan ma moloan, teka seilon hone tesol maunten masin ti tel kuluiak kakai Haeu kakawen, ‘Put tihini teleiwa amite.’

(Hos 10:8) ³¹Ti

laha aile halialu nga tel seilon sawisawin, ien masin ka laha lui salo moihin, i kum lula tapo. Tuahae Haeu pamu i axi kawatan hani teka seilon laha kum towiahu ti lialui woulaha. Ien masin salo paxean i lua tapo hawane.”

³² Teka seilon ti hile tin lato ati hetekie hua seilon woulalu pate lialun lehe telei akati Jises. ³³ Ti lato tahia haniwa tesol axan “Tetesol tanoman masin kui pati seilon,” teka seilon ti hile tahi hakea Jises he kros pata. Muhiin lato tahi hakea huhua liai, tel teapaun manau ape tel sai kalamau ti Jises.

³⁴ Ti Jises patul he kros i ukek, “Tel Tamak Haeu, oxoxiwa teka seilon ie ti kawatan ti tenen saun lialun ie nake laha kum tioi waliko tenen laha ailele.” Ape teka seilon ti hile lato halokeni satu ti upiai tetel i uke tetenen ia ti tesol sose Jises.

³⁵ Teka seilon tu paxapax a teka masiwi ti teka Ju kak soxeni Jises ukek, “I huali teka seilon liai. Na masin salan i Krais, tel Haeu kilami ma taloma, i huali aliakewa i!”

³⁶ Teka seilon ti hile tin lato kak soxeni i. Lato nahih hani kapin ape axi unuman waen wangingian. ³⁷ Ape lato ukek, “Huali aliakewa o na o masiwi tapein ti teka Ju!”

³⁸ Teik kakain ti suluan lato tahi hakea onote patun i kak ukek, “TEL MASIWI TAPEIN TI TEKA JU”

³⁹ Tel ti huhua seilon laha hakea kapi Jises, i soxeni Jises ukek, “Na o Krais, hualiwa kako.”

⁴⁰ Ape tel liai tumei i ukek, “Namiloiai Haeu nake o tin ape o mat. ⁴¹ Sawisawin wanen ti laha telei kalu. Kawatan ti kalu uke, i hapono hawane saun ti kalu ailewen tuahe tel seilon ie i tai aile tenen waliko lialun.”

⁴² Ape i ukek, “Jises, taen o toa Masiwi ti neiniae lawe seilon, tahanema nga.”

⁴³ Jises hone i ukek, “Nga kakane hawane o, taen tetelao o soh akati nga hani tone Haeu, tesol ti amuamu tap tahi tapoan.”

Matei Jises

Mt 27:45-56; Mk 15:33-41; Jn 19:28-37

⁴⁴ Ti lape ngain, hatehu xux i tilok ti leili aua tolulu. ⁴⁵ Tataen ien wanen Haeu lexi teik maia i akeak leili tehu Ingi Haeu, ti patul haniwa taen itan. ⁴⁶ Ape Jises tilok eliel ukek, “Tel Tamak Haeu, nga hana nga hani he minam.” I kak kewak ien ape i mat.

⁴⁷ Tel masiwi ti teka seilon ti hile i namiloiai paxai hatesol waliko ti i sosohot ti Jises mat. Ape i sameni Haeu. I ukek, “Salan wanen, tel seilon ie seilon sawisawin, i tai

aile tenen na saun lialun.” ⁴⁸ Kilan seilon laha apupuha ti paxapaxa tin laha paxai tioi ka i seilon sawisawin ape laha alia hani tonalaha hetekie lalape tatahan. ⁴⁹ Ape teteka laha tioi Jises, laha tu siasia papaxai waliko ti sosohot lokon ien. Leilolahe tesol hehin lato kahitima Jises ti Galili hani Jerusalem.

Tihiniae Jises

Mt 27:57-61; Mk 15:42-47; Jn 19:38-42

⁵⁰ Ti ien tel seilon sawisawin axan Josep ti tehu taon Arimatea leili Judia. I tel ti teka masiwi ti teka Ju ape i atetengi taun ti Haeu neini lawe seilon. ⁵¹ Kalak i tel ti teka masiwi, i kum amuke namil ti lato ailewen teleiai Jises. ⁵² I nahih hani kapi Pailat ape i kamei na i waxy auni tupui Jises.

⁵³ Ti Pailat sowini haniwa i, Josep ma teka hualian hamosu tupui Jises ape lato puxui talini i teik maia weluwelun. Muhiin lato hana i hani leili amal tenen laha tanomi he pot patul ti hepekeun. Tehu amal ien laha tai hahana tupui seilon. ⁵⁴ Sai ape alohah ti ngain ti apesenial Sabat.

⁵⁵ Tesol hehin ti lato kahitima Jises ti Galili, lato nahih usi tamusuke Josep hani he amal ape lato paxai ti i hana tupui Jises.

⁵⁶ Muhiin ien lato nahih alia ape apesenai sanda lehe lato ahui hani tupuan. Lato tai aile telao ien nake lato hanau telao Sabat usiai nauna ti Moses.

24

Jises xahat ti matean

Mt 28:1-10; Mk 16:1-8; Jn 20:1-10

¹ Pate letu ti Sande, tesol hehin nahih hani he tehu amal. Lato kaua sanda ti lato apesenien. ² Lato ningahi tehu pot laha uke sioniai amali Jises ape hulinan.

³ Ape lato soh hani leilon tuahe lato kum niningah tupui tel Masiwi Jises. ⁴ Lato tataxini ape tua tu lalolal. Hua seilon take hahutua hani kapi lato. Puxuaulalu xeu talepalep hawane.

⁵ Tesol hehin mamata hawane ape lato loka laukua hani itan. Huhua seilon ien hone lato ukek, “Kalahai amuto pax upiup tel seilon moihin he tone teka maten? ⁶ I kumahe ie. I moih aliawen! Nameniwa kakaiyan ti i kakane wen amuto ti Galili. ⁷ Lokon ien i ukek, ‘Nga tel Nati Seilon, hoi liai laha hana hani mini teka seilon woulaha lialun. Laha tahi hakea nga hani he kros ape nga mat tuahe muhi ngain tolulu nga moih alia.’”

⁸Ti tesol hehin hongoa, lato nameni ali-ake kakai Jises. ⁹Lato nahih salili amal ape lato kaxi hatapo waliko ti i sosohot hani tesol huopanim tel kahikahi Jises ma teka kapi lato. ¹⁰Tesol hehin kaxiai tenen meng ien hani tesol aposel, axalato Mary Magdalene, Joana, Mary tel tini Jeims ma hina hehin liai. ¹¹Tuahe lato sokok tesol hehin tua kak lalolal ma lato kapaxe. ¹²Tuahe Pita tua ape i kiliwau hani he tehu amal. I wana hani 'leilon ape i ningahi mewenae teik maia puxuiai Jises. I nahih alia hani kapi tesol liai ape i to namiloi tataxini waliko ti i sosohot.

*Hua kahikahi Jises nahih hani Emaus
Mk 16:12-13*

¹³Ngain tin tetehu, hua kahikahi Jises nahih hani tewau toan axan Emaus, sai masin huopanim tehu kilomita xauxaun ti Jerusalem. ¹⁴Ti lalu nanahiwa, lalu he kakak lawe waliko ti i sohotuen. ¹⁵Ti lalu to kakak, Jises sohot hani kapi lalu ape i nahih akati lalu. ¹⁶Tuahe lalu kum ila tioi i nake pulalulu masin i kum xeu.

¹⁷Jises kamei lalu, "Amulu he kakak waliko la?"

Lalu tu hamalum, kawalalu kola ka lolalu pate teluan. ¹⁸Tel ti lalu axan Kleopas hone Jises, "Oheak mewenae o leili teka seilon ti laha nahih haniwa Jerusalem kum tioi waliko ti i sosohot ien hina ngain tamusuen."

¹⁹I kamea, "Waliko la?"

Lalu pahoi ukek, "Waliko ti i sohot hani Jises ti Nasaret, tel kuluiai kakai Haeu. Haeu hapohea i ape kilan seilon sameni pohe kakaian ma puasan. ²⁰Teka masiwi tuah ti hukuminiai Haeu ma seilon ma teka masiwi liai ti kaha, lato aile namil ti teleian ape hani laha tahi hakea Jises hani he kros ape i mat. ²¹Aiha sokok i se tetel oxoxiai teka seilon ti Israel ti hahitake teka Rom ma kawatan tenen tenen. Tuahe laha telei i ngain tolulu tamusuen a tap tenen waliko sohotuen. ²²Ape tetelao menge tesol hehin kahikahi Jises ti lato aliamai he tehu amal i hahataxina amite. ²³Lato kum ninginah tupui Jises. Lato ukek lato ningahi hina engel ape teka engel hone lato ka Jises ape moihin. ²⁴Aile ape teka ti amite nahih hani he tehu amal ape lato ningahi masin wanen ti tesol hehin kakaxi tuahe lato tai ningahi Jises."

²⁵Ape Jises hone lalu ukek, "Patumulu pate ailan. Pate amuto soh hahakokol hatesol waliko ti teka kuluiai kakai Haeu kakawen. ²⁶Hoi namily Haeu ka Krais kaum

lalape kawatan ma moloan ape muhin Haeu hamoiha i ape waxi hani tesol tonain tuah leili tonan." ²⁷Ape Jises nexi hani lalu ka waliko ti Moses ma hatesol teka kuluiai kakai Haeu taiwen kakak alia i.

²⁸Ti lato xohi haniwa Emaus, Jises lehe i nahih ahe. ²⁹Tuahe lalu ukek, "O tilimuen kapimili nake sikole ape i tilok." Ape i soh akati lalu.

³⁰Ti lato to ang, Jises waxi teik bret, i kak kemulik hani Haeu, i wiki ape i hani lalu. ³¹Tataen ien pulalulu xeu ape lalu ila tioi Jises. Muhiin ape i kaluta ti lalu. ³²Ape lalu kakak alia puki lalu ukek, "Ti kako he aweisal, tiakalu i amuam hawane ti i kakak kapi kalu ma nexi hahani kalu kakain ti he pepai Haeu."

³³Lalu tu huluta ape lalu nahih alia hani Jerusalem, tetesol huopanim tel kahikahi Jises ma teka kapi lato apupuha. ³⁴Lato kakane lalu ukek, "Salan wanen! Tel Masiwi Jises i moih aliawen. Tin i sohot haniwen kapi Saimon Pita."

³⁵Ape lalu kaxi hani lato waliko ti i sohot he aweisal. Lalu ukek, "Ti Jises wiki teik bret, tataen ien wanen ape amili ila tioi i."

Jises take hahutuia hani kapi tesol kahikahin

Jn 20:19-23

³⁶Lokon ti lalu to kakaxi hani lato tesol waliko ien, Jises take hahutuia hani kapi lato ape i hone lato ukek, "Amuam ti Haeu hani amuto." ³⁷Lato ong mamata hawane nake lato sokok lato ninginah hosai tel seilon maten.

³⁸Tuahe Jises ukek, "Alahan amuto mama? Ala amuto kum kakapaxe ka nga moih alia. ³⁹Paxaiwa minak ma aek ka salan wanen nga. Sotima nga lehe amuto tioi ka nga tel seilon moihin. Hosai seilon maten tap tupuan masin ti amuto ningahi ng aha." ⁴⁰I kak kewa ape i kola hani lato minan ma aen.

⁴¹Lato ong ma amuam hawane tuahe namilylato i uke huai. Aile ape i katei lato an. ⁴²Ape lato hani i teik xixi lelean. ⁴³I waxi ape i ani he pulalatu.

⁴⁴Muhin i hone lato, "Ti nga tutuen kapimuto nga honewen amuto ka waliko ti laha taiwen leili pepai Moses, teka kuluiai kakai Haeu ma leili pepai Salm i kakak nga, liai i sohot poponowi."

⁴⁵Ape Jises haxewa namilylato sale kakain ti leili pepai Haeu. ⁴⁶I hone lato, "Kakain ti leili pepai Haeu i ukek ka Krais tunahi kawatan ma moloan lalap ape i

mat tuahe muhi ngain toluhu i moih alia.⁴⁷ Hutui ti Jerusalem teka kahikahik sawatensi meng solian ti Haeu hahitake axak hani teka seilon ti lawe xux. Teka laha towiahu ti lialui woulaha, Haeu oxoxi laha ti kawatan ti saun lialun ti laha.⁴⁸ Amuto kaxi hatapoa waliko ti amuto ningahiwen i sohot hani nga ma hatesol waliko ti nga hanauen seilon.

⁴⁹ “Ape nga hani amuto Holi Spirit masin ti tel Tamak Haeu kakawen. Amuto tiliwen Jerusalem atengi taen Holi Spirit haniwa amuto poh ti ailei puasak ma ti kapitia-muto.”

Jises alia hani kapi tel Taman Haeu

Mk 16:19-20; Apo 1:9-11

⁵⁰ Muhiin ien Jises hakahita tesol kahikahin ti Jerusalem hani taen tewau toan Betani. I tulini minan hani patul ape i kamei Haeu ti hualialato.⁵¹ Ti ien Haeu waxi i hani tesol tonan patul.⁵² Ti Jises saliliwa tesol kahikahin, lato lokuhape lotu sameni i. Muhiin ape lato nahih alia hani Jerusalem hetekie lalape amuam.⁵³ Lawe ngain lato nahih hani Ingi Haeu. Lato lotu sameni Haeu ma kak kemulik hani i ti lawe waliko i ailewen.

Jon

Meng solian ti Jises tataiai Jon Kakain ti haxewai tenen meng ie

Jon tel aposel tai tenen meng solian ie sai ahang 60 muhin ti Jises moih aliawia ape Haeu waxy i hani tesol tonan. I tel ti tesol huopanum huhua aposel ti Jises. Lawe i to nahih akakati Jises. I papaxai pupuasan ma hongohong nauna tetan. I tai teik pepa ie lehe lawe seilon soh hawane ti Jises Krais ape laha to kapi Haeu lian tehue. Jon kaxi haxewa ka Jises i se Kakai Haeu ma tin Nati Haeu, tetel i takah he tehu pon ie ape i kola haxewa Haeu hani kaha lehe kaha tioi hawane i. Jises aile kilan waliko tenen lalap ti pohe Haeu lehe teka seilon soh ka i se tetel awaiakaha ti kawatan ti lialui woukaha. I se aweisalukaha hani tel Tamakaha Haeu. I tel kaxiai kakain salan sale Haeu ma tel haniai tonain kapin ti tap tahi tapoan. Teka laha soh tetan laha hong usi nauna tetan. Teka liai laha tale tehitolahia hani Jises ape laha telei i. Tuahie i moih aliawen ape aope ie i kapi Haeu ma Masiwi ti lawe waliko.

Jises Krais se Kakain i ahuma ti Haeu

¹Ti uli hutu lawe waliko tetel i Kakain i liai hoi ien. I kapi Haeu ma i se Haeu. ²Uli hutu lawe waliko i hoi liai kapi Haeu.

³Haeu hapanusa i ti tanomiai lawe waliko. Na Haeu kum hapanusa i, tap wanen tenen waliko tanomawen. ⁴Tetel i Kakain i to kapi Haeu lian tehue ape i tetel haniai seilon tonain kapi Haeu ti tap tahi tapoan. I masin xewai alon. I haxewa hani seilon lawe waliko. ⁵I hokai haxewa tilokoi namili seilon ape tilokoan kum pon tipehanian.

⁶Tel seilon axan Jon Baptis, Haeu talo i hani kapi teka seilon ailei pupuasan. ⁷I kaxi hani laha tetel masin xewai alon lehe lawe seilon soh tetan. ⁸Puki Jon kumahe tetel masin xewai alon, i tua kaxi haxewa hahania laha tel masin xewai alon. ⁹Tetel masin xewai alon i tahia hanima hatehu pon itan ie lehe i haxewa hawane lawe waliko salan ti Haeu.

¹⁰I hoi lawe kapi Haeu ape Haeu hapanusa i tanomiai tehu pon itan ie tuahie ti tahiamia, teka seilon kum paxai tioi i.

¹¹I lula haniai xuxun tuahie puki teka akikin kum tani waxy i. ¹²A teka laha tani waxy i ape laha soh tetan, i huali laha sohot nati

Haeu. ¹³Kumahe laha sohot nati Haeu ti sale nenex, ti namili seilon ma na isiai wawan ti hatanoan. Puki Haeu aile, ape laha sohot natun.

¹⁴Tetel i Kakain i sohot seilon hanowi kaha ape i luama to kapi kaha ti tehu pon itan ie. Kaha ningahi lalape pohen ma soliaian, tel pate tuah wanen i luama ti Haeu tel Taman. Tap tel soliaian masin tetan. Ti soliaian i kola lalape wawahen ti Haeu hani kaha ape i kola hatakei lawe waliko salan ti Haeu.

¹⁵Jon kaxi hani seilon sale tetel i Kakain ti i ukek, “Tel seilon ien i tetel nga kakaxi ti nga ukek, ‘Tel na i luainima muhik i pamu masiwan tetak nake i hoi imat tetak.’”

¹⁶Ti lalape soliaian i to aile hasolia hawane hahani kaha. ¹⁷Moses hani kaha nauna ti Haeu tuahie Jises Krais aile kola lalape wawahen ti Haeu hani kaha ma lawe waliko salan ti Haeu. ¹⁸Tap tel ningahiwen Haeu. Tuahie telawae Natun i kola haxewa hani kaha seilon. Tel Natun se he aten wanen ma i se Haeu.

Jon Baptis aita wanen?

Mt 3:1-12; Mk 1:1-8; Lk 3:1-18

¹⁹Telao teka masiwi ti teka Ju leili Jerusalem talo teka masiwi ti hukuminiai Haeu ma seilon ma teka puase leili Ingi Haeu hani kapi Jon Baptis lehe laha kamei i, “O aita? Nakon o Krais?”

²⁰Jon kum puluhini, i kak haxewa ukek, “Nga kumahe Krais.”

²¹Laha kamea ulea, “A o aita wanen? Nakon o Elaija?”

Jon pahoi ukek, “Nga kumahe Elaija.”

Laha kamea ulea, “Nakon o tel kuluiai kakai Haeu masin Moses?”

Jon pahoi laha ukek, “Kumahe.”

²²Laha kamea ulea, “A o lahe seilon? Haxewa hanima amite lehe amite tioi hahongoi teka laha taloma amite.”

²³Ape Jon tua uke teik kakai Aisaia tel kuluiai kakai Haeu i ukek, “Nga tel i titiloh hani seilon he lohong,

“Towiahua ti lialui woumuto
lehe tel Masiwi neini amuto taen i
tahiamal!” *(Isa 40:3)*

²⁴Tesol seilon teka Parisi taloma, lato kamei Jon ukek, ²⁵“Kalahai o baptaisi seilon na o kumahe Krais, kumahe Elaija, ma tin kumahe tel kuluiai kakai Haeu masin Moses?”

²⁶Jon pahoi ukek, “Haeu sowini hani nga baptaisiai seilon ani kan tuahie ti wasolamuto tel seilon tuah amuto kum paxai tioi.”

²⁷ I tel puasama muhik. Masiwiaian ala i kum pon nga unauan.”

²⁸ Hatesol waliko ie i sosohot leili tewau toan Betani ti sai angiba pape kan Jodan, tetesol Jon baptaisi teka seilon.

Jises masin sipsip uluha teka Ju telei hani Haeu

Mt 3:16-17; Mk 1:10-11; Lk 3:21-22

²⁹ Ngain liai telao Jon ningahi Jises nahih hahaniima kapin ape i ukek, “le se tetel Haeu taloma lehe i mat hanowi sipsip uluha ti laha telei hani Haeu. I aile ape Haeu oxoxi seilon ti kawatan ti lialui woulaha. ³⁰ Seilon tetel nga kakak ti nga ukek, ‘Tel seilon na i luainima muhik, i pamu masiwian tetak nake i hoi imat tetak.’ ³¹ Imat nga kum paxai tioi i tuahe nga luama baptaisiai teka seilon ani kan lehe teka seilon ti Israel laha paxai tioi hawane i.

³² “Nga ningahi Holi Spirit mosulih ti he maun hanowi tok pux ape to kapin. ³³ Ape nga tioi i tetel nake Haeu, tel i taloma nga baptaisiai seilon ani kan, i kaxi hani nga ukek, ‘Tetel o ningahi Holi Spirit mos hanilih kapin i se tetel i hani seilon Holi Spirit ti kapitrialaha.’ ³⁴ Salan wanen, nga ningahi waliko ien i sohotuen ape nga kaxi hani amuto ka tel seilon ie se tel Nati Haeu.”

Teka uli laha sohotua kahikahi Jises

³⁵ Ngain liai telao Jon Baptis tutu kapi hua kahikahin. ³⁶ Ti Jises nahih tatamusua, Jon pax sawi hani i ape i ukek, “Paxaiwa, ie tetel Haeu taloma lehe i mat hanowi sipsip uluha ti laha telei hani Haeu.” ³⁷ Huhua kahikahi Jon hong kewak ien ape lalu nahih kahiti Jises.

³⁸ Jises tohea paxai tunahi ka lalu kakahitima i ape i kamei lalu, “Pahamulu waliko la?

Lalu pahoi i ukek, “Tel masiwi, o toto ia?”

³⁹ I pahoi lalu ukek, “Nahima paxai.” Lokon ien sai 4 kilok alohah. Ape lalu nahih kahiti i hani tonan. Lalu heuta kapin alohah hatehu.

⁴⁰ Tel ti lalu axan Andru ukale Saimon Pita. ⁴¹ Kiliwan wanen Andru upia tel ukalan ape kakane i, “Amite paxaiwen Mesaia.” Tenen kakain “Mesaia” i ukek, “Krais.”

⁴² Muhiin ien Andru hakahita Saimon hani kapi Jises. Jises paxaiwa i ape i ukek, “Axam Saimon, tetel nat i Jon, tuahe nga axai axam Kepas.” (Tenen kakain “Kepas” i ukek, “Pita” ma tin “tehu pot.”)

⁴³ Ngain liai telao Jises nahih hani Galil. I apatuini Pilip ape hone i ukek, “Kahitima

nga lehe o sohot kahikahik!” ⁴⁴ Pilip seilon ti Betsaida, taon tin tetehu ti Andru ma Pita.

⁴⁵ Pilip nahih upia Nataniel ape hone i, “Amite paxaiwen tel seilon ti Moses ma teka kuluiai kakai Haeu tai kakaxi. I Jises tel nat i Josep ti Nasaret.”

⁴⁶ Nataniel kamei i, “Kaie hina waliko solian ti Nasaret?”

Ape Pilip ukek, “Kahitima nga lehe o paxai.”

⁴⁷ Ti Jises paxaiwa Nataniel nahih hahaniima kapin, i ukek, “I tel seilon wanen ti Israel, i malang pulutiai seilon.”

⁴⁸ Nataniel kamei i, “O tioi nga ukek ia?”

Jises pahoi i ukek, “Imat ti Pilip tunahi o, nga tioiwen ka o to nanamiloi kakai Haeu hahitake tea pata fig.”

⁴⁹ Nataniel ausinike hawane, “Tel masiwi, o tel Nati Haeu! O se masiwi tapein ti Israel!”

⁵⁰ Jises ukek, “Nakon o soh tetak nake nga tioi ka o to nanamiloi kakai Haeu hahitake tea pata fig? Imuh o ningahi nga aile waliko tenen pamu lapan.” ⁵¹ Ape i hone lato, “Nga kakane hawane amuto, imuh amuto paxai tioi ka nga tel Nati Seilon se aweisal ti hukuminiai Haeu ma seilon masin ti Haeu kolawen ti leili paxangoi Jekop ti i ningahi teka engel han haniwa tone Haeu ma mos haniwa itan.”

2

Jises kolitini kan hani waen

¹⁻² Muhi ngain huohu, tehu salasala i sohot leili tewau toan Kana ti Galili. Leili teka seilon laha ilowi tel tini Jises hetekie Jises ma tesol kahikahin. ³ Ti leili salasala unumalaha waen i tapo ape tel tini Jises hone i, “Laha ape tapa waen.”

⁴ Jises hone i ukek, “Kumahe puasaku namiloan. I tai meima taun tetak ti Haeu kikilami.”

⁵ Tel tinan hone tesol ailei puasain ti sala, “Tua aile usiwa tenen na i hone amuto.”

⁶ Tepanim tehu peti kan ani pot hoi tutu ien, tehu tehu ti lato i akeni akulai 100 lita. Lawe teka Ju hapuasa ti nuhiai lawe waliko usiwa saun ti haunialaha ti puli Haeu.

⁷ Jises hone teka unaui tehu ing, “Utuhii tihiva kan hani tesol peti kan ie.” Ape lato utuhii tih atengi i xuh. ⁸ I hone ulea lato, “Utuhiiwa teik ape kau haniwa tel ngahatiai sala.” Salan, lato aile usi kakaian.

⁹ Ti tel ngahatiai sala namihiniwa, kumahe ape kan nake Jises kolitini haniwen waen. I kum tioi lato kema tetesol, tuahe

tesol utuhiai kan lato tioi. I tiloi tel seilon i sal ape i ukek,¹⁰ “Tel masiwi ti sala lawe i hanimu imat waen tenen pate solian ape imuh taen ti laha un ahoiwa, i hani waen ti kumahe pate solian. Tuahe o alolomeni waen tenen pate solian hani tapeinan.”

¹¹ Teik kolakol ien ti Jises aile leili Kana ti Galili i kola hutui ka i pate tuah wanen hetekie lalape pohen. Ape tesol kahikahin lato soh tetan.

¹² Muhin ien Jises ma tel tinan, tesol ukalan ma tesol kahikahin nahih hani tehu taon Kapenaum ape lato to teik ien.

Jises usi xaxaweni teka laha hangaini soxi mate Ingi Haeu

Mt 21:12-13; Mk 11:15-17; Lk 19:45-46

¹³ Lawe ahang teka Ju aile ang Jain lapal ti nameniai ngain ti lokon Haeu waxy aliale teka tamalahai ti matahaun ti Igip. Laha axai Pasova. Taun ti Pasova i xohiwen ape Jises nahih hani Jerusalem.¹⁴ Mate Ingi Haeu i ningahi hina seilon hahangaini bulmakau, sipsip ma pux ti seilon kahui ti hanhai Haeu. I ningahi hetekie teka laha toto pape sau sohi he kolikol moni kahuiai soxi.¹⁵ Ti Jises paxaiwa, i aile teik wakowak anital. I hape xaxaweni lawe manihuh, i towi silahoteni hatesol moni ape i aka suoteni tesol sau.¹⁶ I hone teka laha hahangaini pux, “Kau xaxaweniwa tesol waliko ie ape kum hahapuasa Ingi tel Tamak hanowi tone hangainiai soxi.”

¹⁷ Lokon ien wanen tesol kahikahin nameni kakain ti he pepai Haeu ti i ukek, “Wawahen tetak hani Ingi Haeu pate xoxoan wanen. Aile ape laha telei nga.”
(Ps 69:9)

¹⁸ Ti teka Ju ningahiwa ma hongoa, laha ukek, “Aita sowini hani o ailei tesol waliko ien? Kola hanima amite tenen kolakol lehe amite soh ka Haeu taloma o.”

¹⁹ Jises kak pahoi laha ukek, “Hamananawa Ingi Haeu ape leili ngain tolulu nga hatuhi aliake.”

²⁰ Ape teka Ju eseini hawane ukek, “Nakon o sokok o waxaini hatuhi aliakean ti leili ngain toluhue?⁴⁶ ahang hatuhiai tesol Ingi Haeu ie.”²¹ Tuahe laha kum xeu ka kumahe Jises kakak tetesol ing. I kakak puki i tehu Ingi Haeu.²² Imuh, taen ti Jises moih aliawa ti matean, tesol kahikahin nameni aliakema teik kakaina ien ape lato soh Jises ma kakain ti leili pepai Haeu.

²³ Aope ie, ti i Jerusalem, kilan seilon soh hawane tetan ti laha ningahiwa kolakol

lalap ti i aile leili Pasova.²⁴ Tuahe Jises tap namil xoxoan ti laha nake i tioi hawane woi lawe seilon.²⁵ I kum hapuasa tel na seilon kaxi hanian nake puki i tioi namili lawe seilon.

3

Jises ma Nikodimus

¹ Tel seilon masiwi ti teka Ju, axan Nikodimus. I tel ti teka Parisi.² Ipong tehu i nahih hani kap Jises ape i ukek, “Tel masiwi, amite tioi ka Haeu taloma o hanau seilon. Tap tel seilon pon ailei kolakol lalap ti lawe o ailele, mewenae na i hina pohe Haeu.”

³ Jises hone i ukek, “Nga kakane o kakain salan, Haeu kum neini wanen seilon, mewenae na i takah ulea.”

⁴ Nikodimus ong hawane ape i kamei Jises, “Seilon tenen hoi liai salaimat i takah ulea ukek ia? Seilon tenen i takahawen i kum pon soh alia hani tiai tinan lehe i takah ulea.”

⁵ Jises pahoi ukek, “Nga kakane hawane o, tap tel seilon Haeu po neini, mewenae na i takah ulea ti i sohot seilon haun ti pohe Holi Spirit.⁶ Seilon hanatuale seilon tuahe mewenae Holi Spirit i pon towiahualaha hani natu Haeu.⁷ Aile ape kum ongaongti nga hone o ka amuto hatesol takah uleawa.⁸ Aupol ah hani tesol tesol ti pahan. Seilon hong tangian tuahe i kum tioi tetesol ti aupol ahoma ma tetesol i ahua. Tin masin seilon kum xeu sale Holi Spirit ti i towiahua laha hani natu Haeu.”

⁹ Nikodimus kamei Jises, “Tesol waliko ien sohot ukek ia?”

¹⁰ Jises pahoi i ukek, “O tel seilon tuahe hanau i teka Ju a o kum tioi tenen nga kakak.¹¹ Nga kakane hawane o, nga ma tesol kahikahik amite kakaxi waliko ti amite tioi ma ningahiwen tuahe pahamuto kum is hong waxiai kakaiamite.¹² Amuto kum soh nga ti nga kakane amuto waliko ti tehu pon ie ape lehe amuto soh nga ukek ia na nga kakane amuto waliko ti tone Haeu?

¹³ Nga tel Nati Seilon, tetel i luama ti tone Haeu, mewenae nga tioi hawane waliko ti i sosohot ien.¹⁴⁻¹⁵ Nga kakane amuto, masin ti he lohong, Moses tulini hana tok weiko samen patul he pata ti awaiai teka Ju, tin masin laha hakea nga tel Nati Seilon hani patul he kros lehe teka laha soh tetak, laha uke tonain kapi Haeu ti tap tahi tapoan.

¹⁶ “Ti lalape wawahen ti Haeu hani hatesol seilon, i taloma telawe Natun lehe teka laha soh tetan laha kum seliai ti Haeu lian tehue. Laha uke non tonain tuah kapin ti tap tahi tapoan. ¹⁷ Kumahe Haeu taloma tel Natun howiniae seilon ma axialaha kawatan ti lialui woulaha. Haeu taloma i awaias seilon ti kawatan ti lialui woulaha.

¹⁸ “Teka namilolah xooaan ti tel Natun, Haeu kum axi kawatan hani laha ti lialui woulaha a teka tap namil xooaan hani i, hoi Haeu namiloien ka laha uke kawatan. ¹⁹ Le se huan ti Haeu axi kawatan hani seilon. Tetel masin xewai alon i tahiawen tehu pon itan ie tuahe seilon pamu laha waheni tilokoan ti xewan nake laha waheni ailei saun lialun. ²⁰ Teka seilon ailei saun lialun laha watakai xewan ma laha sia ti xewan nake kumahe pahalah seilon liai ningahi lialui woulaha. ²¹ A teka seilon laha hong usi kakai Haeu, laha wahren xewan ma laha kum namiloai na seilon liai ningahi waliko ti laha ailele nake laha ailele saun tenen Haeu pahan.”

Jises ma Jon Baptis

²² Muhin ien Jises ma tesol kahikahin nahih salili Jerusalem ape lato lua hani toan ti Judia. Leili taun ti i kapi lato ien, i baptaisi teka seilon. ²³ Lokon ien Jon Baptis tin i baptaisi seilon he kan Enon xohixohin kapi tehu taon Salim. Tesol ien kilan kan ape teka seilon to nahih hahaniwa kapin lehe i baptaisi laha. ²⁴ Puasain ien i sohot imat ti laha hana Jon hani ingi kalabus. ²⁵ Ngain telao tesol kahikahi Jon kak hapatapat kapi tel Ju liai sale baptaisi seilon. Laha kak hapatapat ka saun tenen ia salan ti na seilon aile usi lehe Haeu namiloai ukek laha sawisawin. ²⁶ Ape lato nahih hani kapi Jon Baptis. Lato kakane i ukek, “Tel masiwi, tetel seilon kemuk i kapim sai angiba ti tehu kan Jodan, tetel lawe o to kakaxi, kilan seilon nahih hahaniwa kapin ape i baptaisi laha.”

²⁷ Jon pahoi lato ukek, “Kum nanamiloai. Tap tel i tua aile puase Haeu halik na Haeu kilami i ailean. ²⁸ Puki amuto hongoen kakaiaak ka nga kumahe Krais, tetel Haeu taloma. Nga tuahe tel apeseniai seilon ti tahiaian. ²⁹ Masin ti tel lohi tel seilon i sal, i to hong atetengi na tel seilon i sal hukuma hani kapi tel axoan. Ape i amuke hawane ti i sohot. Tin masin lalape amuam tetak tetelao nake salan i sohotuen, kilan seilon nahih hani kapi Jises hongoi kakaian. ³⁰ Aile

ape seilon namiloi eliel kewak i pamu tuah tetak.

³¹ “Tel i luama tone Haeu i Masiwi ti lawe waliko. Seilon ti tehu pon ie, i kakaxi waliko ti tehu pon ie. Aile ape Krais, tel i luama tone Haeu, i pamu tuah ti hatesol seilon. ³² I kakaxi waliko ti i ningahiwen ma hongoen tuahe seilon kum hong soh kakaian. ³³ Tel na i hong soh kakaian i kola haxewa ka kakai Haeu pate salan. ³⁴ Tetel Haeu taloma, i kakaxi kakai Haeu nake Haeu hani hatapo hawane i Spirit tetan. ³⁵ Haeu tel Taman waheni hawane tel Natun, aile ape i hana tel Natun Masiwi ti lawe waliko. ³⁶ Tel na namilon xooaan ti tel Nati Haeu, i uke tonain kapin ti tap tahi tapoan. Tuahe tel na i tale tehiton hani tel Nati Haeu, tap wanen i uke tonain ien. I hamalum hahitake lengei Haeu.”

4

Jises ma tel hehin ti Samaria

¹ Teka Parisi hong ka Jises baptaisiwen ma i itini waxainiwen seilon hani kahikahin pamu kilaian ti Jon. ² Tuahe salan tetan teka kahikahin baptaisi laha, kumahe Jises. ³ Ti Jises tioiwa waliko ti teka Parisi hongoen, i lua salili Judia ape i alia hani Galili.

⁴ Ti luaian i nonoa texux xux Samaria. ⁵ Ape i sota tehu taon axan Sika. I xohixohin kapi teik hepekeun Jekop haniwen tel natun Josep. ⁶ Tehu kan wal ti Jekop ien ape ti lape ngain Jises to hahanau papan nake nawan pusoan ti welui nanahian.

⁷ Tai kue tel hehin ti Samaria nahima utuhiai kan. Jises kamei i, “Ewi na o axi unumak teik kan?” ⁸ Mewenae i wanen nake tesol kahikahin nahiwen leili taon kahuiai an.

⁹ Tel hehin ong hawane nake teka Ju ma teka Samaria laha kum hukuma hehetekie. Ape i ukek, “Nga hehin ti Samaria. Alahan o tel Ju kamei nga utuhi axiai unumam kan?”

¹⁰ Jises pahoi i, “O kum paxai tioi waliko ti Haeu pahan i hani o ma tin o kum paxai tioi nga. Na o tioila, o katewen ape ala nga axiwen o tenen kan wanen.”

¹¹ Tel hehin ukek, “Tel masiwi, o tap ututuh a tehu kan wal se pate walawalan. O kema tenen kan wanen ia? ¹² Jekop tel tamamite ti matahauan hani amite tehu kan wal ie. Imat tesol natun ma tupun manihuh lawe lato unun ie. Nakon o pamu masiwin ti Jekop? Nakon o hina kan tenen pamu soliaian?”

¹³ Jises pahoi i ukek, “Tehu kan ie na seilon un i kum ahoi laha lian tehue. Teteka laha unuen, pahalahua un ulea.¹⁴ Tuahé tehu kan nga hani seilon, i ahoi laha lian tehue nake i sohot hanowi kan tenen tap tahi lil mongaian leilolahua. Tehu kan ien kan wanen, i aile ape seilon to kapi Haeu lian tehue.”

¹⁵ Tel hehin kamea, “Tel masiwi, axima nga kan tenen ien lehe pahak kum is ulea ape nga kum aliamma utuhiai kan.”

¹⁶ Jises hone i, “Nahih hakahitama tel axoam.”

¹⁷ Tel hehin pahoi i ukek, “Nga tap axoak.”

Ape Jises ukek, “Kakaiam salan, o tap axoam.¹⁸ Kemuk o sal kewen he tepanim ape tel wawan o toto kapin aope ie, i kumahe axoam.”

¹⁹ Tel hehin ukek, “Tel masiwi, sale kakaiam nga paxai tioi ka o tel kuluiai kakai Haeu.²⁰ Kainen kaxi hanima nga, alahan amuto teka Ju ukek lotui Haeu tesoloe leili Jerusalem? Teka matahaun ti amite lawe laha lotui Haeu ie patul he tehu maunten Gerisim.”

²¹ Jises hone i, “Hong sohoma nga, taun i luluainima ape ewi na seilon lotui Haeu tuahé na tesol, kumahe mewenae he tehu maunten ie ma leili Jerusalem.²² Amuto teka Samaria amuto lototui Haeu tuahé amuto kum tioi aluin i. Amite teka Ju amite tioi hawane Haeu tel amite lolotui nake i haxewa hani amite sale awaiai seilon ti kawatan ti lialui woulaha.²³ Tehu taun ti i luluainima se liai ape ie ti seilon lotu sameni tel Tamalaha Haeu ti leili atelaha nake Holi Spirit neini lotu ti laha. Saun ti lotu tenen ien Haeu pahan.²⁴ Haeu kumahe tuahé seilon, i Spirit ape teka na laha lotu sameni i, pahan Holi Spirit neini lotu ti laha lehe laha lotui i ti leili atelaha wanen.”

²⁵ Tel hehin ukek, “Nga tioi ka Meseia tel laha axai Krais, i luluainima. Na i tahiam, i kaxi nexi hatapo lawe waliko hani amite.”

²⁶ Jises hone i, “Se nga tetel. Nga Krais.”

²⁷ Lokon ien wanen tesol kahikahi Jises aliamma ape lato kuaini hawane ka Jises kakak kapi tel hehin. Tuahé tap tel ti lato kamei Jises waliko tenen i pahan ti tel hehin ma nake lahan i kakak kapin.

²⁸ Tel hehin hana lioiwa tehu peti kan ape i kiliwau alia hani leili taon. I kakane teka seilon ukek,²⁹ “Nahima paxai tel seilon i kaxi hatakei hani nga lawe waliko ti nga ailewen! I uke Krais, tetel Haeu taloma.”

³⁰ Kilan seilon leili taon laha ahuta paxai Jises.

³¹ Ti tesol waliko ien sosohot, tesol kahikahin kamei eliel Jises, “Tel masiwi, angimua teik.”

³² Tuahé Jises hone lato, “Nga hina an ti amuto kum tioi.”

³³ Tesol kahikahin he kamekam alia lato, “Nakan saka tel kau axiwen anan?”

³⁴ Jises ukek, “Ti nga aile waliko ti Haeu pahan, ien se masin ka anak. Ape ti na nga aile hatapo puasain tenen ti Haeu taloma nga ailean, se masin ka anak.³⁵ Amuto ukek hina pangapang tutuen imat ti amuto hutui apuhiniae an ti he kin. Tuahé amuto paxapax aluawa lehe amuto ningahi ka kilan seilon laha apeasawen ti Haeu neini laha ape laha masin an ti i apeasawen ti waxi apuhiniae.³⁶⁻³⁷ Ti aope ie hina seilon laha neneini seilon ien hani Haeu ti ukei tonain kapin ti tap tahi tapoan. Ape Haeu hani laha kahi puasalahua. Amuto tioi teik kakain i ukek, ‘Hina seilon ti seiniai kin ma hina seilon ti apuhiniae an.’ Se pate salan. Tin masin puase Haeu, hina seilon laha kaxi ahuti kakai Haeu ape hina seilon laha neini seilon hani Haeu. Ti waliko ien sohot, teka ti kaxi ahutiae kakai Haeu ma teka ti neiniai seilon hani kapin laha amuam hetekie.³⁸ Nga talo amuto ti neiniai seilon hani Haeu. Teka imat hoi liai laha puas eliel hawane ape ti aope amuto puas kului puasain ti hoi laha ailewen.

Kilan teka Samaria soh ti Jises

³⁹ Kilan teka Samaria ti leili tehu taon ien soh hawane ti Jises nake tel hehin kaxi haniwen laha ukek, “Tel seilon ien i kaxi hatakei hani nga lawe waliko ti nga ailewen.”⁴⁰ Ti laha nahih haniwa kapi Jises laha kamei eliel i na i tomu teik kapi laha. Se ape i to ngain huohu.⁴¹ Kilan teka Samaria liai tin laha soh tetan ti laha hongoa kakaian.

⁴² Laha kakane tel hehin, “Amite soh hawane tetan nake puki amite hong hawanewen kakaian kumahe mewenae nake ti o kaxi hani amite. Ape amite tioi hawanewen ka i se tetel i awai lawe seilon ti kawatan ti lialui woulaha!”

Jises haewia nati tel masiwi

Mt 13:57; Mk 6:4; Lk 4:24

⁴³ Muhi ngain huohu ape Jises lua ulea hani Galili.⁴⁴ Ti imat, teka seilon ti puki tonan laha hong watakai kakai Jises. Lokon

ien i ukek, "Ti toan liai seilon sameni tel kuluai kakai Haeu tuahe ti puki tonan wanen laha watakai hongoi kakaian." ⁴⁵ Ape aope ie ti Jises tahia haniwa Galili, pate laha amuke i nake ti laha Jerusalem lokon ti Pasova, laha ningahiwen waliko tenen pate lalap i aile.

⁴⁶ Ti Jises Galili, i alia hani tehu taon Kana, tetesol kemuk i kolitini kan hani waen. Xohixohin ien, leili tehu taon Kapenaum, tel akaik wawan pate tinun. I nati tel masiwi hahitake tel masiwi Herod. ⁴⁷ Ti tel seilon ien hongoa ka Jises luawen ien ti Judia, i lua kamei eliel Jises haewiai tel natun sikole i mat.

⁴⁸ Jises kakane tel seilon, "Alahan pahamuto paxaimu puase poh ti nga ailele lehe amuto soh tetak?"

⁴⁹ Tuahe tel seilon ukek, "Tel masiwi, hualima tel natuk uke i mat."

⁵⁰ Ape Jises hone i, "Nahih aliawa, tel natum i ewi." Tel seilon soh kakai Jises ape i nahih alia hani tonan.

⁵¹ Teka unaui tel seilon nahih upia ha-hongo i ukek, "Tel natum ape i ewi-en!"

⁵² Ti i kameiwa lato lokon wanen tel natun ewi, lato ukek, "Tihah alohah sai 1 kilok, lul ti tel natum i tapo hahutuia."

⁵³ Ape tel tame tel akaik paxai tioi ka i sohot hawane lokon Jises kaakane i ka tel natun i ewi. Aile ape tel seilon ien ma hatesol seilon leili ingan laha soh hawane ti Jises. ⁵⁴ Ie ape kewen he huohu puase poh i aile leili Galili muhin ti i luama Judia.

5

Jises haewia tel seilon pape kanipt Betesda

¹ Muhin ien Jises nahih hani Jerusalem ti tehu angain lalap ti teka Ju. ² Leili Jerusalem tehu kanipt axan *Betesda* ti kakai Arameik, tepanim ing tenen saxawaxawan tu kakalini. I xohixohin kapi tewau kahip ti taon, axan Sipsip. ³ Kilan wanen seilon tinun lawe laha engeeng tesol ien. Leilolahe teka pulaxa, teka laha nahih tawen ma teka tupualaha maten. ⁴ Hina taun tel engel ti Haeu mos hapixe tehu kan ape na tel tinun i soh hani he tehu kan ti i pixepix tutuen, tetel ien i ewi. ⁵ Tel ti teka seilon ien i tinu kuwen leili ahang 38. ⁶ Ti Jises paxaiwa tel seilon engeeng ien, i paxai tioi ka i tinu kuwen. Ape Jises kamei i, "Paham o ewi?"

⁷ Tel tinun wix pahoi i, "Tel masiwi, nga kum nahih uke. Tap seilon hualiax hani he

tehu kan ti i pixepix tutuen. Nga to totonghi tuahe seilon liai lawe imat tetak."

⁸ Jises hone i, "Xahatawa, lumiwa enepam ape tau nahiwa."

⁹ Taen ien wanen tel seilon ewi. I lumi kau enepam ape i hutui i nahih. Tetelao ien ngain Sabat ti Jises haewia tel seilon ien. ¹⁰ Aile ape teka masiwi ti teka Ju kuma laha amuam. Ape laha hone tel seilon ukek, "Tetelao se Sabat, hahalin na o kakau enepam telao ngain Sabat."

¹¹ Tuahe i kak pahoi laha ukek, "Tetel seilon i aile haewia nga, i hone nga lumi kau enepam ape tau nahiwa."

¹² Laha kamei i, "Aita tetel seilon i haewia o ape hone o lumi kau enepam ape tau nahiwa?"

¹³ Tuahe tel seilon kum tioi. I tai tioi Jises tetel nake lokon ti i ewiwa Jises hoi i nanahih leili lawalawai seilon. ¹⁴ Muhiin ien, Jises apatuini tel seilon ien leili Ingi Haeu ape Jises hone i, "O ape ewi tuahe kum aile ulelea saun lialun uke kawatan pamu lapan tunahi o." ¹⁵ Ti tel seilon nahih saliliwa Jises, i nahih kakane teka masiwi ti teka Ju ka Jises tetel aile haewia i.

Jises ukek i tel Nati Haeu

¹⁶ Ape teka masiwi ti teka Ju aile saun tenen lialun hani Jises nake i aile haewia seilon telao ngain Sabat. ¹⁷ Tuahe Jises ukek, "Tel Tamak Haeu puas huali seilon lawe ngain, aile ape tin nga aile usi." ¹⁸ Ti teka masiwi hongoa, pahalaha is eliel hawane teleiai Jises, kumahe mewenae nake i xaputi nauna ti sale Sabat tuahe hetekie ti i ukek Haeu se Taman wanen. Nake ti tenen ien lato ukek Jises namilo i ka Haeu.

¹⁹ Jises hone teka masiwi ti teka Ju ukek, "Nga kakane hawane amuto, nga Nati tel Tamak Haeu, puki nga kum pon ailei tenen na waliko halik na nga ningahimu tel Tamak aile. Lawe waliko tel Tamak aile, nga tel Natun tin nga aile. ²⁰ I sohot ukek nake tel Tamak waheni hawane nga tel Natun ma i kola hani nga waliko ti i aile. Imuh tin i hani nga puasake waliko tenen pamu lapan. Ape amuto ongagini hawane waliko ti na nga aile. ²¹ Masin ti tel Tamak Haeu hamoiba seilon maten ape axi laha tonain ti tap tahi tapoan kapin, tin masin nga tel Natun aile hani teka ti pahak. ²² Tel Tamak Haeu hani lioi nga tel Natun paxai kolongenai woi lawe seilon. ²³ I aile ukek lehe lawe seilon hong ma sameni nga tel Natun masin ti laha hong ma sameni tel Tamak Haeu. Tel na i

watakai nga tel Natun, liai hoi i watakai tel Tamak Haeu, tetel i taloma nga.

²⁴ “Nga kakane hawane amuto, tel na i hong usi kakaiak ma namilon xoxoan ti Haeu tetel i taloma nga, tel seilon ien liai hoi i to hutuiwen kapi Haeu. Haeu kum axi i kawatan ti lialui woun. Kemuk ti i tai hong usi kakaiak, woun haxau i ti Haeu ape aope ie i pakata xoxox kapi Haeu lian tehue.

²⁵ “Nga kakane hawane amuto, tehu taun ti i luluainima se liai ape ie ti teka woulaha haxau laha ti Haeu, hong kakaiak tuah mewenae teteka laha hong tamani laha to kapi Haeu lian tehue. ²⁶ Pon i sohot ukek ien nake masin ti Haeu i hina poh ti axiai seilon tonain kapin ti tap tahi tapoan, i hani nga tel Natun poh tenen ien. ²⁷ Ape i haniwen nga paxai kolongenai woi teka seilon nake nga tel Nati Seilon, nga se Krais.

²⁸ “Kum ongaong waliko ti nga kakak nake taun i luluainima ti teka maten hong nga tiloi laha. ²⁹ Ape laha xahat alia he amal. Lawe seilon laha ailewen saun tenen Haeu pahan, laha uke tonain kapin ti tap tahi tapoan ape teka laha ailewen saun lialun, laha uke kahulaha ti lialui woulaha. ³⁰ Nga kum tua aile waliko ti puki namilok. Nga paxai kolongeni woi seilon hanowi ti tel Tamak Haeu kaakane nga. Ti nga paxai kolongeni woi seilon, nga aile usi namili Haeu, tetel i taloma nga, kumahe puki namilok. Aile ape kologenous tetak sawisawin wanen.”

Jises salan tel Nati Haeu

³¹ Jises kakak tutuen ukek, “Na masin mewenae nga kaxi aliliake nga, seilon kum soh kakaiak. ³² Tuah tin tel seilon liai, tel Tamak Haeu i kakaxi nga ape nga tioi ka waliko ti i kakak nga se salan wanen.

³³ “Puki amuto taloen seilon hongoi kakai Jon Baptis ape waliko ti i kakak nga se salan.

³⁴ Tuah kumahe nga upia seilon lehe laha kak hawane ka nga tel Nati Haeu. Nga hanamena amuto kakai Jon lehe amuto soh tetak ape Haeu awai amuto ti kawatan ti lialui woumuto. ³⁵ Kakai Jon masin xewan i haxewa hani amuto waliko tenen salan ti i kakak nga ape hina taun ti amuto amuke kakaian.

³⁶ Tuah pupuasak ti Haeu hani nga aile hatapoan, ien pamu i haxewa ka tel Tamak Haeu taloma nga. ³⁷ Puki i haxewa ka nga se tel Natun kalak amuto tai hongohong kinaxon ma tai ningahi kawan. ³⁸ Tuah

kakai Haeu amuto kum uke hanowi waliko tenen tone atemuto wanen nake amuto kum hong soh nga, tetel Haeu taloma.

³⁹ “Lawe ngain amuto ridai upia elielil salangawe kakain leili pepai Haeu nake amuto sokok i hani amuto tonain kapi Haeu ti tap tahi tapoan. Tuah amuto sel hawane nake leili pepai Haeu i kakaxi nga tel Haeu taloma. ⁴⁰ Ape amuto kum soh tetak, tetel i hani seilon tonain kapi Haeu ti tap tahi tapoan.

⁴¹ “Kumahe nga kak ukek ien lehe seilon sameni nga. ⁴² Tuah nga tioi amuto. Tap wawahen ti Haeu leilomuto. ⁴³ Tel Tamak Haeu taloma nga hahitake axan a amuto kum hong kakaiak. Tuah na seilon kakak puki hahitake axan amuto hong usi kakai. ⁴⁴ Amuto aile ukek nake amuto he sasamen alia amuto. A amuto kum namiloi waxi lehe telawae Haeu namiloi ukek amuto seilon tuah.

⁴⁵ “Tuah kum namiloi ukek ka nga tetel suluiamuto hani tel Tamak Haeu. Moses tel suluiamuto, nauna tetan ti amuto monomon ka i huali amuto. ⁴⁶ Na amuto hong sohola kakai Moses, tin ala amuto hong soh kakaiak nake waliko ti Moses tai kakaxi, se i kakak nga. ⁴⁷ Tuah amuto kum hong soh kakain ien. Ape lehe amuto hong soh ukek ia kakaiak?”

6

Jises axi ani seilon akulai 5,000

Mt 14:13-21; Mk 6:30-44; Lk 9:10-17

¹ Muhin ien Jises ma tesol kahikahin lang kolia hani liai tepaun ti kanitax Galili. Tesol kanitax ien axan liai tenen Taibirias.

² Kilan wanen seilon kakahiti Jises nake laha ningahiwen i haewia seilon ti kui pohen.

³ Jises ma tesol kahikahin nahih hani patul he tehu mauntien kokol ape lato to hetekie. ⁴ Pasova, ngain lalap ti teka Ju ape i xohiwen.

⁵ Jises paxawa, i ningahi teka kilai seilon nahih hahanima kapin ape i kamei tel kahikahin Pilip, “Kako kahui an ia lehe i pon waxenai tesol mongohe seilon ie?” ⁶ I kak ukek ien ti tohongi paxaiai Pilip. Hoi i tioiwen waliko tenen lehe i aile.

⁷ Pilip hone pahoi, “Mongohualaha! Kahi tel seilon na i puas ti pangapang tepanim tolulu i kum pon tutuen kahuiai an lehe lawe seilon pon ukei tuahe na teik.”

⁸ Andru tel kahikahin liai, tetel ukale Saimon Pita, i ukek, ⁹ “Tel akaik wawan ie hina

tepanim bret ma huok xixi. Tuahe i kum pon wanen waxenaiaw lawalawai seilon!"

¹⁰ Jises hone tesol kahikahin, "Hatonawa teka seilon." Hina pahoah ien i tapai ti hatesol seilon to hani itan. Mongohe seilon i akulai 5,000. ¹¹ Jises waxi tesol bret ape i kak kemulik hani Haeu. Muhin i sei hani teka seilon. Tin masin i sei huok xixi atengi tataen an ahoi laha hatesol.

¹² Tataen an ahoiwa lawe seilon, Jises hone tesol kahikahin, "Waxi apuhini hat-apoa moxe an lehe i kum tua xoina." ¹³ Tesol kahikahin aile usi ape moxe teik kokole an ien, lato lohi apuhini aliaké huopaním huohu po.

¹⁴ Ti teka seilon ningahiwa waliko tenen lalap Jises aile ti kui pohen, laha he kakak, "I liai tel kuluiai kakai Haeu, tetel kako teka Ju mon atetengi." ¹⁵ Jises paxai tioi ka uke laha lungai i sohot tel masiwi ti nahikei xuxulaha. Aile ape i nahih hani patul he maunten ti tesol mewenae i.

*Jises nanahih patul he kanitax
Mt 14:22-33; Mk 6:45-52*

¹⁶ Alohalah tehu ien tesol kahikahi Jises nahih hani kanitax Galili. ¹⁷ Muhi lolohan Jises tai tahia hani kapi lato ape lato ku hani he tea koap. Lato lang hani tehu taon Kapenaum liai tepani ti kanitax Galili.

¹⁸ Tai kue aupol ah kui ape i hatano laman. ¹⁹ Tataen tesol kahikahin xoxei haxaua tea koap xawaian sai masin tepanim kilomita, lato ningahi tel seilon nanahih patul he kanitax. I to nahih xohi hahanowi kapi tea koap ape lato mamata. ²⁰ Tuahe i ukek, "Se nga Jises! Kum maamatal!" ²¹ Ape lato amuam hakuhi i hani he koap. Tataen ien wanen tea koap takana hani tesol ti pahalato.

Jises se an wanen ti tone Haeu

²² Ngain liai telao teka kilai seilon laha apupuha tetesol pape kanitax ti tesol kahikahi Jises ahuta sasaliliwa. Lato hapuwa teawe koap ien. Teka seilon tioi ka Jises tai kuoxi lato ape laha to atetengi i tetesol ien. ²³ Lokon ien hina koap ti tehu taon Taibirias tahia hani kapi laha, tetesol ti Jises axiaxi ani teka kilai seilon muhin ti i kak kemulik haniwa Haeu. ²⁴ Ti laha paxai tioiwa ka Jises tin tap, laha ku hani he tesol koap ien ape laha lang hani Kapenaum pax upiaian. ²⁵ Ti laha tunahowi i liai tepani ti kanitax, laha kamei i, "Tel masiwi, saka o non ukek ia hanima ie?"

²⁶ Tuahe Jises kak ukek, "Nga kakane hawane amuto, amuto upiup nga kumahe nake amuto xeu ti hui waliko ti nga aile ti kui pohek tuahe nake nga axi ahoi hawane amuto an. ²⁷ Amuto kum puas elieliel upiai an tetenen aneso i tapo. Puas upia elieliewa an tetenen i kum tapo. Haelieliewa ukei tonain kapi Haeu ti tap tahi tapoan ti nga tel Nati Seilon pon haniamuto. Tel Tamak Haeu hani nga ailei teik puasain ien."

²⁸ Teka seilon kamei Jises, "Haeu pahan amite aile waliko la?"

²⁹ Jises kak pahoi laha, "Haeu pahan namilomuto xoxoa tetak, tetel i taloma."

³⁰ Laha ukek, "Aile kola hanima amite kolakol tenen lalap lehe amite soh o. Kiae o kola hani amite waliko la?" ³¹ Teka matahaun ti kako, Haeu kola hani laha tenen kolakol ti i hapuasa Moses hani laha ani mana ti he lohong. I sohot poponowi usima kakai Haeu ti i kakawen, 'Moses hani laha ani bret ti i ahuma tone Haeu.'" (Exod 16:4)

³² Jises hone ulei laha, "Nga kakane hawane amuto, kumahe Moses tetel i hani laha bret ti tone Haeu. Se hahaniai tel Tamak Haeu. I se tetel axiamuto an wanen. ³³ A an wanen ti Haeu se tetel i tahia hanima tehu pon ie ti axiai seilon tonain kapi Haeu ti tap tahi tapoan."

³⁴ Teka seilon kak ukek, "Tel masiwi, lawe ngain axima amite tenen an wanen ien."

³⁵ Jises kak pahoi laha, "Nga se an wanen ti haniai seilon tonain kapi Haeu ti tap tahi tapoan. Tap tel i hitol ulea ma pahan is ulea i un na namilon xoxoan tetak.

³⁶ Tuahe amuto tap namil xoxoan tetak kalak amuto ningahiwén waliko tenen lalap nga ailewen. ³⁷ Lawe seilon tel Tamak Haeu haníwen nga ape laha sohot kahikahik, tap nga tale tehitok hani laha. ³⁸ Kumahe nga tahiamáti tone Haeu ailei waliko ti puki namilok. Haeu taloma nga ailei waliko ti pahan nga ailewa. ³⁹ Teka seilon ti i haníwen nga, teteka laha sohot kahikahik, Haeu pahan nga ngahati aluiníwa laha hatesol nake i pahan nga xahateníwa laha ti matealahea ngain tetehu ti hinitiai lawe seilon. ⁴⁰ Ie namilo tel Tamak Haeu ka lawe seilon paxai tioiwa ka nga se tel Natun ma tin laha soh hawanewa tetak lehe laha uke tonain kapin ti tap tahi tapoan ape nga hamoiba aliaké laha ti ngain tetehu ti hinitiai lawe seilon."

⁴¹ Teka seilon hong lengeka ma kak hakilika nake Jises ukek se i an wanen ti tone Haeu. ⁴² Laha he kakak alia puki laha, "I

tuahé tel nati Josep! Kako tioi taman ma tinan. Ape lahan i ukek i luama ti tone Haeu?"

⁴³ Jises hone lato, "Kum kak mumum ha-hakila! ⁴⁴ Tap tel i tua sohot kahikahik halik na tel Tamak Haeu, tetel i taloma nga, i towiahu namilon ti soh tetak. Na i sohot ukek ien, nga xahateni aliake i ngain tehu ti hinitiai lawe seilon. ⁴⁵ Masin ti teka kuluiai kakai Haeu taiwen, 'Haeu i hanau teka seilon.' ^(Isa 54:13) Ape teka laha hong usi kakai Haeu, laha sohot kahikahik.

⁴⁶ Tuahé kumahe nga ukek ka tel na seilon ningahiwen tel Tamak Haeu, mewenae nga, tetel ahuma ti Haeu, ningahiwen i.

⁴⁷ "Nga kakane hawane amuto, tel na namilon xoxoan tetak, hoi liai i to kapi Haeu lian tehue. ⁴⁸ A salan, nga se an wanen ti axiai seilon tonain ien. ⁴⁹ Teka matahaun ti amuto laha aniani mana ti he lohong tin laha mat. ⁵⁰ Tuahé an wanen ti tone Haeu, tel na i ani i kum mat. ⁵¹ Nga tetel an wanen ti tone Haeu se ape kapimuto. Hatesol teteka laha ani, laha to kapi Haeu lian tehue. Tenen an wanen ien se tupuak nga hani ti nga mat lehe seilon uke tonain kapi Haeu ti tap tahi tapoan."

⁵² Ti teka seilon hongoa, laha kak he lungelung alia puki laha ape laha he kamekam, "I hani kako ani tupuan ukek ia?"

⁵³ Tuahé Jises ukek, "Nga kakane hawane amuto, amuto kum uke tonain kapi Haeu ti tap tahi tapoan, halik na amuto ani tupuak ma unumi kakauk tel Nati Seilon. ⁵⁴ Tuahé na amuto ani tupuak ma unumi kakauk, hoi liai amuto to kapi Haeu lian tehue ape nga xahateni aliake amuto tehu ngain ti hinitiai lawe seilon. ⁵⁵ Pake tupuak se an wanen ma kakauk se unum wanen.

⁵⁶ Na amuto ani tupuak ma unumi kakauk, amuto se kahikahik wanen ape nga lawe kapimuto lian tehue. ⁵⁷ Masin ti tel Tamak Haeu taloma nga, i aile lehe nga moih lian tehue, tin masin na amuto to hawane kahikahik wanen, nga aile lehe amuto moih lian tehue. ⁵⁸ Nga se an wanen ti tone Haeu. Teka matahaun ti amuto laha ani mana, tin laha mat. Tuahé tel na i ani an wanen ti tone Haeu i kum mat." ⁵⁹ Jises hahanau teka seilon leili tehu synagog ti tehu taon Kapenaum ti i kakaxi tesol kakain ien.

Kilan kahikahki Jises laha salili tamusuke i

⁶⁰ Tesol kahikahki Jises hongoa ape kilan ti lato ukek, "Kakaiaam pate ailan ti amite ukean ma usian."

⁶¹ Jises paxai tioi ka tesol kahikahik kak mumum ape i kamea, "Nakon teik kaka-iaik pate i hahataxina halialu namilomuto?

⁶² Ape amuto namiloi ukek ia na amuto ningahi nga tel Nati Seilon nga alia hani tone Haeu? ⁶³ Holi Spirit ti Haeu ti tetel axiai seilon tonain kapi Haeu ti tap tahi tapoan. Ti puki kui seilon i kum pon ailean. Kakain ti nga kakane amuto i ahuma ti Holi Spirit ape i axi seilon tonain kapi Haeu ti tap tahi tapoan na laha soh tetak. ⁶⁴ Tuahé teka ti amuto laha kum hong soh nga." Jises kak ukek ien nake hoi i tioiwen teteka laha soh tetan. Tin i tioi seilon tetel imuh i hangaini i hani mini teka seilon teleian. ⁶⁵ Ape Jises ukek, "Teka ti amuto kum soh tetak nake masin ti nga kakanewen amuto, tap tel i tua sohot kahikahik halik na tel Tamak Haeu towiahu namilon ti soh tetak."

⁶⁶ Hutui taen ien, kilan kahikahki Jises laha tale tehitolaha tetan ape laha kum kahiti i. ⁶⁷ Jises kamei tesol huopanim huhua kahikahki i ukek, "A amuto? Kaie amuto kum nahih salili nga?"

⁶⁸ Saimon Pita kak pahoi, "Tel masiwi, lehe amite kahiti ulea aita? O tel hanauamite kakai Haeu ti ukei tonain kapin ti tap tahi tapoan. ⁶⁹ Amite hong soh kakaiaam ma amite tioi ka o tel seilon sawisawin wanen ti Haeu."

⁷⁰ Jises kakane tesol huopanim huhua kahikahik, "Nga kilami amuto aposel tetak tuahé tel ti leilomuto, Satan kapiti ma hapuasa i." ⁷¹ Jises kakak Judas, nati Saimon Iskariot. Imuh i hangaini Jises hani teka seilon ti teleian, kalak i tel ti tesol huopanim huhua aposel.

7

Tesol ukale Jises kum soh tetan

¹ Muhin ien Jises hanau tatale teka seilon leili Galili. Kumahe pahan i nahih hani Judia nake teka Ju ien hina namil ti teleian.

² Taun ti angiaiin lalap ti teka Ju atai ingalahou houha i xohiwen. Laha aile ukek ien ti namenai lokon teka matahaun ti laha he lohong. ³ Ape tesol ukale Jises kak soxeni i, "Nahih saliliwa ie haniwa Jerusalem lehe teka kahikahim paxai waliko tenen lalap na o aile. ⁴ Na paham lawe seilon tioi o, kum mumuneni puasam. Na o pon ailei waliko tenen lalap ti kui pohem, aile kolawa lehe lawe seilon sameni o." ⁵ Lato kak ukek ien nake lato kum soh tetan kalak lato se ukalan wanen.

⁶Jises hone lato, “Taun ti lawe seilon tioi nga i tai meima. Ti amuto, lawe taun se solian ti ailei waliko. ⁷Tap huan ti seilon watakai amuto tuahe laha watakai nga naake nga kaxi hatakei lialui woulaha. ⁸Mewenae amuto nahih haniwa tehu angiaian lalap ien. Nga tai apeas nake taun tetak i tai meima.” ⁹Jises hone lato kewak ien ape i hamalum Galili.

Jises hanau teka seilon mate Ingi Haeu

¹⁰Muhi tesol ukalan nahih haniwa Jerusalem, Jises tin i nahih tuahe kumahe i nahih tatake nake kumahe pahan teka seilon ila tioi i. ¹¹Lokon ien leili Jerusalem teka masiwi ti teka Ju to pax upiup Jises. Laha he kamekam, “Jises tel hatanoi wasol ia?”

¹²Kilan seilon laha kak hahakokol sale Jises wasolalaha. Teka laha ukek, “I se seilon solian.”

Teka liai ukek, “I neini puluti teka seilon.” ¹³Tuahe tap tel i kakak sale Jises ti taxingi lawe seilon nake laha mamata teka masiwi ti teka Ju.

¹⁴Patalal ti taun ti nameniai lokon teka matahaun ti teka Ju he lohong, Jises nahih hani Ingi Haeu ape i hutui hanau teka seilon. ¹⁵Teka masiwi ti teka Ju kuaini hawane ape laha ukek, “Tel seilon ie i tai sukul, saka anesoan ti kakai Haeu i ukema ia?”

¹⁶Jises ukek, “Tetenen ti nga hahanau amuto kumahe puki namilok, i ahuma ti Haeu tetel i taloma nga. ¹⁷Tel na i aile usiusi namili Haeu i tioi ka waliko ti nga hahanau seilon i ahuma ti Haeu kumahe puki namilok. ¹⁸Tel na i kakak puki hahitake axan i aile ukek ien lehe seilon sameni i. Tuahe tel i puas elilie lehe seilon sameni tetel i taloma i, kakaian salan ape i malang pulutiae seilon. ¹⁹Moses hani amuto nauna ti Haeu, kewak? Tuahe tap tel ti amuto puas usiusi. Ape kalahai amuto tohongi teleiak?”

²⁰Kilan wanen seilon kak pahoi Jises, “Spirit lialun kapiti halialuen o. Aita pahan teleiam?”

²¹Jises kak ukek, “Nga aile haewiawen tel seilon telao ngain Sabat ape amuto hatesol ong lengke. ²²Tuahe puki amuto pupuas telao ngain Sabat ti amuto aile teik kikilam ti kotia uli walikoi natumuto wawan usiay nauna ti Moses. Tenen saun ien hoi imat ti Moses, lokon ti Abraham tel matahaun ti kako. ²³Na tenen saun ien i onotenii

telao ngain Sabat, amuto aile haseleni lehe amuto kum xaputi nauna ti Moses. Ape lahan amuto lengeini nga ti nga haewia tel seilon ti telao ngain Sabat? ²⁴Kum paxai kokolongeni saun ti seilon ti puki namilomuto, tuahe ti namili Haeu.”

Nakon Jises se Krais?

²⁵Hina seilon leili Jerusalem laha ukek, “Nakon i seilon tetel teka masiwi ti kako pahalahia teleian? ²⁶Paxaiwa! I leili teka seilon, i hanau ulelea laha tuahe tap tel hakume i. Sohin laha paxai tioi ka i Krais. ²⁷Saka i sohot ukek ia nake amite tioi ka i ti Nasaret tuahe amite kum tioi tetesol Krais ahuma.”

²⁸Aile ape ti Jises hahanau tutuen teka seilon mate Ingi Haeu, i kak eliel hani laha, “Amuto sokok amuto tioi nga ma tetesol ti nga ahuma. Tuahe kumahe nga luama ti puki namilok, tel liai taloma nga. I se tel Haeu salan tuahe amuto kum tioi i. ²⁹A nga tioi hawane i nake nga nakuama tetan ape i taloma nga.” ³⁰Ti teka masiwi ti teka Ju hongoa, laha tohongi xotiai Jises tuahe tap tel aha pohiwen i nake i tai meiwa taun tetan.

³¹Tuahe kilan seilon soh tetan ape laha ukek, “I aile hahakila waliko tenen lalap ti kui pohen. I se Krais nake soliai puasan masin ti Krais.”

³²Teka Parisi hong ka kilai seilon kak wixiwix sale puase Jises ape lato ma tesol masiwi tuah ti hukuminiai Haeu ma seilon, lato talo tesol peteniai Ingi Haeu ti xotiai Jises. ³³Jises kak ulea ukek, “Nga kapimuto hatesol teik taun kukunun ape nga alia hani kapi tetel i taloma nga. ³⁴Ape taen ien amuto pax upia nga ti huhual tuahe amuto kum pon tunahia. Tin amuto kum lua uke hani tetesol ti nga ien.”

³⁵Teka masiwi ti teka Ju he kakak alia laha, “Kiae i nahih kelak lehe kako kum pon tunahian? Nakon i nanamilo i na i nahih salili xuxukako hani kapi teka akikikako Ju kakaialaha Grik? Sohin uke pahan i hanau teka Grik. ³⁶Salangawee kakaian ukek ia ti i kakak ka kako pax upia i tuahe kako kum pon tunahian? A i ukek ia ti i kakak ka kako kum lua uke hani tetesol ti na i lula to?”

Jises kakak sale unum wanen

³⁷Ti ape tehu ngain tapeinan ti taun ti nameniai lokon teka matahaun ti teka Ju he lohong. Ngain tehu ien Jises tu ape i kak eliel ukek, “Tel na pahan is i un,

soh hawanewa tetak ape nga hani i unum wanen.³⁸ Tel na i soh tetak, i un lian tehue. Masin ti pepai Haeu kakaxi, ‘Tenen unum wanen i masin kan tenen i lili tap mongaian ti leili tel na i soh.’”³⁹ Kakai Jises ti i kakak ien i kakaxi sale Holi Spirit, tetel Haeu hani teka laha soh ti Jises. Hanima tataen, Haeu tai axi Holi Spirit hani teka kahikahi Jises nake Haeu tai kola hatakei hatesol pohe Jises.

Teka seilon kak he hapatapat sale Jises

⁴⁰ Ti teka kilai seilon hongoa kakai Jises, teka ti laha ukek, “Tel seilon ie, salan wanen i tetel kuluiai kakai Haeu ti kako teka Ju to monomon.”

⁴¹ Teka liai ukek, “I se Krais.”

Tuahe teka liai ulea ukek, “Tap wanen nake i se seilon ti Galili.⁴² A kakain ti leili pepai Haeu i ukek Krais, tel ti kaha to monomon, i nakuama ti tel masiwi David ma i takah Betlehem, tetewau toan ti kemuk David toto.”⁴³ Aile ape kakaialaha hatesol sale Jises i hil.⁴⁴ Teka pahalaha laha xoti Jises tuahe tap tel aka pohiwen i.

⁴⁵ Ti teka peteniai Ingi Haeu nahih alia hanipa kapi teka masiwi ti hukuminiai Haeu ma seilon ma teka Parisi, tesol masiwi ien kamei lato ukek, “Alahan amuto kum xoti Jises ape hakahita hanima kapimite?”

⁴⁶ Lato pahoi ukek, “Tel seilon ien kak hanowi ka i tel masiwi tapein. Tap tel kaakawen masin tel seilon ien!”

⁴⁷ Teka Parisi kak ukek, “Kaie i puluti hetekiewen amuto?⁴⁸ Saka tap tel ti kako teka Parisi ma na teka masiwi laha soh tetan,⁴⁹ Mewenae teka seilon ie tap namilo-laha laha soh tetan nake laha kum tioi aluini kakai Haeu ape Haeu hani laha kauif kawatan.”

⁵⁰ Nikodimus, tel ti teka Parisi i paxaiwen Jises ti imat, i hone teka liai,⁵¹ “Nauna ti Moses halini kako tieniai tel seilon na kako tai hong ma upia mataini waliko ti i aislewen.”

⁵² Ape lato pahoi i, “Sale kakaiam masin ka o tin ti Galili ma o saupa ti Jises. Nihehi paxaiwa pepai Haeu lehe o tioi ka tap tel kuluiai kakai Haeu i ahuma ti Galili.”

⁵³ Muhin ien hatesol seilon nahih alia hani tonalahia.

8

Tel hehin i aile saun lialun ti wawan hehin

¹ Ape Jises nahih hani Maunt Oliv.² Uli letu ti ngain liai telao Jises nahih alia hani Ingi Haeu. Kilan seilon apuha kalini i. Jises

to hani itan ape i hutui hanau laha.³ Lokon ien tesol hanaui nauna ti Moses ma tesol Parisi ati tel hehin lato tunahi i eng akakati tel wawan kumahe axoan. Ape lato hatuhi i mate teka kilai seilon ien.

⁴ Lato kakane Jises, “Tel masiwi, tel hehin ie amite atima nake i eng akakati tel wawan kumahe axoan.⁵ Nauna ti Moses kak elielik ka hehin tenen masin ie mewenae ti hokai teleiwa ani pot. Kaie o kak ukek ia?”

⁶ Lato kamei Jises tenen ien nake pahalato i kakawa waliko tenen i pon na lato sului i. Tuahe Jises tuole ape i tai kakain he pekeun ani ngaxe minan.⁷ Ti lato to kakamei Jises, i tu hokahale ape i kakane laha hatesol, “Tel ti amuto na i tai aile saun lialun, kewa i imat ti hokaiai tel hehin pot.”⁸ I tuole ape i tai ulea.

⁹ Ti laha hongoa kakai Jises, laha nahih salili i uke tel tel, nahiai imat teteka salaimat. Mewenae Jises tutuen kapi tel hehin.¹⁰ Jises tu hokahale ape i kamei tel hehin, “Teka suluiam ia? Nakon teka lehe laha aile halialu o, laha ox nahiwen?”

¹¹ Tel hehin kakane Jises, “Tel masiwi, tap tel tutuen ie.”

Ape Jises ukek, “Ien, nga tin nga kum aile hani o na tenen. Ewi na o nahih tuahe kum ailele ulei saun lialun.”

Jises ukek i masin xewai alon

¹² Jises kakane ulei teka kilai seilon, “Nga masin xewai alon. Nga kola aweisal tenen sawisawin hani seilon. Tel na i sohot kahikahik, tap i po to ti tilokoan ailei saun lialun nake ngal tel neinian lehe i to kapi Haeu lian tehue.”

¹³ Teka Parisi hone Jises, “Mewenae o kakak alia o, tap tel liai ukek ka kakaiam salan.”

¹⁴ Jises kak pahoi lato ukek, “Kalak mewenae nga kakak alia nga, kakaiak se salan nake nga tioi tetesol ti nga ahuma ma tetesol ti nga alia. Tuahe amuto kum tioi tenen ien.”¹⁵ Amuto paxai kolongeni woi seilon ti puki namilomuto tuahe nga aile usiusi namili Haeu.¹⁶ Ti na nga paxai kolongeni woi seilon, kolongenian tetak se sawisawin nake kumahe nga ailele ti puki namilok. Tel Tamak Haeu tetel i taloma nga, i lawe kapik.¹⁷ Leili pepai nauna ti puki ti amuto i ukek ka na kakai hua seilon tenenawie, tenen kakain ien salan.¹⁸ Puki nga kola ka kakaiak salan hetekie tel Tamak tin i kola ka kakaiak salan.”

¹⁹ Lato kamei Jises, “Tel tamam ia?”

Jises kak pahoi lato, "Amuto kum tioi nga ma tel Tamak. Na amuto tioila nga, ala tin amuto tioi tel Tamak." ²⁰ Jises kakak ien ti i hahanau teka seilon mate Ingi Haeu, xohixohin tesol hanai moni ti ailei puase Haeu. Laha tai xoti i nake taun tetan i tai meiwa.

Jises kaxi haxewa hani teka laha tai soh tutuen tetan

²¹ Jises hone olei teka seilon, "Kum kue ape nga salili tamusuke amuto. Amuto pax upia nga ti huuhal tuahé amuto kum tunahi ape amuto mat hetekie lialui woumuto. Amuto kum lua uke hani tesol ti nga luawa."

²² Teka masiwi ti teka Ju ukek, "Salangawé kakaian i ukek ia? Kaie i telei aliae i? Alahan i ukek kako kum lua uke hani tesol ti na i luawa?"

²³ Jises kak tatale ukek, "Amuto se ti tehu pon itan ie. Namilomuto ma pupuasamuto tuahé ti seilon. A nga se ti tone Haeu patul, pupusak nga aile usiusi namili Haeu. ²⁴ Nga kakawen ka amuto mat hetekie lialui woumuto. Na amuto kum soh ka nga se tetel ti nga kakaxi, salan i sohot hani amuto."

²⁵ Lato kamei i, "Kaie o aita?"

Jises kak pahoi, "Nga kaxi hakila haniwen amuto. ²⁶ Pate tutuen kakaiak salemuto ape kilai lialui woumuto i pon na nga sului amuto. Tuahé nga kakane teka seilon ti tehu pon ie mewenae waliko ti nga hong ti tel i taloma nga, tetel i salan wanen." ²⁷ Teka masiwi ti teka Ju tai hong xeu tutuen ka Jises kaakane lato sale tel Taman Haeu.

²⁸ Ape Jises hone lato, "Tataen amuto tahí hakea nga tel Nati Seilon patul he kros, Haeu hatakei hani amuto ka nga se tetel ti nga kakaxi. Nga kum aile tenen na waliko ti puki namilok. Masin ti tel Tamak hahanau nga, tin nga kaxi hani teka seilon. ²⁹ A tetel i taloma nga i lawe kapik. I kum lioi nga nake lawe nga aile waliko tenen i hamuamua i." ³⁰ Ti Jises kakak tutuen, kilan seilon soh tetan.

Nati Abraham ma nati Satan

³¹ Ape Jises kakane teteka Ju laha soh tetan, "Na amuto puas usi matuhini waliko ti nga hahanau, amuto kahikahik wanen.

³² Na masin ien, amuto tioi aluini waliko tenen salan sale Haeu ape amuto kumahe unaui saun lialun ulea, amuto ape oxoxain."

³³ Seilon teka kak pahoi Jises, "Amite kahi nati Abraham ma tap wanen amite po to unaui tenen na waliko. Kalahai o kak ukek ien?"

³⁴ Jises hone laha, "Nga kakane amuto kakain salan. Tel na i aile tatale saun lialun i se unauan. ³⁵ Tel unaui tel tame tehu ing i kum to kapin hanowi tel na natun wanen. ³⁶ Aile ape na nga tel Nati Haeu oxoxi amuto ti unaui saun lialun, amuto oxoxa hawanewen. ³⁷ Nga tioi amuto kahi nati Abraham tuahe teka ti amuto tohongi teleiak nake amuto kum hong auni kakaiak.

³⁸ Nga kakak waliko tetenen tel Tamak kola haniwen nga tuahe amuto ailele waliko tetenen tel tamamuto hohone amuto."

³⁹ Laha kak pahoi Jises, "Abraham se tamamite."

Jises ukek, "Na amuto nati Abraham, amuto puas usiwen waliko ti i ailele. ⁴⁰ Nga kaxi hahani amuto kakain salan ti nga hongoma ti Haeu tuahe amuto tohongi tutuen teleiak. Abraham tai ailele saun tetenen. ⁴¹ Amuto aile waliko tenen tel tamamuto ailele."

Laha kak pahoi Jises, "Amite kumahe tuahe nati aweisal. Amite se nati Haeu wanen."

⁴² Jises hone laha, "Na Haeu se salan wanen tamamuto, amuto waheniwen nga nake nga luama ti Haeu. Kumahe nga luama ti puki namilok, i taloma nga. ⁴³ Lahan amuto kum hong xeu waliko tenen ti nga kakak? Se nake amuto kum hong waxi kakaiak. ⁴⁴ Ien se nake amuto nati tel tamamuto Satan ma pahamuto wanen puas usiay namilon. Ti pate uli hutuan, i tel halilau tamusukei seilon ma i kum xeisa waxi waliko tenen salan nake tap wanen i kakak waliko tenen salan. Ti i kak puputa, i aile ti puki saun tetan nake i weli puputa ma i se tel tame puputa. ⁴⁵ Aile ape ti nga kakak waliko tenen salan, amuto kapaxe. ⁴⁶ Nakon aita ti amuto pon sehatuhini ka nga ailewen saun lialun? Ape lahan amuto kum soh nga kalak kakaiak salan? ⁴⁷ Tel seilon na i ti Haeu, i hong usi kakai Haeu. Tuahe amuto kum hong usi kakaian nake amuto kumahe tetan."

Jises se pamu tuah ti Abraham

⁴⁸ Teka Ju kak lengeling, "Salan wanen ti amite ukek ka o tel Samaria ma spirit lialun kapiti hahalalu o."

⁴⁹ Jises kak aseini, “Tap wanen nake nga sameni tel Tamak Haeu a amuto watakai nga. ⁵⁰ Kalak nga kum upiup seilon same-niak, Haeu pahan seilon sameniwa nga a namilon mewenae sawisawin. ⁵¹ Nga kakane hawane amuto, tel na i puas usi kakaiak i kum mat wanen.”

⁵² Teka seilon kak eliel hawane, “Ape amite tioi hawane ka spirit lialun kapiti halialuen o! Abraham matewen ma teka kuluiai kakai Haeu tin laha matewen a o ukek tel na i puas usi kakaiam i kum mat. ⁵³ Kaie o pamu tuah ti Abraham tel tamamite? Abraham i mat ma teka kuluiai kakai Haeu tin laha mat. Nakon o sokok o aita?”

⁵⁴ Jises kak pahoi laha, “Na puki nga sameni nga, tap solian tetan. Se puki tel Tamak i hana nga seilon pate tuah. I se tetel amuto ukek i Haeu ti amuto. ⁵⁵ Tuah amuto kum tioi i. Nga tioi hawane i. Na masin nga ukek nga kum tioi i, nga puputawen, hanowi ti amuto. Tuah nga tioi i ape nga puas usiusi kakaiam. ⁵⁶ Tel tamamuto Abraham i amuam hawane ti i ningahiwa thaliaik. I paxaiwa ape ia amuke.”

⁵⁷ Teka seilon kak ukek, “Ahangum tai meiwa 50! Lehe o ningahi Abraham ukek ia?”

⁵⁸ Jises kak pahoi laha, “Nga kakane hawane amuto, imat ti Abraham takah, nga se liai ien, tetel ti nga kakaxi.” ⁵⁹ Tataen ien wanen, laha waxy pot ti hokaiai Jises tuahie i kuosel ti laha ape i nahih salili Ingi Haeu.

9

Jises haewia tel seilon pulaxa

¹ Ti Jises ma tesol kahikahin tau nanahih, lato ningahi tel seilon pulaxa. Liai i takahama pulaxa. ² Tesol kahikahi Jises kamei i, “Tel masiwi, nake lahan tel seilon ie pulan pulaxa? Nakon i sohot ukek ti puki lialui woun ka lialui woi taman ma tinan?”

³ Jises kak pahoi ukek, “Kumahe nake ti lialui woun ma na lialui woi taman ma tinan. Pulan i pulaxa lehe Haeu kola hani teka seilon lalape pohen ti i hualu tel seilon ie. ⁴ Ti nga tel haxewaiamuto tutuen kapimuto, kako kewa ailei puase tetel i taloma nga. Kum kue ape nga salili amuto. Ien masin tilokoan ti seilon kum puas uke. ⁵ Nga masin xewai alon ti haxewai lawe seilon ti nga he tehu pon ie.”

⁶ Ti Jises kak kewa, i uke teik pekeun. I pukeini ma talini hawasalisali ape ahui hani

puli tel seilon pulaxa. ⁷ Ape i ukek, “Nahih nuhiwa pulam haniwa tehu kan Siloam.” Tetenen ax Siloam i ukek, “talo.” I nahihape i nuhi pulan. Tataen ien pulan ewi ape i paxapax uke.

⁸ Teka seilon laha toto xohixohin kapin ma teka laha ningahiwen i imat ti lawe i to katekat huuhalu, laha he kamekam, “Nakon i se tetel seilon pulaxa, lawe kako ningahi i to katekat huuhalu?”

⁹ Teka laha ukek, “Se tetel ien.”

Tuah teka liai ukek, “Kumahe, tuah tanoman masin wanen i.”

Ape puki tel seilon hone laha, “Se nga tetel seilon amuto he kamekam.”

¹⁰ Laha kamei i, “I sohot ukek ia ape pulam ewi?”

¹¹ I kak pahoi ukek, “Tel seilon axan Jises pukeini hawasalisali teik pekeun ape i ahui hani pulak. I talo nga nahih nuhi kawak hani tehu kan Siloam ape nga aile usi. Tataen ien pulak i ewi ape nga paxapax uke.”

¹² Laha kamei i, “Tel seilon ien ape ia?”
I ukek, “Nga kum tioi.”

Teka Parisi nihehi upia sale haewiai tel pulaxa

¹³ Muhiin ien laha hakahita tel seilon kemuk pulan pulaxa hani teka Parisi. ¹⁴ Ngain tetelao ien Sabat ti Jises aile hawasalisali teik pekeun ti aile haewiai puli tel seilon ien. ¹⁵ Teka Parisi kamei i, “I sohot ukek ia ape o paxapax?”

Ape i kakane lato, “Jises hana teik pekeun wasalisalin hani he pulak ape ti nga nahih nuhiwa kawak, pulak ewi.”

¹⁶ Tesol ti teka Parisi ukek, “Tel seilon Jises i kumahe wanen ti Haeu nake i xaputi nauna ti telao ngain Sabat.”

Tuah teka liai ukek, “Kumahe, nake tap tel seilon woun lialun i pon ailei waliko tenen lalap ti kui pohen masin ti tel seilon ien.” Kakaialahoa i hatano wasolalahoa.

¹⁷ Ape teka Parisi kamei ulei tetel seilon, “Tel seilon i haewia pulam, kiae o ukek i aita?”

Tel seilon kak pahoi, “Nga ukek i tel kuluiai kakai Haeu.”

¹⁸ Teka masiwi ti teka Ju lato kum soh ka tetel seilon ien kemuk pulan pulaxa ape lato ilowi taman ma tinan. ¹⁹ Lato kamei lalu, “Tel seilon ien, i natumuli? Nakon i tetel amulu ukek hoi i takahama pulaxa? Ape lahan ka i paxapax?”

²⁰ Tel taman ma tel tinan kak ukek, “I se natumili. Salan hoi i takahama pulaxa.”

²¹Tuahe amili kum tioi i sohot ukek ia. Amili kum tioi aita haewia pulan. I ape lalap, i pon tukei awan. Kameiwa i!” ²²Lalu kak ukek ien nake lalu mamata teka masiwi ti teka Ju. Lalu tioi lato ailewen namil ka na tel seilon i ukek Jises se Krais, lato xaxaweni tamusuke i ti synagog. ²³Nake ti tenen ien lalu ukek, “I ape lalap, i pon tukei awan. Kameiwa i.”

²⁴Lato ilowi tuhi tel seilon kemuk pulaxa ape kakane i ukek, “Kakawa ti kuinakei Haeu ka waliko ti na o kak se salan nake amite tioi ka tetel seilon i haewia o woun pate lialun.”

²⁵Ape tel seilon kak pahoi lato ukek, “Nga kum tioi na i woun lialun ma na kumahe. Tuahe nga tioi tetenen, kemuk nga pulaxa ape aope ie nga Paxapax uke.”

²⁶Tuahe lato kamea, “Waliko la i aile hani o? I haewia pulam ukek ia?”

²⁷I kak pahoi lato ukek, “Nga kakanewen amuto tuahe amuto kum hong. Alahan pahamuto hong ulea? Halik na pahamuto sohot hakikahin.”

²⁸Lato kak saxuti i ape ukek, “Puki o kahikahin, amite se kahikahi Moses.

²⁹Amite tioi ka Moses tel tuah wanen nake Haeu kakawen kapin tuahe tel seilon ien, i pupuas hahitake aita?”

³⁰Tel seilon ukek, “Saka i aile ukek ia ka amuto kum tioi? Amuto kum tioi aita tel hani i ailei puasan kalak i haewiawen pulak.

³¹Kako tioi Haeu kum hong seilon tetenen woun lialun, i hong teka laha lotu sameni i ma puas usi waliko ti pahan. ³²Kemuk tap wanen tel hahahaewiawen puli tel na seilon i takahama hoi pulaxa. ³³Na masin tel seilon ien kumahe i ahuma ti Haeu, ala i kum pon ailei tenen ien.”

³⁴Lato kak lengeleng ukek, “Lilian ti o takahama o tel welli ailei saun lialun. O kumahe tel hanauamite!” Ape lato talo xaxaweni i ti synagog.

Teteka pulaxa wanen

³⁵Ti Jises hongoa waliko ti i sohot hani tel seilon ien, i nahih upia i. Ti i tunahiwa, i kamei tel seilon, “Nakon namilom xoxoan ti tel Nati Seilon?”

³⁶I pahoi Jises ukek, “I aita? Tel masiwi, kaxi hanima nga lehe nga soh tetan.”

³⁷Jises hone i, “O paxaiwen i. Ti aope ie i kakak kapim.”

³⁸Tel seilon ukek, “Tel Masiwi, nga soh hawane tetam.” I lokuha hani itan ape i lotui Jises.

³⁹Jises hone i ukek, “Nga lua hanima tehu pon ie paxai kolongenai woi seilon. Nga luama haxewai namili teka laha kum xeu ningahiai lawe waliko salan sale Haeu. Ape teka seilon laha sokok hoi laha xewawen ti lawe waliko salan sale Haeu, laha masin teka pulaxa wanen.”

⁴⁰Teka Parisi tutu ien. Ti laha hongoa kakai Jises, laha kamea, “Kiae o ukek amite masin teka pulaxa wanen?”

⁴¹Jises pahoi laha ukek, “Na masin amuto pulaxa wanen, tap tel i tieniwen amuto. Tuahe nake amuto sokok amuto xewawen ti lawe waliko salan sale Haeu, amuto puluti aliliak amuto ape lialui saun ti amuto tutuen.”

10

Jises tel ngahat solian

¹Jises kakane teka seilon ukek, “Nga kakane hawane amuto, tel na i kum soh non he aweing hani tone sipsip a i soh muna hakokol, tel seilon ien i tel seilon xuxuina.

²Tuahe tel ngahatiai sipsip lawe i soh non he aweing. ³Tel peteniai tesol ien i hei kahip hani tel ngahatiai sipsip ape lato hong tioi hawane kinaxon. Ti i hasohotu lato i tiloi axalato tok tok. ⁴I nahike hasohotu ape i neini lato. Lato kahiti i nake lato hong tioi hawane kinaxon. ⁵Lato kum nahih kahiti seilon liai, lato ox salili nake lato kum hong tioi kinaxon.”

⁶Jises kak kokolongeni kakain ien hani teka seilon tuahe laha kum xeu salangawan.

⁷Aile ape Jises kaxi haxewa hani laha i ukek, “Nga kakane hawane amuto, nga masin tewau aweing ti teka sipsip nahih soh.

⁸Teka seilon imat tetak laha woinakon ngahatiai sipsip, laha seilon ti xuxuina ma aile halialualato. Tuahe teka sipsip tetak lato kum hong usi laha. ⁹Nga masin tewau aweing. Tel na i non tewau aweing ien, i tunahi tonain kapi Haeu lian tehue. Ape tesol tesol ti na i nahih, i kum tae tenen na waliko nake Haeu lawe kapin. ¹⁰Tel seilon lialun namilon mewenae ti xuxuina, teletele, halialui seilon ma soxi. Tuahe nga luama lehe seilon hina tonain tenen laha amuke hawane.

¹¹“Nga tel ngahat solian. Tel ngahat solian i kum nomuha na i mat ukei totone teka sipsip tetan. ¹²Seilon ti laha kahui i moni peteniai sipsip, i kumahe tel ngahat wanen nake lato kumahe tetan. Ti i ningahiai sinen tenen tumun kalimen kiliwama, i

ox salili teka sipsip. Ape sinen xohoti hamange ma usi silahoten i lato.¹³ Tel seilon ien ox salili lato nake i kumahe tel tamalato wanen ape i kum nam waxi waliko ti na i sohot hani lato.

¹⁴ “Tuahé nga se tel ngahat solian. Nga ma teka sipsip tetak amite lohun xooxan. ¹⁵ Masin nga ma tel Tamak amili pate lohun xooxan. Aile ape nga kum nomuha na nga mat ukei totone teka sipsip tetak. ¹⁶ Hina sipsip laha kumahe kapik tuahe laha tin tetak. Ape namilok xooxan wanen ti hukumini hatapoalaha, lehe hatesol sipsip tetak hong usi kakaiak. Ape ngain ti i luluainima, laha hatesol hukuma hetekie hahitake ngahat telawé.

¹⁷ “Tel Tamak Haeu wahleni nga nake puki nga hani lioi nga mat lehe nga moih alia.

¹⁸ Tap tel pon teleiak halik na nga sowini. Nga pon hani seilon telei nga ma nga pon moih alia tuahe nga puas usiusi waliko ti tel Tamak honewen nga ailean.”

¹⁹ Teik kakain ien i selai teka seilon.

²⁰ Kilan seilon kakak Jises ukek, “Spirit lialun kapiti halialu il! I taxitaxiawen! Ape lahan amuto hong kakaian?”

²¹ Tuahe seilon teka laha kak ukek, “Tel seilon na spirit lialun kapiti halialu i, i kum kak ukek ien. Spirit lialun kum pon haewiai puli seilon pulaxa!”

Jises ukek i tel Nati Haeu

²² Ngain lalap ape i tahiwé leili Jerusalem ti teka Ju nameni taun ti hil waxi aliakei Ingi Haeu ti teka Siria. Lokon ien taun ti waiwain.²³ Jises tau nanahih tesol Totone Solomon kapi Ingi Haeu.²⁴ Teka Ju apuha kalini i ape ukek, “Kum tua kak hahatila amite. Na o Krais, se kaxi hawane hanima amite.”

²⁵ Jises kak pahoi laha, “Nga kakanewen amuto tuahe amuto kum hong soh. Waliko tenen lalap nga ailele hahitake axe tel Tamak Haeu i kola hawane ka nga se tetel ti nga kakaxi.²⁶ Tuahe amuto kum hong soh nake amuto kumahe tesol ti teka sipsip tetak.²⁷ Teka sipsip tetak hong usi kakaiak. Nga tioi hawane lato ape lato se kahikahik.²⁸ Nga hani lato tonain kapi Haeu lian tehue ape lato kum to wanen lioan ti kaui kawatan ti lialui woulato. Tap tel pon waxi xaxawenialato ti ngangahat tetak.²⁹ Tel Tamak Haeu hani nga teteka lato sohot kahikahik. I pamu masiwian ti lawe seilon, aile ape tap tel i pon waxi xaxawenialato ti

ngangahat tetan.³⁰ Nga ma tel Tamak Haeu amili pakata xox hahawane, amili masin seilon tel.”

³¹ Ti laha hongoa, laha waxi ulea pot ti hokaian.³² Tuahe Jises ukek, “Tel Tamak Haeu hapohea nga ailei kilari waliko solian ti hualai seilon. Tenen ia ti tesol waliko ien ti talesi amuto lehe pahamuto telei nga?”³³

³⁴ Laha kak pahoi Jises, “Kumahe pa-hamite hokai o ti waliko solian o ailewen tuahe nake o teheni halialu Haeu. O tuahe seilon masin amite ape o ukek ka o se Haeu.”

³⁴ Jises ukek, “Ala puki amuto tioi ka Haeu kaakane hina teka masiwi leili pepaun. ‘Nga ukek amuto se haeu.’ (Ps 82:6)³⁵⁻³⁶ Amuto tioi ka kakai Haeu lawe sawisawin ma tuah. Na Haeu ukek ka teka masiwi ti seilon tetan se haeu na laha teka ti hong usiak kakaian, alahan amuto ukek nga teheni hahalialu Haeu ti nga ukek nga tel Nati Haeu? Nga pakata xoxox kapi tel Tamak Haeu. Puki i kilami nga ailei pupuasan ape i taloma nga ailean.³⁷ Na masin kumahe nga ailele puase tel Tamak Haeu, kum hong sohosoh nga.³⁸ Tuahe na nga ailele puasan, kalak amuto kum hong soh nga, sohoa kui pohek ti waliko tenen lalap nga ailele lehe amuto xeu ma tioi ka nga ma Haeu amili pakata xox hahawane, amili masin seilon tel.”

³⁹ Ti laha hongoa, laha tohongi ulea po-hiai Jises tuahe i kuosel ti laha.⁴⁰ Ti tesol ien Jises non koti tehu kan Jodan ape i nahih to hani tetesol kemuk Jon baptaisi teka seilon.⁴¹ Kilan seilon opea hani kapi Jises. Laha ukek, “Tap tenen waliko lalap Jon ailewen tuahe kakaian ti tel seilon ie se salan wanen.”⁴² Ape kilan seilon ien laha hong soh ti Jises.

11

Matei Lasarus

¹⁻² Tel seilon axan Lasarus i ti tewau toan Betani tesol ti hahutuan toto, Mary ma Mata. Mary se tetel imuh i tihi sanda tenen poum solian hani he ae tel Masiwi Jises ape i uke ukun umeni hapaxean. Aope Lasarus tinun.³ Aile ape hahutuan hakau kakain hani Jises ukek, “Tel Masiwi, tel lohumi wanen i pate tinun.”

⁴ Ti Jises hongoa i ukek, “Tenen nax ien kumahe i sohot hani Lasarus lehe i mat tamus tuahe lehe Haeu kola lalape kui pohen ape teka seilon sameni nga tel Natun.”⁵ Jises tone aten wanen Mata, Mary ma

Lasarus. ⁶Tuahe kalak i hongoen ka Lasarus pate tinun, i to ahe ngain huohu tesol ti i heheuta. ⁷Imuh i hone tesol kahikahin, “Kako nahih alia hani Judia.”

⁸ Tesol kahikahin pahoi i ukek, “Tel Masiwi, pate aope wanen teka seilon ien lehe hokai telei o ani pot. Alahan lehe o alia kewak ien?”

⁹ Ape Jises ukek, “Ti nga tel haxewaia-muto kapimuto, kum nanamiloi nake hina taun tutuen Haeu hani kako ailei waliko ti pahan. ¹⁰ Tuahe ti na seilon kum nam waxi nga tel haxewaialaha, ien masin laha nanahih ti leili tilokoan ape laha kum pon ailei waliko ti Haeu pahan.” ¹¹ Jises kak kewa ape i ukek, “Tel lohukako Lasarus ape i matihuen. Tuahe nga nahih hangoni i.”

¹² Tesol kahikahin pahoi i ukek, “Tel Masiwi, na masin i mamatih pake i ewi.”

¹³ Tuahe salangawe kakai Jises i ukek ka Lasarus matewen ape lato sokok i ukek Lasarus tua mamatih.

¹⁴ Aile ape Jises kaxi haxewa hani lato, “Lasarus matewen. ¹⁵ Kalak nga kumahe kapin ti lokon i mat, nga amuam nake waliko ti lehe i sohot, i pon haxoxoi namilomo-tetak. Kako nahih hani kapin.”

¹⁶ Tomas, tel laha axai i Sangasang, hone tesol tuaun, “Kako nahih kahiti tel masiwi lehe tin kako mat ohoi i.”

¹⁷ Ti lato tahiawa Betani, Jises hong ka laha tihiwiens Lasarus ngain hinalo tamusuen. ¹⁸ Betani kumahe xauxaun ti Jerusalem, sai tolulu kilomita. ¹⁹ Kilan seilon nahih paxai Mata ma Mary haso-lialalu ti matei tel ukalalalu. ²⁰ Ti Mata hongoa ka Jises nanahima, i nahih tengeni i a Mary tutuen leili ing. ²¹ Mata kakane Jises, “Tel Masiwi, na masin o ie, kaie tel ukalak i tai mat. ²² Tuahe kalak Lasarus matewen, nga tioi hawane ka Haeu aile tuahe tenen na o kamei i.”

²³ Jises hone i ukek, “Tel ukalam i xahat alia.”

²⁴ Ape Mata ukek, “Nga tioi ka i xahat alia taen hatesol seilon xahat alia, ti taun ti hinitiai lawe seilon.”

²⁵ Jises hone i ukek, “Nga tel xahateniai seilon maten ma hanialaha tonain kapi Haeu ti tap tahi tapoan. Tel na namilom xoxoan tetak kalak i mat i moihin tutuen.

²⁶ Ape tel i soh tetak ma i to kapi Haeu lian tehue, tel ien i kum mat tamus. Kaie o soh ti waliko ie?”

²⁷ Ape Mata pahoi i ukek, “Tel Masiwi, nga soh hawane ka o Krais, tel Nati Haeu, tetel

Haeu taloma.” ²⁸ Ti Mata kak kewa, i nahih alia. I waxy tahaini Mary ti teka seilon ape i ukek, “Tel Masiwi tahiawen, i kamekam o.”

²⁹ Ti Mary honga i saxoh ahuta tengenian.

³⁰ Ti lokon ien Jises tai soh hani leili toan, i tutuen tetesol ti Mata nahih tengeni i.

³¹ Teteka seilon laha apupuha leili tehu ing kapi Mary ti hasolian, taen laha ningah i tua ape i saxoh ahuta hani melal, laha kahiti i. Laha sokok lehe i nahih tang hani he amal. ³² Ti Mary tahiawen haniwa kapi Jises, i lokuha hani itan kapi aen ape i ukek, “Tel Masiwi, na masin o ie, kaie tel ukalak i tai mat.”

³³ Ti Jises ningahiw Mary ma teka seilon kapin tatangixi Lasarus, lon tel hetekie tian i kawat hawane. ³⁴ I kamei lato, “Amuto hahanopi i ia?”

Ape lato ukek, “Tel Masiwi, nahima paxai.”

³⁵ Ape ti tatahan tetan kani pulan lil.

³⁶ Hina seilon ien, laha ukek, “Paxaiwa, lapal wanen wawahen tetan ti Lasarus.”

³⁷ Tuahe teka liai, laha ukek, “I aile haewia puli tel pulaxa, kewak? Kaie ala i awaiwen Lasarus.”

Jises hamoiba Lasarus

³⁸ Ape lato tahiawen hani tehu amali Lasarus. Amal tenen ien laha tanomi he pot patul ti hepekeun. Laha hulini tehu lalape pot ti siponian. Ti lato tutu ien, Jises lon tel ulea. ³⁹ I hone lato, “Hulini xaxaweniwa tehu pot.”

Tuahe Mata ukek, “Tel Masiwi, poun ape kohan. I leili amal kewen ngain hinalo.”

⁴⁰ Jises hone i ukek, “Hoi nga kakanewen o ka na namilom xoxoan tetak, o ningah waliko tenen lapal ti pohe Haeu aile.” ⁴¹ Aile ape lato hulini xaxaweni tehu pot. Jises pax hani patul ape i ukek, “Nga kak kemulik hani o tel Tamak Haeu nake o hongoen kamekame tetak. ⁴² Nga tioi ka lawe o hong nga, tuahe nga kamei o ti puli lawe seilon ie lehe laha soh ka o taloma nga.”

⁴³ Muhin ti i kak kewa, i tilol eliel ukek, “Lasarus ahutama!” ⁴⁴ Ape tel seilon kemuk maten, i ahuta. Minan, aen ma patun tali-nan tutuen maia ti puxuiai seilon maten. Jises hone lato, “Upati xaxaweniwa maia ape hanahiwa i.”

Teka masiwi ti teka Ju aile namil ti teleiai Jises

Mt 26:1-5; Mk 14:1-2; Lk 22:1-2

⁴⁵ Aile ape kilan ti teka seilon kapi Mary, ti laha paxaiwa waliko ti Jises aile, laha

soh tetan.⁴⁶ Tuahe teka ti laha nahih hani kapi teka Parisi ape kaxi hani lato waliko ti Jises ailele.⁴⁷ Aile ape teka Parisi ma teka masiwi tuah ti hukuminiai Haeu ma seilon apuha hani kapi teka masiwi tapein ti teka Ju ape lato ukek, "Kaie kako aile walikola? Tel seilon ien aile kilan kolakol tenen lalap.⁴⁸ Na kako paxai lioi waliko ti i ailele, hatesol seilon laha soh tetan ape teka Rom aile halialu Ingi Haeu ti kako hetekie kako teka Ju."

⁴⁹ Tel ti lato, axan Kaiapas, i tel masiwi tapein ti hukuminiai Haeu ma seilon ti ahang tehu ien. I ukek, "Tap namilomuto.⁵⁰ Amuto kum paxai tioi ka pamu ewian na seilon telawé i mat, kumahe lawe seilon. Pamu lialuan na teka Rom telei kako teka Ju hatesol."

⁵¹ Waliko ti i kakak kumahe ti puki namilon. Nake i tel masiwi tapein ti hukuminiai Haeu ma seilon ti ahang tehu ien, Haeu aile i kak kilami ka Jises mat ti hualiai teka Ju hatesol.⁵² Tuahe kumahe mewenae ti lato, hetekie hatesol seilon ti Haeu laha tesol tesol lehe laha hukuma hetekie namil tenenawé ti usiai nauna ti Haeu.

⁵³ Tataen ien teka masiwi ti teka Ju hutui aile namil ti teleiai Jises.⁵⁴ Aile ape Jises monga ailei puasan ti puli lawe seilon. I nahih ahuta hani Epraim, tehu taon xohixohin kapi lohong. Ape i ma tesol kahikahin to ien.

⁵⁵ Ngain lalap ti Pasova ape i xohiwen. Kilan seilon ti toan tesol tesol laha nahih hani Jerusalem ti ailei saun tenen ti hau-nialaha ti puli Haeu masin ti teka Ju lawe ailele apesenalaha ti Pasova.⁵⁶ Laha to pax upiup Jises. Ti laha leili Ingi Haeu, laha he kamekam alia laha, "Amuto namiloi ukek ia? Kaie i nahih hanima tehu apuhain ti Pasova ka tap?"⁵⁷ Lokon ien tesol masiwi tuah ti hukuminiai Haeu ma seilon hetekie tesol Parisi lato honewen teka seilon ka na tel i tioi Jises tetesol, hahonga lato lehe lato xoti i.

12

Mary tihu sanda hani ae Jises
Mt 26:6-13; Mk 14:3-9

¹ Ngain tepanum tehu imat ti Pasova, Jises nahih hari Betari, tesol tone Lasarus, tetel Jises hamoiha aliakte matean.² Ti ien lato apeseni angiaiun ti amukei Jises. Mata tel lohiai an. Lasarus tin ien leili teka laha toto he tone angiaiun kapi Jises.³ Ti lokon ien Mary waxi tehu sanda kahun pate lalap ma

poun pate solian. I tihu hatapo hani he ae Jises ape i uke ukun umeni hapaxean. Soliai poi tehu sanda i atuhing hatehu.

⁴ Tuahe Judas Iskariot, tel ti tesol kahikahi Jises, tetel imuh i hangaini Jises hani minni teka masiwi ti teka Ju, i ukek,⁵ "Kalahai i tua aile xoini tehu sanda? Pamu ewian na hangaini waxiai moni lalap ape hani teka seilon tap soxi."⁶ Kumahe i kak ukek ien nake i tahane teka seilon tap soxi tuahe nake i seilon tenen xuxuina. I tetel aumiai moniulato ape hina lawe i xuina.

⁷ Tuahe Jises ukek, "Kum hohowini i nake i auni tehu sanda atengi tetelao. I tihu hani he aek apeseniak ti tehu mateak.⁸ Teka seilon tap soxi laha lawe kapimuto, tuahe naga kumahe lawe kapimuto."

⁹ Kilan seilon hong ka Jises Betani ape laha nahih kewak ien. Tin pahalahaa paxaiai Lasarus, tetel Jises hamoiha aliakte matean.¹⁰ Aile ape teka masiwi tuah ti hukuminiai Haeu ma seilon aile teik namil ti telei hetekieai Lasarus.¹¹ Pahalato lato telei Lasarus nake xahat aliaian aile, ape kilan teka Ju laha kum hong lato, laha soh non ti Jises.

Jises tel Masiwi soh hani Jerusalem
Mt 21:1-11; Mk 11:1-11; Lk 19:28-40

¹² Ngain liai telao teka kilai seilon nahih hani tehu apuhain lalap ti Pasova. Laha hong ka Jises nahih hanima Jerusalem.

¹³ Laha koti kai hatoh ape nahih tititol tengenian,

"Kako haxawawa axe Haeu.

Kako sameniwa ma amukewa tel i nahih
hehetekiema poh ma solian ti Haeu!
(Ps 118:25-26)

Kako sameniwa ma amukewa
tel Masiwi tapein ti Israel!"

¹⁴ Jises waxi tok donki uluha, i to he tehiton ape tok donki tau kakau i, masin ti pepai Haeu kakawen ukek,

¹⁵ "Teka seilon ti Israel, kum maamata.

Paxaiwa, tel Masiwi ti amuto i luluainima,
i toto patul he tok donki uluha." (Zech
9:9)

¹⁶ Ti lokon ien tesol kahikahi Jises kum xeu salangawé waliko ti i sosohot. Tuahe muhin ti Jises xahat aliawa ti matean, lato nameni ka pepai Haeu i kakawen ka hatesol waliko ien i sohot hani i.

¹⁷ Teteka seilon laha kapi Jises ti i tilo ahuti Lasarus he amal lokon ti i hamoiha aliakte i, laha kaxi hani teka liai waliko ti i

sohotuen.¹⁸ Ape kilan seilon nahir tengeni Jises nake laha hongoen waliko tenen lalap i ailewen ti pohe Haeu.¹⁹ Teka Parisi kakak alia puki lato, “Amuto ningahi kako kum waxaini wanen. Paxaiwa, hatesol seilon nahir kakahiti i ma hongohong kakaian.”

Jises kakak sale matean

²⁰ Tesol ti teka Grik tin lato nahir lotu hani Jerusalem ti tehu apuhain lalap ti Pasova.²¹ Lato nahir hani kapi Pilip, tel seilon ti tehu taon Betsaida ti Galili ape lato ukek, “Kaie ewi na o huali amite? Pahamite amite paxai Jises.”²² Pilip nahir hahongo Andru ape ati lalu nahir kakane Jises.

²³ Jises kakane teka seilon ukek, “Taun ti mateak i xohiwen. Ape teka seilon paxai tioi ka nga tel Nati Seilon pate tuah ape laha sameni nga.”²⁴ Nga kaxi hawane hani amuto, ien masin wanen tehu waki maia ti seilon seini, i matemu ape imuh i hahua hakila. Na tap, i hamalum waki maia tehue.²⁵ Na tel seilon pahan mewenae akeni konginiae totongan ti itan ie, i lioi totongan ti kapi Haeu. Tuahne na tel seilon i to kahikahik kalak na masin i lioi totongan ti itan ie, i waxytotongan ti kapi Haeu.²⁶ Tel na pahan i sohot kahikahik kewa ka i hong usi kakaiak. Na tel i sohot kahikahik lawe i kakahiti nga hani tuahne na tesol. Ape tel Tamak Haeu namiloi ukek i tel seilon tuah.

²⁷ “Aope ie tiak pate kawatan. Tuahne nga kum kamei Haeu awaiak ti mateak nake hoi liai nga luama ti haponowiai namilon.²⁸ Tel Tamak Haeu, kola haniwa lawe seilon lalape pohem ma soliaiam.”

Tataen ien tenen kinax wixima ti tone Haeu i ukek, “Nga kolawen ape nga kola ulea.”

²⁹ Teka kilai seilon tutu ien hongoa ape teka ti laha ukek, “Sohin tonui kuhuh.”

Teka liai ukek, “Tel engel kakak kapin.”

³⁰ Tuahne Jises hone laha, “Tenen kakain ien kumahe ti hualiaik, ti hualiamuto.

³¹ Aope ie teka seilon ti tehu pon ie lahu tu ti sulusulu nake ti lialui woulaha. Tuahne taun ape i tahiawen ti nga waxaini xaxaweni Satan tel i neini hahalialu laha.³² Taen ti laha tahi hakea nga hani patul he kros, nga kapiti seilon ti lawe xux hanima kapik lehe laha soh tetak.”³³ Jises kak ukek ti kilamiai sale matean.

³⁴ Teka seilon ukek, “Amite tioi ti he pepai Haeu ka Krais i moih lian tehue. Alahan o ukek laha tahi hakea i hani patul he kros? Ape o kakak ulea lahe Krais?”

³⁵ Jises pahoi laha ukek, “Kum kue nga tel haxewaiamuto ape kumahe kapimuto. Aile ape ti nga tutuen kapimuto, usiwa nenein tetak lehe amuto kum puhei ailei saun lialun. Ien masin seilon na i nahir tatanga leili tilokoan.”³⁶ Ti nga tutuen kapimuto, amuto sohoa tetak nake nga masin xewan ti neiniamuto. Na amuto aile usi, amuto sohot hanowi seilon ti xewan.” Muhiin ti Jises kak kewa, i nahir hani tesol ti laha kum tioi.

Teka seilon laha kum soh ti Jises

³⁷ Kalak Jises ailele kilan waliko lalap ti pohe Haeu he puli teka seilon, laha kum soh tutuen tetan.³⁸ Masin wanen ti Aisaia tel kuluiak kakai Haeu kak kilamiwen, “Haeu tel Masiwi, tap seilon hong soh ti amite kakaxi o hani laha. Tin tap seilon paxai tioi lalape po-hem.”³⁹ Aile ape laha kum soh. Aisaia tin i kakkawen,

⁴⁰ “Pulalaha masin ka pulaxa. Laha papaxai waliko ti Haeu ailele tuahne laha kum ningahi. Patulaha pate ailan, laha kum xeu. Ape laha kum towiahu ti lialui woulaha lehe Haeu aile haewia laha.”⁴¹ (Isa 6:10)

⁴¹ Aisaia kak ukek nake i ningahiwен lalape poh ma solian ti Jises ape i kaxi i hani teka seilon.⁴² Kilan seilon laha soh ti Jises. Hina masiwi ti teka Ju tin lato soh tuahe lato mamata kolaian uke teka Parisi xaxaweni tamusuke lato ti synagog.⁴³ Pamu lato halepelep lehe seilon sameni lato, i xoini na Haeu sameni lato.

⁴⁴ Jises kak eliel ukek, “Tel na i soh tetak tin i soh hetekie ti tel i taloma nga.”⁴⁵ Tel i paxaiwen nga, i paxai hetekiewen tel i taloma nga.⁴⁶ Nga lua hanima tehu pon ie masin xewai alon lehe hatesol seilon laha soh tetak laha kum to leili tilokoan ti saun lialun.⁴⁷ Na tel hong kakaiak ape i kum puas usi, nga kum sului i nake nga luama awaiay seilon ti kawatan ti lialui woulaha.⁴⁸ Tel na i kum nam waxy nga ma kum hong auni kakaiak, puki kakain ien sului i. Ape telao ngain ti hinitiai lawe seilon, Haeu axi i kawatan nake ti kakaiak ien.⁴⁹ Kakaiak salan nake kumahe nga kakak ti puki namilok. Se tetel i taloma nga, tel Tamak Haeu hone nga waliko ti nga kakaxi.⁵⁰ Ape nga tioi ka ti usiai nauna tetan i hani seilon tonain kapin

ti tap tahi tapoan. Aile ape nga kakaxi waliko tenen tel Tamak hone nga kaxian.”

13

Jises aile kola hani tesol kahikahin sale auni hasolai seilon

¹Sikole ngain ti Pasova ape Jises ma tesol kahikahin ang apuha hetekie. Jises tioi ka se ape taun ti i salili tehu pon ie ape alia hani kapi tel Taman Haeu. I waheni hawane tesol kahikahin, seilon tetan ape i kola lalape wawahen tetan hani lato.

²Satan hoi i hanarniloawen Judas tel nati Saimon Iskariot hangainiai Jises hani teka teleian. ³Jises tioi ka tel Taman Haeu hana i Masiwi ti lawe waliko ma tin i tioi ka i ahuma ti Haeu ape i alia hani kapi Haeu. ⁴Lokon ti lato angiang, Jises tu, i naxi xaxaweni tehu atuhiai puxuaun, i waxy teik taol ape i xiotti hani luhan. ⁵I tihii kan hani tehu kapi ape i nuhi ae tesol kahikahin. I uke teik taol i xiotti luhan ape i umeni hapaxe aelato.

⁶Ti i tahiawa kapi Saimon Pita, Pita kamei i, “Tel Masiwi, lehe o nuhi aek?”

⁷Jises hone i ukek, “Waliko ti nga ailele o kum paxai tioi tuahe imuh o xeu.”

⁸Pita hone i ukek, “Tap wanen ka o nuhi aek.”

Jises kakane aliake i ukek, “Na nga kum nuhi aem, o kumahe tel kahikahik wanen.”

⁹Pita ukek, “Tel Masiwi, na masin ien, kumahe mewenae aek, nuhi hetekiema minak ma patuk.”

¹⁰Jises ukek, “Seilon ti i kikanoen i kum kikan ulea. Tapai i tua nuhi aen ape i hau hawane. Tuahe kumahe amuto hatesol leilomuto haun.” ¹¹Jises ukek ka kumahe hatesol kahikahin haun nake i tioi ka tel ti lato hangaini i hani teka teleian.

¹²Ti Jises nuhi kewa aelato, i puxui aliake tehu atuhiai puxuaun ape i nahihi alia hani tesol totongan. I kamei lato, “Saka amuto tioi waliko tetenen nga aile hahani amuto?

¹³Lawe na amuto kakane nga, amuto ukek tel Masiwi ma na tel hanauamite. A salan nake nga Masiwi ma tel hanauai seilon.

¹⁴Kalak nga Masiwi ma hanauai seilon, nga nuhi aemuto. Aile ape amuto tin he nuhinuhawa aemuto.

¹⁵Nga aile kola hahani amuto sale auni hasolai seilon ape amuto aile usiwa. ¹⁶Nga kakane hawane amuto, tap tel unaui tel masiwi i pamu masiwian ti tel masiwi tetan. Tin masin tel kaui kakain, i kumahe pamu tuah ti tel taloan.

¹⁷Ape

amuto tioiwen tesol waliko ien. Na amuto puas usi, Haeu auni hasolia amuto.”

Jises kakak tel hangainian

Mt 26:20-25; Mk 14:17-21; Lk 22:21-23

¹⁸Jises kakak tutuen ukek, “Waliko tenen ti lehe nga kak, kumahe nga kakak amuto hatesol. Nga tioi hawane amuto, tetesol nga kilamiwen tetak. Tuahe waliko ti lehe i sohot hoi pepai Haeu kakawen ukek, ‘Tetel i ang kapik masin ka tel lohuk xoxoan, i tale tehiton hani nga watakaiak.’ (Ps 41:9)

¹⁹Nga hahongo pepelei amuto lehe tataen ti sohot, amuto soh ka nga se tetel ti nga kakaxi. ²⁰Na tel seilon hong waxi kakai tel ti nga taloma, tin masin i hong waxi kakaiak. Ape tel na i hong waxi kakaiak tin masin i hong waxi kakai tel i taloma nga.”

²¹Muhin ti i kak kewa, tian i kawat ape i kak hei hawane ukek, “Salan wanen, tel ti amuto i hangaini nga.”

²²Tesol kahikahin Jises he paxapax alia lato, ape lato to nanarniloi ka kiae i kakak aita. ²³Tel ti lato, tetel lolohul ti lalu Jises pate xoxoan, i to palahah hani patanawan. ²⁴Saimon Pita aile kola hani i ukek, “Kameiwa Jises i kakak aita.”

²⁵Ape tel xohixohin kapi Jises kamea, “Tel masiwi, o kakak aita?”

²⁶Ape Jises kak pahoi ukek, “Tel nga hani i teik bret ie muhin ti nga xomi haniwa tehu tone an, i tetel ien.” Salan, i xomi ape i hani Judas Iskariot, tel nati Saimon. ²⁷Muhin wanen ti Judas ani kewa teik bret, Satan kapiti namilon. Ape Jises hone i, “Aile koseniwa waliko ti lehe o aile.” ²⁸Tap tel ti tesol kahikahin Jises ien hong xeu salangawe kakaian. ²⁹Teka ti lato sokok ka Jises tatalo i kahuiiai an ti tehu angiai ti Pasova ma na i tatalo i axiai moni hani teka laha tap soxi nake Judas i tel auniai moniulato. ³⁰Tataen ien wanen Judas nahih salili lato. Hoi ape tilokoan.

Jises kak kilami ka Pita ase

Mt 26:31-35; Mk 14:27-31; Lk 22:31-34

³¹Ti Judas nahiwa, Jises kakane lato ukek, “Taun ti mateak i xohiwen. Ape teka seilon paxai tioi ka nga tel Nati Seilon se pate tuah ape laha sameni. Ape puasak aile kola hani seilon lalape poh ma solian ti Haeu.

³²Nake ti tenen ien, kum kue Haeu tin i kola lalape pohek ma soliaiak tel Natun. ³³Tesol natuk, kumahe pate nga kue kapimuto. Nga kakane ulei amuto waliko ti nga kakanewen

teka liai, amuto pax upia nga tuahe amuto kum pon lua hani tetesol ti na nga luawa.

³⁴ “Tenen nauna sale wawahen ti Haeu hani seilon, nga kaxi haxewa ma haxoxo hani amuto. Amuto he wawahenawa masin ti nga waheni hawane amuto.” ³⁵ Na amuto he wawahen alia amuto, i kola hani teka seilon liai ka amuto se kahikahik wanen.”

³⁶ Saimon Pita kamei i, “Tel masiwi, o nahih kelak?”

Jises pahoi i ukek, “Aope ie o kum kahiti uke nga hani tesol na nga luawa tuahe imuh o lua hani kapik.”

³⁷ Pita kamei i, “Tel masiwi, alahan nga kum pon kahiti aope? Nga kum nomuha na nga mat ohoi o.”

³⁸ Jises pahoi i, “Nga kum ukek. Nga kakane hawane o, imat ti tok mom wawan kokoini, o putini ka o kum tioi wanen nga uke he tolusu.”

14

Jises se aweisal ti hani tel Taman Haeu

¹ Jises kakane tesol kahikahin, “Kum aile hahakawata namilomuto ti tuahe tenen na waliko. Namilomuto kewa xoxoan ti Haeu ma nga. ² Ti tone tel Tamak Haeu kilan ing. Na kumahe salan kaie nga tai kakane amuto. Nga lua hani ien apesenai ingamuto. ³ Na nga apesenai kewa nga aliamma waxi amuto lehe amuto to kapik tetesol ti nga toto. ⁴ Amuto tioi aweisal ti kane tesol nga luawa.”

⁵ Tomas kakane Jises, “Tel masiwi, amite kum tioi tetesol ti na o luawa ape lehe amite tioi ukek ia aweisal?”

⁶ Jises pahoi ukek, “Nga se aweisal hani tel Tamak Haeu. Nga tel kaxiai kakain salan sale Haeu ma tel haniai tonain kapin ti tap tahi tapoan. Mewenae nga se aweisal ti seilon kane tel Tamak. ⁷ Na amuto tioi hawanewen nga, hoi amuto tioi tel Tamak. Aope ie amuto tioiwen ma ningahiwen i.”

⁸ Pilip ukek, “Tel masiwi, kolama tel Tamam ape tap pahamite ulea na tenen.”

⁹ Jises pahoi Pilip, “Nga to kue hawanewen kapimuto. Ala o tioiwen nga. Tel ti i paxaiwen nga, i ningahiwen tel Tamak. Aile ape alahan o ukek nga kola haniva amuto tel Tamak? ¹⁰ Nakon o kum soh ka nga ma tel Tamak amili pakata hahawane ape amili masin tel? Kakain ti nga kaakane amuto kumahe ti puki namilok. Se tel Tamak, tel i to papakata

kapik i ailele puasan. ¹¹ Hong sohoa ka nga ma tel Tamak amili pakata hahawane. Na amuto kapaxe kakaiak, amuto sohoa nake ti waliko lalap nga ailele ti pohe Haeu.

¹² “Nga kakane hawane amuto, tel na namilon xoxoan tetak i pon ailei waliko ti nga ailele. Tin i pon ailei waliko pamu lapan, taen ti nga alia haniva kapi tel Tamak.

¹³ Nga aile waliko ti amuto kamei nga ti hahitake axak lehe poh ma solian ti Haeu, nga tel Natun kola. ¹⁴ Na amuto kamei nga tenen na waliko ti hahitake axak, nga aile hani amuto.”

Jises kakane hawane amuto, tel na namilon xoxoan tetak i pon ailei waliko ti nga ailele. Tin i pon ailei waliko pamu lapan, taen ti nga alia haniva kapi tel Tamak.

¹⁵ Jises kakane tesol kahikahin ukek, “Na amuto waheni nga, amuto puas usiwa nauna tetak. ¹⁶ Ape nga kamei tel Tamak ti haniamuto tel hakuiamuto lehe i to lian tehue kapimuto. ¹⁷ I se Holi Spirit, i kola hatesol waliko tenen salan sale Haeu. Teka seilon kumahe ti Haeu laha kum hong waxi i nake laha kum paxai tioi i. Tuahe amuto tioi i nake i se wasolamuto ape imuh i tin leilomuto tel tel ti kapitiamuto. ¹⁸ Ti nga lua salili amuto, kumahe nga lioi tamusuke amuto, nga alia hanima kapimuto. ¹⁹ Kum kue ape teka seilon kumahe ti Haeu laha kum ningahi nga tuahe amuto ningahi ulei nga. Ape kalak amuto mat, amuto moih ulea nake nga moih ulea. ²⁰ Taen ti Haeu hamoiha nga ti mateak, amuto paxai tioi ka nga ma tel Tamak amili pakata hahawane ma tin kako pakata hahawane. ²¹ Tel na i puas usi nauna tetak, i waheni nga. Ape tel na i waheni nga, tel Tamak waheni i ma tin nga waheni tel seilon ien. Ape nga kola haxewa hawane nga hani i lehe i tioi aluini.”

²² Judas, kumahe tetel Judas Iskariot, i ukek, “Tel masiwi, nake lahan o kola haxewa o hani mewenae amite a kumahe hani lawe seilon?”

²³ Jises pahoi ukek, “Teka laha waheni nga, laha hong usi kakaiak ape tel Tamak waheni laha. Se teka ien nga ma tel Tamak to hawane kapi laha. ²⁴ Teka laha tap wawahen hani nga, laha kum hong usi kakaiak. A kakai ien kumahe ti puki namilok, se kakai tel Tamak, tel i taloma nga. ²⁵ Nga kakane amuto tesol waliko ien ti nga tutuen kapimuto. ²⁶ Tuahe Holi Spirit tel hakuiamuto, tetel tel Tamak taloma ti hahitake axak, i hanau amuto lawe waliko

ma i hanamena amuto hatesol waliko ti nga kaxi haniwen amuto.

²⁷ “Kum hahakawata tiamuto ti tenen na waliko ma kum maamata. Nga tel hapau namilomuto ma tiamuto. Ti nga aile ukek, namilomuto ma tiamuto heh hawane, kumahe masin ti seilon aile hahani amuto. ²⁸ Nga kakanewen amuto ka nga salili amuto tuahe nga aliamma. Na salan amuto waheni nga, ala amuto amuam ti nga alia hani kapi tel Tamak tetel pamu tuah tetak. ²⁹ Nga kakane amuto imat ti i sohot lehe na i sohotua hoi amuto soh kakaia.

³⁰ “Nga kum kak kue kapimuto nake Satan lehe i tohongi aile halialuak. Tuah pohen i kum pon kui pohek. ³¹ Nga puas usi hatesol namili tel Tamak lehe lawe seilon tioi ka nga waheni i.

“Ien, kako nahih.”

15

Jises se tea pata huan kilan ma solian

¹ Jises kakane tesol kahikahin, “Nga se tea pata huan kilan ma solian ape tel Tamak Haeu i se tetel ngahatiai tea pata ien. ² Lawe ngaxon tenen i kum hua, Haeu koti xaxaweni ape i sahuli hasolia ngaxon tenen i huhua lehe i sihai hakila ape hua kila. ³ Amuto hoi liai masin ngaxe pata tenen laha sahuli hasoliawen nake amuto hong usi kakaia. ⁴ Pakata xoxoa kapik ape nga pakata xox kapimuto. Tap ngaxe pata i tua hua, i hua mewenae na i papakata he tea patan. Tin masin amuto. Mewenae na amuto pakata xox kapik amuto hua kila.

⁵ “Nga se tea pata huan kilan ape amuto se ngaxon. Tel na i pakata xox kapik, i hua kila. Na amuto selai tetak, amuto kum aile uke tenen na waliko solian ti Haeu. ⁶ Tel na i kum pakata xox kapik i masin ngaxe pata ti laha koti xaxaweni ape i aiol mat. Laha apuhini ape lui xoini hani he ah. ⁷ Na amuto pakata xox kapik ma hong auni kakaia, tenen na amuto kamea, nga aile hani amuto. ⁸ Na amuto hua kila, amuto se kahikahik wanen ape waliko ti amuto aile i kola lalape poh ma soliae tel Tamak Haeu.

⁹ “Nga waheni amuto masin ti tel Tamak waheni nga. Amuto pakata xoxoa kapik lehe kako to he wawahen ukek ien. ¹⁰ Na amuto puas usi nauna tetak, amuto waheni tatale nga masin ti nga puas usi hahatapo nauna ti tel Tamak ape nga waheni tatale i. ¹¹ Nga kaakane amuto waliko ie lehe

amuam tetak kapimuto ape tiamuto tin i xuh ti amuam. ¹² Nauna tetak ie, waheni amuto tel tel masin ti nga waheni amuto.

¹³ Tel na i mate ukei totone tel lohun se i kola hahawane wawahen. ¹⁴ Amuto se lohuk wanen na amuto usi hatapo nauna tetak. ¹⁵ Nga kum namiloi ukek ka amuto tuahe unauk nake tel unaui seilon i kum tioi namili tel masiwi tetan. Nga namiloi ukek ka amuto se lohuk nake nga kaxi hatakei hahani amuto lawe waliko nga hongoen ti tel Tamak Haeu. ¹⁶ Kumahe amuto otei nga, nga otei non amuto tetak ape nga kilami amuto lehe amuto hua, huan tenen tap tahi lialuan ma tapoan. Ape tel Tamak aile hani amuto tuahe tenen na amuto kamei ti hahitake axak. ¹⁷ Nga nau hahawane amuto, he wawahenawa.”

Jises kaxi ka seilon watakai i ma tesol kahikahin

¹⁸ Jises kakak tutuen ukek, “Na teka seilon watakai amuto, nameniwa ka imat laha watakaimu nga. ¹⁹ Na amuto tuiainen teka seilon kumahe ti Haeu, ala laha waheni amuto. Tuah amuto kumahe tuaulaha nake nga otei amuto ti leilolahia hani kahikahik. Aile ape laha watakai amuto. ²⁰ Nameniwa ti nga kakanewen amuto, tel unaui seilon kumahe pamu masiwan ti tel masiwi tetan. Seilon axi nga kawatan ape tin laha axi kawatan hani amuto. Na laha hong usi kakaia, tin laha hong usi kakaia-muto. ²¹ Laha aile halialu amuto nake amuto kahikahik a laha kum tioi tetel i taloma nga. ²² Na masin nga tai kakane laha waliko tenen salan sale Haeu, tap tel tieni laha ti lialui woulaha. Tuah laha hongoen kakaiakapik ape laha tioi hawane ti laha aile saun lialun. ²³ Teka laha watakai nga, tin laha watakai tel Tamak. ²⁴ Na nga tai aile waliko tenen lalap ti pohe Haeu, tap tel pon tienialaha ti lialui woulaha. Tuah kalak laha ningahiwene, laha watakai ati amili tel Tamak. ²⁵ Wawatak ti laha ien i sohot ti hapoponowiai waliko ti pepai Haeu kakawen. I ukek, ‘Laha watakai nga ti tap wanen huan.’ (Ps 35:19, 69:4)

²⁶ “Taen ti Holi Spirit tel hakuiamuto thiama, tetel i ahuma ti Haeu ma i kak hatakei lawe waliko salan sale Haeu, i kaxi haxewa nga hani amuto. ²⁷ Ape tin amuto kaxi haxewawa nga hani seilon liai, pake amuto se kapik ti uli hutui puasak.”

16

¹ Jises kaakane tutuen tesol kahikahin ukek, "Nga kaxi hahani amuto ukek ien lehe xoxoi namilomuto tetak i kum put. ² Laha xaxaweni tamusuke amuto ti synagog ape taun i luluainima ti teka seilon laha tele amuto laha namilo i ukek ka saun tenen ien i kola ka laha se unaui Haeu. ³ Laha aile ukek ien hani amuto nake laha kum tioi amili tel Tamak. ⁴ Tesol waliko ien nga kaxi hahani amuto aope ie lehe ti na i sohot, amuto nameni kakaiak. Nga tai kaxi hani amuto ti imat nake nga kapimuto ma tap tel aile halialu amuto.

Puase Holi Spirit

⁵ "Aope ie nga alia hani kapi tel i taloma nga tuahe tap tel ti amuto i kamei nga tetesol ti na nga lua hani. ⁶ Tiamuto xuhai tatahan nake ti waliko nga kakanewen amuto. ⁷ Nga kakane hawane amuto, ti solian ti amuto pamu ewi nga salili amuto nake na nga kum alia hani kapi tel Tamak, Holi Spirit tel hakuiamuto i kum tahia hani kapimuto. Tuahe na nga salili amuto, muhin nga talo i hanima kapimuto. ⁸ Ape na i tahiama i sehatuhini hani teka seilon ka laha ailele saun lialun. Tin i kak haxewa sale aweisal ti laha sohot seilon sawisawin ti Haeu ma sale Haeu axi kawatan ti lialui woulaha na laha kum towiahu ti saun ien ape usi i. ⁹ Holi Spirit kola hani teka seilon ka laha ailele saun lialun nake laha kum soh tetak. ¹⁰ I kola haxewa ka laha sohot seilon sawisawin na laha soh tetak. Nga lua hani kapi tel Tamak nake nga tel pate sawisawin. Ape amuto kum ningahi ulea nga. ¹¹ Holi Spirit kola ka Haeu hoi i namilo iwen ukek ka i axi kawatan hani Satan tel neini halialui seilon ma hani teteke ti ailei saun lialun.

¹² "Kilan kakaiak tutuen ti kakaneamuto tuahe kilan kasia ti na amuto hong xeu lape tehue. ¹³ Tuahe tataen Holi Spirit tahiama, tetel i kola lawe waliko salan sale Haeu, i neini amuto ti tioiai Haeu. Kumahe i kakak ti puki namilon, i kakaxi waliko tenen i hong ti Haeu ape i kakane amuto waliko ti luluainima tutuen. ¹⁴ I kaxi hani amuto waliko ti nga kaxi hani i ape i kola lalape pohek ma soliaiak. ¹⁵ Hatesol waliko ti tel Tamak hina se tetak, aile ape waliko ti nga kaxi hani Holi Spirit, i kaxi hani amuto."

Tatahan ma amuam

¹⁶ Jises ukek, "Kum kue ape amuto kum ningahi nga ape tin kum kue amuto ningahi ulea nga."

¹⁷ Teka ti tesol kahikahin he kamekam, "Salangawe kakaian ukek ia ti i kaakane kako ka kum kue ape kako kum ningahi i ape tin kum kue kako ningahi ulea i? Salangawe kakaian ukek ia ti i kaakane kako ka i sohot ukek ien nake i lua hani kapi tel Taman?" ¹⁸ Lato he kamekam tutuen, "Salangawe tenen kakain 'kum kue' i ukek ia? Kako kum xeu waliko tenen i kakak."

¹⁹ Jises tioiwen ka pahalato lato kamei i ape i ukek, "Nakon amuto he kamekam salangawe waliko ti nga kakak?" ²⁰ Nga kakane hawane amuto, amuto tang tahane taen ti teka seilon laha kumahe kahikahik laha amuam. Amuto to leili tatahan tuahe imuh tatahan ti amuto towiahu hani lalape amuam. ²¹ Masin tel hehin ti lehe i hatakahä natun, i ilamenimu moloan ape imuh i amuam nake i hatakahawen tel aikaik. ²² Tin masin amuto, amuto toto leili tatahan tuahe taen nga ningahi ulea amuto, tiamuto amuam hawane. Tap tel i pon xaxaweniai amuam ien leili tiamuto. ²³ Taun tehu ien, amuto kum kamei ulea nga na tenen. Nga kakane hawane amuto, tel Tamak Haeu aile hani amuto tuahe tenen na amuto kamei i ti hahitake axak. ²⁴ Hanima tataen aope amuto tai kamea ukek ien. Kameiwa Haeu hahitake axak lehe i hani amuto ape amuto amuam hawane.

²⁵ "Nga hahapuasa meng tenen tenen ti nga hanau amuto tuahe taun tehu i luluainima ti nga kaxi hei hani amuto sale tel Tamak Haeu. ²⁶ Tataen ien amuto kamei i ti hahitake axak. Nga kum ukek nga tuke awamuto ti kameian. ²⁷ Puki tel Tamak Haeu waheni amuto nake amuto waheni nga ape amuto soh ka nga ahuma tetan. ²⁸ Nga ahuma ti tel Tamak Haeu hani tehu pon itan ie ape aope ie nga lua salili tehu pon ie hani kapi tel Tamak."

²⁹ Ape tesol kahikahin ukek, "Aope ie o kaxi haxewa hawanewen, kumahe o hahapuasa meng hanowi ti imat. ³⁰ Aope ie amite tioiwen ka o tioi lawe waliko, ape tap i hahapuasa amite kameiam. Ti nake tenen ien amite soh ka o ahuma ti Haeu."

³¹ Jises kakane lato ukek, "Aope ie amuto soh. ³² Tuahe tehu taun i luluainima, a se hoi liai i tahiawen, ti amuto ox salili nga hani tonamuto. Tuahe nga kumahe lioan nake tel Tamak se kapik. ³³ Nga kakane amuto

waliko ie lehe namilomuto ma tiamuto i ewi hawane ti amuto pakata xox kapik. Ti tehu pon ie amuto tunahi kilan kawatan tuahe tu xoxoa. Nga waxainiwen pohe Satan ma lawe waliko lialun.”

17

Jises lotu huali aliake i

¹ Ti Jises kakane kewa tesol kahikahin, i pax hani patul ti tote Haeu ape i lotu ukek,

“Tel Tamak, taun tetak i meiwen ti nga mat ma xahat alia. Kola haniwa lawe seilon lalape pohek ma soliaiak nga tel Natum lehe nga kola hani laha lalape pohem ma soliaiam.² Pake o hana nga Masiwi ti lawe seilon lehe nga axi tonain kapim ti tap tahi tapoan hani teteka seilon o hana hahitake ngangahatak.³ Lato uke tonain kapim ti tap tahi tapoan na lato tioi hawane o, tel Haeu salan ma nga Jises Krais tel o taloma.⁴ Nga kola haniwen teka seilon lalape pohem ma soliaiam ti nga aile hatapo puasain ti o hahani nga ailean.⁵ Tel Tamak, aope ie kola haniwa laha lalape pohekalu ma soliaikalu, i se hoi liai ti kalu, imat ti hutuiai tehu pon itan ie.

Jises lotu huali tesol kahikahin

⁶ “Nga kaxi haxewawen o hani tesol kahikahik, tetesol o waxy ahuti ti leili teka seilon laha kumahe tetam ape o hana lato hahitake ngangahatak. Lato hoi lawe tetam. O aile lehe lato sohot kahikahik ape lato hong usi kakaiam.⁷ Aope ie lato tioi ka lawe waliko ti o hani nga, i ahuma tetam.⁸ Nga kaxi hani lato waliko ti o kaxi haniwen nga ape lato hong waxy kakaiakalu. Lato tioi hawane ka nga ahuma tetam ape lato soh ka o taloma nga.

⁹ “Nga lotu huhuali lato. Aope ie kumahe nga lotu huhuali teka seilon laha kumahe tetam, nga lotu huhuali tetesol o hana hahitake ngangahatak nake lato seilon tetam.¹⁰ Lawe seilon tetak se tetam ma lawe seilon tetam se tetak. Ape sale pupuasalato i kola lalape pohek ma soliaiak.¹¹ Kum kue nga lua salili tehu pon itan ie hani kapim tuahe lato tiliwen ie wasole teka seilon laha kumahe tetam. Tel Tamak pate tuah, ti lalape pohem awaiwa lato, ti poh tetenen o haniwen nga lehe lato pakata xox hetekie hanowi kalu.¹² Ti nga kapi lato ie, nga hahapuasa

pohem ti awaialato ape tap tel ti lato i seliai ti nenein tetam mewenae Judas Iskariot. I tetel lioan, hoi i kau kawatan ti lialui woun lehe kakain ti he leili pepaum sohot poponowi.

¹³ “Aope ie nga alia hani kapim. Nga kakak tesol waliko ie ti nga tutuen he tehu pon itan lehe lalape amuam tetak tin he tialato.¹⁴ Nga kakanewen lato kakaiam ape teka seilon laha kumahe tetam laha watakai hawane lato nake lato ape kumahe tuaulaha. Nga tin kumahe tuaulaha.¹⁵ Kumahe nga kamei o ti waxy ahutialato ti leilolaha tuahe nga kamei o ti awaialato ti Satan.¹⁶ Salan wanen, tesol kahikahik lato kumahe tuai teka seilon laha kumahe tetam masin ti nga kumahe tuaulaha.¹⁷ Hapuasawa kakaiam ti hualialato lehe lato sohot unauam wanen ti ailei pupuasam. Pake kakaiam pate salan.¹⁸ Masin ti o taloma nga hani tehu pon ie ti ailei pupuasam, tin nga talo lato hani tesol tesol ti ailei pupuasam.¹⁹ Nga hani hatapo nga unauam wanen lehe tin lato sohot unauam wanen.”

Jises lotu huali hatesol seilon laha soh tetan

²⁰ “Kumahe nga lotu huhuali mewenae tesol kahikahik kapik, tin nga lotu huhuali hatesol teka laha soh tetak ti laha hong soh kakai tesol kahikahik.²¹ Tel Tamak, nga lotu huali laha hatesol lehe laha pakata xox hetekie hanowi kalu, ape tin laha pakata xox kapi kalu lehe teka seilon soh ka o taloma nga.

²² “Nga hani laha pohem ma soliaiam ti o haniwen nga lehe laha pakata xox hetekie hanowi hawane kalu.²³ Ape tin nga pakata xox kapi laha masin ti o pakata xox kapik lehe ti xoxoi pakataialaha laha sohot hanowi seilon tel. Ien i kola hawane hani teka seilon laha kumahe tetam ka o taloma nga ma o waheni hawane laha masin ti o waheni hawane nga.²⁴ Tel Tamak, pahak wanen ka teka seilon o hana hahitake ngangahatak, lato lawe kapik lehe lato ningahi lalape pohek ma soliaiak ti o hani nga nake hoi o waheni nga imat ti hutuiai tehu pon itan.

²⁵ “Tel Tamak, tel pate sawisawin, teka seilon kumahe tetam laha kum tioi o tuahé nga tioi hawane o ma teka kahikahik tioi ka o taloma nga.²⁶ Nga kola haxewawen o hani lato ape nga kola tatale

lehe lato waheni seilon liai masin ti o waheni nga ape wawahen tetak hamalum leilolato tel tel.”

18

Laha xoti Jises

Mt 26:47-56; Mk 14:43-52; Lk 22:47-53

¹ Muhin ti Jises lotu kewa, i ma tesol kahikahin nahih hani tesol axan Kitron Vali. Ti ien, lato soh hani leili tesol kini oliv. ² Judas, tetel imuh i hangaini Jises hani teka seilon teleian, i tioi tetesol kin nake Jises ma tesol kahikahin nahih hakila hani ien. ³ Ape Judas nahih hani tetesol kin. Kahitiwa i tesol seilon ti hile ti Rom, tesol unaui teka masiwi tuah ti hukuminiai Haeu ma seilon ma tesol unaui teka Parisi. Laha kakau paulaha, lul ma kamaialaha liai.

⁴ Jises hoi i tioi lawe waliko ti lehe i sohot hani i. Kakanua i nahih kouke hani mateiwalaha ape i kamea, “Amuto upiup aita?”

⁵ Laha ukek, “Jises ti Nasaret.”

Ape Jises kak pahoi, “Se nga.” Judas tetel hangainian tin i tutu kapi laha ien. ⁶ Ti Jises ukek, “Se nga,” laha sue alia ape laha put hani itan.

⁷ Jises kamei ulea laha, “Amuto upiup aita?”

Laha ukek, “Jises ti Nasaret.”

⁸ Jises hone laha, “Nga kakanewen amuto ka se nga tetel. Na masin salan amuto upiup nga, amuto hanahi lioiwa tesol kahikahik, tiliwen lato nahih taha.” ⁹ I kak ukek ien lehe kakain ti i kakawen i sohot poponowti i ukek, “Tel Tamak, nga awai teka seilon o haniwen nga, tap tel seilon i pon waxi xaxawenialato ti ngahat tetak.”

¹⁰ Taen ien Saimon Pita itini ahuti tea ngolun weluwelen. I kaheni ape i koti haputa taxingi Malkus, tel ti tesol unaui tel masiwi tapein ti hukuminiai Haeu ma seilon. I koti tose teapaun taxingan manau.

¹¹ Tuah Jises hone Pita, “Hana aliakewa tea ngolun haniwa he ingan. Laii nga kau kawatan ti tel Tamak namiloiven nga kau.”

¹² Ape tesol seilon ti hile ti Rom hetekie tel masiwi ti laha ma teka peteniai Ingi Haeu, laha xiota Jises. ¹³ Imat laha hakahita i hani kapi Anas, tel wawan ihai Kaiapas. Kaiapas i masiwi tapein ti hukuminiai Haeu ma seilon ti ahang tehu ien. ¹⁴ I tetel kemuk i kakane teka masiwi ti teka Ju ka pamu ewian na seilon telawate mat ti awaiai lawe seilon ti matemate.

Pita ase ka i kum tioi Jises

Mt 26:69-75; Mk 14:66-72; Lk 22:54-62

¹⁵ Saimon Pita ma tel kahikahin Jises liai, lalu nahih usi Jises ma tesol hakahitaian. Tetel kahikahin liai ien, laha sowini i soh hani tesol mate ingi Kaiapas, tel masiwi tapein ti hukuminiai Haeu ma seilon nake Kaiapas tioi i. ¹⁶ Pita tutuen melal kapi aweing. Aile ape tetel kahikahin Jises liai alia hani kapin ape i hone tel hehin pepeteni aweing hasohoi Pita. ¹⁷ Tel hehin ien kamei Pita, “Nakon o kumahe se tel ti kahikahin tel seilon Jises?”

Pita pahoi ukek, “Kumahe.”

¹⁸ Tesol unaui Kaiapas ma teka peteniai Ingi Haeu, lato tu kakalini tehot ah hahiai tinulato nake pate waiwain. Ape Pita tin i nahih tu akati lato hahiai tinun.

¹⁹ Ti lokon ien Anas kakamei Jises sale tesol kahikahin ma waliko ti i hahanau teka seilon. ²⁰ Jises kak pahoi i ukek, “Lawe nga kak hehei ti taxingi seilon. Nga hahanau laha leili synagog ma leili Ingi Haeu, tetesol ti teka Ju apuha hehetekie. Nga kum kak mumunen tenen na waliko.” ²¹ Ape nake lahan o kamei nga ukek ien? Kameiwa teka laha hongoen kakaiak. Laii laha tioi waliko ti nga kakaxi.”

²² Ti Jises kak kewak ien, tel ti tesol peteniai Ingi Haeu tapahi i ape i ukek, “Kalahai o towi kakain tenen masin ien hani tel masiwi tapein ti hukuminiai Haeu ma seilon?”

²³ Jises pahoi i ukek, “Na masin nga kakawen waliko kumahe salan, kola sehatuhinima. Tuahne na nga kakawen kakain salan, nake lahan o tapahi nga?”

²⁴ Ape Anas talo Jises ti i xiotaan tutuen hani kapi Kaiapas tel masiwi tapein ti hukuminiai Haeu ma seilon.

²⁵ Lokon ien Saimon Pita tutu tutuen kapi teka seilon pape tehot ah ape lato kamei i, “Nakon o kumahe se tel ti kahikahin tel seilon Jises?”

Pita pahoi ukek, “Kumahe.”

²⁶ Leilolato tel unaui Kaiapas, i akiki tel seilon Pita kote tose taxingan ti leili kini oliv. I kamei Pita, “Nakon o kumahe se telet nga ningahi kapi Jises leili kini oliv?” ²⁷ Pita ase ulea ka i kum tioi Jises. Ape ti lokon ien wanen tok mom wawan kokoiniwa.

Jises tu mate tel masiwi Pailat

Mt 27:11-14; Mk 15:1-5; Lk 23:1-5

²⁸ Ti pate uli letu, laha hakahita Jises ti ingi Kaiapas hani tehu ingi Pailat, tel ti teka

masiwi ti Rom. Tuahé hahalin ti teka Ju soh hani tehu ing ien nake se ingi teka kumahe Ju. Na laha soh, laha kum pon aniai an ti Pasova nake laha ape loló.²⁹ Aile ape Pailat nahih sohot hani kapi laha ape i kamea, “Pahamuto sului tel seilon ie ti waliko la?”

³⁰ Laha kak pahoi ukek, “Na masin i kumahe tel seilon ti ailei saun lialun kaie pake amite kum hakahita hanima kapim.”

³¹ Pailat hone laha ukek, “Kaien puki amuto waxi suluiwa i usiwa puki nauna ti amuto.”

Laha kakane i ukek, “Amite hahalin wanen ti teleiai tel na seilon.”³² Waliko ien i sohot lehe kakain ti Jises kakak sale matean i sohot poponowi.

³³ Pailat nahih alia hani leili ing ape i hone tesol unauan hakahitai Jises hani kapim. Ape i kamei i, “Nakon o se tel masiwi tapein ti teka Ju?”

³⁴ Jises ukek, “Nakon o kakamei nga ti puki namilom ka teka liai kaxi hani o ngá?”

³⁵ Pailat pahoi ukek, “Kumahe namilok. Nga kumahe tel Ju. Puki teka akikim ma teka masiwi tuah ti hukuminiai Haeu ma seilon laha hana o hani he minak. Waliko la tenen lialun o ailewen?”

³⁶ Jises ukek, “Na masin nga masiwi ti tuahe namili seilon, hoi teka unaauk hil awaiwen nga ti mini teka Ju masiwi ti amite. Tuahé kumahe puki seilon hana nga masiwi.”

³⁷ Ape Pailat ukek, “Kaien o se tel masiwi tapein, kewak?”

Jises pahoi i ukek, “Puki o ukek nga masiwi tapein. Nga takah hanima tehu pon ie ti kola hatake haniae seilon waliko tenen salan. Hatesol teka laha waheni waliko tenen salan, laha hong usi kakaiak.”

³⁸ Ape Pailat kamei i, “A waliko la tenen salan?” Muhiin ien Pailat nahih alia hani melal kapi teka seilon ape i hone laha ukek, “Nga tai upia tunah tenen ti i pon suluan.”

³⁹ Tuahé ti usiay saun ti amuto, lawe nga oxoxi ahuti tel ti teka kalabus hani amuto ti taun ti Pasova. Kaie pahamuto nga oxoxi ahuti tel masiwi tapein ti amuto teka Ju?”

⁴⁰ Laha ausini elieliel ukek, “Kumahe! Kumahe! Pahamite Barabas!” Barabas i tel ti teka Ju laha hil pahoi teka masiwi ti kiliwakei xuxulaha.

¹ Muhiin ien Pailat hani teka unaauan ti hile heti Jises. ² Lato alingini ngaxe au ape nihini hana hani he patun. Lato sosoi i teik maia tenen kakai ati polun. ³ Lato kak soxeni i ukek, “Tel masiwi tapein ti teka Ju tap tahí mateam!” Ape lato tapahi tuhituhu i.

⁴ Pailat nahih ulea hani kapi teka seilon laha apupuha ape i kak ukek, “Nga atoheni i hani amuto. Tuahé amuto tioi kewak nga tai tunahi tenen na waliko lialun ti i pon suluan.” ⁵ Laha hasohotu Jises hani melal. Ngaxe au alinginian he patun ma teik soson maia kakai ati polun. Ape Pailat kak ukek, “Paxaiwa tel seilon ti amuto susului.”

⁶ Teka masiwi tuah ti hukuminiai Haeu ma seilon ma teka peteniai Ingi Haeu paxaiwa Jises ape lato leng ausisini, “Tahi hakea i haniwa he kros!”

Tuahé Pailat ukek, “Puki amuto tahi hakeawa i. Nga tai upia tunah waliko tenen lialun i ailewen.”

⁷ Teka laha apupuha ien tilol pahoi i ukek, “Tenen nauna ti amite ukek ka liai i mat nake i kakaxi ka i tel Nati Haeu.”

⁸ Ti Pailat hongoa, i mamata hawane. ⁹ I hakahita aliakte Jises hani leili ing ape i kamei i, “A o seilon ti ia?” Tuahé Jises tai wix pahoi. ¹⁰ Pailat hone i, “Nake lahan o kum wix pahoi nga? O tioi kewak, i pon na oxoxi o ma na tahi hakea o.”

¹¹ Ape Jises ukek, “Na Haeu tai sowini hani o, o kum pon ailean. Aile ape tel seilon i hana nga hani he minam, i aile saun pamu lialuan ti o aile.”

¹² Ti Pailat hong kewak ien, i tohongi oxoxi ahuhuke Jises. Tuahé teka seilon ien leng ausini ukek, “Na masin o oxoxi ahuti tel seilon ie, o kumahe lohi Sisa. Tel na i ukek i se tel masiwi tapein, i pahoxai Sisa tel masiwi tapein ti Rom.”

¹³ Ti Pailat hongoa kakain ien i hakahita aliakte Jises hani melal ti mateiwai teka seilon ape i to hani tesol totuan ti hong paxaiak kakain, ti kakai Arameik laha axai, Gabata. Tenen kakain ien ukek, “Tesol Pot.”

¹⁴ Waliko ien i sohot ti tehu ngaini ti apesenialaha ti Pasova. Ti sai lape ngain, Pailat kakane teka seilon, “Tel masiwi tapein ti amuto ie!”

¹⁵ Laha tilol pahoi Pailat, “Teleiwa! Teleiwa! Tahi hakea i haniwa he kros!

Pailat kamei lato, “Kaie pahamuto nga telei tel masiwi tapein ti amuto?”

Teka masiwi tuah ti hukuminiai Haeu ma seilon pahoowa, "Masiwi ti amite mewenae Sisa."

¹⁶ Pailat kakanua i hani Jises he minalaha lehe laha tahi hakea i hani he kros. Ape teka seilon ti hile waxi Jises.

*Laha tahi hakea Jises hani he kros
Mt 27:35-44; Mk 15:24-32; Lk 23:32-43*

¹⁷ Ape laha nahih hahaniwa tesol axan Golgota. Teik kakain ien ti kakai Arameik. I ukek, "Tetesol tanoman masin kui pati seilon." Puki Jises kakau teik kros pata. ¹⁸ Ti tesol ien laha tahi hakea i hani he teik kros i kakau. Tin laha tahi hakea hua seilon, tel sai teapaun, tel liai teapaun ape Jises patalal ti lalu. ¹⁹ Ti hahitake axe Pailat teka seilon ti hile tahi hakea teik kakain onote pati Jises. I ukek, "JISES TI NASARET, TEL MASIWI TAPEIN TI TEKA JU." ²⁰ Kilan wanen seilon paxaiwen kakain ien nake tetesol ti Jises akeak xohixohin tehu taon lalap a kakain ien laha tai ti kakai Arameik, Latin ma Grik.

²¹ Teka masiwi tuah ti hukuminiai Haeu ma seilon hone Pailat, "Kumahe i tel Masiwi Tapein ti teka Ju. Tai sohi kewak, tel seilon ie i ukek i Masiwi Tapein ti teka Ju."

²² Pailat pahoi ukek, "Waliko ti taiwen tiliwen masin ien."

²³ Muhin ti teka seilon ti hile tahi hakea kewa Jises, lato sei tesol maia Jises sosoi wasolalato seilon hinalo. Lato waxy hetekie tehu atuhiae puxuaun tuahie i maia teikawe ape lato kum pon seian. ²⁴ Aile ape lato ukek, "Kako kum lexi sei. Kako halokeni satu upiae tel waxian."

Waliko ien i sohot haponowiai teik kakain leili pepai Haeu. I ukek,

"Lato sei tesol sosos maia wasolalato ma halokeni satu waxiae tehu atuhiae puxuauk." *(Ps 22:18)*

Ape salan, tesol seilon ti hile aile ukek ien.

²⁵ Tutu xohixohin kapi teik kros se tel tini Jises, tel tuai tel tinan, Mary tel axoi Klopas ma Mary Magdalen. ²⁶ Ti Jises paxaiwa tel tinan tutu ien kapi tel kahikahin lohun pate xoxoan, i ukek, "Tel tinak, o kewa tel seilon ie masin natum wanen." ²⁷ Ape Jises kakane tel kahikahin ien, "I se ape tinam." Hututataen ien tel kahikahin waxy auni i.

*Matei Jises
Mt 27:45-56; Mk 15:33-41; Lk 23:44-49*

²⁸ Jises tioi ka hatesol puasain ti tel Taman talo i aisle ape i hatapoem. Lehe kakain ti pepai Haeu i sohot poponowi, Jises ukek, "Kinawek paxepaxen, pahak nga un." *(Ps 22:15, 69:21)* ²⁹ Tehu peti waen wangingian

ien, aile ape laha xomi hawaxexa teik maia hani he waen, laha hana hani teik tumi ngaxe pata axan hisop ape tulini hani he singi awan. ³⁰ Ti Jises namihiniwa i ukek, "Pupuasak nga hatapoem!" I lakuini patun ape i hana aliaka i hani he mini Haeu.

³¹ Telao ien ngaini ti apesenialaha ti Sabat ape Sabat tehu ien se ngaini lalap ti tehu Pasova. Aile ape teka masiwi ti teka Ju watakai tupui tesol seilon ien akeak tutuen he kros telao Sabat. Laha kamei Pailat na i sowini hani teka unauan ti hile xai otohi ae tesol seilon ien lehe lato mat kosea ape laha hamosu tupualato hani itan. ³² Ape tesol unaui Pailat ti hile nahih xai otohi ae huhua seilon laha tahi hahakea kapi Jises. ³³ Ti lato tahi haniwa kapi Jises, lato ningahia ka i matewen ape lato kum otohi aen. ³⁴ Tuahie tel ti tesol seilon ti hile tapuhi pope Jises tehu samen ape kaka ma kan xiweu ahuta hahutuia. ³⁵ Tetel i ningahiweng waliko ti i sohot ien i kakaxi waliko salan. I tioi waliko ti i kakaxi se salan. I kaxi waliko tenen ien lehe tin amuto soh ti Jises. ³⁶ Tesol waliko ien i sohot haponowiai teik kakain leili pepai Haeu, i ukek, "Tap tea na kuin laha otohi." *(Exod 12:46; Num 9:12; Ps 34:20)* ³⁷ Tin i haponowiai teik kakain liai leili pepai Haeu i ukek, "Teka seilon paxai tetel laha tapuhi." *(Zech 12:10)*

*Auniai tupui Jises leili amal
Mt 27:57-61; Mk 15:42-47; Lk 23:50-56*

³⁸ Muhin ien Josep ti tehu taon Arimatea kamei Pailat na i waxy auni tupui Jises. Josep i tel kahikahin Jises tuahe i puluhini nake i mamata teka masiwi ti teka Ju. Ti Pailat sowini haniwa Josep, i waxy tupui Jises. ³⁹ Nikodimus, tetel kemuk ipong tehu i nahih paxai Jises, i kahiti Josep kau hehetekie 33 kilo mer ma aloes, waliko tenen masin sanda poun pate solian. ⁴⁰ Ape lalu waxy mer ma aloes hetekie teik maia weluwelun ape puxui talini tupui Jises. Lalu aile ukek usiai saun ti teka Ju sale tihiniae seilon maten. ⁴¹ Tetesol laha tahi hahakea Jises xohixohin kapi tesol kin. Leili tesol kin ien tehu amal haun, tenen laha tanomia he pot patul ti hepekeun. Laha tai hahaha tupui seilon maten ien. ⁴² Lalu hana Jises ien nake tehu amal xohixohin a ngaini tetehu ien se ti apesenialaha ti Sabat.

¹ Pate letu ti Sande, ti tilokoan tutuen, Mary Magdalen nahih hani tehu amal ape i ningahi tehu pot laha uke sponiai amali Jises ape hulinan. ² Aile ape i kiliwau hani kapi Saimon Pita ma tel kahikahi Jises liai, tel lohun xooaan. I ukek, “Laha waxy ahutien tupui tel masiwi ti leili amal ape amite kum tioi tesol laha hahaha i!”

³ Ape Pita ma tel kahikahi Jises liai lalu luu hani tehu amal. ⁴ Ati lalu kikiliwau tuahue tel kahikahi Jises liai i pamu nahiaria ape i tahia imat hani amal. ⁵ I teha wana ape i ningahi maia ti laha pupuxui Jises tuahue i tai soh hani leilon. ⁶ Saimon Pita, tel i usima muhini, i tahiawa ape i soh hani leilon. Tin i ningahi teik maia puxuiai tupui Jises ien. ⁷ Teik maia laha tatalini patun, i toto tanenan kumahe kapi maia liai. ⁸ Ape tel kahikahi Jises i tahiamu imat he amal, tin i soh hani leilon. I ningahi waliko ti leili amal ape i soh ka Jises moih aliawen. ⁹ Tuahue kalak tataen ien tesol kahikahi Jises tai xeu tutuen teik kakain ti pepai Haeu kakaxi ka Jises moih alia ti matean. ¹⁰ Muhin ien huuhaa kahikahi Jises nahih alia hani tonalalu.

*Jises take hani kapi Mary Magdalen
Mt 28:9-10; Mk 16:9-11*

¹¹ Mary tu tangitang melal ti tehu amal. I tang teha wana hani leilon. ¹² Ape i ningahi hua engel puxuaualu pate papax-axun. Lalu tote tesol kemuk laha hahaha tupui Jises, tel onote patun ma tel onote aen. ¹³ Lalu kamei i, “O tatangike la?”

I pahoi lalu ukek, “Laha waxy ahutiwen tel masiwi tetak, nga kum tioi laha hahaha i ia!”

¹⁴ I kik kewa ape i tohea. I ningahi Jises tutu ien, tuahe i kum ila tioi i. ¹⁵ Jises kamei i, “O tatangike la? O paxai upiup aita?”

Mary sokok i tel seilon ti lawe i pupuas leili tesol kin ien. I ukek, “Tel masiwi, na o waxy ahutiwen tupui Jises, kaxi hanima nga tesol ti o hahaha i lehe nga waxy auni.”

¹⁶ Jises ukek, “Mariam!” I tiloi axan ti Arameik, puki kakaialalu.

Mary hongoa ape tohea pahoi i. Tataen ien i paxai tioi Jises ape tin i hapuasa kakai Arameik i ukek, “Rabonil!” Teik kakain ien i ukek, tel Hanau seilon.

¹⁷ Jises hone i, “Kum aka hahaxomu tetak, nga tai alia hani kapi tel Tamak Haeu. Tuahue nahih haniwa kapi tesol kahikahik, Honewa lato kum kue nga alia hani kapi tel

Tamak i se tin Tamalato, tel Haeu tetak i se tin Haeu tel Masiwi ti lato.”

¹⁸ Mary Magdalen nahih hani kapi tesol kahikahin ape i ukek, “Nga ningahiwen tel Masiwi!” Ape i kakane lato kakain ti Jises hohone i.

*Jises take hani kapi tesol kahikahin
Lk 24:36-43*

¹⁹ Alohah ti telao Sande ien, tesol kahikahi Jises apupuha leili tehu ing, aweing konginan nake lato mamata teka Ju liai. Lokon ien Jises take hani kapi lato ape i ukek, “Amuam ti Haeu kapimuto.” ²⁰ Ti i kak kewak ien, i kola hani lato minan ma popon. Tesol kahikahi Jises amuam hawane ti lato ningahiwa tel Masiwi. ²¹ Jises kak ulea ukek, “Amuam ti Haeu kapimuto. Masin ti tel Tamak Haeu taloma nga ailei puasan, tin nga talo amuto.” ²² Muhiin ien i uhui aupolun hani lato ape i ukek, “Amuto kewa Holi Spirit. ²³ Na amuto oxoxi teka seilon ti kawatan ti saun lialun ti laha aile hani amuto, Haeu tin i oxoxi laha ti kawatan ien. Na amuto kum oxoxi laha ti kawatan ti saun lialun ti laha, Haeu tin i kum oxoxi laha.”

*Tomas ningahi Jises ape i soh hawane
Mk 16:14*

²⁴ Tomas, tel ti tesol huopanim huuhaa kahikahi Jises, tin laha axai i Sangasang, i kumahe ien lokon ti Jises take hani kapi tesol kahikahin liai. ²⁵ Ape lato kakane i ukek, “Amite ningahiwen tel Masiwi!”

Tomas pahoi ukek, “Nga kum soh, halik na nga paxai mahe tuhi nil he minan ma naga soti mahe naxon he popon.”

²⁶ Muhi puasain tehu, tesol kahikahi Jises hukuma ulea leili ing ape Tomas tin kapi lato. Kalak aweing konginan, Jises take tu hani kapi lato. I ukek, “Amuam ti Haeu kapimuto.” ²⁷ Ape i kakane Tomas, “Paxaima minak. Sotima mahe tuhi nil ape sotima mahe naxon he popok. Kum kakapaxe, soh hawanema tetak.”

²⁸ Tomas paxai tioiwa ape i kak eliel hawane, “O se Masiwi tetak ma Haeu tetak!”

²⁹ Jises kakane i, “O soh nake o ningahi hawane nga. Tuahue teka laha tai ningahi nga a laha soh tetak, Haeu aile hasolia hawane hani laha.”

Puase teik pepa ie

³⁰ Tesol kahikahi Jises tin lato ningahi kilan waliko tenen pate lalap liai Jises aile ti pohe Haeu tuahue tap leili teik pepa ie.

³¹ Tuahe tetesol ti leili pepa ie nga tai lehe amuto soh ka Jises i se Krais tel Nati Haeu ape ti xoxoi namilomuto tetan, amuto uke tonain kapi Haeu ti tap tahi tapoan.

21

Jises take hani tesol kahikahin ti kanitax Galili

¹ Muhiin ien Jises take ulea hani tesol kahikahin. I sohot ukek. ² Lokon ien tepanim hua ti lato pape kanitax Galili, axan liai tenen Taibirias. Lato tetesol ien se Saimon Pita, Tomas tel laha axai Sangasang, Nataniel tel ti Kana ti Galili, hua nati Sebedi ma hua kahikahi Jises liai. ³ Saimon Pita kakane tesol liai, "Nga lua teletel xixi."

Lato ukek, "Amite mahoi o." Ape lato ku hani he tea koap tuahe lato tai tiuk xixi ipong hatehu.

⁴ Ti i nininitimile, Jises tutu ngixi peixux tuahe tesol kahikahin kum ila tioi i. ⁵ Ape i tilol hani lato, "Tesol teleiai xixi, amuto tai tiuk na tok, kewak?"

Lato ukek, "Tap wanen!"

⁶ I kakane lato, "Towi uleawa tehu upenaumuto haniwa teapaun sai manau ti tea koap lehe amuto tiuk." Lato towi happuta tehu upen ape lato kum tei aliake uke nake kilan wanen xixi lato puliwen.

⁷ Tel kahikahi Jises lohun xoxoan hone Pita, "I se Jises tel Masiwi!" Ti Pita hongoa ka se tel Masiwi, i talini xiotti luhuan tehu puxuaun ape i tautit hani itax. ⁸ Tesol kahikahi Jises liai xoxei ititini tehu upen xuhai xixi hani peixux. Lato kumahe pate xauxaun, xawaian sai 100 mita. "Ti lato mos haniwa peixux, lato ningnig xixi patul he ah tenen tuahe nawal. Tin hina bret ien.

¹⁰ Ape Jises hone lato, "Kau ngahoma xixi ti amuto tikewen." ¹¹ Saimon Pita nahih hani he tea koap ape itini xaheni tehu upen xuhai 153 xixi hani peixux. Kalak xixi pate kilan ma lalap, upen tai watat.

¹² Jises hone lato, "Nahima ang." Tap tel ti tesol kahikahin kameawen ka i aita naake lato tioi i se tel Masiwi ti lato. ¹³ Jises waxi bret ma xixi ape hani lato ani. ¹⁴ Le se ape he tolulu ti Jises take hani tesol kahikahin muhin ti i moih aliawa ti matean.

Jises kamei Pita

¹⁵ Ti lato ang kewa, Jises kamei Saimon Pita ukek, "Saimon tel nati Jon, nakon wawahen tetam hani nga pamu i xoini wawahen tetam hani lawe waliko liai?"

I pahoi ukek, "A se. Tel Masiwi, o tioi nga waheni o."

Jises kakane i, "Ngahati aluiniwa teka kahikahik masin ti tel ngahatiai sipsip."

¹⁶ Jises kamei ulea, "Saimon tel nati Jon, nakon o waheni hawane nga?"

I pahoi ukek, "A se. Tel Masiwi, o tioi nga waheni hawane o."

Ape Jises ukek, "Ngahati aluiniwa teka kahikahik masin ti tel ngahatiai sipsip."

¹⁷ Jises kamei i he tolulu i ukek, "Saimon tel nati Jon, nakon o waheni nga?"

Saimon Pita tian i kawat nake Jises kamei i uke he tolulu sale wawahen tetan hani i. Ape i ukek, "Tel Masiwi, o tioi lawe waliko. O tioi ka nga waheni hawane o."

Jises hone i, "Ngahati aluiniwa teka kahikahik masin ti tel ngahatiai sipsip."

¹⁸ Nga kakane hawane o, lokon ti o uluha, lawe o aile waliko ti paham ma lawe o nahih hani tesol ti paham. Tuahe ti na o salaimatawa, teka liai waxi o hani tesol ti kumahe paham." ¹⁹ Jises kak ukek ien kilamiai sale matei Pita. Matean i haxawa hawane Haeu. Ape Jises hone i, "Tu xox tatalewa tel kahikahik!"

Jises ma tel kahikahin lohun xoxoan

²⁰ Ti Jises ma Pita tau nanahih, Pita tohea ape ningahi tel kahikahi Jises liai lohun xoxoan, kakahiti lalu. I tetel i to papalahah hani patanawe Jises lokon ti lato ang tehu angiaiin ti Pasova ape i kamea, "Tel Masiwi, aita ti amite tel hangainiam hani mini teka seilon teleiam?" ²¹ Ti Pita ningahiwa tel i kakahiti lalu, i kamei Jises, "A tel io, waliko la na i sohot hani i?"

²² Jises pahoi ukek, "Sohin uke pahak i moihiin tutuen atengi taen nga aliamma. O kum namiloi hahakila tenen ien. A o, tu xox tatalewa tel kahikahik." ²³ Ti nake ien, kakain sawata wasole teka kahikahi Jises ka tel kahikahin lohun xoxoan i kum mat. Tuahe Jises tai kak ukek ien. I tua ukek, "Sohin uke pahak i moihiin tutuen atengi taen nga aliamma. O kum namiloi hahakila tenen ien."

Tiliai kakai Jon

²⁴ Tel kahikahi Jises lohun xoxoan i se tetel i ningahiwen ma tai kakaxi tesol waliko ie. Ape amite teka kahikahi Jises tioi ka waliko ti i kakak salan wanen.

²⁵ Kilan wanen waliko liai tutuen ti Jises ailewen. Na masin pahalahatai kongini hatapo tesol waliko ien, nga kum ukek ka

Jon 21:25

131

Jon 21:25

hatehu pon ie i tapai tone hatesol pepa ti
sale Jises.

Aposel Puase tesol Aposel Kakain ti haxewai teik pepa ie

Luk tai teik pepa ie sai ahang 33 muhin ti Jises moih aliawa ape Haeu waxi i hani tesol tonan. Luk i kumahe Ju, i Grik. I tel dokta. I tin tel ti taiai meng solian ti Jises. Hina waliko ti i tatai ie i kema ti tesol aposel ma hina puki i ningahi ti i pupuas kapi Pol, tel ti tesol aposel. Huttuiai teik pepa ie, i kakaxi ti Haeu hani tesol huopanum hua aposel Holi Spirit ape i hapohea lato ti kaxi ahutiae meng solian ti Jises ma ailei kilan waliko tenen pate lalap hualiai teka seilon. Lato hutui tenen puasain ien Jerusalem. Imuh lato puas ahuta hani xux liai ape anen tenen puasain ien kilan teka kumahe Ju laha soh ti Jises Krais.

Teka Ju ma teka kumahe Ju, imat kumahe laha huhukuma, tuahe imuh Holi Spirit huali laha ape laha uke he akikin ahuma ti Jises Krais. Lokon ien teka masiwi ti teka Ju lato watakai tesol aposel kaxi meng solian ti Jises. Aile ape lato xoti tesol aposel ape hani he mini teka masiwi ti Rom tuahe teka masiwi ien kum tunah waliko tenen na lialan lato ailewen. Aile ape Luk kakaxi leili pepaun ka teka kahikah Jises lato tai xaputi tenen na nauna ti teka masiwi ti Rom. Luk tin i kaxi hani kako ka teka kahikah Jises pate laha sawat kila hani tesol tesol nake Holi Spirit hapohea tesol aposel kaxi ahutiae meng solian ti Jises.

Haeu kakawen ka i hani Holi Spirit

¹⁻² Tel masiwi Teopolis, leili teik pepa Meng solian ti Jises nga kakaxi hatesol waliko ti Jises ailewen ma hanauen ti i hutui pupuasan, hani tataen ti Haeu waxi i hani kapin ti tesol tonan. Imat ti Haeu waxi i, Jises hani teka kahikahin kakain ti pohe Holi Spirit ti i talo lato ailei puasalato. Teteke kahikahin i kilamiwen aposel tetan.
³ Leili 40 ngain muhi matean i sohot take kila hani kapin lato. I kola ka i moih aliawen. Lokon ien i kakane lato sale nenein ti Haeu.

⁴ Telao ti lato ang apupuha i hone lato, "Amuto kum nahih sasalili Jerusalem, atengimua tataen tel Tamak Haeu hani amuto Holi Spirit ti i honewen amuto,

masin ti nga kakanewen amuto. ⁵ Jon baptaisi seilon ani kan tuahe pate ape sikole Haeu hani amuto Holi Spirit ti kapitiamuto."

Haeu waxi Jises hani kapin

⁶ Telao ti tesol kahikah Jises apuha haniwa kapin, lato kamei i, "Tel masiwi, nakon se ape o hani kaha teka Israel ngahati aliake kaha ma neini xux liai?"

Jises paohi lato ukek, "Kumahe waliko ti lehe amuto tioi. Mewenae Haeu noseniai taen ti tesol waliko ien sohot. ⁸ Tuahe ti Haeu hani amuto Holi Spirit, amuto uke pohen ape amuto kaxi sawateni nga hani teka seilon ti Jerusalem, hatexux ti Judia, Samaria ma lawe xux."

⁹ Muhiin ti i kak kewa, Haeu waxi i hani patul kapin ti puli tesol kahikahin ape teik maun likihini i ti pulalato.

¹⁰ Lato to paxapax tutuen, hua seilon pux-uaulalu papaxaxun sohot tu hahutua hani kapi lato. ¹¹ Lalu ukek, "Tesol akiki Galili, alahan amuto paxai kakapitini maun? Tetel Jises, Haeu waxi hani patul kapin, tin i aliamma masin ti amuto ninghai i luainiwa."

Matias saiti Judas

¹² Waliko ien i sohot ti Maunt Oliv, xohixohin tehu taon Jerusalem. Muhiin ien tesol aposel alia hani taon. ¹³ Ti lato tahiawa, lato soh hani tehu ing teke patul, tesol lawe lato heheuta. Lato tetesol: Pita, Jon, Jeims, Andru, Pilip, Tomas, Batolomiu, Matiu, Jeims tel nati Alapeus, Saimon tenen axan liai Selot ma Judas tel nati Jeims. ¹⁴ Lato hatesol lawe lato apuha lotu hetekie namil tenenawen kapi tesol hehin ma Mary tel tini Jises hetekie tesol ukale Jises.

¹⁵ Ngain telao, sai 120 kahikah Jises laha apuha ape Pita tua i ukek, ¹⁶ "Tesol akikik ti Krais, waliko ti kakai Haeu kaxiwen i sohot hapoponowi sale Judas, tetel i atima teka xotiai Jises. Ti kuewen wanen Holi Spirit hanamiloa tel masiwi David ti kak kilamiai tesol waliko ien. ¹⁷ Kemuk Judas tel ti leilokako, Jises kilami i puas akatiakako."

¹⁸ Imuh Judas waxi teik moni ti hangainiai Jises ape i kahui teik pekeun. Ti ien i haputa kalungini i, tian tapox, puhuan ahuta ape i mat. ¹⁹ Lawe seilon ti Jerusalem hong menge matei Judas, ape laha axai teik pekeunaun ien ti kakaialaha Arameik. Laha axai Akedama. Teik kakain ien ukek, Pekeun ti Kaka.

²⁰ Pita kak tatale ukek, "Leili pepai Salm ti tataiai David i ukek, 'Tiliwen tap seilon leili ingan, laha kum ingangai.' (Ps 69:25) Tin i

ukek, 'Tel seilon liai akeniai pupuasan.' (Ps 109:8)

²¹⁻²² "Aile ape ewi na tel seilon soh ulea hani kapi kako ti kaxiai xahatai Jises tel Masiwi. Kako kilami tel ti lawe kapi kako lokon kako kapi Jises, hutui ti Jon baptaisi Jises haniwa tataen ti Haeu waxy i hani kapin ti tesol tonan."

²³ Ape lato noseni kilamiai tel ti huuhu seilon ie: Josep Basabas, axan liai tenen Justus, ma Matias. ²⁴ Lato kamei Haeu ukek, "Tel Masiwi, o tioi namili lawe seilon. ²⁵ Kola hanima amite tetel ti o kilamiwen lehe i sohot tel aposel ukek pupuase Judas, tel i saliliwen amite hani tesol hoi liai totongan." ²⁶ Ape lato halokeni satu upiai tel ti Haeu kilami. Haeu kilami Matias ape i hukuma hani kapi tesol huopanim tel aposel.

2

Tahiai Holi Spirit ti Pentekos

¹ Tehu ngain lalap ti Pentekos, teka kahikahi Jises apuha hetekie hani leili tehu ing. ² Lato hong tangjai waliko tenen i hahutualih patul masin aupol kuin ape i haxuha hatehu ing ti lato toto. ³ Lato ningahi tenen waliko masin xekei ah a tanome leh i sawat to hani pati tel tel. ⁴ Holi Spirit soh xuh hani leilolato ape lato hutui kakak kakai xux liai ti Holi Spirit hanesoa lato.

⁵ Ti lokon ien, teka Ju ti xux texux texux laha toto leili Jerusalem. Laha seilon ti lotuiai Haeu. ⁶ Ti laha hongoa tangjai waliko tenen masin aupol kuin, kilan seilon apuha paxai ape laha hong ongaini nake tel tel hong ka teka kahikahi Jises ape lato kakak puki kakaialah. ⁷ Teka Ju ien pate laha tataxini ape laha eseini hawane ukek, "Nakan tesol seilon ien kumahe akiki Galili?" ⁸ A i sohot ukek ia ape kako hong lato kakak kakaiakako? ⁹ Kako teka ti Partia, Midia, Elam, Mesopotamia, Judia, Kapadosia, Pontus ma Asia, ¹⁰ teka ti Pricia, Pampilia, Igip ma teka ti Libia tetesol xohixohin tehu taon Sairini, hetekie kako teka soliwa ti Rom. ¹¹ Kako teka nakuama ti teka Ju ma teka lotu usiusi teka Ju. Ape kako teka ti Krit ma Arabia. Tuahe kako hatesol hong ka lato kakak kakaiakako wanen sale waliko lalap ti Haeu ailewen!" ¹² Laha kum tioi ka i sohot ukek ia ape laha he kamekam alia puki laha, "Waliko tenen lahan ie?"

¹³ Teka ti laha kak soxeni teka kahikahi Jises ukek, "Lato un kasia unum ailan!"

Pita kakane teka kilai seilon

¹⁴ Pita tule kapi tesol huopanim tel aposel ape i kak eliel lehe laha hong, i ukek, "Amuto teka Ju ma amuto hatesol ti Jerusalem, hong matainiwa na nga kaxi haxewa hani amuto. ¹⁵ Teka seilon ie kumahe ka lato unuun hanowi ti amuto nanamilo i nake seilon kum unuun letu masin. ¹⁶ Tenen waliko amuto ninginahi masin ti Joel tel kuluiai kakai Haeu kaxiwen i ukek,

¹⁷ "Haeu ukek, 'Leili taun imat ti tehu pon ie tapo,
nga axi Holi Spirit hani seilon tenen tenen.'

Natumuto wawan ma hehin laha kak kului kakaiak,
teka natumuto uluha ma teka wawan salaimat
nga hapaxangongo.

¹⁸ Kalak tuahe teka unauak wawan ma hehin nga hani laha Holi Spirit telok ien ape laha kak kului kakaiak.

¹⁹ Nga aile hasohotu kolakol tenen lalap he maun
ma he tehu pon itan ie.
Matemate, ah ma axuan tenen pate kilakilan
i sohot he tehu pon itan.

²⁰ Imat ti tehu ngain lalap ti sohotui Krais tel Masiwi
al i tilok

a pangapang i sohot kakan masin kaka.

²¹ Taen ien, teka laha upia huuhal ti tel Masiwi,
i waxy auni laha lian tehue.' (Joel 2:28-32)

²² "Hongoa amuto tesol Israel! Jises tetel ti Nasaret i aile waliko lalap tenen tenen ti pohe Haeu. I kola ka Haeu taloma i. Puki amuto tioiwen ma ningahiwen nake i sohotuen wasolamuto. ²³ Tetel seilon ien, Haeu kak kilamiwen ka amuto hangaini hani teka seilon lialun ape laha telei. Laha tahi hakea i hani he kros. ²⁴ Tuahe Haeu hamoihawen Jises. I oxoxiwen i ti matemate nake kum pon wanen matemate aka kongini i. ²⁵ Kako tioi ka salan wanen nake David tel masiwi kakawen sale Jises. I ukek, "Nga ninginahi tel Masiwi kapik lawe ngain.

Lawe i huali nga ape
nga kum mamata kawatan na i tunahi naga.

²⁶ Aile ape leili tiak hetekie kakaik mewe-nae nga amuam.

Kalak nga tioi nga mat,

nga tioi hawane ka Haeu i tel ngaha-tiak.

²⁷ Haeu, nga soh o kum aka lioi nga leili amal.

O kum hakoha lioi tupuak leili amal nake nga tel unauam lolowi.

²⁸ O kola haniwen nga aweisal ti ukei tonain solian.

Ti o kapik, nga amuam.” (Ps 16:8-11)

²⁹ Pita kakatale ukek, “Amuto tesol akikik, nga kaxi hawane hani amuto ka tel masiwi David, tetel matahaun ti kako, i matewen ape laha ti hiniwen. Aope ie, amalun tutuen kapi kako. ³⁰ David kumahe i kakak puki i. David i tel kuluiai kakai Haeu, i tioi Haeu kakawen ka tel ti nakuama tetan i sohot Masiwi hanowi i. ³¹ David liai i tioiwen waliko ti na Haeu aile, ape i kakak sale xahatai Jises Krais ti i ukek ka Haeu kum aka lioi i leili amal lehe tupuan koha.

³² “Tetel Jises nga kakaxi, Haeu xahateniwen ti matemate ape amite hatesol kahikahi ningahiwen ka i ape moihin.

³³ Haeu hana Jises hani minan tepaun manau ti neiniai seilon ape hani i Holi Spirit masin ti i kakawen i aile. Tin i hahani kako Holi Spirit ape waliko ti amuto ningahi ma hongohong aope ie se pupuase Holi Spirit. ³⁴⁻³⁵ Haeu tai waxi David tel masiwi hani tonan, i waxi Jises masin ti puki David kakawen. I ukek,

“Haeu kakane tel Masiwi tetak,
“Toma papak tepaun manau
ti neiniai seilon atengi tataen nga
hanawa teka seilon
laha pahoxai o hani hahitakam.”’ (Ps
110:1)

³⁶ “Aile ape amuto hatesol Israel tioi ke-wak, tetel Jises amuto teleiwen, se tetel Haeu kilamiwen Masiwi ti amuto ma i tin Krais, tetel Haeu taloma!”

³⁷ Ti laha hongoa teik kakain ien, pate i tuhuke hakawata hawane tialaha ape laha kamei Pita ma tesol aposel liai ukek, “Tesol akikimite, kiae ape amite aile la?”

³⁸ Pita pahoi laha ukek, “Towiahua ti saun lialun ti amuto lehe amite baptaisi amuto hahitake axe Jises Krais. Ape Haeu oxoxi amuto ti kawatan ti saun lialun ti amuto ape i hani amuto Holi Spirit. ³⁹ Haeu kakawen ka i hani amuto, natumuto ma tin hani teka seilon ti xux liai, hatesol teteka i kilamiwen.”

⁴⁰ Kilan kakain tuah Pita kakane laha ape i kak haxoxo ma hanamena kapitini laha i ukek, “Na amuto hong tamani kakaia,

amuto salia ti hukuma akatiai teka seilon lialun ti aope ie.” ⁴¹ Teteka seilon lato hong soh kakai Pita, teka kahikahi Jises baptaisi lato. Telao ien 3,000 seilon soh palahi teka kahikahi Jises.

Teka kahikahi Jises to amuam hetekie

⁴² Teka lato sohot kahikahi Jises lato hani hatapo lato ukei anesoin ti tesol aposel. Hatesol kahikahi Jises lato hina namil teikawe ti to hukuma hetekie, lotu hukuma ma ang hukuma ti nameniai matei Jises.

⁴³ Tesol aposel aile hasohotu kilan waliko tenen lapap wanen ape hatesol seilon paxai ma ong amuke. ⁴⁴ Hatesol kahikahi Jises lawe lato to hukuma ma he axias soxi.

⁴⁵ Lato hangaini soxialato ape sei moni hani hualiae teka tap soxi. ⁴⁶ Lawe ngain lato apuha hetekie ti namil teikawe leili Ingi Haeu. Lato ang bret nameniai matei Jises ma amuam ti he axias an leili ingalato.

⁴⁷ Lato kak ma pak sameni Haeu ape lato amuke saun solian seilon liai aile hani lato. Lawe ngain Haeu hasoho palahi seilon hani kapi teka kahikahi Jises, teteka i awai laha ti kawatan ti lialui woulaha.

3

Pita haewia tel seilon aen lialun

¹ Ngain tehu taun ti lotu ti alohah, Pita ma Jon, hua kahikahi Jises, nahih hani Ingi Haeu. ² Lalu ningahi tel seilon aen lialun lilian ti i takahama. I toto pape tewau aweing axan Solian. Lawe ngain teka akikin kau hatona i hani pape tewau aweing ien lehe i kat moni ti teka seilon na laha soh hani Ingi Haeu. ³ Ti i ningahi Pita ma Jon nahih sosohoa, i katei lalu moni. ⁴ Lalu pax sawi hani i ape Pita ukek, “Paxaima amili!” ⁵ Ape se i paxai lalu, i sokok ka lalu axi i na tenen.

⁶ Ape Pita ukek, “Nga tap moni tuahe waliko tenen nga hina nga hani o. Ti pohe Jises Krais tel ti Nasaret, nga hone hawane o, tua ape tau nahiwa!” ⁷ Pita akeni tepaun minan manau ape aka hatuh i. Tuhan tehue anele aen ma titin i soli. ⁸ I tit hokahale ape i tau nanahih. I nahih kahiti lalu hani Ingi Haeu. I tit amumuke pohe Haeu ape i kak kemulik hani i. ⁹ Hatesol seilon ien ningahi i nanahih ma hong i sasameni Haeu. ¹⁰ Ti laha paxai tioiwa ka se tetel i to katekat pape tewau aweing axan Solian, pate laha ongaini hawane waliko ti i sohot hani i.

Pita kakane teka laha ningahi tel seilon aen lialun ewi

¹¹ Hatesol seilon ongaini hawane ape laha kiliwau hani kapi tesol axan Totone Solomon, tetesol ti tel seilon kemuk aen lialun pohi amumuke Pita ma Jon. ¹² Ti Pita ningahiwa teka seilon apuhawa, i hone lato ukek, "Amuto teka Israel, alahan waliko tetenen ie i hahataxina amuto? Alahan amuto paxai hamalumini amili? Kumahe kuimili ma soliai woumili i aile tel seilon ie nanahih. ¹³ Haeu ti Abraham, Aisak, Jekop ma teka matahaun ti kako, i hanawen tel unauan Jises seilon pate tuah, tetel amuto hangaini hani teka masiwi ti Rom. Pate amuto watakai i kalak Pailat ailewen namil ti oxoxian. ¹⁴ Amuto watakai hawane Jises, tetel i ailele mewenae puase Haeu a woun pate sawisawin. Amuto kamei Pailat na i ahuti hani amuto tel weli teleiai seilon. ¹⁵ Ape amuto telei Jises, tel haniai hanawain tenen tap tahi tapoan. Tuahae Haeu xahateni aliakewen i ape puki amite ningahiwen ka i moihin. ¹⁶ Se pohe Jises hakui tel seilon aen lialun. Amili haewia i ti xoxoi namilomili ti Jises.

¹⁷ "Teka soliai akikik, nga tioi ka amuto ma tesol masiwi ti amuto kum paxai tioi waliko tenen auha aile haniwien Jises. ¹⁸ Tuahae Haeu kakanewen teka kuluiakakaian ape laha kak kilamiwen ka Krais tel Nati Haeu, liai i kau kawatan ape se i sohotuen. ¹⁹ Aile ape amuto lioiwa saun lialun. Towiahu hanawa Haeu lehe i oxoxi amuto ti kawatan ti lialui woumuto. ²⁰ Na amuto aile ukek ien, Haeu hakui amuto ape i hamosu Jises Krais, tel i kilami hanhi amuto. ²¹ Aope ie i tutuen tone Haeu atetengi taun ti Haeu aile hauni hasolia lawe waliko masin ti Haeu hanamiloa kakain hani teka kuluiakakaian ti kuewen. Lawe laha puas hahawane ti Haeu. ²² Lokon ti kuewen, Moses kakaxi Krais ti i ukek, 'Haeu tel Masiwi ti kako, imuh i talo tel kuluiakakaian masin ti i taloma nga. I uke tel ti puki akikikako. Amuto hong tamaniwa lawe waliko na i kakane amuto ailean. ²³ Na tel kum hong tamani kakai tel kuluiakakaian Haeu ien, Haeu namiloi ukek tel ien kumahe tetan.' (*Deut 18:15, 18-19*)

²⁴ "Hutuima ti Samuel, hatesol kuluiakakaian Haeu liai laha kak kilamiwen waliko ti i sosohot aope ie. ²⁵ Masin teka kuluiakakaian Haeu, tin amuto uke waliko ti Haeu kakanewen tesol tamakako ti kuewen. Haeu xinoti teik namil kapi Abraham i ukek, 'Nga hapuasa tesol lato nakuama tetam

auni hasoliai hatesol seilon ti tehu pon ie.'

(*Gen 22:18*) ²⁶ Haeu kilamiwen tel unauan Jises ti talo hanimu koko teka Ju. I aile kola lalape soliaian ti i huali koko ti towiahuakako ti saun lialun."

4

Pita ma Jon tutu mate tesol masiwi ti teka Ju

¹ Ti Pita ma Jon kakak tutuen kapi teka seilon, teka masiwi tahiamma. Lato se teka ti hukuminiai Haeu ma seilon, tel masiwi ti teka peteniai Ingi Haeu ma teka Sadusi.

² Lolato lialu nake Pita ma Jon kakaxi hani teka seilon ka Jises moih aliawen. Ien i kola ka teka laha mat laha xahat alia. ³ Kakanua lato akeni kongini lalu ape hana hani leili kalabus atengi ngain liai tehu nake pate ape alohah. ⁴ Tuahae kilan teka laha hong meng ien, laha soh. Mongohe kahikahi Jises hanhi sai 5,000.

⁵ Taen kewa ngain liai tehu, teka masiwi ti teka Ju tenen tenen ma teka hanau nauna ti Moses laha apuha Jerusalem. ⁶ Laha apuha hani kapi Anas, tel masiwi tapein ti hukuminiai Haeu ma seilon, ma Kaipas, Jon, Aleksanda ma teka akiki Anas liai. ⁷ Teka unaualaha hakahita Pita ma Jon hani kapi teka masiwi ape laha kamei lalu ukek, "Amulu kema poh ti aita ti amulu haewia tel seilon aen lialun? Amulu ailele ti hahitake axe aita?"

⁸⁻⁹ Holi Spirit hakui Pita ape i kakane laha, "Amuto hatesol teka masiwi ti teka Ju, nakon amuto kamei amili nake amili tahane tel seilon aen lialun? Ape tin pahamuto tioi sale ewiawtinun?" ¹⁰ Ien, amuto ma hatesol seilon ti Israel tioiwa, tel seilon tutu ie mateiwaumuto tinun ewi hawanewen nake ti pohe axe Jises Krais ti Nasaret, tetel amuto telei ape Haeu xahateni ti matean.

¹¹ Jises se tel seilon ti pepai Haeu kakak,

"Tehu kuku teka ataiai ing hilisa,"

Haeu aile hasohotu i kuku pamu tuah ti kuku liai!"

(*Ps 118:22*)

¹² Tap wanen tel seilon pon awaiakah ti lengei Haeu ti saun lialun ti kaha, mewenae Jises, tetel Haeu kilamiwen. Ti hatehu pon itan ie mewenae i tapai."

¹³ Teka masiwi ongaini hawane ti laha paxai Pita ma Jon kak mamatut. Laha tioi lalu tuah seilon naun tai sukul. Laha ila tioi ka lalu se kahikahi Jises. ¹⁴ Tap laha kak ulea tenen naked tel seilon i ewiwen tutu kapi Pita ma Jon. ¹⁵ Ape teka masiwi hone lalu nahih ahutamua ti tehu ing laha

toto, ape laha he kakak aliamu puki laha.
¹⁶ Laha he kamekam, “Kako aile la hani lalu? Lawe seilon leili Jerusalem laha tioi hatapoen waliko tenen lalap lalu ailewen. Kako kum puluhini uke. ¹⁷ Tuahé kako halini lalu kaxiai puase Jises lehe axe Jises i kum sawata ahe hani teka seilon.”

¹⁸ Laha tiloi hasoho aliakte lalu ape kakane lalu ka tapeiniwa kaxi hanaui teka seilon ti hahitake axe Jises. ¹⁹ Tuahé Pita ma Jon kak pahoi laha ukek, “Amili namiloi ukek pamu ewian na amili hong usi kakai Haeu kumahe amuto. ²⁰ Amili kum kongini uke kaxiai waliko ti puki amili ningahiwen ma hongoen.”

²¹ Teka masiwi kum tunah huan ti kalabu-siai Pita ma Jon. Laha tua kak hahamatau lalu ape hanahi nake lawe seilon laha sameni Haeu ti waliko i sosohot telao ien. ²² Tel seilon i ewike pohe Haeu, ahangun akulai 40.

Teka kahikahi Jises lato lotu

²³ Tataen Pita ma Jon ahuta kewa, lalu nahih alia hani kapi teka kahikahi Jises liai ape kaxi waliko tenen teka masiwi tuah ti hukuminiai Haeu ma seilon ma teka masiwi liai kakak. ²⁴ Ti teka kahikahi Jises hongoa, lato lotu hetekie hani Haeu, lato ukek, “Tel Masiwi, o tanomi maun aheah ma tehu pon itan ie, kanitax ma lawe waliko ti heihon. ²⁵ O hapusa Holi Spirit kakanei tel unaum David, tel tame tesol tamamite, i kak ukek, “Kalahai teka seilon laha kum tioi Haeu lolaha lialu?

Kalahai teka seilon tua namiloi pahoxai Haeu?

²⁶ Teka masiwi tenen tenen ti tehu pon itan ie
 apuha hetekie ti hileiae Haeu tel Masiwi ma
 Krais tel Natun.” *(Ps 2:1-2)*

²⁷ “Ape salan, Herod ma Pontius Pilat apuha hetekie kapi teka seilon laha kum tioi Haeu ma teka seilon ti Israel leili Jerusalem ape laha aile namil ti halialui Jises, tel o kilamiwen, tel unaum i hani hatapo namilom ti puasam. ²⁸ Ape waliko ti o namiloiwen i sohot, laha apuha hetekie ailean. ²⁹ Tel Masiwi, ti tenen ien paxai tioiwa kakain ti laha kak hahamatau amite ape aile hamatuawa amite teka unaum ti kaxiai kakaiam. ³⁰ Hanima amite pohem ti haewiai seilon ma hasohotui kolakol tenen lalap hahitake axe tel unaum Jises.”

³¹ Ti lato lotu kewa, tetesol ti lato apupuha i nuea ape Holi Spirit soh hapohea

lato. Aile ape tap lato mamata kaxiai kakai Haeu.

Teka kahikahi Jises he axiax soxi

³² Hatesol kahikahi Jises namilolato teikawe. Tap tel na i ukek teik na soxian mewenae tetan, lawe waliko na lato hina lato sei. ³³ Hetekie lalape poh, tesol aposel kaxi tatale xahatai tel Masiwi Jises ape Haeu to hasolia hahani lato. ³⁴ Tap tel ti lato kukun teik na soxi. Teka na hina teik hepekeun ma na ing, laha hangaini ukei moni. ³⁵ Laha atoheni hani mini teka aposel ape lato sei hani teka seilon pahalahu huuhalu.

³⁶ Masin ti Josep aile, tel Livai ti texux xux Saiprus. Tesol kahikahi Jises axai i Banabas. Salangawe axan ukek, “Tel ti kak haxoxoi seilon.” ³⁷ I hangaini teik hepekeunaun. I kewa moni ape i hani teka aposel.

5

Ananaias ma Sapaira

¹ Tel seilon axan Ananaias hetekie tel axoan Sapaira, tin lalu hangaini teik hepekeunaulalu. ² Ti lalu kewa moni, lalu akeni kongini aliakte teik ape ti liai, lalu atoheni hani tesol aposel.

³ Pita ukek, “Ananaias, nake lahan o hani lioi Satan kapiti namilom ape o aile puluti Holi Spirit ti akeni kongini aliakte teik moni ti kahi hepekeun?” ⁴ Imat ti o hangaini, hepekeun liai tetam ape moni ti o uke liai tetam. Alahan o puputa? Kumahé o pupuluti mewenae seilon, o puluti hehetekie Haeu.”

⁵ Ti Ananaias hongoa, i put mat. Ape teka seilon mamata hawane ti laha hongoa waliko ti i sohot hani Ananaias. “Teka seilon uluha nahima, puxui auni tupuan, lato kau hasohotu ape tihini.

⁷ Ti muhi aua tolulu tamusua, tel axoan hehin nahima. I kum tioi waliko ti i sohotuen. ⁸ Ape Pita kamei i, “Kaxi hanima nga, nakon moni se hatesol lapan ie amulu akeni ti kahi hepekeunaumulu?”

Sapaira pahoi ukek, “Se mewenae ien.”

⁹ Pita kakane i ukek, “Alahan o ma tel axoam hahelehele Holi Spirit? Tesol seilon lato tihini tel axoam lato tutu aweing, tin lato apepeas kauí tupuan!”

¹⁰ Tataen wanen ien i put mat hani itan. Tesol seilon uluha nahih sohoa ningahi i maten, lato kau hasohotu tupuan ape tihini i pape tel axoan. ¹¹ Ti hatesol kahikahi Jises

ma teka liai hongoa waliko ti i sohot hani Ananaias ma Sapaira, pate laha mamata.

Teka aposel haewia kilan seilon tinun

¹²Teka aposel aile hasohotu kilan kolakol tenen pate lalap ape teka seilon ningahi pohe Haeu. Hatesol kahikahi Jises lawe lato apuha hetekie ti tesol Totone Solomon pape Ingi Haeu. ¹³Tap seilon melal ti lato pahalahsa saupa kapi lato, kalak pate laha sasameni lato. ¹⁴Tuahe seilon to kila ahe tatale teteke laha soh ti Jises Krais ape laha soh palahi teka kahikahi Jises. ¹⁵Ti teka seilon paxaiwa puase teka aposel, laha kau teka tinun hani he aweisal ape hana laha patul he sau ma he tahi lehe tuahe lihui hosai Pita i halihu laha na i nahir sahiwa. Ien i tapai ti haewai teka tinun. ¹⁶Ape kilan seilon ti lawe taon kakalini Jerusalem tin laha kau teka seilon tinun ma teka ti spirit lialun kapiti hahalialu ape Haeu haewia laha hatesol.

Teka masiwi ti teka Ju pahalato telei teka aposel

¹⁷Tel masiwi tapein ti hukuminiai Haeu ma seilon ma hatesol tuaun laha ti teka Sadusi, laha lohaini tesol aposel nake kilan seilon sameni lato. ¹⁸Laha xoti teka aposel ape hana hani tehu ing ti kalabusiai lawe seilon lialun. ¹⁹Tuahe ti ipong tetehu ien, tel engel ti Haeu i hei kahip ti aweingi kalabus ape hasohotu lato. ²⁰Ape i hone lato ukek, "Nahir haniwa Ingi Haeu ape kaxi tatale haniwa teka seilon meng solian sale tonain kapi Haeu ti tap tahi tapoan."

²¹Ti i letule lato nahir hani Ingi Haeu ape hananau teka seilon ien.

Letuan tin tetehu, tel masiwi tapein ti hukuminiai Haeu ma seilon ma hatesol masiwi ti Israel lato apuha hetekie. Lato talo teka unaualato nahir waxiai tesol aposel lehe teka masiwi kamei lato hina kamekame. ²²Ti teka unaualato tahia haniwa ingi kalabus lato tai tunahi tesol aposel ape lato nahir alia hani kapi teka masiwi. ²³Lato ukek, "Ti amite tahiawa, tewau kahip ti aweingi kalabus konginan xoxoan. Teka peteniai kalabus tin laha tutu aweing. Tuahe ti amite heiwa kahip, tap seilon ien."

²⁴Ti tel masiwi ti teka peteniai ingi kalabus ma teka masiwi tuah ti hukuminiai Haeu ma seilon hongoa, lato tataxini ape lato ukek, "Waliko la sohotuen?" ²⁵Tataen ien tel seilon tahia hani kapi lato ape i ukek, "Hongoa! Tesol seilon amuto hahana

leili kalabus lato tutu ulea mate Ingi Haeu hananau teka seilon sale Jises!"

²⁶Kakanua tel masiwi ti teka peteniai kalabus hetekie tesol unauan lato nahir waxi aliake tesol aposel. Lato aile hakokol nake lato mamata uke teka seilon hokai lato pot. ²⁷Ape lato hakahita tesol aposel hani kapi teka masiwi lehe tel masiwi tapein ti hukuminiai Haeu ma seilon kamei lato hina kamekame. ²⁸I ukek, "Amite halini hawanewen amuto hanau teka seilon waliko ti Jises hanauen. Tuahe amuto kaxi sawateni kaliniwen Jerusalem ape amuto tieni amite teleiai Jises."

²⁹Pita tuke awe tesol aposel, i ukek, "Amite hong usiusi kakai Haeu, kumahe kakai seilon. ³⁰Tel Tamakako Haeu xahateni aliakewen Jises ti matean, tetel amuto tahi hakea hani he kros ape i mat. ³¹Haeu waxi i hani papan teapaun manau ape i sohot tel Masiwi ti neiniasi seilon ma tel ti awaai seilon ti lengi Haeu ti saun lialun ti kaha. Haeu aile ukek ien lehe kako teka seilon ti Israel hina aweisal ti towiahu ti saun lialun ape Haeu oxoxi kako ti kawatan ti lialui woukako. ³²Amite teka kahikahi Jises ningahi hawanewen waliko ien ape amite kakaxi. Holi Spirit tin i hahaxoso kakaiamite, tetel Haeu hani teteke seilon laha hong usi kakaian."

³³Teka masiwi ti teka Ju hongoa, lalatu lialu hawane ape pahalato telei tesol aposel. ³⁴Tuahe tel ti lato axan Gamaliel, i tel Parisi a tin tel hanau nauna ti Moses, i tule ape i talo tesol aposel hanimu melal. Gamaliel pate lawe seilon hong kakaian.

³⁵Ape i hone teka masiwi ien, "Amuto seilon ti Israel, amuto namiloi aluinimua waliko tenen na kako aile hani tesol seilon ie.

³⁶Amuto nameni tel seilon Teudas ti i ukek ka i tel seilon masiwi, ape 400 seilon lato sohot kahikahin. Ti laha teleiwa i, tesol kahikahin ox silahota ape teik puasan i mat. ³⁷Muhin ien Judas ti Galili apuhini teka seilon ti hil pahoiai teka seilon ti Rom lokon ti ngaini ti wexei teka Ju lehe laha tioi mongohe seilon ti haniai teka masiwi ti Rom moni. I tin laha telei ape tesol kahikahin ox silahota.

³⁸"Aile ape nga nau amuto kum aile hahalialu tesol seilon ie, hanahiwa lato. Pake na puasalato i tua nakuale ti puki seilon, i tapo kaluta. ³⁹Tuahe na puasalato ahuma ti Haeu, amuto kum pon konginialato. Amuto aile tunahi amuto puas hilei hawane Haeu!"

⁴⁰ Ape teka masiwi hong usi nauna ti Gamaliel. Lato tiloi hasoho tesol aposel ape teka unaualato heti. Muhiin ien teka masiwi halini lato hanau seilon waliko ti Jises hanauen. Ape lato talo hasohotu tesol aposel.

⁴¹ Ti tesol aposel nahih saliliwa teka masiwi ti teka Ju, pate lato amuke ti Haeu hani lato kau kawatan nake lato kahikahi Jises. ⁴² Ape lawe ngain lato nahih hani Ingi Haeu ma ingi teka seilon ti hanau alaha ma kaxiai meng solian ka Jises i se Krais, tel Haeu taloma.

6

Tepanim hua kahikahi Jises seiai waliko ti huhual

¹ Ti ape mongohe teka kahikahi Jises kikilale, teka Ju kakaialaha Grik laha wiliki teka Ju kakaialaha Arameik ma Hibru nake laha kum sei hapono waliko hani teka hehin kakaialato Grik axoalato matewen. ² Tesol aposel apuhini hatesol kahikahi Jises ape lato ukek, ‘Kumahe solian na amite aka lioi puasain ti kaxiai menge Haeu ape amite tani waxy seiai waliko ti huhual. ³ Amuto kilamiwa tepanim hua heilon ti leilomuto, tetesol Holi Spirit kakapiti lato ma namilo-lato xewan. Amite hani lato akeniai teik puasain ti seiai waliko ti huhual. ⁴ Ape amite hani hatapo amite ailei puase lotu ma ti kaxiai menge Haeu.’

⁵ Hatesol kahikahi Jises lato amuke teik namili tesol aposel ape lato kilami Stiven, tel seilon namilon xoxoan ti Haeu ma Holi Spirit kakapiti i. Tin lato kilami Pilip, Prokorus, Nikanor, Timon, Parmenas ma Nikolas ti Antiok, tetel i sohot tel ti usai lotu ti teka Ju ape tin i sohot tel kahikahi Jises. ⁶ Lato kola hani tesol aposel tetesol seilon ti lato kilamiwens ape tesol aposel hana min patul he pati tesol seilon ien kameiai Haeu ti hakuialato ailei teik pua-sain ien.

⁷ Ape meng solian ti Jises i sawat tatale. Mongohe kahikahi Jises leili Jerusalem kila kosea hawane. Lokon ien kilan teka masiwi ti hukuminiai Haeu ma seilon laha sohot kahikahi Jises.

Laha akeni kongini Stiven

⁸ Stiven aile hasohotu kilan kolakol lalap wanen nake ti soliae Haeu i axi Stiven poh.

⁹ Tuahé hina seilon laha kak wawatakai Stiven. Teka Ju ti Sairini ma Aleksandria lato seilon ti tehu synagog axan Oxoaxai ma teka Ju ti Sailisia ma Asia, laha kak he

hapatapat kapi Stiven. ¹⁰ Tuahé laha kum xoini Stiven ti kakain nake i seilon tenen namilon xewan ape Holi Spirit hani i kakain solian.

¹¹ Ape laha xui ngah seilon liai ti kak kewak, “Amite hong Stiven kak halialu Moses ma Haeu.” ¹² Aweisal tetewau ien laha hahika teka Ju, teka masiwi ti laha ma teka hanau nauna ti Moses ape laha akeni kongini Stiven. Laha hakahita i hani kapi teka masiwi tuah ti teka Ju.

¹³ Ape laha hakahitama tesol seilon lato tua kau tanomi putini kakain. Teka ti lato ukek, “Stiven lawe i kak halialu tehu Ingi Haeu ma nauna ti Moses. ¹⁴ Amite hong i ukek ka tetel Jises ti Nasaret i hamanagan tehu Ingi Haeu ma i sohi saun ti Moses hak-outa hanima kako.” ¹⁵ Ape hatesol masiwi laha toto ti tehu apuhain ien laha paxai kapitini Stiven. Laha ningahi kawan i xeu hanowi kawe tel engel, spirit solian ti Haeu.

7

Kakai Stiven hani teka masiwi ti teka Ju

¹ Ape tel masiwi tapein ti hukuminiai Haeu ma seilon kamei Stiven, “Kakain ti laha susului o salan?”

² Stiven ukek, “Tesol akikik, hongoa. Haeu take hani kapi Abraham hetekie lalape xewaian, lokon ti Abraham, tel mata-haun ti kako, i toto tutuen Mesopotamia imat ti sos hani Haran. ³ Ape Haeu hone Abraham, ‘Nahih saliliwa tesol akikim ma xuxum ape nahih haniwa xux ti na nga kola hani o.’

⁴ “Salan, i nahih salili texux xuxun Kaldea ape i to hani Haran. Muhiin ti tel taman matewa, Haeu hasoso Abraham hanima texux xuxukako ie. ⁵ Ti lokon ien Haeu tai hani Abraham teik na hepekeun. Tuahé i kakane Abraham ka i ma teka lato nakuama muhiin, lato uke hatesol hepekeun ie, kalak Abraham tap natun lokon ien. ⁶ Haeu kakane i, ‘Imat, teka lato nakuama tetam lato sohot soliwa ti texux xux liai ma unaui seilon. Laha aile halialu lato leili 400 ahang.

⁷ Tuahé nga axi kawatan hani teka laha ha-puasa halialu lato ape imuh nga waxy aliale lato lehe lato lotui nga ie, tetesol hepekeun ti nga kakawen nga hani lato.’ (Gen 15:13-14)

⁸ Haeu xinoti namil kapi Abraham ti ailei teik kikilam ti kotiae uli walikoi teka aikaik wawan ti kolakol ka i ma teka lato nakuama tetan lato seilon ti Haeu. Ape Abraham aile hani tel natun Aisak muhi takahan kewa ngain tepanim tolulu. Imuh Aisak

hatano Jekop ape Jekop sohot tel tame tesol huopaniam huhua seilon lato sohot tame teka Israel.

⁹ “Tesol nati Jekop wiliki tel ukalalato Josep. Lato hangaini i hani teka Igip ape laha uke i unaualaha. Tuahae Haeu kapi Josep. ¹⁰ Haeu huali i ti hatesol kawatan tetan. Haeu hanesoaw hawane i ape Fero, tel masiwi tapein ti Igip, amuke hawane i. I hana Josep tel masiwi hahitakan ngahatiai Igip ma hatesol soxian.

¹¹ “Telok, tehu hitolo lalap ti Igip ma Keinan. Teka seilon tunahi kawatan lalap. Ape tesol akiki Josep lato tin tap analato. ¹² Ti Jekop hong tunahiwa ka hina an ti Igip laha hana alolomeni, i talo tesol natun hani ien. ¹³ Ti Jekop taloa tesol natun hani Igip, Josep aile kola ka i tetel ukalalato. Ape tataen ien Fero tioi tesol akiki Josep. ¹⁴ Muhin Josep tapea waxi tel taman Jekop ma tesol akikin, 75 hatesol sohot haniwa kapin Igip. ¹⁵ Ape salan, Jekop sos hani Igip. I ma tesol natun to mat ien. ¹⁶ Kuilato laha kau aliakte hani tehu taon Sekem ape hana hani tehu amal ti Abraham kahui ti tesol nati Hamor.

¹⁷ “Ti sikole ape Haeu haponowia waliko ti i kakane Abraham, teka Israel leili Igip laha kila hahawanele. ¹⁸ Ti tel liai toa masiwi ti Igip, i kum nam waxi Josep. ¹⁹ Tel masiwi ien i hapuasa halialu teka matahaun ti kako ma i lungi lato xoiniai natulato kokol lehe i mat.

²⁰ “Moses takah lokon ien. Haeu namiloi ukek i aakai solian. Leili pangapang tolulu tel tinan ma tel taman aunini i leili ingalalu. ²¹ Tap aliakean, lalu kum muneni uke i ape lalu ahuti i hani melal. Tel nati Fero hehin tunahi i ape waxi auni hanowi natun wanen. ²² Moses uke anesoin hanowi teka akaik ti Igip. Ape i tin tel seilon solian ti kakain ma puasain.

²³ “Ti ahangi Moses kewa 40, i namiloi na i nahih paxai teka Ju akikin. ²⁴ Lokon ien i ningahi tel akiki Igip aile hahalialu tel akiki Ju. Ti Moses awawai tel akikin, i telei tel Igip. ²⁵ Moses sokok tesol akikin paxai tioi ka Haeu hapuasa i ahutiae teka Ju ti Igip. Tuahae lato kum paxai tioi.

²⁶ “Ngain liai tehu Moses ningahi hua Ju akikin lalu hilehil, ape i tohongi lali hasolai wasolalalu. I ukek, ‘Amulu akikin. Alahan amulu hil?’

²⁷ “Tuahae tetel i hutui hile i sipeli xaxaweni Moses ape i hone i, ‘O kumahe tel

masiwi ti amite. ²⁸ Lehe o telei nga hanowi ti o telei tel Igip titihah?’ ²⁹ Ti Moses hongoa i ox hani texux xux Midian ape i to ien hanowi soliwa. I sal ien ape i hanatua hua natun wawan.

³⁰ “Ahang 40 tamusua, tel engel take hani kapi Moses leili teik sisihan i xekexek he lohong, xohixohin kapi Maunt Sainai. ³¹ Ti Moses ningahiwa, i tataxini. Ti i nahih xohi ahewa paxai aluinian, i hong kinaxe Haeu. ³² I ukek, ‘Nga Haeu ti tesol matahaun tetam, Abraham, Aisak ma Jekop.’ (Exod 3:6) Moses i mamata xexex ape kumahe pahan i paxai.

³³ “Ape Haeu hone Moses, ‘Akahetiwa sueumake o tutu matak Haeu tel Masiwi tetam. ³⁴ Nga ningahiwen teka Igip hapuasa hahalialu tesol seilon tetak ape nga hon-goen tangialato. Nga mosuma taloamti oxoxialato. Ape nga talo aliakte o hani Igip ailei teik namilok.’ (Exod 3:5-10)

³⁵ “Moses tetel teka Ju watakai laha ukek, ‘O kumahe tel masiwi ti amite.’ Moses se tetel Haeu hana i masiwi ape talo aliakte hani Igip oxoxiai teka Ju. Telao tel engel ti Haeu sohot hani kapi Moses leili teik sisihan i xekexek. I huali Moses ailei teik puasain ien. ³⁶ Ape Moses nahike ahuti teka Ju ti Igip. Lokon ien i aile hasohotu kilan kolakol lalap wanen ti Igip, ti tesol kanitax axan Kakan ma he lohong.

³⁷ “Moses tin tetel i kakane teka Israel, ‘Imuh Haeu hani amuto tel kuluiai kakaian. I puki tel akikikako masin nga.’ (Deut 18:15) ³⁸ Moses tin tel i kapi tesol tamakako ti he lohong ape tel engel ti Haeu kakak kapin ti Maunt Sainai. Lokon ien Haeu hani Moses nauna ti kola haniakako sale hasolai woukako masin ti Haeu pahan.

³⁹ “Tuahae tesol tamakako kum hong usi Moses. Ti namilolato wanen, lato kum nam waxi Moses, pahalato alia hani Igip. ⁴⁰ Ti Moses tutuen Maunt Sainai lato hone Aron ukek, ‘Tanomi hanima amite tesol haeu ti neiniamite sake Moses tetel i ahutima amite ti Igip, amite kum tioi waliko tetenen tunahiwen i.’ (Exod 32:1)

⁴¹ Lokon ien lato tanomi tok bulmakau uluha. Lato telei manihuh ape lelei hani i hanowi ka i tel Haeu Masiwi ti lato. Ape lato aile tehu angiai lalap ti amukei waliko ti lato tanomien. ⁴² Aile ape Haeu hani lioi lato lotui hatapo waliko ti he maun aheah, i hapoponowi waliko ti Haeu kaxiwen leili pepai teka kuluiai kakaian. I ukek,

“ Teka seilon ti Israel, ti amuto he lohong
leili 40 ahang,
salan amuto telei ma lelei manihuh
tuahe kumahe amuto aile hahani nga.

⁴³ Amuto kakau ing sosoxope ti Molek
ma tehu kohot ti Repan amuto tanomi
ape amuto lotui lalu hanowi nga tel
Haeu.

Aile ape nga hana lioi amuto he mini teka
seilon
laha waxi amuto hanowi tuahe
unuaalah
hani tesol tataen i akilaua tehu taon
Babilon.’” (Amos 5:25-27)

⁴⁴ Stiven kakak tutuen, i ukek, "Tesol tamakako lato kakau ing sosoxope ti Haeu, kolakol ka Haeu kapi lato ti he lohong. Lato tanomi tehu ing ien hanowi ti Haeu kola haniwen Moses ti Maunt Sainai. ⁴⁵ Lokon ti Josua tel masiwi ti kako neini teka Israel hetekie huuhual ti Haeu, lato waxaini hile ape lato uke hepekeun ti Haeu kakawen i hani lato. Tetehu ing sosoxope ti Haeu lato kau hehetekie kapi lato ape i to hamalum ien atengi tataen ti tel masiwi David.

⁴⁶ "Haeu amuke David ape David kamei na i atai hani i, tel Haeu ti Jekop, tehu ing.

⁴⁷ Tuahe tel masiwi Solomon ataian. ⁴⁸ A kako tioi ka Haeu tel Masiwi tapein i kum to leili ting ti seilon atai ani min. Masin ti Haeu kakawen leili pepai tel kuluiai kakaian. ⁴⁹ I ukek,

“‘Nga Masiwi ti lawe waliko ti patul ma
tehu pon itan ie.
Nalau wuuta sakaki tanci.

Nakon amuto sokok i tapai
na amuto atai hani nga tehu ing?
Nakon amuto sokok i tapai
na amuto atai hani nga tehu ing lehe
nga to hanau?

⁵⁰ Se nga tel tanomi hatapo lawe waliko.''"
(Isa 66:1-2)

⁵¹ Stiven kakane tutuen tesol masiwi i ukek, "Patumuto pate ailan nake amuto kum hong tamani kakai Haeu. Amuto masin tesol tamamuto. Puasamuto i hihilei Holi Spirit. ⁵² Tamamuto aile halialu hatesol kuluiai kakai Haeu! Tin lato telei teka laha kak kilami sohotui tel seilon sawisawin ti Haeu, tel Krais Haeu taloma, tetel amuto hangaini hani laha telei. ⁵³ Kalak teka engel haniwen amuto nauna ti Haeu, amuto kum hong usi."

Laha hokai Stiven pot

⁵⁴ Ti teka masiwi ti teka Ju hongoa kakai Stiven lato atalahi nisulato ti lialui lolato.

⁵⁵ Tuahé Stiven tak hani patul. Hetekie huuhal ti Holi Spirit i ningahi larape xewai Haeu ape i ningahi Jises tutu pape Haeu sai manau ti neimiai seilon. ⁵⁶ I ukek, "Hongoa! Nga niningahi maun hea ape tel Nati Seilon i tutu pape Haeu sai manau!"

⁵⁷ Ti lato hongoa lato aka siponi taxin-galato, lato ausini eliel hawane ape lato kiliwau nami Stiven. ⁵⁸ Lato itini hahatete Stiven hani melal ti Jerusalem ape hokai i pot. Tesol seilon lato papaxai sale teleiai Stiven lato seilon teke puxuaulato patul. Lato hani tel seilon axan Sol peteni ape tin lato hokai telei Stiven.

⁵⁹ Leilon ti lato hohokai i pot, Stiven tilol hani tel Masiwi ukek, "Jises tel Masiwi tetak, waxiwa nga!" ⁶⁰I aleal put hani itan ma tang ausini hani Haeu, "Oxoxiwa lato ti kawatan ti saun lialun ti lato ailele!" Ti i kak kewa ape i mat.

8

Teka kahikahi Jises tunahi kawatan

¹ Sol paxai waheni ti laha telei Stiven.

Ti ngain tehu ien teka seilon hutui ax-
iai kawatan tenen lialun wanen hani teka
kahikahi Jises leili Jerusalem. Aile ape
hatesol kahikahi Jises ox hani tesol tesol ti
Judia ma Samaria tuahé tesol apostel lat-
hamalum Jerusalem.² Teteka seilon laha
lolotui Haeu, laha tihini auni Stiven ma
laha tahane hawane i.³ Tuahé Sol i hutui
aile halialui teka kahikahi Jises. I soh hani
ing tehu tehu, i itini ahuti wawan ma hehin
ape lohi laha hani ingi kalabus.

Pilip leili tehu taon lalap ti Samaria

⁴Teteka kahikahi Jises laha ox, laha kaxi meng solian ti Jises hani tesol tesol. ⁵Pilip nahih hani tehu taon lalap leili Samaria ape i kaxi hani teka seilon ka Jises se Krais, tel Haeu taloma. ⁶Ti kilai seilon hongoa kakai Pilip ma ningahiwa i aile hasohotu kolakol lalap wanen, laha hong aka matainai. ⁷Teka spirit lialun laha tang eliel hawane ti Pilip ahuti xaxaweni laha leili teka seilon. Tin i aile haewa teka seilon tupualaha maten ma teka aelaha lialun. ⁸Aile ape amuamu lalap wanen leili tehu taon ien.

Saimon pahan i kahui pohe Haew

⁹ Ti lokon ien tel seilon axan Saimon i hahapuasa pohe Satan hasohotui kolakol lalap ti tehu taon ien. Ape kilan seilon

laha ong amuke waliko ti i ailele. Saimon hanasanas ukek ka i tel seilon wanen.¹⁰ Lawe seilon tuah ma naun, laha hong mataini Saimon ape laha ukek, "Tel seilon ie hina pohe Haeu, poh tenen lalap wanen."¹¹ Laha soh i nake laha ong amuke kilan waliko lalap ti i ailewen.¹² Tuah te Pilip kaxi ahuhuti meng solian sale aweisal ti Haeu neini seilon ma pohe Jises, laha hong soh ape Pilip baptaisi laha, wawan ma hehin.¹³ Puki Saimon tin i soh ape muhun ti Pilip baptaisiwa i, i kahiti Pilip hani tesol tesol. Saimon ong amuke kolakol lalap ti Pilip ailele.

¹⁴ Ti tesol aposel leili Jerusalem hongoa ka teka seilon ti Samaria laha ukewen kakai Haeu, lato talo Pita ma Jon hani kapi laha.¹⁵ Ti lalu tahiawa lalu kamei Haeu ti axiai Holi Spirit hani teka laha soh kakai Haeu.¹⁶ Ti imat Pilip baptaisi laha hahitake axe Jises tuahe laha tai uke Holi Spirit ti kapitalaha.¹⁷ Ape aope Pita ma Jon hana minalalu patul ti laha kameiai Haeu ti hinalaha Holi Spirit ape se laha uke.

¹⁸ Saimon Paxai tioi ka laha kewen Holi Spirit ti Pita ma Jon hana minalalu patul ti laha. Pahan i axi Pita ma Jon moni ape i ukek,¹⁹ "Nga hani amulu moni na amulu hani nga tenen poh ien, lehe na nga hana minak patul ti seilon, tin laha uke Holi Spirit."

²⁰ Pita ukek, "Tiliwen o mateke hetekie monium nake o sokok ka o pon kahuiai pohe Haeu ani moni.²¹ Tap pupuasam puasain ti amili ailele nake namilom kum onotenii namili Haeu.²² Towiahua ti tenen saun lialun ien, ape kameiwa Haeu oxoxiam ti kawatan ti lialui namilom.²³ Aile kewak ien nake nga paxai o seilon tenen pate hanasanas ma saun lialun xiotti kokongini o."

²⁴ Ape Saimon pahoi ukek, "Amulu kameiwa Haeu lehe i kum axi nga kawatan ti lialui namilok."

²⁵ Ti Pita ma Jon kaxi kewa titioalalu sale Jises ma kaxi ahutuwa kakaian, lalu nahih alia hani Jerusalem. Ti aweisalulalu lalu kaxi ahutu meng solian ti Jises hani toan tewau tewau ti Samaria.

Pilip ma tel seilon ti Itiopia

²⁶ Ngain tehu tel engel ti Haeu hone Pilip, "Nahih haniwa tewau aweisal sai haiup he lohong ti i luainiwa Jerusalem hani Gasa."

²⁷ Ape salan i nahih. Ti i nanahiwa i apatuini tel seilon ti Itiopia, tel masiwi ti ngahatiai

lawe soxi ti tel masiwi hehin ti Itiopia axan Kandis. Tel seilon ien heheisama lotuiai Haeu leili Jerusalem ape i aliliama.²⁸ I kiliwau alia hahaniwa tonan leili tea wain karis. I riridai pepai Aisaia tel kuluiai kakai Haeu.

²⁹ Ape Holi Spirit hone Pilip, "Nahih xohi kapita haniwa tea karis."

³⁰ Pilip kiliwau haniwa kapi tea karis ape i hong tel seilon riridai pepai Aisaia. Ape Pilip kamei i, "O xeu waliko ti o riridai?"

³¹ Tel seilon ukek, "Lehe nga xeu ukek ia halik na tel haxewa hani nga?" Ape i ilow Pilip ku to hani kapin.

³² Teik kakai Haeu tel seilon riridai, i ukek, "I masin tok sipsip laha hakahita hani teka teleian.

I masin tok nati sipsip i to hamalum na laha kota ole tinun.

I kum kak na tenen.

³³ Woulaha teheni hawane i.

Kumahe wanen salan saun ti laha aile hani i.

Tap tel pon kaxiai teka laha nakuama tetan nake laha telei i." (Isa 53:7-8)

³⁴ Tel seilon kamei Pilip, "Tel kuluiai kakai Haeu kakak aita leili teik kakai Haeu nga riridai? I kakak puki i a tel seilon liat?"

³⁵ Ape Pilip kaxi haxewa hani i hutui ti teik kakain ien ma i kaxi ahuti hani i meng solian ti Jises.

³⁶ Ti lalu kikiliwawa, lalu tahiha hani ngixi tehu kan. Ape tel seilon hone Pilip, "Tehu kan ie. Ewi na o baptaisi nga?"

³⁷ Pilip ukek, "Na namilom xoxoan ti Jises Krais, nga baptaisi o."

Ape tel seilon ukek, "Nga soh ka Jises Krais i tel Nati Haeu."³⁸ Tel seilon ti Itiopia hapeti tea karis. Ati lalu mos hani he kan. Pilip baptaisi i ape i sohot kahikahi Jises.

³⁹ Ti lalu ahutama he kan, Holi Spirit waxi hahutuwa Pilip. Tel seilon kum ningin i tuahe i kiliwau tatalewa hetekie amuamu he tian.⁴⁰ Lokon ien Pilip tahiha hani tehu taon Asotus. I kaxi ahuhuti meng solian ti Jises ien ma leili lawe taon ti aweisalun haniwa tehu taon Sisaria.

Sol sohot kahikahi Jises

¹ Lokon ien Sol patte pahan tutuen wanen teleiia teka kahikahi Jises. I nahih hani kapi tel masiwi tapein ti hukuminiai Haeu ma seilon.² Sol kamea na i tai axi i hina pas lehe i kola hani teka masiwi ti synagog leili tehu taon Damaskas. Tesol pas ien i

kaxi ka Sol pon xotiai teka seilon laha usiusi aweisali Krais ma hakahita kalabusialaha hani Jerusalem.

³Ti Sol nahihi xohi hahaniwa Damaskas, teik xewan i ahuma he maun ape i kam hahutuia kakalini i. ⁴Sol put hani itan ape i hong tenen kinax kakane i ukek, "Sol, Sol, nake lahan o to aile hahalialu nga?"

⁵Ape Sol ukek, "Tel masiwi, o aita?"

Ape i pahoi ukek, "Nga Jises, tetel o to aile hahalialu. ⁶Xahatawa, nahihi tamus haniwa Damaskas lehe ape o hong waliko tetenen na o aile."

⁷Tesol seilon kakahiti Sol lato ongaini hawane, tap tel wixiwix. Lato hong kinaxe tel seilon i kakak tuahé lato kum ninginah tupuan. ⁸Sol xahatale ape i haxepa pulan, tuahé i kum ninginah uke waliko. Aile ape lato akeni minan ape hakahita i hani Damaskas. ⁹Ngain tolulu i kum paxapax. Tin i kum angiang ma unuu kan.

¹⁰Ti leili Damaskas tel kahikahi Jises axan Ananaia. Lokon ti waliko ien sohot hahani Sol, Haeu tiloi Ananaia i ukek, "Ananaia."

Ape i pahoi ukek, "Alahan tel Masiwi? Nga ie."

¹¹Tel Masiwi kakane i ukek, "Nahihi haniwa leili tehu ingi Judas he tewau aweisal axan Sawisawin ape kamea upiawa tel seilon akiki Tarsus, axan Sol. Aope ie i lolotu ien. ¹²Leilon ti Sol lolotu nga kola hani i ka o Ananaia nahihi hana minam patul tetan ti haewiai pulan."

¹³Ananaia kak pahoi i ukek, "Tel Masiwi, nga hong kilan seilon tau kakaxi tel seilon ien ka lawe i aile halialu teka wawan ma hehin tetam ti Jerusalem. ¹⁴Ape aope i nahihi hanima Damaskas nake teka masiwi tuah ti hukuminia Haeu ma seilon sowini haniwi i xotiai teka seilon laha lolotu o."

¹⁵Tuahe tel Masiwi hone Ananaia, "O nahihi nake nga kilamiwen i ailei puasak. I kaxi sawateni meng solian tetak hani teka seilon laha kum soh tetak ma hani teka masiwi ti laha hetekie teka seilon ti Israel.

¹⁶Ape nga hanau i ka liai i tunahi kawatan ma moloan nake i tel unaauak."

¹⁷Ape se Ananaia nahihi soh hani leili tehu ing Sol toto. I hana minan patul ti Sol ape i ukek, "Sol tel akikik Ju, tel Masiwi Jises i take hani kapim he aweisal ti o lúa hanima ie, i taloma naga haewiai pulam ma kameiai Haeu haniam Holi Spirit." ¹⁸Lokon ien wanen, tenen waliko masin ungi xixi i tawakale he puli Sol ape i paxapax alia. I

tule ape Ananaia baptaisi i. ¹⁹Muhin ien laha axi anan ape tinun kui.

Sol kaxi meng solian ti Jises leili Damaskas ma Jerusalem

Sol tomu teik kapi teka kahikahi Jises leili Damaskas. ²⁰Taen ien i soh hani synagog tehu tehu kakaxi ka Jises i tel Nati Haeu.

²¹Lawe seilon teka laha hongoa menggon laha ongaini hawane ape laha ukek, "Nakon i kumahe seilon tetel kemuk ti Jerusalem i aile hahalialu teka seilon laha lolotu Jises? Nakon i ie kumahe ti xotiai teka kahikahi Jises ma hakahitaialaha hani Jerusalem kapi teka masiwi tuah ti hukuminia Haeu ma seilon?"

²²Tuahe Sol kaxi ahuti aheke meng solian ti Jises hetekie pohe Haeu. Ape teka Ju ti Damaskas laha hong tataxini ti i kaxi nexi haxewa ka Jises se Krais. ²³Kilan ngain tamusua ape hina ti teka Ju laha aile namil ti teleiae Sol. ²⁴Tuahe Sol tioiwen namilolahia. Ngain ma ipong laha peteni aweingi Damaskas lehe laha telei Sol na i ahuta ti taon. ²⁵Tuahe ipong tehu tesol lawan hana i leili tehu po lalap, lato xiota tok tal ape halahe i hani melal ti tehu titieh ti Damaskas.

²⁶Taen Sol tahia haniwa Jerusalem, i to-hongi hukuma hani kapi teka kahikahi Jises tuahé lato hatesol mamata i nake lato kum soh ka i tin tel kahikahi Jises. ²⁷Tuahe Banabas hakahita Sol hani kapi tesol aposel. I kaxi hani lato ka Sol ningahi Jises he aweisal ti hani Damaskas ape Jises kakak kapin. Tin i kaxi hani lato ka Sol kak matut ti i kaxi ahuti meng solian ti Jises leili Damaskas. ²⁸Aile ape Sol to kapi lato. I kaxi matuke sawateniai meng solian hahitake axe Jises leili Jerusalem. ²⁹Lawe i to he kakak kapi teka Ju kakaialaha Grik tuahe lato aile namil ti teleian. ³⁰Ti teka kahikahi Jises tioiwa, lato hakahita Sol hani Sisaria ape lato hakau i hani tehu taon Tarsus, tesol puki tonan.

³¹Tataen ien teka kahikahi Jises ti Judia, Galili ma Samaria lato tunahi tonain solian nake tap seilon aile hahalialu lato. Haeu hakui lato ape Holi Spirit aile hasolia hawane lato. Teka kahikahi Jises laha kila ti laha aile usi lawe waliko ti Jises hanauen laha.

Enias ma Tabita

³²Lokon ien Pita lua hani taon tehu tehu ape ngain telao i nahihi paxai teka kahikahi Jises laha toto tehu taon Lida. ³³Ti ien

i tunahi tel seilon axan Enias. Ahang tepanim tolulu i tua engeeng naake tupuan maten.³⁴ Pita hone i, "Enias, Jises haewia o. Xahatawa! Lumawa enepam." Tataen ien wanen Enias xahat.³⁵ Lawe seilon ti laha toto Lida ma Saron paxaiwa waliko ti i sohot hani Enias, laha towiawu ti lialui woulaha ape usi Haeu tel Masiwi.

³⁶ Lokon ien ti tehu taon Jopa, tel hehin kahikahi Jises axan Tabita (ti kakai Grik laha axai Dorkas) lawe i aile saun solian hani teka seilon liai ma i huali teka seilon tap soxi.³⁷ I tinu mat. Laha kikanomi i ape hanopi hani leili ing teke patul.³⁸ Jopa xohixohin kapi Lida. Taen teka kahikahi Jises hongoa ka Pita Lida, lato talo hua seilon hani kapin ape lalu kakane i, "Pahamite wanen o nahih koseama!"

³⁹ Pita kahiti lalu. Ti i tahiawa, laha waxi i hani leili ing teke patul. Lawe hehin teteka axoalahma matewen laha apuha kalini Pita ape tang kokola puxux ma maia ti Tabita sawiti.⁴⁰ Muhiin ti Pita talo hasohotua laha ti tesol ien, i lokuhape i kamei huuhal ti Haeu. I tale matan hani tel maten ape i ukek, "Tabita xahatawa!" Ti tel hehin haxepale pulan, i ningahi Pita ape i xahat to.⁴¹ Pita akeni mini tel hehin ape huali i hatuhian. I tiloi teka hehin axoalahma matewen ma teka kahikahi Jises liai ape i kola hani lato ka Tabita moih aliawen.

⁴² Meng ti Pita hamoiba Tabita sawat kakalini Jopa ape kilan seilon soh ti Jises.⁴³ Pita to kue Jopa kapi Saimon, tel seilon ti uluti apeseniai uli maniuhu ti hangaini.

10

Konilius ilowi Pita

¹ Leili tehu taon Sisaria, tel seilon axan Konilius. I tel masiwi ti hile ti Rom, tehu taon lalap ti Itali. Kilai teka seilon ti hile hahitakan sai 600.² I ma teka lohe ingan lato wahreni Haeu. Konilius huali teka Ju laha tap soxi ma lawe i lolotui Haeu.³ Alohalah tehu, taun ti i lotu, Haeu hanamiloa i ningahi haxewa tel engel tetan nahih hanima kapin ape i ukek, "Konilius!"

"Konilius paxai kapitini i hetekie mamata ape i kak ukek, "Tel Masiwi, paham la?"

Tel engel pahoi i ukek, "Haeu hongoen lotu tetam ma ningahiwen soliae puasam ti o huuhalu teka seilon tap soxi. Haeu amuke tenen woum ien.⁵ Aope ie taloa teka seilon haniwa Jopa ape hakahitama tel seilon axan Saimon Pita.⁶ I heheuta tehu ingi Saimon, tel seilon uluti apeseniai uli

maniuhu. Ingan tutu peixux. Honewa Pita nahima."

⁷ Ti tel engel kakane kewa Konilius ape i salili i. Konilius tiloi hua unauan pate lolowi ma tel seilon ti hile i waheni Haeu.⁸ Konilius kaxi hani lato lawe waliko ti i sohot hani i ape i talo lato hani Jopa.

Haeu hina kakain tuah hani Pita

⁹ Ti ngain liai telao, lato nahih xohi ha-haniwa Jopa. Ngain tin tetehu, ti Lalape ngain, Pita han hani hongini tehu ing, tenen honginan mamanahan, lehe i lotu.

¹⁰ Pita pate i hitol pahan i ang. Ti laha apepeseni tutuen an, Haeu hanamiloa Pita ape i ningahi maun hea.¹¹ Ape tenen waliko masin teik Lalape maia tumun hahinalopaua xinotan mos hahanima kapin.¹² He teik maia ien maniuhu ma manixus tenen tenen.¹³ Pita hong kinaxe Haeu i ukek, "Pita, xahatawa ape telei aniwai!"

¹⁴ Tuah Pita ukek, "Tel Masiwi, nga kum aile ukek ien. Laii nga kum aniani waliko tenen nauna ti Moses hahalini ma amite teka Ju ukek i kumahe haun."

¹⁵ Haeu kakane ulea i ukek, "Waliko ti nga ailewen haun, kum ukekek ka kumahe haun."¹⁶ Pita ningahi tesol waliko ien uke he tolulu. Muhiin ien teik maia lauta alia hani patul.

¹⁷ Ti Pita to nanamiloi salangawe waliko ti i ningahiwen, tesol seilon tataloi Konilius, lato tunahiwen ingi Saimon ape lato he aweing.¹⁸ Ape lato tilol kamea na Saimon Pita toto ien.

¹⁹ Ti Pita nanamiloi tutuen, Holi Spirit hone i ukek, "Tolu seilon nahiwen ie upaiam.²⁰ Xahatawa, mosua ape kahitiwa lato. Kum hahakila namilom pake puki nga taloma lato."

²¹ Pita mos hani kapi lato ape i kak ukek, "Se nga tel seilon amuto upiup. Amuto luama ti waliko la?"

²² Ape lato ukek, "Konilius tel masiwi ti hile ti Rom taloma amite. I seilon tenen sawisawin, lawe i lolotui Haeu. Teka Ju sameni ka i seilon tenen solian. Tel engel ti Haeu kakane i ka ilowiwa o haniwa leili ingan lehe i hong tenen na o kak."²³ Ape Pita ilowi lato lawai i leili ing. Ti ngain liai telao Pita apeas kewa ape i kahiti tesol seilon Konilius taloma. Hina kahikahi Jises ti Jopa tin laha kahitiwa lato.

Pita leili ingi Konilius

²⁴ Ti ngain liai telao, lato tahiia hani Sisaria, tetesol Konilius atetengi lato. Tesol akikin ma tesol lohun hoi laha apupuha ien. ²⁵ Ti Pita sohoa, Konilius nahih tengeni i ape lokuhu matan. ²⁶ Pita akeni minan ape hone i, "Tule! Nga tuahe seilon masin o." ²⁷ Pita kakak tutuen kapin ape i ningahiw en kilan seilon apupuha leili tehu ing.

²⁸ Pita kakane lato ukek, "Amuto tioi hawane ka hahalin wanen ti amite teka Ju hukuma kapi teka seilon ti xux liai. Tuahe Haeu kola haniwen nga ka tap hahalin ti na naga lawai tuahe tel na seilon. ²⁹ Aile ape ti Konilius ilowima nga, tap nga watakai. Konilius, nake lahan o tapea waxyi nga?"

³⁰ Konilius kak pahoi ukek, "Ngain hinalo tamusuen ti nga lolotu, nga ningahihahutuia tel engel puxuaun pate i xeu talepalep. ³¹ Ape i kakane nga, 'Konilius, Haeu hongoen lotu tetam ma ningahiw en soliae puasam ti o huhuali teka seilon tap soxi. Haeu amuke tenen woum ien. ³² Taloa teka seilon haniwa Jopa ape hakahitama tel seilon axan Saimon Pita. I heheuta tehu ingi Saimon, tel seilon uluti apesenai uli manihuh. Ingan tutu peixux.' ³³ Aile ape nga tapea kosea waxiam. Ti soliaiam o tahiam. Amite hatesol apupuha ie ti puli Haeu hongoi lawe waliko i hohone o kaxi haniamite."

Pita kaxi ahuti meng solian ti Jises leili ingi Konilius

³⁴ Pita hutui kakaian ukek, "Aope ie nga paxai tioi ka Haeu kum aile nenexi seilon.

³⁵ Haeu amuke teteka seilon ti lawe xux laha lolotu i ma aile saun tenen i pahan.

³⁶ Amuto tioi tenen meng solian ti Jises Haeu haniwen amite tesol seilon ti Israel. Jises, Masiwi ti lawe seilon, i aile hasolia wasolakaha hani Haeu. ³⁷ Amuto tioi waliko ti i sohot kakalini Judia, hutui Galili ti Jon Baptis hone teka seilon lioi xaxaweniani saun lialun lehe i baptaisi laha. ³⁸ Amuto tioi Haeu hani Jises Holi Spirit ma poh. I nahih hani tesol tesol ailei puasain solian ma haewiai teka seilon spirit lialun kapiti hahalau nake Haeu kapin.

³⁹ "Amite tesol aposel, amite kaxi ahuti lawe waliko ti amite ningahi i aile leili xuxumite teka Ju hetekie Jerusalem. Ape imuh laha tahi hakea i he kros ape i mat.

⁴⁰ Tuahe muhi ngain tolulu Haeu xahateni aliake i ti matean ape kilan seilon ningahiw en ka i moihin. ⁴¹ Kumahe lawe seilon

ningahiw i, mewenae amite tesol ang akatiwen i muhin ti i moih aliawa. Liai Haeu kilamiwen amite ti kaxi ahutiai meng solian ti Jises. ⁴² Ape i hone amite ti kaxi haxewa haniai teka seilon ka i tetel Haeu kilamiwen hinitiai seilon, teka moihin ma tekia maten. ⁴³ Hatesol teka kuluiak kakai Haeu lato tai kaxiwen ka Haeu oxoxi teka seilon ti kawatan ti saun lialun ti pohe Jises, na namilolaha xoxoan tetan."

Teka kumahe Ju laha uke Holi Spirit

⁴⁴ Ti Pita kakak tutuen, Haeu axi Holi Spirit hani hatesol seilon laha hongohong kakai Pita. ⁴⁵ Tesol Ju kahikahi Jises lato kahitima Pita ti Jopa pate lato ongainingi ka Haeu tin i axi Holi Spirit hani teka seilon laha kumahe Ju. ⁴⁶ Lato hong teka seilon ien kakak kakain ti kumahe kakaialaha ti Holi Spirit hanamiloa laha ma lato hong laha sasameni Haeu.

⁴⁷ Ape Pita ukek, "Tesol seilon ie kewen Holi Spirit masin kako teka Ju. Aile ape tap el pon konginiakako ti baptaisalato ti kan." ⁴⁸ Ape Pita hone tesol seilon kumahe Ju i ukek, "Amuto kewa baptais hahitake axe Jises." Ti lato baptais kewa, lato kamei eliei Pita na i tilimuen teik kapi lato.

11

Pita kak haxewa hani teka Ju kahikahi Jises

¹ Tesol aposel ma teka kahikahi Jises liai ti tesol tesol ti Judia, lato hongoen ka teka kumahe Ju tin laha hong soh kakai Haeu.

² Ape ti Pita nahih tahiia haniwa Jerusalem, teka Ju kahikahi Jises lato kahilolo i. ³ Lato ukek, "O heheuta ingi teka kumahe Ju ma tin o angiang kapi laha."

⁴ Ape Pita hutui kaxi haxewa hatapo hani lato waliko ti i sohotuen. ⁵ I ukek, "Ngain telao ti nga Jopa, leilon ti nga lolotu, Haeu hanamiloa nga ningahi tenen waliko masin teik lalape maia mosulih he maun hahanimia kapik. ⁶ Nga pax haniwa he teik maia, nga ningahi manihuh ma manixux tenen tenen. ⁷ Ape nga hong kinaxe Haeu i ukek, 'Pita, xahatawa ape telei anika.'

⁸ "Tuahe nga ukek, 'Tel Masiwi, nga kum aile ukek ien. Laii nga kum aniani waliko tenen nauna ti Moses hahalini ma amite teka Ju ukek kumahe haun.'

⁹ "Ape Haeu kakane ulea nga, 'Waliko ti nga ailewen haun, kum ukekek ka kumahe haun.' ¹⁰ Nga ningahi tesol waliko ien uke he

toluhu. Muhin ien teik maia lauta alia hani patul.

¹¹ "Lokon ien wanen tolu seilon laha taloma ti Sisaria tahi hanima ing tetehu nga heheuta. ¹² Holi Spirit kakane nga ka nga kahitiwa lato kum hahakil namilok. Tepanim tel kahikahi Jises ie tin lato kahiti nga hani Sisaria ape amite hatesol nahih hani leili ingi Konilius. ¹³ Konilius kaxi hani amite ka i ningahi tel engel ti Haeu leili ingan. Tel engel kakane i, 'Taloa teka seilon haniwa Jopa ape hakahitama tel seilon axan Saimon Pita. ¹⁴ I kaxi ahuti hani o meng solian ti Jises. Na o ma hatesol seilon leili ingam hong soh kakaiyan, Jises awai amuto ti kawatan ti saun lialun ti amuto.'

¹⁵ "Ape tataen nga hutui kakaiak, Haeu hani teka seilon ien Holi Spirit masin ti i hani kako teka Ju lokon ti Pentekos.

¹⁶ Tataen ien wanen nga namenai kakai tel Masiwi Jises, i ukek, 'Jon baptaisi seilon ti kan, tuaha Haeu hani amuto Holi Spirit ti kapitiamuto.' ¹⁷ Pate xewan ka Haeu haniwen lato teka kumahe Ju Holi Spirit masin ti i haniwen kako teka Ju, ti kako soh ti Jises tel Masiwi. Na masin ien, nga aita lehe nga pon konginiai Haeu?"

¹⁸ Ti lato hong kewak ien ape lato kum kahiloloi Pita. Lato sameni Haeu ukek, "Haeu tin hanamiloa teka kumahe Ju lehe laha towiawu ti saun lialun ape laha uke tonain kapin ti tap tahi tapoan."

Teka ti Antiok sohot kahikahi Jises

¹⁹ Teteka kahikahi Jises lato ox hani tesol tesol nake laha axi lato kawatan ti lokon laha telei Stiven, lato lua hani tataen Penisia, Saiprus ma Antiok. Lato kakaxi meng solian ti Jises hani mewenae teku Ju.

²⁰ Tuaha teka ti lato ti Saiprus ma Sairini lua hani Antiok ape tin lato kakaxi meng solian ti Jises hani teka kumahe Ju. ²¹ Pohe Haeu hualii lato ape kilan seilon hong soh meng solian ti Jises. Laha towiawu ti saun lialun ape usi Jises Krais tel Masiwi.

²² Tesol kahikahi Jises ti Jerusalem hong tunahiwa ape lato talo Banabas hani Antiok. ²³ Ti i tahiawa i paxai solian ti Haeu aile hani teka Antiok ape i amuam hawane. I hone lato ti haxoxoi namilolato ti Jises Krais ma hani hatapoi tupualato ti wahenian. ²⁴ Banabas hina namil xooaan ti Jises. I tel seilon solian nake Holi Spirit kakapiti i. Kilan seilon soh ti Jises ti laha hongoa kakai Banabas.

²⁵ Muhin Banabas lua hani Tarsus ti upiai Sol. ²⁶ Ti i tunahiwa, ati lalu alia hani Antiok. Lawe lalu huhukuma kapi teka kahikahi Jises ma hahanau kilan seilon sale puase Jises leili ahang tehu. Lokon ien ti Antiok, laha axai hutui teka kahikahi Jises, Kahikahi Krais.

²⁷ Ti lokon ien teka kuluiai kakai Haeu ti Jerusalem lato lua hani Antiok. ²⁸ Tel ti lato axan Agabus tule leili tehu apuhain lap ape hetekie huhual ti Holi Spirit i kak kilami tehu hitolo lalap i sohot hani hatehu pon ie. Ape imuh i sohot hawane, lokon Klodius masiwi tapein ti Rom. ²⁹ Aile ape teka kahikahi Jises ti Antiok namiloi ka lato tel tel hakau huhual ti lato pon, ti hualiai teka kahikahi Jises ti Judia. ³⁰ Ti lato apesenai kewa waliko ti huhual, lato hani he mini Banabas ma Sol lehe lalu hakau hani teka masiwi ti kahikahi Jises leili Jerusalem.

12

Tel engel ti Haeu oxoxi Pita ti kalabus

¹ Lokon ti Banabas ma Sol lua hani Jerusalem, tel masiwi Herod Agripa xoti teka ti kahikahi Jises lehe i aile halialu lato. ² I talo teka unauan teleiai tel aposel Jeims, tel ukale Jon. Laha koti kinawen ani ngol weluwelun. ³ Ti i paxaiwa ka teka Ju pate laha amuke waliko ti i ailewen, i xoti ulei Pita. Tesol waliko ien i sohot lokon ti Pasova, ngain ti namenai lokon Haeu waxy aliake teka Ju ti Igip. ⁴ Herod lohi Pita hani kalabus ape i hana teka unauan ti hile petenian. I sei lato hinalo hinalo ukek aua toluhu toluhu. Herod namiloi i hatuhi Pita ti sulusulu he puli lawe seilon muhi Pasova.

⁵ Tuaha te Pita leili kalabus, teka kahikahi Jises lato lotu kamei eliel Haeu hualian.

⁶ Ipong tehu imat ti Herod pahan i hatuhi Pita ti sulusulu, Pita mamatih leili kalabus wasole hua petenian. Laha xinoti i ani sen hani lalu hauhua ape hua liai pepeten aweing. ⁷ Tel engel ti Haeu take hahutuia hani kapi Pita ape xewan haxewa tehu ingi kalabus. Tel engel huei hangoni i ukek, "Xahat koseawal!" Ape sen tua put oxoxa he mini Pita.

⁸ Tel engel hone i ukek, "Xinotiwa tehu puxuaum ape nihiniwa sueum." Pita aile usi ape tel engel kak ukek, "Hanawa tehu atuhiai puxuaum ape kahitima nga."

⁹ Pita nahih sohot kahiti i ti ingi kalabus. I kum ukek waliko ti i sosohot salan wanen. I sokok ka Haeu tua hahanamiloa i ningahi tesol waliko ien. ¹⁰ Lalu nahih

sahiwa teka peteniai kalabus imat ma teka liai ape lalu nahih tamus hani tewau kahip saman haniwa leili taon. Tewau kahip i tua hea ape lalu nahih ahuta. Lalu nanahiwa he aweisal ape tel engel kaluta hahutuia ti Pita.

¹¹Pita namilon ape i xeu waliko ti i sohot hani i ape i ukek, "Nga tioi salan wanen! Tel Masiwi taloma tel engel oxoxiak ti Herod ma ti hatesol waliko teka Ju nanamiloi laha aile hani nga."

¹²Ti namilon xewawa i nahih hani ingi Mary tel tini Jon Mak. Kilan kahikahi Jises apupuha ien ti lotu hualiai Pita. ¹³Pita tuitui kahip ti melal ape tel hehin uluha, axan Roda, nahih paxai. ¹⁴Ti tel hehin hong tioiwa kinaxe Pita, amuamuaihan i tai hei aweing. I kiliwau hahongo teka liai ka Pita tutu melal.

¹⁵Lato hone tel hehin, "O taxitaxiawen!" Tuahae i kak tatale ka salan wanen. Ape lato ukek, "Sohin tel engel ngahatian."

¹⁶Pita tui tatale kahip. Ti lato heiwa lato ong hawane ti lato ningahiwa Pita. ¹⁷Pita aile kola minan hani lato ka kum wixiwix ape i kaxi hani lato aweisal ti Haeu ahuti i ti kalabus. Ape i ukek, "Kaxi haniwa Jeims tel ukale Jises ma teka kahikahi Jises liai waliko ti i sohot haniwen nga." Ape i nahih salili lato hani tesol liai.

¹⁸Ti ape letu, teka peteniai kalabus laha kum niningah Pita. Pate laha mamata ma tataxini. Laha ukek, "Nakon Pita oxoxa ukek ia?" ¹⁹Herod talo teka unauan upia elielia Pita tuahae lato kum tunahi. Ape Herod kamei hakila kamekame hani teka peteniai Pita. Muhiin Herod hone teka unauan teleiwa lato. Lokon ien Herod sos salili Judia hani Sisaria ape i to ien.

Matei Herod Agripa

²⁰Telao Herod lon pate lialun ti teka seilon ti Taia ma Saidon. Teka seilon ien pahalahia aile hasolia wasolalahia ma Herod nake laha kema analaha ti xuxi Herod. Ape laha kamei eliel huuhal ti Blastus, tel unaui Herod pate i papanga kapin. Hetekie huuhal tetan Herod waheni na i to kakak kapi laha. ²¹Tehu ngain Herod kilami ti i to kakak kapi laha, i puxui tehu puxuaun ti masiwi, i to he tehu tonain tuah tetan ape i kaxi ahuti kakaian. Kilan seilon apupuha hongoi kakai Herod. ²²Laha tilol ukek, "I haeu, kumahe tuahe seilon."

²³Tel engel ti Haeu aile hatinu hahutuia Herod nake i kum lotui Haeu. Ul tan leili tian ape imuh i mat.

²⁴Teka kahikahi Jises sawateni tutuen meng solian ti Jises ape kilan seilon laha hong soh kakaialato.

²⁵Banabas ma Sol hatapoa pupuasalalu ti atoheniai huuhal hani teka kahikahi Jises ti Jerusalem ape lalu alia hani Antioch hetekie Jon Mak.

13

Holi Spirit kilami Banabas ma Sol ailei puasan

¹Leili teka kahikahi Jises ti Antioch, Banabas, Simeon tel laha axai i Polun, Lu-sius ti Sairini, Sol ma Manaen, tel i lap tuaima Herod Antipas. Tesol seilon ien lato teka kaxi ahutiae meng solian ti Jises ma hanauai seilon sale usian. ²Ngain tehu ti teka kahikahi Jises hahalini an ti hualiai lotu ti lato hani Haeu, Holi Spirit hone lato ukek, "Talaheniwa Banabas ma Sol hanima nga nake nga hina puasain tuah ti lalu."

³Lato halini tatale an ma lotu tatale. Lato hana minalato patul ti lalu kamei Haeu ti hakuialalu. Ape lato talo lalu ailei puasain ti Holi Spirit kikilami lalu puasakean.

Puase Banabas ma Sol ti leili Saiprus

⁴Holi Spirit kapiti Banabas ma Sol hani tehu taon Selusia ape lalu lang hani texux xux Saiprus. ⁵Ti lalu tahia haniwa tehu taon Salamis, lalu kaxi ahuti kakai Haeu leili synagog. Jon Mak tin kapi lalu, i huali lalu ailei puasain.

⁶Lato kolia koti Saiprus hani tehu taon Papos. Ti ien lato tunahi tel seilon axan Bar Jises, akiki Ju. I woinakon kuluai kakai Haeu. I hahapuasa pohe spirit lialun ailei puasan. ⁷I lohi Sergius Paulus, tel masiwi kiliwakei Saiprus, seilon tenen namilon xewan. Sergius Paulus ilowi Banabas ma Sol nake pahan i hong kakai Haeu. ⁸Tuahae Bar Jises, axan tenen liai Elimas, i nam watakai Banabas ma Sol ape i xui Sergius Paulus kum hong sohosoh lalu uke i sohot kahikahi Jises.

⁹Sol, ti aope laha axai i Pol, Holi Spirit hanamiloa i ape i paxai kahiloloi Elimas. ¹⁰I ukek, "O unaui Satan! O pahoxai hatapoa waliko tenen solian, o puluti seilon ma aile hakila saun lialun. Kakai Haeu lawe o kaxi towiahu hani puputa. ¹¹O ape Haeu axi tenen kawatan, O pulaxamu ape o kum tua pon ningahiai al." Tataen ien wanen Elimas

kum pon paxapax. I soxa upiup aweisalun ape i kamea na tel ati i.

¹² Ti Sergius Paulus ningahiwa waliko ti sohot hani Elimas, i soh ti Jises ape i ong amuke waliko ti Pol ma Banabas hahanau sale puase Jises tel Masiwi.

Pol leili tehu taon Antiok ti Pisidia

¹³ Pol ma hua mahoan lato lang ti Papos hani Perga, tehu taon ti Pampilia. Ti ien Jon Mak lua salili Pol ma Banabas ape i alia hani Jerusalem. ¹⁴ Ape lalu lalu salili Perga hani Antiok, tehu taon ti Pisidia. Telao Sabat lalu nahih hani leili synagog. Lalu to ape lotu kapi teka Ju. ¹⁵ Muhin ti tel seilon kaxi kewa hina nauna ti Moses ma ti teka kuluiak kakai Haeu, teka masiwi ti synagog kamei Pol ma Banabas ukek, “Hua Ju akikimite, na amulu hina kakain ti hualiamite, kakawa.”

¹⁶ Pol tua, i tulini minan i kola ka ape i kak. I ukek, “Amuto tesol Israel ma tesol kumahe Ju amuto lolotui Haeu, hongoa!

¹⁷ Tel Haeu ti kako teka Israel lolotui, i kilamiwen tetan tesol tamakako ti matahaun. Lokon ti lato toto Igip, Haeu hakila lato ape ti kui pohen, i oxoxi lato ti Igip. ¹⁸ Ti lato nanahiwa he lohong leili ahang 40, Haeu kum lioi lato kalak lato kum hong tamani i. ¹⁹ Haeu huali teka Israel hileiai teka akiki tepanim huoxux xux liai laha toto leili texux xux Keinan. Ape Haeu hani lato tamai hepekeun ti Keinan. ²⁰ I uke 450 ahang ti hil waxiai hepekeun ien.

“Muhin ien i axi lato masiwi ti neinialato hanima taen ti Samuel, tel kuluiak kakaian. ²¹ Imuh lato kamei Haeu axialato tel masiwi liai. Ape i hani lato Sol, tel nati Kis, kahi nati Benjamin. I masiwi ti lato leili ahang 40. ²² Muhin ti Haeu xaxaweniwa i masiwi ti lato, i kilami David. Haeu kakak sale David ukek, ‘Nga amuke hawane David, tel nati Jesi. I aile hatapo waliko tenen pahak.’ (Sam 13:14)

²³ “Ti leili teka kahi nati David, Haeu hani teka Israel Jises, tel awaialato ti kawatan ti saun lialun ti lato, masin ti i kakawen. ²⁴ Imat ti Jises hutui puasan, Jon Baptis kakane hatesol seilon ti Israel ka laha towiahua ti saun lialun ape usiwa Haeu lehe Jon baptaisi laha. ²⁵ Ti lehe Jon hatapo puasan i hone teka seilon, ‘Amuto sokok nga aita? Nga kumahe Krais, tel amuto to atetengi. I sohotuma muhik. Masiwiaian ala i kum pon nga unauan.’

²⁶ “Amuto teka kahi nati Abraham ma teka kumahe Ju amuto lolotui Haeu, tenen

meng solian ti Jises awai kako ti kawatan ti saun lialun, Haeu hani kako hatesol. ²⁷ Teka seilon ti Jerusalem ma teka masiwi ti laha, laha kum paxai tioi Jises. Tuahé ti laha hani Jises he mini teka teleian, i hapoponowi hawane kakai teka kuluiak kakai Haeu ti lawe koko riridai na Sabat. ²⁸ Kalak laha kum tunah huan ti teleiai Jises, laha kamei Pailat ka teleiwa i.

²⁹ “Ape ti laha aile hatapo waliko ti kakai Haeu kakawen, laha hamosu tupui Jises ti he teik kros ape hana i hani he amal. ³⁰ Tuahé Haeu xahateni aliake Jises. ³¹ Ape teka seilon lato kakahiti i ti Galili hani Jerusalem, ngain kilan lato ningahi i moihin. Teka seilon ien kaxi sawatenei lawe waliko ti lato ningahiwen hani kako hatesol.

³² “Ape amili kaxi hahani amuto meng solian ie. ³³ Waliko ti Haeu kakanewen tesol tamakako ti matahaun i hapoponowi hani koko tesol kahi natulato ti i hamoiba aliake Jises. Masin ti Haeu kakawen leili pepai Salm, i ukek,

“O se Natuk. Nga kilamiwen o ailei puasak.” (Ps 2:7)

³⁴ Haeu hamoiba Jises ti matean lehe i kum mat ulea, masin ti Haeu kakawen leili pepai tel kuluiak kakaian i ukek,

“Nga aile hasolia hani amuto masin ti nga kakanewen tel masiwi David.” (Isa 55:3)

³⁵ Masin ti David kakak kapi Haeu ti i ukek, “O kum hani tel unauam solian koha leili amal.” (Ps 16:10)

³⁶ David kumahe i kakak alia i nake ti i aile hatapoia puase Haeu lokon ti i masiwi ti teka Israel, i mat ape laha tihini i kapi teka taman ti matahaun ape tupuan i koha. ³⁷ Tuahé Jises, tel Haeu hamoiba ti matean, i tai koha leili amal.

³⁸ “Aile ape pahak amuto xeu waliko ti amili kaxi hahani amuto ka Haeu oxoxi seilon ti kawatan ti lialui woulaha nake ti puase Jises. ³⁹ Wasolakaha seilon ma Haeu i kum sawi na kaha tua hong usi mewenae nauna ti Moses. Se mewenae na namilokaha xooaan ti Jises, Haeu namilo ukek kaha seilon sawisawin. ⁴⁰ Lepetawa uke waliko ti Haeu kakawen leili pepai tel kuluiak kakaian i sohot hani amuto.

⁴¹ “I ukek, ‘Teteka ti amuto mal sosoxeni nga, hongoa! Amuto ong mamata ape amuto mat nake kawatan nga hani amuto pate lialun wanen.

Amuto kum soh ti kawatan ien,

kalak na seilon nexi hahani amuto.’”
(Hab 1:5)

⁴² Ie tiliai kakai Pol. Ti ape lehe Pol ma Banabas nahih sohot he synagog, tesol seilon ien ilowi lalu alia uleama Sabat tehu toma lehe lalu kaxi ulea waliko ti lalu kakaxi.
⁴³ Muhin ti laha heisawa lotu, kilan teka laha soh kakai Pol, teka Ju ma teka kumahe Ju, laha kahiti Pol ma Banabas. Lalu kakak kapi laha ape hakui laha ti tu xox tatale ti xoxoi namilola laha hani Jises nake ti lalape soliai Haeu i hani laha tel Natun.

Pol ma Banabas nahih hani kapi teka kumahe Ju

⁴⁴ Sabat liai tehu, sikole ka hatesol seilon ti Antiock nahih hani synagog ti hongoi meng solian ti Jises. ⁴⁵ Taen ti teka masiwi ti teka Ju ningahiwa kilai seilon, namilolato i lialu ti Pol ma Banabas ape lato kak halialu kakai Pol.

⁴⁶ Tuahe Pol ma Banabas kak matut, lalu ukek, “Haeu taloma amili kaxiai meng solian ti Jises hanimu amuto teka Ju, tuahe amuto kum hong soh. Ien i kola ka amuto kumahe solian ti i tapai amuto uke tonain kapi Haeu ti tap tahi tapoan. Aile ape aope ie amili kaxi meng solian ti Jises hani teka kumahe Ju. ⁴⁷ Masin ti Haeu kakanewen tel Natun, i ukek,

“Nga kilami o hanowi xewan

ti hani lawe seilon ti xux tesol tesol
lehe o awai laha ti kawatan ti saun
lialun ti laha.” (Isa 49:6)

⁴⁸ Ti teka kumahe Ju hongoa, pate laha amuam ape laha sameni kakai Haeu. Teteka ti Haeu kilamiwen laha ukek tonain kapin ti tap tahi tapoan, laha hong soh meng solian ti Jises. ⁴⁹ Ape meng ien i sawata kakalini Antiock.

⁵⁰ Tuahe teka masiwi ti teka Ju lato hahika teka masiwi ti Antiock ma tesol hehin kumahe Ju lato lolotui Haeu ma axalato lalap. Tesol seilon ien xui teka seilon ti Antiock aile halialui Pol ma Banabas ape usi xaxawenialalu ti ien. ⁵¹ Aile ape Pol ma Banabas tapahi hepekeun ti he anele aelalu, i kola ka Haeu kum amuke teka seilon ien. Ape lalu lua hani tehu taon Ikonium.

⁵² Teka kahikahi Jises ti Antiock lato to amuam hawane ma Holi Spirit kapiti tatale lato.

14

Pol ma Banabas leili tehu taon Ikonium

¹ Ti Ikonium Pol ma Banabas nahih hani tehu synagog. Lalu kakak hetekie pohe

Haeu, aile ape kilan teka Ju ma teka kumahe Ju laha hong soh meng solian ti Jises.

² Tuahe teteka Ju laha kum hong soh, laha hahika teka kumahe Ju ti watakaiai Pol ma Banabas. ³ Pol ma Banabas to kue ien ape lalu kaxi matuke ka ti lalape soliai Haeu i hani teka seilon Jises. Haeu kola ka kakai alalu salan ti i hani lalu poh ti aile hasohotui kilan kolakol tenen lalap. ⁴ Tuahe teka seilon ti Ikonium laha tikela, teka teapaun ti teka Ju laha kum soh ti Jises ape teka teapaun ti Pol ma Banabas.

⁵ Tesol ti teka Ju ma kumahe Ju hetekie teka masiwi ti lato, lato aile namil ti aile halialui Pol ma Banabas ape hokai telei lalu pot. ⁶ Tuahe ti lalu tioiwa, lalu ox hani Listra ma Derbe, huohu taon leili Likaonia ma tesol toan melal ti taon ien. ⁷ Ti ien lalu kaxi tatale meng solian ti Jises.

Pol ma Banabas leili tehu taon Listra

⁸ Ti Pol ma Banabas Listra lalu tunahi tel seilon aen lialun. I kum nanahih lilian ti i takahan. ⁹ Ngain tehu i to hongohong ti Pol kakaxi meng solian ti Jises. Ti Pol pax sawi haniwa i, i paxai tioi ka tel seilon ien namilon xoxoan ka Jises pon haewian.

¹⁰ Ape Pol tilol hani i ukek, “O tual!” Ti i kakawa, tel seilon tit tua ape i tau nanahih.

¹¹ Ti teka kilai seilon ningahiwa waliko ti Pol aile, laha tilol ausisini ti kakaialaha Likaonian, “Hua haeu lalu sohot hanowi seilon ape mosuen kapi kako.” ¹² Ape laha axai Banabas Seus nake Seus i tel masiwi ti teka haeu laha lolotui ape Pol laha axai Hermes nake laha soh ka i tel ti kaxiai kakain. ¹³ Tahu ing ti lotuiai Seus xohixohin melal ti taon. Tel masiwi ti hukuminialaha ma Seus i atima bulmakau ti laha hahasaha palawa he kinawen, haniwa he aewingti Listra nake i ma teka seilon pahalaha aile pali hani lalu.

¹⁴ Tuahe ti Banabas ma Pol paxai tioiwa, lalu lexi puxuaulalui nake lalu watakai hawane ape lalu kiliwau hani leili teka seilon. ¹⁵ Lalu tilol ukek, “Kalahai amuto aile saun tetenen? Amili tuahe seilon masin amuto. Amili ie ti kaxi haniamuto meng solian ti Jises lehe amuto kum lotui haeu tenen kumahe salan ma kum pon hualiai seilon. Amuto lotuiai Haeu telaweh, telal i tanomi hatesol waliko ti patul, hatesol hepekeun ti itan ie ma itax ma waliko ti heihon.

¹⁶ Ti imat, Haeu hani lioi teka kumahe Ju aile usi waliko ti pahalaha. ¹⁷ Tuahe Haeu kola ka i salan nake ti soliaian i hani amuto akah ma an ti he kinemuto. I axi hapono hawane

amuto an ape i aile hamuamua amuto.”

¹⁸ Kalak tesol kakain ien, ailan wanen ti konginai teka seilon ti ailei pali hani lalu.

¹⁹ Muhin ien tesol ti teka Ju ti Antiok ma Ikonium lato tahiama ape itini namili teka seilon ti Listra hani tepaun ti lato. Laha hokai Pol pot ape itini leleterti i hani melal ti taon. Laha sokok i matewen. ²⁰ Tuahetataen ti teka kahikahi Jises nahih apuha kaliniwa Pol, i tu hahutuia ape i kahiti aliakate lato hani leili taon. Ti ngain liai tehu Pol ma Banabas lua hani tehu taon Derbe.

Pol ma Banabas alia hani Antiok tehu taon ti Siria

²¹ Ti Derbe, Pol ma Banabas kaxi meng solian ti Jises ape kilan seilon laha sohot kahikahi Jises. Muhin ien lalu alia hani Listra, Ikonium ma Antiok. ²² Lalu kokane hakui teka kahikahi Jises ape hone lato akeni kongini tataleai namil xoxoan ti Jises. Lalu ukek, “Kako tunahi kilan kawatan imat ti kako to kapi Haeu tel neiniakako lian tehue.” ²³ Ti lawe taon ien Pol ma Banabas kilami teka masiwi ti ngahatiai teka kahikahi Jises. Lalu lotu ape lalu halini hetekie an ti hualiai lotu ti lalu. Lalu kamei Haeu ti hualiai teka kahikahi Jises laha hana hatapo namilolaha hani Haeu. ²⁴ Imuh lalu luaini kotiwa Pisidia ape lalu tahia hani texux xux Pampilia. ²⁵ Ti ien lalu kaxi meng solian ti Jises leili tehu taon Perga ape imuh lalu lua tamus hani tehu taon Atalia.

²⁶ Ti ien lalu lang alia hani Antiok ti Siria, tetesol ti lalu hutui ailei puasalalu. Lokon ti imat, teka kahikahi Jises ien laha kamei Haeu hualialalu ailei puasain ti ape lalu hatapoem. ²⁷ Lalu apuhini hatapo teka kahikahi Jises ien ape lalu kaxi hatapo hatesol waliko ti Haeu hualiven lalu ailean. Tin lalu kakane lato ti sale Haeu hei aweisal hani teka kumahe Ju lehe laha soh ti Jises. ²⁸ Ape lalu to kue ien kapi teka kahikahi Jises.

15

Apuhain ti teka kahikahi Jises leili Jerusalem

¹ Tesol seilon ti Judia lato lua hani Antiok ape lato hutui hanauai teka kahikahi Jises ukek, “Amuto ailewa teik kikilam ti kotiai uli walikoumuto usiwa nauna ti Moses. Na amuto kum aile ukek ien, Haeu kum awai amuto ti kawatan ti saun lialun ti amuto.”

² Pol ma Banabas kak hapatapat kapi tesol seilon ien. Aile ape teka kahikahi Jises hakau Pol ma Banabas hetekie teka kahikahi Jises liai hani Jerusalem ti paxaiai

tesol aposel ma teka masiwi ti teka kahikahi Jises ti ingi lotu ti hasawiai teik waliko ien.

³ Ti lato lua hahaniwa xux ti Penisia ma Samaria kane Jerusalem, lato kaxi hahani teka kahikahi Jises aweisal ti teka kumahe Ju laha sohot kahikahi Jises. Tenen meng ien aile hamuamua hawane teka kahikahi Jises ien.

⁴ Ti lato tahiawa Jerusalem, tesol aposel, teka kahikahi Jises liai ma teka masiwi ti lato waxi auni lato. Ape Pol ma Banabas kaxi hatesol waliko Haeu hualiven lalu ailean. ⁵ Muhin ien teka kahikahi Jises lato tepaun ti teka Parisi lato tua ape lato ukek, “Teka kumahe Ju laha usi hatapoa hatesol nauna ti Moses. Laha ailewa teik kikilam ti kolakol ka laha seilon ti Haeu.”

⁶ Ape tesol aposel ma teka masiwi ti kahikahi Jises leili Jerusalem lato apuha ti kak paxaiai teik waliko ien. ⁷ Muhi welui kak hapatapat ti lato, Pita tule ape i ukek, “Amuto tesol akikik ahuma ti Jises, amuto tioi ka hina ngain tamusuen Haeu kilamunga, tel ti lelomuto, kaxiai meng solian ti Jises hani teka kumahe Ju lehe laha hong soh ti Jises. ⁸ Haeu tel i tioi namili hatesol seilon, i kola ka i namiloi ukek laha seilon tuah ti i hani laha Holi Spirit masin ti i hani kako. ⁹ Ti i aile teik waliko ien i kola ka laha kumahe liai tenen ti kako. Ape Haeu oxoxi laha ti kawatan ti saun lialun ti laha naake laha hana hatapo namilolaha hani Jises. ¹⁰ Aile ape amuto kum aile hahalenge Haeu! Kum hahani laha kawatan ti usiay hatesol nauna ti Moses naake tamakako ti matahaun ma puki kako kum pon usian. ¹¹ Kako soh ka ti lalape soliai Jises tel Masiwi ti kako, i awai kako ti kawatan ti saun lialun ti kako. Tin masin teka kumahe Ju.”

¹² Ti Pita kak kewa, tap tel wixiwix ape lato hong ulea Pol ma Banabas. Lalu kaxi hatapo hatesol kolakol lalap ti Haeu hualiven lalu ailean hani teka kumahe Ju.

¹³ Muhin ti lalu kak kewa, Jeims ukek, “Amuto tesol akikik ahuma ti Jises, hongoa!

¹⁴ Waliko ti Saimon Pita kakaxi, i haxewa haniwen kako ka Haeu namiloi tahane teka kumahe Ju. I huali laha ape teka ti laha sohot seilon tetan. ¹⁵ Masin ti Haeu kakawen leili pepai teka kuluiakakaian. ¹⁶ I ukek, “Imuh nga aliamma haxoxo aliakete tehu nenein ti David.

Laha aile halialuawen tuahe nga aile hasolia aliakate.

¹⁷ Nga aile ukek ien lehe teka kumahe Ju tin laha sohot seilon tetak,

teka pahalahala nga Haeu Masiwi ti laha,
teteka nga kilamiwen tetak.

¹⁸ Nga Haeu, tel nga aile hatapo tesol waliko ien,
nga kakaxi waliko ti teka seilon tioi-wen
lilian ti kuwen wanen.’’ (Amos 9:11-12)

¹⁹ Ape Jeims kak tatale ukek, ‘‘Aile ape nga namiloi ukek kako kum aile hahakawata teka kumahe Ju, teteka laha towiahu ti lialui woulaha ape usi Haeu. ²⁰ Tuahé kako tai non hani laha teik kakain ka laha kum aniani an tenen teka seilon ailewen pali hani teka haeu kumahe salan. Laha kum ailele saun lialun ti wawan hehin, laha kum ununumi kaka ape laha kum aniani xixioi manihuh tenen hina kaka leilon. ²¹ Laha aile usiwa tesol waliko ien nake lawe Sabat leili synagog ti lawe taon laha to kakaxi nauna ti Moses lilian ti kuwen. Ape na laha kum usi, laha aile halialu namili teka Ju kahikahi Jises.’’

Kakain ti hani teka kahikahi Jises laha kumahe Ju

²² Tesol aposel, teka masiwi ti kahikahi Jises ti Jerusalem hetekie teka kahikahi Jises liai lato namiloi na hakau hina seilon hani Antiock akati Pol ma Banabas. Lato kilami Judas Basabas ma Sailas, huhua seilon ti teka kahikahi Jises sasameni. ²³ Lato hakau tuaiwa lalu teik kakain i ukek,

“Amuam ti amite tesol aposel ma teka masiwi ti teka kahikahi Jises ti Jerusalem, tesol akikimuto ahuma ti Jises haniwa amuto teka kumahe Ju leili Antiock, Siria ma Sasilisia.

²⁴ “Amite hongoen ka hina seilon ti leilomite lua haniwen kapimuto ape laha aile hahataxina ma hanamiloa hakila amuto. Tesol seilon ien kumahe amite taloa. ²⁵ Aile ape amite hatesol kilami hina seilon lehe amite hakau hani kapimuto akatiwa Banabas ma Pol, huhua lohumite. ²⁶ Lalu hani hahatapo lalu ti ailei puase Jises kakal na hina kawatan ma matemate. ²⁷ Amite hakaua Judas ma Sailas lehe tin lalu kaxi hani amuto waliko ti leili teteik kakain. ²⁸ Holi Spirit hanamiloa amite ka amite kum axi papalahi kawatan hani amuto tuahue amuto aile usiwa tesol kakain ie. ²⁹ Amuto kum aniani an tenen teka seilon ailewen pali hani teka haeu kumahe salan. Kum ailele saun lialun ti wawan hehin. Kum

ununumi kaka ma kum aniani xixioi manihuh tenen hina kaka leilon. Pamu ewian na amuto kum aile tesol waliko ien. Amuam ti amite haniwa amuto.”

³⁰ Ape lato lua hani Antiock. Lato apuhini teka kahikahi Jises ape hani laha teik kakain ien. ³¹ Ti laha hongoa, laha amuam hawane nake i hakui xoxoi namilolahati ti Jises.

³² Judas ma Sailas, huhua ti kaxi ahutia meng solian ti Jises, tin lalu kak hakui xoxoi namilolahati ti Jises. ³³ Tesol seilon lato luama Jerusalem lato to teik kokol ien ape teka kahikahi Jises ti Antiock talo aliale lato hani Jerusalem. Lato ukek, ‘‘Amuam ti Haeu kapimuto.’’ ³⁴ Tuahé Sailas nanamiloi na i tilimuen. ³⁵ Pol ma Banabas tin lalu hamalum Antiock ape hetekie teka kahikahi Jises liai lato hanau kakai Haeu ma kaxi ahuti meng solian ti Jises hani teka seilon.

Pol ma Banabas selaiia

³⁶ Hina ngain tamusua ape Pol hone Banabas, ‘‘Kalu alia hani kapi teka kahikahi Jises ti lawe taonti kalu kakaxi meng solian tetan lehe kalu Paxai na namilolahati ti Jises xooaan tutuen.’’ ³⁷ Banabas pahan i waxy Jon Mak kahitrialalu. ³⁸ Tuahé Pol namiloi ukek ka kumahe pate ewi nake Jon Mak ox salili lalu ti lato Pampilia ape i tai puas akati lalu ti hatapoi puasalato. ³⁹ Pol ma Banabas lalu kak hapatapat ape lalu selaiia. Banabas waxi Jon Mak ape lalu lang hani Saiprus. ⁴⁰ Pol kilami kahitian Sailas. Imat ti lalu lua salili Antiock, teka kahikahi Jises kamei Haeu ti ngahitrialalu. ⁴¹ Ti lalu lua hahaniwa Siria ma Sasilisia, lalu kak hakukui xoxoi namili teka kahikahi Jises.

16

Timoti kahiti Pol ma Sailas

¹ Pol ma Sailas lua hani tehu taon Derbe ape imuh hani tehu taon Listra. Ti ien tel kahikahi Jises axan Timoti. Tel tinan i tin tel kahikahi Jises, i akiki teka Ju. Tuahé tel taman i akiki teka Grik. ²Teka kahikahi Jises ti Listra ma Ikonium kak sasameni Timoti. ³ Pol pahan i waxy Timoti kahitrialalu. Aile ape Pol aile hani i kikilam ti teka Ju ti kolakol ka i tel seilon ti Haeu. I aile ukek ien nake teka Ju laha toto ien laha tioi ka tel tame Timoti i akiki Grik. Na i kum aile ukek ien, teka Ju kum hong lato.

⁴ Ti Pol, Sailas ma Timoti luluawa leili taon tehu tehu, lato kaxi hani teka kahikahi Jises laha kumahe Ju waliko ti tesol aposel ma teka masiwi ti kahikahi

Jises ti Jerusalem hohone laha puas usian.
⁵Aile ape teka kahikahi Jises namilolato i xox ahe tetan ape lawe ngain kilan seilon laha soh papalahiwa teka kahikahi.

Ti Troas Haeu hanamiloa Pol kane Masedonia

⁶Pol, Sailas ma Timoti lato lua non wasole Prigia ma Galasia nake Holi Spirit lon kum al lato kaxi kakai Haeu hani teka seilon ti Asia. ⁷Ti lato meiwa texux xux Misia, lato tohongi lali na lato lua hani texux xux Bitinia tuahé Holi Spirit ti Jises kum sowini hani lato. ⁸Ape lato lua sahiwa texux xux Misia tamus hani tehu taon Troas.

⁹Ti ipong, Haeu hanamiloa Pol ningahi tel seilon ti Masedonia tutu. I kamei eliel Pol ukek, "Lua hanima Masedonia! Hualima amite!" ¹⁰Muhin ien Pol, Sailas, Timoti ma nga Luk, tel nga tai tener meng ie, amite apeas talowi ti kane Masedonia nake amite namiloi tioi ka Haeu pahan amite kaxiwa meng solian ti Jises hani teka seilon ien.

Lidia ti Pilipai sohot kahikahi Jises

¹¹Amite lang salili Troas sawi hani texux xux kokol axan Samotres. Ape ngain liai tehu amite lang hani tehu taon Neapolis. ¹²Ti ien amite non aweisal hani Pilipai, tehu taon lalap tuah ti Masedonia. Tehu taon ien hahitake teka masiwi ti Rom. Amite to hina ngain ien.

¹³Telao Sabat, amite nahih ahuta ti taon hetekie teka Ju hani tesol lawe laha lolotu pape tehu kan. Ti amite tunahiwá tesol ti na amite to, amite kakak kapi tesol hehin lato apupuha ien. ¹⁴Tel ti tesol lato hongohong amite axan Lidia. I ti tehu taon Tiatira. I tel ti hangainiai maia tenen kakai ati polun kahun pate lalap. Lidia tel ti i lolotui Haeu ape Haeu haxewa namilon lehe i hong tioi ma soh meng solian ti Jises Pol kakaxi. ¹⁵Muhin ti amite baptaiswa i ma hatesol seilon leili ingan, i ilowii amite i ukek, "Na amuto ukek nga tel kahikahi Jises, amuto nahih to hanima leili ingak." Ape salan amite to kapin.

Pol ma Sailas leili kalabus

¹⁶Ngain tehu ti amite nahih hahaniwa tesol ti tone lotu, tel hehin uluha unaui teka seilon apatuuni amite he aweisal. Spirit lialun kakapiti i ape i pon kaxiwaliko ti na i sohot imuh. I hasohotu kilan moni hani teka masiwi tetan ti kaxi haniai teka seilon liai waliko ti i sohot hani laha imuh. ¹⁷Tel

hehin kakahiti amite Pol to titiol, "Tesol seilon ie lato unaui Haeu tel Masiwi tapein. Lato kakaxi sale awaiai seilon ti kawatan ti saun lialun ti laha."

¹⁸Kilan ngain i aile saun tin tetenen ape Pol lon manomano. I tohea paxai tel hehin ape i kakane tel spirit lialun leilon i ukek, "Ti poh Jises haniwen nga, nga hone o ahutawa ti tel hehin ie." Tataen ien wanen tel spirit lialun ahuta salili i.

¹⁹Ti tesol masiwi tetan tioiwa ka aweisal ti hatanoi moniulato keitawen, lato pohi Pol ma Sailas ape lato itini lalu hani teka masiwi ti Rom ti tehu taon ien, tetesol tone apuhua seilon. ²⁰Ape lato hone teka masiwi ukek, "Huhua seilon ie lalu Ju. Lalu aile hahataxina teka seilon ti taon ti kako.

²¹Lalu hahanau teka seilon saun tenen pate i hilei saun ti kako. A amite teka Rom, lialun na amite puas usi tenen saun ien."

²²Teka kilai seilon laha apupuha ien laha huali teka sulualulu. Aile ape teka masiwi ien hone teka unauhalato lexi xaxaweniai puxui Pol ma Sailas ma hetialalu. ²³Laha heti halialu kewa lalu, laha towi lalu hani leili ingi kalabus. Ape laha hone tel peteniai kalabus peteni aluinialalu. ²⁴Tel peteniai kalabus towi lohi lalu hani tesol tone kalabus patatal wanen ape i xioti kongini aelalu wasole pata tenen kawatan.

²⁵Sai luhui ipong, Pol ma Sailas lotu ma pak hahani Haeu. Teka kalabus liai honghong lalu. ²⁶Xux i nuea hahutua ape i nuei tehu ingi kalabus. Ti lokon ien wanen hatesol kahip tua hea ape sen tua oxoxa ti teka kalabus. ²⁷Ti tel peteniai kalabus haiwa i ningahi hatesol kahip hean ape i sokok hatesol seilon ti kalabus kiliwau ahutawen. Kakanua i ahuti tea ngolun ti hile ape lehe i tapuhi aliake i. ²⁸Tuahe Pol tilol eliel ukek, "Kum tetelei o! Amite hatesol tutuen ie!"

²⁹Tel peteniai kalabus tilol hone tel liai ukek, "Kauma lul." Ape i kiliwau soh hani leili kalabus. I mamata xexex ape i lokuhu mate Pol ma Sailas. ³⁰I hakahita ahuti lalu ape i kamea, "Nga aile la lehe i pon awaiai ti kawatan ti saun lialun tetak?"

³¹Lalu pahoi i ukek, "Namilom kewa xoxoan ti tel Masiwi Jises ape i awai o ti kawatan ti saun lialun. Tin masin hatesol seilon leili ingam, aweisal tenenawé." ³²Ape lalu kaxi meng solian ti Jises hani i ma hatesol seilon ti leili ingan. ³³Kalak ape ipong kuewen, tel peteniai kalabus nuhi mange tinulalu ape lalu baptaisi i ma hatesol seilon ti leili ingan. ³⁴Muhin ien

i ilowi Pol ma Sailas hani leili ingan ape i axi analalu. I ma hatesol seilon leili ingan lato amuam hawane nake aope namilolato xooxoan ti Haeu.

³⁵ Letu ti ngain liai telao teka masiwi ti tehu taon ien lato talo tesol masiwi hahitakalato hetekie teik kakain i ukek, "Oxoxiwa lalu."

³⁶ Tel peteniai kalabus hone Pol, "Teka masiwi hakauma kakain ti oxoxiamulu ti kalabus. Ape ewi na amulu nahih. Nahih hawanenewa!"

³⁷ Tuah Pol pahoi tesol unaui teka masiwi ukek, "Laha tai hatuhi amili ti sulusulu kalak amili seilon ti hahitake ngahat ti Rom. Laha kum tunahi tenen na waliko lialun amili ailewen. Laha heti amili he puli lawe seilon ape towi lohi amili hani leili kalabus. Aope pahahaha oxoxi muneni amili. Kumahe masin ien! Puki laha nahih oxoxima amili ape hakahita ahutiwa."

³⁸ Muhin tesol seilon ien kaxi hani teka masiwi ti tehu taon ien kakai Pol. Ti lato hongoa ka Pol ma Sailas seilon ti hahitake ngahat ti Rom, lato mamata. ³⁹ Ape lato nahih hani kapi Pol ma Sailas lato ukek, "Amite tahane hawane ti amite aile saun tenen lialun hani amulu." Muhin lato ati ahuti lalu ti kalabus ape lato kamei lalu na lalu nahih salilu tehu taon. ⁴⁰ Tuah Pol ma Sailas nahih hanimu ingi Lidia. Ti ien lalu kak hakui teka kahikahi Jises lehe namilolato xox tatale ti usian. Ape lalu salili tehu taon Pilipai.

17

Ti Pol ma Sailas Tesalonika

¹ Pol ma Sailas lua akilaua huohu taon Ampipolis ma Apolonia ape tahiya hani tehu taon Tesalonika. Tehu synagog ti teka Ju ien. ² Pol nahih hani tehu synagog hanowi ti lawe i to ailele. Sabat tolulu i to kakak kapi teka Ju kakain ti he pepai Haeu. ³ I kaxi haxewa kakai Haeu ape i nexi hani lato ka hoi liai ti kuewen Haeu namiloiven ka Krais kau kawatan ma moloan ma i xahat alia ti matean. Pol ukek, "Jises, tetel nga kaakane amuto, i se Krais, Haeu taloma ti awaia kako ti kawatan ti saun lialun ti koko."

⁴ Teka ti tesol Ju lato soh kakai Pol ape lato sohot kahikahi Jises. Ape kilan teka Grik laha lolotui Haeu ma teka hehin axalahala lalap tin laha sohot kahikahi Jises.

⁵ Tuah kilan teka Ju laha hin namil lialun nake kilan seilon laha sohot kahikahi Jises. Laha apuhini teka seilon lialun ape hahika

kilan seilon ti leili taon. Laha hamana tewau kahip ti tehu ingi tel seilon axan Jason ape laha soh upia Pol ma Sailas lehe laha ati lalu hani kapi teka kilai seilon. ⁶ Tuah te laha tai tunahi lalu, laha itini Jason ma teka kahikahi Jises liai hani kapi teka masiwi ti tehu taon ien. Laha tilol ukek, "Huhua seilon Pol ma Sailas aile saun tenen hahataxina seilon ti tesol tesol. Lalu ape ie ailele saun tin tetenen!" ⁷ A Jason waxy auni lalu hani leili ingan. Lato hatesol seilon ti xaputiae kakai Sisa tel masiwi tapein ti Rom. Tin lato ukek ka tel seilon axan Jises i masiwi tapein ti kako."

⁸ Ti teka masiwi ma teka kilai seilon hon-goa, laha leng lialu hawane. ⁹ Teka masiwi akeni kongini moni lalap ti Jason ma tesol liai lehe lato kum aile ulei saun tenen i hahataxina teka seilon. Ape teka masiwi hanahi lioi lato.

Ti Pol ma Sailas Berea

¹⁰ Ipong tehu ien, teka kahikahi Jises talo Pol ma Sailas hani tehu taon Berea. Timoti tin i lua hani ien tuahe imuh. Ti lalu tahiawa, lalu nahih hani tehu synagog ti teka Ju. ¹¹ Teka seilon ti Berea lawe laha hong mataini kakai seilon, laha xoini teka ti Tesalonika. Laha hong amuke hawane meng solian ti Jises tuahe lawe ngain laha nihehi paxai pepai Haeu ti paxaiai waliko ti Pol kakak na masin salan. ¹² Aile ape kilan teka Ju, teka hehin Grik axalahala lalap ma teka Grik wawan, laha soh ti Jises.

¹³ Ti teka Ju ti Tesalonika hongoa ka Pol kakaxi kakai Haeu hani teka Berea, teka ti lato lua haniva Berea ape hahika kilan seilon aile halilaiu Pol. ¹⁴ Aile ape teka kahikahi Jises talo Pol ma teka liai laha lua akakati i hani Aten tehu taon leili texux xux Akaia. A Sailas ma Timoti hamalum Berea. ¹⁵ Ti lato tahiawa Aten, tesol akatiae Pol alia hani Berea hetekie kakaian. Pahan Sailas ma Timoti kosea haniva kapin.

Pol leili tehu taon Aten

¹⁶ Lokon ti Pol to atetengi Sailas ma Timoti Aten, tian kawat hawane ti i ningahiwa kilan haeu tenen kumahe salan laha tanomi ape lotui. ¹⁷ Aile ape leili synagog i to kakaxi meng solian ti Jises hani teka Ju ma teka Grik laha lolotui Haeu. Lawe ngain i nahih hani tesol tone apuhai teka seilon ape tin i kaxi meng solian ti Jises hani teka na laha ien.

¹⁸ Tesol seilon Epikurian ma Stoik laha teteka hanau sale totone seilon, tin laha

kak hapatapat kapi Pol. Teka ti laha ukek, “Tel seilon ie tua kak lalolal.”

Teka liai ukek, “Tanoman i kakak haeu tenen kako kum tioi.” Laha kak ukek ien nake Pol kakaxi sale puase Jises ma xahataian ti matean.

¹⁹ Laha ilowi Pol hani kapi teka masiwi ti nahikei Aten ape teka masiwi ukek, “Pahamite amite tioi waliko haun ti o hanau teka seilon.” ²⁰ Hatesol waliko ti o kakak amite tai hongohong. Pahamite tioiai salangawan.” ²¹ Pahalato lato tioi nake hatesol seilon ti Aten ma teka seilon ti xux liai laha toto ien, lawe pahalahua tua to kakak ma hongohong waliko haun teka seilon kakaxi.

²² Pol tule ape i ukek, “Amuto teka seilon ti Aten, nga tioi hawane amuto seilon ti lotu.” ²³ Ti nga tau nanahih leili taon ti amuto, nga ningahi kilan wanen waliko ti amuto lolotui. Tin nga tunahi tesol tone hanai pali hina kakain taian ien i ukek, ‘Hani haeu teneten ti kaha kum tioi.’ Aope nga kaxi hani amuto tel Haeu amuto tua lolotui tuahue amuto kum tioi i.

²⁴ “Haeu tetel i tanomi hatehu pon itan ie ma hatesol waliko ti heihon. I tel Masiwi ti hatesol waliko ti patul ma itan ie. Kumahe totongan leili ing ti seilon atai lotuian. ²⁵ Ape teka seilon kumahe laha puas tetan nake i pahan huhual. I tetel i hani seilon hanawain ma lawe waliko liai. ²⁶ Imat Haeu tanomi seilon tel ape tel ien i hanatua seilon tenen tenen ti hatehu pon itan ie. Puki Haeu namiloien tetesol ti na laha to ma lokon ti laha takah ma mat.

²⁷ “Haeu tanomi seilon lehe laha haeliel hawane ti tioi aluinian. A Haeu kumahe xauxaun kapi kaha tel tel. ²⁸ Ti pohe Haeu kaha puki masin ti i namiloien. I axi hanawaiakahma hakui kaha ailei puasain. Tel ti amuto teka taiai kakain i kakak sale tesol waliko ien. I ukek, ‘Kako hatesol nonoma ti Haeu.’ ²⁹ Na masin ien, kaha kum namiloi ukekek ka Haeu masin waliko ti tel seilon tanomi ani pata ma na pot.

³⁰ “Ti imat Haeu kum axi kawatan hani teka seilon ti lialui woulaha nake laha kum tioi Haeu. Tuahue aope ie, i hone eliel hatesol seilon ka kaha towiahua ti lialui woukaha ape hong usiwa kakaian. ³¹ Haeu kilamiwen ngain telao ti tel Natun hiniti hatesol seilon ape hinitian tetan sawisawin. Haeu kola ka tesol waliko ien salan ti i xahateni aliake tel Natun ti matean.”

³² Ti laha hongoa ka Pol kakaxi sale xahateniai seilon maten, teka ti laha soxeni i tuahue teka liai lato ukek, “Pahamite amite hong ulea tenen meng o kakaxi.” ³³ Ape Pol nahih salili tehu apuhain ien. ³⁴ Teka ti laha hong soh kakai Pol ape i hanau aheke lato. Leilolato Daionisius tel ti teka masiwi ti Aten, tel hehin axan Damaris ma hina seilon liai.

18

Pol leili tehu taon Korin

¹ Muhiin ien Pol salili Aten ape i lua hani tehu taon Korin, i tin leili texux xux Akaia.

² Ti ien i apatuini tel Ju axan Akila i takah texux xux Itali hetekie tel axoan Prisila nake Klodius, tel masiwi tapein ti Rom, i talo xaxaweni teka Ju ti Rom. ³ Ape Pol heuta ma puas kapi lalu. Lato hatolu ha-puasa uli manihuh tanomiai houha ape lato hangaini ti waxenialato.

⁴ Lawe Sabat Pol nahih hani leili synagog. I tohongi itiniasi namilii teka Ju ma teka Grik lehe laha soh ti Jises. ⁵ Ti Sailas ma Timoti tahiama ti Masedonia, Pol pupuasan ape mewenae kaxi ahutiai meng solian ti Jises. I kaxi haxewa hani teka Ju ka Jises se Krais tel Haeu taloma. ⁶ Ti lato kak pahoii ma kak halialua i, Pol tapahi xaxaweni hepekeun ti tehu puxuaun. Ien i kola ka Haeu kum amuke lato. I ukek, ‘Kumahe nakek na Haeu axi amuto kawatan ti amuto kum hong soh kakaiak. Tataen ti aope ie nga nahih hani kapi teka seilon kumahe Ju ti kaxi ahutiai meng solian ti Jises hani laha.’

⁷ Ape i sos hani tehu ingi tel seilon axan Titius Justus. I kumahe Ju tuahe i lolotui Haeu kapi teka Ju. Ingan kapi tehu synagog. ⁸ Krispus, tel ti teka masiwi ti tehu synagog, i sohot kahikahi Jises hetekie hatesol seilon ti lohe ingan. Kilan seilon ti Korin tin laha hong soh meng solian ti Jises ape laha uke baptais.

⁹ Ipong tehu Haeu kakane Pol ukek, “Kum maamata! Kaxi tatalewa kakaiak ma kum aile lilioi. ¹⁰ Nga lawe kapim, tap tel pon aile halialuan nake ti leili tehu taon ie kilan seilon tetak.” ¹¹ Aile ape Pol to ien ahang tehu tewaok. I hahanau teka seilon kakai Haeu.

¹² Lokon ti Galio tel neiniai texux xux Akaia, teka Ju aile namil teikawe ape lato akeni kongini Pol. Lato ati i hani Galio lehe i tu ti sulusulu. ¹³ Lato ukek, “Tel seilon ie i

lungei teka seilon ti lotuiai Haeu ti aweisal tenen i xaputi nauna ti teka masiwi ti Rom.”

¹⁴ Pol lehe i kak tuahe Galio tua kakanewa teka Ju i ukek, “Na hina waliko pate lialun i ailewen, se liai pupuasak ti hongoamuto teka Ju.” ¹⁵ Tuahe ie se kakain ti he wawatak, kakain ti ax tenen tenen ma nauna ti amuto teka Ju. Puki alia amuto kak hasawiwa. Nga kumahe hongoi meng ti waliko tenen ien.”

¹⁶ Ape i talo xaxaweni lato hatesol ti tone hongoi meng. ¹⁷ Ti lialui lolato kakanua lato akeni pohi Sostenes tel masiwi ti synagog ape xai i mate Galio tuahe Galio kum nam waxi.

Pol alia hani tehu taon Antioik leili Siria

¹⁸ Pol to kapi teka kahikahi Jises ti Korin ape imuh i hetekie Akila ma Prisila lang salili laha hani texux xux Siria. Imat ti lato lang salili tehu taon Kenkeria, Pol uluhui ukun i kola ka i hatapoен puasaan leili Korin ti i tuoha hanahi Haeu. ¹⁹ Ti lato hasungawa Epesus, Pol nahih salili Prisila ma Akila. I nahih hani tehu synagog ape i kakak kapi teka Ju sale puase Jises. ²⁰ Teka seilon kamei i na i to ahemu kapi lato tuahe i ukek kumahe. ²¹ Tuahe i hone lato, “Na Haeu pa-han, nga alia hanima kapimuto imuh.” Ape i lang salili Epesus. ²² I hasunga hani tehu taon Sisaria. Ti ien i lua hani Jerusalem paxaiai teka kahikahi Jises. Ape imuh i lua hani tehu taon Antioik.

²³ I to teik kukunun ien ape i lua hani huoxux xux Galasia ma Prigia. I kak hakui teka kahikahi Jises lehe laha puas usi tatale kakai Haeu.

Apolos leili Epesus ma Akaia

²⁴ Lokon ien, tel Ju axan Apolos i luama tehu taon Aleksandria leili Igip hani tehu taon Epesus. I seilon tenen solian ti kakain ma pate i tioi kakai Haeu. ²⁵ Laha hanauen i sale aweisal ti Jises. I amuam hawane ti kaxiai sale puase Jises ma kakaian pate salan. Tuahe i tioi mewenae baptais ti Jon ailele. ²⁶ Lawe i kaxi matuke leili synagog. Ti Prisila ma Akila hongoa kakaian, lalu waxy i hani tonalalu ape hanau aheke i sale aweisali Jises.

²⁷ Imuh Apolos namiloi na i lua hani texux xux Akaia. Teka kahikahi Jises ti Epesus lato kak haxxo i ape lato tai teik kakain hani teka kahikahi Jises ti Akaia kameialato ti waxy aumun. Ti Apolos tahia haniva Akaia, huhual lalap i hani teka seilon laha soh ti Jises nake ti lalape soliai Haeu. ²⁸ Ti i kak he hapatapat kapi teka Ju, kakaian xoini

kakaialaha. I uke kakain ti he pepai Haeu ti nexi hanialaha ka Jises se tel Krais Haeu taloma.

19

Ti Pol Epesus

¹ Ti Apolos leili tehu taon Korin, Pol luan noona Galasia ma Prigia ape i tahia hani tehu taon Epesus. Ti ien i tunahi teka seilon laha soh ti Jises. ² Ape i kamei laha, “Ti amuto sohoa ti Jises, nakon amuto ukewen Holi Spirit ti kapitiamuto?”

Laha pahoi ukek, “Tin liai amite tai hong na hina Holi Spirit.”

³ Pol kamei laha, “Lehe baptais tenen lahan amuto ukeke?”

Laha pahoi ukek, “Baptais ti Jon.”

⁴ Pol ukek, “Jon baptaisi teka laha towiahu ti saun lialun ape laha usi Haeu. I hone teka seilon ti Israel ka laha sohoa ti Jises, tetel i tahiamu muhin.”

⁵ Ti laha hongoa ien, laha uke baptais ti hahitake axe Jises Krais. ⁶ Pol hana minan patul ti laha ti lotu hualialaha ape Haeu hani laha Holi Spirit. Tataen ien laha lotui Haeu ti kakain ti laha tai hanau ma tin laha kului kakai Haeu. ⁷ Mongohualaha sai huopanum hua.

⁸ Ti leili pangapang tolulu, Pol lawe i nahih hani synagog. I kak matuke ahutiai meng solian ti Jises ape i tohongi itiniasi namili teka Ju ti sale nenein ti Haeu. ⁹ Tuahe teka ti lato hong watakai hetekie namil ti kakapax. Ape lato kak halialu sale aweisali Krais. Aile ape Pol nahih salili lato. I hakahita teka kahikahi Jises hani tehu ingi Tiranus, ing ti hanau teka seilon. Ti ien, lawe ngain i kakak kapi teka kahikahi Jises ti sale nenein ti Haeu. ¹⁰ Ti leili ahang huohu i kaxi ahuti meng solian ti Jises hani teka Ju ma teka kumahe Ju laha toto leili texux xux Asia. Ape kilan ti laha hong soh kakaian.

Tesol nati Skeva

¹¹ Haeu hani Pol poh ti ailei waliko tenen lalap wanen. ¹² Aile ape kalak maia ti Pol hapuasawen laha waxy ape hani teka tinun ma teka ti spirit lialun kapiti hahalialu. Ape teka tinun laha ewi ma spirit lialun ox salili teka seilon lato kapiti hahalialu.

¹³ Tesol ti teka Ju, ti lato lua hani tesol tesol, lato hapuasa axe Jises tel Masiwi ti xaxawenai spirit lialun ti seilon. Lato hone teka spirit lialun ukek, “Ti pohe Jises, tetel Pol kakaxi, amuto ahutawa!” ¹⁴ Tepanim hua hatotalin, nati Skeva tel masiwi tuah

ti hukuminiai Haeu ma seilon, lato ailele tenen saun ien.

¹⁵ Telao tel spirit lialun kak pahoi lato ukek, "Nga tioi Jises ma Pol, a amuto aita?" ¹⁶ Tel seilon spirit lialun kapiti halialu, i leng hilei hatotalin ape itini lexi puxualato. Lato kiliwau salili i, tinulato mangein.

¹⁷ Hatesol teka Ju ma teka kumahe Ju laha toto Epesus, laha mamata hawane ti laha hongoa waliko ti i sosohot ape laha sameni hawane axe Jises tel Masiwi. ¹⁸ Kilan ti teka laha soh ti Jises, lato kaxi ahuti saun lialun ti lato ti taxingi seilon. ¹⁹ Teka lato hapuasa pohe Satan ti ailei waliko tenen lalap, lato kau apuhini pepa ti hanaualato ailei tesol waliko ien. Kalak kahi tesol pepa ien pate lalap, lato lui ti puli lawe seilon nake ape lato soh ti Jises. ²⁰ Aile ape ti kui pohe Haeu, meng solian ti Jises sawat hani kilan seilon.

Teka seilon kak hilehil leili Epesus

²¹ Muhin ien Holi Spirit hanamiloa Pol alia hani Jerusalem nonoa xux ti Masedonia ma Akaia. Pol hone teka kahikahi Jises ukek, "Muhin ti na nga heisawa Jerusalem, nga kane Rom." ²² Ape i talo hua huanal Timoti ma Erastus hani Masedonia nake i to ahemu teik leili texux xux Asia.

²³ Ti lokon ien hina kawatan lalap soso-hot leili Epesus nake hina seilon laha kak halialu aweisali Krais. ²⁴ Tenen kawatan ien Demetrius hutui. I tel seilon ti tanomi ukenei teka ing nameniai tel haeu hehin axan Artemis teka Grik lolotui. I ma tesol puase kapin lato uke silva ti tanomi ukenei tetesol ing ape lato hasohotu hakila moni ti lato hangaini. ²⁵ I tiloi teka puas akatan ma teka laha ailele puasain hanowi ti lato ape i ukek, "Amuto tioi ka moniukako tenen puasain ie hasohotu." ²⁶ Ape puki amuto papaxai ma hongohong waliko ti Pol ailele leili Epesus ma tin leili lawe toan ti Asia. I kak hahataxina kilan seilon ka waliko ti kako tanomi ani min kumahe haeu tenen salan. ²⁷ Na Pol aile tatale tenen puasain ien, teka seilon kak halialu tenen puasakako ape laha ukek ka Artemis ma tehu ing ti lotuian ape kumahe tuah. Ape Artemis, tetel ti kilan seilon ti Asia ma tehu pon itan ie to lolotui, axan i taxix."

²⁸ Ti teka seilon hongoa teik kakain ien, laha leng hawane ape tilol ausisini, "Kumahe! Artemis tel ti kako Epesus lolotui, axan lalap wanen!" ²⁹ Laha hahika teka seilon liai. Ape kilan seilon laha kiliwau

itini lungei Gaius ma Aristakus, huhua lua akatiai Pol, hani tesol tone apuhain. ³⁰ Pol pate pahan i kakane teka seilon tuahe teka kahikahi Jises kongini, uke laha aile halialu i. ³¹ Teka masiwi lawe Pol ti texux xux Asia, lato hakouta kakain kamei eliliei i ka i kum kokola kawan hani leili tesol tone apuhain.

³² Lokon ien leili tesol tone apuhain, kilan seilon laha tataxini. Teka ausisini tenen, teka ausisini tenen nake kilan ti laha kum tioi salangawe apuhain. ³³ Ape teka Ju hone lungei Aleksanda i tel ti lato na i kakane laha ien. Aleksanda tulini minan lehe i kak haxewa hani teka seilon waliko ti i sosohot. ³⁴ Tuahie ti laha paxai tioiwa ka i tel Ju, laha hatesol ausisini ukek, "Artemis ti kako Epesus i pate tuah wanen!" Sai aua huohu laha tua to ausisini ukek ien.

³⁵ Imuh tel ti teka masiwi ti Epesus hamonga laha, i ukek, "Teka akikik! Hatesol seilon tioi ka kako teka Epesus aunini tehu ing ti lotuiai Artemis ma tehu pot hina hosaua ti i putalih he maun. ³⁶ Hatesol seilon tioi ka waliko ie salan wanen. Aile ape amuto hamalumua ma kum aile saxohuxoh waliko. ³⁷ Amuto hakahitama huhua seilon ie kalak lalu tai xuina waliko ti leili ing ti lotuiai Artemis ma tai kak halialu i. ³⁸ Na Demetrius ma teka puas akatan hina kakain ti sulualulu, kaha hina teka masiwi ti xux ma teka hongoi meng. Lato haniwa lalu he mini teka masiwi ti hasawian. ³⁹ Na hina kakain liai ti sulusulu, tin haniwa he mini teka masiwi ti hasawian. ⁴⁰ Nga namiloi ukek ka teka masiwi ti Rom sului kako ti saun tenen ti amuto ailele nake tap tutuhan." ⁴¹ Muhin ien i hatapo tehu apuhain.

20

Pol lua hani Masedonia ma Akaia

¹ Hina ngain tamusua, Pol apuhini teka kahikahi Jises hani kapin. I kak haxoxo tapeini lato ape i lua hani texux xux Masedonia. ² Ti ien i kak hahaxoxo teka kahikahi Jises ti toan tewau tewau. Ape muhin i tahia hani Akaia. ³ Ti ien i to pangapang tolulu. I apepeas na i lang hani texux xux Siria tuahe i upia tunahi ka teka Ju namiloi hahalialu i. Aile ape i noseni i non hani Masedonia tamus hani Siria.

⁴ Hina seilon kukuoxi Pol. Lato se Sopater nati Pirus ti Berea, Aristakus ma Sekundus ti Tesalonika, Gaius ti Derbe, Tikikus ma Tropimus ti texux xux Asia ma Timoti. ⁵ Tesol seilon ien langawen imat hani

Troas ape lato atetengi amite, nga Luk ma Pol mela. ⁶ Muhi tehu Pasova, amite lang salili Pilipai leili Masedonia. Ngain tepanim imuh amite takana hani Troas ape amite to puasain tehu ien.

Pol hamoiba Utikus

⁷ Tehu ngain ti nameniai xahatai Jises, amite tesol kahikahin hukuma ti aniai bret. Muhi ien Pol kakak kapi teka seilon sale puase Jises atengi taen luhui ipong naake ngain liai telao pahan i salili lato. ⁸Kilan kamaamite leili ing patul ti amite apupuwa. ⁹Leilon ti Pol kakak tutuen, tel seilon uluha axan Utikus i toto he pax ti palaen, pulan lihi eliel ti momoi kamaamite. Ti i matih luhua i putalih patul ti tehu ing toluke hani itan. Ti laha lautiwa Utikus, i se maten. ¹⁰Tuahe ti Pol mos haniwen itan, i tuole akeni aumi Utikus ape i ukek, “Kum tatahane, i moih alaiwen!” ¹¹Pol soh alia hani leili ing teke patul ape lato hatesol ang hukuma. I kak kue hawane kapi lato atengi ti ape i nitini. Muhi ien i nahih salili lato. ¹²Teka ngahatiai Utikus lato hakahita i hani tonan. Pate lato amuam hawane nake i moih alia.

Pol kakane teka masiwi ti teka kahikahi Jises ti Epesus

¹³ Pol nahih non aweisal hani tehu taon Asos. A amite lang ani waian atengi i hani ien. ¹⁴Ti ape i tahiha hanima kapimute, amite hatesol lang hani tehu taon Mitilini. ¹⁵Ti ngain liai telao amite lang sahi texux xux kokol axan Kios. Telao ngain imuh amite lang sahi texux xux kokol axan Samos ape ti ngain liai telao ulea amite takana hani tehu taon Miletus. ¹⁶Pol namiloiven ka amite kum takana Epesus lehe i kum hatalia amite nake i haxehax ti tahiha hani Jerusalem ti telao ngain ti Pentekos.

¹⁷Tuahe taen amite tahiama Miletus, Pol hakau kakain hani Epesus kameiai teka masiwi ti teka kahikahi Jises na i tengeni lato Miletus. ¹⁸Ti lato tahiawa, Pol hone lato, “Amuto tioi sale totonak ma wouk ti nga kapimuto, hutuimai telao ngain nga tahiama texux xux Asia. ¹⁹Nga teheni nga ti ailei puase Haeu hetekie tatahan tetak hani seilon liai kalak teka masiwi ti teka Ju aile axi nga kawatan tenen tenen. ²⁰Amuto tioi nga tai puluhini teik na kakain tenen i pon hualiamuto. Nga hahanau amuto sale puase Jises leili kilan seilon ma ti ingi tel tel. ²¹Nga hahanau teka Ju ma teka kumahe Ju tenenawe ti nga kakane laha ka laha

towiahua ti lialui woulaha ape usiwa Haeu ma sohoa ti Jises tel Masiwi.

²²“Ti aope ie, Holi Spirit hanamiloa eliel hawane nga kane Jerusalem. Nga kum tioi waliko tenen na i sohot hani nga ien.

²³Tuahe Holi Spirit hahongo nga leili lawe taon ti nga tahiawa ka kalabus ma kawatan tenen tenen atetengi nga. ²⁴Nga soh ka totonak tuah mewenae na nga aile hatapo puasain tenen Jises haniwen nga. I pahan nga kaxi sawateniwa sale lalape soliaian ma wawahen ti Haeu ti i hani kaha Jises, tel awaiakaza ti kawatan ti lialui woukaha.

²⁵“Nga tioi ka tap tel ti amuto, teteka ti nga kaakane sale nenein ti Haeu, po ningahi ulea nga. ²⁶Ti aope ie nga kakane hawane amuto, na tel seilon i uke kawatan ti Haeu nake ti lialui woun, kum titieni nga.

²⁷Nga tai pupuluhini lawe waliko ti Haeu pahan amuto tioiwa ma ailewa.

²⁸“Ngahati aliakewa amuto ma teka seilon Holi Spirit hanawen hahitake au-nian ma nenein ti amuto. Lato sohot seilon ti Haeu nake tin Jises mat kahuiai lialui woulato. Ngahati hanowiwa ti tel seilon ngahati sipsip. ²⁹Nga tioi hawane ka muhin ti na nga saliliwa amuto, teka woinakon hanaui kakai Haeu laha tahiha hanima kapimuto masin sinen tenen tumun kalimen. Laha haeliel halialui teka seilon ti Haeu lehe lato kum usi kakain salan tetan. ³⁰Puki alia teka ti amuto laha hulo towiahukakai Haeu itiniae teka seilon tetan usiai kakaialaha. ³¹Aile ape lepe-teniwa teka seilon ien. Nameniwa waliko ti lawe nga to hahanau amuto leili ahang tolulu ma telui lok ti amuto.

³²“Aope nga hana amuto hahitake ngahat ma nenein ti Haeu. Nameniwa ka ti lalape soliai Haeu ma wawahen tetan, i hani kako meng solian ti Jises. Ape teka ti amuto laha hani hatapo tupualaha ailei puase Haeu, kakaian i pon hakuialaha ape kahulaha solian i hani laha ti leili tonan.

³³“Tiliai kakaiak, nga liai kumahe pahak moni ma na maia ti amuto. ³⁴Amuto tioi ka nga hatano moni ti puki minak ma tin nga huhuali teka seilon kapik. ³⁵Ti lawe waliko nga aile, nga kola hani amuto ka mewenae na kaha puas eliel kaha pon hualiae teka tap kuilaha. Nameniwa kakai Jises ti i ukek, ‘Pamu amuam lapl na amuto hani, i xoini ti na amuto uke.’”

³⁶Ti i kak hatapoa, i lokuha ape i lotu kapi lato. ³⁷Lato akeni aumi Pol ape lato hatesol

tang nake ape i salili lato.³⁸ Pate lato tahane nake i ukek ka lato kum ningahi ulea i. Ape lato nahih tapeini amite hani he tea waian.

21

Pol kane Jerusalem

¹ Ti amite lang saliliwa lato hani texux xux Kos, lomite i tel. Ti ngain liai telao amite tahia haniwa texux xux kokol axan Rodes ape lang ulea hani tehu taon Patara.

² Ti ien amite ku soha he tea waian liai kane texux xux Penisia leili Siria.³ Ti amite langalang amite ningahi texux xux Saiprus ape amite lang non sai haiup hani tehu taon Taia ti Siria. Amite takana ien nake laha tiheli hina angah.

⁴ Ti ien amite paxai ngah teka kahikahi Jises ape amite to kapi lato puasain tehu. Holi Spirit kak hatakei hani lato waliko ti na i sohot hani Pol ape lato hahongo i ka i kum lua hahani Jerusalem.⁵ Tapeini ngain ti puasain tehu ien, amite nahih alia hani he tea waian. Hatesol kahikahi Jises hetekie tesol axoaloat hehin ma natulato nahih tapeini amite. Ti ien, amite hatesol lokuha ape amite lotu.⁶ Lotu kewa amite kak tapeini lato ape amite nahih ku hani heiwi tea waian. Ape lato nahih alia hani tonatalo.

⁷ Amite lang tatale hani tehu taon Petole-mais. Ti amite hasungawa, tin hina teka kahikahi Jises ien ape amite to lawai lato ti ngain tehu.⁸ Ngain liai telao amite ku salili lato ape amite takana hani tehu taon Sisaria. Ti ien amite to kapi Pilip, tel ti ahutiae meng solian ti Jises. I tin tel ti tepanim huhua seilon ti ailei puasain ti seiai waliko ti huuhal, ti laha kilami leili Jerusalem.⁹ Natun hehin hinalo lato tai sal, lato teka ti kuluiak kakai Haeu.

¹⁰ Muhi hina ngain ti amite toto ien, tel seilon axan Agabus i tahiama ti Judia. I tin tel kuluiak kakai Haeu.¹¹ Ti i nahima paxai amite, i waxy teik tahe Pol ape i xinoti aliake puki minan ma aen ape i ukek, "Holi Spirit i ukek, 'Tin masin tel seilon tahan teteik tah, teka masiwi ti teka Ju ti Jerusalem xinoti ape laha hangaini hani teka seilon ti Rom.' "

¹² Ti amite hongoa, amite ma teka kahikahi Jises ti tesol ien, amite hatesol kamei eliel Pol ka i kum lua hahani Jerusalem.

¹³ Tuah Pol ukek, "Kalahai amuto tangixi nga ma tohongi sohiai namilok? Nga hean wanen kumahe mewenae na nga kalabus leili Jerusalem tuahe hetekie na nga mat ti

ailei puase Jises tel Masiwi."¹⁴ Amite kum pon towiahui namili Pol ape amite ukek, "Tiliwen Haeu aile haseleni pupuasan."

¹⁵ Muhin ien amite apeseni soxiamate ti kane Jerusalem.¹⁶ Teka ti kahikahi Jises leili Sisaria lato hakahita amite to kapi Menason ti tehu luaiamate ien hani Jerusalem. Menason i tel akiki seilon ti texux xux Saiprus ma i tel kahikahi Jises lilian ti imat wanen.

Pol kakak kapi teka kahikahi Jises leili Jerusalem

¹⁷ Ti amite tahia haniwa Jerusalem, teka kahikahi Jises pate lato amuke ma waxi auni amite.¹⁸ Ngain liai telao amite ma Pol nahih paxai Jeims ape hatesol masiwi ti teka kahikahi Jises ti Jerusalem tin lato tahiama.¹⁹ Pol tengeni lato hatesol ape i kaxi nexi hatapo waliko ti Haeu hualiwen i ailean hani teka kumahe Ju.

²⁰ Ti i kak kewa lato hatesol kak sameni Haeu. Tuah lato ukek, "Tel akikimite ahuma ti Jises, kilan kilan wanen teka Ju laha sohot kahikahi Jises. O tioi ka laha hani hahatapo namilohala usiai nauna ti Moses.

²¹ Tuah laha hongoen ka o to hahanau hatesol Ju, laha toto xuxi teka kumahe Ju, ka laha lioiwa nauna ti Moses. Laha ukek ka o hone laha kum ailele teik kikilamti kotaia uli walikoi natulaha wawan masin kolakol ka laha seilon ti Haeu. Tin laha ukek ka o hone laha kum usiusi saun liai ti kako teka Ju.²² Liai laha tioi ka o tahiawen. Kako namiloi upia tewau aweisal lehe laha Paxay tioi ka o usiusi nauna ti kako teka Ju.

²³ "Amite tenen namil. Hinalo seilon ie lato kak tuoha haniwen Haeu.²⁴ Nahih kahitiwa lato hani tehu Ingi Haeu ape hukumawa kapi lato ti ailei saun ti haunihamuto ti puli Haeu. Ape kahuiwa ti uluhiai patulato masin kolakol ka lato aile hapoponowi hawanewen tutuoh ti lato hani Haeu. Na o aile ukek ien, hatesol seilon paxai tioi ka kumahe salan waliko ti laha hongoen pake o usiusi nauna ti Moses.²⁵ Tuah teka kahikahi Jises laha kumahe Ju, amite kaxi haniwen laha namilomite leili teik kakain. Amite taiwen ka laha kum aniani an tenen teka seilon ailewen pali hani teka haeu kumahe salan. Laha kum ailele saun lialun ti wawan hehin, kum ununumi kaka ma kum aniani xixioi manihuh tenen hina kaka leilon."

²⁶ Ape Pol aile usi teik namilato. Ngain liai telao i hukuma hani kapi tesol hinalo seilon ti aile haunialato usiwa saun ti teka Ju. Muhin ien Pol nahih hani tehu Ingi

Haeu ape i hahongo teka hukuminiai Haeu ma seilon ka muhi ngain tepanim huohu lato kau huok manixux hani Haeu ti kolakol ka tutuoh ti lato hani Haeu ape tapein.

Laha xoti Pol

²⁷ Ti ngain tepanim huohu sikole i tapo, teka Ju akiki texux xux Asia lato ningahi Pol leili Ingi Haeu. Lato hahika teka kilai seilon ape laha akeni pohi Pol.

²⁸ Ape laha tilol, "Seilon ti Israel! Hualima amite xotian! Tel seilon ie i tel ti lawe i nahih tapai tesol tesol hahanau seilon watakai seilon ti Israel ma nauna ti Moses hetekie tehu Ingi Haeu ie. Ape tin i hakahita teka seilon kumahe Ju hani Ingi Haeu ape aile haloloa." ²⁹ Laha kak ukek ien nake laha ningahi Pol kapi Tropimus, tel kumahe Ju ti Epesus, leili Jerusalem ape laha sokok ka Pol hakahitawen i hani Ingi Haeu.

³⁰ Hatesol seilon leili Jerusalem leng hawane ape laha kiliwama tesol tesol. Laha itini ahuti Pol ti Ingi Haeu ape kakanua laha keiti kahip. ³¹ Teka kilai seilon ien laha to-hongi teleiai Pol tuahé kakain tħażżej tamus hani Klodius tel masiwi ti hile ti Rom ka hilehile i sosħot leili Jerusalem. ³² Kiliwan wanen i waxy teka seilon ti hile ma teka masiwi hahitakape ape lato kiliwau kosea hani kapi teka laha apupuha. Ti teka kilai seilon ningahiwa lato, laha monga xaiāi Pol.

³³ Ape tel masiwi Klodius xoti Pol. I hone teka unauan ka lato kewa huaik sen xinot i konginian. Ape i kamei teka kilai seilon, "Aita tel seilon ie? I ailewen waliko la?"

³⁴ Teka ti laha tiloma tenen, teka liai tiloma liai tenen. I kum pon tunahiai kakain salan nake pate laha wiliwilja ma laha hahataxina aliak laha. Aile ape i hone teka unauan atiāi Pol hani tehu ing tone teka seilon ti hile. ³⁵ Lato tai nahih xau ape teka seilon leng eliel ahe. Aile ape ti awaiai Pol, teka seilon ti hile lauti kau i. ³⁶ Teka seilon to nahih usiusi Pol ape tilol ausisini, "Teleiwa i! Teleiwa i!"

³⁷ Ti teka seilon ti hile lehe hasoho Pol hani leili ing, Pol kamei tel masiwi Klodius i ukek, "Ewi na nga kaakamu kapim?"

Ti tel masiwi hongoa, i ong tilol ukek, "O se o kakak kakai Grik!" ³⁸ Nga sokok o tel seilon ti Igip, tetel i neini teka seilon hil pahoiai teka Rom ape i hakahita 4,000 seilon tuaun hani lohong tesol ti laha toto."

³⁹ Pol kak pahoi, "Kumahe! Nga tel Ju ti Tarsus leili Sailisia, tehu taon lalap tuah. Ewi na nga kakane teka seilon ie?" ⁴⁰ Ti tel masiwi sowini haniwa Pol, i tu patul lehe laha ningahi i. I tulini minan lehe i kak. Ti teka kilai seilon kak mongawa, Pol hutui kakaialaha.

22

Pol kakane teka kilai seilon

¹ Pol ukek, "Amuto teka akikik, teka masiwi ma teka lokok, hongoa kakain ti ape nga kaxi nexi hani amuto waliko ti i sohotuen." ² Ti laha hongoa i kaakane laha ti puki kakaialaha, laha hamalum hawane ape Pol hutui kakaian.

³ "Nga tel Ju ti Tarsus leili Sailisia tuahē nga lap ie leili Jerusalem. Gamaliel tel i hanau hatapo nga sale nauna ti teka tamakako ti imat ape nga hani hatapoen kuik ailei puase Haeu masin ti amuto. ⁴ Imat nga aile halilu teka seilon laha usiusi aweisali Krais ape teka, laha telei. Nga xoti wawan ma hehin. Nga xioti laha ani sen ape hana hani kalabus. ⁵ Tel masiwi tapein ti hukuminiai Haeu ma seilon ma hatesol masiwi liai pon kaxi haniamuto ka kakaiax salan. Nga kema pas ti lato haniae teka masiwi ti tesol synagog leili Damaskas, i kaxi ka nga pon xotiai teka kahikahi Jises ape hakahita kalabusialaha hani Jerusalem.

⁶ "Ti nga lua xohi hahaniwa Damaskas, ti lape ngain teik xewan ahuma he maun i xeu hahutuia kakalini nga. ⁷ Nga put hani itan ape nga hong tenen kinax kakane nga ukek, 'Sol, Sol, alahan o to aile hahalilu nga?'

⁸ "Ape nga kamea, 'Tel masiwi, o aita?'

"Ape i pahoi ukek, 'Nga Jises ti Nasaret, tetel o to aile hahalilu.' ⁹ Tesol seilon kapik lato ningahi teik xewan, tuahe lato kum hong kinaxe tel seilon i kakak.

¹⁰ "Nga kamei i, 'Tel Masiwi, kaie nga aile la?'

"Ape tel Masiwi hone nga, 'Xahatawa, nahih tamus haniwa Damaskas lehe ape o hong waliko tenen na o aile.'

¹¹ "Teka seilon kapik akeni minak ape hakahita nga hani Damaskas nake teik lalape xewan hapulaxa pulak. ¹² Ti leili tehu taon ien, tel seilon axan Ananias. I tel seilon ti usi hawanei nauna ti Moses ma hatesol teku Ju leili Damaskas laha sameni i. ¹³ I nahih tu hanima kapik ape i ukek, 'Sol, tel akikik Ju, nga kakane o, paxapax aliawa!'

Tataen ien wanen, nga paxapax alia ape nga ningahi i.

¹⁴“Ape Ananaias kakane nga ukek, ‘Haeu tel Masiwi ti kako ma ti teka tamakako ti matahaun i kilamiwen o lehe o tioi waliko ti i pahan ma lehe o ningahi Jises tel unauan sawisawin ape hong hawane kakaiyan. ¹⁵Ape o kaxi sale puase Jises hani lawe seilon, waliko ti o ningahiwien ma hongoen. ¹⁶Kum talitalia. Haxoxoa namilom haniwa Jises ape nga baptaisi o hahitake axan lehe Haeu oxoxi o ti kawatan ti lialui woum.’

¹⁷“Ti nga nahih alia haniwa Jerusalem ape nga lolotu leili Ingi Haeu, Holi Spirit hanamiloa nga ningahiai Jises. ¹⁸Jises hone nga, ‘Salili koseniwa Jerusalem nake teka seilon ie laha kum hong soh na o kaxi nga hani laha.’

¹⁹“Nga kak pahoi ukek, ‘Tel Masiwi, kemuk nga kalabus i xai teka kahikahim leili synagog. ²⁰Ape ti laha hokai telei Stiven tel unaum an i pot, nga tutu ien. Puki nga paxai waheni. Nga tetel peteniai atuhiai puxui teka seilon laha hohokai i. Tuahape seilon paxai tioi ka nga towiahuen.’

²¹“Tuahape Jises tel Masiwi hone nga, ‘O saliliwa Jerusalem nake nga talo haxau o hani kapi teka kumahe Ju lehe laha hong meng solian tetak.’”

²²Teka seilon laha hong atengi tataen Pol tili kakaiyan ka Jises talo i hani teka kumahe Ju. Ape laha ausini ukek, “Hatapo xaxaweniwa axan! Teleiwa il! Tapai ala telei kueiniwen il!” ²³Ti laha leng ausisini, laha totowi atuhiai puxuaulaha ma towi sasapoxi hepekeun hani patul kolai lialui lolaha ti Pol.

Pol kaxi ka i tel ti hahitake ngahat ti Rom

²⁴Klodius tel masiwi ti hile ti Rom hakahita Pol hani leili tehu ing tone teka seilon ti hile ape i hone teka unauan ka lato hetiwa i lehe i kaxi waliko tetenen teka Ju ausini wawatakai. ²⁵Ti lato xinoti kewa Pol ape apeas ti hetian, Pol kakane tel masiwi hahitake Klodius tutu ien, “Nakon ewi ti hetiwa tel seilon hahitake ngahat ti Rom na masin i tai tu ti sulusul?”

²⁶Ti i hong kewak ien, i nahih hani kapi Klodius ape i ukek, “Tel seilon ien i hahitake ngahat ti Rom! Ape o aile ukek ia?”

²⁷Kakanua Klodius nahih hani kapi Pol ape kamei i, “Kaxi hanima nga, o tel ti hahitake ngahat ti Rom?”

Pol pahoi ukek, “Salan.”

²⁸Klodius ukek, “Nga kahui halapa hawane moni lehe nga sohot tel ti hahitake ngahat ti Rom.”

Pol ukek, “Nga tel ti hahitake ngahat ti Rom nake tel tamak i tin hahitake ngahat ti Rom!”

²⁹Tataen ien wanen teka seilon ti hile lehe laha heti Pol, laha sia alia tetan. Ti Klodius tioiwa ka Pol tel ti hahitake ngahat ti Rom, i mamata hawane nake i honewen teka unauan xinoti hetiwa Pol.

Pol tu mate teka masiwi ti teka Ju

³⁰Tel masiwi Klodius pahan i tioi huan ti teka Ju sului Pol. Aile ape ngain liai tehu i oxoxi sen ti he mini Pol ape i hone teka masiwi tuah ti hukuminiai Haeu ma seilon ma teka Ju masiwi liai ka lato apuhawa. Ape i waxy hatuhu Pol hani matalato.

23

¹Pol pax sawi hani hatesol masiwi ien ape i ukek, “Teka Ju akikik. Nga ilameni tioi ka pupuasak ti Haeu sawisawin wanen.”

²Ti i hongoa ien, Ananaias tel masiwi tapein ti hukuminiai Haeu ma seilon, hone teka seilon tutu xohixohin kapi Pol ka tapahiwa i. ³Ape Pol hone i ukek, “Haeu tin i tapahi o, tel seilon lehom huoka! O toto ie ape o susului nga hahitake nauna ti Moses tuahape puki o xaxaputi nauna tetan ti o hone laha tapahiak.”

⁴Tesol seilon tutu xohixohin kapi Pol laha hong teik kakaiyan ape laha hone i, “Kalhai o kak halialu tel masiwi tapein ti hukuminiai Haeu ma seilon?”

⁵Pol kak pahoi ukek, “Tesol akikik, nga tai tioi ka i tel masiwi tapein ti hukuminiai Haeu ma seilon. Na ngä tioila, nga tai kak halialu i nake teik kakai Haeu ukek, ‘Kum kak halialu tel masiwi ti neiniamuto.’” (Exod 22:28)

⁶Ti Pol paxai tioiwa ka leili teka masiwi ien hina teka Sadusi ma teka Parisi i tilol hani lato, “Teka akikik, nga tel Parisi masin teka tamak ti matahaun. Nga tu ti sulusulu nake nga soh ka seilon maten laha moih alia.”

⁷Ti i kak kewak ien, teka Parisi ma Sadusi hutui kak he hapatapat. ⁸Namilolato ape i selaiwa nake teka Sadusi ukek ka teka seilon matewen laha kum moih alia, a tin tap teka engel ma tap teka spirit, tuahape teka Parisi soh ti hatolunen waliko ien. ⁹Lato titule ape leng ausisini hawane. Teka ti hanau nauna ti Moses lato Parisi, lato kak eliel, “Amite tai upia tunahi tenen saun lialun na

i ailewen. Sohin uke na spirit ma na engel kaakane i.”¹⁰ Tel masiwi Klodius paxai ka ape laha leng eliel hahawane. I mamata uke laha aile hamange Pol. Kakanua i hone teka unauan ka lato nahih haniwa leilolahe, waxi lungewa Pol ape hakahita haniwa tehu ingi teka seilon ti hile.

¹¹ Ipong tehu ien Jises tel Masiwi take hani kapi Pol ape i ukek, “Kum maa-mata! Masin ti o kaxi sasawateni nga leili Jerusalem, tin kaxi ahutiwa meng solian tetak leili Rom.”

Namil ti teleiai Pol

¹² Ti ngain liai telao, tesol ti teka Ju apuha ape aile teik namil ti aile halialui Pol. Lato kak kuinake hani Haeu ka lato kum ang ma un hani tataen na lato telei kewa Pol.¹³ Mongohe teteka seilon akulai 40.¹⁴ Ape lato nahih hani kapi teka masiwi tuah ti hukuminiai Haeu ma seilon ma teka masiwi liai ape lato ukek, “Amite tuoha ka amite kum ang ma un hani tataen na amite telei kewa Pol.”¹⁵ Amite ailewen teik namil. Amuto ma teka masiwi liai kameiwa tel masiwi Klodius waxi aliaakema Pol. Kak hanowiva ka pahamuto kamei aheke Pol waliko ti amuto susului i. Ape amite telei i imat ti i tahiamma.”

¹⁶ Ti tel wawan uluha nati tel tuai Pol hongoa teik namil ien, i nahih hani ingi teka seilon ti hile ape i kaxi hani Pol.¹⁷ Pol tiloi tel ti teka masiwi hahitake Klodius ape hone i, “Hakahitawa tel seilon uluha ie hani tel masiwi Klodius. I hina waliko tuah ti na i kaxi.”

¹⁸ Ape i aile usi. I kakane Klodius, “Tel seilon kalabus axan Pol hone nga hakahita hanima o tel seilon uluha ie nake pahan i kakak kapim.”

¹⁹ Klodius ati i hani tesol mewenae lalu ape kamei i, “Waliko la paham o kakane nga?”

²⁰ Tel seilon uluha ukek, “Tesol ti teka Ju ailewen teik namil ka letu lato kamei o waxiai Pol hani kapi teka masiwi ti lato. Lato kak hanowi ka pahalato kamei ahekean waliko ti lato susului i.”²¹ Tuahem kum ailele nake kilai seilon akulai 40 lato muna pepeteni i ti teleian. Lato tuohawen ka lato kum ang ma un hani tataen na lato telei i. Aope ie lato atetengi na o sowini hani lato waxiai Pol.”

²² Klodius hone i, “Kum kakaxi hani tel na seilon ka o kaxi haniwen nga.” Ape i talo aliakae tel seilon uluha.

Klodius hakau Pol hani Sisaria

²³ Ape tel masiwi Klodius tiloi hua unauan, masiwi ti hile ape i ukek, “Waxiwa 70 seilon ti hile laha kiliwakei hos, 200 seilon ti hile laha hokahoka ti samen ma 200 liai. Amuto apeasawa ti lua hani tehu taon Sisaria ti 9 kilok ipong tetehu.”²⁴ Waxi apeseni haniwa Pol hina hos lehe amuto atoheni hahamahuli i hani kapi Feliks, tel masiwi ti Sisaria.”²⁵ Muhin ien i tai teik pas hani Feliks. I ukek,

²⁶ “Kakaia ngi Klodius Lisias, hani o Feliks, tel masiwi tuah. Letu solian!

²⁷ “Tesol ti teka Ju pohi kongini tel seilon ie ape lehe lato telei. Ti nga tioiwa ka i tel seilon hahitake ngahat ti Rom, nga hetekie tesol seilon tetak amite awai i.”²⁸ Pahak nga tioi hui suluan, aile ape nga hakahita i haniwen teka masiwi ti teka Ju.²⁹ Nga tunahi ka tesol Ju sului Pol ti xaputiai nauna ti lato teka Ju. Sulusulu ti lato i kum pon xotian ma teleian.³⁰ Nga hongoen ka teka seilon aile teik namil ti teleiai Pol. Aile ape nga hakau koseni i hani o. Ape nga hone lato ka pamu ewi na o hongoi sulusulu ti lato.”

³¹ Teka seilon ti hile aile usi kakai Klodius Lisias, tel masiwi ti lato. Ipong tetehu ien, lato waxi Pol ape hakahita i hani tataen tehu taon Antipatris.³² Ti ngain liai telao tesol ti teka seilon ti hile laha alia hani Jerusalem ape teka liai ti kiliwakei hos laha hakahita tamusuke Pol hani tehu taon Sisaria.³³ Ti laha tahia haniwa Sisaria, laha hani tel masiwi Feliks teik pasi Klodius ape hana Pol he minan.³⁴ Muhin ti i ridaiwa teik pas, i kamei Pol, “O ti lahe xux?”

Pol pahoi ukek, “Ti Sailisia.”

³⁵ Feliks ukek, “Nga hong mengom na teka suluam tahiamma.” Ape i hone teka unauan peteniai Pol leili tehu ing lalap atataiai tel masiwi Herod.

24

Teka Ju sului Pol hani Feliks

¹ Muhi ngain tepanim, Ananaias tel masiwi tapein ti hukuminiai Haeu ma seilon, tahia hani Sisaria hetekie teka Ju masiwi liai ma Tertelus, tel pupuasan tukai awe teka suluiai Pol. Lato tahia ti suluiai Pol hani tel masiwi Feliks.² Ti tel masiwi hasohoa Pol hani tesol tone apuhain, Tertelus hutui kakaian hani Feliks. I ukek,

¹⁰ “O tel masiwi tuah, o huali hatona hasolliawen amite teka Ju ape tap hilehile. Ti soliai namilom, o aile sohi hakila waliko ti hasoliai xuxumite. ¹¹ Amite paxai tesol waliko ien ape amite hatesol sameni o. Amite kak kemulik hawane hani o. ¹² Nga kum kongini kueini o. Nga kamei eliel o, ti soliaiam nati hongoa teik kukunui kakiamite.

¹³ “Amite paxai tioi tel seilon ie i weli aile halialui wasole seilon. Lawe i hahika teka Ju tesol tesol ti hil pahoiai teka masiwi ti Rom. I nanahike temat seilon laha axai Nasarin, teka kahikahi Jises ti Nasaret. ¹⁴ Tin lehe i halialu tehu Ingi Haeu tuahe amite akeni kongini i. ¹⁵ Tel masiwi Klodius Lisias waxi lungei Pol ti amite ape taloma teku suluhan hani o. ¹⁶ Kewa puki o kameian lehe o tioi waliko ti amite susului i.” ¹⁷ Tesol Ju sa huali kakai Tertelus ape lato ukek ka kakaian pate salan.

Pol ahuti kakaian hani Feliks

¹⁸ Ape tel masiwi Feliks kola Pol ka i kakawa. Ape Pol kak ukek, “O tel masiwi tuah, nga tioi ka ahang kilan o toto tel nam paxaiamite teka Ju. Aile ape tiak i amuam ti nga kak xengei kakaialat matam. ¹⁹ Na o kamei teka seilon, o tunahi koseni ka i tai akulai ngain huopanir huohu ti nga lolotu leili Ingi Haeu ti Jerusalem. ²⁰ Laha tioi ka nga tai kak he lungelung kapi tel na seilon ti leili Ingi Haeu. Tin laha tioi ka nga tai hahika teka Ju leili synagog ma tesol tesol ti Jerusalem. ²¹ Ape teka seilon ie lato tap aweisal ti kolaian ka sulusulu ti lato salan.

²² “A waliko tetenen salan ie. Nga usiusi aweisali Krais tenen lolaha kum al. Nga lolotui tel Haeu ti teka matahaun ti amite lolotui ape nga soh hawane hatesol nauna ti Moses ma lawe waliko ti teka kuluiai kakai Haeu taiwen. ²³ Tin masin teka seilon ie, nga monomon ka Haeu hamoiba aliale teka seilon matewen, teka seilon solian ma teka lialun. ²⁴ Aile ape lawe nga puas eliel hawane lehe tiak mewenae ewi ti Haeu ma teka seilon.

²⁵ “Hina ahang tamusuen nga alia hani Jerusalem. Nga atoheni moni hualiae teka akikik Ju ma nga lelei manihuh hani Haeu.

²⁶ Teka suluak ningahi nga ailele saun ti hauniak ti puli Haeu leili Ingan. Tap seilon wiliwilia nake ti huak lokon ien. ²⁷ Tuah tesol ti teka Ju ti Asia lato ien, lato ala matam ie na lato hina kakain ti suluak. ²⁸ I pon o kamei tesol seilon ie waliko ti lato titieni nga lokon ti nga tutu ti sulusulu

mate teka masiwi ti teka Ju. ²⁹ Lato pon suluak mewenae ti teik kakain nga ukek ka naga tu ti sulusulu nake nga soh ka seilon maten laha moih alia.”

³⁰ Feliks tioi hawane teka laha usiusi aweisali Krais ka laha kum pahoi teka masiwi ti Rom tuahe i mongenimu tehu sulusulu ien ape i ukek, “Ti na tel masiwi Klodius Lisias tahama, nga aile namilok sale hasawiai tehu sulusulu.” ³¹ Ape i hone tel ti teka seilon ti hile peteniai Pol tuahe i ukek ka ewi na teka lohun huali i ti tenen waliko na i tap.

Pol kakak kapi Feliks ma tel axoan

³² Hina ngain tamusuen, Feliks ma tel axoan Drusila tel hehin Ju, lalu tiloi Pol ape lalu hong kakaian. Pol kak nexi sale usiai aweisali Jises. ³³ I kaxi hani lalu ukek, “Mewenae na namilokaha xoxoan ti Jises, wasolakaha seilon ma Haeu i sawi. Haeu pahan kaha seilon tahiwa hatesol isiakahna tenen i aile halialu kaha. Ngain tehu Haeu hiniti hatesol seilon.”

Feliks hongoa kakaian ape i mamata hawane. I ukek, “O nahimua. Nga po ilowi o na pahak.” ³⁴ Muhiun ien, Feliks ilowi hakila hawane Pol nahih kakak kapin nake i kakanthoi Pol moni ahutian ti kalabus.

³⁵ Feliks aile ukek ien leili ahang huohu. I kongini hamalumini Pol leili kalabus nake pahan i hamuamua teka masiwi ti teka Ju. Imuh Porkius Festus uke totongan ti nahikei Sisaria.

25

Pol pahan Sisa tel masiwi tapein ti Rom hong paxaai mengon

¹ Tel masiwi Festus tahiha haniwa Sisaria ape ti ngain tolulu tamusua i lua hani Jerusalem. ² Teka masiwi tuah ti hukuminiai Haeu ma seilon ma teka Ju masiwi liai hahongi i sale suluai Pol. ³ Lato kamei eliel Festus, “Ewi na o hakau sohi Pol hanima Jerusalem?” Lato kak ukek nake paha-lato teleiae Pol ti luaian hani Jerusalem.

⁴ Tuah Festus hone lato ukek, “Kumahe! Pol tiliwen kalabus ti Sisaria pake kum kue nga alia hani ien. ⁵ Teka masiwi ti amuto kahitima nga hani Sisaria. Na Pol ailewen tenen waliko lialun, amuto suluwa i ien.”

⁶ Muhi ngain huopanim, Festus alia han Sisaria ape ti ngain liai telao, laha hutui suluai Pol. Festus hone teka unauan ka lato hakahitama Pol. ⁷ Tataen Pol tahama, teka

masiwi ti Jerusalem tu kou i ape lato kak susului i kakain tenen tap salangawan.

⁸ Pol ukek ka kakailato kumahe salan. I ukek, "Nga tai xaputi tesol nauna ti Moses, nga tai halialu Ingi Haeu ma nga tai xaputi tuahé na tenen nauna ti teka masiwi ti Rom."

"Tuahé Festus pahan i aile haewia namili teka Ju ape i kamei Pol, "Nakon o waheni na nga hong paxai tehu sulusulu ie hani Jerusalem?"

¹⁰ Pol kak pahoi i ukek, "Kumahe! Ti aope ie nga tutu mate tel ti teka masiwi ti Rom. Nga tel seilon hahitake ngahat ti Rom, aile ape o pon hong paxaiai kakain ti suluak. O tioi hawane ka nga tai aile tenen na waliko lialun hani teka Ju. ¹¹ Na nga ailewen tenen saun lialun ti i pon nga mat, nga kum salini uke. Tuahé na tap kakain salan ti lato sului nga, tap tel pon hangainiak hani lato. Katekate tetak ka Sisa tel masiwi tapein ti Rom hong paxaiai kakain ti suluak."

¹² Festus kakak kapi tesol hualian ti axiai namil ape i pahoi Pol ukek, "Katekate tetam nga sowini, nga hakau o hani Sisa!"

Festus kakane Agripa ma Bernis sale Pol

¹³ Muhi hina ngain tel masiwi Agripa ma tel tuan Bernis tahia hani Sisaria ti paxaiai Festus. ¹⁴ Lalu to kapin kilan ngain ape Festus kaxi haxewa hani lalu sale Pol. I ukek, "Tel seilon i kakalabus ie lilian ti Feliks.

¹⁵ Lokon ti nga Jerusalem, teka masiwi tuah ti hukuminiai Haeu ma seilon ma teka Ju masiwi liai, laha sului Pol ape kamei nga ti axian kawatan. ¹⁶ Tuahé nga kakanewen lato ka kumaha saun ti kako seilon ti Rom ti axiai seilon kawatan na kako tai hatuhu laha ti sulusulu. Imat kako hani laha kak xengeimui kakain ti teka sulualaha.

¹⁷ "Aile ape ti teka suluai Pol tahia kemak ie, nga akeni hulutini tehu sulusulu ti ngain liai telao. Ape nga hone teka unaauak ka lato hakahitama Pol. ¹⁸ Ti teka suluan tua ape lato kak, kumahe lato susului i waliko ti nga amemene. ¹⁹ Lato kakak sale lotuiae Haeu ti lato ma sale Jises, tel i matewen, tetel Pol ukek ka i moihiin tutuen. ²⁰ Nga kum tioi aluini sale kiliwakei tehu sulusulu ape nga kamei Pol na i waheni lua hani Jerusalem lehe laha hong paxai kakain ti suluan ien. ²¹ Tuahé Pol pahan Sisa hong paxaiai kakain ti suluan. Aile ape nga kongini hamalumini i leili kalabus atengi tataen na nga hakau uke i hani Sisa."

²² Agripa kakane Festus, "Pahak puki Pol kakak kapik."

Festus ukek, "Ewi, letu ape o hong kakaiyan."

²³ Ti ngain liai tehu Agripa ma Bernis nahih soh hani tehu ing ti hong paxaiai sulusulu, hetekie teka masiwi ti teka seilon ti hile ma teka seilon tuah ti Sisaria. Hatesol seilon ien laha paxai sameni lalu. Ape Festus hone teka unauan ka lato hakahitama Pol. ²⁴ Festus kak ukek, "Tel masiwi Agripa ma amuto hatesol, ie se seilon tetel teka Ju ti Jerusalem ma teka Ju ti Sisaria laha eliel ka teleiwa. ²⁵ Tuahé taen ti nga hong paxaiai, nga tai tunahi waliko tenen na lialun ti i pon kaha telei i. Tuahé ti i katei ka Sisa hongoi mengon, nga noseni hakauan hani Sisa. ²⁶ Tuahé nga kum tioi aluini waliko tenen na nga tai hani Sisa sale Pol. Aile ape nga atoheni i hanima kapimuto hatesol ma o tel masiwi Agripa, tel seilon pate tuah ti kako. Taen kako kamei matainiwa i ape nga tioi waliko na nga tai hani Sisa. ²⁷ Nga namiloi ukek kumahe solian ti hakaui tel seilon kalabus hani tel masiwi Sisa na koko kum tioi aluini waliko tenen lialun ti laha susului i."

26

Pol kak xengei kakai teka suluan mate Agripa

¹ Tel masiwi Agripa hone Pol, "Ape ewi na o kak xengei kakai teka suluan aope ie."

Pol tulini minan i kola ka ape i kak. I ukek, ² "Tel masiwi Agripa! Pate onotan ka o tel hong paxaiai kakaiak ti nga xengei kakai teka suluan. ³ Pake pate o tioi hatesol saun ti teka Ju ma waliko ti laha kak he hapatapat. Nga kamei eliel o, hong matainiwa kakaiak.

⁴ "Hatesol Ju laha tioi sale totonak lili-an ti uluhauk, ti nga toto xuxuk ma leili Jerusalem. ⁵ Laha tioiwen nga lilian ti kuewen ape na pahalahia kaxi kakain salan, pon laha kak ka laha tioi ka nga tel ti teka Parisi amite puas usi aluluini hatesol nauna ti Haeu. ⁶ Aope ie lato sului nga naake nga to monomon ka Haeu aile hapoponow i waliko ti i kakanewen teka tamamite Ju sale xahateniae seilon maten. ⁷ Teka huopanum huosol seilon ti Israel lato monomon waliko tin tetenen ape lawe lato lolotui Haeu ma ailele puasan. Tel masiwi, ti teik monomon ien teka Ju susului nga." ⁸ Ape Pol kakane teka Ju i ukek, "Alahan teka ti amuto kapaxe ka Haeu hamoiha aliake seilon maten?"

⁹“Puki nga kemuk nga soh hawane ka ewi ti aile halialui teka kahikahi Jises ti Nasaret.
¹⁰ Se pupuasak wanen ti leili Jerusalem. Na teka masiwi tuah ti hukuminiai Haeu ma seilon sowiniwa, nga xoti teka kahikahi Jises ape hana hani kalabus. Tin nga waheren na telei lato. ¹¹ Nga nahih hani synagog tehu tehu ti aile halialualato ape lungen i lato kak halialui Haeu. Kalak tataen ti taon ti teka kumahe Ju nga kum sosokol aile halialualato.

¹²“Telao nga lua hahaniwa Damaskas ailei tenen puasain ien ti teka masiwi tuah ti hukuminiai Haeu ma seilon sowini haniwen nga. ¹³ Tel masiwi, ti lape ngain nga ningahi hahutua teik xewan, i xoini hawane xame al. I kakalini nga ma teka seilon kapik. ¹⁴ Amite hatesol put hani itan ape nga hong tenen kinax i kakane nga ti Arameik, kakaiak wanen, ‘Sol, Sol, alahan o aile halhalalu nga? Tel na i hil pahoi nga, i tunahi kawatan.’

¹⁵“Nga kamea, ‘Tel Masiwi, o aita?’

“Ape tel Masiwi pahoi ukek, ‘Nga Jises, tetel lawe o to aile halhalalu. ¹⁶ Xahatawa! Nga take hani kapim ti kilamiam tel unauk ma kaxi haniai lawe seilon waliko ti o ningahi tetelao ma imuh. ¹⁷ Ape nga awai o ti teka Ju ma ti teka seilon laha kumahe Ju, teteka ti nga talo o hani kapi laha. ¹⁸ O haxewai pulalahwa waxy laha towiahu ti tilokoan hani xewan, ti pohe Satan hani Haeu lehe Haeu oxoxi laha ti kawatan ti lialui woulaha. Ape laha seliai hani ailei puasan nake namilolaha xoxoan tetak.’

¹⁹“Tel masiwi Agripa, aile ape nga kumtahi waliko ti Jises kakane nga ailean ti i take hani nga he aweisal hani Damaskas. ²⁰ Imat nga kaxi ahuti meng solian ti Jises hani teka seilon ti Damaskas, muhin leili Jerusalem ma hatexux xux ti Judia ape tin hani teka seilon laha kumahe Ju. Nga honewen laha ka laha towiahua ti lialui woulaha ape usiwa Haeu. Nga kakanewen laha ti ailei saun teneten i kola ka laha lioiwen saun lialun. ²¹ Nake ti kaxiai kakai Haeu, tesol Ju aka kongini nga leili Ingi Haeu ape lato tohongi teleiak.

²²“Tuahé Haeu lawe i huuhalu nga hanima taen tetelao. Aile ape nga tutu ie kakaxi sale puase Jises hani teka seilon tuah ma teka seilon naun. Kumahe nga kakaxi waliko liai tenen ti teka kuluiai kakai Haeu ma Moses ukek i sohot. ²³ Nga kakaxi ka

Krais, tetel Haeu taloma, i tunahi kawatan ape laha telei i. Tin nga kakaxi ka i tetel Haeu hamoihamu imat ti lawe seilon maten. Kakaian masin teik xewan hani teka Ju ma teka kumahe Ju.”

²⁴ Ti Festus honga ien, i tilol tumei Pol, i ukek, “O taxitaxiawen! Anesoam lap kasia ape i aile hataxitaxia ol!”

²⁵ Tuahé Pol pahoi ukek, “Tel masiwi tuah, nga kumahe taxitaxia. Kakaiak hina salangawan. Salan wanen waliko ti nga kakak. ²⁶ Ape tel masiwi Agripa i tioi aluin hawane waliko ti nga kakak. Nga kak matut hani i nake nga soh ka hatesol waliko nga kakaxi koukean tetan. Waliko ien kumahe ti lehe i muna.” ²⁷ Ape Pol kakane tel masiwi Agripa i ukek, “Nga tioi hawane ka o soh waliko ti teka kuluiai kakai Haeu kakawen.”

²⁸ Agripa kamei Pol, “Nakon o sokok o sohi koseni uke nga hani tel kahikahi Jises?”

²⁹ Pol ukek, “Kalak na i kosea ma na kumahe, nga kamei Haeu ka kumahe mewenae o tuahe amuto hatesol ti amuto hongohong kakaiak amuto sohot kahikahi Jises hanowi nga, tuahe kumahe masin ti naga kakalabus ie.”

³⁰ Muhiin ien tel masiwi Agripa, tel tuan Bernis, tel masiwi Festus ma teka masiwi liai tule ape lato nahih salili tesol ien. ³¹ Lato kakak alia puki lato, “Tel seilon ien i tai aile waliko lialun tenen i tapai i kalabus ma na telei.”

³² Agripa hone Festus ukek, “Na i tai katei ka Sisa hongoi kakain ti suluan, i pon kako hanahi lioi i.”

27

Pol lua hani Rom

¹ Lokon ien Pol ma teka kalabus liai laha hani he mini Julius, tel masiwi ti teka seilon ti hile ti Sisa. Tel masiwi Festus noseni ka Pol ma teka kalabus liai lato lang hani Rom. A nga, tetel taiai tenen meng ie, nga kukuoxi lato. ² Aristakus, tel seilon ti Masedonia tonan leili tehu taon Tesalonika, i tin kapimite. Amite ku hani he tea waian ti tehu taon Adramitium, i apepeas ti lang sota hani taon tehu tehu peixux ti Asia.

³ Ngain liai telao amite tahiia hani tehu taon Saidon. Ti soliae Julius i sowini hani Pol nahih paxaiai teka lawan ien lehe laha huali i tenen na i tap. ⁴ Ape amite lang ahe ulea. Aupol pate lengen tunahi amite, aile ape amite towiahahu wasole texux xux

Saiprus ma peixux ti xux lalap ien.⁵ Amite lang towiahahu usiai peixux ti texux xux Sailisia ma Pampilia ape amite tahia hani tehu taon Mira leili texux xux Lisia.⁶ Ti ien Julius tunahi tea waian ti tehu taon Aleksandria leili Igip i kane texux xux Itali. Ape i hakuhi amite he tea waian ien.

⁷ Kilan ngain amite lang hahakokol ape amite tahia hani tehu taon Kenidus tuahé pate ailan. Amite tunahi aupol lengan wanen, aile ape amite lang non luainan ti texux xux Krit sahiwa toun ti Salmone.⁸ Amite lang sahisahi peixux atengi amite tahia hani tesol axan Tone Petiaiin Solian, xohixohin tehu taon axan Lasea.⁹ Hatalia langaiamite nake hunan pate lialun. Liae ape muhi tehu ngain ti teka Ju lelei manihuh hani Haeu kahi lialui woulaha. Laman pate lalap nake taun ti hunaxa. Aile ape Pol hone laha ka amite kum lang ahe.

¹⁰ I kakane laha ukek, "Hongoa! Na kako lang lungelung, kako tunahi kawatan. Tea waian manan, kako lioi kilan soxi ma uke kilan seilon laha mat."¹¹ Tuahé Julius hong soh kakai tel huniwa ma tel tame tea waian ape i kum tani waxi kakai Pol.¹² Petiai waian ti ien tin kumah solian ti seilon heuta leili taun ti waiwain ma aupol kuin. Aile ape sikole hatesol teka mahoseni ka lato lang tatale hani Piniks, tesol petiai waian ti Krit, i pamu luhun ti hunan lialun.

Tehu ahon lalap

¹³ Kokole aupol ahoma sai haiup ape lato namiloi ka lato lang tohongi. Lato tei xuot, aheti lih ape lang sahisahi peixux ti Krit.

¹⁴ Tuahé tai kue tehu lamin luainima sai tolai angiba ti texux xux.¹⁵ Ti aupol taheima lato kum pon kapiti hasawiai tea waian ape amite puasake lioi tea waian aupol tua paxeni hamanumanu.

¹⁶ Pala amite lihu ti amite man haniwa sai haiup pape texux xux kokol axan Kauda. Tataen ien amite aheti ahuke tea koap amite wawati hani heiwi tea waian.

¹⁷ Ape amite xioti talini haxo tea waian. Teka mahoseni lih lehe tea waian tua man nake lato mamata uke amite oh hepekeun ti waloke Sirtis peixux ti Afrika.

¹⁸ Ngain liai telao hunan pate lialun tutuen. Laman pexupexuini tea waian ape sikole amite kaxox. Kakanua lato towi xoini angah ti he tea waian.¹⁹ Ngain liai telao ulea tin lato towi xoini soxi tini tea waian ti hapalean.²⁰ Kilan ngain amite kum niningah puli al ma kohot nake pate hunaxa tutuen.

Aile ape namilomite sihuk hawane aita pon huali amite.

²¹ Kilan ngain amite tai angiang. Ape Pol hone tesol maho ukek, "Ala amuto hong usiwen kakaiak! Na kako tutuen Krit, ala kako tai xoini soxi ma tenen kawatan ie tai tunahi kako.²² Tuahé amuto tu xoxoa pake tap tel ti amuto mat, mewena tea waian manan.²³ Haeu, tetel nga unauan ma lawe nga lolotui, i taloma tel engel tetan hani kapik ipong tehu tatamusua.²⁴ Ape i hone nga, 'Pol, kum maamata! Haeu hong kamekame tetam ape i awai hatesol seilon kuoku kapim. Pahan o tu mate Sisa ti sulusulul'²⁵ Aile ape tu xoxoal! Nga soh hawane ka Haeu aile usi waliko ti i kakawen.²⁶ Tuahé tea waian i manan ape kako pap hasunga hani peixux ti texux xux."

Tea waian oh manan

²⁷ Muhi ngain huopanum hinalo ti amite manuman itax ti Adria, ti luhui ipong tesol maho sixi ka amite man xohi haniwen xux.

²⁸ Lato halahé tok kapet tumun teik samen ape tunahi ka tahulouan ngahainan 20. Tai kue lato tohongi ulei ape tunahi ka ngahainan 15.²⁹ Pate lato mamata ka tea waian uke i man xotui hat. Aile ape lato halahé hinalo xuot muhiwai tea waian. Lato to hahaxe letuan.

³⁰ Tesol maho lato tohongi ox saliliai tea waian ape lato halahé hamosu tea koap hani itax woinakon halahé xuot ti mateiwa.³¹ Tuahé Pol hone Julius ma teka seilon ti hile, "Na tesol maho lato kum hamalum heiwa, kako hatesol mat."³² Aile ape teka seilon ti hile koti tok tal ti xiotiai tea koap ape i man.

³³ Sikole letu, Pol kakane lato, "Amuto tai angiang ngain huopanum hinalo nake namilomuto kilan ti mamata ma monomon."³⁴ Nga kamei eliel amuto, angimua teik lehe amuto kui. Kum maamata pake tap tel ti amuto mange."

³⁵ Muhin ien Pol waxi hina bret ape i kak kemulik hani Haeu ti he pulalato ape i ani.

³⁶ Namilolato hatesol i soli ape lato ang.

³⁷ Mongohumite hatesol heiwi tea waian 276.³⁸ Ti lato ang xuhawa, lato towi xoini tomi an hani itax lehe tea waian pal ahe.

³⁹ Ti letule, tesol maho kum paxai tioi texux xux ien. Tuahé lato ningahi teik walokan ma peixux ape lato namiloi na lato lang hani ien.⁴⁰ Ape lato koti tesol tal xuot lehe i taxix. Lato upati tal ti xiotiai kapit ape lato aheti teik lih mateiwa lehe aupol

halanga tea waian hani peixux.⁴¹ Tuah tea waian lang oh. Konokonoi tea waian latuhu he hepekeun ape mau to xai hahamanana sai muhiwa.

⁴² Teka seilon ti hile aile teik namil ka lato telei hatapo tesol kalabus lehe laha kum pap hani peixux ape kiliwau muna.⁴³ Tuah Julius tel masiwi watakai na telei Pol, aile ape i hakongu lato ti teleiai teka kalabus. I hone lawe seilon ka teka laha pap uke, laha titiwa imat hani itax ape pap haniwa peixux.⁴⁴ Ape i hone teka liai ka laha sakalawa patiu ma na mananai waian papaialaha hani peixux. Ie sale ti ape amite hatesol pap hasunga.

28

Pol he texux xux Malta

¹ Ti amite meiwa peixux ien, amite upia tunahi ka texux xux ien axan Malta.² Teka seilon ti ien pate laha aile aluini amite. Akah hutui ux ma tin waiwain. Laha hawia tehot ah ape ilowi amite hatesol ti hahiai tinumite.

³ Pol awiti salo ape ti i hana momokoi hani he tehot ah, tok weiko tenen i telei seilon ahutama leili salo nake i ilameni kekean ape i atalahi minan.⁴ Teka seilon ti xux ningahi ka tok weiko ien akeak he mini Pol ape laha he kakak alia puki laha, “I liai tel teleiai seilon. Kalak i kuosel ti kawatan ti itax, haeu ti kako tetel ti nam kolengonai seilon, i hani lioi Pol mat.”⁵ Tuah Pol tohoi tok weiko hani he tehot ah a i tai mange.⁶ Ape laha to atetengi na tinun hul ma na i put mat. Tuah ti i kuewa tap tenen waliko lialun sohotuen ape laha sohi namilolah ka Pol i haeu.

⁷ Teik hepekeun xohixohin ien, hepekeunai Publius tel masiwi ti Malta. I ilowi amumuke amite hani tonan ape waxi auni amite ti ngain tolulu.⁸ Lokon ien tel taman tinun, i tua engeeng. Lul tunahi i hetekie i lamani tian. Pol nahih paxai i ape i hana minan patul tetan kameiae Haeu ti haewian. Ape tinun ewi.⁹ Muhin ien laha atoheni teka tinun hani kapi Pol ape i haewia laha.¹⁰ Pate laha auni hasolia amite. Ape tataen ti lehe amite ku salili laha, laha axi amite waliko tenen amite tap.

Pol tahia hani Rom

¹¹ Muhi pangapang tolulu amite ku hani he tea waian ti tehu taon Aleksandria i pet liliuh lokon ti hunan lialun. Axan Dioskuri, i kilami nati Seus sangasang axalalu Kastor ma Poluks, hua haeu ti teka Grik lolotui.

¹² Amite tahia hani tehu taon Sirakus leili Sisili ape amite to ien ngain tolulu.¹³ Ti ien amite lang ahe ape takana hani tehu taon Regium leili texux xux Itali. Ti ngain liai telao aupol ahoma sai haiup ape ti liai telao amite takana hani tehu taon Puteoli.¹⁴ Amite tunahi teka kahikahi Jises ien ape lato ilowi amite to kapi lato puasain tehu. Muhin ien amite lua ulea hani Rom.

¹⁵ Tataen teka kahikahi Jises ti Rom hongoa ka amite luluainiwa, lato lua tengeni amite. Tesol, lato apatuuni amite tehu taon axan Apius Forum a tesol liai apatuuni amite tesol axan Ing Toluhi. Ti Pol ningahiwa lato, leili tian i amuam hawane ape i kak kemulik hani Haeu.

¹⁶ Ti amite tahia haniwa Rom, laha sowini hani Pol heuta tehu ing mewenae i tuahe tel seilon ti hile petenian.

Pol kakak kapi teka masiwi ti teka Ju leili Rom

¹⁷ Muhi ngain tolulu ti amite Rom, Pol ilowi teka masiwi ti teka Ju hani tehu apuhain. Ape i kakane lato, “Amuto teka akikik, nga tai aile teik na waliko lialun hani tel na seilon ma nga tai tahi teik na saun ti tesol tamakako ti matahaun. Tuah ti nga Jerusalem, laha xoti nga ape hana nga hani mini teka Rom ti kalabusiak.”¹⁸ Lato hong paxai meng ti suluak. Pahalato oxoxiak nake lato tunahi ka nga tai aile waliko lialun tenen na i pon laha telei nga.¹⁹ Tuah teka masiwi ti teka Ju watakai teik namil ien. Aile ape tap tewau aweisal ulea mewenae nga kamei ka Sisa hong paxaiai kakain ti suluak. Kumahe pahak suluai teka akikik Ju, pahak nga kak xengei kakai teka suluak.²⁰ Aile ape nga ilowima amuto ti kakak kapimoto. Ti nake monomon ti kako teka Israel hani Krais tetel Haeu taloma, laha xiotti kalabusi nga sen.”

²¹ Ape lato kak pahoi ukek, “Amite tai uke teik na pas ti Judia hahongoamite sale huam ma tin tap tel ti teka kahikahi Jises tahiawen ie ape kaxiwen ka o ailele waliko tenen lialun.”²² Amite tioi ka seilon tesol tesol laha kak halialu teka seilon laha usiusi aweisali Krais tuah pahamite amite hong hawane namilom.”

²³ Lato kilami ngain tehu ape lato kilan nahih kakak kapi Pol tesol i heheuta. Ti letu haniwa ipong i kaxi hani lato sale nenein ti Haeu. I hapuasa kakai Moses ma kakain ti teka kuluihai kakai Haeu taiwen ape i kaxi hawane hani lato ka Jises se tel Krais Haeu

taloma. ²⁴ Teka laha hong soh kakai Pol tuahe teka liai laha kum soh. ²⁵ Ape lato kak he hapatapat alia puki lato. Imat ti lato nahih salili tesol ien, Pol kak ukek, “Pate salan wanen waliko ti Holi Spirit kakanewen Aisia tel kuluiak kakai Haeu ti kaxi haniai tesol tamakako ti matahaun. I kak ukek,

²⁶ “Nahiwa ape honewa teka Israel, “Amuto hongohong kakaiak tuahe amuto kum hong tioi, amuto papaxai waliko ti nga ailele tuahe amuto kum xeu.”

²⁷ Honewa laha kewak ien nake patulaha pate ailan, taxingalaha kilakilan ma pulalaha masin pulaxa.

Kiae ala laha ningahiweng ma hong xewawen ma tin towiahuen ti lialui woulaha ape nga aile haewiawen laha.’’ (Isa 6:9-10)

²⁸ Ape Pol tili kakaian ukek, “Aisia kakak tesol tamakako ti matahaun tuahe kilan teka Ju ti ape ie, lato kum soh meng solian ti Jises. Amuto tioi kewak, tenen meng solian ti Haeu ka Jises awai seilon ti kawatan ti lialui woulaha tin i hani teka kumahe Ju. Ape laha hong soh.” ²⁹Ti i kak kewa, teka Ju nahih salili i ape lato kak he hapatapat alia puki lato.

³⁰ Ahang huohu Pol eng kakahui tehu ing i heheuta. Pate i amuam na seilon nahih paxai i. ³¹I angiamatake kaxiai sale nenein ti Haeu ma sale puase tel Masiwi Jises Krais. Tap tel kongini uke i.

Rom
Teik pasi Pol hani teka kahikahi
Jises Krais ti Rom
Kakain ti haxewai teik pepa
ie

Sai 27 ahang muhin ti Jises moih aliawa ape Haeu waxy i hani tesol tonan, Pol tel aposel tai teik pas ie hani teka kahikahi Jises Krais ti Rom. Lokon ien i toto tehu taon Korin. Rom se tehu taon lalap leili texux xux Itali tetesol Sisa tel masiwi toto. Kilan xux liai tin hahitakan. Pol hahanau ka tap tel seilon kum ailele saun lialun ma kaha kum pon wanen sohot seilon sawi-sawin ti soliai puasakha. Aile ape ti puki haelielakah wasolakaha kapi Haeu i kum sawi. Jises Krais tetel i mat ti kaui kawatan ti lialui woukaha. Mewenae na kaha soh tetan, Haeu oxoxi kaha ti kawatan ti saun lialun ape i namiloi ukek kaha seilon sawi-sawin. Pol kaxi haxewai sale pupuase nauna ti Moses ma kui pohe Holi Spirit, tetel lawe i kakapiti nanahiai teteka namilolaha xooxoan ti Jises Krais. Pol nanamiloi na i lua hani Rom ti hakuiai teka kahikahi Krais ien, teka Ju ma teka Grik.

¹ Nga Pol tel unaui Jises Krais. Haeu kilami nga aposel. I talaheni nga hani kaxi ahutiae meng solian ti Jises Krais ti i ahuma tetan. ² Ti kuwene wanen teka kuluiai kakai Haeu kak kilamiwen tenen meng ien he teik pepaun. ³ Tenen meng solian ien i kakak tel Nati Haeu. Ti i sohot seilon hanowi kaha, i nakuama ti tel masiwi David. ⁴ I seilon sawisawin tapein. Ti lalape kui poh, Haeu hamoiha i ti matean ape i kola hawane ka i se Natun. I Jises Krais tetel Masiwi ti kako. ⁵ Ti lalape soliaian i kilami nga aposel nake pahan kilan seilon haxawai axan. Haeu talo nga hani teka kumahe Ju lehe laha hong soh meng solian ti Jises Krais ma usi nauna tetan. ⁶ Ape tin Haeu kilamiwen amuto hani kahikahi Jises Krais.

⁷ Aile ape nga tai hani amuto hatesol teka Rom ti Haeu waheni, teteka i kilami seilon tetan ape amuto hani hahatapo i tupuamuto.

Nga kamei Haeu tel Tamakako ma tel Masiwi Jises Krais kolai lalape soliaialalu ma hatona hasoliai ti amuto.

Pol nanamiloi ti lua paxaiai teka Rom

⁸ Hutuiai kakaiak nga kak kemulik hani Haeu tel Masiwi ti kako ti lawe waliko Jises Krais aile haniwen amuto. Nga kak kemulik nake ti tesol tesol seilon kakaxi sale xoxoi namilomuto ti Jises Krais. ⁹ Haeu, tetel nga hani hahatapo i tupuak kaxiai meng solian ti tel Natun, i tioi ka nga nameni kakapitini amuto.

¹⁰ Tapai na nga lotu, nga lotu huhualu amuto. Aope ie nga kamei Haeu na ape i nati hei hanimu nga tewau aweisal ti lua hani kapimuto na masin pahan. ¹¹ Pahak wanen nga paxaimu amuto ti hualiamuto lehe amuto kui ahe ti pohe Holi Spirit. ¹² Salangawe namilok masin lehe xoxoi namilokako ti Haeu i hakui ati kako.

¹³ Teka akikik ti Krais, pahak amuto tioi kewak, nga tohongi hakilawen lehe nga lua paxai amuto tuahé hina waliko lawe i kongini nga hanima tataen. Sohotuak hani kapimuto lehe pupuasak wasolamuto i kau anan masin ti i sohotuen leili teka kumahe Ju liai ti nga kapi laha. ¹⁴ Tinuk ilameni ka se ape pupuasak wanen kaxiai meng solian ti Jises Krais hani hatesol seilon, teka Grik ma teka kumahe Grik, teka seilon aneso ma teka tap titioalaha. ¹⁵ Aile ape namilok xooxoan wanen ka meng solian ien tin nga kaxi hetekie hani amuto teka toto Rom.

¹⁶ I kum hahieni nga kaxiai meng solian ti Jises Krais nake taen seilon hong soh, ti kui pohe Haeu i awai laha hatesol ti kawatan ti lialui woulaha. I awaimu teka Ju nake laha hongoi imat ape imuh teka kumahe Ju. ¹⁷ Se tenen meng solian ien i nexi kola aweisal ti hasawiai wasolakaha hani Haeu. Tap tewau aweisal tutuen, mewenae na kaha hana hatapo xoxoi namilokaha hani Jises Krais kaha sohot seilon sawisawin ti puli Haeu. Masin ti tel kuluiai kakai Haeu tai kueiniweni, i ukek, “Teka seilon sawisawin, xoxoi namilolaha ti Haeu neneini laha ape laha to lian tehue kapin.” *(Hab 2:4)*

Lialui woi seilon

¹⁸ Haeu tel Masiwi tapein kola ka i lengeini teka seilon laha kum nam waxy i ma teka laha aile hahakila saun tenen pate lialun ape i kahui aliake hani laha. Ti lialui woulaha i tipahi muneni waliko tenen salan sale Haeu ti ala teka seilon tioi. ¹⁹ Tuahé sale Haeu hoi liai xewan nake puki Haeu kola hahatakei hani laha. ²⁰ Salan kaha kum ninginahgi i tuahé kaha papaxai waliko ti i aile lilian ti i tanomiwa tehu pon ie. I kola hawanewen lalape kui pohen ti tap tahi

taopoan. Aile ape ala kaha tioiwa ka i se Haeu wanen. Nake ti tetenen ala tap tel ukek i tap titioan ti Haeu.

²¹ Ape kalak teteka laha kum nam waxi Haeu hina titioalaha tetan, laha kum sameni i ma kum kak kemulik ti lawe waliko i aile. Teka seilon ien tap solian ti namilolaha ape ti takalahui patulaha laha kum paxai tioi waliko tenen lialun ma solian. ²² Laha sokok laha seilon tenen pate aneso tuahe salan tetan namilolaha tap wanen. ²³ Laha kum paxai tioi lapape xewai Haeu ma pohen tel tap tahih matean. Laha lotui waxy waliko ti laha tua tanomi hanowi seilon, kalak i aneso mat. Tin laha tanomi manihuh, manixux hetekie tataen loloma lehe waxy laha lotui.

²⁴ Aile ape Haeu hani lioi laha usi isiai pahahaha ti ailei waliko tenen i haloloa leilo-laha. Ape laha teheni hahiallu tupualaha nake ti ailei saun lialun ti wawan hehin. ²⁵ Ti ala laha soh waliko salan sale Haeu, laha soh non waliko tenen putain. Laha lotui waliko ti tatanomiai Haeu ti ala laha lotui ma sameni non Haeu tetel i tanomi lawe waliko. I se tetel ala kaha seilon haxawa kapitiniwa axan lian tehue. Salan wanen ala masin ien.

²⁶ Nake ti tenen ien Haeu hani lioi laha hongeni isiai pahahaha ti ailei saun tenen pate hienain. Aile ape hehin teka, kumahe laha usiusi saun ti wawan hehin tenen ti i onoteni namili Haeu, laha eng akati non hehin liali. ²⁷ Tin masin hina wawan laha lioi aweisal sawisawin ti wawan hehin ape laha is eliel eng akatiai wawan liali. Ape laha aile saun tenen ti pate hienain alia hani laha tel tel. Ti lialui woulaha ien laha uke hapoponowi kahulaha.

²⁸ Teka seilon laha kum nam waxy Haeu, laha ukek ka tap solian tetan ti tioiwa Haeu. Aile ape i hani laha usi lialui namilolaha ti ailei waliko tenen ala i kum alune. ²⁹ Laha xuhai saun lialun tenen tenen ma kumahe sawisawin. Namilolaha xoxoan ti ailei waliko tenen lialun hani seilon liali. Laha watakai na seilon liali xoim laha ma laha tin halepean. Laha seilon ti hatanoi wasol, pulutiai teka liali ma teleiai seilon. Laha misahi ma nam hahiallu seilon liali. ³⁰ Teka laha kakak tehitih seilon, laha watakai Haeu, laha paxai teheni seilon liali, laha itini laha ma weli hanasanas. Laha aneso hawane namiloiwa aweisal ti ailei saun lialun ma tin laha tahi kakain ti tamalaha ma tinalaha. ³¹ Laha kum hapuasa namilolaha ma kum aile usi kakaialaha. Laha tin tap wawahen

ma tatahan leili tialaha. ³² Kalak laha tioi ka ti sawisawiai Haeu i namiloi ukek ka teteka laha aile tenen saun lialun ien, kahulaha mewenae matemate, laha aile tatale tesol waliko ien kasinan ti ape laha hongeni hetekie teteka laha ailele saun tenen lialun ien.

2

Sawisawin wanen paxai kolongenian ti Haeu

¹ Aile ape Haeu kahui aliake lialui woi lawe seilon teteka laha aile saun lialun. Amuto teteka ti na amuto howini halialu woi seilon liali, puki amuto hahani Haeu kahui aliake lialui woumuto nake amuto tin amuto ailele saun lialun. ² Kako tioi hawane ka paxai kolongenian ti Haeu pate sawisawin wanen. Lawe i kahui hapoponowi kaha ti lialui woukaha. ³ Aile ape amuto teteka na amuto howini halialu woi seilon liali a tin amuto ailele saun lialun, kaie amuto pon saliniai kawatan ti na Haeu hani amuto? ⁴ Paxaiwa lapape ewiaw Haeu i kola hahani amuto. I kum sasaxoh kahuiamuto ti lialui woumuto, lawe i tani waxy kapitini amuto. Nakon pate amuto kum paxai tioi ka soliai Haeu ien i nexi hani amuto aweisal ti na amuto towiahu ti saun lialun ti amuto?

⁵ Tuahé tap amuto nam waxy. Alaii patumuto halenge aheheke Haeu hani tataen ti hinitiai lawe seilon ti i axi kawatan hani teka ailei saun lialun, usiwa sawisawiai paxai kolongenian tetan. ⁶ Taen ien Haeu kahui hapoponowi hawane kaha ti lawe waliko kaha ailewen. ⁷ Seilon teka, laha kum lioi wanen ailei waliko tenen solian. Ien i kola ka tuah wanen ti laha na Haeu sameni amuke laha ma hani laha hanawain ti tap tahih tapoan. Seilon teteka ien, Haeu hani laha to kapin lian tehue. ⁸ A seilon teka, laha namiloi wawaxi mewenae laha. Laha kum usi waliko tenen salan, laha usi waliko tenen ti i pahoxai namili Haeu. Seilon teteka ien, ti lengi Haeu i axi hawane laha kawatan. ⁹ Teteka laha aile kakapitini waliko lialun, laha kau moloan lapap ma tialaha i kawat hawane. I sohot hanimu teka Ju ape tin hetekie hani teka kumahe Ju. ¹⁰ A teteka laha aile kakapitini waliko solian, Haeu sameni amuke laha ma i hatona hasolia tialaha. I aile non hanimu teka Ju ape tin hetekie hani teka kumahe Ju. ¹¹ Ati laha uke hapoponowi kahulaha nake Haeu kum paxai nenexi seilon.

¹² Kalak teka kumahe Ju laha kumahe hahitake tesol nauna ti Haeu hahaniai Moses, laha lialu tamus na laha to aile tatale

saun lialun. Ape teka laha hoi hahitake tesol nauna ien, na laha to aile tatale saun lialun, Haeu kahui aliake hani laha usiwa titioalaha ti tesol nauna ien.¹³ Se sawisawin na laha uke kawatan nake kumahe ka tuahe ti hongoi tesol nauna ien Haeu paxai ukek laha seilon sawisawin, mewenae na laha aile usi waliko ti tesol nauna ien kakak.¹⁴ Teka kumahe Ju, kalak tap titioalaha ti tesol nauna Haeu hahaniai Moses, laha pon aile usiwaliko ti tesol nauna ien kakak. Puki laha ilameni tioi waliko tenen ewi ma na lialun. Aile ape i pon na nanahialaha i pahowi hani tesol nauna ien kalak laha tai hong ti taxingalah.¹⁵ Saun ti laha kola ka waliko ti tesol nauna hahanau hoi liai leilolaha. Puki namilolaha tin i kola ukek ien. Hina i tieni laha, hina i namiloi amuke laha.¹⁶ Taurn ti hinitiai lawe seilon, Haeu hani Jises Krais paxai kolongenai woulaha kalak tataen waliko ti laha aile mumuneni. Ti nga kakaxi meng solian ti Jises Krais se naga kakaxi tesol waliko ie.

Nauna ti Moses ma teka Ju

¹⁷ Amuto teteka Ju amuto amasake hawane ka amuto se akiki Ju ma tin seilon ti Haeu kilamiwen tetan, amuto hana hahatapo xoxoi namilomuto hani nauna ti Moses. Amuto sokok ka usiwaloko tesol nauna ien i hasawi wasolamuto kapi Haeu.¹⁸ Se amuto tioi waliko tetenen Haeu pahan amuto ailewa. Amuto paxai tioi waliko tenen sawisawin tapein nake laha hanauen amuto nauna ti Moses.¹⁹ Amuto soh hawane ka amuto pon neiniae teka kumahe Ju hani Haeu masin na tel seilon neini tel pulaxa. Amuto ukek amuto pon kola haxewai Haeu hani seilon masin xewan i haxewa seilon he tilokoan.²⁰ Namilomuto pate i elielie k amuto pon nau hasawiae teka tap titioalaha ma hanau teteka laha masin akaik kokol laha kum tioi Haeu nake amuto tioi hatapoen nauna ti Moses ti hina anesoin ma waliko salan.

²¹ Amuto hahanau seilon liai usiwaloko nauna ien. Alahan amuto kum hanau aliakeku amuto? Amuto hohone seilon ka kum xuxuina tuahe puki alia amuto hina amuto xuxuina.²² Amuto ukek kum ailele saun lialun ti wawan hehin a puki alia amuto ailele. Amuto watakai hawane seilon lotui waliko tenen kumahe Haeu a hina amuto aile waliko tenen i tenehi haliulu tetel i salan Haeu.²³ Pate amuto hanasanaseka nauna ti Moses tuahe amuto kola tapoi lomuto hani Haeu ti amuto xaputi nauna ien.²⁴ Aile ape ala kako kum tataxini ti pepai

Haeu kak ukek, "Teka kumahe Ju laha kak saxuti Haeu nake ti woi teka Ju."¹ (Isa 52:5)

²⁵ Amuto teka Ju amuto kewen teik kikilam ti kotiai uli walikoumuto ti kolakol ka amuto seilon ti Haeu. Tuahe teik kikilam ien ti tuah mewenae na amuto usi nauna ti Haeu hani Moses. Na amuto tahi tesol nauna ien, kikilam ti amuto tap pupuasan ape amuto masin seilon ti laha kum tioi Haeu.²⁶ Ape teka kumahe Ju laha tap kikilam tenen ien, Haeu paxai ukek laha seilon tetan na laha aile usi waliko ti nauna tetan kakak.²⁷ Na masin teka tap teik kikilam ien laha aile usiwaloko nauna ti Haeu hani Moses, i kola ka sawisawin wanen na Haeu axi kawatan hani teka Ju laha xaputi tesol nauna ien kalak laha kewen teik kikilam ien ma nauna ti Haeu tataiai Moses toi laha.

²⁸ Kumahe teka laha tua aile usiwaloko nauna ti teka Ju laha ape seilon ti Haeu. Tin masin kikilam ti laha kewen ti kolakol ka laha seilon ti Haeu, i kum aile Haeu paxai ukek laha seilon tetan wanen.²⁹ Seilon ti Haeu wanen se teteka laha hani Haeu hauni leilo-laha. Ukei kikilam ti uli walikoi seilon ma tuah usiwaloko nauna ti Moses, i kum towiahua hasolia seilon. Mewenae na kaha hani Holi Spirit kapitiaka i aile kaha sohot seilon haun. Na masin ien, kalak seilon kum sameni kaha, Haeu tetel sameniaka.

3

Sawisawiai Haeu tap tahi sohiaian

¹ Uke hina ti amuto laha kamea, lahe aweisal lehe kako teka Ju xoini teka kumahe Ju? Ewian la tel Ju uke ti teik kikilam ti kotiai uli walikoun?² Kilan solian tetan na tel seilon i nakuama ti teka Ju. Solian tenen ti pate tuah ie. Se kako teka Ju Haeu hanium kakaian lehe kako usi ma kaxi sawateni.

³ Salan hina teka laha xaputi namil ti Haeu xinotiwem kapi laha. Tuahe kalak na masin ien, nakon Haeu kum hamalumini twaak tetan?⁴ Nga kum ukek! Kalak na tap wanen seilon aile usi waliko ti i kakawen, Haeu lawe i aile usi hawane waliko ti i kakawen. Masin ti leili pepai Haeu tel masiwi David ukek, ti i kaakane Haeu, "Lawe seilon paxai tioiwa ka kakaiam mewenae salan.

Na tel seilon ukek paxai kolongenian tetam

kumahe sawisawin, i kum pon waxainiai suluam

nake lawe o kola ka o mewenae sawisawin."⁵

(Ps 51:4)

⁵ Uke teka ti amuto namiloi ukek, na masin lialui woukako i kola hawane ka Haeu se pate sawisawin, kaie i poponowi na i kahui kako ti lialui woukako? Nga tua kak hahanowii paxapaxa ti seilon. ⁶ Kum nanamiloi ukek ien. Na masin kumahe sawisawin ti Haeu kahui kako ti lialui woukako, ala kumahe i poponowi ti i axi kawatan hani tuahe na seilon ti tehu pon ie. ⁷ Teko ti amuto uke laha kak pahoi nga ukek, na masin putai xoxoi namil ti usiai aweisali Haeu i kola hawane soliai sawisawiaian ma i aile seilon haxawa hawane axan, kum pon ti na i tieni kaha ti saun lialun. ⁸ Hina seilon laha kak putini ka amite tesol apostol hahanau ka ewi na seilon aile saun lialun lehe teka liai paxai tioi soliai Haeu. Seilon teka ien, Haeu hani hapoponowi hawane laha kawatan.

Tap tel seilon sawisawin ti puli Haeu

⁹ Kaie kako namiloi ukek ia? Nakon kako teka Ju pamu ewian ti teka liai? Tap wanen! Amite kolawen ka lawe seilon, teka Ju ma teka kumahe Ju, kaha hatesol aile saun lialun. ¹⁰ Masin ti leili pepai Haeu i ukek, “Tap tel seilon sawisawin ti puli Haeu.

Tap tel na seilon i kum aile saun lialun.

Tap wanen.

¹¹ Tap tel i xeu hawane aweisali Haeu, tap tel i hitoloke hawane Haeu.

¹² Hatesol seilon talewen tehitolaha hani Haeu,

laha hatesol talesawen.

Tap tel i aile waliko tenen i hasolia seilon.

Tap tuahe na tel.” (Ps 14:1-3, 53:1-3)

¹³ “Awalaha mewenae kohan.

Laha seilon ti weli pipis.

Kakaialaha sisiaian wauni puliweu.” (Ps 5:9, 140:3)

¹⁴ “Laha weli kak sai halilui seilon hetekie wawatak.” (Ps 10:7)

¹⁵ “Lawe laha is eliel hawane ti halilui ma teleiai seilon.

¹⁶ Tesol tesol na laha tahiawa laha aile hakila waliko

tenen kohan ma hakawata tiai seilon.

¹⁷ Teka seilon ien tap wanen namil ti hasoliai wasole seilon.” (Isa 59:7-8)

¹⁸ “Tap wanen lolaha hani Haeu.” (Ps 36:1)

¹⁹ Taen ie ala amuto paxai tioi ka tap tel i sawisawin ti puli Haeu, kasinan kako teka Ju nahe Moses haniwien kako nauna ti Haeu ti usian. Aile ape kaha hatesol, teka Ju hetekie lawe seilon ti tehu pon ie kaha kum pon awaiakaha ti na Haeu tieni kaha ti saun

lialun. ²⁰ Ti tenen ien kako paxai tioiwa ka Haeu kum ukek kaha seilon sawisawin ti usiai nauna tetan ti hahaniai Moses. Nauna ien i kola haxewa ka kaha hina saun lialun.

Sale hasawiai wasolakaha hani kapi Haeu

²¹ Aope ie Haeu kola haniwen kaha aweisal ti hasawiai wasolakaha hani kapin, aweisal liai tenen ti usiai nauna ti hahaniai Moses. Puki Moses ma teka kuluiai kakai Haeu lato taiwen leili pepai Haeu sale tenen ien. ²² Haeu namiloi ukek wasole seilon hani kapin i sawi na namilokaha xooxan ti Jises Krais. Haeu hei tewau aweisal ien hani hatesol teka laha soh ti Jises Krais, teka Ju ma teka kumahe Ju. I kum nam nenexi na tel.

²³ Se lawe seilon aile saun lialun. Nanahia-akaha hatesol pate i tae haxawai axe Haeu.

²⁴ Ti lalape soliai Haeu i aile wasolakaha hani kapin i sawi, kumahe ti soliai pupuasakaha. I aile ukek ti Jises Krais mat kahuiai saun lialun ti kaha. ²⁵ Haeu talo Jises Krais mat ukei kawatan ti lialui woukaha lehe ape i hatapo lengean. Kaha kum uke kawatan ti saun lialun na kaha soh hawane ka Jises mat ti ukei totonakaha. Haeu aile ukek ien lehe waxi i kola ka waliko ti i ailele se sawisawin. Imat ti tahai Krais, i kum kahui aliake lialui woi teka seilon, i tani waxi kapitini laha. ²⁶ Aope ie saun lialun ti kaha ape kahuian. I kola hawane ka waliko ti Haeu aile se pate sawisawin. I kola ka puki i se pate sawisawin ma i aile kaha teka hina namil xooxan ti Jises Krais wasolakaha kapin i sawi.

²⁷ Nameniwa, kumahe ka ti usiai nauna ti Moses i hasawi wasolakaha hani kapi Haeu. Aile ape i kum pon wanen kaha sameni aliake kaha. Ti xoxoi namilokaha hani Jises Krais i aile wasolakaha kapi Haeu i soli. ²⁸ Ape amuto papaxai? Mewenae ti xoxoi namilokaha hani Jises Krais wasolakaha hani kapi Haeu i sawi, kumahe ti aile waliko ti nauna ti Moses hahanau naake seilon kum pon usi hawanean.

²⁹ Namiloi paxaiwa. Nakon Haeu se mewenae Masiwi ti teka Ju? Kumahe, tin hetekie teka kumahe Ju. ³⁰ Pate amuto tioi ka Haeu se telawae ape tin aweisal tewawawe ti hasawiai wasolakaha hani kapin. Aile ape mewenae ti xoxoi namil ti Jises Krais wasolakaha hani kapi Haeu i sawi, kako teka hina kikilam ti kotiai uli walikoukako ma teka kumahe Ju laha tap kikilam tenen ien. ³¹ Uke amuto namiloi ukek ka ape tap pupuase nauna ti Moses nahe kaha hina namil xooxan ti Jises Krais. Kumahe wanen

masin ien. Xoxoi namilokaha ti Jises Krais i kola ka nauna ti Moses hina tupunan.

4

Xoxoi namili Abraham ti Haeu

¹Namilo paxaiwa Abraham tel tamakako teka Ju ti matahaun. Ti lahe aweisal wasolan hani kapi Haeu i sawi? ²Na masin i sawi ti soliai pupuasan, ala i pon sameni aliakean hani seilon. Tuahé tap salangawan na i sameni aliake i hani Haeu. ³Ala amuto tioi waliko ti leili pepai Haeu i ukek, “Abraham soh hawane Haeu ape ti xoxoi namilon ien Haeu paxai ukek ka i tel seilon sawisawin.” (*Gen 15:6*)

⁴Nga kaxi haxewa aheke ukek. Tel na i puas hahitake seilon liai, i uke kahun ti tenen puasain i aile. I kum namilo ukek tuaha ti soliai tel kahuian i tua axi i moni, ien se liai kahi puasain. ⁵Tuahe soliai wasolakaha hani kapi Haeu kumahe ka kahi pupuasakaha. Ien se ani xoxoi namilokaha ti Jises Krais. Kaha soh ka Haeu i pon aile teka seilon laha xauxaun tetan, wasolalaha hani kapin i sawi.

⁶Tel masiwi David kakawen tetenen ti i kakaxi lalape amuumui teteka seilon ti Haeu namilo ukek wasolalaha hani kapin se sawisawin kumahe nake ti pupuasalah. I ukek,

⁷“Amuamui teteka seilon
ti Haeu oxoxi laha ti kawatan ti lialui woulaha.
Lialui saun ti laha ape susunian.

⁸Amuamui teka seilon ien.

Tap Haeu tel Masiwi po hapeti lialui woulaha
he namilon.” (*Ps 32:1-2*)

⁹Nakon amuumu tetenen mewenae ti kako teteka Ju hina kikilam ti uli walikoukako ka hetekie teka tap kikilam tenen ien? Salan wanen ti kako kakaxi ka Haeu namilo ukek wasole Abraham hani kapin se sawisawin nake ti xoxoi namili Abraham hani i. ¹⁰Namilo paxaiwa. Lokon wanen wasolalalu i soli? Nakon i sohot muhin ti Abraham uke kikilam tenen ien ka imat? Kumahe muhin, wasolalalu i soli imat ti ukei kikilam ien.

¹¹Tenen kikilam ien ti Abraham uke se kolakol ka hoi liai namilon xoxoan ti Haeu ma tin i sawisawin ti puli Haeu imat ti i aile tenen saun ien. Aile ape Abraham i sohot tame hatesol seilon laha soh ti Haeu hanowi i, kalak laha tap kikilam tenen ien. Wasolalaha hani kapi Haeu i sawi nake ti xoxoi namilolaha tetan. ¹²Tin masin Abraham

se tamakako teka Ju, kumahe mewenae teteka kako hina kikilam ti uli walikoukako tuahe hetekie nanahiakako i ukene xoxoi namili Abraham ti Haeu, imat ti i uke tenen kikilam ien.

¹³Kumahe nake ti usiai nauna ti hahaniai Moses, Haeu kakane Abraham ka i ma teka nakuama tetan laha sohot tame lawe waliko ti tehu pon ie. Haeu aile nake i namilo ukek Abraham se seilon sawisawin. I ahuma ti xoxoi namili Abraham hani i. ¹⁴Na masin kako uke waliko ti Haeu kakawen i hani nake ti usiai nauna ti Moses, tap pupuase xoxoi namilokaha hani Haeu. Ape tin tap kaha po uke waliko ti Haeu kakawen i hani nake kaha kum pon usi hatapoi nauna ien.

¹⁵Aile ape i halenge Haeu nake lawe kaha xaputi tunahi. Mewenae na liai Haeu tai hani kaha nauna ien, kaha kum xaputi.

¹⁶Aile ape waliko solian ti hahaniai Haeu, kaha uke ahuma ti xoxoi namilokaha tetan. Ti lalape soliaian i hani kaha, kumahe ti soliai pupuasakaha. Hatesol teteka nakuama ti Abraham, hoi liai kaha uke na kaha hina namil xoxoan ti Haeu masin ti Abraham, kumahe mewenae na kaha teka kahikahi Jises Krais aile usi saun ti teka Ju. Abraham se tamakaka hatesol teteka kaha soh ti Jises Krais. ¹⁷Masin ti leili pepau Haeu kakane Abraham ukek, “Nga aile o sohot tame kilan seilon ti tesol tesol ti tehu pon itan.” (*Gen 17:5*) I sohot ukek nake namili Abraham xoxoan ti Haeu, tetel i hamoiba aliake teka maten ma i tua kak hasohotu waliko ti liai tap.

¹⁸Kalak tap salangawe monomon tetan ka i sohot tame tel na akaik, ti xoxoi namilon ti Haeu, Abraham mon atengi tatale ape se i sohot tame kilan seilon ti tehu pon ie. Masin ti Haeu kakanewen i ukek, “Kilan wanen teteka laha nakuama tetam.” (*Gen 15:5*) ¹⁹Xoxoi namilon ti Haeu tap wanen i tataelih kalak i tioi ka i salaimat kasiawen ti na i sohot tame tel na akaik ti ahungun ape sai 100 ma tel axoan Sara se tin lieheh.

²⁰Abraham tap tahi kapaxei waliko ti Haeu kakawen i aile, xoxoi namilon ti Haeu i xox aheahelle. Xoxoi tutuhan i haxawa hawane axe Haeu. ²¹Abraham soh hawane ka Haeu pon ailei waliko ti i kakawen i aile. ²²Leili pepai Haeu i kaxiwen ka nake xoxoi namili Abraham ti Haeu, Haeu namilo ukek i se seilon sawisawin.

²³Tetenen ien kumahe mewenae hani Abraham. ²⁴Kaha tin Haeu namilo ukek seilon sawisawin na namilokaha xoxoan tetan, tetel i hamoiba aliake Jises tel Masiwi

ti kaha.²⁵ Haeu hani lioi Jises mat nake ti lialui woukaha ape i xahateni aliake Jises ti matean lehe wasolakaha hani kapi Haeu pon i sawi.

5

Teteka wasolalaha hani kapi Haeu solian laha leili amuam

¹Haeu namiloi ukek kako ape sawisawin nake kako hina namil xooaan ti Jises Krais. Aile ape wasolakako hani kapi Haeu solian, usiwa waliko ti Jises Krais tel Masiwi ti kako ailewen. ²Nake ti xoxoi namilokako ti Jises Krais i hei hani kako aweisal ti ukei lalape solian ti Haeu ape aope kako to ilalameni tutuen. Ape kako amuam hawane ti kako mon atetengi taen ti kako tuai Haeu ti hatesol waliko solian tetan.

³Kumahe mewenae ien, tin kako amuam taun ti kawatan nake kako tioi i hanau kako kau lungiae waliko. ⁴Ti na kako nouhi kawatan, kako uke he kuin ape Haeu amuke kako. Ti i amuke kako, monomon ti kako xox hawane. ⁵Ape tenen monomon ti kako ien i kum hatahunoso kako nake Haeu waheni hawane kako. Se Holi Spirit ti Haeu haniwen kako i aile kako paxai tioi lalape wawahen ti Haeu.

⁶Taun teteuhu ti Haeu kilamiwen, ti kako tap wanen huuhal, Jises mat hualiakah teka seilon ailei saun lialun. ⁷Hanimah kaha, kalak tel seilon solian, kumahe malimun ti mat hualian, kalak teka uke laha kum nomuha. ⁸Tuahe Haeu kola hawanewen lalape wawahen tetan hani kaha ti Krais mat ukei totonakaha lokon ti kaha seilon lialun tutuen.

⁹Nake ti matei Jises Krais, kako teka hina namil xooaan hani i, wasolakako ma Haeu ape i soli. Aile ape kako soh hawane Jises Krais awai kako ti lengi Haeu taen ti i axi kawatan hani teka seilon ailei saun lialun. ¹⁰Lokon ti kako papahoxai tutuen Haeu, i aile kako pakata hani kapin nake ti matei tel Natun. Aile ape i pon hawane kako soh ka Jises Krais awai kako ti kawatan tenen tap tahi tapoan nake i molihin ma i pupuas leilokako. ¹¹Kumahe mewenae tenen ien. Tin i pon kako amuke hawane Haeu usiwa waliko ti Jises Krais ailewen ti i pakateni kako hani kapi Haeu.

Sale pupuase Adam ma Krais

¹²Adam, tetel kaha nakuama tetan, i hasohotu saun lialun hani tehu pon ie. Tetenan ien i hutui matemate. Ape i sohot hani lawe seilon nake kaha hatesol aile saun

lialun. ¹³Imat ti nauna ti Haeu hahaniai Moses, saun lialun hoi liai ien. Haeu kum tieni seilon ti xaputiai nauna ien nake lokon ien tap nauna. ¹⁴Tuahe lokon ti Adam hanimah taen ti Moses, matemate i kakalauhi hatesol seilon, tataen teka laha aile saun lialun tetenan kumahe ti xaputiai nauna hanowi ti Adam. Tahitah ti Adam, i aile halialu hatesol seilon a waliko ti Jises Krais aile i hasolia kaha hatesol.

¹⁵Soliai Haeu hani kaha, soliaian i xoini wanen lialuan ti tahitah ti Adam hasohotu. Matemate i tunahi kaha seilon nake ti lialui woi seilon tel. Tuahe xuhai solian kilan seilon uke nake ti lalape soliai seilon tel, Jises Krais. ¹⁶Lalape soliai Haeu hani kaha, anan liai tenen wanen ti ani lialui woi seilon tel. Saun lialun ti Adam i hutui halenge Haeu ti tieniakah ti lialui woukaha. Tuahe kalak pate kilan saun lialun ti kaha, wasolakaha hani kapi Haeu pon i sawi nake ti waliko ti Jises Krais ailewen ti awaikakah. ¹⁷Saun lialun ti seilon tel aile matemate tinoi kongini kaha. Tuahe kaha teteka kaha uke lalape soliai Haeu ma kaha ilameni tioi ka wasolakaha hani kapi Haeu sawiwen, kaha to wawaxaini lawe waliko lian tehue nake ti Jises Krais.

¹⁸Aile ape nake ti seilon tel tahi kakai Haeu, kaha hatesol tunahi lengelenge ti Haeu ti lialui woukaha. Tuahe tin seilon tel, Jises Krais, i aile waliko sawisawin ti i hong tamani Haeu. I hei aweisal hani kaha hatesol lehe wasolakaha hani kapi Haeu i sawi ape kaha sohot seilon haun ti usian. ¹⁹Nake ti tahitah ti seilon tel, Adam, saun lialun kalauih kaha kilan. Tin masin nake ti hong tamaniai kakain ti seilon tel, Jises Krais, wasole kilan seilon i sawi kapi Haeu.

²⁰Nauna ti Haeu hahaniai Moses i soholih lehe waxi seilon paxai tioi uke lialui woulaha. Tuahe ti seilon to aile ahehekele saun lialun, lalape solian ti Haeu hani kaha i lap aheahela. ²¹Masin ti saun lialun tinoi kokongini seilon hani aweisal ti matemate, lalape soliai Haeu hani kaha i oxoxi kaha hani aweisal ti hasawiai wasolakaha hani kapi Haeu lehe kaha uke tonain kapin ti tap tahi tapoan nake ti waliko ti Jises Krais tel Masiwi ti kaha ailewen.

6

Teka kahikahi Krais taha hawanewen ti saun lialun

¹Ape lehe kako kak ukek ia? Kaie kako to aile tatale saun lialun lehe lalape solian ti Haeu hani kako to lap aheatale?

² Tap wanen. Kako kongini uke isiai pa-hakako ti ailei saun lialun. Kako masin tel seilon maten, i kum pon hongenai totohong. ³ Nakon amuto maluhewen ka hatesol teteka kako kewen baptais ti kolakol ka kako pakatawen kapi Jises Krais, ien masin ka kako mat ohoiwen i. ⁴ Aile ape ti kako kewen baptais, ien masin ka kako mat ape tihina usiwen i. Tuahe Jises Krais i xahat alia ti matean ti kui pohe tel Taman. Ape kako tin masin ka kako xahat alia lehe kako ape seilon haun ti usiai Haeu.

⁵ Kako pakata haniwen kapi Jises Krais ti kako selai kako ti aweisal lialun ti kako to usiusi. Ien masin ka kako mat ohoi i. Tin masin kako pakata hani kapit ti kako sohot seilon ti usiai aweisali Haeu. Ien masin ka kako moih alia usi Jises Krais. ⁶ Kako tioi ka ti laha tahi hakea Krais he kros masin ka laha tahi hakea hetekiewen lialui nanahai-akako ti imat. Ien lehe kako pon tahiiai isiaakako ti ailei saun lialun ape kako kum hani lioi saun lialun kapiti kakapitini kako. ⁷ Kako ape kumahe hahitake saun lialun, masin seilon maten i taha hawanewen ti saun lialun. ⁸ Ien masin ka kako mat ohoi Jises Krais. Aile ape kako soh ka tin kako to kapin. ⁹ Kako tioi hawane ka salan nake Krais xahat alia ti matemate ape tap i po mat ulea. I kuoselewen ti pohe matemate. ¹⁰ Matean tehue wanen ti xoini tamusukei saun lialun ape aope ie i pakata hahawane kapi Haeu. ¹¹ Aile ape amuto namiloi kewak, amuto masin seilon maten i kum pon hongenai totohong ti ailei saun lialun. Pakata-iamuto kapi Jises Krais, i kola hawanewa ka nanahiamuto i hahawaxa Haeu.

¹² Amuto kum hahani saun lialun kapiti amuto. Kum hohongeni lialui isiaiamuto.

¹³ Kum hani lilioi tuahe tesol ti tupuamuto i alali ailei saun lialun. Imat amuto xaux-aun wanen ti Haeu. Tuahe aope ie amuto seilon haun. Aile ape hani hatapoa Haeu tupuamuto. Tesol tesol ti tupuamuto ha-puasa usiwa namili Haeu ti ailei saun solian.

¹⁴ Kum hani lilioi lialui isiaiamuto kapiti amuto. Amuto kumahe hahitake nauna ti Moses ti i kum kongini uke amuto ti ailei saun lialun. Amuto ape hahitake lalape soliai nenein ti Haeu.

Teka kahikahi Krais seilon ti ailei waliko sawisawin

¹⁵ Kaie lahan? Ti kako ape hahitake lalape soliai nenein ti Haeu, kaie kako aile tatale saun lialun pake kako kumahe hahitake nauna ti Moses? Tap wanen. ¹⁶ Nakon

amuto kum tioi ka amuto sohot unaui tel ti na amuto hong usi? Na amuto usi lialul isiaiamuto, amuto se hahitake saun lialun ti i neini amuto hani aweisali matemate. Tuahe na lawe amuto hong tamani Haeu, i amuke hawane nanahiamuto. ¹⁷ Kemuk saun lialun kakapiti amuto. Tuahe kemuliwanen Haeu nake ti leili atemuto ape amuto hong usiwen kakaian ti amuto hon-goen. ¹⁸ Amuto taha hawanewen ti saun lialun. Amuto ape unaui Haeu ailei waliko sawisawin.

¹⁹ Nga hapuasa kakain tetenen ti nexi hani amuto nake pamu malimun ti amuto xeu. Kemuk lawe amuto hapuasa tupuamuto ailei saun lialun ma ti xaputiai nauna ti Haeu. Tuahe aope ie, hani hatapoa tupuamuto ailei saun solian lehe lawe amuto hani hatapo Haeu leilomuto ma lawe amuto aile usi namilon.

²⁰ Lokon ti amuto unaui saun lialun, tap wanen amuto tani waxy ailei waliko sawisawin. ²¹ Waliko la solian amuto kewen ti lialui woumuto tenen ti aope ie amuto hi-hienake? Waliko ien i tua neini amuto hani aweisali matemate. ²² Tuahe amuto taha hawanewen ti saun lialun ape amuto sohot unaui Haeu. Ani tenen ien, Haeu huali amuto lehe amuto hani hatapo i tupuamuto ma amuto uke tonain kapin ti tap tahi tapoan. ²³ Nameniwa ka kahi saun lialun se matemate. Tuahe teteka kako pakata hahawane kapi Jises Krais tel Masiwi ti kako, ti lalape soliai Haeu i hani kako tonain kapin ti tap tahi tapoan.

7

Kahikahi Krais tahain ti hahitake nauna ti Moses

¹ Tesol akikik ti Krais, amuto tioi hawanewen nauna ti Moses. Amuto tioi ka nauna ien kakalauhi seilon mewenae ti i moihin tutuen. ² Nga kak kola ukek. Na tel hehin hina axoan, nauna ti Moses kongini hahamalumini i kapi tel axoan ti i moihin tutuen. Tuahe na tel axoan mat, i koukewen ti tehu salaian ien. ³ Aile ape na i uke tel wawan liai ti tel axoan moihin tutuen, seilon axai i hehin ti tua hani lalolal tupuan. Tuahe na tel axoan matewen, nauna ti Moses kum kongini i, ape na i sal ulea, laha kum axai i ukek ien.

⁴ Tesol akikik ti Krais, tutuhi kakaia masin. Nauna ti Moses kum xinoti kongini amuto. Amuto ape seilon haun nake amuto pakata hahawane kapi Krais, tetel ti Haeu

hamoiha aliaakewen. Masin ti tel hehin, i ape hahitake ngangahat ti tel axoan haun, amuto ape hahitake ngangahat ti Krais lehe ani puasamuto se solian hani Haeu.⁵ Kemuk, lokon ti kako tua aile usiusi isiai tupuakako, kako is eliel ahe ailei waliko ti Haeu hahalini. Lialui isiaiakako i pupuas leilokako ape lialui pupuasakako neini kako hani aweisali matemate.⁶ Tuahape ie kako selaiawen ti lialui nanahiakako ti imat hani hahitake Jises Krais. Aile ape kako tahawen ti hahitake nauna ti Moses lehe Holi Spirit tetel ape kapitiakako ti ailei puase Haeu, kumahe tuahue usiai teik teik ti nauna masin ti imat.

Nauna ti Moses i kola hatakei saun lialun ti kaha

⁷ Kaie kako ukek nauna ti Moses hina lialun tetan? Tap wanen. Nake ti nauna ien kako tioi waliko tenen lialun. Teik ti tesol nauna i ukek, “Kum hohongeni lialui isiaiam.”⁸ (Exod 20:17) Na masin tap teik nauna ien, nga kum tioi ka saun tenen ien kumahe sawisawin.⁹ Tuahue na kaha tua usiusi isiai tupuakaha, titioakaha ti teik nauna ien i tua hahika kaha ti xaputian. Lialui isiai seilon ti ailei saun lialun kumahe pate xoxoan na masin tap nauna.

¹⁰ Lokon ti kako kumahe xewan ti nauna, tap kako to nanamiloi waliko ti kako ailele. Tuahue ti kako xewawa waliko ti nauna hananau, kako Paxai tioi ka kako seilon ti ailei saun lialun ma kako se he aweisal ti matemate.¹⁰ Nga sokok tesol nauna ien ala ti kola haniakako tonain kapi Haeu tuahue i kola towiahua ka kako se xauxaun wanen tetan.¹¹ Lialui isiaiakako i puluti aliake kako ka leilon ti kako ailele saun lialun i pon kako usi nauna ti Haeu. Tuahue salan tetan, kako xau ahe ti Haeu.¹² Ti tesol waliko ien nga kak ukek, nauna ti Haeu hahaniai Moses se tuah wanen nake i ahuma ti Haeu. I hahanau waliko ti pahan ma i huhuali kaha.

¹³ Kaie kako ukek nauna solian ien haxau kako ti Haeu? Tap wanen. Tuahue i kola hawane hani kako lialui woukako ape kako tioi kako se xauxaun ti Haeu ti kako xaputii nauna solian ien. Aile ape kako Paxai tioi hawane lialui saun lialun.

Hilehile ti leilokaha

¹⁴ Tap lialun ti nauna ti Moses. Kako tioi ka i ahuma ti Haeu. Lialun non kaha seilon nake kaha hongeni lialui isiaiakaha kapiti kaha.¹⁵ Kewi kaha nam tataxini aliakae kaha. Pahakaha ailei waliko solian

tuahue kaha kum aile. Hina kaha aile non waliko lialun ti kaha watakai.¹⁶ Na kaha aile waliko lialun ti kumahe pahakaha ailean, namilokaha i kola hani kaha ka salan nauna ti Haeu se solian.¹⁷ Tuahue kaha kum kongini uke ailean. Isian ti leilokaha ititini kaha ti ailei waliko lialun.

¹⁸ Tap waliko solian leilokaha usiwa isiai tupuakaha. Kaha namiloi eliel ailei waliko solian tuahue kaha kum aile usi.¹⁹ Ape kaha kum aile waliko solian ti pahakaha ailean. Kaha aile tatale waliko lialun ti kumahe pahakaha.²⁰ Na kaha aile waliko tenen kumahe pahakaha ailean, ien i kola kumahe kaha tua aile. Isiai tupuakaha lulungei kaha ailean.

²¹ Tunahan tetak masin. Kewi lawe i sohot ukek. Na pahakaha aile waliko solian, waliko lialun leilokaha i neini hakalala kaha.

²² Ti leili atekaha, kaha waheni hawane nauna ti Haeu.²³ Tuahue lialun ti leilokaha i hilei namil solian ti kaha ape i tipahi kongini kaha hahitake nenein ti lialui isiaiakaha ti i pupuas leilokaha.²⁴ Hatahan wanen kaha! Kaie aita pon oxoxi hatahakaha ti lialun ti leilokaha ti i itini hahaniwa kaha aweisali matemate?²⁵ Nga tunahai ka salan wanen tenen ie. Ti aweisal tepaun, leili namilokaha kaha paxai tioi soliai nauna ti Haeu ape pahakaha wanen usian. Tuahue ti liai tepaun, lialui isiaiakaha i neini hakalala kaha hani ailei saun lialun. Aile ape kemulik haniwa Haeu ti Jises Krais tel Masiwi ti kaha, tetel i hualii kaha ti xoiniai lialun ti leilokaha.

8

Aweisal huonen neiniakaha

¹ Ala ape amuto tioi. Teteka kaha pakata xox hawawane kapi Jises Krais, tap Haeu po tieni halialu kaha.² I sohot ukek ien nake kako teka kahikahi Krais, Holi Spirit tel i neneini kako ma i hahasawi nanahiakako, i oxoxi kako ti hahitake nenein ti isiaiakako ailei saun lialun ti lawe i kapiti kako hani aweisali matemate.³ Usiai nauna ti Haeu hahaniai Moses, i kum aile kaha loii saun lialun nake lialui isiaiakaha pamu xoxoaiyan. Aile ape Haeu namiloi aweisal liai tenen. I taloma tel Natun Jises Krais i sohot hanowii kaha seilon. Haeu hani i, tetel tap nami na teik saun lialun, kauai kawatan ti lialui woukaha lehe kaha taha uke hahitake nenein ti lialui isiaiakaha.⁴ Haeu aile ukek ien lehe waxi kako teka kahikahi Krais kako pon ailei waliko ti nauna tetan hahanau. I

puas na kako kum usi lialui isiai tupuakako tuahé kako usi nenein ti Holi Spirit.

⁵ Teka laha tua puas usiusi lialui isiai alaha, namilohala mewenae toi waliko ti hamuamui tupualaha. A teteka laha puas usiusi nenein ti Holi Spirit, namilohala toi waliko ti Holi Spirit amuke. ⁶ Na seilon hani lioi lialui isiai alaha neini namilohala, laha tunahi aweisali matemate ti i haxau laha kapi Haeu. A teka laha hani Holi Spirit kapiti namilohala, Haeu hatona hasolia tialaha ma laha tunahi tonain tuah kapin. ⁷ Teteka seilon lialui namilohala kakapiti laha, lawe laha pahoxai Haeu. Laha kum hong tamani nauna tetan. Salan wanen hoi liah laha kum pon usian. ⁸ Ape ti usiai isiai tupualaha laha aile waliko tenen i kum pon wanen hamuamui Haeu.

⁹ Tuahé amuto teka kahikahi Krais, kumahe amuto usiusi isiai tupuamuto. Se Holi Spirit tetel i neneini amuto na salan amuto hahani i puas leilomuto. Nameniwa ka seilon teka Holi Spirit kumahe i pupuas leilohala, laha kum pakata wanen kapi Krais. ¹⁰ Na amuto pakata kakapita kapi Krais, kalak na imuh amuto mat nake ti lialui woukaha seilon, Haeu hani amuto hanawain ti i moih kapita nake wasolamuto hani kapin ape sawisawin. ¹¹ Haeu xahateni aliaké Jises Krais ti matean. Aile ape na Holi Spirit tetan pupuas leilomuto, kalak na tupuamuto mat, Haeu hamoiba aliaké amuto ti pohe tel Spirit ien.

¹² Tesol akikik ti Krais, ala Holi Spirit tetel neiniakako. Aile ape kako kum hohogeni wanen isiai tupuakako. Kako kum ailele waliko ti isiai tupuakako ititini kako ailean. ¹³ Na amuto tua to hohogeni lialui isiaiamuto, i selai haxau tamusuke amuto ti Haeu. Tuahé na ti kui pohe Holi Spirit amuto tahi waxaini lialui isiaiamuto ti ailei saun lialun, amuto tunahi tonain tuah kapi Haeu. ¹⁴ I sohot ukek ien nake teteka laha hani Holi Spirit kapiti laha, laha se nati Haeu.

¹⁵ Aile ape amuto kum sosohot seilon tenen weli maamata hanowi ti lokon amuto tutuen hahitake nenein ti lialui isiaiamuto. Aope ie amuto se nati Haeu nake amuto hahitake nenein ti Holi Spirit. Ti tenen ien, i pon hawane kako kakane Haeu ukek, "O se Tamamite." ¹⁶ Ape puki Holi Spirit haxoxo namilokako ka salan kako nati Haeu. ¹⁷ Na masin ien, kako uke waliko solian ti Haeu hahani tel Natun Jises Krais. Tuahé na pahakako tuai Haeu ti hatesol waliko

solian tetan, tin kako kau lungewiwa kawatan hanowii ti Jises Krais kauen.

Waliko solian tapein ti imuh teka kahikahi Krais uke

¹⁸ Nga soh hawane ka kawatan ti i tutunahi kako aope ie, i kum xohima wanen kapi kilai waliko solian ti kako uke ti Haeu imuh. ¹⁹ Lawe waliko ti Haeu tanomi, laha mon atetengi ngain tapeinan ti Haeu hamoiba aliaké teka natun. ²⁰ Haeu namiloiwén ka lawe waliko ti i tanomi, i lialu ma tapo ahuahulih kalak na kumahe pahalahá i sohot ukek ien. ²¹ Tuahé lawe waliko mon atetengi tutuen ngain tapeinan ti Haeu kola lalape soliaian ti i aile lehe waxi tap laha po lialu tamus masin ti i aile hani teka natun.

²² Kako tioi ka waliko tenen tenen ti Haeu tanomi laha ahahatake kaui kawatan lilian ti imat hanima aope. Moloi kawatan ien masin ti hehin na i hatakaha aaka. ²³ Tin hetekie taen kako, kalak Holi Spirit tel i pupuas leilokako i aile kako ilameni tioi ka kilan waliko solian ti na i luluanima imuh, tin kako ahahatake moloan ma kawatan ti i tutunahi kako. Tuahé kako mon atetengi taen kako uke hatapo lawe waliko solian ti Haeu nake kako natun. Taun tehu ien i hani kako tupuakako haun masin ti i kakawen. ²⁴ Lilian ti Haeu awaiwa kako ti kaui kawatan ti lialui woukako, kako mon atetengi ukei tesol waliko ien. Tap tel i mon atengi waliko tenen hoi liah i kewen. ²⁵ Tuahé na kako mon atetengi waliko tenen ti kako tai waxy, kako soh hawanewa ka kako uke ma kako kum mon liliao.

²⁶ Ape na kuikako uke he tap, Holi Spirit tetel huaialiakako. Kalak tataen ti kako kum lotu uke, puki Holi Spirit lotu huuhiali kako. I lotu ahahatake hawane ti i kum pon kaha kaxi kolongeni. ²⁷ Haeu, tetel i paxai kalisi leili lawe seilon, i tioi waliko ti Holi Spirit kakak ti i tutuke awakako nake lotu tetan onotení namili Haeu. ²⁸ Ape kako tioi ka lawe waliko ti i sosohot, Haeu hatano solian ti teka laha waheni i. Teteka ien Haeu kilamiwen puas usiai namilon. ²⁹ Seilon teka ien Haeu hoi liah i tioiwen ka laha seilon tetan ape ti kilamiwen laha sohot hanowii tel Natun. Ti tenen ien kako ape masin talin ape tel Nati Haeu i tetel pamu ti kako. ³⁰ Ti Haeu kilamiwa kako, i ilowi kako ti usian ma i aile wasolakako kapin i sawi. Ape kako uke tuai i waliko solian tetan ti i kakawen.

Tap tenen waliko kongini uke wawahen ti Haeu

³¹Lehe ape kako kak ukek ia ti lalape soliai Haeu ien? Na Haeu tepaun ti kako, aita pon xoiniakako? ³²Haeu tai hasalia tel puki Natun ti kaui kawatan tuahé i hani lioi i mat ti hualiakako. Na masin ien, i pon hawane kako soh ka ti lalape soliaian tin i hani kako lawe waliko ti hualiai nanahiakako.

³³Na tel i sului kako teka Haeu kilamiwen tetan, nakon Haeu hong waxy i? Tap. Puki ailelei Haeu wasolakako kapin i sawi. ³⁴Aita tel pon xoiniakako na laha sului kako? Tap. Jises Krais tel Masiwi tapein, i toto mini Haeu sai manau, i tukei awakako hani Haeu. I tel i mat ma i xahat aliawen ape i huhual kako.

³⁵Waliko la pon konginiai wawahen ti Krais hani kako? Na kako tunahi kawatan tenen tenen, kumahe ka ape tap wawahen ti Krais hani kako. Kalak na taun ti kako kum tioi tenen waliko na kako aile, na seilon axi kako kawatan nake ti usiai Krais, na kako lamani moloan, na kako tae hawane soxi, leili taun ti hitolo, leili taun ti moxe matein masin ti na lehe laha telei kako, tap tenen na waliko kongini uke wawahen ti Krais hani kako. ³⁶Waliko ien masin ti leili pepai Haeu tel masiwi David kaakane i ukek,

“Nake amite seilon tetam,
lawe ngain amite moxemoxe matein.
Tap seilon aile nanamiloi amite,
hanowi sipsip ti na laha telei.” (Ps
44:22)

³⁷Tuahe kalak kako to ilalameni kawatan tenen tenen, kako waxaini hahamahuli nake Krais tel i waheni kako, i hahakui kako.

³⁸Nga soh hawane ka tap tenen na waliko kongini uke wawahen ti Haeu hani kako. Na kako moi hin ma na kako maten tin i hahamalum. Teka engel, teka spirit lialun ma na poh tenen tenen, laha kum tiehi uke wawahen ti Haeu. Tin masin lawe waliko ti i sosohot aope ie ma na imuh. ³⁹Waliko ti pate patul wanen ma itan wanen hetekie lawe waliko ti Haeu tanomiwen, tap tenen ti lato i pon konginiai wawahen ti Haeu hani kako. A se Jises Krais tel Masiwi ti kako i kokola lalape wawahen ti Haeu ien.

9

Pol nanamiloi teka Ju

¹Nga kaxi hahawane kakain salan. Nga se kahikahi Krais, nga kum puluti wanen amuto. Namilok xoxoan wanen ka waliko ti nga kakak salan nake Holi Spirit pupuas leiloc. ²Tiak kawatan wanen. Nga toto

leili tatahan. ³Nga tahane hawane teka Israel. Laha se teka akikik Ju. Na ala i tapai laha soh ti Jises Krais, nga kum nomuha na Haeu kak sai nga ape nga seliai ti Krais.

⁴Se teteka Israel, Haeu kilami seilon tetan ma i paxai ukek laha se natun. I lawe kapi laha lokon ti teik xewai maun neneini laha he lohong. I xinoti kakain kapi laha ma hani laha nauna ti usian. I kola hani laha sale usiai saun ti lotuiam ma laha se tin teteka Haeu kakawen i hani laha kilan waliko solian. ⁵Abraham, Aisak ma Jekob lato se teka matahaun ti laha a Krais i tin tel Ju ti i sohot seilon hanowi kaha. I se Haeu, Masiwi ti lawe waliko. Hoi liai kaha haxawa hawanewa axan lian tehue. Salan wanen.

Haeu pon aile usiai tenen ti pahan

⁶Tuahe kilan teka Ju laha kum soh ti Jises Krais. Kalak masin ien, kumahe ka waliko solian ti Haeu kakawen i aile hani Abraham ma teka nakuama tetan i kum sohot poponowi. Salangawan masin. Kumahe hatesol teka laha nakuama ti Abraham laha nati Haeu wanen. ⁷Tin masin kumahe hatesol teka kahi nati Abraham Haeu namiloi ukek laha se nati Abraham. Ien se salan nake Haeu kakanewen Abraham ka mewenae teka laha nakuama ti tel natun Aisak se nati Abraham wanen. ⁸Haxewa ahekean masin. Kumahe ka seilon se nati Haeu nake i kahi nati Abraham. Mewenae teteka kahi natun ti Haeu kakawen ka liai laha takah, i namiloi ukek laha nati Abraham wanen. ⁹Kako tioi ka Haeu kakane Abraham ukek, “Ahang tehu toma, taun tin tetehu, Sara hatakaha tel akaik wawan usiwa namilok.” (Gen 18:10)

¹⁰Tel akaik ien i se Aisak tel matahaun ti kako. I axoan Rebeka tetel i hanatuale huuha akaik wawan sangasang, Jekop ma Iso. ¹¹⁻¹²Imat ti lalu takah, hoi liai Haeu kakanewen Rebeka ukek, “Tel pamu i hahitake tel komuh.” (Gen 25:23) I aile ukek ien ti puki namilon kumahe ti paxai kolongenai woulalu. Namilon ti i aile kumahe i ahuma ti soliai puasalalu. I kola ka Haeu kilami seilon ti na pahan i kilami. ¹³Masin ti leili pepai Haeu i ukek, “Nga kilami Jekop. Teka seilon tetak nukua ahuma tetan. Kumahe pahak Iso.” (Mal 1:2-3)

¹⁴Kaie kako kak ukek ia? Nakon kolonigenian ti Haeu kumahe sawisawin ti kilamiai seilon? Tap wanen. ¹⁵Masin ti Haeu kakanewen Moses i ukek, “Nga aile kola lalape soliaiak hani tuahe tel ti na pahak nga kola.

Nga kola tatahan tetak
hani teka seilon ti na pahak nga kola.”
(Exod 33:19)

¹⁶ Aile ape Haeu kilami seilon kumahe nake
ti isiai pahalahma ma haelielalaha ailei
puasain. I aile ti lalape soliaian hani teka
ti na pahan i aile.

¹⁷ Namiloiw waliko ti Haeu kakak leili
pepaun. I kakane Fero, tel masiwi ti Igip
ukek, “Nga aile o sohot tel masiwi lehe waxy
nga kola kui pohek ti na nga puas ahuxai
pupuasam ma tin seilon ti pon hatehu ie
laha paxai tioi lalape axak.” (Exod

^{9:16}) ¹⁸ Ape kako paxaiwen ka Haeu aile kola
soliaian hani teka ti na pahan i kola ma i aile
hailala pati teka ti na pahan i hailala, seilon
tetenen masin Fero.

¹⁹ Tuah teka ti amuto uke laha ukek,
“Na masin ien, alahan ka Haeu tieni kaha?
Na Haeu pahan ailei tenen na waliko, aita
tel pon konginian?” ²⁰ Kum kak ukek
ien. Amuto aita lehe amuto kak papahoii
Haeu? Kaie waliko ti i tanomawen kamei tel
tanomian ukek, “Alahan o tanomi nga ukek
ie?” (Isa 29:16, 45:9) ²¹ Na tel hehin
hapanua kaini ailei po, i tetel i namiloi na i
aile po wanen ma na poxawaha.

²² Tin masin Haeu, pon hawane i kola
lengean ma pohen hani teka laha pahoxai
i, ma tin pon hawane i kola tatahan ti i
paxai lilioi lialui woi seilon teteka ala i tapai
hawane Haeu tua halialu tamusuke laha.

²³ Tin pon hawane Haeu aile hasolia hani
teka seilon ti pahan i kola lalape soliaian
hani laha, teteka hoi i kilami peleiven
ka laha to kapin lian tehue. ²⁴ Teka ien
se tin kako, teka ti Haeu kilamiwen usiai
aweisalun, kumahe mewenae teka Ju, tin
hetekie teka kumahe Ju.

²⁵ Masin ti Hosea tai kaxiwen ka Haeu
ukek,
“Teka seilon kumahe tetak,
nga paxai ukek laha ape tetak.

Nga waheni teteka
ti imat nga kum amuke.” (Hos 2:23)

²⁶ Tin i tai kakaxi,
“Ti imat Haeu kakawen ka laha kumahe
seilon tetan.

Tuah aope ie Haeu ukek,
‘Nga tel pate pohen nga paxai tioi
ka laha se natuk.’” (Hos 1:10)

²⁷ Isaia, tel kuluiai kakai Haeu kak eliel sale
teka Israel ukek,
“Kalak teka seilon ti Israel kilaialaha
mongohuan puli hepekeun ti peixux,
pate palai teteka Haeu awai.

²⁸ I sohot ukek ien nake Haeu tel Masiwi
liai i kahui koseni seilon ti tehu pon ie
ti lialui woulaha
masin ti i kakawen ka i aile.” (Isa
10:22-23)

²⁹ Tin masin ti Isaia kakawen imat i ukek,
“Na Haeu tel Masiwi pate pohen
tai hasalia palaiakahaka teka ti kaui
kawatan,
ala kaha lialu tamus hanowi ti
Haeu aile hani seilon ti Sodom ma
Gomora.” (Isa 1:9)

Teka Ju kum soh ka Jises se Krais

³⁰ Kaie ape kako namiloi ukek ia? Teka
kumahe Ju, wasolalaha hani kapi Haeu
i sawi nake ti xoxoi namilolah ti Jises
Krais, kalak laha tai puas eliel ti hasawian.

³¹ Tuah teka Ju, kalak laha haeliel hawane
ti usiai lawe saun ti laha, wasolalaha hani
kapi Haeu i tai sawi. ³² Kaie lahan tenen ien?
I tai sawi nake namilolah xooaan ti soliai
pupuasalah kumahe ti tenen aweisal Haeu
haniwen laha. Laha ukek pate hienain na
Krais mat he kros, aile ape laha kum soh ti
Jises. Masin ka laha tanga he tehu kuku.

³³ Masin ti pepai Haeu kakawen sale Jises
Krais i ukek,
“Nga hatuhu tehu kuku pate tuah leili
Jerusalem.

Tehu kuku ien laha tanga put.
Tuah teka seilon laha soh tetan
tap wanen laha po namiloi tahane ali-
ake.” (Isa 8:14, 28:16)

10

¹ Tesol akikik ti Jises Krais, leili tiak i
tangitang hawane. Ti xoxoi isiai pahak
nga kamei Haeu lehe waxy i awai teka Ju ti
kawatan ti lialui woulaha. ² Pon nga kaxi
hani amuto nake nga tioi ka laha haeliel
hawane hani hatapoi Haeu tupualaha tu-
ahetitioalaha ti sale pupuase Haeu i tae.
³ Nga kak ukek nake laha kum paxai waxy
aweisal ti Haeu aile haniwen hasawiai wa-
sole seilon hani kapin ape laha akeni haxo
puki aweisaluhaha ti hasawialaha. Laha
kum hongeni usiai aweisali Haeu. ⁴ Teka
Ju eliel tutuen usiai nauna ti Moses lehe
waxy Haeu paxai ukek laha sawisawin. Tu-
ahetitioalaha ti sale pupuase Haeu i tae.
Tehu kuku ien laha tanga put.
Tuah teka seilon laha soh tetan
tap wanen laha po namiloi tahane ali-
ake.” (Isa 8:14, 28:16)

*Xoxoi namili seilon ti Jises Krais wasolalaha
kapi Haeu i sawi*

⁵ Sale hasawiai wasole seilon hani kapi Haeu ti usiai nauna ti Haeu hahaniai Moses, Moses tai kaxiwen ukek, “Tel na i usi hatapo lawe waliko ti nauna ien hahanau, i to kapi Haeu lian tehue.” *(Lev 18:5)* ⁶Tuahé teka wasolalaha hani kapi Haeu sawiwen nake ti xoxoi namilokaha ti Jises Krais, pon laha kak hanowi ti leili pepai Haeu i ukek, “Kalahai lehe kaha ku hani tone Haeu?” *(Deut 30:13)* Teik kakain ien kaxi ka tap pupuase namil ti waxy hamosui Krais lehe i huali tuhi kaha. ⁷Tin masin kaha kum namiloi ukek, “Hoi tel mos haniwa tone teka maten.” *(Deut 30:13)* Ien ti xahateniai Krais lehe i huali kaha. ⁸Tenen ien salan wanen nake teteka namilokaha xooxoan ti Jises Krais, pon kaha kak hanowi ti leili pepai Haeu i ukek, “Malimun wanen ti tioiai kakai Haeu sale hasawiai wasole seilon hani kapin. I pon kaha hana hani leili atekaha wanen ma tau kakaxi.” *(Deut 30:14)* Ien se meng ti amite teka aposel kaxi sasawateni lehe waxy teka seilon soh ti Jises Krais.

⁹ Aile ape tel na i kak matuha ka Jises se tel Masiwi tapein ma i soh hawane ka Haeu xahateniwei i ti matean, Haeu awai i ti kawatan ti lialui woun. ¹⁰Se salan wanen nake wasolakaha hani kapi Haeu i sawi na kaha soh hawane ti Jises Krais. Ape ti xoxoi namil ien, na kaha kak matuha ka i se tel Masiwi tapein, Haeu awai kaha ti kawatan ti lialui woukaha. ¹¹Masin ti leili pepai Haeu i ukek, “Tel na i soh tetan tap wanen i po hienake.” *(Isa 28:16)* ¹²Tenen ien i puas leili teka Ju ma teka kumahe Ju. Laha hatesol, Masiwi ti laha telawe Jises Krais, tetel i aile hasolia hawane hani hatesol teka na laha kamei i huuhal. ¹³Masin ti leili pepai Haeu, Joel tel kuluiai kakaian tai kaxiwen ukek, “Hatesol teka laha paxai tioi Haeu tel Masiwi ma laha kamei i huuhal leili taun ti kawatan, i tel awaialaha.” *(Joel 2:32)*

¹⁴Tuahé laha kum kamea huuhal ti tel na masin laha kum soh tetan. Ape laha kum soh ti tel na masin laha tai hongohong sale tel seilon ien. Ape tin laha kum hong uke na masin tap tel kaxi hanialaha. ¹⁵Ape tap tel kaxi hani laha na masin tap tel taloi tel seilon ti kaxian. Ti leili pepai Haeu, Aisaia tai kaxiwen ukek, “Teka laha kakaxi meng solian ti Haeu, tahiaialaha se pate solian.” *(Isa 52:7)*

¹⁶Tuahé kumahe hatesol teka Ju laha hong waxy meng solian ti Jises Krais. Laha masin teteka ti Aisaia tai kaxiwen ukek, “Haeu tel Masiwi, palaiai teteka laha hong

soh mengom ti amite kakaxi.” *(Isa 53:1)* ¹⁷Aile ape xoxoi namilokaha ti Jises Krais i nonoma ti hongoi meng solian tetan. Ape meng solian ti Jises Krais, kaha hong ahuma ti tel kaxian.

¹⁸A teka Ju? Nakon laha tai hong menge Haeu? Hoi liai laha hongoen. Ti kuewen wanen David tel masiwi kaxi ukek, “Waliko ti i kola sale Haeu i mei haniwen seilon

ti tesol tesol he tehu pon ie.” *(Ps 19:4)*

¹⁹Nga karmeamu, nakon teka Ju tai xewaxeumeng solian ti Jises Krais? Laha xewan tuahe laha kum nam waxy. Masin ti Haeu kakawen lokon ti Moses. I ukek, “Nga aile hasolia hani teka seilon liai

ape amuto namiloi watakai nake amuto paxai ukek
laha kumahe seilon tetak hanowi amuto.

Amuto lengeke nake nga aile hahani teteka amuto ukek tap titioalaha tetak.”
(Deut 32:21)

²⁰Nameni aliakewa kakai Haeu ti Aisaia kak mamatuke. I ukek, “Teteka tap namilokaha ti tioiak laha paxai tioi nga.

Nga kola hexawa nga hani teteka tap laha kamekam sale tioiak.” *(Isa 65:1)*

²¹Tuahé ti sale teka Ju i kak ukek, “Ngain tehu ma tehu nga to mon atengi hahawane na teka seilon tetak towiahu alia hani kapik
tuahé laha pate seilon ti pahopah ma tahitah.” *(Isa 65:2)*

11

Lalape namili Haeu ti teka seilon tetan Ju

¹Teka ti amuto uke ape laha namiloi ka Haeu tale tehiton hani teka seilon tetan. Tap wanen. Paxaiwa, puki nga se tel Ju, kahi nati Abraham. Nga nakua ahuma ti Benjamin.

²Haeu kum tale tehiton hani teteka i kilamiwa seilon tetan. Tap wanen. Ala amuto tioi teik kakain leili pepai Haeu ti i kakak lokon ti Elaija kaxi ahuti lialui lon ti teka Ju hani Haeu. I ukek, ³“Haeu tel Masiwi, laha telei hatapoen teka kuluiai kakaiai ma laha hamananawen tesol tone waliko ti seilon kauma haniam. Mewe-nae nga moxen ape tin laha tohongi lalali teleiak.” *(1 Kgs 19:10, 14)*

⁴ Amuto nameni waliko ti Haeu kakane i. Haeu kak pahoi ukek, "Kumahe mewenae o tutuham xoxoan tutuen tetak. 7,000 seilon tutuen laha tai lolotui Baal tetel kumahe Haeu wanen." (1 Kgs 19:18)

⁵ Tin masin ti aope, kumahe hatesol teka Ju laha talewen tehitolaha hani Haeu. Saka palaiai teka tutuen, teteka namilokako xoxoan ti Jises Krais. Teka ien hoi liai Haeu kilamiwen tetan ti lalape soliaian. ⁶ Na masin ien, kumahe Haeu kilami kaha naake ti soliai pupuasakah. Na i ailela ukek ien, kumahe ape i kola hahawane lalape soliaian.

"Ape kako kak ukek ia? Kalak kewi ti teka Ju laha haeliel hawane ti hasawiai wasolalaha hani kapi Haeu, laha tai wawaxaini. Mewenae teka ti Haeu kilamiwen tetan, teteka namilolaha xoxoan ti Jises Krais, wasolalaha hani kapi Haeu i sawi. Tuahé teka liai, ailai patulaha ti tioiai aweisal tenen sawisawin, Haeu tua halali lioi. ⁸ Masin ti leili pepai Haeu i ukek, "Haeu aile hakaluta namilolaha.

Hanima taen aope laha masin ka pulaxa,
taxingalahalha tin masin ka sutu." (Deut 29:4; Isa 29:10)

⁹ Tin i hanamena nga kakai David tel masiwi, lokon ti i kamei Haeu axiai kawatan hani teka laha pahoxai i. I kak ukek, "Tiliwen laha sokok tap waliko lialun po tunahi laha

hanowi teka laha ang amuu luhuluh. Laha kum amemene ka waliko tenen lialun sohot hani laha.

Masin manihuuh ti na i sahea he nokonok.

Tiliwen laha nahih naketa
ape laha uke kawatan ti lialui woulaha.

¹⁰ Aile kolongeniwa pulalah uke he titiloko, kolongeniwa ka laha to kau
haweluwele kawatan
masin teka laha kakau waliko tenen
pate kawatan
he wahelaha, tap tahi kau lioian." (Ps 69:22-23)

¹¹ Teteke Ju laha kum soh ti Jises Krais, ien se saun lialun. Kaie laha selia tamus hawane ti Haeu ape i kum pon laha aliam? Tap wanen. Ti namili Haeu i pahan teka kumahe Ju laha sohoa ti Jises Krais lehe waxi i awai laha ti kawatan ti lialui woulaha. Ti aweisal tenen ien teka Ju Paxai tioi solian tetan ape tin pahalahua ukean. ¹² Ti teka Ju tale tehitolaha hani Jises Krais, Haeu aile hasolia hani teka kumahe Ju, ti i hei hani

laha aweisal ti awaialaha ti kawatan ti saun lialun. Na masin ien, i lap ahewa solian ti i aile hani seilon ti tehu pon ie, na teka Ju hana hatapo namil xoxoan hani Jises Krais.

¹³ Kakaik ie lalap hani amuto teka kumahe Ju. Haeu kilamiwen nga aposel ti puas leilomoto. ¹⁴ Tenen puasak ie nga paxai ukek i pate tuah wanen naake pahak wanen upiai aweisal lehe teka akikik Ju Paxai tioi waliko ti amuto kewen ape i haisi laha ukean. Nga puas tanomi ukek lehe Haeu awai hina ti laha ti kawatan ti lialui woulaha. ¹⁵ Solian tapein wanen ti na laha sohot kahikahi Krais. Ti Haeu tale tehiton hani laha, i hei aweisal hani seilon ti tehu pon ie ti hasawiai wasolalaha hani kapin. Tuahé ti Haeu waxi aliakewa laha naake ti xoxoi namilolaha ti Jises Krais, se pate solian wanen, masin ka tel seilon maten i moih alia. ¹⁶ Na Abraham ma teka matahaun ti kako teka Ju, lato se seilon ti Haeu, kako teka nakuama ti lato se tin seilon ti Haeu. Masin ti na tel seilon i talini palawa ti ailei bret ape i hari Haeu teik ti ulti hamaloa, palawa hatehu ti i apeseniwen se ti Haeu. Tin masin na wahe tea pata i ti Haeu, hatesol ngaxon ma huan se ti Haeu.

¹⁷ Teteka Ju Haeu tale tehiton hani laha, laha masin ngaxe tea pata ani sein ti taxax tosa he tea patan. A amuto teka kumahe Ju, teteka amuto soh ti Jises Krais, amuto masin ngaxe pata tenen puki xexean laha pakateni hani tea pata ngaxon taxaxawen. I tin i momoih ti tea pata ien. Tin masin amuto ukeke solian ti Haeu kakawen i hani Abraham ma teka nakuale tetan. ¹⁸ Tuahé kum tetehehi teka Ju ti Haeu tale tehiton hani laha. Kum hanasanasa ka amuto ukeke waliko solian ti Haeu. Amuto tuahé masin ngaxe pata, kumahe wahan moih nonoma tetan, i moih nonoma ti wahan.

¹⁹ Teka ti amuto uke laha namiloi ka Haeu tale tehiton hani teka Ju lehe i hahaha amuto ti pakatai kapin. Masin ngaxe pata ti laha hataxaxa xaxaweni lehe laha hana pakateni ngaxe pata liai. ²⁰ Salan, tuahé nameniwa ka Haeu tale tehiton hani laha naake laha kum soh ti Jises Krais ape pakatai amuto hani kapi Haeu naake ti amuto soh. Kum hahaxawa amuto. Karipetiba uke tin i sohot hani amuto. ²¹ Haeu tai kola tatahan hani teka Ju ien, teteka laha masin ngaxe pata ti hoi liai i ngaxoima he tea pata ani sein. Ape nakon lehe i kola hani amuto na amuto tap xoxoi namilomuto ti Jises Krais?

²² Ape kako paxai tioiwen ka Haeu aile hasolia hani seilon a tin pate i hahia hani seilon. I pate ahian kane teka Ju laha talewen tehitolaha hani i tuahe i kola soli-aian hani amuto na amuto tu xox hamalum tetan. Na tap, i tale tehiton hani amuto. ²³ A teka Ju, na laha towiahu ape laha soh ti Jises Krais, Haeu waxi amuke laha. I pon pakateni aliake laha hani kapin. Laha masin ngaxe tea pata ani sein ti i taxax, Haeu pakateni aliake.

²⁴ Amuto teka kumahe Ju, kemuk amuto seselai ti Haeu tuahe aope Haeu waxi amuke amuto masin ngaxe tea pata ti puki xexean laha koti waxi ape pakateni hani tea pata ani sein. Waliko tenen ien seilon koi ailele. Na masin ien, kaie amuto kum ukek ka pamu Haeu waxi amuke teka Ju laha towiahu alia hani kapin? ien masin ka Haeu pakateni aliake ngaxe pata ti hoi liai i ngaxoima he tea pata ani sein.

Haeu kola tatahan tetan hani hatesol seilon

²⁵ Teka akikik ti Krais, pahak amuto xeu aluawa waliko ti Haeu kola hatakeiwen sale teka Ju lehe tap amuto namiloi ka amuto pamu tuah ti laha. Ti ailai patulaha laha kum soh ti Jises Krais tuahe i kum hamalum ukek ien. Laha kum soh atengi tataen hatesol teteka kumahe Ju Haeu kilamiwen tetan laha sohoa ti Jises Krais. ²⁶ Aile ape hatesol teka Ju laha soh ti Jises Krais, Haeu awai ti kawatan ti lialui woulaha. Masin ti Aisaia tai kaxiwen leili pepai Haeu ukek, “Tel awaia kaka i ahuma ti Jerusalem
ape i neini tahaini teka Ju ti saun lialun.

²⁷ Haeu ukek, ‘Nga usi kakapitini tenen namil
ti nga xinoti kapi teka seilon tetak
ape nga oxoxi laha ti lialui woulaha.’”
(Isa 59:20-21; 27:9)

²⁸ Kilan teka Ju laha hil pahoi meng solian ti Jises Krais ape ti tenen saun ien amuto teka kumahe Ju, Haeu aile hasolia hani amuto. Tuahe teka Ju se kikilamiai Haeu, laha seilon tetan tutuen ti pate i waheni nake laha nakuama ti Abraham, Aisak ma Jekop, tetesol seilon Haeu xinotimu kakain kapi lato. ²⁹ Nga kak ukek nake Haeu kum namiloi tahane aliake ti i kilami ma hapohea seilon ailei puasan. ³⁰ Amuto teka kumahe Ju, imat amuto pahoxai Haeu, tuahe ti teka Ju tahi Haeu, i kola non tatahan tetan hani amuto. ³¹ Tin masin aope ie teka Ju papahoxai Haeu tuahe tin i kola tatahan hani laha na laha towiahu, masin ti i aile

haniwen amuto. ³² Nake ti tahitah ti kaha hatesol, masin ka Haeu hahamalumini kaha hahitake saun ti tahitah lehe i kola hawane tatahan hani kaha hatesol, teka Ju ma teka kumahe Ju.

Sameniai Haeu

³³ Malehe lalape soliai Haeu ma anesoan.
Ti lalape titioan, waliko ti i aile mewe-nae sawisawin.

Tap tel pon nexi haxewai namilon.
Kaha kum xeu wanen sale pupuasan.

³⁴ “Kiae aita po tioi namili Haeu?

Aita tel na i pon nauan?” (Isa 40:13)

³⁵ Tap tel i hani halapa kasiniwen Haeu
lehe ala Haeu kahui aliake. (Job 41:11)

³⁶ Ien se pate salan nake i tetel tanomiai lawe waliko
ape i hamalumini kapitini laha
lehe lawe waliko ien i kola lalape axan.
Kaha haxawawa Haeu lian tehue.
Salan wanen.

12

Hani hatapoa Haeu tupuamuto

¹ Tesol akikik ti Krais, namiloi paxaiwa lalape soliai Haeu ti i haniwen amuto. Aile ape nga kamei hawane amuto ti hani hat-apoi Haeu tupuamuto. Ti leili atemuto wanen hani hatapoa amuto ailei puase Haeu. Amuto se moihin, kumahe masin manihuh tenen maten laha telei ti haniai Haeu. Na masin ien, nanahiamuto kola hawanewa ka amuto se unaui Haeu wanen. Saun tenen ien Haeu amuke hawane. ² Kum aile usiusi saun ti teka seilon laha kum tioi Haeu. Hani lioiwa Holi Spirit kapiti namilomuto lehe i towiahu amuto hani seilon haun usiai Haeu. Aweisal tenen ien amuto tioi aluini waliko ti Haeu pahan amuto ailewa. Amuto paxai tioi waliko tenen ewi, waliko tenen Haeu amuke ma amuto pon usi hapo-ponowiai namilon.

³ Ti lalape soliai Haeu i aile nga tel aposel ape nga kaakane amuto hatesol ukek. Kum haneke kakasini amuto, hapuasawa patumuto namiloi aliakeamuto. Paxai kolongeni aliakewa amuto haniwa kuimuto ti Haeu haniwen amuto. I hani amuto nake namilomuto xoxoan tetan. ⁴ Pate amuto tioi, tupui seilon tehue tuahe kilan soxi tinun. Hatesol hina puasan tuahe puasalato tenen tenen. ⁵ Tin masin kako teka kahikahi Krais, kalak kako kilan, kako pakata het-ekiewen nake ti pakataiakako hani kapi Krais. Tel tel ti kako se huhual ti hani tel liai, aile ape kako puas hukumawa.

⁶Ti soliai Haeu i hapohea kako tel tel ti ailei waliko tenen tenen. Na tel ti kako Haeu hapohea i ti kaxi kuluiaiakaian, i kaxi hawanewa kakain ti i soh ka Haeu hatakei hani i. ⁷Na tel tetan ti hualiae seilon, i huali aluinawa. Na tel tetan ti hanau seilon, i hanau aka matainiwa. ⁸Na tel tetan ti hakuiai seilon liai, i haku aluinawa. Na tel tetan ti waxeniai teteka seilon laha tae soxi, i axi hawanewa ti wiai ongan. Na tel tetan ti neiniae seilon, i hani hatapoia tupuan ti neini aluinialaha. Ape na tel tetan ti kolai tatahan hani seilon, i aile kola hetekiewa amuam.

Kola kapitawa wawahen

⁹Wawahen hawanewa ti leili ate-muto. Watakaiwa hatesol waliko lialun. Haelielawa ti waliko tenen solian. ¹⁰Amuto pakata hetekiewen hahitake Krais. Amuto he wawahen hawanewa ma lawe kolawa lomuto haniwa tel tel. ¹¹Amuto kum ukekhe nunuxa. Is eliel hawanewa ti ailei puase Haeu tel Masiwi.

¹²Amuamua ti amuto mon atetengi waliko solian ti Haeu kakawen i aile hani amuto. Leili taun ti kawatan, tu xox kapitawa ma tin kum lotu lilioa. ¹³Na tel ti teka kahikahi Krais tae ti tenen na waliko, amuto kewa hean ti hualian ma lawe waxy auniwa teka soliwa.

¹⁴Na teka seilon aile halialu amuto nake amuto kahikahi Krais, kum sai hahalialu laha. Kolawa wawahen ma tin kameiwa Haeu ti aile hasolisa haniwa laha. ¹⁵Amuto amuam tuaiwa teka na laha amuam ma tin amuto tuaiwa teka laha toto ti leili tatahan lalap. ¹⁶Namilomuto elielawa ka seilon liai uke waliko solian masin ti na pahamuto ukean. Kum halepelep ukei totuan tenen tuah lehe seilon haxawa axamuto. Amuto kewa hean ti hukuma hani teteka ti seilon liai paxai teheni ma ti ailei puasain tenen seilon paxai wasi. Kum hahanasake ka anesoamuto pate lalap.

¹⁷Na tel i aile waliko lialun hani amuto, kum aile kahui aliakie. Kolongeni kewak ka waliko ti amuto aile mewenae sawisawin ti puli lawe seilon. ¹⁸Ti hatesol kuimuto ma anesoamuto, haeliel hawanewa lehe waxy wasolamuto hani kapi seilon mewenae solian.

¹⁹Tesol soliai akikik ti Krais, amuto kum he kahukah saun lialun. Hani lioiwa he mini Haeu. Masin ti leili pepaun i ukek, "Nga tel Masiwi nga kak ukek, ngakahui aliakie saun lialun.

Nga tetel axiai kawatan
hani teka laha aile halialu amuto."
(Deut 32:35)

²⁰Amuto aile nonoa waliko ti pepai Haeu kakak ie,
"Na teka laha papahoxai amuto laha hitol,
amuto axiwa analaha.

Na kinawelaha paxepaxen, axiwa unumalaha.
Na amuto aile ukek ien,

laha hienake saun ti laha aile haniwen
amuto

ape uke laha towiahu." (Prov 25:21-22)

²¹Kum tua hahani lialun xoini amuto, aile nonoa waliko solian hani seilon lehe amuto xoini lawe waliko lialun.

13

Tanoa lokaha hani teka masiwi

¹Amuto teka kahikahi Krais, tanoa lomuto hani teka masiwi ti nahikei xux nake na Haeu tai sowini, ala laha tai uke tesol tonain ien. Lawe masiwi laha uke tonain ien usiwa namili Haeu. ²Aile ape na seilon pahoxai teka masiwi, se tin laha papahoxai namili Haeu ape laha kum salia ti kauai kawatan. ³Seilon teka laha aile waliko tenen sawisawin, laha kum mamata teka masiwi, mewenae teka laha ailele saun tenen lialun. Na pahamuto lehe amuto kum mamata, lawe ailewa waliko tenen sawisawin ape teka masiwi sameni amuto.

⁴Ti namili Haeu hatesol masiwi se unauan lehe ti pupuasalah amuto uke solian tetan. Tuahne amuto tahi laha, pon amuto mamata nake ti masiwalaha i tapai laha axi kawatan ti lialui woi seilon. Pon laha aile ukek ien nake laha puas kikilami waliko ti ala Haeu aile ti lengean hani teteka laha aile waliko tenen lialun. ⁵Aile ape amuto hong tamaniwa teka masiwi, kumahe mewenae ti matauamuto ti ukei kawatan tuahne amuto paxai tioiwa waliko tenen ewi ma na lialun ti puki leili namilomuto.

⁶Nake se tin ti tenen ie, amuto hani moni ti laha kilamiwen haniai teka masiwi ti nahikei xux. Teka masiwi ien laha pupuas ti Haeu na laha aile aluinwa puasalah. ⁷Haniwa seilon waliko ti hoi liai ala amuto haniwa. Moni ti teka masiwi kilamiwen ka amuto haniwa laha ti waliko tenen tenen, liai amuto haniwa. Kolawa lalape lomuto haniwa teka masiwi ti amuto.

Saun ti wawahen ma sale nanahiai teka kahikahi Krais

⁸Lawe hamate aliakewa waliko ti amuto ukewen. Tuahne saun ti wawahen tap tiliai

hamatean, aile ape kako he wawahen kapitawa. Tel na i waheni seilon liai i usi hahawane waliko ti nauna ti Haeu hahanau. ⁹ Nauna ti Haeu ukek, "Kum tetelei seilon, kum ailele saun lialun ti wawan hehin, kum xuuxuina, kum tua isis waliko ti seilon liai." ^(Exod 20:13-15, 17)

Tesol nauna ien ma hina nauna liai, hatesol lohiama leili teik nauna ti Haeu ie, "Waheniwa seilon liai hanowi ti amuto waheni aliake amuto." ^(Lev 19:18)

¹⁰ Tel na hina saun ti wawahen i kum aile halialu seilon liai. Kolai wawahen se usi hawanei waliko ti nauna ti Haeu kakak.

¹¹ Aile usiwa waliko ti nga kaakane amuto. Nameniwa ka aliai Jises Krais pate ape i xohiwen. Kum luhuluh. Taun ti aliai Jises Krais tel awaiakako ti lawe waliko lialun ti tehu pon ie, i ape pamu xohian, kumahe masin ti uli kako sohotua kahikahi. ¹² Taun ti kako he tehu pon ie sikole i tapo ape taun ti awaiakako i xohiwen. Aile ape kako lioi xaxaweniwa saun lialun. Lialui nanahiakako masin ka kako toto tutuen leili tilokoan. Masin seilon ti i nanahih he xewan, kako elielwi ailei saun tenen solian. Ien se paukako ti hil pahoxaiai waliko lialun.

¹³ Lawe kako ailewa waliko tenen i alune ti kako aile hanowi ka kako leili xewan. Kako kum hukuma he akakat ti apuhain tenen lialun ma un taxitaxia. Kako kum ailele siksiki tenen tenen ti lialun. Kako kum aile hahatano wasol ma kum namiloi halialu seilon liai na laha xoini kako. ¹⁴ Kako namiloi non kewak. Nanahiakako i kola hawanewa woi Jises Krais ma kako tahi xaxaweniwa namilokako ti hongenai lialui isiaiakako.

14

Kum howini halalialu teka kahikahi Krais liai

¹ Teteka namilolaha hani Jises Krais kumahe pate xoxoan, waxy amukewa laha hani leilomuto ma kum kak wawatakai namilolaha ti sale waliko. ² Seilon teka laha soh ka ewi na laha anii an tenen tenen tuahe teka liai namilolaha ukek ka halalin ti aniai xixioi lawe manihuh. ³ Teka laha aniani an tenen tenen laha kum paxai teteheni teka laha kum aniani lawe an. Tin masin teka laha kum aniani lawe an, laha kum howini halalialu teka laha aniani an tenen tenen naake puki Haeu paxai ukek laha se kahikahi Krais. ⁴ Amuto aita lehe amuto howini halalialu seilon ti unaui Haeu? Hani lioiwa

Haeu tel Masiwi ti kaha paxai kolongenai waliko ti laha ailele, na masin sawisawin ma na kumahe. I pon hualialaha ti ailei waliko tenen sawisawin lehe laha tu xox hawane tetan.

⁵ Tin masin, seilon teka laha namiloi ukek ka ngain hina pamu tuah ti ngain liai tuahe teka laha ukek ka tenenawae. Kaha tel tel soh hawanewa ti puki namilon wanen waliko tenen ewi ma na lialun ti na i aile.

⁶ Teteka laha namiloi ukek ka ngain tehu i pamu tuah ti lotuiai Haeu, laha lolotu tehu ngain ien ti haxawai axan. Tin masin teteka laha aniani an tenen tenen, laha hahaxawa axe Haeu nake laha kak kemulik hani i ti an ien. Ape teka laha hahalini an hina, laha aile ti kolai lolaha hani Haeu ma tin laha kak kemulik hani Haeu ti an tenen laha aniani. ⁷ Kako kumahe puki masiwi ti kako, kumahe kako he tehu pon ie tuahe ti hamuamuaikako. Tin kumahe kako mat usi namilokako. ⁸ Ti kako moihin tutuen, nanahiakako kewa i kola ka kako haxawa axe Haeu. Ape mateakako, kako mat usi namili Haeu. Aile ape, kako moihin ma na maten, kako hahitake tel Masiwi Haeu. ⁹ Nga kak ukek nake Krais mat ape i moih alia lehe i to tel Masiwi ti kaha hatesol, teka moihin tutuen ma teka laha matewen.

¹⁰ Kalahai lehe ape amuto howini halialu ma na paxai teheni teka kahikahi Krais liai? Nameniwa ka ngain tehu kaha hatesol tu mate Haeu tel i paxai kolongen i woukaha.

¹¹ Masin ti Aisaia tai kaxiwen ti Haeu kak ukek,

"Nga tel Masiwi nga kak kuinake ti puki
axak ka
lawe seilon laha lokuba lotui nga.

Ape lawe seilon paxai tioi ka
nga salan Haeu tel Masiwi." ^(Isa 45:23)

¹² Pate ape xewan ka kaha tel tel tuke hatesol woukaha hani mate Haeu tel i paxai kolongenai nanahiai lawe seilon. ¹³ Aile ape kako kum he hohowin halialu aliakae kako. Kako kolongenai non kewak, nanahiakako i kum neini hakalala teka kahikahi Krais liai ma tin i kum haputa laha ti ailei waliko lialun.

¹⁴ Ti hahitake axe Jises Krais nga tioi ma soh hawane ka tap tenen an i haloloa leilokaha ti puli Haeu. Tuah na tel i namiloi ukek ka hina an i haloloa kaha, halik puki, kumahe sawisawin na i ani. ¹⁵ Na amuto talesi namili tel akikimuto ti Krais nake ti waliko ti amuto anii, ien kumahe amuto kokola saun ti wawahen. Na amuto

aile ukek ien, amuto aile hahalialu wasolan hani kapi Haeu. Nameniwa ka tel seilon ien tin Krais mat ukei totongan.¹⁶ Na amuto aile waliko tenen amuto ukek ka ewi, a teka liai ukek lialun, ien amuto aile tunahi ka laha kak hahalialu axamuto.

¹⁷ Hongoa, Haeu ti i neini seilon, kumahe tuah tetan waliko ti kaha ani ma unumi. Pahan masin, hetekie huhual ti Holi Spirit kaha ailewa waliko tenen ti i paxai ukek sawisawin, kaha hasolia kapitiniwa wasolakaha kapi teka liai ma tin hina amuam leili tiakaha.¹⁸ Na kako aile pupuase Krais usi tesol waliko ien, Haeu paxai amuke kako ape seilon tin laha paxai waheni kako.

¹⁹ Aile ape hani hatapoa namilokako ailei waliko tenen i hasolia wasolakako ma i hakui kako tel tel ti usiai aweisali Haeu.²⁰ Kum aile hahalialu puase Haeu leili teka kahikahi Krais liai nake ti sale aniai an. Salan ka lawe an Haeu ukek ewi ti an, tuahe kumahe lawe taun ewi aniai an tetenen ti seilon liai ukek hahalin nake i haputa laha ailei waliko tenen laha ukek kumahe sawisawin.²¹ Aile ape kum aniani xioxio manihuh, kum ununumi unum ailan ma kum ailele tuahe na tenen waliko ti uke i haputa tel akimuto ti Krais ailei waliko ti i ukek lialun.

²² Salan Haeu sowini hani amuto ailei waliko hina. Tuahe kum sasameni xoxoi namilomuto ti sale ngain, an ma unum ma kum lulungei teka liai ti usiamuto. Haeu amuke teka laha aile waliko ti xoxoi namilola halik na sale ailei tenen waliko ien i tieni aliake laha.²³ Tuahe na tel kahikahi Krais namilon i uke he huaik ti aniai tenen na an, i kum aniani nake i an, kumahe i aile ti xoxoi namilon ape i ilameni tioi ka i ailewen waliko lialun. Nameniwa, na kaha aile waliko kumahe ti xoxoi namilokaha, ien se kaha ailele waliko lialun.

15

Ti hahitake axe Jises Krais kako pakata hehetekie

¹ Kako teteka kako aile waliko ti xoxoi namilokako, kako tani waxiwa hualiae teka namilolaha kumahe xoxoan ma i uke he huaik ti na laha aile waliko. Kako kum ailele waliko tuahe ti hamuamuaiakako.² Kako tel tel ailewa waliko tenen i hewi tel liai lehe i uke solian tetan ma hakui xoxoi namilon ti Jises Krais.³ Tataen puki Jises Krais i tai aile waliko ti tuahe hamuamuaihan. Masin ti leili pepai Haeu, Jises kakane tel Taman ukek, "Teka laha kak hahalialu o, laha kak hahalialu

hehetekie nga."

(Ps 69:9)

⁴ Nameniwa ka lawe kakain laha taiwen leili pepai Haeu laha tai ti hanauakaha. I huali kaha ti tu xox leili taun ti kawatan ma hakui pakataiakaha kapi Krais lehe waxy kaha pon atengiai waliko solian ti Haeu kakawen i aile hani kaha.

⁵ Nga kamei Haeu tel lawe i haxoxo kakapitini kako ti hualiamuto lehe waxy amuto pakata soli hani kapi tel tel hetekie namil teikawe, ti amuto usiusi saun ti Jises Krais hahanau kaha.⁶ Ape ti pakataiamuto ien amuto sameni puxawei Haeu tel Tame Jises Krais Masiwi ti kako.

⁷ Aile ape waxy amukewa tel tel ti amuto masin ti Krais waxy amuke amuto hani kahikahin. Saun tenen ien i kola ka amuto haxawa axe Haeu.⁸ Pahak amuto nameniwa ka ti pupuase Krais i huali kako teka Ju lehe waxy seilon paxai tioi ka waliko ti Haeu kakanewen teka matahaun ti kako se salan ma i sohot poponowi.⁹ Ape tin lehe teka kumahe Ju sameni Haeu ti lalape tatahan tetan nake i huali hetekie laha. Tenen ien i hapoponowi waliko ti leili pepai Haeu kakawen. David kakane Haeu ukek, "Nga haxawa o kapi teka kumahe Ju.

Nga pak sameni axam." (2 Sam 22:50;
Ps 18:49)

¹⁰ Ti leili pepai Haeu tin i ukek,
"Teka kumahe Ju,
amuu tuiawa teka Ju seilon ti Haeu."
(Deut 32:43)

¹¹ Tin i ik ulea ukek,
"Hatesol teka kumahe Ju,
haxawawa axe Haeu tel Masiwi.
Lawe seilon pak sameniwa axan." (Ps
117:1)

¹² Ape Aisaia tin i ik ukek,
"Tel seilon i nakuama ti tehu kahi nati Jesi
tel tame David,
i sohot tel masiwi ti nahikei teka
kumahe Ju
ape laha hana hatapo namilolaha hani
i."
(Isa 11:10)

¹³ Haeu tetel salangawe monomon ti kako. Nga kamei i ti axiamuto amuam ma hatona hasoliai tihamuto usiwa xoxoi namilomuto tetan lehe ti pohe Holi Spirit amuto mon eliel hawane atengiai waliko solian ti Haeu kakawen i aile hani amuto.

Pol nenexi sale pupuasan ti i ailele leili teka kumahe Ju

¹⁴ Tesol akikik ti Krais, nga soh hawane ka amuto xuhai saun solian tenen tenen. Amuto tioi aluini aweisali Krais ma amuto

pon hanau seilon liai. ¹⁵ Kalak masin ien, leili teik pas ie kakaia pala ahian sale waliko hina ti hanamenaiamuto. ¹⁶ Nga hanau amuto ukek ien nake ti lalape soliai Haeu nga se unaui Jises Krais ti ailei puasain leili teka kumahe Ju. Haeu kilami nga kaxiai meng solian ti Jises Krais. Puasak masin puase teka masiwi ti hukuminiai Haeu ma seilon. Masin ti laha lelei manihuh hani Haeu lehe Haeu waxy amuke, nga neini teka kumahe Ju hani Haeu lehe waxy laha xox ahe tatale seilon ti Haeu ti kui pohe Holi Spirit ti i pupuas leilolahe ape Haeu waxy amuke laha.

¹⁷ Aile ape ti xoxoi pakataiak hani Jises Krais, nga amasake hawane ailei puase Haeu.

¹⁸ Tap tenen waliko liai nga po sameni, mewenae waliko ti Krais aileti leili pupuasak. Kakaiai ma nanahiak i neini teka kumahe Ju ti hong tamaniai Haeu. ¹⁹ Nga itini waxaini laha ti kilan kolakol lalap nga aile ti pohe Holi Spirit. Ti nga aile pupuasak ien, nga lua hani kilan taon hutui Jerusalem hani tataen texux xux Ilirikum. Ti ien, nga kaxi hatapoem meng solian ti Jises Krais.

²⁰ Lawe nga eliel kaxiai meng solian ti Jises Krais hani teteka seilon laha ti hongohong. Kumahe pahak nga tua puas kului puasain ti teka liai hutuiwen masin tel seilon i tua atau hahuna tehu ing ti hahutuiai tel liai. ²¹ Nga aile usiusi waliko ti Aisaia tai kaxiwen leili pepai Haeu ti i ukek, “Teka pate tap hohongoalaha tetan, laha po tioi i.

Teka laha tai hongohong mengon, laha po xeu kakaian.” ^(Isa 52:15)

²² Se puasain ien hahatalia nga ti sohot paxaiamuto.

Pol nanamiloi paxaiai teka kahikahi Krais ti Rom

²³ Pate kilan ahang pahak wanen nga lua paxai amuto. Tuahen nga po kokoukewa aope, nga tinami hatapoem puasak leili xux ti ie. ²⁴ Nga nanamiloi kane texux xux Spein. Ti aweisaluk hani ien, nga sotamu Rom ti paxaiamuto. Pahak nga to amuamumu teik kapimuto ape muhin amuto hualima nga ti tehu luaiak ien.

²⁵ Tuahen aope ie nga lua hanimu Jerusalem otoheniai moni ti hualiae teka kahikahi Krais ien. ²⁶ Teka kahikahi Krais ti xux Masedonia ma Akaia, lato apuhini moni ti hualiae teteka kahikahi Krais ti

Jerusalem totonalaha lialun. Lato aile ukek ien ti leili atelato wanen. ²⁷ Lato amuam hawane ailean. Salan tetan, lato ilameni ukek ka i pon hawane lato kahui aliake solian ti lato kewen, ti teka Ju kahikahi Krais kaxi meng solian hani lato teka kumahe Ju. Lato namiloi ukek ka waliko ti lato hani, i kum ponoa na lato kolongeni hani waliko ti teka Ju aile haniwen lato. ²⁸ Nga kolongeni ka teka Jerusalem uke hahamahuli teik moni ien. Muhiin ti nga aile kewa teik puasak ie, nga sota paxai amuto imat ti nga tapau hani Spein. ²⁹ Pate nga soh ka ti lalape soliai Krais, i hapuasa nga lehe waxy amuto uke kilan solian tetan ti nga kapimuto.

³⁰ Ati kako pakata hehetekie hani kapi Jises Krais tel Masiwi ti kako ma kako hina wawahen ti hahaniai Holi Spirit. Aile ape nga kamei hawane amuto lehe amuto eliel lotu sekuiak ti ailei pupuase Haeu. ³¹ Lotu kameiwa Haeu lehe i awai nga ti teka Ju ti Judia laha kum soh ti Jises Krais ma tin lehe teka kahikahi Krais ti Jerusalem amuke pupuasak wasolalato. ³² Lotu elielawa lehe waxy na Haeu pahan nga tahia kapimuto. Ape na nga luawa, nga tahia hetekiewa amuam he tiak ape kako he sekusek alia kako.

³³ Nga kamei Haeu, tetel hatona hasoliai tiai seilon, akati amuto hatesol. Salan wanen.

16

Pol hakau amuam tetan hani teka kahikahi Krais

¹ Fibi tel akikikako ti Krais, tai kue i sohot paxai amuto. I tel hehin masiwi leili teka kahikahi Krais ti tehu taon Kenkeria. Nga sameni hawane i. ² I unaui Jises tel Masiwi masin kako. Amuto waxy auniwa i usiwa saun ti koko teka seilon ti Haeu. I huali hakilawen seilon hetekie puki nga ape tin amuto hualiwa i ti tenen na i tae.

³ Amuam tetak haniwa Prisila ma tel axoan wawan Akila. Lalu puas tutuay nga ti ailei puase Jises Krais. ⁴ Lalu kum nomuhini kalak pate sikole lalu mat nake ti awaiak ti matemate. Nga ma teka kahikahi Krais laha kumahe Ju ti tesol tesol kak kemulik lalap wanen hani lalu.

⁵ Amuam haniwa teka kahikahi Krais lawe lato apuha leili ingalau.

- Amuam haniwa Epenetus tel pate nga waheni. Leili texux xux Asia, i tetel i sohot kahikahi Jises Krais imat ti teka liai.
- ⁶ Amuam haniwa Mary tetel i puas eliel hahawane ti hualiamuto.
- ⁷ Amuam haniwa Andronikus ma tel hehin Junias huhua akitik Ju lalu kalabus tuaiwen nga. Lalu sohot kahikahi Krais imat tetak ape teka seilon sameni hawane huhua aposel ien.
- ⁸ Amuam haniwa Amplius tel akitikako ti Krais pate tuah tetak.
- ⁹ Amuam haniwa Urbanus tel tuaukako ti ailei puase Jises Krais, ma Stakis tel pate nga waheni.
- ¹⁰ Amuam haniwa Apeles tetel nanahian kola i unaui Krais wanen, ma Aristobulus hetekiewa teka akitik lohe ingan.
- ¹¹ Amuam haniwa Herodion tel akitik Ju, ma Nasisus hetekie teteke akitik lohe ingan lato kahikahi Krais.
- ¹² Amuam haniwa Trifena ma Trifosa huhua hehin lalu eliel hahawane ailei puase Jises tel Masiwi, ma tel hehin Persis pate nga amuke. Tin i eliel hahawane ailei puasain ien.
- ¹³ Amuam haniwa Rupus tel unaui Krais pate solian, ma tel tinan tetel lawe i aile hani nga hanowi natun wanen.
- ¹⁴ Amuam haniwa Asinkirus, Flegon, Hermes, Patrobas, Hermas ma teka kahikahi Krais kapi lato.
- ¹⁵ Amuam tetak tin haniwa Filologus, Julia, Olimpas, Nereus, tel tuan ma hatesol kahikahi Krais kapi lato. ¹⁶ Ti amuto apuha hetekie, pohi amukewa tel tel ti kolai wawehen. Hatesol teka kahikahi Krais ti tesol tesol laha hakau amuam ti laha hani amuto.

Tilai nauna ti Pol

- ¹⁷ Teka akitik ti Krais, nga kamei eliel amuto, kanipetiwa teteke laha neini hasele amuto ti aweisali Krais ma laha aile axi amuto wasol nake waliko ti laha hahanau i pahoxai waliko salan ti amuto hongoen. Amuto kum papakata kapi laha.
- ¹⁸ Seilon tenen ien, laha kumahe unaui Krais tel Masiwi ti kako, laha tua usiusi isiai tupualaha. Malimun ti laha pulutiae teka seilon soholakawi nake laha anesoke hawane towi hapau kakain ti itiniae namili seilon. ¹⁹ Teka kahikahi Krais tesol tesol, laha hongoen xoxoi tutuhamoto ti Krais ape nga amuke hawane. Tin pahak amuto

paxai tioi hawanewa waliko tenen sawi-sawin ma kum nanakaxua ti waliko lialun.

²⁰ Soh hawanewa ka Haeu, tetel i hatona hasolia tiakako ma wasolakako tel tel, i halialu tamusuke koseni pohe Satan tetel lawe i pupuas ti halialui wasolamuto. Nga kamei Haeu lehe Jises tel Masiwi ti kako aile kola lapale soliaian hani amuto.

²¹ Timoti tel tuauk ti ailei puase Krais, hetekie Lusius, Jason ma Sosipater tesol akitik Ju, lato hakau amuam ti lato haniwa amuto.

²² Minak nga Tertius, tel akitikumo ti Krais tel Masiwi, nga tai teik pasi Pol ie. Nga tin nga hakau amuam tetak haniwa amuto.

²³ Gaius tin i hakau amuam tetan haniwa amuto. I tel nga toto leili ingan, ing tetehu lawe teka kahikahi Krais apuha.

Erastus tel auniai moni ti tehu taon ie, ma Kuortus tel akitikako ti Krais, tin lalu hakau amuam haniwa amuto.

²⁴ Nga kamei Jises Krais tel Masiwi ti kako lehe i aile hasolia tatale hani amuto hatesol.

²⁵ Haeu i pon hakuai xoxoi namilomotetan, usiwa meng solian ti Jises Krais ti nga kakaxi, tetenen ti Haeu po hahatakewa aope. ²⁶ Ape i pon hawane seilon tioi. Teka kuluiakakai Haeu laha tai kaxi kilamiwen sale Jises Krais ape Haeu tetel tap tahi tapoan, i talo kako teka unauan ti kaxi swateniai meng solian ti Jises Krais hani lawe seilon ti tesol tesol lehe waxy laha soh tetan ma hong usi kakaian. ²⁷ Mewenae i se salan Haeu ma anesoan lalap tapein. Kako haxawawa axan lian tehue nake ti Jises Krais. Salan wanen.

1 Korin
Teik pasi Pol hani teka kahikahi
Jises Krais ti Korin
Kakain ti haxewai teik pepa
ie

Sai 24 ahang muhin ti Jises moih aliawa ape Haeu waxy i hani tesol tonan, Pol tel aposel tai teik pas ie hani teka kahikahi Jises Krais ti Korin. Lokon ien i toto tehu taon Epesus. Korin se tehu taon tuah leili Akaia, tetexux xux teka Grik totonai. Kilan seilon ti Korin pate aneso ma kilan wanen soxi tuahela lolotui waliko tenen kumahe salan Haeu ma to ailele saun lialun. Kemuk, Pol kaxi ahuhuti meng solian ti Jises Krais hani teka Korin. I hahanau laha leili ahang tehu tewaok ape kilan seilon laha sohot kahikahi Jises Krais. Imuh i hong tunahi ka hina kawatan sosohot leilolato. Kumahe lato usi hahawane aweisali Krais ma lato he wiwilik. Aile ape lato tai kakamei Pol sale waliko ti i sosohot leilolato. Leili teik pas ie Pol tai pahoi tesol Korin. I nau hasawi lato ma nexi haxewa sale nanahiai teka kahikahi Krais.

¹ Nga Pol tel aposel ti Jises Krais, Haeu kilami nga ti puki namilon. Amuam ti amili Sostenes tel akikikako ti Jises Krais hanipa amuto.

² Nga tai teik pas ie hani amuto teka kahikahi Krais ti tehu taon Korin. Haeu aile hasohotu amuto seilon tetan ti i pakateni amuto hani Jises Krais. Aile ape Haeu pahan wanen amuto hani hatapoa i tupuamuto hetekie teka laha toto tesol tesol, teteke laha paxai ukek Jises Krais i tel Masiwi. I Masiwi ti laha ma ti koko.

³ Nga lotu kamei Haeu tel Tamakako ma Jises Krais tel Masiwi ti haniamuto lalape solialalau ma hatona hasoliai tiamuto.

Pol kak kemulik hani Haeu

⁴ Lawe nga kak kemulik hani Haeu tel Masiwi tetak nake ti lalape soliaian i hani amuto waliko solian. I aile ukek ien nake ti waliko ti Jises Krais ailewen. ⁵ Nake ti amuto pakata hani Jises Krais, Haeu aile hasolia hakila hani amuto. I hani amuto anesoin ti towi aluiniae kakain ma titioamuto ti lawe waliko i kola hahatakei hani amuto. ⁶ Ti tesol waliko ie, Haeu kola hani amuto ka waliko ti amite tesol aposel kakaxi sale Jises Krais se salan wanen. ⁷ Aile ape Holi Spirit ti

Haeu hapono hani amuto tenen ti na amuto tae, haliwei ti amuto mon atetengi aliai Jises Krais tel Masiwi ti koko. ⁸ Pake Jises hahakui amuto atengi mateamuto lehe ti na i aliama, tap tel i po tieni amuto ti tenen. ⁹ Haeu aile hahani kako tesol waliko solian ien nake lawe i aile usi waliko ti i kakawan. I kilami amuto seilon tetan lehe waxy amuto pakata xox hawane kapi tel Natun Jises Krais tel Masiwi ti koko.

Kahikahi Krais ti Korin lato tikela

¹⁰ Tesol akikik ti Krais, nga kamei eliel amuto hahitake axe Jises Krais tel Masiwi ti koko, kum he hapatapat ma kum he wiwilik nake i aile axi wasolamuto. Kewa namilomuto teikawe lehe waxy amuto hukuma hetekie hawane ti lawe waliko na amuto aile. ¹¹ Tesol akikik ti Krais, teka ti tehu ingi tel hehin axan Kloe hahongoen nga lengelenge ti wasolamuto. ¹² Nga hongoen ka amuto hina wasol. Teka ti amuto ukek amuto se kahikahik nga Pol. Teka ukek laha se kahikahi Apolos. Teka liai ukek laha kahikahi Pita. Ape teka ukek ka laha kahikahi Jises Krais.

¹³ Nakon Krais i wika uke teik teik? Nakon nga Pol tetel laha tahi hakea telei ti awiamuto? Nakon hahitake axak nga Pol ti amuto uke baptais? ¹⁴ Kemulik wanen Haeu ka nga baptaisiwen huawe wanen ti amuto, mewenae Krispus ma Gaius. ¹⁵ Aile ape tap tel i po ukek i ukewen baptais hahitake axak. ¹⁶ Salan ka tin nga baptaisi hetekiewen teka lohe ingi Stepanas. Muhi tesol ien, nga kum nam tunah na nga baptaisiwen hina seilon liai. ¹⁷ Kumahe Jises Krais taloma nga baptaisiai seilon. I kilami nga kaxi ahutiae meng solian tetan. Kumahe nga hahapuasa kakain ti i ahuma puki anesoi seilon nake pahak seilon soh hawaneweh tehu matei Jises Krais he kros ti awaialaha.

Sale anesoi Haeu

¹⁸ Nga tioi ka teteka laha tale hawaneweh tehitolaha hani Haeu ape laha kane tesol kauai kawatan ti tap tahi tapoan, laha ukek ka matei Jises Krais he kros tap wanen pupuasan. Tuahetekia kako soh ti tenen meng ien ape kako kane tesol kapi Haeu lian tehue, kako ukek ka ien se aweisal ti Haeu kola kuiai pohen ti awaikakah.

¹⁹ Masin ti leili pepai Haeu i ukek, “Nga teheni hawane namili teka laha sokok laha seilon aneso.

Nga titi nanahiai teka laha sokok

namilolaha xewan tapein.” (Isa 29:14)

²⁰ Na Haeu aile ukek ien, i namiloi ukek ia teka laha sokok laha seilon tenen ti namil xewan, aneso mumuh ma seilon namilo ti towiai kakain? Haeu kola hawanewen ka anesoin ti teka seilon laha kum soh tetan tap pupuasan. ²¹ Ti anesoi Haeu i namiloi-wen ka teka seilon kum pon tioi hawaneean ti puki anesoalaha. Aile ape Haeu noseni ka teka seilon oxoxa ti kawatan ti lialui woulaha na laha soh ti tenen meng solian ti Jises Krais amite kakaxi, tetenen teka laha kum soh ti Krais ukek tap pupuasan. ²² Teka Ju lawe pahalahaa paxaai kolakol lalap tenen i kola ka meng solian ti Jises Krais i ahuma ti Haeu. Teka kumahe Ju lawe laha uke waheni mewenae kakain tenen i onoteni anesoin ti pahalahaa. ²³ Tuahé amite tesol aposel amite kakaxi solian ti kako uke ti matei Krais he kros. Teka Ju laha kum pon hawane kauan nake laha kum ukek seilon tahi hakea Krais he kros. Teka kumahe Ju laha ukek ka matei Jises Krais he kros tap wanen pupuasan.

²⁴ Tuahé teteke Haeu kilamiwen laha seilon tetan ape laha soh hawane kakaiyan, ti leili teka Ju ma teka kumahe Ju, laha paxai tioi ka Jises Krais kola hawane pohe Haeu ma anesoan. ²⁵ Seilon teka laha ukek Haeu tap namilon ti i aile tewau aweisal awaiaakaha ien. Ti salan tetan i kola ka anesoan i xoini hawane anesoi lawe seilon. Laha ukek ti Haeu aile ukek ien i kola ka tap wanen kuin tuahe salan tetan kuiai pohen i xoini hawane kui lawe seilon.

²⁶ Tesol akikik ti Krais, namenim aliakewa ti uli amuto sohotua kahikahi Jises Krais. Ti namili teka seilon, kumahe kilan ti amuto seilon aneso, axamuto lalap ma seilon tuah. ²⁷ Tuahé Haeu hapuasa waliko tenen seilon ukek tap pupuasan lehe i teheni teka laha sokok laha seilon aneso. Ape i hapuasa seilon tenen teka liai ukek kumahe tuah lehe waxy i teheni teka laha sokok axalaha lalap. ²⁸ Haeu kewi i hapuasa seilon tenen teka liai paxai wasi ma aile hanowu ka laha kaliap lehe waxy i naxi xaxaweni axe teka laha sokok laha pate tuah. ²⁹ Aile ape tap tel i po hanasanasake anesoan ma lape axan he puli Haeu.

³⁰ Haeu se tetel i pakateni amuto kapi Jises Krais. Kako uke solian ti anesoi Haeu ti Jises Krais mat awaiaakako. Nake ti waliko tenen ti Jises Krais ailewen, wasolakako kapi Haeu i sawi, kako oxoxa ti hahitake saun lialun ma kako hani hatapo Haeu tupuakako.

³¹ Masin ti leili pepai Haeu i ukek, “Na pa-

ham o sameni waliko, sameniwa mewenae waliko ti Haeu tel Masiwi ailewen.” (Jer 9:24)

2

Pol hahanau anesoin ti i ahuma ti Holi Spirit

¹ Tesol akikik ti Krais, imat ti nga kapimoto, ti nga kakaxi waliko ti Haeu hohone nga, kumahe nga hahapuasa kakain tenen potopoton ma sale kakaiak kumahe nga kokoala ka nga pamu anesoan ti amuto. ² Nga ailewen namilok ka nga kakak mewenae Jises Krais ma tehu matean he kros ti awaiaakaha. ³ Tinuk i uke he tap kuin, i akiaki ma xexex ti nga kakak kapimoto.

⁴ Ti nga hahanau amuto ma kaxi ahuhuti meng solian ti Jises Krais, kumahe nga kakak ti puki lape anesoak ti itiniamuto. Puki Holi Spirit kola hawane ti kuiai pohen ka kakaiak salan. ⁵ Pahak wanen amuto soh ti Jises Krais kumahe ti anesoi seilon tuahe ti paxai tioiai pohe Haeu ti i pupuas leiomuto.

⁶ Tuahé na amite tesol aposel wasole teka laha hana hatapo namilolaha hani Jises Krais ma laha usi hahawane nauna tetan, amite kakak hetekie anesoin ti amite kakaxi menge Haeu. Anesoin tenen ien kumahe tetenen teka laha kum soh ti Haeu ma teka masiwi ti tehu pon ie hina. Puasalaha ma masiwalaha aneso i tapo. ⁷ Amite kakaxi waliko ti Haeu namiloiwen i aile hani kaha ti lalape anesoan. Waliko ien, ti imat ti tai hatakei hani teka seilon. Tuahé imat ti i tanomi lawe waliko, hoi i namiloiwen ka lalap solian kaha uke ti anesoan. ⁸ Tuahé tap tel ti teka masiwi ti tehu pon ie paxai tioi tesol waliko ien. Na laha tioila, ala laha tai tahi hakea telei tel Masiwi ti kako, tel solian tapein. ⁹ Laha kum xeu uke waliko ti pepai Haeu kaxiwen ti i ukek,

“Tap tel paxaiwen, tap tel hongoen,
tap tel pon namiloi usiai
hatesol waliko solian ti Haeu apesen-i-
wen
ti teka laha waheni hawane i.” (Isa
64:4)

¹⁰ Tuahé kako teka kahikahi Krais, Haeu kola hatakei haniwen kako tesol waliko ien. I hapuasa Spirit tetan ti haxewaakako. Holi Spirit pon ailean nake i nihehi paxai ma tioi lawe waliko, hetekie tataen tesol waliko ti Haeu pate ailan ti teka seilon xeu.
¹¹ Tap tel seilon tioi namili tel seilon liai, puki alia i tioi aliakewa namilon. Tin masin

tap tel tioi namili Haeu, mewenae Spirit tetan.¹² Kumahe Haeu hanamiloa kako usiai hanauan ti teka laha kum tioi i. Kako kewen Spirit tetan ape kako paxai tioi waliko ti Haeu haniwen kako ti lalape soliaian.

¹³ Ti amite kaxi hahani amuto tesol waliko ien, kumahe amite hahapuasa kakain ti amite kema ti anesoi seilon. Amite kakak hahitake anesoin ti Holi Spirit. I kakapiti kakaiamite ti amite kaxi haxewa hahani teka seilon waliko ti pahan i hatakei.¹⁴ Tel na i kum hani Spirit ti Haeu kapitiae namilon, i kum tani waxy waliko ti Holi Spirit hahanau. I namiloi ukek waliko ien tap pupuasan. I kum paxai tioi solian tetan nake mewenae hetekie huhual ti Holi Spirit seilon pon paxai tioi aluiniae salangawee tesol waliko ien.¹⁵ Teka ti Holi Spirit pupuas leilolato, lato paxai kolongeni aluin waliko, tuahe teka liai laha kum paxai kolongeni aluin uke lato.¹⁶ Masin ti tel kuluiak kakai Haeu kakawen,

“Aita po tioi namili Haeu tel Masiwi?

Aita pon naui Haeu?”¹⁷ (Isa 40:13)

Tuahe kako nam tioi waliko ti Holi Spirit hahatakei hani kako nake namilokako onotenii namili Jises Krais.

3

Tesol aposel lato tuahe unaui Haeu

¹ Tesol akikik ti Krais, lokon ti nga kapimuto, nga kum hanau amuto hanowi ti nga hahanaau seilon ti Holi Spirit kakapiti. Nga kakane amuto hanowi ti nga kakane teka ti isiai pahalahaa neneini laha. Amuto kumahe pate xoxoan ti usiai aweisali Krais, aile ape nga hahanaau amuto waliko tenen malimum ti amuto ukean hanowi na tame tel akaik i hanau tel natun kokol.² Nga kum hanau amuto waliko tenen pate ailan ti amuto ukean masin hehin i kum hani tel natun pate kokol an tenen ailan, i hani i kani sus. Amuto tai ponoa ukean ma ape ie amuto tin mamasin tutuen.³ Lialui isiai pahamuto i kakapiti tutuen amuto. Amuto aile saun tenen ti nam watakaiai seilon liai nake laha xoini amuto ma amuto kak hapatapat wasolamuto. Kaie i kum kola ka lialui isiai pahamuto i kakapiti amuto? Amuto aile hahanowi seilon tenen i kum tioi Haeu.⁴ Teka ti amuto ukek amuto usiusi nga Pol ape teka liai ukek laha se kahikahi Apolos. Kaie i kum kola ka amuto aile hahanowi teka kumahe kahikahi Krais?

⁵ Nakon amuto ukek nga Pol aita a Apolos aita? Amili hahua tuahe unaui Haeu.

Amili huhuali amuto lehe amuto soh ti Jises Krais. Amili hahua tua ailele puasain ti Haeu haniwen amili.⁶ Nga masin tel seiniai waki pata nake nga tetel nga kaxi hanimu amuto meng solian ti Jises Krais. Apolos masin tel hawasiae waki pata nake i hanau aheke amuto. Tuahe Haeu tetel i aile ape i xex, tetel i haxoxo hahawane amuto lehe amuto sohot seilon tenen ti pahan.⁷ Aile ape kumahe pate waliko lalap tel seinian ma tel hawasian. Waliko lalap se Haeu tetel haxexean nake i hahakui xoxoi namilokako ti Jises Krais lehe waxy kako sohot seilon ti usi hawanean.⁸ Tel seiniai waki pata ma tel hawasian lalu pupuas ti namil teikawe ti haxexei tehu waki pata ien. Tin masin tel kaxiai meng solian ti Jises Krais ma tel hanau ahekean, lalu pupuas ti namil teikawe hakuiai teka kahikahi Krais. Ati lalu uke kahulalu usiwa puasalalu.⁹ Amili Apolos puas pakata hehetekie ailei puase Haeu. Amuto masin tesol kin ti Haeu hone amili puasakean. Amuto masin tehu ing ti Haeu atatai.

¹⁰ Nga kaxi hani amuto meng solian ti Jises Krais ape amuto soh. Se masin ti tel i hahana teke tuhi kuku ti i atatai tehu ing. Ti lalape soliai Haeu i hapohea nga ailei tenen puasain ien. Teka liai laha hanau aheke amuto masin teka laha hatuhi ing patul he tesol tuhi kuku ien. Ti laha hatuhi laha kanipeti hawane sale hatuhian. Tin masin teka unaui Haeu tin laha kanipeti hawanewa sale hanauamuto.¹¹ Sale ataiing, teke tuhi kuku hanaian tekewe. Tin masin amite tesol aposel kakaxi meng tene-nawee hani teka seilon. Tenen meng ien se ti Jises Krais. Tap tenen meng liai i haxoxo tutuhamuto ti waliko tenen salan ti Haeu.

¹² Na sale nanahiai teka kahikahi Krais i onotenii namili Haeu, laha masin teteka laha hapuasa pot tenen ailan ma tuah ti laha hatuhi ing patul he teke tuhi kuku. Tuahe na sale nanahialaha i sel ti namili Haeu, laha masin teteka laha hapuasa waliko naum masin pata ma kaini ti hatuhiai ing, waliko tenen i pon ah lui.¹³ Puasalaha i po sohot kouke tataen ti Haeu hiniti lawe seilon. Taen ien Haeu paxai kolongeni puase lawe seilon. Ien masin ti na ah lui ing ape kaha paxai tioi waliko tenen laha hahapuasa ataien.¹⁴ Ing tetehu laha uke ataien waliko tenen masin pot, ah kum lui uke. Na Haeu paxai ukek pupuasakalo tuah ma soliai anan tap tahi lialuan, i kahui hasoliai koko.¹⁵ Tuahe tehu ing na ah lui hatapo,

teka ataiān laha kum uke kahulaha. Na hina pupuasakako i kum usi namili Haeu, kako kuosel ti tehu kawatan ti tap tahi tapoan tuahe hanowi ka kako okohi ti ahutiakako leili xekei ah.

¹⁶ Nakon amuto kum tioi ka amuto masin ingi Haeu ape Spirit tetan leilomuto? ¹⁷ Na teka laha haeliel halialui tetehu ingan, Haeu halialu tamusuke laha nake kako, teteka kako hani hatapo i tupuakako, se pate tuah tetan.

¹⁸ Teka ti amuto sokok amuto seilon aneso tuahe namilomuto masin namili teka laha kum soh ti Haeu. Kum puluti aliliak amuto. Na pamahuto sohot seilon aneso wanen, usiwa namili Haeu ape tiliwen teka laha kum tioi Haeu ukek tap anesoamuto.

¹⁹ Hani lioiwa laha aile ukek ien nake waliko ti laha sokok i ahuma ti anesoan wanen, Haeu ukek tap pupuasan. Masin ti leili pepaun i ukek,

“Teteka laha sokok laha pate aneso,

Haeu ukek anesoalaha suhai ali-
akealah.” *(Job 5:13)*

²⁰ Tin i ukek,

“Haeu tel Masiwi paxai ukek tap pupuase
namili
teka laha sokok laha pate aneso.” *(Ps 94:11)*

²¹ Aile ape kum hanasanasake teka masiwi, ka tel pamu masiwiyan ti teka liai. Hatesol waliko ti Haeu hahani amuto, hina solian tetan ti amuto. ²² Tuah tel ti amite, nga Pol, Apolos ma Pita, Haeu hapuasa amite hatesol hualiamuto. Waliko ti i tanomi he tehu pon ie, ti kaha hapuasa. Hatesol waliko hina solian tetan ti kako teka kahikahi Krais, na kako moihin ma na kako maten, waliko ti i tunahi kako aope ma na imuh.

²³ Aile ape kum hanasanasake teka masiwi ti tehu pon ie nake amuto hahitake Krais a Krais se ti Haeu.

4

Pol nau hasawi teka Korin

¹ Aile ape seilon namiloi kewak ka amite tesol apisel amite unaui Jises Krais. Haeu hana amite kaxi haxewai waliko ti imat i tai hatakei hani teka seilon. ²Kaha tioi, na tel masiwi hanauen tel ailei tenen na puasain, i aile usi aluin i hatapoa. ³Puki nga Pol, i kum ailewa nga na tenen ti amuto ma na seilon liai paxai kolongeni sale pupuasak. Kalak puki nga, nga kum paxai kolongeni aliliak sale pupuasak. ⁴Nga ilameni tioi

ka tap tenen nga talesiwen tuahe kumahe i kola hawane na masin salan nga talesiwen ma na kumahe. Jises Krais tel Masiwi i tetel nam paxai kolongeniat.

⁵ Aile ape kum howini hahalialu seilon liai. Taun i luluainima ti Jises Krais tel Masiwi paxai kolongeni woi lawe seilon taen ti i aliam. Tataen ien i kola hatakei waliko lialun ti teka seilon aile mumunen. I ahuti hakouke namili lawe seilon. Taen ien Haeu sameni tel tel, usiwa sale nanahialaha.

⁶ Tesol akikik ti Krais, tesol waliko nga hahanau amuto ie nga kak kolongeni hani amili Apolos. Nga ailele ti solian ti amuto lehe amuto tioi aluin sale usi hawanei kakai Haeu leili pepaun. Na masin ien, tap amuto haxawa masiwi tel ma nam watakai tel. ⁷Aita hana amuto pamu tuah ti tel liai? Waliko la ti amuto kewen kumahe hahaniai Haeu? Na masin amuto kema tetan, kalahai amuto to hanasanasake ka ti puki kuimuto?

⁸ Amuto sokok ka amuto tapai hawanewen ti usi hatapoi kakai Haeu. Amuto hanowi ka amuto uke hatapoen hatesol waliko ti Holi Spirit hahani seilon. Amuto hanowi ka hoi amuto neini tutuai Krais teka seilon a amite teka hanauamuto tap. Tap na amuto to hail masiwi lehe amite to tuai amuto. ⁹Nake ti tenen ien, ilamenan tetak masin ka amite tesol apisel ti Krais, Haeu hanawen tapeinan ti lawe seilon. Hanowi ka amite teka kalabus lehe teka masiwi hani laha telei ti puli lawe seilon. Tin hanowi ka lawe seilon hetekie teka engel laha paxai otioti waliko tenen i sohot hani amite masin ti teka seilon laha mamatai lokoloko.

¹⁰ Tanoman namilomuto onotenii namili teka seilon laha ukek tap namilomite nake amite hani hatapo Jises Krais tupuamite. Tuah amuto sokok amuto seilon aneso ti usiai Krais. Hina seilon laha namiloi talesi ka amite tap pohe Haeu. Amuto sokok ka amuto seilon pate pohen. Namilomuto ukek seilon sameniwa amuto ape ewi na laha teheni halialu amite. ¹¹Hanimtaen aope ie amite tutunahi hitolo, amite sosoi maia wasan ma watata. Laha xai hahalialu amite ma amite tua sos ahahu. ¹²Amite puas eliel hahawane ti waxeniamite. Ti teka seilon kak saxuti amite, amite aile hasolia hani laha. Ti laha axi amite kawatan, amite kum kahui aliake, amite tu xox tatale. ¹³Ti seilon kak teteheni axamite, lawe amite ailele kakain solian na amite kak laha. Hanimtaen aope ie teka laha kum soh ti Haeu

laha aile hahani amite hanowi tix ti he kan ma masiap ti seilon tua towi xoini.

¹⁴ Kumahe nga tai teik pas ukek ti hahieniamuto, nga tai ti nau hasawia-muto nake amuto masin natuk pate nga wahreni. ¹⁵ Kalak kilan wanen seilon hanaua-muto sale aweisali Krais, telawe tamamuto ti neiniamuto hani kapin. Nga masin tel tamamuto nake ti nga kaxi meng solian ti Jises Krais ape amuto soh tetan. ¹⁶ Aile ape nga kamei eliel amuto usi hawaneak ti aweisali Krais.

¹⁷ Nake ti tenen ien nga taloa Timoti hani kapimuto. Pate nga wahreni i hanowi tel natuk wanen. Namilon xoxoan ti Jises Krais. Lawe i puas alua hawane hualik. I hanamena aliakte amuto sale nanahiak ti usi Jises Krais. I onoteni hawane waliko ti nga hahananu teka kahikahi Krais ti tesol tesol sale usian.

¹⁸ Teka ti amuto, hanasanias ti laha. Laha sokok nga kum tahiia aliawa. ¹⁹ Tuahe na masin ti namili Haeu, tai kue nga alia hani kapimuto. Taen ien nga tioi na salan teka hanasanias hina pohe Holi Spirit ma na tuahe xanaxan. ²⁰ Teteka ti Haeu neneini laha, i hapohea laha ti usian. Ti tenen ien i kola ka salan laha seilon ti Haeu kumahae ti laha tua to kakak. ²¹ Pahamuto tenen ia nga aile hani amuto ti na nga tahiawa? Na masin amuto kum towiahu ti lialui saun tenen ti amuto ailele, nga kahiloloi hawane amuto. Tuahe na amuto towiahu, nga kak hamalehu hani amuto ma aile kola lalape wawahen tetak hani amuto.

5

Sale hasawiai teka kahikahi Krais

¹ Nga hong kuaini ka hina saun lialun ti wawan hehin tenen ti pate hienain waso-lamuto. Tel seilon leilomuto i eng akakati tel tinan tonamuh. Kalak teka laha kum tioi Haeu, saun tenen ien laha koi ailele. ² Kiae lialui woun ala i hakawata hawane tiuamoto. I pon hawane amuto xaxaweniwen i ti leilo-muto. Tuahe haniwa amuto, pate amuto hanasaniasake anesoamuto usi aweisali Krais.

³ Kalak nga tap kapimuto, namilok tutuen toi amuto. Nga ailewen namilok sale hasawiai tel seilon i aile tenen saun ien hanowi ka nga kapimuto. ⁴ Taun ti na amuto apuha hahitake axe Jises tel Masiwi ti kako hetekie kui pohen, nga tin masin ka kapimuto ma pahak amuto aile kewak ie.

⁵ Amuto xaxaweniwa i ti leili teka kahikahi Krais lehe waxy i paxai tioi ka i ape uke Satan neini ape ti lalape kawatan ien, i towiahu ti lialui woun. Na masin ien, Haeu awai i ti kawatan ti lialui woun ape tehu ngain ti aliai Jises tel Masiwi, Haeu kum tieni i.

⁶ Amuto to hanasaniasake anesoamuto usi aweisali Krais tuahe amuto tua paxai lilioi saun lialun. Tenen ien kumahe wanen salan. Nakon amuto kum tioi ka teik kokole ist i haxiwa palawa hatehu? Tin masin tel seilon na i to ailele saun lialun, i aile halialu namili teka liai. ⁷ Masin ti teka Ju xaxaweni hatapo ist ti leili ingalahi imat ti Pasova, lioi xaxaweni hatapoia saun lialun ti leilomuto lehe waxy amuto sohot seilon haun ti usiay Krais nake amuto seilon ti Haeu. Nameniwa ka Krais mat ti oxoxi-akako ti kawatan ti lialui woukako masin ti teka Ju telei sipsip wawan uluha taun ti Pasova ti kahuai lialui woulaha. ⁸ Nake tenen ien se salan wanen, nanahiakako hatehu usiwa namili Haeu. Kako kum usiusi lialui woukako ti imat. Kako kum aile halialu tel tel, kako hani hatapoia Krais tupuakako ti leili atekako wanen ma lawe kakawa kakain salan.

⁹ Teik pasuk nga tai hanimu amuto imat, nga hone amuto kum huhukuma kapi teka seilon laha to ailele saun ti sikisiki tenen ti pate hienain. ¹⁰ Tuahe kumahe nga ukek kum huhukuma kapi teteka laha kum tioi Haeu laha ailele tenen saun ien ma laha tin halepean, waxy lungiay soxiao seilon ma lotuiai waliko tenen kumahe Haeu. Na nga kakawen ukek ien, ala amuto xaxaua ti tehu pon ie lehe amuto kum tunahi seilon tenen ien. ¹¹ Tuahe ti nga tai hani amuto, namilok ukek kum huhukuma kapi teka laha ukek laha kahikahi Krais a laha to ailele tesol saun ien hetekie laha kak teheni halialu seilon liai ma to un taxitaxia. Seilon tenen masin, kalak tuahe ti angain, kum hetekie kapi laha.

¹² Kumahe pupuasakako paxai kolongeni hasawiai woi teka seilon melal ti teka kahikahi Krais. Pupuasamuto nau hasawiai teka kahikahi Krais tuaumuto. ¹³ Masin ti leili pepai Haeu i ukek, "Seilon ti laha to ailele saun tenen pate lialun, amuto xaxaweniwa laha leilomuto." *(Deut 17:7)* Haeu tetel nam paxaiai waliko tetenen na i aile hani teka laha kum soh tetan.

6

Sale sulusulu leili teka kahikahi Krais

¹ Na tel ti amuto hina wasol kapi tel liai, alahan amuto kum hasawi aliake wasolamuto teka kahikahi Krais, teka seilon ti Haeu? Amuto kum sulusul hani teteka laha kum nam waxi Haeu. ² Nakon amuto kum tioi ka kako teka seilon ti Haeu, imuh kako paxai kolongeni woi teka laha kum soh ti Haeu? Na masin ien, nakon amuto kum pon hasawiai teik waliko kokol wasolamuto teka kahikahi Krais? ³ Nakon amuto kum tioi ka imuh kako paxai kolongeni hetekie taen teka engel? Na masin ien, ala amuto pon hasawiai kawatan ti kaha he tehu pon ie. ⁴ Na amuto hina wasol, alahan amuto paxai teka kumahe kahikahi Krais ti hasawian? Teka seilon ien tap axalaha leilokako teka kahikahi Krais nake laha kum soh ti Haeu. ⁵ Nga kak ukek ti hahieniamuto. Nakon pate tap tel ti amuto anesoan i tapai hasawiai wasol na i sohot wasolamuto teka kahikahi Krais? ⁶ Tuahé amuto kum aile ukek ien. Amuto he sulusul alia amuto hani teka ti hong paxaiai kakain, a tesol seilon ien laha kum soh ti Haeu!

⁷ Salan tetan, ti na amuto he sulusul alia amuto, hoi i kola ka amuto put hawanewen ti usiai saun tenen Haeu pahan. Pamu ewian na amuto kau lungai kawatan ti teka liai talesii amuto, i xoini ti na amuto sul hani teteka laha kum tioi Haeu ti hong paxaiai kakain. Aile ape na tel ti teka kahikahi Krais puluti amuto ti ukei soxihamuto, kum susului i hani teka ien. ⁸ Tuahé kumahe amuto aile ukek ien. Puki alia amuto tatalesi ma pupuluti seilon liai, tataen teka akikimuto ti Krais.

Tupuakaha ailei saun ti Haeu pahan

⁹⁻¹⁰ Ala amuto tioi ka teka laha to ailele saun tenen pate lialun laha kum tuai teka seilon Haeu neneini ape laha kum to kapin lian tehue. Kum hahani tuahé na tel puluti amuto. Teka laha lolotui waliko tenen kumahe Haeu, teka laha to ailele saun ti sikisiki tenen ti pate hienain, teka laha to ailele saun lialun ti wawan hehin, teka wawan laha hani lioi teka wawan liai aile hanowi ka laha hehin, teka wawan laha eng akati aliliake wawan, teka xuxuina, teka halepean, teka seilon ti un taxitaxia, teka laha kak teheni halialu seilon liai ma teka laha waxi lungai soxihamuto seilon liai, hatesol teteka ien laha kum uke tonain kapi Haeu lian tehue. ¹¹ Teka ti amuto, kemuk masin ien. Tuahé Haeu nuhi hauni leilomuto ti

amuto towiahu ti lialui woumuto. Amuto sohot seilon tetan tataen ti amuto hani hatapoa i tupuamuto. Aile ape i namilo i ukek amuto seilon sawisawin. Haeu aile ukek ien nake ti waliko Jises Krais tel Masiwi aile haniwen kako hetekie Holi Spirit ti i hani koko i pupuas leilokako.

¹² Teka ti amuto ukek, “Nga se kahikahi Krais, aile ape nga hean ti ailei tenen tenen na pahak.” Salan, tuahé kumahe lawe waliko na amuto aile hina solian tetan hani amuto. Kalak nga hean ti ailei lawe waliko, nga kum sohot unaui na tenen lehe i kapiti nga. ¹³ Teka ti amuto sokok tap lialun na kaha aile tenen tenen hani tupuakaha. Nga kak ukek nake teka ti amuto sokok, “An tuahé hualiai tupuakaha ape tupuakaha i lawe pahan an.” Salan, tuahé imuh Haeu hatapo hahuonen. Amuto kum kak ukek ka tap tenen na kaha hapuasa tupuakaha ti ailei saun lialun ti sikisiki. Kumahe wanen salan. Haeu tel Masiwi tanomi tupuakaha tetan. I hani ailei waliko ti pahan. I halepelep hawane ti tupuakaha. ¹⁴ Masin ti i hamoiba Jises tel Masiwi ti kuiai pohen, tin i hamoiba hetekie kaha.

¹⁵ Nakon amuto kum tioi ka amuto seilon ti Krais? Masin soxi tini seilon tesol i pakata hetekie hani patun, kako pakata hehetekie hani Krais. Tel seilon ti Krais, kaie i hapuasa tupuan ti ailei saun lialul hani hehin ti aweisal? Tap wanen! ¹⁶ Ala amuto tioi ka tel na i eng akakati tel hehin ti aweisal, ien masin ka lalu ape tupui seilon tel. Na amuto sokok ewi ti na aile tenen ien, kumahe amuto nam wawaxi teik kakain he pepai Haeu ti i ukek, “Hahunatun, ti tupualalu hukuma hetekie, lalu sohot hanowi seilon tel.” (Gen 2:24) ¹⁷ Tuahé na tel i hukuma hani kapi Jises Krais tel Masiwi, pakataian pate xoxoan hani i ma Holi Spirit.

¹⁸ Kum ailele wanen saun lialun ti sikisiki. Tap waliko lialun liai ti amuto aile i halialu tupuamuto hanowi ti tenen saun ien. Tel na i aile saun lialun ti sikisiki, i aile halialu aliliake tupuan. ¹⁹ Nakon amuto kum tioi ka tupuamuto se masin ingi Holi Spirit? Haeu haniwen amuto ape i pupuas leilomuto. Amuto kumahe puki masiwi ti amuto. ²⁰ Lalap wanen kahi lialui woukaha. Haeu hani puki tel Natun mat oxoxiakahia ti kawatan ien. Aile ape hani hatapoas tupuamuto ti haxawai axe Haeu.

¹Ie pahoiai waliko ti amuto tai kamekam. Solian ti na teka kahikahi Krais kum sal ma kum eng akati seilon liai. ²Tuahē nake pate kilan seilon ailele saun lialun ti sikisiki, pamu ewian na tel tel hina axoan. Na tel i sal, i hamalum kapitawa kapi tel axoan.

³Tel wawan hongeni haniwa tel axoan hehin ma tel hehin tin hongeni haniwa tel axoan wawan ti usiai saun ti hahunatu.

⁴Tel hehin hina axoan, kumahe mewenae i masiwi ti tupuan. Tin masin tel wawan hina axoan.

⁵Tel tel kum kakapitini tupuan ti tel axoan halik na ati lalu sowini ti lalu kum eng he akakat ti teik taun kukunun. Na masin ien, pamu i axi aheke taun ti na lalu lotu hani Haeu. Tuahē imuh lalu he hohogenen aliawa lehe Satan kum haputa lalu ti ailei saun lialun ti wawan hehin na lalu kum kongini uke isialalu. ⁶Waliko ti nga kaakane amuto kumahe nga hohone amuto usiwa, nga tua kakane amuto nauna ti puki namilok. ⁷Nga waheni na seilon kum sal, hanowi nga. Tuahe kaha seilon kumahe tenenawé. Teka Haeu hapohea kaha lehe kaha pon na kaha sal a teka i hapohea kaha lehe kaha pon na kaha kum sal.

⁸Teteka laha tai sal ma teteka axoalaha mat saliliwen laha, kakaiak hani laha ukek. Pamu ewian na laha kum salasal hail, hanowi nga. ⁹Tuahe na laha kum kongini uke isiai tupualaha, laha sal hailiwa. Pamu ewian na laha sal, uke laha kum pon mikiniae isian ti laha.

¹⁰Teteka ti hina axoalaha, waliko ti lehe nga hone amuto ie, i ahuma ti puki Jises tel Masiwi. Tel hehin i kum lilioi tel axoan. ¹¹Tuahe na i aile ukek ien, i kum salasal ulea, mewenae na i uke aliake tel hoi liai axoan. Tin masin tel wawan, i kum lilioi tel axoan.

¹²Waliko ti na nga kak ie, nauna ti puki namilok hani amuto teteka kahikahi Krais axoamuto kum soh ti Jises Krais. Na tel ti amuto wawan tel axoan pahan i to hamalum kapin, i kum lilioi. ¹³Tin masin na tel ti amuto hehin tel axoan pahan i to hamalum kapin, tin i kum lilioi. ¹⁴Nga kak ukek ien nake Haeu namiloi tel wawan i tuah, usiwa xoxoi namili tel axoan ti Haeu. Tin masin tel hehin, Haeu namiloi ukek i tuah, usiwa xoxoi namili tel axoan ti Haeu. Na Haeu tai namiloi ukek ien, i kum Paxai amukela natulalu. Tuahe i amuke.

¹⁵Tuahe na tel wawan ma na hehin ti teka laha kum soh ti Krais, pahan i lioi tel axoan, ewi na i sos. Na i sohot ukek

ien, lalu ape kumahe hahunatu. Tetel i soh ti Krais, i ape kumahe hahitake tehu salaialalu, i ape koukean. Tetel kahikahi Krais i kum lungei kokongini tel axoan i kumahe kahikahi Krais nake Haeu pahan totonako kewa solian. ¹⁶Amuto teka kahikahi Krais, amuto kum tioi kaie amuto pon itiniai namili axoamuto lehe lato soh ti Krais.

¹⁷Tuahe amuto tel tel tohongi laliwa ti hamalum kapitawa masin ti Jises tel Masiwi aile hasohotuen amuto ti amuto sohotua kahikahi. Ie se nauna tetak hani hatesol kahikahi Jises Krais. ¹⁸Masin na tel seilon i hoi liai hina teik kikilam ti uli walikoun usiai saun ti teka Ju. I kum xaaxaweni ti ape i sohotua kahikahi Krais. Tin masin na tel i tap teik kikilam ien tataen ti ape i sohotua kahikahi Krais, i kum ukeke hail teik kikilam ien. ¹⁹Tap liai tenen ti tel na i hina teik kikilam ien ma na tap. Waliko tuah mewenae ti usiai nauna ti Haeu.

²⁰Amuto tel tel hamalum kapitawa masin ti uli amuto sohotua kahikahi Krais. ²¹Na amuto unaui seilon ti amuto sohotua kahikahi Krais, kum namiloi hahakila. Tuahe na hina aweisal ti lehe amuto oxoxa, hapuasawa. ²²Amuto tioiwa, kalak na amuto unaui seilon ti amuto sohotua kahikahi Krais tel Masiwi, i oxoxiwen amuto ti hahitake saun lialun. Tin masin na amuto kumahe unaui seilon ti amuto sohotua kahikahi Krais, aope amuto se ape unauan. ²³Lalap wanen kahi lialui woomuto Haeu kahui ti i hani tel Natun mat ti oxoxiamuto. Aile ape amuto kum sosohot unaui waliko lialun ti tehu pon itan ie. ²⁴Teka akikik ti Krais, amuto hamalum kapitawa masin ti uli amuto sohotua kahikahi Krais tuah amuto tiliwen hahitake nenein ti Haeu.

²⁵Ie ape nga kakane amuto sale teka laha tai sal. Nga tap kakain i ahuma ti Haeu tel Masiwi hanialaha. Tuahe ti soliafan i axi nga anesoin tenen i pon amuto soh ti waliko tenen na nga kakane amuto. Aile ape nga hani amuto namilok. ²⁶Usiwa waliko lialun ti i sosohot aope ie, nga namiloi ukek ewi na amuto hamalum hanowi ti aope. ²⁷Na o tel axoam, kum upiup aweisal ti hatapoi salaiamulu. Ape na o tap axoam, kum ngangah axoam. ²⁸Tuahe ti puli Haeu kumahe saun lialun na masin teka laha tai salasal laha sal, ati wawan ma hehin. Tuahe pahak amuto salia ti kawatan tenen i tutunahi teka laha salawen.

²⁹ Teka akikik ti Krais, salangawe kakaiak masin. Taun pate ape kukunun hani tataen ti aliai Jises Krais. Aile ape teka laha hina axoalah, hani hatapoa Haeu tupualaha hanowi ti na laha tai sal. ³⁰ Tap liai tenen na amuto toto ti tatahan, amuam ma na kilan soxihamut, kum hahani tenen na waliko hakongu amuto ti hani hatapoi Haeu tupuamuto. ³¹ Kako tioi ka tetehu pon kaha toto ape ie, tai kue i tapo. Aile ape ti na amuto hapuasa waliko ti tehu pon ie, kum hana hahatapo namilomuto ma kuimuto hani tenen ien.

³² Pahak amuto kum pate nanamiloi waliko ti tehu pon ie. Wawan tenen i tai sal, naminon i hatapo hani ailei puase Haeu tel Masiwi. I haeliel hawane ti ailei waliko tenen Haeu tel Masiwi amuke. ³³ Tuah wawan tenen hina axoan, i nanamiloi waliko ti tehu pon ie. I haeliel ti ailei waliko tenen i hamuamua tel axoan. ³⁴ Aile ape naminon i he hilehil. Hehin teteka ape tap axoalah ma teteka liai laha tai sal, laha hani hatapo namilolah ailei puase Haeu tel Masiwi. Laha haeliel hawane ti hani hatapoi Haeu tel Masiwi tupualaha. Tuah teka hehin hina axoalah, laha nanamiloi waliko ti tehu pon ie. Laha haeliel hawane ti ailei waliko tenen i hamuamua axoalah. ³⁵ Kumahe nga totohongi tiehi amuto. Nga kak ukek ti solian ti amuto. Pahak nga huali amuto namil lehe amuto aile waliko ti Haeu ukek sawisawin ape amuto hani hatapo Haeu tupuamuto lehe tap waliko hatangatanga amuto.

³⁶ Tuah na tel wawan namilowen ka i uke axoan tel hehin i oteotei nake i kum mikini uke isiai tupuan ma tel hehin i masiwi kakasiawa, tiliwen i uke. Kumahe i ailele saun lialun. Ewi lalu sal. ³⁷ Tuah na naminon xoxoan ti i kum sal, tap waliko susulini i ma i kongini uke isiai tupuan, ewi na i kum uke axoan tel hehin ien. ³⁸ Aile ape na i sal, i aile namil sawisawin tuah na i kum sal, i aile namil pamu soliaian.

³⁹ Tel hehin hamalum kapitawa kapi tel axoan ti tel axoan moihin tutuen. Na tel axoan mat, i ape koukean na pahan i sal ulea, tuah mewenae na tel wawan i kahikahi Jises Krais tel Masiwi. ⁴⁰ Tuah teka puki namilok, pamu i tunahi amuam na i kum sal ulea. Nga kak ukek nake nga soh ka nga tin hina Holi Spirit ti Haeu kapitai kakaia.

¹ Ie ape nga kaxi hani amuto sale an ti laha ailewen pali hani waliko tenen kumahe salan Haeu. Kako tioi ka Haeu axiwen kako anesoin ti tesol waliko ien. Tuah namiloi paxaimua tetenen. Na masin seilon ukek i tioi hatapo waliko, namiloalah i aile laha sameni aliakae anesoalah. Nameniwa ka salan tuah wanen na kako kola hawane saun ti wawahen ti huali hasolai seilon. ² Tel na i sokok i tioi hatapo waliko, anesoan pate i tae tutuen. ³ Ape tel na i waheni hawane Haeu, Haeu paxai ukek i seilon tetan wanen.

⁴ Ien, nga nexi haxewa aheke hanimu amuto sale haeu tenen laha aile hahani i pali. Kako tioi ka haeu tenen ien i kumahe moihin a i tin kumahe salan. Pate kako tioi ka telaweh Haeu tenen salan. ⁵ Hina seilon laha sokok kilan haeu ti he maun ma he tehu pon ie. Haeu tenen ien laha lotui ma hana i masiwi. ⁶ Tuah kako teka kahikahi Krais kako soh ti Haeu telaweh, tel Tamakah. Lawe waliko i ahuma tetan. I tetel kako hani hahatapo i tupuakako ma lolotui. Masiwi ti kako tin telaweh, Jises Krais. Nake ti i, Haeu tanomi lawe waliko. Haeu taloma i lehe waxi kako uke tonain solian kapin.

⁷ Tuah kumahe lawe seilon xewan ti tesol waliko ien. Teka ti amuto kahikahi Krais amuto muhinaiwen waliko ti laha aile hani haeu tenen kumahe salan ape na amuto ani an tenen lawe laha ailele pali hani i, namilomuto sului aliakae amuto. Amuto namiloi ka i se an ti laha hahani haeu tenen kumahe salan. Namilomuto i uke huonen, kiae ewi ka lialun na amuto ani? Ape na masin amuto ani, amuto ilameni ukek amuto ailewen tenen saun lialun. ⁸ Tuah kumahe Haeu amuke kako nake ti an tenen kako ani. Na masin kako hahalini kako aniai hina an, Haeu kum ukek kako seilon lialun. Tin masin na kako ani, i kum ukek kako seilon sawisawin.

⁹ Tuah waliko ti Haeu sowini hani amuto kumahe ka lawe taun solian ti ailean. Kanipetiwa uke i haputa teka namilolah kumahe xoxoan ti Haeu. ¹⁰ Aile ape teteka amuto tioi waliko ti amuto ailele, na tel ti laha paxai tunahi amuto angiang leili tehu ingi haeu tenen kumahe salan, i tua hahika i ti aniai waliko tenen laha ailewen pali. ¹¹ Ti aweisal tewau ien amuto teteka hina titioamuto ti tesol waliko ien, amuto haputa halilau namlili tel seilon namilon kumahe xoxoan ti Haeu. Nameniwa ka i tin tel ti Jises Krais mat ti ukei totongan.

¹² Na amuto ani tenen an laha ailewen pali, amuto aile halialu aheke namilon nake i namiloi ukek tenen an ien se hahalin. Na masin ien, amuto ailewen saun lialun hani i, tel akikimuto ti Krais hetekie tataen puki Krais. ¹³ Aile ape na nga tioi ka waliko ti nga ani i haputa tel kahikahi Krais hani saun lialun, nga kum ani ulea he pulan lehe namilon ti Haeu i kum tapo kaluta.

9

Pol tel aposel teheni aliake i ti ailei puase Haeu

¹ Nakon nga lehe kumahe koukean ti ailei waliko ti puki Haeu sowini? Nga se koukean. Nga se tel aposel. Ti puki pulak wanen, nga ningahiwen Jises tel Masiwi ti kako. Amuto sohot kahikahi Krais nake puasain ti i talo nga aile haniamuto. ²Kalak na teka liai kum paxai ukek nga tel aposel, ala amuto paxai tioi nga. Puki nanahiamuto ma pupuasamuto i kola hawane ka nga tel aposel ti Jises Krais.

³ Ie se kakain ti awaiak na seilon kak teheni nga. ⁴Ti hanima amili Banabas, i pon amili kamei amuto huhual ti an ma unum nake amili aposel. ⁵Tesol ukale Jises tel Masiwi ma tesol aposel, kasinan Pita, tesol axoalato kewi to kakahiti lato, seilon to waxeni hehetekie lato. Tin masin amili, i pon na amili uke huhual ien ti amuto. ⁶I pon amili kum puas ti ngahati aliake amili ti amili ailele puase Haeu.

⁷ Lahe seilon ti hile i pupuas hahitake tel masiwi ape puki i ngahati aliliike i? Seilon ti seiniai an laha ani aliake an ti he kinelaha. Tin masin seilon tupui manihuh lehe i uke aliake solian tetan. ⁸Waliko ti nga kakak ie kumahe mewenae namili seilon nake nauna ti Moses tin i hahanau waliko tenen masin. ⁹Tenen ti tesol nauna Haeu hani Moses i ukek, "O kum xioti mimingini awe tok bulmakau ti halinian aniai komem ti o hahapuasa i ailei tenen puasain ti selaiak komem ti he ulin." (*Deut 25:4*) Haeu kumahe i nanamilo mewenae bulmakau ti i hani tenen nauna ien. ¹⁰Se tin hehetekie kako. Teka laha talai hawakiaki hepekeun ti seiniai peteta, laha uke aliake anan. Tim masin teka laha aile puase Haeu i pon hawane ti seilon liai ngahati laha.

¹¹ Amite tesol aposel se masin teka seiniai waki maia ti amite pupuas kaxi haniamuto kakai Haeu. Aile ape i pon hawane ti na amite uke aliake hina huhual ti amuto,

masin teka seiniai waki maia laha uke aliake anan. ¹² Na teka liai laha pon ukei huhual ti amuto, ala pamu i pon amite ukean. Tuahé amite tai kamei amuto ukei kahi puasamite. Kalak amite tunahi kawatan tenen tenen, amite puas tatale lehe amite kum tiehi aweisali teka seilon ti hong sohoi tenen meng solian ti Jises Krais.

¹³ Ala amuto tioi ka teka laha pupuas leili Ingí Haeu laha ang an ti teka seilon kau haniwa ien. Amuto tioi ka teka masiwi ti hukuminiai Haeu ma seilon lato ani hina an ti teka seilon kau haniwa Ingí Haeu lehe teka masiwi ien hana hani he tone waliko ti haniai Haeu. ¹⁴Tin masin Jises tel Masiwi i hone eliel ka teka laha uke solian ti meng teka kahikahin kakaxi, laha auniwa teka kaxian. ¹⁵ Tuahé nga tai kamei amuto ti tenen na huhual. Namilok ti nga tai teik pas ie, kumahe ti ukei tenen na waliko ti amuto. Kalak na nga mat ti hitolo nga kum aile ukek ien. Na masin nga uke kahuk nake ti kaxiai kakai Haeu, tap salangawan ti na nga sameni sale puasak. ¹⁶Ti na nga kaxi meng solian ti Jises Krais, kumahe nga ailele ti puki haxawai axak. Se liai pupuasak ti hahitake axan. Nga ilameni ukek ka pate lialun na nga kum kaxi ahuti meng solian ti Jises Krais.

¹⁷ Na nga kaxila ti puki namilok, kiae ala Haeu kahui hasoliawen nga. Tuahé puki Jises Krais paxai tioi ka nga tapai ailean ape i hani nga tenen puasain tuah ien. ¹⁸Aile ape waliko la kahuk? Solian tetak masin, nga amuam ka nga pon kaxi haniai seilon meng solian ti Jises Krais ti tap tel kahuia. Nake ti tenen ien nga kum kamei tuahé na tel ti auniak kalak nga tel aposel.

¹⁹ Kalak nga koukean kumahe hahitake tel na seilon, nga aile ukek nga unaui lawe seilon lehe nga itini hakila laha hani kahikahi Krais. ²⁰Na nga kapi teka Ju, nga aile hanowi ka nga tel ti laha lehe nga itini waxaini laha. Na nga kapi teka laha hahitake nauna ti Moses, nga aile hanowi ka nga tel tuaulaha lehe nga itini waxaini laha, kalak puki nga, nga koukewen ti hahitake tesol nauna ien. ²¹Na nga kapi teka kumahe Ju, nga aile hanowi ka nga kumahe hahitake nauna ti teka Ju ususi lehe nga waxaini itiniae teka kumahe Ju. Tuahé kumahe nga ukek nga tahi kakai Haeu. Pake nga usi hahawane nauna ti Krais.

²² Na nga kapi teka namilolaha kumahe xoxoan ti Haeu, nga teheni nga ape nga kum aile waliko tenen i hahataxina laha lehe nga pon haxoxoi namilolaha ti Haeu. Aile ape na nga kapi seilon tenen tenen, nga tua aile ususi sale totonalaha. Nga tohongi aweisal tenen tenen ti neinialaha hani Krais tel awaiakaha. ²³ Nga aile ukek ien lehe kilan seilon laha soh palahi teka lato sohoen meng solian ti Jises Krais ape tin nga uke solian ti tenen meng ien.

²⁴ Amuto tioi ka kilan seilon leili lokoloko tuahé lawe telawé seilon i waxaini ape i uke kahi tehu lokoloko. Tin masin nanahi-amuto usiwa namili Haeu lehe waxy amuto uke kahumuto. ²⁵ Lawe seilon ti lokoloko laha hani hatapo tupualaha apesenialaha ti tehu kiliwain lalap kalak i hamolo tin-ula. Laha haeliel hawane ti ukei kahi tehu lokoloko, waliko tetenen ti i kum to kue. Tuahé kako teka kahikahi Krais, kako uke kahukako ti tap tahi lialuan na kako haeliel hawane usiā namili Haeu. ²⁶ Aile ape nga hani hatapo namilok ailei waliko ti Haeu pahan masin tel seilon ti kiliwain lalap, i hani hatapo hawane namilon ti tehu lokoloko ien. Masin tel seilon aneso ti taputuput i haeliel hawane lehe waxy minan kum sel, tin nga haeliel hawane lehe waxy nga kum sel ti usiā aweisali Haeu. ²⁷ Masin tel seilon ti kiliwain i hamolo tinun ti apesenian ti lokoloko, nga hani lioi tupuak hong usiā namilok lehe muhi kaxiai kakai Haeu, i kum ukek ka nga kum tapai ukei kahuk.

10

Kanipetiwa saun lialun ti teka matahaun ailele

¹ Tesol akikik ti Krais, pahak amuto nameni kapitiniwa lokon ti teka matahaun ti koko nahih kakahiti Moses. Haeu uke teik maun ti neiniae aweisalulato. Ape i aile lato pon nahih kotiai tesol kanitax axan Kakan hani liai teapaun. ²Lokon ti lato nahih kokoti kanitax ma nahih usiisi teik maun, Haeu hana lato hatesol hahitake Moses tel masiwi ti lato. ³Lato hatesol ani an tene-nawé ti Haeu haputama he maun. ⁴Lato hatesol un kan tesoloe ti Haeu hasohotu he tehu pot. Tehu pot ien i kikilamai Krais ka i hoi lawe kapi lato. ⁵Tuahe kilan ti lato Haeu kum amuke nake lato tahi kakaian ape i hani lioi lato mat silahota he lohong.

⁶ Tesol waliko ien i sohot ti hanauakah lehe waxy namilokaha kum is eliel ailei waliko lialun ti lato ailele. ⁷Aile ape kako kum lolotui waliko tenen kumahe salan Haeu hanowi ti teka ti lato ailele. Nameniwa waliko ti Moses taiwen, i ukek, "Teka seilon un ma ang amuam liliau ti sameniai tok bulmakau lato tanomi ani gol." (Exod 32:6)

⁸ Kako saliniwa ailei saun lialun ti wawan hehin, saun tetenen teka ti lato ailele ape 23,000 ti lato mat leili ngain tehue.

⁹ Kako kum hahele halengelenge Haeu tel Masiwi hanowi teka ti lato ailele ape weiko tenen lialun telei lato. ¹⁰Tin kako kum kak mumum pahoiai teka neiniakako hanowi teka ti lato ailele ape tel engel lawe Haeu hapuasa ti halilui waliko, i telei lato. ¹¹Tesol waliko ien ti i sohot hani teka matahaun ti kako, i hanau hawane kaha seilon. Ape Moses tai kongini lehe kako kanipeti nanahiakako nake tapoi tehu pon ie ape i xohiwen.

¹² Na amuto namiloi ukek xoxoi tutuhamuto i tapai hawanewen, lepetawa uke tin amuto put ti ailei saun lialun.

¹³ Nameniwa, totohong ti lawe i tutunahi amuto, kumahe liai tenen ti teka liai tutunahi. Na masin totohong tunahi amuto, hana hatapoa namilomuto haniwa Haeu nake i kakawen i huali amuto. I hongeni hani mewenae totohong tenen kako pon waxainian. Na totohong lehe i xoini amuto, Haeu kola hani amuto aweisal ti waxainian lehe amuto kum aile tenen na waliko lialun ape amuto tu xox tatale.

Kako kum lolotui waliko tenen kumahe Haeu

¹⁴ Tesol soliae akikik ti Krais, salini kaptiniwa lotuiae waliko tenen kumahe salan Haeu. ¹⁵ Amuto seilon tenen namiloi. Namiloi paxai aluiniwa teik kakaiak ie na sawisawin. ¹⁶ Leili tehu angiaiñ ti nameniai Jises Krais tel Masiwi, kako teka kahikahin kako kak kemulik hani Haeu waen ti i kilami kake Krais ape kako unumi. Muhiñ kako wiki sei teik bret i kilami tupuan ape kako ani. Ti kako sei waen ma bret, i kola ka kako pakata hehetekie hani Jises Krais tel i mat ukei kahi lialui woukako. ¹⁷Ti kako hatesol ani sei bret teikawe, i kola xoxoi pakataiakako hahitake Krais. Kalak kako kilan, kako sohot hanowi seilon tel.

¹⁸ Namiloi paxaiwa teka Israel. Laha kau maniuh hani Ingi Haeu lehe laha telei. Laha hani Haeu ape laha ani aliaké. I kola ka laha pakata hehetekie kapi Haeu

ma puki alia laha. ¹⁹ Nga kakane amuto tesol waliko ien nake pahak amuto xeu alua sale ailei pali hani waliko tenen kumahe Haeu. Tap pupuase tenen pali ien ti laha aile nake tetel laha hahani i kumahe salan Haeu. ²⁰ Kumahe laha hahani Haeu, laha tua aile hahani spirit lialun ti laha lolotui. Kumahe wanen pahak amuto tuai laha lotuai spirit lialun. ²¹ Amuto pakata hetekiewen kapi Jises Krais tel Masiwi. Amuto apuha hehetekie unumiai waen ti i kilami kakaun. Aile ape amuto kum tutuai teka laha ununumi waen leili tehu angiaian ti amukei spirit lialun. Lawe amuto hukuma ti tehu angiaian ti nameniai Jises Krais. Aile ape amuto kum sohosoh ti tehu angiaian ti laha ailele amukei spirit lialun. ²² Na kako aile ukek ien, kako hahele halenge Haeu tel Masiwi. Nameniwa i pamu kuiaian ti kako.

Kako haxawawa axe Haeu ti lawe waliko kako aile

²³ Teka laha ukek, “Kako koukean ti ailei lawe waliko.” Tuahen nga ukek kumahe lawe waliko solian ti na seilon aile. Kako koukean ti ailei tenen tenen tuahen kumahe lawe waliko ti kaha aile i pon hualiakah. ²⁴ Kako kum namiloi aliliak mewenae solian ti totonakao. Kako haelielwa aile hasolai seilon liai.

²⁵ Amuto pon aniai lawe an ti laha hangaini. Kum namiloi maamata anian uke na i talesni tenen. Kum kamekam sale tesol an ien na laha ailewen pali ma na kumahe. ²⁶ Leili pepai Haeu i ukek, “Hatehu pon ie ma hatesol waliko heihon tatamai Haeu tel Masiwi.” (Ps 24:1)

²⁷ Na tel ti teka kumahe kahikahi Krais ilowi amuto hani tehu angiaian, nahiwa na pahamuto. Ape tua aniai waliko tenen laha hani amuto. Kum kamekam sale an i ahuma tetesol lehe amuto tioi na amuto ang ma na kumahe. ²⁸ Tuahen na tel ti hahongi amuto ka tenen an ti lehe amuto ani laha ailewen pali, amuto kum aniani, uke i haputa namili tel seilon ien. Kum aniani, uke i namiloi ukek ka lialun na seilon ani tenen an ien. ²⁹ Kumahe nga ukek lialun ti na amuto ani. Tuahen amuto kum aniani nake ti solian ti teka laha sokok lialun na ani. Kako tioi ka Haeu kum halini kako aniai tenen an ien. Aile ape na teka liai ukek ka lialun na kako ani, kumahe salan. ³⁰ Na masin kako kak kemulik haniwen Haeu ti an ti lehe kako ani, kumahe salan na seilon liai kak halialu kako ti waliko ti kako kakawen kemulik.

³¹ Aile ape na amuto ang ma na un, ma ti lawe waliko amuto aile, ailewa ti sameni haxawai axe Haeu. ³² Kanipetiwa sale nanahiamuto lehe amuto kum tiehi teka Ju, teka kumahe Ju ma na teka kahikahi Krais ti pakatai kapin. ³³ Puki nga, nga haeliel hawawane hasolai lawe seilon ti aweisal tenen tenen. Nga aile ukek ien nake kumahe nga nanamiloi mewenae solian tetak tuahe solian ti lawe seilon lehe nga pon haxoxoi namilolaha ti Krais ape i awai laha ti kawatan ti lialui woulaha.

11

¹ Amuto usiwa nanahiak masin ti nga usiusi nanahiai Krais.

Nauna ti Pol sale lotu ti wawan hehin leili Ingi Haeu

² Nga sameni hawane amuto nake lawe waliko ti amuto ailele, amuto nameni kokongini kakaiak ma amuto tu xox tatale ti usiai nauna ti nga haniwen amuto.

³ Pahak amuto paxai tioiwa tetenen ie. Krais i pamu masiwi ti lawe wawan, i patul ti laha. Hehin i hahitake tel axoan wawan. A Krais i hahitake Haeu tel Taman. ⁴ Tel wawan na i lolotu ma na i kakaxi tenen meng ti Haeu hanamiloa i, a patun atuhan, i kola tapoi lon hani tel pamu patul tetan.

⁵ Tin masin tel hehin na i lolotu ma na i kakaxi tenen meng ti Haeu hanamiloa i, a patun kumahe atuhan, i kola tapoi lon hani tel pamu patul tetan. Tenen ien waliko ti hienain masin tel hehin na patun hatehu uluhan. ⁶ Na tel hehin i watakai atuhiai patun ti leili ingi lotu, pamu ewian na i koti xaxaweni hail ukun. Kaha tioi ka i hienake na ukun pate kukunun ma na patun uluhan. Aile ape ala i atuhiai patun na i lolotu ma na i kakaxi menge Haeu.

⁷ Teka wawan laha kum atutuhi patulaha leili ingi lotu. Haeu tanomi laha lehe laha kola aliak ka saun ti laha pahowi hawane hani saun tetan ma pahan laha ailewa waliko ti i haxawa axan. Tuahen teka hehin laha atuhiai patulaha. Laha ailewa waliko ti i haxawa axe axoalaha. ⁸ Kako tioi ka kumahe Haeu tanomi wawan nonoma ti hehin, i tanomi nonoma hehin ti wawan.

⁹ Ti uli Haeu tanomiwa tel wawan kumahe hualiai hehin, i tanomi hehin ti hualiai tel wawan. ¹⁰ Aile ape hehin atuhiai patun ti leili ingi lotu lehe i kola ka pon i kakak ti hahitake axe Haeu. Saun tenen ien teka engel amuke.

¹¹ Ti kako hahitake Jises Krais tel Masiwi, hehin tupuan kumahe puki tetan, tin masin haniwa wawan. Na tap huhual wasolalalu, kumahe i usiusi namili Haeu. ¹² Kalak Haeu tanomina hehin ahuma ti wawan, wawan lawe i takah nonoma ti hehin. Tuahé ati lalu ahuma ti Haeu nake i tel tanomiai lawe waliko.

¹³ Puki amuto namiloi paxaiwa na masin ewi hehin lotu hani Haeu ti patun kumahe atuhan. ¹⁴ I kum alune wanen na wawan hawelu ukun nake i hahiena aliake i.

¹⁵ Tuahé uk weluwelun solian ti hehin atuhiai patun ma hasoliai paxaian. ¹⁶ Na teka laha kum amuke tesol waliko ien, nameniwa ka tap tel ti amite tesol apostel kaxi ulea hani amuto kakain liai tenen ti waliko ti nga hahanau amuto ie. Teka kahikahi Krais ti tesol tesol tin laha tua hanau usiusi hanauan ti amite.

Nauna ti Pol sale tehu angain ti nameniai Jises tel Masiwi

¹⁷ Pahak nga nau ulea amuto sale apuhami amuto. Kumahe nga amuam ti amuto nake na amuto hukuma hetekie ti lotu, woumuto ti amuto ailele tap solian tetan, i halialu aheke amuto. ¹⁸ Nga honemu amuto tete-nen ie. Nga hongoen ka na amuto apuha ti lotu, lawe amuto tan wasol. Ti aweisal hina, nga soh ka salan. ¹⁹ Saun tenen ien kumahe haun. Ti teka seilon selaiia nake ti hapatapat wasolalaha, lawe i kola teteka tutuhalaha pamu xoxoan ti Haeu.

²⁰ Na amuto apuha hetekie ti tehu angain ti nameniai Jises tel Masiwi, sale woumuto kumahe salan. Waliko ti amuto ailele kumahe i usiusi ti Jises kola haniwen kako. ²¹ Nake na amuto ang hetekie, amuto kum atengi teka liai, amuto kum tani waxy laha. Aile ape teka laha hitol. Teka ti amuto tin laha un taxitaxia. ²² Amuto aile hanowi ka tap puki ingamuto na amuto ang ma un. Woumuto kola ka tap lomuto hani seilon ti Haeu. Tenen saun amuto ailele ien, teka tonalaha lialun laha ilameni ka laha pate itan. Na amuto, ka lehe nga kakane amuto la? Lehe nga sameni amuto? Tap wanen.

²³ Ala amuto tioiwen sale tehu angain ien. Jises tel Masiwi hanauen nga ape nga kului haniwen amuto. Ipong tetehu ti Judas hangaini Jises tel Masiwi, leili tehu apuhain kapi tesol kahikahin Jises waxy teik bret. ²⁴ Ti i kak kemulik haniwa Haeu, i wiki ape i ukek, "Teik bret ie i kilami tupuak nga hani lioi ti solian ti amuto. Aniwa ti nameniamak."

²⁵ Ti lato ang kewa i aile waliko tin tetenen. I waxi tehu kap waen ape i ukek, "Ie se kakauk ti kolakol ka Haeu xinotiwen tenen namil haun kapi seilon tetan. Na amuto apuha ti tenen angain ie, unua waen ti nameniai waliko nga aile haniwen amuto."

²⁶ Salangawe kakaian masin. Lawe na kako apuha ti nameniai Jises tel Masiwi ape kako ang bret ma un waen, ien masin ka kako kakaxi tehu matean ti hualiakako. Kako aile tatale atengi taen ti i aliamma.

²⁷ Aile ape tel na i ani bret ma unumi waen ti nameniai Jises tel Masiwi a woun kumahe wanen sawisawin, i ailewen saun lialun ti puli Haeu nake i teheni halialalu tupui Jises ma kakaun. ²⁸ Kako tel ti paxai aliakemu woukako imat ti koko ani bret ma unumi waen ti i kilami tupuan ma kakaun. ²⁹ Na koko ani bret ma unumi waen ti nameniai Jises tel Masiwi tuahe woukako kola ka koko kum paxai tioi ka koko pakata hehetekie hani Krais hanowi ka koko tupuan, Haeu axi koko kawatan. ³⁰ Nake ti tenen ien, kilan ti amuto laha tinu, laha aleal ape teka laha tapo.

³¹ Na koko paxai mataini aliakemu lialul woukako, Haeu kum axi koko kawatan. ³² Tuahé na Haeu axi koko kawatan, i ailele ti hasawiakako lehe kako kum uke kawatan ti tap tahoapao ti na i axi teka laha tale tehitolahana i.

³³ Tesol akikik ti Krais, na amuto hukuma hetekie ti tehu angain ti nameniai Jises tel Masiwi, pahak amuto atengimua hatesol seilon apuhamu lehe ati amuto ang. ³⁴ Tel na pate i hitol kasia, ala i ang aliamua puki leili ingan lehe Haeu kum kola hani i lengenan na i kum tani waxy teka liai ti tehu angain ien.

Nga po nau aheke amuto na nga tahiaw haniwa kapimuto.

12

Holi Spirit hapohea koko ailei waliko tenen tenen

¹ Tesol akikik ti Krais, ie ape nga kaxi hani amuto sale ti Holi Spirit hapohea koko ti ailei waliko tenen tenen. Pahak amuto xeu hawanewa. ² Amuto nameni lokon ti amuto kum tioi tutuen Haeu. Kilan waliko tenen lialun i neini hakalala amuto hani lotuiai waliko tenen kumahe salan Haeu, waliko tenen i kum pon kaxi hani amuto kakai Haeu. ³ Aile ape nga kakane hawane amuto, mewenae teka ti Holi Spirit kakapiti, laha ukek Jises i Masiwi. Tap tel ti laha po kak sai halialu i.

⁴ Kako pon ailei waliko tenen tenen ti pohe Holi Spirit tuahe Holi Spirit telawé i hani kako poh ti ailean. ⁵ Kako aile puasain tenen tenen tuahe hatesol kako aile hahani telawé Masiwi Jises Krais. ⁶ Haeu pupuas lelokako ti aweisal tenen tenen, tuahe Haeu telawé ailele tesol puasain ien ma i hahapuasa kako ailei puasan.

⁷ Waliko ti Holi Spirit hahapohea kako ailean, i aile lehe kako hatesol uke solian tetan. ⁸ Teka ti kako kakak hetekie namil xewan ti Holi Spirit hani kako. Teka ti kako kakak hetekie anesoin ti Holi Spirit, i tin tetel i hani kako. ⁹ Teka ti kako, Holi Spirit aile haxoxo hawane namilokako ti Haeu ape teka liai ti kako, Holi Spirit tin tetel i hani poh ti haewiai seilon. ¹⁰ Teka, Holi Spirit hani kako poh ti ailei kolakol tenen lalap. Teka, i hanamiloa kako kuluiai kakai Haeu. Teka, i hani kako anesoin ti paxai kolongenai puasain ti seilon ailele na i ahuma ti Haeu ma na kumahe. Teka, Holi Spirit hanamiloa kako ape kako kakak kakai xux liai ti kako tai hanau ape teka i axi kako anesoin ti haxewai kakain ien. ¹¹ Hatesol waliko ien Holi Spirit telawé i hahapohea kako ti ailean. I aile usiusi puki namilon ti i hani poh tenen ti na pahan i hani tel tel ti kako.

Kalak kako kilan, kako pakata hehetekie hani Krais hanowi ka tupui seilon tel

¹² Kako teka kahikahi Krais kako pakata hehetekie hani kapin hanowi ka tupui seilon tel. Masin soxi tini seilon, kalak i kilan, i pakata hehetekie hani tupuan. ¹³ Baptais ti kako uke, Holi Spirit telawé hukumimi hetekiewen kako hahitake axe Krais, kalak kako Ju ma na kumahe Ju, kako unaui seilon ma tin kumahe unaui seilon. Ape Holi Spirit telawé pupuas lelokako hatesol ti hakuakako masin kan ti seilon un lehe i moih kapita.

¹⁴ Tupuakaha seilon kumahe lape teikawe. Kilan soxi tinun laha puas hehetekie. ¹⁵ Na masin ae tel seilon wix uke ape i ukek, "Nga kumahe min, aile ape nga kumahe teik ti tupuan," i hamalum kakapita teik ti soxi tinun. Kakaian kum tose selai uke i. ¹⁶ Ape na masin taxingan i ukek, "Nga kumahe pul, aile ape nga kumahe teik ti soxi tinun," i hamalum kakapita teik ti soxi tinun. Kakaian kum selai uke i. ¹⁷ Na masin tupui seilon hatel i mewenae pul, i hong ukek ia waliko? Ape na i mewenae taxing, i asoi ukek ia waliko?

¹⁸ Tuahe tupui seilon kumahe masin ien. Haeu aile tesol soxi tini seilon lato puas he

paho hetekie. Teik teik ti lato i hana usiusi namilon. ¹⁹ Na masin tupui seilon soxi tinun teikawe, i kumahe wanen ka tupui seilon. ²⁰ Salan tetan, kilan soxi tini seilon tuahe laha pakata hehetekie hani tupui tehue. ²¹ Aile ape pul kum kaakane min ukek, "O tap pupuasam tetak." Tin masin pati seilon i kum kaakane aen ukek, "O tap pupuasam tetak."

²² Ien kumahe wanen salan. Tetesol soxi tinun na kaha namiloi ukek i kumahe pate tuah, na masin i tap, kumahe lawe waliko kaha pon ailean. ²³ Tetesol soxi tinun paxai kumahe pate solian, kaha auni hale-pelep. Tetesol soxi tinun ti kumahe ewi na seilon paxai, kaha uke hawane anि ponen. ²⁴ Tesol soxi tinun liai, tetesol ewi na seilon paxai, kaha kum auni halepelep hanowi ien. Nameniwa, puki Haeu hana tanomi soxi tini seilon ukek ien. Aile ape tetesol ti kaha paxai ukek kumahe pate tuah, i tin hina wanen pupuasan. ²⁵ Haeu aile ukek ien lehe hatesol soxi tinukaha lato puas he paho alua. Tin masin kako teka kahikahi Krais, pahan kako puas hukuma hetekiewa, kako kum he wawatak. Kako he aunau-nawa. ²⁶ Wasolakako teka kahikahi Krais masin soxi tini seilon puas hetekie ti seilon tel. Na teik soxi tinukaha lamani moloan, tupuakaha hatel tin i ilameni. Na kaha auni aluin teik ti soxi tinukaha, tupuakaha hatel i uke solian tetan.

²⁷ Kako hatesol pakata hehetekie hani Krais hanowi ka tupui seilon tel. Kako tel ti Krais masin soxi tini seilon pakata hehetekie hani tupuan. Tel tel ti kako hina pupuasan ti Haeu. ²⁸ Leili teka kahikahi Krais, Haeu kilamiwen puasakako tel tel. Imat teka aposel, ape teka kuluiai kakai Haeu, teka hanau seilon, teka ailei kolakol lalap hahitake axan, teka haewiai seilon, teka hualiai seilon, teka masiwi ti nahikei ingi lotu ape teka laha kakak kakain liai tenen ti laha tai hanau. ²⁹ Nakon lehe kako hatesol aposel? Nakon lehe kako hatesol kuluiai kakai Haeu ma hanau seilon? Tin kumahe kako hatesol hina poh ti ailei kolakol lalap hahitake axe Haeu. ³⁰ Nakon lehe kako hatesol haewiai uke seilon? Kaie kako hatesol tapai kak kakain ti kako tai hanau ma ti nexi haxewiaian? ³¹ Tap wanen. Na masin ien, kako hana hatapoa namilokako kewak ka kako pon ailei waliko tenen pamu i huali seilon liai.

Aile ape aope ie nga kaxi hani amuto aweisal tenen solian tapein ti ailean.

13

Wawahen se pamu tuah ti lawe waliko

¹Na masin tel seilon pon kak tapai kakai xux texux texux ma kakai engel a tap wawahen leili aten, kakaina masin waliko tenen i aile hakila hameng, masin tangiai belo ti laha tua xaxai. ²Na masin tel i pon kuluiai kakain ti Haeu ma tioi hawane lawe waliko ti Haeu tai hatakei ma hina hatesol anesoin ma tin hina namil xoxoan ti naxi sohiai maunten, a tap wawahen leili aten, tap wanen pupuasan. ³Na masin tel i hani hatapo hatesol soxian hani teka laha tap soxi ma kalak i hani tupuan lehe laha lui telei hani Haeu, a tap wawahen leili aten, tap tenen solian i po uke.

⁴Tetel seilon i hina xuhai wawahen leili aten, kalak na i tunahi kawatan, i tu xox tatiale. I kum leng kosea ma lawe i aile hasolia hani seilon liai. I tap namil lialun ti na seilon liai xoini i ti tenen na waliko. Tap i hanasanmas ma sameni aliake i. ⁵Na tel seilon hina wawahen, i hina lon ti seilon liai. I kum halepelep, i kongini uke lon na laha aile waliko tenen lialun hani i. I kum hapeti he namilon saun lialun ti laha aile haniwen i. ⁶Tel na i hina wawahen leili aten, i kum amuke saun lialun, i amuke saun tenen i usi hahawane nauna ti Haeu. ⁷I kum aka lioi saun ti wawahen, kalak na teka seilon aile halialu i. Soliae wawahen tetan i haxoxo aheke namilon ti Haeu ma seilon. Monomon tetan ti atengiai waliko tenen solian i kum tapo. Ti na i tunahi kawatan tenen tenen, i tu xox kapita waheniai seilon liai.

⁸Saun ti wawahen se tuah lian tehue. Soiliaian tap tahi tilian. Kalak kako to kulkului kakai Haeu, ngain telao kako monga. Kalak kako pon kak kakai xux texux texux ti kako tai hanau, imuh kako kum aile ulei. Kalak na kako tioi kilan waliko tenen tenen, taun i luluainima ti lalape pupuase anesoakako i tapo. ⁹Kako kum tioi hatapo lawe waliko ma Haeu kum hatakei hatapo hani kako kakain ti na kak kului. ¹⁰Tuahen taen ti Jises Krais aliamma, lawe waliko i sohot soli hatap hawane. Ape lawe waliko ti kumahe solian tapein i tapo.

¹¹Lokon ti kako akaik tutuen, kakaiakako, namilokako ma nam nexiai waliko ti kako, tutuen ti teka akaik. Tuahen ti ape kako masiwiwa, kako hana lioi hatapoen woi akaik. ¹²Aope ie, ti kako tutuen he tehu pon ie, kako kumahe xewan wanen ti lawe waliko. Masin ti na tel i paxai waliko he tehu

kalas penapenan. Tuahen imuh, kako xeu alua hawane masin ti na tel i paxai hawane waliko ani pulan. Aope ie titioakako teik kokol. Tuahen taun ti i luluainima imuh ape kako tioi hatapo lawe waliko masin ti Haeu tioi hatapo kako, hatesol namil ma pupuasakako.

¹³Waliko tuah ti i hahamalam se totolunen. Haeu pahan kako waheni tatalewa i ma seilon, kewa namilokako xoxoan tetan hetekie tin kako mon atengiwa waliko solian ti i kakawen i aile. Tuahen totolunen ien wawahen se pamu tuah.

14

Sale kuluiai kakai Haeu ma kakak kakai xux liai ti lotuiai Haeu

¹Aile ape amuto haelielawa ka amuto hina wawahen leili atemuto. Tuahen tin amuto kewa namilomuto xoxoan ukei pohe Holi Spirit ti ailei waliko tenen tenen. Pamu tuah amuto kameiwa i ti hapoheamuto kuluiai kakai Haeu. ²Nga kak ukek nake tel na i kakak kakai xux liai ti Holi Spirit hanamiloa i, tel seilon ien i kakak hani Haeu kumahe hani seilon. Tap seilon hong tioi kakaian. Ti pohe Holi Spirit i kakaxi waliko tenen ti teka liai kum tioi. ³Tuahen tel na i kulkului kakai Haeu, i kakak hani seilon liai ti hakuialaha, ti haxoxoi namilolaha ti Haeu ma hewiai namilolaha lehe i pau. ⁴Tel i kakak kakai xux liai ti lotuiai Haeu, i huali aliliake i. Tuahen tel i kulkului kakai Haeu, i huali hatesol kahikahi Krais.

⁵Pahak amuto hatesol pon amuto kakak kakai xux liai ti lotuiai Haeu tuahen pahak wanen amuto kak kului kakai Haeu. Pamu solian ti lawe seilon na tel i kului kakai Haeu hani laha. I xoini na tel i kakak kakai xux liai halik na tel nexi haxewa kakaian lehe i pon hualiae teka kahikahi Krais.

⁶Tesol akikik ti Krais, na masin nga luan hani kapimuto ape kakane amuto kakai xux liai ti amuto kum tioi, a nga kum towiahu haxewa kakaiak, waliko la solian tetan? I huali amuto mewenae ti na nga kakane amuto waliko ti Haeu hatakei hani nga, ti na nga kaxi haxewa hani amuto sale Haeu, ti na nga kak kului kakaian ma hanau amuto saun ma nauna tetan. ⁷Ti haxewai kakaiak, nga kak kolongeni waliko tenen kumahe moihin masin kita. Na tel i kum xai haxewa aluini, kako kum tioi kinaxe pak. ⁸Tin masin na tel i kum kuini aluini suhusuh, seilon kum xeu salangawe tangian. ⁹Tin masin amuto. Na kakaiamuto kumahe xewan,

seilon liai kum tioi tenen amuto kakak. Kakaiamuto tuahe masin aupol.

¹⁰ Kilan kakai xux liai ti tehu pon ie ma hatesol i pon hanaui teteka laha tioi kakain ien. ¹¹ Tuahne na tel i kakak kakain ti kako kum tioi, i masin akiki xux liai ma kako kum he titioa. ¹² Na pahamuto wanen ukei solian ti Holi Spirit, haeliel hawanewa lehe amuto pon hualiai hatesol kahikahi Krais.

¹³ Nake ti tenen ien, tel i pon kakak kakai xux liai, i lotu kameiwa Haeu anesoin ti nexi hexewaii kakaian. ¹⁴ Na tel i lotu ti kakai xux liai, i lotu hawane leili aten tuahe kumahe i hahapuasa namilola nake puki Holi Spirit hahanamiloa i kakain.

¹⁵ Ape lehe kako lotu ukek ia? Ewi na kako lotu ma pak ti kakai xux liai ti mewenae leili atekako, tuahe tin kako pak ma lotu hetekiewa namilokako. ¹⁶ Na masin tel ti amuto lotui Haeu ti kakai xux liai a hina teka seilon ien laha kum xeu, laha kum kak akati amuto ti kemulik hani Haeu nake laha kum tioi waliko ti i kakak. ¹⁷ Kalak lotu tetan i haxawa uke Haeu, i kum hakui uke teka laha kum xeu.

¹⁸ Kemulik haniwa Haeu ka nga pon kakak kakai xux liai ti lotuian. Ailean tetak i xoini amuto hatesol. ¹⁹ Tuahne ti leili lotu, pamu nga waheni kakanei seilon kakain palai tenen xewan ti naualahi, i xoini ti na nga kakak kakain kilan ti kakai xux liai ti laha kum tioi.

²⁰ Tesol akikik ti Krais, kum aile hahanowi namili akaik, namilomuto kewa namili masiwi. Tuahne ti sale saun lialun, amuto hanowiwaka akaik tenen i susus tutuen.

²¹ Leili pepai Haeu i ukek,
“Nake ti teka seilon tetak tahi kakaiak,
nga hapuasa teka ti xux liai ti hasaw-

ialato,

laha kakak kakai xux texux texux.

Nga hapuasa laha ti hahongoi teka seilon
tetak
tuahne tin pate lato kum hong usi kakaiak.

Ie kakaiak Haeu tel Masiwi.” (Isa 28:11-12)

²² Ti kako kakak kakai xux liai ti Holi Spirit hanamiloa kako, i kola hatakei pohe Haeu hani teka seilon laha kum soh tetan. A kuluiai kakai i hani teka kahikahi Krais, kumahe i hani teka laha kum soh tetan.

²³ Na masin ti leili lotu amuto hatesol kakak kakai xux liai ti amuto tai hanau, ape teka laha kum soh ti Haeu sohoma ma na seilon laha kum tioi hawane saun tenen ien, laha ukek sohin amuto taxitaxiawen. ²⁴ Tuahne na

masin teka seilon ien sohoma leili lotu taen ti amuto kukului kakai Haeu, laha hong xeu hawane kakain ien. Ape laha paxai tioi ka laha seilon ti ailei saun lialun ma hetekie Haeu hani laha kawatan na laha kum lioi lialui woulaha. ²⁵ Laha paxai tioi ka Haeu tioi hawane hatesol namilola ma pupuasalaha ti seilon liai kum tioi. Ti tenen ien, laha lokuhu lotui Haeu ape laha ukek, “Salan wanen, Haeu wasolamuto.”

Sale kiliwakei lotu ti teka kahikahi Krais

²⁶ Tesol akikik ti Krais, nga kaxi hanau amuto waliko ti na amuto aile ti leili lotu. Teka ti amuto uke hina pak ti pakui hani Haeu, teka uke hina nauna ti hanaui seilon. Teka liai uke hina waliko ti Haeu kola hatakei haniwen laha ti kaxi haniae seilon. Teka liai ulea uke hina meng ti kakai xux liai. Tenen meng ien kewa tel i nexi hexewa hani amuto. Hatesol waliko ien amuto ailewa ti haxoxoi teka kahikahi Krais. ²⁷ Ewi na hua ma na tolu ti amuto kakak kakai xux liai ti Holi Spirit hanamiloa lato. Tuahne kewa tel kakamu imat. Ape tel liai ti amuto kewa nexi hexewaii kakaian. ²⁸ Na tap tel nexi hexewaiian, tel seilon ti i kakak kakai xux liai, i kum kak elilie ti lawe seilon hong. Kewa ka kakaian mewenae ti lalu Haeu.

²⁹ Hua ma na tolu ti amuto kak kuluiai kakai Haeu ape teka liai hong paxai matainiwa kakaialato. ³⁰ Na masin leilon ti tel i tu kakaxi kakain ti Haeu, ape Haeu hani ulea tel liai tenen meng, tel i tu kakak mongawa. ³¹ Ewi na amuto hatesol kaxi kului kakai Haeu tuahe axiya taun ti tel tel lehe i hanau hatesol kahikahi Krais ma haxoxo namilolato. ³² Teka kuluiai kakai Haeu laha konginiwa kakaialaha atengiwa taun ti laha kakai. ³³ Haeu i watakai na kako teka kahikahi Krais kako seilon tenen ti aile nakaputinia waliko. Haeu pahan kiliwakei lawe waliko ti kako mewenae sawisawin ma wasolakoko kewa solian.

³⁴ Masin ti i sosohot ti ingi lotu tehu tehu wasole teka kahikahi Krais, teka hehin laha kum hahasiwixa kamekame ti leili lotu. Laha minginiwa awalaha. Nauna ti Moses tin i hanau ukek ien. ³⁵ Na laha hina kamekame, laha po kameiwa axoalaha ti ingalaha nake hahien na laha hatalia kiliwakei lotu.

³⁶ Na masin amuto kum amuke waliko ti nga kakaxi ie, nameniwa ka kakai Haeu kumahe i ahuma ti amuto. Tin kumahe mewenae amuto hongoen kakaian. ³⁷ Na

salan amuto teka kuluiai kakai Haeu ma seilon tenen pon ailei waliko tenen tenen ti pohe Holi Spirit, ala amuto paxai tioi ka waliko ti nga kakak ie se nauna ti Jises Krais tel Masiwi.³⁸ Na tel i kum nam waxi kakaiak, Haeu kum paxai tioi i.

³⁹ Tesol akikik ti Krais, pahak namilomuto kewa xoxoan ti kuluiai kakai Haeu ma tin kum hahalini tel na i kak kakai xuxliai ti lotuiai Haeu.⁴⁰ Tuah lewe waliko ti amuto aile, paxai kewak ka amuto aile aluini hahawane ma kiliwakean mewenae sawisawin.

15

Pol hahanamena sale xahatai Jises Krais ti matean

¹ Tesol akikik ti Krais, nga hanamena aliliaki amuto meng solian ti Jises ti nga kaxi haniwen amuto. Amuto hong waxiwen ma tutuhamuto xox hawanewen.² Na namilomuto xox tatale ti tenen meng ien, Jises Krais awai amuto ti kawatan ti lialui woumuto. Na tap, tenen meng ien i kum huali wanen amuto.

³ Ala amuto nanameni, nga hakouta haniwen amuto waliko ti nga hongoen ti Jises tel Masiwi. Pate tuah tapein ti lawe waliko se tetenen. Jises Krais mat ti ukei kawatan ti lialui woukaha masin ti pepai Haeu kakaxi.⁴ Laha tihini i ape Haeu xahateni aliaki i muhi ngain tolulu masin ti pepai Haeu kakawen ka i sohot.⁵ Muhin Jises Krais take hanimu tel aposel Pita ape imuh i take hani huopanim tel aposel.⁶ Muhin ien lepe tehue i take hani teka kahikahin liai kilailato saai 500 hani patul. Teka ti lato laha tapoen tuah pamu kilaian teka moihin tutuen.⁷ Imuh i take hani Jeims ape muhin kapi hatesol aposel liai.⁸ Tapeinan wanen tin i take hani nga ape nga sohot aposel tetan. Tuah tap tel amemene ka i kilami nga aposel.⁹ Ti paxaian tetak nga tel pamu itan ti lawe aposel. I kum tapai wanen laha axai nga aposel nake kemuk naga aile halialu hawane teka kahikahi Krais, teteke seilon ti Haeu.

¹⁰ Tuah ti lalape soliai Haeu i aile ape nga sohot tel seilon masin ti amuto tioi nga aope. Soliaian i kau hawane anan. Nga puas eliel hahawane xoini hatesol aposel liai. Tuah kumahe nga ailele ti puki kuik. Ti soliai Haeu i puas hahakui nga.¹¹ Nameniwa, meng tenen nga kakaxi ma ti tesol aposel

liai kakaxi se tenenawé. Ape meng tenen solian ien amuto hong sohoen.

Salan wanen Haeu hamoiba aliake seilon

¹² Amite tesol aposel kaxi haniwen amuto ka Haeu xahateni Jises Krais ti matean. Aile ape nakon lahan teka ti amuto ukek ka seilon kum moih alia?¹³ Na salan seilon kum moih alia, kaie ala Krais tin i tai moih alia.¹⁴ Na masin Haeu tai xahateni Krais ti matean, tap pupuase meng ti amite kakaxi ma tin tap pupuase xoxoi namilomuto ti Jises Krais.¹⁵ Na masin ien, amite puputawen sale Haeu nake amite kaxi hahani amuto ka Haeu xahateni Krais ti matean. Tuah na salan ka seilon kum moih alia, Haeu tai xahateni aliaki i.¹⁶ Haeu xahateni aliaki ukek ia Jises Krais, na i kum pon seilon moih alia?¹⁷ Na masin Krais tai moih alia, tap wanen solian amuto uke ti xoxoi namilomuto tetan ape imuh amuto uke kawatan ti lialui woumuto.¹⁸ Na masin ien, hatesol kahikahi Krais laha matewen, laha toto tetesol ti kaui kawatan ti tap tahi tapoan.¹⁹ Na kako hana namilokako hani Krais mewenae ti hasolai totonakako ti he tehu pon ie, hatahan wanen kako.

²⁰ Tuah salan wanen, Krais moih aliawen. Ien i kola hawane ka teka ti kako mat, tin kako xahat alia.²¹ Namiloi paxaiwa. Seilon telawe Adam i aile ape matemate sohot. Tin masin seilon telawe Krais i aile ape seilon moih alia.²² Kaha hatesol mat nake kaha nakuama ti Adam tetel i tahi kakai Haeu. Tin masin kaha hatesol moih alia nake ti Krais.²³ Kaha tel tel moih alia taun ti Haeu kilamiwen. Haeu xahateniwen imat Krais. Ape taun ti aliaian, teteke laha soh tetan laha moih alia.

²⁴ Tataen ien Krais xaxaweni hatapo lawe spirit lialun ma lawe masiwi laha pahoxai Haeu. Muhin ien tehu pon ie i tapo. Ape Jises Krais hana hatapo lawe waliko hahitake nenein ti Haeu tel Taman.²⁵ Krais hoi liai i neneini seilon atengi tataen Haeu xoini hatapoa hatesol teka laha pahoxai i ape hana laha hahitake Jises Krais.

²⁶ Tapeini waliko lialun ti i xaxaweni hatapo se matemate.²⁷ Leili pepai Haeu i ukek ka i hana lawe waliko hahitake nenein ti Jises Krais. Tuah Haeu kumahe hahitakan nake puki i hani Krais poh ti neiniai lawe waliko.²⁸ Ti Jises Krais sohotua masiwi ti lawe waliko, i teheni aliaki i hani hahitake tel Taman tetel i hana lawe waliko hahitakan lehe Haeu neini hatapo lawe waliko.

²⁹ Namiloi aluiniwa tetenen. Na seilon kum moih alia, nake lahan teka seilon uke

baptais ulea ukei totone teka laha mat imat ti ukei baptais? Solian tetan la na masin seilon kum moih alia?

³⁰Puki amite tesol aposel, amite kum nam waxi kawatan ti i tutunahi amite hetekie kalak na amite mat. Amite tai aile ukek ien na masin amite kum soh ka Haeu hamooha aliake amite. ³¹Tesol akikik ti Krais, uke tuahen na telao seilon telei nga ti tenen puasain nga ailele. Ien se pate salan masin salan wanen ka nga amuke amuto nake amuto pakata xox kapi Krais tel Masiwi ti koko. ³²Teka seilon ti Epesus lawe laha pahoxai nga hanowi manihuh tenen tumun kalimen. Nga tu xox kakapita pahoialaha kumahe nake pahak nga uke kahuk ti he tehu pon ie. Na masin Haeu kum hamooha aliake nga, tap solian tetan ti na nga tua hani lioi laha telei nga ti ailei puase Haeu. Na masin seilon kum moih alia, i pon na koko aile mewenae waliko ti hamuamua-iakako. Masin ti hina seilon laha ukek, “Kako tua ang ma un taxitaxia

nake letu uke kako mat!” (Isa 22:13)

³³Kum hahani laha puluti halialu amuto. Kako tioi na koko puas hukuma hani kapi teka seilon wel i ailei saun lialun, laha halialu soliae woukako. ³⁴Amuto alia hanima namil solian lehe amuto kum aile ulea saun lialun. Nga kak teik waliko ie nake teka ti amuto laha kum tioi hawane Haeu. Ala laha hienawa nake laha se kahikahi Krais.

Ti tone Haeu tupuakako tap tahi lialuan

³⁵Uke na teka ti amuto kamea, “Haeu hamooha seilon ukek ia? Tanome tupualaha masin ia?” ³⁶Kakapax ti amuto i kola ka tap wanen namilomuto. Namiloi paxai haniwa na amuto seini tehu waki pata. I kum xex halik i matemu. ³⁷Waliko ti amuto tihini hani leili hepekeun kumahe pata ti amuto sohuti. Amuto seseini tuahen wakuen masin waki komem ma na waki maia. ³⁸Haeu tetel i aile tesol wakuen ien xex hani pata usiwa ti pahan. I namiloi tanome lawe pata tenen tenen. ³⁹Tin masin tupui lawe waliko moihin i kumahe tenenawé. Tanome tupui seilon, manihuh, manixux ma xixi, laha tenen tenen.

⁴⁰Tupui waliko ti he maun liai tenen ti tupui waliko ti tehu pon ie. Soliaialaha tin kumahe tenenawé. ⁴¹Soliai xewai alon liai tenen ti soliae xewai pangapang ma na kohot. Kalak puki kohot, soliae kamaialaha kumahe tenenawé.

⁴²Tin masin tupuakaha seilon ti he tehu pon ie, i liai tenen ti tupuakaha muhin ti Haeu hamooha aliakewa kaha. Kaha seilon, i aneso kaha mat ape tupuakaha i koha. Tuahen tupuakoko teka kahikahi Krais ti kako moih aliawa, i tap tahi lialuan. ⁴³Tupuakaha ti he tehu pon ie kumahe pate solian wanen, hina kawatan lawe i tunahi tupuakaha. Tuahen ti Haeu hamooha aliakewa kako, i sohot soli hatap hawane. Lawe tinukaha i uke he lialum ma i hatapo kükaha. Tuahen ti kako moih aliawa, tupuakoko i kui hawane. ⁴⁴Aope ie tupuakaha masin ti Haeu namiloiven tuahen ti tehu pon ie. Tuahen ti hamooha aliakewa kako, kako uke tupuakoko haun wanen tenen ti tap tahi lialuan. Huonen tupuakoko, tenen ti kako hina he tehu pon ie ma tenen ti kako hina taen ti kako to kapi Haeu leili tonan.

⁴⁵Leili pepai Haeu i ukek ka lokon Haeu tanomi Adam imat ti lawe seilon, i axi Adam hanawain ape i moih hanowi kaha hatesol. Jises Krais tin i sohot seilon hanowi kaha, tuahen i tetel haniai hanawain ti tap tahi tapoan. ⁴⁶Tuahen kumahe kako kemu hanawain tenen tap tahi tapoan. Imat, kako kemu tupuakoko ti Haeu namiloiven tuahen ti tehu pon ie ape imuh kako uke tupuakoko tenen haun wanen, taen ti kako to kapi Haeu leili tonan. ⁴⁷Tel seilon imat wanen Adam, Haeu tanomi i ani pekeun ti tehu pon ie. Tuahen Jises Krais tetel i sohotuma imuh, i ahuma ti tone Haeu. ⁴⁸Kaha teka seilon ti tehu pon ie tupuakaha masin ti Adam. Tuahen ti tone Haeu, kako uke tupuakoko haun wanen masin ti Jises Krais tetel i ahuma ti tone Haeu. ⁴⁹Aope ie kako masin Adam tel seilon ti tehu pon ie. Tuahen imuh kako sohot hanowi Jises Krais tel seilon ti tone Haeu.

⁵⁰Tesol akikik ti Krais, nga kakane hawane amuto kako kum pon wanen tonaiat tone Haeu, tetel i neneini lawe waliko, na tupuakoko ti tehu pon ie i hamalum. Tupuakoko ien i lialu ma koha, tuahen ti tone Haeu tap tenen waliko i po lialu.

⁵¹Hongoa! Ape nga kaxi hani amuto waliko ti Haeu tai hatakei. Hina ti teka kahikahi Jises Krais laha tai tapo, laha moihi tutuen ti Jises Krais aliama. Tuahen tataen ien hatesol kahikahin laha sohia. ⁵²I sohot hahutua hanowi xepai usil taen ti kako hong tenen kuiniae suhusuh tapeinan ti Haeu. Tataen ien teka kahikahi Krais kaha moih alia ape Haeu sohi tupuakaha hani tenen haun wanen ti tap tahi lialuan.

⁵³ Tupuakaha tenen i lialu i sohia hani teten ti tap tahi lialuan usiwa namili Haeu, len masin ti na tel seilon i naxi xaxaweni soson wasan ape i hana tenen haun.

⁵⁴ Ti waliko ien sohot, i hapoponowi hawane kakain leili pepai Haeu ti tel kuluiak kakaian taiwen. I ukek,
“Haeu xaxaweni hatapo matemate.” (Isa 25:8)

⁵⁵ Na masin ien, i pon hawane kako soh kakain leili pepai Haeu ti i ukek,
“Tap wanen ape matemate po xoini kako.

Tap wanen ape i po halialu kako.” (Hos 13:14)

⁵⁶ Matemate i sohot nake ti saun lialun ti kaha seilon. A kaha tioi kaha ailewen saun lialun nake nauna ti Haeu kola hani kaha.

⁵⁷ Tuahé lawe kako kak kemulik hahani Haeu tetel i huali kako waxainiai lawe waliko lialun nake ti pupuase Jises Krais tel Masiwi ti kako ma ti xoxoi namilokako tetan.

⁵⁸ Tesol soliai akikik ti Krais, tu xox hawane. Kum hahani tenen na waliko kapiti hakalala amuto. Lawe hani hatapoa tupuamuto ailei puase Haeu tel Masiwi. Ala amuto tioi ka puasain lalap ti amuto ailele ti axe Haeu tel Masiwi i kum tua xoina.

16

Huhual ti teka Korin hani teka Judia

¹Ie ape nga kakak sale moni ti lehe amuto apuhini hualiai teka kahikahi Krais ti texux xux Judia. Amuto aile usiwa waliko ti nga honewen teka kahikahi Krais ti texux xux Galasia. ²Lawe Sande, tel tel ti amuto hana talaheniwa teik moni lapan ti pon amuto hani leili tehu puasain ien. Ape hana auniwa lehe na nga lua haniwa kapimuto, tap amuto tauxxuux ti apuhinian. ³Kilami ngahoa teka seilon ti amuto tioi laha tapai otoheniai moni ti amuto apuhinian hani Jerusalem. Ape na nga tahiawa nga ti pas ti haxewai nanahiai tesol seilon ien ti nga talo. ⁴Na puasak tin i onoteni kane Jerusalem, lato kahiti nga.

Tiliasi kakai Pol

⁵Nga nanamiloi na nga lua hanimu texux xux Masedonia. Pake kumahe nga to kue ien. Ape muhin nga lua paxaiamuto. ⁶Sohin uke nga tomu teik kapimuto, nga kum tioi aluini. Uke na nga hatamusumu taun ti waiwain ien lehe amuto haponoak waliko tenen na nga tae ti tehu nanahiai ti hani tuahé tesol na nga lua. ⁷Na masin Jises tel Masiwi sowini hani nga, pahak nga taliamu

teik kapimuto luaiak tetehu. Kumahe pahak nga tua sota. ⁸Tuahé nga hamalumumu ie leili Epesus atengi tehu ngain lalap ti Pentekos tapoa. ⁹Kalak kilan seilon ie pahoxai nga, Haeu hei hawanewen aweisaluk ti kaxiai meng solian tetan hani teka seilon. I aile ka pupuasak kau hawane anan, aile ape nga namiloi nga tilimuen ie.

¹⁰Ti na Timoti lua haniwa kapimuto, aile aluin i haniwa i nake tin i ailele puase Jises tel Masiwi hanowi nga. ¹¹Kolongeniwa ka tap tel ti amuto paxai teheni i. Huali hawanewa i ti tehu nanahian lehe i aliamma hetekie amuam he tian. Nga to atetengi i ma tesol kahikahi Krais liai kahitan.

¹²Nga to kakane hahakui Apolos ti lua paxaiamuto hetekie teka kahikahi Krais liai. Tuahé i tai namiloi na i lua hani kapimuto aope ie. Na i pon, i luawa.

¹³Lepetawa uke waliko neini hakalala amuto. Haxoxo hawanewa namilomuto ti Jises Krais. Lawe amuto kewa he angiamat ma kuin. ¹⁴Kolawa saun ti wawahen ti lawe waliko amuto aile.

¹⁵Amuto tioi ka ti hatexux xux Akaia, Stepanas hetekie hatesol seilon leili ingan lato tetesol lato hong sohomu ti Jises Krais. Ape lato hani hatapo tupualato hualiai teka seilon ti Haeu. ¹⁶Tesol akikik ti Krais, nga kakane hawane amuto kolawa lomuto hani lato ma hong usiwa kakaiatalo hetekie teteka seilon tin laha puas eliel ailei puase Haeu. ¹⁷Nga amuke sohotui Stepanas, Portunatus ma Akaikus ti paxaiak. Lato huali nga waliko tenen amuto kum pon nake amuto tap ie. ¹⁸Nga soh amuto amuam hawane ti amuto hong ka lato hakui alialek nga. Seilon tenen ien, amuto paxai tioiwa ka laha seilon tuah.

Tiliasi teik pas ie Pol hakau amuam

¹⁹Amuam ti teka kahikahi Krais ti texux xux Asia haniwa amuto. Akila ma tel axoan hehin Prisila hetekie teka kahikahi Krais laha huhukuma leili ingalalu ti ailei lotu, tin lato hakau amuam lalap haniwa amuto ti hahitake axe Krais. ²⁰Hatesol akikimuto ti Krais ie tin lato hakau amuam haniwa amuto. Na amuto apuha hetekie, pohi amukewa tel tel ti amuto ti kolai wawahen nake amuto se kahikahi Krais.

²¹Puki minak wanen nga Pol tai amuam tetak haniwa amuto.

²²Tel na i tap wawahen hani Jises Krais tel Masiwi, lialuin lalap tunahia i ti lengei

Haeu. Jises tel Masiwi, kum kukueini alia-
iam.

²³ Nga kamei Jises tel Masiwi ti kolai
lalape soliaian hani amuto.

²⁴ Wawahen tetak haniwa amuto hatesol
ti axe Jises Krais.

2 Korin

Teik pasi Pol liai hani teka kahikahi Jises Krais ti Korin Kakain ti haxewai teik pepa ie

Sai 26 ahang muhin ti Jises moih aliawa ape Haeu waxy i hani tesol tonan, Pol tel aposel tai teik pas ie hani teka kahikahi Jises Krais ti Korin. Lokon ien i toto texux xux Masedonia. Korin se tehu taon tuah leili Akaia, tetexux xux teka Grik totonai. Teik pas ti Pol tai hanimu teka Korin, kakaiian pate ahian hani lato. Imuh i talo Taitus hani kapi lato ti hakuialato. Ti Taitus alia haniwa kapin i kaxi aliake hani i sale nanahialato. Hina ti teka Korin laha towiahuen ti lalui woulaha tuah teka liai lato tahi Pol ma watakai i masiwi ti lato. Leili teik pas ie, hinalo waliko tenen tuah. Pol amuke hawane teteka laha towiahuen. I hanamena lato waliko salan leili meng solian ti Jises Krais. I hone lato apuhini hatapoi moni ti hualiae teka kahikahi Krais laha tap soxi. Ape i kaxi haxewa hani lato ka i salan wanen tel aposel ti Jises Krais.

¹Nga Pol tetel puki Haeu kilami aposel ti Jises Krais, nga tai teik pas ie hani amuto teka kahikahi Krais ti Korin hetekie hatesol seilon ti Haeu leili hatexux xux Akaia. Amuamti amili Timoti tel akikikako ti Krais haniwa amuto hatesol.

²Nga lotu kamei Haeu tel Tamakako ma Jises Krais tel Masiwi ti haniamuto lalape soliaialalu ma hatona hasolai tiamuto.

Haeu lawe i hakui seilon tetan

³Kako sameniwa Haeu tel Tame Jises Krais tel Masiwi ti kako. I tetel lawe i tahane ma hakui kako ti na kawatan tunahi kako nake i waheni hawane kako masin tel taman tenen pate solian. ⁴Haeu lawe i hakui kako xoiniai kawatan tenen tenen lehi waxy kako tapai hakuiai teka liai na kawatan tunahi laha. Masin ti kako kema huuhal ti Haeu, tin kako pon hualiae seilon leili taun lialun. ⁵Masin ti Jises Krais kau hakilawen kawatan, kako teka kahikahin tin kako kau hakila kawatan, tuah Haeu hakui kapitini kako hanowi ti i huali halapawen Jises Krais. ⁶Ti amite tesol aposel lamani hawane kawatan nake ti ailei puase Haeu, amite kau lulungei ti hakuiamuto lehe amuto sohot soli ahe tatale seilon

ti Haeu wanen. Ti amuto paxai tioi ka Haeu huali amite kau i kawatan ien, i hanau amuto ti tu xoxo tatale kau i kawatan tenen amite kakau ape tin amuto uke huuhal ti Haeu. ⁷Aile ape namilomite pate xoxoan sale xoxoi tutuhamuto ti Krais nake amite tioi ka ti amuto kau i kawatan tenen amite kakau, puki Haeu hahakui amuto hanowi ti i aile hahani amite.

⁸Tesol akikik ti Krais, pahak amuto tioiwa kawatan lalap ti i tunahi amite leili texux xux Asia. Kawatan tenen pate lialun i akulai kuimite ti kauan. Pate i he pexipex kasia ape amite sokok ka i xoiniwen amite. ⁹Salan tetan amite sokok uke amite mat nake i hakawata hawane tiamite. Tenen ien i sohot lehe amite kum hana namilomite hani puki kuimite, tuah hani Haeu, tetel i xahateni aliake seilon maten. ¹⁰Haeu awaiwen amite ti kawatan tenen ti mate-mate ape amite soh hawane ka lawe i awai kapitini amite. ¹¹Tuah tin pahak amuto lotu hualima amite. Na Haeu hongeni lotu ti amuto ape ti lalape soliaian i to awawai amite, kilan seilon laha kak kemulik hani i.

Pol sohi namilon ti sale luaiān

¹²Nga kak matut hetekie amuam ka nanahiamite usiusi namili Haeu ma lawe amite aile aluini hani teka seilon, kasinan hani amuto. Kumahe ka amite pon ailean nake amite usiusi anesoin tuah te seilon. Ti xoxoi namilomite hani Haeu, i to huuhal amite ti lalape soliaian. ¹³Nga kak ukel nake lawe pasuk nga tai hamalimu hani amuto lehe amuto xeu hawane. ¹⁴Aope ie amuto kum tioi aluini nga. Tuah pahak wanen telao amuto tioi hawane nga lehe na Jises Krais tel Masiwi aliamama, amuto amuke nga hanowi ti nga amuke amuto.

¹⁵Aile ape ti xoxoi namilok ti amuto, kemuk nga namiloiweng ka nga lua uke he huohu hani kapimuto lehe pamu amuto uke halapa huuhal. ¹⁶Tin nga namiloiweng paxaiamuto ti aweisaluk hani Masedonia ma ti aweisaluk na nga aliliama ape lehe amuto hualii nga ti luaiak hani Judia.

¹⁷Uke amuto namiloi hakila ti nga sohi namilok. Nakon amuto sokok nga tai namiloi mataini? Ti nga aile tenen na namil, kumahe nga aile hanowi ti teka laha kum soh ti Haeu. Nga kumahe masin seilon tenen i kak ukel i aile waliko tuah i kum aile. ¹⁸Masin ti lawe Haeu aile usi waliko ti i namiloiweng, namilok tin i kum tua sohia lalolal. ¹⁹Tin masin Jises Krais tel Nati Haeu,

tel ti Sailas, Timoti ma nga Pol to kaxi hahani amuto, i kumahe seilon tenen autas, lawe i puas usi hawane kakaian.²⁰ Nake ti pupuase Jises Krais, lawe waliko ti Haeu kakawen i aile, i sohot poponowi. Aile ape kako teka kahikahin kak kewak salan wanen pupuase Jises Krais. Ti tenen ien se kako sasameni Haeu.²¹ Puki i huhualati kako ti tu xox kakapita ti Jises Krais. I kilami kako ti ailei puasain tuah.²² Haeu oteiwen kako seilon tetan, I hani Holi Spirit neiniakupo. Pupuase Holi Spirit leilokako i kola ka waliko ti Haeu kakawen i aile hani kako, i sohot poponowi.

²³ Salangawan ti nga tai lua hani kapimuto nake kumahe pahak nga tumei amuto. Puki Haeu tioi ka salan.²⁴ Kumahe ka amite tesol aposel akekeni namilomuto ti Haeu. Amite puas tuai amuto lehe amuto hina amuamu ma namilomuto ti Jises Krais i xoxatale.

2

¹ Aile ape nga namiloi ka nga kum lua hani kapimuto aope ie uke nga hakawata ulea namilomuto ti tumetume tetak.² Na nga aile hatahanea amuto, tap tel ulea hamuamuaik.³ Nake tenen ien, nga tai haniwen amuto sale hasawai nanahiamuto lehe na nga luawa, tap tel ti amuto hakawata namilok. Amuto ala teteka ti hamuamuaik. Namilok xooaan ka amuto hatesol aile usiusi kakaiak leili teik pasuk ien ape lehe ati kako he amuam.⁴ Ti nga tai teik pas ti tumeiamuto, tiak i kawat hawane hetekie leili atek i tangitang hawane. Kumahe nga tai ti hakawatai namilomuto tuahae ti kolai lalape wawahen tetak hani amuto.

Pol pahan teka Korin oxoxiwa tel seilon ti kawatan ti lialui woun i aile haniwen lato

⁵ Ie ape kakaiak sale tel seilon i aile tenen saun lialun wasolamuto. I hakawata nga, a pamu kasinan amuto. Tuahae kumahe pahak nga kak eliel ahe tenen waliko ien.⁶ Kahi lialui woun i tapaiwen masin ti kewi ti amuto kolongeniwen.⁷ Ie ape taun ti amuto oxoxi i ti kawatan ti lialui woun i aile haniwen amuto. Ape amuto hakuiwa i lehe tatahan lalap kum pexi kasini i.⁸ Nga kakane eliel amuto, kolawa ka amuto waheni tutuen tel seilon ien.

⁹ Nga tai teik pas ien ti tohongi paxaiamuto sale tamaniai kakaiak. Pahak nga tioi na masin amuto puas usi hahatapo waliko ti nga honewen amuto ailean.¹⁰ Na amuto

oxoxi tel seilon ien ti kawatan ti saun lialun i aile haniwen amuto, tin nga oxoxi i. Ape na hina waliko lialun ti na tel aile hani nga, nga oxoxi i hahitake axe Jises Krais. Nga aile ukek ti hualiamuto lehe amuto hasolias kapitini wasolamuto kapi seilon.¹¹ Pahak amuto hong usiwa kakaiak sale tel seilon ien lehe Satan kum pon neini hakalalaia-muto. Pake kako tioi sale nonosenan.

Puase teka kahikahi Krais ti kaxiai mengon

¹² Ti nga lua haniwa tehu taon Troas kax-iai meng solian ti Jises Krais, nga tunahi ka hoi liai Haeu apeseniwen aweisal ti tenen puasain ien.¹³ Tuahae namilok kila hawane ti Taitus tel akikik ti Krais i tai tahia hani kapik ti hahongoak sale nanahiamuto. Aile ape nga kak tapeini teka Troas ape nga lua hani texux xux Masedonia.

¹⁴ Kemulik haniwa Haeu, tel lawe i neini huali kako ti xoiniai hatesol kawatan ma lawe waliko lialun nake kako pakata xoxox kapi Jises Krais. Haeu hapuasa kako ti sawateniai meng tenen ti i kakkak sale Jises Krais. Ti kako aile tenen puasain ien, se masin ka poi tenen waliko pate solian i tah hani tesol tesol.¹⁵ Sale nanahiakako masin ka poi waliko tenen pate solian ti Jises Krais to hahani Haeu. Teteka laha hong soh ti kako kaxi sasawateni meng solian ti Jises Krais, i awai laha ti kaui kawatan ti lialui woulaha a teteka laha kum soh, laha selai a tautamus ti Haeu.¹⁶ Ti teteka laha tale tehitolaha hani Haeu, tenen meng ien masin ka waliko tenen kohan poune pate lialun nake laha watakai hongoan. Ti teteka laha hong auni tenen meng ien, i masin ka poi waliko tenen pate solian nake laha hong soh ka laha to kapi Haeu lian tehue. A aita tapai hawane ti ailei tenen puasain ien?

¹⁷ Se mewenae teteka laha kaxi ahuti kakai Haeu ti leili atelaha wanen hanowi amite tesol aposel ti Krais. Amite tioi ka puki Haeu kilami amite ailei tenen puasain ien ma lawe i papaxai nanahiamite. Amite kumahe masin teka woinakon kaxi ahutiai kakai Haeu. Laha tua ailele ti ukei moni.

3

¹ Kumahe nga kak ukek ie ti sameni ali-akeamite. Amite kum kamei tuahae na tel taiai pas tenen ti kaxiai soliai puasamite hanowi ti teka liai ailele. Amite kum ha-hapuasa pas tenen ien ti amite lua hani kapimuto ape tin masin na amite lua salili amuto hani tesol liai ti ailei puasamite, amite kum kamei amuto pas tenen ien.

² Puki amuto aile kola soliai puasamite. Amuto se tai konginian he atemite. Ape lawe seilon paxai tioi soliai nanahiamuto. ³ Hanowi ka puki Jises Krais tai tenen pas ti kaxiai soliai nanahiamuto kolai ani puasamite. Kumahe ka seilon tioi sale nanahiamuto ani pas. Laha paxai tioi ka Holi Spirit ti Haeu tetel poh tapein, i pupuas leilomuto. Tin masin kumahe laha tioi ahuma he pot tenen taian, tetenen ti Haeu hahani Moses. Laha paxai tioi ka amuto towiahu hani Haeu ti leili atemuto wanen.

⁴ Amite kak matuke ukek nake ti xoxoi namilomite ti Haeu. Amite se unaun wanen nake ti Jises Krais. ⁵ Kumahe ti puki kuimite amite pon ailei puase Haeu. Kumahe amite ukek ka waliko ti amite ailele se puki hahasohotuamite. Haeu tel hahakui amite ti ailei puasan. ⁶ Haeu huali amite ti nahikei puasan usiwa tenen namil haun ti i xinoti kapi teka seilon tetan. Tenen meng ti amite kakaxi kumahe sale usi hatapoi lawe nauna ti Moses hahitake tenen namil ti Haeu xinotimu kapi teka seilon tetan Ju. Tenen meng ti amite kakaxi se sale ti Haeu hani kako Holi Spirit ti kapitiakako. Ti imat, na seilon kum aile usi nauna ti Haeu, i selai xaxaweni laha kapin. Ti hahitake tenen namil haun ti i xinoti, Holi Spirit neneini ma huhuali seilon ti ukei tonain kapi Haeu ti tap tahi tapoan.

Soliai namil haun ti Haeu xinoti kapi seilon tetan

⁷ Moses naunu teka seilon ka na laha kum usi hatapo nauna ti Haeu, laha seliai ti Haeu lian tehue. Haeu tai nauna tetan he pot tenen mamarahanan. Ti Haeu hani Moses tesol nauna ien, kawe Moses i kam kola hawane lalape xewai Haeu ape teka Ju kum paxai kapitini uke kawe Moses. Tuahne lalape xewai kawan i to tapo ahua. ⁸ Kalak usiai nauna ti Moses kum huali uke seilon ukei tonain kapin ti tap tahi tapoan, i kolawen lalape xewaian ma pohen ti i hani tesol nauna ien. Na masin ien, pamu i kola aheke lalape xewaian ma pohen ti Holi Spirit pupuas feilokako, tetel i neneini ma huhuali kako ukei tonain tenen ien. ⁹ Ti seilon hongoa meng ti Moses kakaxi, laha paxai tioi ka laha seilon ti ailei saun lialun ma imuh Haeu axi laha kawatan. Tenen meng ien se tuah wanen tuahne meng ti kako teka kahikahi Krais kakaxi se pamu tuah. I hanau seilon ka wasolakaha kapi Haeu i sawi na namilokaha xooan ti Jises Krais. ¹⁰ Aope ie waliko ti Moses hahanau ape kumahe tuah na kako kolongeni hani

meng solian ti Jises Krais nake tenen meng ien se tuah tapein. ¹¹ Tenen namil ti Haeu xinotimu imat kapi teka seilon tetan Ju se tuah wanen, tuahne i kum hamalum lian tehue. Pamu soliaian tenen namil haun ti Haeu xinoti kapi kako teka kahikahi Krais nake tap tahi puas mongaian.

¹² Nake ti soliai tenen namil haun ien, amite puas matuke hahawane. ¹³ Amite kum atuhi muneni kawamite ti amite hahanau seilon. Amite kum aile hanowi ti Moses ti i atuhi muneni kawan lehe teka Ju kum ningahi ka xewai kawan i to tapo ahua. I kola ka soliai tenen namil ti Haeu xinotimu kapi teka Ju, tin i to tapo ahua. ¹⁴ Tuahne namil teka Ju uke he takalah nake lato seilon tenen hatongetong. Hanima taen tetelao, na lato ridai pepai Moses, tin lato kum xeu ka soliai tenen namil ti Haeu xinotiwien kapi lato i tapoan. Lato masin ka tenen waliko titiehi namilolato. Mewenae na lato hana hatapo namilolato hani Jises Krais, namilolato xeu tautamus. Ien masin ka teik waliko i titiehi namilolato i xaxau. ¹⁵ Salan wanen, hanima taen tetelao, na lato ridai pepai Moses, namilolato tin i tai xeu ukuke, masin ka waliko hahatiloko namilolato. ¹⁶ I xaxawena mewenae na lato towiahu xoxoi namilolato hani Jises Krais tel Masiwi. ¹⁷ Ape Holi Spirit ti Haeu se Masiwi i pupuas leilokako, tetel i oxoxi kako ti usi hatapoi tesol nauna ti Moses. ¹⁸ Hanowi ka Haeu xaxaweniwen waliko ti i hatiloko namilokako ape kako paxai tioi lalape soliai Jises Krais tel Masiwi. Ti pohe Holi Spirit, kako sohia ahe tatale ti sohot hanowi Jises Krais. Ape ti sohiaiakako, seilon liai paxai tioi ka Jises Krais se tetel tuah tapein.

4

Puase tesol aposel i hakui teka kahikahi Krais liai

¹ Ti puki ewiae Haeu i hani amite ailei tenen puasain tuah ti hanau seilon meng solian ti Jises Krais. Aile ape amite kum nohoha wanen. ² Amite watakai wanen ailei waliko tenen i hahiena aliakte amite na i sohot kouke. Amite kum puluti halialu seilon ma kum kaxi nakaputini kakai Haeu. Amite soh Haeu paxai tioi ka lawe amite kak hahawane waliko tenen salan. Ape i pon seilon liai paxai tioi ma soh amite.

³ Na hina seilon meng solian ti Jises Krais masin ka munenian ti laha, ien se teteka laha watakai hong waxian ma laha to xau

ahe tatalewa ti Haeu.⁴ Satan, tetel i neneini kilan seilon ti tehu pon ie, i aile hapulaxa laha ape laha kum soh ti Jises Krais. Aile ape laha kum paxai tioi meng solian ti Jises Krais ti i hahaxewa lalape xewaian, pohen ma soliaian. Laha kum tua xeu wanen ka Jises Krais se puki masin alia Haeu.

⁵ Namiloi paxaiwa, kumahe amite lua kaxi aliliak amite. Amite hanahanau seilon ka Jises Krais se tel Masiwi. Nake ti Jises Krais, amite se unauamuto ti kolai aweisal hani Haeu. ⁶ Ti Haeu tanomi tehu pon ie, i tua kak ka xewan haxewawa tilokoan ape i sohot. I tetel i aile ape meng solian ti Jises haxewa hawane namilokako teka kahikahin. I aile ukek lehe kako xeu ka xewa Haeu ma lalape soliaian hetekie pohen kako paxai nonoma ti Jises Krais.

⁷ Meng solian tetan se waliko tenen pate tuah a amite teka kaxian masin waliko tenen wakiakin, na i put i manan. Lehe ti tenen ien seilon paxai tioi ka pupuasamite kumahe ti puki kuimite, amite ailele ti pohe Haeu. ⁸ Kawatan tenen tenen to pipisihini amite tuah i kum xoini amite. Na amite soh tunahi taun ti amite kum tua tioi tenen na amite aile, namilomite i kum put. ⁹ Teka seilon aile halialu amite tuahe Haeu kum paxai lioi amite. Mangemange tunahi amite tuahe i kum halialu tautamusuke amite. ¹⁰ Amite tatauke he namilomite ka uke ngain tehu laha telei amite ti ailei puase Haeu hanowi ti laha telei Jises. Tuah amite kum nohoha lehe ti pupuasamite seilon paxai tioi Jises Krais tel pate pohen.

¹¹ Salan wanen, amite moxe matein nake amite unaui Jises, tuahe kalak amite tioi ka ngain tehu amite mat, ti pupuasamite i kokola ka Jises pupuas tutuen leilomite. ¹² Aile ape, kalak lawe amite tunahi kapitini kawatan, ti moxe mateamite amuto uke tonain ti tap tahi taopoan kapi Haeu.

¹³ Amite tesol apostol lawe amite kaxi matuke tatale kakai Haeu nake ti xoxoi namilomite tetan, hanowi ti tel i kakawen leili pepai Haeu i ukek, "Namilok xooaan ti Haeu, aile ape nga kaxi ahuhuti kakaian." *(Ps 116:10)* ¹⁴ Pake amite tioi ka Haeu hamoiba amite hanowi ti i hamoiba Jises tel Masiwi ape i hatona hukumini ati kako hani kapin.

¹⁵ Hatesol waliko ien se ti solian ti amuto. Ti lalape soliai Haeu i to itini hahakila seilon hani hahitake Jises Krais ape kilan seilon kak kemulik lalap wanen hani Haeu. Saun tenen ien i haxawa hawane axan.

¹⁶ Aile ape tap wanen amite po aile lioi. Kalak kui tupuamite tapo ahuahua, tuahe leilomite, Haeu to hakui kakapitini. ¹⁷ Tesol kawatan aope i tutunahi amite, i kum hamalum haweluweu. I waliko kokol na seilon kolongeni hani lalape soliai Haeu ti i hani kako lian tehue. ¹⁸ Aile ape kumahe amite namiloi wawaxi waliko ti pon amite ningahi, amite hana namilomite hani waliko ti amite kum pon ningahian. Ngain tehu, waliko ti i tutunahi amite he tehu pon ie i tapo, tuahe waliko ti i aununa tone Haeu se ti kako lian tehue.

5

Kakain sale tupui seilon haun ti hahaniai Haeu

¹ Kako tioi ka tupuakako kum to lian tehue, i masin ing ti sosoxope. Kalak na laha telei kako ti tehu pon ie, Haeu luhungini auni kako hani tonan leili ing ti tap tahi lialuan, ing tetenen ti kumahe mini seilon atai. ² Imat ti i sohot, kako ahahatake moloan ma ahahanake pusoi tinukako he tehu pon ie. Kako nam hasaxohu hahawane ukei tupuakako haun ti hahaniai Haeu. ³ Kumahe ka ape tap tupuakako. Tupuakako haun ti Haeu hani kako i hamalum lian tehue. ⁴ Ti kako tutuen he tehu pon ie, tupuakako i aile kako ahahata ti kaui kawatan. Kumahe ka lehe pahakako kako mat, tuahe kako mon hahawane atengiai tupuakako haun tetenen i hamalum lian tehue ma i hataxixi kalutini tupuakako ti aope ie. ⁵ Puki Haeu apeseni kako ti tetenen ien. I hani Holi Spirit neiniakako ape pupuase Holi Spirit leilokako i kola ka tesol waliko ien i sohot hawane imuh.

⁶ Aile ape kako uke he angiamat wanen. Kako tioi ka tehu pon itan ie kumahe xuxukako wanen. Kako tai toa kapi Jises Krais tel Masiwi ti he tone Haeu. ⁷ Xoxoi namilokako ti Jises Krais i neneini nanahiakako kumahe nake ti waliko tenen kako pon ningahian. ⁸ Masin ti nga kakawen, kako uke he angiamat. Pamu kako waheni lioiai tupuakako ti aope lehe kako to kapi Jises Krais leili xuxukako wanen ti tone Haeu tel Masiwi. ⁹ Nake ti tenen ien kako haeliel hawane ailei lawe waliko tenen i hamuamua Jises tel Masiwi, ti kako he tehu pon ie ma na kako kapin ti tonan. ¹⁰ Pake kako hatesol tu mate Jises Krais ti i paxai kolongeni woukako. Taen ien, tel tel ti kako uke hapoponow i kahun ti solian ma lialun ti kako ailewen

lokon ti tupuakako moihin he tehu pon itan ie.

Kakain sale hasawiai wasole seilon kapi Haeu

¹¹ Nake ti tenen ien amite tesol aposel tau kakanipeti puasamite ti puli Jises tel Masiwi. Aile ape amite puas elielit itinai seilon hani tepaun ti Haeu. Haeu tioi ka amite pupuas ti leili atemite. Lok al pupuasamite i kola hani amuto ka salan,

¹² Masin ti nga kakawen imat, kumahe ka amite sasameni amite hani amuto. Ti puki soliai puasamite i pon na amuto namiloi sameni amite. I axi kuimuto ti kak pahoiai teteka laha hanasanasa laha ma laha kum nam waxi ailei puasain ti leili atelaha wanen. ¹³ Hina seilon laha ukek ka amite ailele puase wowok, tuahe salan tetan, teneten amite ailele i hamuamua Haeu. Na seilon paxai ukek ka puasamite solian, amuto tioiwa ka ti hualiamuto. ¹⁴ Pake wawahen ti Krais sulini haxoxo nanahiamite. Amite soh hawane ka ti matei Jises Krais i kau kawatan ti lialui woi lawe seilon. Aile ape kako namiloi hanowia ka kako mat tuaiwen i. ¹⁵ Jises Krais mat ti hualiai lawe seilon. I mat lehe kaha teteka kaha soh tetan kaha kum to he tehu pon ie ti hamuamui tupuakaha, tuahe lehe nanahiakaha lawe i hamuamua i, tetel i mat ti ukek totonakaha ma i xahat aiawen.

¹⁶ Aile ape, lilian ti amite sohotua kahikahi Krais, sale paxapaxa ti amite kolongenai seilon kumahe masin ti teka laha kum soh tetan. Ti imat, amite namiloi Jises Krais hanowi ti laha, tuahe ape amite namiloi towiahuen. ¹⁷ Nameniwa, tel na i pakata xox hani kapi Jises Krais, i sohot seilon haun. I lioiwen lialui nanahian ti imat. Nanahian ape i sohia soliwen.

¹⁸ Ti puki kuikaha kaha kum towiahu uke. Puki Haeu huali kaha. Ti pupuase Jises Krais, Haeu aile wasolakaha kapin i sawi. Ape Haeu hani puasamite kaxi haniai seilon ka i pon wasolalaha kapin sawi.

¹⁹ Matei Jises Krais se kahuiai lialui woi seilon. Aweisal tewau ien Haeu aile ape wasole seilon kapin pon i sawi. Haeu kum hapeti he namilon lialui woi teka kahikahi Krais. Tenen meng solian ie Haeu haniwen amite ti kaxi haniai seilon. ²⁰ Amite teka tukei awe Jises Krais. Ti amite kamei eliel seilon ti towiahuhani Haeu, se hanowi ka puki Haeu ailele. Aile ape amite kamei eliel amuto ti hana hatapoi namilomuto hani Jises Krais lehe wasolamuto kapi Haeu i xox hawane. ²¹ Jises Krais, tel pate tap

wanen tenen na saun lialun, Haeu hani i tetel kaui kawatan ti lialui woukaha lehe wasolakaha kapin i sawi na kaha pakata xox kapi Jises Krais.

6

¹ Amite teka tuaiai Haeu ailei puasan, amite kamei eliel na amuto kum tale tehitomuto hani lalape soliai Haeu ti i aile haniwien kako. ² Ti leili pepai Haeu i ukek, “Ngaini ti nga kilamiwen,

nga hong kamekame ti amuto ti
huhual.

Taen ien nga talo tel awau ti hualia-
muto.” (Isa
49:8)

Nga kakane hawane amuto, tetehu taun ien se aope ie ti Haeu aile kokola soliaian hani seilon. Aope ie Haeu awawai seilon ti kawatan ti lialui woulaha.

Xoxoi tutuhi teka unaui Haeu

³ Amite tesol aposel amite haeliel hawane lehe nanahiamite i kum hahataxina seilon ti haxoxoi namilolaha hani Jises Krais ma tap tel pon kak teheniai pupuasamite ti Haeu. ⁴ Ti lawe waliko amite aile, i kola ka salan amite unaui Haeu. Tap tenen waliko lialun po noheheni amite ti aile puase Haeu. Amite kau lulungei kawatan tenen tenen. Waliko tenen masin. Kewi seilon lawe laha aile halialu amite. Kewi taun lialun lawe i hasihikuku halialu namilomite. ⁵ Hina taun laha xai ma lohi amite hani leili kalabus. Hina taun ti apuhain kilan seilon lengeini puxawei amite. Lawe amite puas makeh, tap matihuin ma angain. ⁶ Woumite tin i kola ka amite se unaui Haeu. Amite seilon haun ti pulan. Ti lawe waliko amite aile, Haeu haxewa namilomite. Amite tu xox tatale kalak na kawatan tenen tenen tutunahi amite. Lawe amite aile aluini hani seilon. Amite wahenei hahawane laha ti leili atemite ma lawe amite hani lioi Holi Spirit neiniamite.

⁷ Mewenae kakain salan amite kakaxi ma amite ailele puasamite ti pohe Haeu. Amite hapuasa soliai woumite hanowi soxi ti hile ti pahoiai teteka laha teheni kakai Haeu ma aile hahalialu amite.

⁸ Kalak na seilon hina lon ma na tap lon ti amite, amite tu xoxox unaui Haeu. Tin masin na seilon sameni ma na laha kak teheni axamite. Tapai lawe waliko na amite aile mewenae salan kalak hina seilon laha ukek amite tuahe woinakon ka

aposel. ⁹Hina seilon laha paxai tioi masih-wiamite tesol aposel tuahe teka laha kum nam waxy. Kalak moxemoxe lehe amite mat, amite saka moihiin tutuen. Amite tai mat kalak seilon aile halialu hawahane amite. ¹⁰Tiamite mewenae leili amauam kalak laha aile hakila tenen tenen ti i hata-hanea amite. Amite kumahe seilon ti kilan soxi tuahe ti pupuasamite kilan seilon tu-nahi solian tenen tenen ti Haeu. Tap tenen waliko ti amite he tehu pon itan ie, tuahe lawe waliko ti Haeu, amite to ukeke nake amite se natun.

¹¹ Teka soliai seilon ti Korin, tap tenen waliko amite kaxi lilikoheni. Amite hean wanen ti amuto. ¹² Na masin soliai waso-lakako kumahe pate xoxoan, kumahe ka nake amite kokongini wawahen ti amite hani amuto. Puki woomuto kola ka kumahe pate amuto waheni amite. ¹³ Nga kakamei amuto hanowi natuk wanen, amuto kewa hean wanen ti amite kola aliakei wawahen ti amite.

Teka kahikahi Krais kum puas huhukuma kapi teka laha kum soh tetan

¹⁴ Kum puas huhukuma kapi teka laha kum soh ti Jises Krais. Nga kak ukek nake seilon sawisawin laha kum he paho uke kapi teteka laha weli ailei saun lialun. Masin ti xewan ma tilokoan lalu kum hukuma uke, tin masin teka kahikahi Krais laha kum huhukuma kapi teka laha hah-i-take nenein ti Satan. ¹⁵ Tap tahi soliai wa-sole Krais ma Satan. Teka laha soh ti Jises Krais, laha kum tutuai teteka laha kum soh nake namilolaha i kum he paho. ¹⁶Kako tioi ka hahalin na seilon kau waliko tenen laha tua tanomi hani leili Ingi Haeu lehe laha lotui. Tin masin kako kum huhukuma kapi teka laha lolotui tesol waliko ien. Kako se masin Ingi Haeu tel pohen tapein nake Holi Spirit ingangai leilokako. Masin ti Haeu kakaweni i ukek,
“Lawe nga akakati teka seilon tetak
ma lawe nga huhuali laha.

Laha paxai tioi ka nga se Haeu tel Masiwi ti
laha
ape nga namiloi ukek laha se seilon
tetak wanen.” *(Lev 26:12)*

¹⁷Ti tesol liai leili pepai Haeu tel Masiwi i
kakane teka seilon tetan ukek,
“Ahutawa leili teka weli ailei saun lialun.

Selaia kapitawa ti laha.
Kum nanakaxua kapi laha lehe nga amuke
amuto.” *(Isa 52:11)*

¹⁸Tin Haeu kakane lato ukek,

“Nga natuwi hani amuto ape amuto tamawi
hanima nga.

Amuto hatesol teka kahikahik se
natuk wanen.

Le se kakaik tel Masiwi pohen
tapein.” *(2 Sam 7:14)*

7

¹Teka soliai akikik ti Krais, namiloi pax-aiwa lalape soliai Haeu ti i kak tatamusua aope ka i hani kako. Aile ape hauniwa kako ti waliko tenen i nakaxui halolo tupuakako ma leilokako. Ti lalape lokako ti Haeu, kako haeliel hawanewa lehe kako sohot seilon tenen sawisawin tapein.

Pol amuam nake teka Korin hasawi aliake woulato

² Amite tai tatalesi tuahe na tel ti amuto. Tap tenen amite ailewen ti haputai xoxoi namili seilon ma tin amite kurn pupulut laha ti ukei waliko. Amuto natu kewa hean hani amite. ³ Kumahe nga kak ukek ti howiniai woomuto. Masin ti nga kakawen imat, amuto se tuah lian tehue leili atemite. Ti leili taun solian ma lialun, kalak na mate-mate tunahi amite kako papakata tutuen. ⁴Aile ape nga kak matut uke kapimuto. Nga amuke hahawane amuto. Amuto hakuwien nga ape kalak taun lialun tutunahi amite, naga mewenae xuhai amuam.

⁵ Ti amite tahia haniwa Masedonia, pate amite tai hahanau kaui kawatan. Tesol tesol hina seilon lawe laha pahoxai amite. Matauin tin tunahi kakapitimi amite. ⁶ Tuah Haeu, tetel lawe i haxoxo aliake tutuhakaha, i hapusa Taitus hakuwamite ti tahiaria. ⁷ Kumahe mewenae Taitus tel hakuwamite. Amite amuam ti amite hongoa sale soliai woomuto hani i. Ti i tahiama i kakane amite ka pahamuto wanen paxai-paxai ma amuto nam wawatakai lialui woomuto ti i hawaxixi soliai wasolakako. Tin i ukek ka pate hina lomuto tetak. Hatesol waliko ien i hamuamua kasini hawane nga.

⁸ Nga kum nam tahane kakaik leili teik pasuk nga tai hanimu amuto imat. Kemuk i hanamiloa nga nake nga tioi ka i hamolo patumuto. Tuahe i kum mol kue. ⁹Aope ie nga amuam, kumahe nake ti hakawatai namilomuto tuahe nake tatahan ti amuto haxewawen namilomuto ape amuto paxai tioi lialui woomuto. Tatahan tenen ien, se tatahan tenen ti Haeu pahan amuto hina. Aile ape salan tetan kakaik tai aile halialu amuto na tenen. ¹⁰Nga kak ukek nake ti koko nam watakai hawane lialui woukako,

Haeu awai kako ti kaui kawatan ti saun tenen ien. Tenen tatahan ti kako ien ala kako kum nam tatahane. Na seilon leili tatahan tuahé laha kum nam watakai ailei saun lialun, i selai laha kapi Haeu.

¹¹ Namiloi paxaiwa mongohe soliae waliwo muhin ti amuto tahane hawane ka tel ti amuto i ailewen waliko tenen lialun. I hakawata tiamuto ape amuto haeliel hawane ti hasawian. Amuto halepelep hawane lehe Haeu papaxai ka amuto ailei laalali waliko sawisawin ti atemuto wanen. Amuto paxai tioi ka Haeu axi amuto kawatan na amuto kum aile mongeni tenen waliko lialun ien. Pate pahamuto wanen nga luawa ti hualiamuto. Amuto kola lomuto hani nga tel aposel ape amuto eliel hawane lehe tetel i ailewen tenen saun lialun ien, i hasawi aliake. Hatesol waliko ien i kola ka amuto tohongi hatapoen lawe aweisal ti hasawiai tenen waliko ien.

¹² Tuahé teik pasuk nga tai hanimu amuto, kumahe nga tai nake ti tel i ailewen tenen saun lialun ien ma na tel i lialuen nake ti tenen ien. Nga tai lehe hetekie huuhal ti Haeu amuto paxai tioiwa ka amuto hahanamite tesol aposel he atemuto wanen.

¹³ Aile ape amite kui ahe hawanewen.

Tuaiwa tenen ien, amite amuke hawane ti amite paxai tioiwa amuamui Taitus nake soliae woumuto hatesol i hatona hasoliawen tian. ¹⁴ Nga kaxi sameniwen amuto hani i. A woumuto tai hatahunosenga. Lawe kakaiak hani amuto mewenae salan, tin masin soliae nanahiamuto ti nga sasameni hani Taitus se salan. ¹⁵ Ti i namiloi paxai aliakewa ka amuto hong kakaiam ma amuto waxi auni aluin i hetekie lalape lomuto, wawahen tetan hani amuto pate i lap hawanewen. ¹⁶ Tiak amuam hawane nake ape nga soh ka lawe waliko na amuto aile tutuhamuto xoxoan.

8

Pol pahan kako kewa ongawi

¹ Teka akikik ti Krais, pahak amuto tioiwa lalape soliae Haeu ti teka kahikahi Krais leili texux xux Masedonia aile kokola. ² Kalak lato to kakau kawatan lalap tenen tenen, amuam ti lato lalap wanen. Kalak sozialato pate palai, lato seilon tenen pate ongawi.

³ Nga tioi ka salan nake puki nga ningahiewen huuhal ti lato hani se lalap wanen, kalak tataen ti i hatae aliake lato. Lato ailele ti puki soliaealato. ⁴ Puki lato kamei eliel amite tesol aposel ti sowini hanialato lehe

lato tuai teka kahikahi Krais liai ti hualiai teka seilon ti Haeu leili texux xux Judia. ⁵ Huhual ti lato i akulai kasini lapan ti amite nanamilo. Imat ti lato aile uked ien, lato hanimu Jises tel Masiwi neinialato. Ape muhin lato kamei non amite ti haxewai namili Haeu hani lato.

⁶ Taitus, tetel i haxoxo hutui huhual ti amuto teka Korin, amite kamei eliel i ti hualiamuto tinamiai tenen puasain ien. Tenen huhual ien i kola lalape soliaeamuto. ⁷ Nga tioi ka amuto pate solian wanen ti kilan waliko. Namilomuto ti Haeu xoxoan wanen. Amuto alune hawane ti towiai kakain ma anesoamuto lalap wanen. Lawe waliko, amuto aile ti atemuto ma wawahen ti amuto hani amite pate lalap. Aile ape pahak amuto tin kewa pate ongawi hualiai teka seilon ti Haeu leili Judia.

⁸ Kumahe nga lulungei amuto ti ailean. Nga paxaiwen lowiai teka kahikahi Krais liai ti huuhal ape pahak tin amuto kolawa soliae wawahen ti amuto. ⁹ Pake amuto tioiwen lalape wawahen ma soliae Jises Krais tel Masiwi ti kako. I pono wanen ti tone Haeu, tuahé nake ti hasoliaiakah i teheni aliake i. I salili hatapo lawe soliae waliko lehe kaha pon ukei kilan waliko solian ti Haeu.

¹⁰ Nameniwa ahang tehu tamusuen. Amuto teka nosenimu ti axiai huuhal ape tin amuto hutuiai huuhal imat ti teka liai. Namilok nga uked, pate solian na amuto aile tetenen ie. ¹¹ Amuto hahiawa aile hatapoi puasain ien hanowi ti uli amuto puasawa. Axiwa laha lapan ti pon amuto axi. ¹² Na masin amuto amuam hawane ti axiai huuhal, Haeu lawe i amuke lapan ti i pon amuto axi. Kumahe i uked ka seilon axiwa waliko ti na laha tap. ¹³ Kumahe nga uked axiwa huuhal lapan tenen ti i aile halialu aliake totonamuto. Pahak ati amuto pono ti ngahatiamuto. ¹⁴ Aope ie amuto kilan waliko ape amuto pon potengenai teka kahikahi Krais ti Judia. Ape telok ti na lato kilan waliko, lato hapono ulea amuto. Ti aweisal tenen ien, ati amuto uke he pono.

¹⁵ Masin ti leili pepai Haeu i uked,
“Teka laha uke hakila, i kum lis i laha
ape teka ukekealaha palai, tap laha
tae.” (Exod 16:18)

Taitus ma hua kahitan hani Korin

¹⁶ Aope ie nga taloa Taitus hani kapimuto. Nga kak kemulik wanen hani Haeu nake Taitus tin haeliel hawane ti hualiamuto hanowi nga. ¹⁷ Kumahe i luawa mewenae ti hongenai kamekame ti amite tesol aposel.

Ti puki xoxoi isian i luawa hualiamuto.
¹⁸ Amite talo tuaiwa Taitus tel akikikako ti Krais liai. I tetel lawe seilon ti ingi lotu tesol tesol kak sasameni pupuasan ti kaxiai meng solian ti Jises Krais.¹⁹ Tuaiwa ien, laha kilamiwen i kahitiamite otoheniai huhual hani teka Judia. Huhual tenen ien i kola ongawiakako ma i haxawa axe Haeu tel Masiwi.²⁰ Lalape huhual ien, amite kanipeti hahawane lehe seilon kum kak halialu amite sale nahikei tenen puasain ien.²¹ Kumahé amite haeliel ailei waliko sawisawin mewenae ti puli Jises tel Masiwi tuahé hetekie ti puli seilon.

²² Tin amite talo uleawa tel akikikako ti Krais liai kahiti tuaiwa Taitus ma tel kahitan. I tel unaui Haeu wanen. Amite paxai hakilawen soliai pupuasan. Ti i tioiwa soliai ongamuto, i haisi aheke i ti lua hualiamuto.²³ Taitus i tel puas akatak. I huhuali nga ailei puasak wasolamuto. Ape hua kahitan, teka kahikahi Krais ie kilamiwen lalu ti ailei puasain kapimuto. Lalape soliai pupuasalalu i haxawa axe Jises Krais.²⁴ Aile ape kola hawanewa wawahen ti amuto haniwa lato lehe teka kahikahi Krais liai paxai tioi ka samenian ti amite sale nanahiamuto se salan.

9

Apeseniai huhual hani teka Judia

¹ Ala i kum tapai nga hanamena tuhi amuto sale tenen huhual ti haniai teka seilon ti Haeu leili Judia.² Nga tioi ka amuto amuam ti hualialaha. Nga sameni kueiniwen amuto hani teka Masedonia. Nga kakanewen lato ka amuto hetekie teka tuaumuto leili Akaia, lolowiahua ti axiai huhual hoi lilian ti ahang tehu tamusuen. Soliai ongahua ien i hahika hasohoen kewi ti teka Masedonia.³ Tuahé nga taloa tolou seilon ien lehe ati amuto tinami apeseniai tenen huhual ien masin ti nga kakaxi ka amuto aile. Na amuto apeseniwen, amuto hapono hawane kakaiak ti nga sasameni amuto.⁴ Tuahé na amuto tai apeseni ape hina teka ti Masedonia kahiti tunahi nga ti luaiak haniwa kapimuto, amite tahuнос nake ti xoxoi namilomite ti amuto. Tuahé pamu hienain lalap alia hani amuto.⁵ Aile ape nga ukek pamu ewian na nga talo peleiwa tolou seilon ien ti tinami hatapoi tenen soliai huhual ien ti amuto kakawen ka amuto hani. Na amuto apeseni imat

ti tahiaiak, i kola ka amuto hahani ti ate-muto wanen, kumahe nake ti seilon lungei amuto.

Kako huali hakilawa seilon

⁶ Namiloi paxaiwa. Na tel seilon seini palai waki pata, tin i uke palai huan. Na i seini hakila waki pata, tin i uke kilan huan.

⁷ Aile ape amuto tel tel axiwa lapan ti i namiloiven ti leili aten wanen. Kum hani tatahane, hani amuke hawanewa. Kumahe nake ti kakai seilon liai ape i hani. Haeu waheni seilon tetenen i axi huhual ti leili aten.⁸ Haeu lawe i hani amuto kilan wanen waliko solian. Salan tetan i axi akulai mongohun ti i tapai ngahati-amuto. Aile ape i pon na lawe amuto aile kilan waliko solian ti hualiai seilon liai.⁹ Masin ti leili pepai Haeu i kakak sale tel seilon hina wanen lon ti Haeu i ukek,

"I tel seilon pate ongawi.

I axi hakila teka seilon tap soxi.
 Haeu kum maluhe wanen tenen soliai puasain ien."
 (Ps 112:9)

¹⁰ Haeu tetel i hani seilon waki pata ti seini ma tin i hani an ti kaha an. I axi hahakila kako lehe kilan waliko kako pon ti hualiai teka laha tae na tenen.

¹¹ Salan wanen, amuto uke kilan waliko solian ti aweisal tenen tenen lehe lawe taun amuto huali hakila uke seilon. Ape ti amite otoheniwa lalape huhual ti amuto haniwa teka Judia, kilan seilon kak kemulik hani Haeu.¹² Huonen solian ti tenen pupuasamuto ien. I hapono teka seilon ti Haeu waliko ti lato tae ma kilan seilon laha xuh ti amuam ape kak kemulik hawane hani Haeu.

¹³ Tenen soliai huhual ti amuto i kola ka amuto se salan unaui Haeu. Ape teka seilon haxawa axe Haeu nake amuto hong usiusi meng solian ti Jises Krais hetekie ongawiamuto hani lato ma seilon liai.¹⁴ Ape ti lalape wawahen, lato lotu huali amuto nake huhual ti amuto i kola hawane lalape soliai Haeu.¹⁵ Tuahé koko hatesol kak kemulik haniwa Haeu ti tel Natun, tetel awaiakaha. Tenen soliaian ien se lalap tapein wanen. Tap tel i pon kaxi hapono kolongenai tenen soliai Haeu ien.

10

Pol kak pahoi teka laha teheni pupuasan

¹ Hina seilon wasolamuto laha ukek ka nga pate masop ti nga kapimuto ape na nga kumahe ien nga tai hani amuto pas

tenen ahian. Tuahé paxaiwa, nga kak hamalehu kakaiak hani amuto tin hanowi ti na Krais aile. ²Nga kamei eliel amuto, kum hong wawaxi kakaialaha lehe na nga tahiā haniwa kapimuto nga kum kak hahia hani amuto hanowi ti na nga tumei teteka laha ukek ka amite tesol aposel nanahiamite tuahé masin teka laha kum soh ti Haeu.

³ Amite tesol aposel se seilon masin teka liai, tuahé sale pahojan ti amite hani teka laha aile halialu amite ma pupuase Haeu kumahe masin ti teka laha kum soh ti Haeu. ⁴Paxaiwa, amite kum hapanusa pa tenen seilon ti hile hahapuasa. Amite hapanusa lalape pohe Haeu ti xoiniai kui pupuase Satan. ⁵Ti aweisal tewau ien amite xoiniai hatapo teka laha pahoxai kakai Haeu. Ti seilon hanasanasake laha ma elilie slainiai teka liai ti tioiai Haeu, amite kola hawane ka laha kumahe wanen salan. Tin amite waxaini itiniai namilu seilon lehe laha usi aweisali Krais. ⁶Aile ape muhin ti amuto teka Korin kola hawanewa ka salan amuto se unaui Jises Krais, amite nau hasawi teteka ti amuto laha tahi nauna tetan.

⁷ Amuto paxai aka mataini hawanemua imat ti amuto aile tenen na namil. Hina seilon laha kak matut ka laha se unaui Krais a amite tesol aposel kumahe. Amuto paxai tioiwa ka amite se unaui Krais wanen tin masin lato. ⁸Kalak na nga kak matuke masiwamite ti Jises Krais tel Masiwi haniwani amite, nga kum hienake. Pake i kilami amite masiwi ti hualiamuto lehe amuto sohot soli ahe tatale kahikahi Krais, kumahe ti haputai xoxoi namilomuto tetan.

⁹Kakaik leili pasuk, namilok kumahe ti hamatauamuto. ¹⁰Nga kak ukek nake hina seilon laha ukek ka kakaiak leili pasuk pate ahian ma kuin wanen ti lungelai seilon, tuahé ti na nga kapi laha nga masin seilon tenen tap ailelean ma kakaiak laha nam teheni. ¹¹Seilon tenen masin, laha paxai tioiwa ka waliko ti nga tatai leili pasuk tin tuahé masin na nga pupuasake ti wasolamuto.

¹²Teteka ti laha pahoxai amite, laha kak hahaxawa laha hani seilon. Lehe amite kolongeni ukek ia amite hani seilon tenen soliaian ien? Laha kolongeni aliake laha hani puki laha ma paxai kolongeni aliake laha ti puki anesoalaha. Namilolaha pate i tae.

¹³Tuahé amite tesol aposel, amite kum tua hahaxawa amite. Amite kak matut mewenae sale puasain ti Haeu hahani

amite. Leili tenen ien se puasain ti amite ailele wasolamuto. ¹⁴Kumahe amite tua itini amite ti amite ukek amite masiwi ti amuto. Amite se teteka imat wanen ti xau luaiamite hani kapimuto ti kaxi ahutia meng solian ti Jises Krais.

¹⁵Tin amite kum ukeke ax lalap ti puase seilon liai. Ti namilomuto hani Haeu to xox tatalele, pon amite mon ka lomuto hani amite i lap ahe onoten i hawane pupuasamite wasolamuto. ¹⁶Ape ti pupuasamite naxia lap ahewa, i pon amite kaxi sawateni aheke meng solian ti Jises Krais hani teka seilon laha tai hong. Amite kum puas tetesol ti teka liai puasawen ien nake lomite kum al amite sameni aliake amite ti waliko teka liai ailewen wasole seilon. ¹⁷Masin ti leili pepai Haeu i ukek, “Na tel pahan i sameni tenen na waliko, sameniwa mewenae waliko ti Haeu tel Masiwi aile.”

(Jer 9:24)

¹⁸Aile ape tel na i sameni aliake i, i kumahe tuahé. Tuahé wanen tetel ti sasameniai Haeu.

11

Hahongohong ti Pol sale teka kumahe salan aposel

¹ Amuto nati hong lungeliuma kakaiak kalak ti haniwa amuto uke masin ka nga tua kak lalolal ti sameni aliakeak. Nga tioi saka amuto hong tutuen nga. ²Nga halelelep hawane ti amuto. Masin na tel seilon pahan tel natun hehin pate sawisawin ti na i hasala hani tel axoan, tin masin pakah wanen amuto pakata hawanewa kapi Jises Krais ape hamalum kapitawa kapin. ³Tuahé i hamatau nga uke amuto hongenii seilon tenen puputa neini hakalala soliai pakata-iamuto kapi Krais hanowi ti Satan i uke tanome weiko ape puluti hakalala Iv. ⁴Nga kak ukek nake hina ti amuto hong amuke teka laha kakaiak kakaih liai tenen sale Jises ti amite kaxiwen. Laha kakane amuto ukei spirit ti kapitiamuto tuahé i kumahe tenenawé masin tenen amuto kewen ti ape amuto sohoa ti Jises Krais. Laha ukek laha kaxi ahuti hahani amuto meng solian, tuahé pate i sel ti tenen meng solian ti Jises Krais ti amuto hong waheniwen.

⁵Nga kum paxai ukek ka hina tewau aweisal teka seilon ien pamu tuah tetak, kakal puki laha namiloi tanomi ka laha se aposel tenen solian tapein. ⁶Nga uke kumahe anowian ti towiai kakaih tuahé nga hina anesoin. Ala amuto tioiwen

nake amite kola hakila haniwen amuto leili hanauan ti amite.

⁷Nakon nga talesiwen la, ti nga kum uke kahuk ti kaxi ahutiae meng solian ti Krais hani amuto? Ti kolai lok hani amuto nga teheni aliake nga. ⁸Nga uke halapawen moni ti ailei pupuasak ti teka kahikahi Krais liai lehe nga tua puas lioa hualiamuto. ⁹Ti nga kapimuto, nga tai hahakawa na tel. Nga tai kakamea huhal ti amuto nake tesol akikikako ti Krais lato luama ti Masedonia, lato axi haponoen nga lawe waliko ti nga tae. Nga haeliel hahawane lehe nga kum hakawata amuto tuahna tenen ape tin tap nga po aile hasohotu. ¹⁰Ape leili hatexux xux Akaia tap tel i pon hakonguak ti kak matukei tenen ien. I pon ti amuto soh tetenen masin ti amuto tioi ka kakain salan ti Krais leilok. ¹¹Kum namiloi ukek ka nga kum hongeni waxiai kahuk nake nga watakai amuto. Kumahe masin ien. Puki Haeu tioi ka nga waheni hawane amuto.

¹²Nga aile kapitini tatale saun tetenen nake pahak nga mingini awe tetesol seilon laha sameni aliliak laha ka pupuasalahna tin masin pupuasamite tesol aposel. ¹³Tesol seilon ien kumahe salan aposel. Pupuasalahna i tua pupuluti seilon. Laha haeliel lehe seilon keekewak laha ailele puase Krais, tuahna tetan laha kumahe unaui Krais. ¹⁴Nga kum tataxini na i sohot ukek ien nake puki Satan putini uke na i hanowi engelai Haeu hetekie xewaian. ¹⁵Tin i kum hahataxina kako na tesol unaui Satan laha putini uke na laha hanowi teka unaui Haeu wanen. Hina ngixin ti ape laha uke hapoponowi kahulaha usiwa waliko ti laha ailele.

Pol kakak kawatan tetan

¹⁶Masin ti nga kakawen, kum namiloi ukek ka nua kakalol sameni aliakeak. Ape kalak na amuto namiloi nga ukek ien, nati honga nga. Na amuto hong teka seilon ti puputa, tin i pon amuto hongomua na nga kak samenimu nga teik. ¹⁷Amuto tioi ka waliko ti nga kakak ie kumahe i usiusi woi Jises tel Masiwi. Na nga sameni aliake nga, se masin seilon tenen i tua kak lalol. ¹⁸Tuahna kilan seilon laha hanasanasa laha hanowi ti teka laha kum tioi Haeu ailele. Aile ape tin nga hanasanasa. ¹⁹Nga namiloi ukek ala amuto hong waheni kakaiak. Lawe amuto waheni hongoi teteka seilon laha putini laha ailele puase

Haeu kalak amuto sokok amuto pate seilon namilo. ²⁰Salan tetan amuto hongeni laha ti toheni ahahu amuto. Tin amuto sowini na laha aile ka laha kahih ti amuto, na laha pisi amuto, na laha haxawa axalaha ti teheniamuto ma na laha aile isisihki-nawemuto. ²¹Tuahe amite tesol aposel, tap wanen amite nanamiloi ti aile hani amuto ukek ien. Nakon lehe nga hienake?

Aile ape nga tin nga pon kak matut sale waliko ti teka pulutiamuto kak hanasanasa, kalak uke i hakouke nga hanowi ka seilon tenen i tua kak lalol. ²²Laha ukek laha se Ju, kewak? Nga se tin. Laha kaxi laha ti Israel. Nga tin. Na laha ukek laha kahi nati Abraham, nga tin kahi natun. ²³Laha kak matut ka laha unaui Krais. Nga se unauan pamu soliaian ti laha. Nga tioi tenen kakaiak ien masin kakai seilon taxitaxia. Tuahna pamu puas eliliel nga, tin pamu nga kalabus hakilawen. Pamu lialuan xaxax ti laha hani nga ma nga lawe moxemoxe matein. ²⁴Teka Ju hetiwen nga uke he tepanim. Ti hetiak tehu, hehet laha hani nga 39. ²⁵Uke he tolulu teka Rom heti nga ani pata. Tehu laha hokai nga pot ti teleiak. Uke he tolulu waian oh manan ti nga kuoku. Tehu liai nga man akaka itax ngain ma ipong hatehu. ²⁶Tap tahi tiliai luaiak. Kilan kawatan tunahi nga ti luaiak he kan ma itax, leili taon ma toan, ti teka xai keliasi soxi, ti teka akilik Ju ma ti teka kumahe Ju, ma ti teka laha putini ka laha kahikahi Krais. ²⁷Nga puas makeh usi hawane ma kewi lawe tap matihuun. Kilan taun lawe kinawek paxepaxe ma hitolo tunahi nga ti tapoi an. Tin kilan ngain nga peu lialu, tap puxux awaiak ti waiwain.

²⁸Tuaiwa tesol waliko ien, lawe ngain nga to nanamiloi hatesol teteka kahikahi Krais nga puasawen wasolalato. ²⁹Na xoxoi namili tel i put, nga ilameni tuai i ma nga haeliel hualian. Na tel i neini hakalala tel liai ailei saun lialun, i tuhuke halialu hawane atek.

³⁰Na laha aile kungati nga ti samenia, pamu nga amuke non kaxi kolai waliko ti nga tae. ³¹Haeu tel Tame Jises tel Masiwi, tetel kako haxawawa axan lian tehue, i tioi ka kumahe nga puputa. ³²Waliko ti i sohot hani nga leili Damaskas i kola ka kumahe nga tapai ti lawe waliko. Telao ti nga ien, tel seilon hahitake tel masiwi Aretas, i hatuhi unauan ti hile he aweingi taon ti peteni

pohiak.³³ Tuahe hina seilon solian laha halahe ahuti nga leili tehu po nonoa he palaen ti tehu titieh ti Damaskas ape nga kuosel tetan.

12

Pol watakai sameni aliakean

¹ Nake ti laha aile kungati nga, nga kum aile lioi sameniak, kalak tap solian tetan. Ti telok telok Jises tel Masiwi hanamiloa nga ningahiai waliko tuah ma i hatakei hani nga waliko ti imat seilon kum tioi.² Ahang 14 tamusuen Haeu hana sohi nga hani tesol patul ti tonan.³ Nga kum tioi ka nga ien hetekie tupuak ka tuahe ti namilok. Mewenae Haeu tioi.⁴ Nga tua tioi ka i waxi nga hani tesol tonan pate tuah ma nga hong waliko tenen seilon kaxi tataxiate ma tin Haeu kum sowini kaxian.⁵ Waliko tenen ien ala i pon ti kaxi sameni tuahe nga watakai ailean. Nga kaxi kola non waliko ti nga tae.⁶ Pate hina waliko ti i pon nga kak sameni nga. Ape na nga aile, nga kum hanowi seilon tenen i tua kak lalolal nake nga kakaxi waliko tenen salan. Tuahe nga hahalini sameni aliakeak nake nga watakai seilon namiloi haxawa kasini nga. Pahak laha paxai kolongeniwa nga ti wouk ma kakaiak.

⁷ Kilan waliko tuah Jises Krais hatakei hani nga. Tuahe Haeu hongeni hani Satan hapuasa tel unauan ti axi kaptiniak kawatan lehe i kongini nga ti hanasanaseki tesol waliko ien. Tenen kawatan ien masin ka kui unun sahea kokongina leili kinawek.⁸ Nga kamei eliel Jises tel Masiwi uke he tolulu ti xaxaweniai tenen kawatan ien.⁹ Tuahe i kakane nga ukek, "I tapai lalape soliaiak ti hualiam. Pupuase pohek i sohot kouke hawane leili taun ti na o tae waliko." Aile ape pamu nga amuke non kaxi kolai waliko ti nga tae lehe Jises Krais hapuasa pohen leilok ti aile waliko.¹⁰ Nake ti nga unaui Krais, nga amuke na nga tae ti tenen na walik, na laha kak saxuti ma aile halialu nga ma ti kawatan tenen tenen liai tunahi nga ti leili taun lialun. Nga kak ukek nake leilon ti nga tae, nga se pono wanen.

Namili Pol pate lalap ti teka kahikahi Krais ti Korin

¹¹ Nga kak hanowi seilon tenen i tua kak lalolal, tuahe puki amuto kungati nga ape nga kak matut sameniak. Kalak teteka

laha kolongeni aliake laha aposel solian tapein ukek nga tap pupuasak, salan tetan laha kumahe ka pamu tuah tetak. Aile ape kumahe lialun na amuto kaxi sameni nga.¹² Ti nga kapimuto, nga kolawen ka salan nga tel aposel wanen. Nga aile tatale kilan kolakol ma waliko tenen lapap ti pohe Haeu, kalak waliko tenen tenen pahoxai nga.¹³ Nga aile aluini hahani amuto masin ti nga aile haniwen teka kahikahi Krais liai. Tuahe nga kum sowini ukei huhual ti amuto ti ailei pupuasak nake hoi liai lato haponoen nga ma tin kumahe pahak nga hakawata amuto. Na amuto soh hawane ka tenen saun ien lialun, nga kamei amuto kum hahapeti lialui lomuto tetak he tiamoto.

¹⁴ Nga luawen uke he huohu kapimuto imat. Aope ie nga lua paxai ulea amuto ape tin nga kum hakawata amuto nake kumahe pahak ukei soxi ti amuto. Ti leili atek pahak wanen lehe amuto pakata xox tatalewa kapi Jises Krais. Pake kumahe pupuase teka akaik ti waxenai taman tinan, liai pupuase taman tinan ti waxenai natun.

¹⁵ Aile ape masin tel soliae tame akaik, nga haeliel hawane aile hatapoi tenen tenen ti hualiamuto. Nga hani hetekie tataen puki tupuak. Ape nga to waheni ahehekewa amuto. Kaie wawahen ti amuto hani nga to tae aheahelih?

¹⁶ Ala amuto tioi ka nga kum hahakawata amuto ti waxeniat. Tuahe teka ti amuto ukek ka anesoak tapan wanen ti pisi waxainiamuto.¹⁷ Lehe nga aile ukek ia? Nakon hina ti tesol seilon nga taloa pisiwen amuto?¹⁸ Nga taloa Taitus hani kapimuto hetekie tel kahikahi Krais liai. Nakon i pisiwen amuto? Ala amuto tioi ka namilomili tenenawe ma lawe ati amili ailele puasain solian hani amuto.

¹⁹ Uke amuto namiloi ukek lawe kakaiak ie tuahe ti sipainiamite tesol aposel. Kumahe. Hatesol kakaiamite kakain tuah nake amite unaui Krais ma nga tioi ka Haeu hongohong kakain ti amite kakak. Teka soliae akikik ti Krais, lawe waliko ti amite ailele se ti huali hakuiamuto.²⁰ Tuahe nga to nanamiloi tahiaiak kapimuto, uke nga tunahi ka woumuto kum hamuamua nga ape nake ti tenen ien tin amuto kum amuke saun ti na nga aile. I hamatau nga uke amuto he hapatapat ma amuto lohaini teka liai, leng ausisini hani tel tel,

namiloi halepelep alia amuto, kak halialu seilon ma misahi laha, hanasanis ma puas nakaputa alia wasolamuto.²¹ Salan wanen, nga nanamiloi tahiaiak kapimuto uke Haeu tel Masiwi tetak kola hawane hani nga lialui woumuto ape i hahiena halialu nga. Ape tatahan lalap tunahi nga nake kilan ti amuto tai aka lilioi saun lialun ti wawan hehin, ti sikisiki tenen pate hienain wanen ma ti hongenaiia isiai namilomuto ti sik.

13

Tiliai nauna ti Pol

¹ Aope ie ape tolulu luaiak hani kapimuto. Leili pepai Haeu i ukek, "Na tel i sului tel liai, hong waxiwa mewenae na seilon hua ma na tolu kakaxi waliko tin tetenen." (*Deut 19:15*) ²Tehu luaiak usiai tehu imat, nga hahongo peleiwen amuto ka nga kum halalia amuto ti lialui woumuto. Aope ie ti nga tap kapimuto, nga hahongo tuhi ulea amuto. Na tahiaiak kapimuto kewa he tolulu, tap tel ti amuto kuosel ti kaui kawatan ti lialui woun, amuto teteka aile kueiniwen saun lialun ma teka ti amuto po ailelewa aope.

³Ti usiwa pahamuto nga kola hani amuto ka Krais hapoheawan nga ti kakaia. Pohen i kum tae na i puas leilomuto. Lawe i kola lalape pohen ti na i aile hasolia amuto ma na i aluin amuto ti lialui woumuto. ⁴Kalak laha tahi hakea telei i hanowi ka i tap poh, aope ie ti pohe Haeu i moihin. Amite tin kakau kawatan ma moloan nake ti Jises, tuahe ti pohe Haeu amite pakata xoxos kapin ma pupuas wasolamuto.

⁵Paxai kolongeni aliakewa xoxoi namilomuto ti Krais. Paxai tioi hawanemua nanahiamuto. Ala amuto paxai tioi ka Jises Krais pupuas leilomuto. Ape ala amuto kola hawanewa ka salan amuto unaui Krais. ⁶Namilok ukek ti pupuasamite amuto paxai tioi ka amite se aposel wanen ti Krais.

⁷Amite lotu kamei eliel Haeu ti hualiamuto lehe amuto kum aile saun tenen lialun. Namilomite kumahie ti kola haniai seilon ka pupuasamite pate solian wasolamuto. Pahamite amuto ailewa mewenae saun tenen ti Haeu pahan kalak na hina seilon laha namiloi ukek amite tae hawane ti ailei pupuase aposel. ⁸Pake amite tu xoxox mewenae ti waliko salan. I ahuxai hawane amite ti hil pahoxaian. ⁹Na tutuhamuto xoxoan ti Krais, i hamuamua hawane tiamite. Aile ape amite kum nam waxi na hina seilon ukek amite tap wanen

poh. Amite kamei eliel Haeu ti haxoxamuto lehe amuto soli ahe tatale ape sohot seilon sawisawin tapein.

¹⁰Nga tatái hani amuto tesol waliko ien hahongoamuto imat ti tahiaiak lehe na ngua haniwa kapimuto nga kum tumei hahia amuto usiwa masiwak. Tenen tonain ti masiwi ien hahaniai Jises tel Masiwi ti hualiamuto lehe amuto sohot soli ahe tatale kahikahi Krais, kumahe ti haputai xoxoi namilomuto tetan.

Pol hakauamuam ti tiliai teik pas ie

¹¹Teka akikik ti Krais, nga tili kakaia ukek. Lawe amuto amuamua ma he sekusekua. Hongoa nauna tetak ape hasoliawa woumuto. Namilomuto kewa tene-nawae ma he wawahen hawanewa wasolamuto. Na amuto aile ukek ien, Haeu lawe kapimuto ti hualiamuto. I tetel i hatona ha-hasolia tiai seilon ma kola hahawane saun ti wawahen.

¹²Na amuto apuha hetekie, pohi amukewa tel tel ti amuto kolai wawahen ti Haeu.

¹³Amuam ti hatesol kahikahi Krais ie haniwa amuto. ¹⁴Wawahen ti Haeu ma lalape soliai Jises Krais tel Masiwi kapimuto hatesol. Nga lotu kakamea lehe Holi Spirit huali amuto ti pakata hani kapin ma puki alia tel tel ti amuto.

Galasia

Teik pasi Pol hani teka kahikahi Jises Krais ti Galasia Kakain ti haxewai teik pepa ie

Pol tel aposel tai teik pas ie hani teka kahikahi Krais ti texux xux Galasia sai 32 ahang muhin ti Jises moih aliawa ape Haeu waxy i hani tesol tonan. Kemuk Pol toto Galasia ape i kakaxi meng solian ti Jises Krais hani teka seilon ti tesol taon ie; Antioch, Ikonium, Listra ma Derbe. Ape kilan teka kumahe Ju laha sohot kahikahi Jises Krais. Imuh tesol ti teka Ju laha kum amuke walikoi ti Pol hahanau. Laha lua hani Galasia ape laha ukek ka seilon usiwa nauna ti Moses ma hatesol saun ti teka Ju lehe Haeu namiloi ukek laha seilon sawisawin. Seilon teka laha soh ape laha usi tenen kakain puputa ien. Ti Pol hongoa, i tai teik pas ie hanaualaha. I hanamena laha ka Haeu namiloi ukek laha seilon sawisawin kumahe nake ti usiwa nauna ti Moses ma saun ti teka Ju tuahne na laha hana hatapo xoxoi namilolaha ti Jises Krais ma tin Holi Spirit kapiti laha.

¹ Teik pas ie tataiak nga Pol tel aposel. Kumahe seilon kilami nga aposel ma na seilon talo nga. Puki Jises Krais ma tel Tamak Haeu kilami nga ailei teik puasain ien, tetel i xahateni Jises ti matean. ² Nga ma hatesol teka akikako ti Krais kapik, amite hakau amuam ti amite hani amuto teka kahikahi Jises Krais ti Galasia.

³ Amite kamei Haeu tel Tamakako ma Jises Krais tel Masiwi ti kako ti kola haniamuto lalape soliaialalu ma hatona hasolai ti amuto. ⁴Jises mat ti ukei kahi saun lialun ti kako lehe i awai kako ti saun ma namil lialun ti seilon ti aope ie. I onoteni hawane nampil tel Tamakako Haeu. ⁵Kako lotu sameniwa Haeu lian tehue. Salan wanen.

Tenenawe meng solian ti Jises Krais

⁶Ti lalape wawahen ti Krais ma soliaian, Haeu aile hasohotu amuto seilon tetan. Nga kum amemene wanen kiliwaihan ka amuto talewen tehitomuto hani Haeu ape amuto hong soh kakain liai tenen ti meng solian ti Jises Krais. ⁷Tuahe kakain ien kumahe wanen salan. Hina seilon laha hulo

towiahu meng solian ti Jises Krais ape i hahataxina namilomuto.

⁸Tenen meng solian ti Jises amite kaxi haniwen amuto se salan wanen. Aile ape kalak na tel ti amite ma na engel ti Haeu kaxi hani amuto meng liai tenen, amite kamei Haeu ti axi hawanean kawatan. ⁹Nga kaxiwen ape nga kaxi ulea. Aope amuto hong waxiwen meng solian ti Jises ti amite kaxi ahuti haniwen amuto. Na tel seilon kaxi hani amuto meng liai tenen, amite kamei Haeu ti axi hawanean kawatan.

¹⁰Kumahe nga kakane amuto ukek lehe seilon amuke nga. Pahak wanen Haeu amukeak. Na nga tua ailele ti hamuamui seilon, nga kumahe unaui Krais.

Sale Pol ti i sohot tel aposel

¹¹Tesol akikimite ti Krais, pahak amuto tioiwa, tenen meng solian ti nga kaxi haniwen amuto kumahe seilon tua aile tanomi.

¹²Kumahe nga kema ti seilon ma na laha hanau nga. Jises Krais tetel i hatakei hani naga.

¹³Amuto hongoen wouk ti imat, lokon ti nge usiusi saun ti lotu ti teka Ju. Nga eliel hawane axiai kawatan hani teka kahikahi Jises Krais ma tohongi lalali ti halialu tamusukealaha. ¹⁴Lokon ien nga xoini kilan teka lokok ti usiwa saun ti lotu ti teka Ju ma tutuhak xooaan ti usiwa hatesol saun ti teka matalau. ¹⁵Tuahe Haeu hina puasain tuah tetak. Hoi i kilamiwen nga lokon ti nga tai takah. Kumahe i aile ukek ien nake ti soliai puasak tuahe ti lalape soliaian. ¹⁶Ape i kola hatake hani nga tel Natun lehe nga kaxi tenen meng solian tetan hani teka kumahe Ju. Nga tai kamei paxai nampil tel na seilon.

¹⁷Tin nga tai lua hani Jerusalem ti paxaiai tesol lato tomu aposel imat tetak. Nga lua sawi hani texux xux Arabia. Ape muhin nga alia hani tehu taon Damaskas.

¹⁸Muhi ahang tolulu tamusua, nga lua hani Jerusalem lehe nga kakak kapi Pita. Puasain huohu nga to kapin. ¹⁹Nga tai paxai tesol aposel liai, mewenae Jeims tel ukale tel Masiwi Jises. ²⁰Meng ti nga tatai ie se sawisawin. Haeu paxai tioi hawane ka kumahe nga puputa.

²¹Imuh nga lua hani huoxux xux Siria ma Sailisia. ²²Lokon ien teka kahikahi Jises leili Judia, lato tai tioi nga. ²³Lato tua hon-gohong meng ti seilon liai kakaxi, "Tetel seilon kemuk i to aile hahalialu kako ma

tohongi lalali haputai xoxoi namilokako ti Jises Krais, ape ie i kakaxi meng solian tetan.”²⁴ Ti lato honga waliko ti Haeu aile hani nga, lato lotu sameni i.

2

Tesol aposel amuke puase Pol

¹ Ahang huopanim hinalo tamusua nga lua alia hani Jerusalem. Nga ilowi hetekie Banabas ma Taitus kahitiak. ² Haeu hanamiloa nga ti lua hani ien. Ape ti nga Jerusalem nga kakak mewenae kapi teka masiwi ti ingi lotu ape nga nexi haxewa hani lato waliko ti nga kaxi hahani teka kumahe Ju sale meng solian ti Jises Krais. Nga watakai na puasak ti imat ma ti aope ie i tua xoina. ³ Saka lato hong waheni kakaiak. Kalak Taitus, tetel kapik i tel Grik, lato tai hone lungei i ailei teik kikilam ti kotiai uli walikoun usiai saun ti teka Ju.

⁴ Tuahé hina seilon ien laha woinakon kahikahi Jises Krais. Laha paxai otioti saun tetenen Jises Krais haniwen kako. Laha tohongi lali haputai xoxoi namil ti kako hina ka mewenae Jises Krais i awai kako ti kawatan ti lialui woukako. Tesol seilon ien pahalaha lungeakako ti aile usiai hatesol saun ma nauna ti lotu ti teka Ju. ⁵ Tuahé amite tai hongeni namilolaha. Pahamite amuto soh tatalewa tenen meng solian ti Jises Krais ti amite kaxi ahuti haniwen amuto nake i salan wanen.

⁶ Tetesol masiwi ti ingi lotu ti Jerusalem lato tai hone lungei nga sohiai waliko ti nga hahanau teka seilon. Lato pate seilon tuah tuah kalak na lato seilon tuah ma na kumahe tuah, i kum sohi sale pupuasak. Haeu kumahe i paxai wawaxi leape axe seilon ti i paxai kolongeni woulaha. ⁷ Tesol masiwi ien paxai tioi ka nga kikilamiai Haeu kaxiai meng solian ti Jises hani teka kumahe Ju, masin ti i kilami Pita kaxiai tenen meng ien hani teka Ju. ⁸ Ti pohe Haeu i aile Pita sohot tel aposel tetan ailei puasan leili teka Ju. Tin masin i hana nga tel aposel tetan ailei puasan leili teka kumahe Ju.

⁹ Jeims, Pita ma Jon, tesol masiwi tapein ti teka kahikahi Jises, lato paxai tioi ka Haeu hani nga teik puasain tuah ien. Lato teini minamili Banabas, kolakol ka amite ailele puasain tenenawé. Ape amite aile tenen namil masin, amili aile puasain ien leili teka kumahe Ju ape lato puas tatale kapi teka Ju.
¹⁰ Tin lato kamei amili hualiai teka kahikahi

Jises laha tap soxi. Saun tenen ien hoi pahak wanen ailean.

Pol tumei Pita ti tehu taon Antiock

¹¹ Ti Pita lua hanima Antiok, nga tumei i puli teka seilon nake waliko ti i ailele kumahe wanen sawisawin. ¹² Imat Pita ang akakati teka kumahe Ju. Tuahé ti tesol Ju kapi Jeims luama ape i kum lawai ma ang akati teka kumahe Ju nake i mamata teka Ju namiloi halialu i. ¹³ Tin masin teka Ju liai laha aile usiusi saun tenen kumahe sawisawin ti Pita ailele. Ape laha itini hetekie taen Banabas.

¹⁴ Ti nga paxawa ka kumahe salan laha usiusi meng solian ti Jises, nga kakane hawane Pita ti pulalaha hatesol. Nga ukek, “O tel Ju, a o xaputiwen hina nauna ti kako teka Ju lokon ti o hukuma hetekie hani kapi teka kumahe Ju. Aile ape alahan o lungei teka kumahe Ju usiai saun ti kako teka Ju?” ¹⁵ Kalu nakuama ti teka Ju ape kalu lap hetekiema saun ti teka Ju, kumahe masin teteke kumahe Ju laha kum usi kakai Haeu. ¹⁶ Tuahé kako teka Ju kahikahi Jises kako tioi ka seilon kum pon hasawiai wasolalaha kapi Haeu ti usiai nauna ti kako teka Ju, mewenae na namilolaha xoxoan ti Jises Krais. Aile ape kako soh hawane ti Jises Krais lehe Haeu namiloi ukek kako seilon sawisawin, kumahe nake kako usiusi nauna ti kako teka Ju tuahé nake namilokako xoxoan ti Jises Krais.

¹⁷ “Tesol ti teka Ju laha sokok kumahe kako usiusi kakai Haeu nake kako kum usi nauna ti kako teka Ju lehe wasolakoko kapi Haeu i sawi. Na kako hana hatapo namilokako hani Krais lehe Haeu namiloi ukek kako seilon sawisawin, kaie Krais hanamiloa kako xaputiai nauna ti Haeu? Tap wanen! ¹⁸ Tuahé na nga usi aliakewen hatesol nauna ti kako teka Ju lehe Haeu namiloi ukek nga seilon sawisawin, ien salan nga ailele waliko ti ala nga kum aile.

¹⁹ Kemuk nga hahitake nauna ti kako teka Ju tuahé Jises Krais oxoxi nga ti hahitake tesol nauna ien lehe nga to hawane tel unaui Haeu. ²⁰ Ien masin ka nga mat ohoiwen Krais he kros. Kumahe ape nga usiusi wouk ti imat. Puki Krais pupuas leiloc. Aope ie nga hana hatapo xoxoi namilok hani fel Nati Haeu, tetel i waheni hawane nga ape i mat ti ukei totonak. ²¹ Nga kum tale uke tehitok hani lalape solian ti Haeu. Ti wawanen tetan i awai kako ti kawatan ti lialui woukako kumahe nake ti soliai puasakako.

Na masin usiai nauna ti kako teka Ju i pon hasawiakako hani Haeu, Krais tua mat xoina."

3

Usiai nauna ti teka Ju a namil xoxoan ti Krais?

¹ Amuto teka kahikahi Krais ti Galasia, amuto tap wanen patumuto. Nga kaxi haxewa hawane haniven amuto sale matei Jises Krais he kros. Tuahe pate amuto hon-geni ti seilon neini hakalala namilomuto.

² Nga kameimu amuto tetenen, amuto uke ukek ia Holi Spirit? Ti sale usiai nauna ma saun ti lotu ti kako teka Ju? Kumahe, Haeu hani amuto Holi Spirit nake amuto hong soh meng solian ti Jises Krais. ³ Amuto tax-itaxiawen! Ti amuto hutui kahitiae Krais, amuto hong usi Holi Spirit. Tuahe ape ie, amuto ailele ti puki kuimuto wanen.

⁴ Amuto kau hakilawen kawatan nake ti kahitiae Krais. Lehe tesol kawatan ien tua xoina? Nga kum ukek! ⁵ Nga kakane ulea amuto, kumahe Haeu hani amuto Holi Spirit ma i aile kolakol tenen lalap wasolamuto nake amuto usiusi nauna ma saun ti lotu ti kako teka Ju, tuahe nake amuto soh meng solian ti Jises Krais ti amuto hongoen.

⁶ Namiloi paxaiwa Abraham. "I soh hawane Haeu ape ti xoxoi namilon ien Haeu ukek i seilon sawisawin." (*Gen 15:6*) ⁷ Aile ape amuto tioiwa ka nati Abraham wanen teteka seilon laha hina namil xoxoan ti Haeu. ⁸ Pepai Haeu hoi kak kilamiwen ka Haeu namiloi ukek teka kumahe Ju laha seilon sawisawin na namilolahe xoxoan tetan. Hoi liat ti imat Haeu kaxi peleiwani hani Abraham tenen meng solian ti i ukek, "Nga aile hasolia hakila hani seilon ti lawe xux na laha soh hawane tetak hanowi o." (*Gen 12:3*) ⁹ Aile ape teka laha hina namil xoxoan ti Haeu, i aile hasolia hani laha masin ti i aile haniani Abraham.

¹⁰ Tuahe teka laha haeliel usiai nauna ma saun ti lotu ti kako teka Ju lehe laha sohot seilon sawisawin, laha toto hahitake lengei Haeu. Masin ti pepai Haeu kakawen i ukek, "Tel na i kum aile usi hatapo lawe nauna ti Moses leili pepai Haeu, i hahitake lengei Haeu." (*Deut 27:26*) ¹¹ Tap tel seilon pon usi hatapo i hatesol nauna ien. Tap tel seilon Haeu namiloi ukek i sawisawin nake ti usiai nauna ma saun ti lotu ti kako teka Ju. Masin ti pepai Haeu kakawen i ukek, "Tel seilon sawisawin i ukek tonain kapi Haeu nake i hina namil xoxoan

hani i." (*Hab 2:4*) ¹² Usiai hatesol nauna ien i liai tenen wanen ti xoxoi namil seilon ti Haeu. Masin ti pepai Haeu kaxiwen, "Na tel pahan i ukek tonain kapi Haeu nake ti usiai nauna ti Moses, i usi hatapo hawanemua hatesol nauna ien." (*Lev 18:5*)

¹³ Jises Krais oxoxi kako ti lengei Haeu. I uke totonakako ape puki i kau kawatan ien. Masin ti pepai Haeu kakawen, "Tel na laha tahi hakea telei hani he pata, i hahitake lengei Haeu." (*Deut 21:23*)

¹⁴ Aile ape nake ti pupuase Jises Krais, Haeu aile hasolia hani teka kumahe Ju masin ti i aile haniven Abraham. Jises mat ukei totonakako lehe na kako hina namil xoxoan hani i, kako uke Holi Spirit ti Haeu kakawen i hani kako.

Nauna ti Moses kum xaputi tenen namil ti Haeu xinoti haniven Abraham

¹⁵ Tesol akikik ti Krais, haxewaiamuto nga kaxi hani amuto tenen saun ti kaha seilon. Na masin hua seilon lalu xinoti tenen namil wasolalalu, tap tel i pon xaputian ma na sohian. ¹⁶ Tin masin ti Haeu xinoti tenen namil hani Abraham. I kakane Abraham ka i aile hasolia hani i ma tel i nakuama tetan. Haeu kumahe i kakak seilon kilan, i kakak seilon telawe, namilon i kakak Krais.

¹⁷ Salangawe kakaiak masin, Haeu xinotimai tenen namil hani Abraham imat. Aile ape tesol nauna ti i hani Moses haniajako teka Ju 430 ahang imuh, i kum pon xaxaweniai tetenen namil Haeu. Aile ape nauna ti Moses i kum pon xaputiai waliko ti hoi Haeu kakanewen Abraham. ¹⁸ Haeu aile hasolia hani Abraham nake i kakawen i aile. Tin masin i aile hasolia hani seilon, kumahe nake laha usiusi nauna ti Moses tuahe nake hoi i xinotien kakain kapi Abraham.

¹⁹ Na masin ien, lehe nauna ti Moses ailei la? Haeu hani kako nake kaha seilon to ailele saun lialun. Tesol nauna ien kola haxewa hani seilon lialui woulaha. I puas atengi tataen ti Krais, tel seilon i nakuama ti Abraham, tetel ti Haeu aile hasolia hani i nake i xinotien kakain kapi Abraham. Tesol nauna ien Haeu hani teka engel haniai Moses, tetel wasole seilon ma Haeu. ²⁰ Kako tioi na masin hua seilon lalu xinoti tenen namil, lalu uke tel seilon to wasolalalu. Tuahe Haeu, mewenae i xinoti tenen namil hani Abraham, tap tel seilon toen wasolalalu.

²¹ Ti Haeu hani Moses tesol nauna ien kaie i xaputi kakain ti i xinotien kakain kapi Abraham? Kumahe! Na masin ti usiai

nauna ien i pon haniakaha tonain kapi Haeu, kaien ti usiai tesol nauna ien i pon hasawiai wasolakaha ma Haeu.²² Tuahé ti he pepai Haeu i ukek ka hatesol seilon laha unaui saun lialun. Aile ape seilon uke tonain kapi Haeu ti tap tahi tapoan na laha hana xoxoi namilolaha hani Jises Krais.

²³ Imat ti Haeu hani kako Krais, kako hahitake tesol nauna ien masin tel seilon leili kalabus i hahitake tel petenian. Tuahé Haeu kola hani kako aweisal ti oxoxiakako na kako hana hatapo xoxoi namilokako hani Jises Krais.

Xoxoi namilokako ti Krais kako sohot nati Haeu

²⁴ Aile ape tesol nauna ien pupuas ti neiniakako hani Jises Krais lehe wasolakoko hani Haeu i sawi na kako soh hawane ti Jises Krais.²⁵ Aope ie kako hana xoxoi namilokako hani Krais. Kako ape kumahe hahitake tesol nauna ien.

²⁶ Aile ape ti xoxoi namilomuto ti Jises Krais amuto hatesol sohot nati Haeu.²⁷ Lokon ti amuto uke baptais hahitake axe Krais, amuto hutui usiai woi Krais. Amuto usi saun tenen haun masin na tel seilon i puxui tehu puxux haun.²⁸ Nake ti xoxoi namilokako ti Krais, kako pakata hawane hahitake Krais, kako masin ka seilon telawé. Aile ape tap tel i pamu tuahé liai tel, Ju ma na kumahe Ju, wawan ma na hehin, unaui seilon ma na kumahe.²⁹ Na amuto seilon ti Krais, amuto salan wanen kahi nati Abraham ape amuto uke waliko ti Haeu kakawen i hani Abraham.

4

¹ Nga kaxi haxewa aheke hanimu amuto. Na tel seilon mat salili kilai soxian, ti teka natun kokol tutuen lato masin tuahé unauan kalak lato hoi tame tesol soxi ien.² Lato tua hong usiusi tutuen tel ngahatiaitalato atengi ngain tetehu tel tamalato kilamiwen ti lato hapuasa tesol soxi ien.

³ Kako tin masin. Imat ti Haeu hani kako Krais, kako unaui nauna ma saun tenen ti teka seilon ti tehu pon ie usiusi.⁴ Tuahé ti i meiwa tehu ngain Haeu kilamiwen, i taloma tel Natun i takahama ti tel hehin. I takahama tel Ju hahitake nauna ti Moses.⁵ Haeu taloma i oxoxiakako, teteka hahitake tesol nauna ien, lehe kako sohot hawane nati Haeu.⁶ Nake kako se natun, Haeu taloma Spirit ti tel Natun hani leilokako. Ape i hanamiloa kako lotu axaiai Haeu "Tamamite."⁷ Amuto ape kumahe unaui nauna ma saun tenen ti teka seilon ti tehu

pon ie usiusi, amuto se nati Haeu wanen. Aile ape Haeu hani amuto lawe waliko ti i kakawen i hani teka natun.

Pol to nanamiloi teka Galasia

⁸ Ti imat, amuto kum nam waxi Haeu. Amuto hana hatapo tupuamuto hani waliko tenen kumahe Haeu.⁹ Tuahé aope ie amuto tioi Haeu. Pamu ewian na nga ukek Haeu tioi amuto. Aile ape kalahai lehe amuto usi aliai nauna ma saun ti lotu tenen i kum huali uke amuto? Pahamuto sohot ulea unaualato?¹⁰ Nakon amuto sokok ka amuto hamuamua Haeu ti amuto usi hatapo saun ti lotu tenen ti teka Ju usiusi leili ahang tehu tehu?¹¹ Nga namiloi hakila hawane amuto. Nakon lehe puasain ti nga aile haniwen amuto i tua xoina?

¹² Tesol akikik ti Krais, nga kamei eliel amuto, oxoxiwa amuto ti hahitake nauna ma saun ti lotu ti teka Ju hanowiwa nga ti ape nga oxoxa hanowiwen amuto ti imat. Amuto tai hong watakai kakaiak lokon ti nga kapimuto.¹³ Amuto nameni ka nga tinun ti uli nga kaxi ahutiwa meng solian ti Jises Krais hani amuto.¹⁴ Lialui naxe tinuk i tohongi lali amuto ti hong watakaiai kakaiak ma paxai teheniak. Tuahé amuto tai aile. Amuto waxi auni nga hanowi ka nga tel engel ti Haeu ma na puki alia Jises Krais.¹⁵ Hatesol amuam ti amuto ien ape ia? Nga soh hawane ka ti lalape wawahen ti amuto tetak, ala amuto xaxusi hatasohu haniwen nga pulamuto na amuto pon.¹⁶ Aope ie lehe amuto watakai nga nake ti nga kakane amuto waliko salan?

¹⁷ Tesol seilon ti hakalalai meng solian ti Jises, laha puas eliel itiniai namilomuto. Tuahé kumahe laha ailele ti solian ti amuto. Pahalahá amuto siawa tetak lehe amuto hong usi nonoa laha.¹⁸ Solian na amuto hong usi hawane seilon tuahe mewenae na kakaialaha sawisawin. Kakain sawisawin tetak amuto usiwa lawe ngain, kumahe mewenae na nga kapimuto.

¹⁹ Tesol natuk, lalape kawatan he tiak masin wanen moloi takohe akaik. Kawatan ien i kum tapo atengi tataen amuto sohot hanowi hawane Jises Krais.²⁰ Pahak wanen nga kapimuto aope ie lehe nga tioi aluin sale kakaneamuto. Nga kum tioi hawane ape nga hanau ukek ia amuto?

Hua nati Abraham

²¹ Amuto teka pahamuto to hahitake nauna ti Moses, kaxi hanima nga, kaié

amuto xeu hawane salangawe tesol nauna ien? ²² Pepai Haeu kakaxi ka Abraham natun wawan hua. Haga tel unaui tel axoan hatakaha tel ape Sara tel axoan i kumahe unaui seilon, i hatakaha tel liai. ²³ Ismael, tel nati Haga, i takah usiwa tuahé isiai namili seilon a Aisak, tel nati Sara, i takah usiwa namili Haeu ti i kakanewen Abraham.

²⁴ Nga kak kolengeni huhua hehin ien hani tenen waliko liai. Haga i tu kikilami kakain ti Haeu xinotiven kapi teka Ju ti Maunt Sainai. Akaik ti nakuama ti Haga hoi laha sohot unaui seilon. Tin masin teka Ju laha sohot hanowi unaui tesol nauna ti Haeu hani Moses hanialaha ti Maunt Sainai.

²⁵ Aile ape Haga tu kikilami Maunt Sainai leili Arabia ma tin i tu kikilami teka seilon ti Jerusalem ti aope ie nake laha hahitake nauna ti Moses masin ka unaui tesol nauna ien. ²⁶ Tuahé Sara i kumahe unaui seilon, i tu kikilami teka ti Jerusalem haun. I masin tinakako teka kako soh ti Jises Krais. Akaik ti nakuama ti Sara, laha kumahe unaui seilon. Tin masin teka laha soh ti Jises Krais laha kumahe unaui tesol nauna ien. ²⁷ Masin ti Aisaia tel kuluiai kakai Haeu kakawen, i ukek,

“Tel hehin lieheh, amuamua.

Pak amuamua kalak o tai pet akaik.
O tel ti imat o kum tan akaik

tuahé aope ie kilai natum
i xoini nati teka hehin liai.” (*Isa 54:1*)

²⁸ Tesol akikik ti Krais, amuto masin Aisak. Ati amuto takah usima kakain ti Haeu xixinoti kapi Abraham. ²⁹ Tuahé Ismael tel i takah usiwa isiai namili seilon, i axi kawatan hani Aisak tel i takah ti pohe Holi Spirit. Tin masin aope ie, teka laha unaui nauna ti Moses, laha axi kawatan hani teka laha hana hatapo xoxoi namilo-laha hani Krais.

³⁰ Tuahé teik kakain ti leili pepai Haeu i ukek, “Usi xaxaweniwa tel hehin unaui seilon ma tel natun nake tel natun tap wanen i po uke waliko ti tel taman, ukean tetel akaik tinan kumahe unaui seilon.” (*Gen 21:10*) ³¹ Tesol akikik ti Krais, aile ape kako kumahe kahi nati tel hehin unaui seilon, teteka hahitake nauna ti Moses masin ka unaui tesol nauna ien. Kako kahi nati tel hehin kumahe unaui seilon. Kako hana hatapo xoxoi namilokako hani Jises Krais.

¹ Jises Krais oxoxiwen kako ti hahitake nauna ti Moses. Aile ape akeni kongini tatalewa xoxoi namilomuto ti Krais, kum ailele ka amuto sohot ulea unaui tesol nauna ien.

² Amuto hongoa. Nga Pol kakane amuto, na amuto sowini hani laha aile haniamuto teik kikilam ti kotai uli walikoumuto usiay saun ti teka Ju, kaien puase Krais hani amuto i tua xoina. ³ Nga kakane hakui ulea amuto tel tel, na amuto sowini hani laha aile hani amuto saun tenen ien, ala amuto aile usi hatapoен hatesol nauna ma saun ti lotu ti teka Ju. ⁴ Amuto teteka amuto usiusi nauna ti Moses ti hasawiai wasolamuto ma Haeu, amuto selai xaxaweniwen amuto ti Krais. Amuto talewen tehitomuto hani lalape soliai Haeu ti awaiamuto ti kawatan ti lialui woumuto.

⁵ Tuahé teteka kako hani Holi Spirit kapi-tiakako, kako mon hahawane ka wasolakako ma Haeu i sawi na kako hana hatapo xoxoi namilokako hani Jises Krais. ⁶ Haeu kum namilo ukek ka seilon sawisawin na laha usi tetenen saun ti kikilam ti kotai uli walikoulaha ma na kumahe. Waliko lalap ti Haeu na seilon soh hawane ti Krais ma kola xoxoi namilohala ien ti saun ti wawahen.

⁷ Puasamuto ala pate solian. Aita ha-hakongu amuto ti usiay kakain salan? ⁸ Kum ukek ka Haeu, nake i pahan amuto hamalumua oxoxain ti hahitake nauna ma saun ti lotu ti teka Ju. ⁹ Kalak seilon tel, i pon pulutiai kilan seilon masin teik kokole ist seilon hana leili palawa i haxixa palawa hateik. ¹⁰ Tuahé nake ati kako kahikahi Jises Krais, nga soh ka amuto kum usi kakain tenen ti kumahe nga hahanau amuto. Haeu axi kawatan hani tuahé tel na seilon kakaian i hahataxina amuto.

¹¹ Tesol akikik ti Krais, teka laha ukek ka nge hone seilon usiay saun ti kikilam ti kotai uli walikoulaha. Na masin salan, teka Ju tai aile halialu nga tuahé laha aile halialu nga nake nga kaxi haxewa salangawe matei Jises Krais he kros. ¹² Teteka Ju laha lungei hahataxina amuto ti ailei saun tenen ien, laha koti xaxawenimua walikoulaha.

¹³ Tesol akikik ti Krais, Haeu pahan amuto hamalumua oxoxain ti hahitake nauna ti Moses. Tuahé kumahe ka amuto oxoxain lehe amuto tua aile saun lialun. Amuto he huuhalua lehe i kola ka amuto ailele saun ti wawahen. ¹⁴ Tenen nauna ti wahenai seilon liai hanowi ti kaha waheni aliakie puki kaha, i salangawe hatesol nauna ti

Haeu. ¹⁵ Tuahe na amuto hanowi sinen tenen tumun kalimen, amuto he hilehil ma hamange aliliake amuto, lepetawa uke amuto halialu tamusuke amuto.

Kewa Holi Spirit neiniakako

¹⁶ Nga kakane amuto, usiwa aweisal ti Holi Spirit neneini amuto lehe amuto kum usi isiai pahamuto ti ailei saun lialun. ¹⁷ Isiai pahakaha ti ailei saun lialun i pahoxai waliko ti Holi Spirit pahan kaha ailewa. Namili Holi Spirit i kum onoteni wanen namilokaha ti ailei waliko tenen lialun. Mewenae lalu hil, lalu kum he paho. Aile ape kumahe ka lawe kaha aile waliko ti pahakaha. ¹⁸ Tuahe na Holi Spirit neini amuto, nauna ti Moses kumahe ape i kakalauhi amuto.

¹⁹ Na kaha usi isiai pahakaha ti ailei waliko tenen lialun, kaha aile kilan saun lialun. Kaha aile saun lialun ti wawan hehin, sale sikisiki ti kaha pate hienain wanen ma kaha kum kongini uke isiai namilokaha ti sik.

²⁰ Kaha lotui waliko tenen kumahe Haeu. Kaha hina apekaha ti hiliai seilon. Kaha watakai teka liai ma kaha seilon tenen weli hilehil. Kaha lohaini teka liai. Kaha lengeini halialu seilon. Kaha lawe halepean. Kaha aile axi wasole seilon ma hukuma hani mewenae kapi teka namiloha onoteni kaha. ²¹ Lawe kaha un taxitaxia ape kaha amuke ailei saun tenen tenen ti pate lialun. Tin kaha aile saun lialun liai masin tesol ien. Nga kakane hawane amuto masin ti nga honewen amuto imat, teka seilon laha to ailele tesol saun ien, Haeu kum hani laha waliko ti i apeseni haniwen teka natun ma tin laha kum uke tonain kapin.

²² Tuahe na Holi Spirit kakapiti kaha seilon, kaha aile kilan saun solian. Kaha waheni Haeu ma seilon liai. Kaha hina amuam leili tiakaha. Lawe kaha eliel hasawiai wasole seilon. Ailan lengeakaha ma kaha kum aile lioi puasakahakal kawatan tunahi kaha. Lawe kaha huali seilon liai ma aile hasolia hani laha. Seilon liai hina namil xoxoan ti kaha. ²³ Lawe kaha aile aluinii hani seilon liai ma kaha waxaini tahiiai isiai pahakaha ti ailei saun lialun. Na seilon usi tesol saun ien, tap tenen nauna i po tieni halialu laha.

²⁴ Teteka kako hana hatapoen kako hani Jises Krais, kako talewen tehitokako hani saun lialun. Ien masin ka isiai pahakaha ti ailei saun lialun i mat ohoiwen Krais he kros. ²⁵ Aile ape na Holi Spirit kakapiti

kako, hani tatalewa i neiniakako. ²⁶ Kako kum hanasanas, kum hahahela seilon liai ma kako kum namiloi wawatakai laha na laha xoini kako ti tuahe na tenen.

6

Kako ailewa saun solian

¹ Tesol akikik ti Krais, na tel seilon ti leilomuto i aile tenen na saun lialun, amuto teteka amuto tu xoxox ti usiai aweisali Haeu, hasawi aka matainiwa i. Tuahe lepetawa uke puki amuto put ti saun lialun. ² Amuto he huhualawa ti kau i kawatan. Aweisal tewau ien amuto usi hahawane nauna ti Moses nake amuto aile usiusi saun tenen Krais pahan. ³ Na tel ti amuto namiloi ukek i seilon pate tuah tuahe i kumahe wanen masin ien, i puluti aliliake i.

⁴ Kum paxai kokolongeni amuto hari seilon liai. Paxai aliakewaa puki woumuto lehe amuto amuke waliko solian ti amuto ailewen. ⁵ Amuto tel tel aile aluinii hawanewa puki puasamoto.

⁶ Teka laha kaxi hahanau amuto sale puase Krais, amuto hualiwa laha waliko solian ti amuto hina.

⁷ Kum puluti aliliake amuto. Tap tel i halokeni tohongi uke Haeu. Waliko ti amuto aile, amuto uke hapoponowi kahun.

⁸ Na amuto usi isiai pahamuto ti ailei saun lialun, kahun amuto uke pate lialun. Na amuto aile usi aweisal ti Holi Spirit kapiti amuto, amuto uke tonain kapi Haeu ti tap tahi tapoan. ⁹ Kako kum nuunuxa ti ailei saun solian. Na kako kum aile lioi, Haeu kahui hasolia kako tetehu taun ti i kilamiven. ¹⁰ Aile ape na kako hina aweisal ti huhual, kako hualiwa lawe seilon. Tuahe kako huali poloseniwa teka akikikako ti Krais.

Tilai nauna ti Pol

¹¹ Kakain ti wexoan lalap ie puki tataiak naga Pol ti hakuiai nauna tetak.

¹² Teteka pahalahaa teka Ju liai paxai amukewa laha, laha lungesi amuto ti ailei saun ti kikilam ti kotiai uli walikoumuto. Laha aile ukek ien nake pahalahaa saliniai kawatan ti teka Ju liai axi teteka laha hahanau seilon ka Jises Krais mat he kros ti awaiakaha ti kawatan ti lialui woukaha.

¹³ Teteka laha usiusi ailei saun tenen ien kumahe laha usi hahatapo lawe nauna ti Moses. Pahalahaa amuto usiwa tenen saun ien lehe laha sameni aliake laha ti puli teka Ju liai ka amuto hong usiwen kakaialaha.

¹⁴ Tuahé ti puki nga, nga kum sameni tenen na waliko, mewenae ti Jises Krais tel Masiwi mat he kros ti ukei totonakako. Nake ti tenen ien, nga aile lioiwen saun tenen teka laha kum soh ti Krais ailele. Aile ape laha kum namiloi waxi waliko ti nga ukek pate tuah. ¹⁵ Haeu kum namiloi ukek seilon sawisawin na laha usi tenen saun ti kikilam ti kotiai uli walikoulaha ma na kumahe. Waliko lalap ti Haeu, kaha sohot hawanewa seilon haun ti usian. ¹⁶ Teteka laha aile ukek ien, Haeu tahane ma huali laha ape i hatona hasolia tialaha. Teteka seilon ien laha salan seilon tetan wanen.

¹⁷ Tiliak kakaiak, seilon kum axiaxi ulea nga kawatan pake mongohe mahe naxon he tinuk i kola ka nga tel unaui Jises wanen.

¹⁸ Tesol akikik ti Krais, nga kamei Jises Krais tel Masiwi ti kako ti aile hasolia hawane haniamuto. Salan wanen.

Epesus

Teik pasi Pol hani teka kahikahi Jises Krais ti Epesus Kakain ti haxewai teik pepa ie

Pol tel aposel tai teik pas ie hani teka kahikahi Krais ti tehu taon Epesus sai 32 ahang muhin ti Jises moih aliawa ape Haeu waxy i hani tesol tonan. Pol tai lokon i Romti i kakalabusake kaxi ahutiai meng solian ti Jises Krais. I hapuasa tel tuaun Tikikus atoheniai teik pasun hani teka kahikahi Krais ti Epesus. Ti lato ridaiwa, lato kului hani teka kahikahi Krais ti taon liai. Teka seilon laha toto Epesus namilolaha lalap wanen ti ukei kilan soxi ma lawe laha lotui waliko tenen kumahe salan Haeu. Ti imat Pol kaxi ahuhuti meng solian ti Jises Krais hani teka Ju ien ti telao Sabat (Apo 18:18-21). Ape imuh i to ahang tolulu ien hahanau teka seilon (Apo 19). Leili Epesus teka Ju ma teka kumahe Ju. Pol kak nanau laha ka Haeu pahan laha hatesol tu hukuma aluawa nake Jises Krais mat ukei kawatan ti lalui woi lawe seilon. Leili teik pas ie tin i kak kolongeni kako teka kahikahi Krais hani waliko tolulen. Kako masin tupui Krais ape i masin patukako. Kako masin ingi Haeu ape puki Krais se tehu kuku pate tuah ti tehu ing ien. Kako masin ka axoi Jises Krais nake kako pakata hahawane kapin.

¹ Nga Pol tel aposel ti Jises Krais ti puki namili Haeu. Teik pas ie hani amuto teka kahikahi Jises Krais ti Epesus, teka amuto hana hatapo tupuamuto ailei puase Haeu. Amuto unaui Krais wanen.

² Nga kamei Haeu tel Tamakako ma Jises Krais tel Masiwi ti kako lehe lalu aile kola lalape soliaialalu hani amuto ma hatona hasolia tiamuto.

Waliko solian Haeu hani hualiakako ti usian

³ Kako kak sameniwa Haeu. I tel Tame Jises Krais tel Masiwi ti kako. I hani kako hatesol waliko solian hualiakako ti usian nake kako pakata hetekie hani Krais. Tesol waliko solian ien puki hahaniai Haeu, kumahe ti itan ie. ⁴ Imat ti tehu pon itan ie tanoma, hoi liai i kilamiwen kako tetan. I pakateni hetekie kako hani Krais lehe kako sohot unauan wanen ape tap tel i pon tieniakako ti tenen na waliko. ⁵ Ti lalape

wawahen tetan, hoi Haeu namiloi peleiven i aile hasohotu kako natun nake ti Jises Krais. I aile ukek ien nake ti pahan ma i amuke ailean.

⁶ Aile ape kako kak sameniwa Haeu ti lalape soliaian i haniwen kako. I aile hasolia hawane hani kako nake ti puase Jises Krais tel pate i waheni, kumahe nake ti puasakako. ⁷ Haeu kola soliai lalape wawahen tetan ti Krais mat oxoxiakako ti kalabus ti saun lialun. Ape i oxoxi kako ti kawatan ti lialui woukako. ⁸ I hani hakila hawane kako waliko solian tenen tenen hetekie lawe anesoin ma namil tenen xewan.

⁹ Haeu hapuasa Krais ailei waliko ti i pahan. Ape i kola hatakei hani kako namilon ti teka seilon kum tioi ti imat. ¹⁰ Tenen namil ien, Haeu aile hapoponowi tataen ti i hukumin hetekie hatesol waliko ti patul ma itan ie hani hahitake Krais tel neinialaha. ¹¹ Haeu aile hatesol waliko ti i nanamiloi. Ti imat wanen, hoi liai i kilamiwen amite teka Ju tetan usiwa puki namilon. ¹² I aile ukek ien lehe amite teteka amite hong sohomu ti Krais imat, amite sameni hawane Haeu tel Masiwi pate tuah wanen. ¹³ Ape ape ie tin amuto teka kumahe Ju hongoen kakain salan, tenen meng solian ti sale Jises Krais awai amuto ti kawatan ti lalui woumoto. Tataen ti amuto hong sohoa ti Krais, Haeu hani amuto Holi Spirit masin ti i kakawen. I kilami ka amuto seilon tetan. ¹⁴ Holi Spirit ti leilokako se kikilam ka Haeu hani kako hatesol waliko ti i kakawen ma tin i oxoxi kako ti kalabus ti saun lialun nake kako se seilon tetan. Aile ape kako sameniwa Haeu tel Masiwi pate tuah wanen.

Pol lotu huali teka Epesus

¹⁵ Aile ape nga lotu huhuali amuto lilian ti nga honga xoxoi namilomuto ti tel Masiwi Jises ma wawahen ti amuto hani hatesol kahikahiin. ¹⁶ Nga kak kemuluk tatale hani Haeu nakemuto. Tapai na nga lotu, nga lotu huali amuto. ¹⁷ Nga lotu kamei Haeu tel Tamakako pate solian, i Haeu ti Jises Krais tel Masiwi ti kako. Nga kamei i ti haniamuto anesoin ma haxewai namilomuto lehe amuto tioi hawane i. ¹⁸ Nga kamei Haeu ti hei hawanei namilomuto lehe amuto tioi waliko ti pahan i hani amuto ti lalape soliaian. Lawe waliko ien Haeu apeseniwen haniai teka seilon tetan.

¹⁹ Tin nga kamei hetekie Haeu ti kola haniamuto kui pohenka i xoini hatapo lawe poh liai. Tetenen poh i pupuas leilokako teka kako soh ti Jises Krais. ²⁰ Tenen lalape

poh ien Haeu hapuasa ti hamoihai Jises Krais ma ti hanaian hani tesol tonan ti papan sai manau neiniae seilon.²¹ Jises se tel Masiwi tapein ti hatesol engel ma teka spirit liai. Awan pamu tuah ti lawe masiwi. Salan wanen i Masiwi ti hatesol waliko ti aope ie ma ti i luluainima imuh.²² Haeu hana lawe waliko hani hahitake Krais ape kilami i Masiwi tapein. Ape teteka laha soh tetan laha uke solian tetan.²³ Krais masin ka pati teka kahikahin ti kapitalaha ape teka kahikahin laha masin tupuan. Hatesol kuiai poh ti kako hina, kako kema ti Krais. Ape hatesol waliko i momoih hahitake ngahat tetan.

2

Lalape wawahen ti Haeu kako sohot seilon haun

¹ Teka kahikahin Jises Krais ti Epesus, ti imat amuto masin seilon tenen maten naake amuto kum hani Holi Spirit kapiti amuto. Amuto tahi kakai Haeu ma aile hakila saun lialun.² Ti lokon ien amuto aile usiusi waliko ti teka seilon lialun ailele. Amuto hong usi kakai Satan tel masiwi ti teka spirit lialun laha toto he maun. I tetel i pupus leili teka laha tale tehitolaha hani Haeu.³ Ti imat kako hatesol masin ien. Kako ailele waliko tenen ti tupuakako pahan. Kako usiusi lialui namilokako ma sisai pahakako ti ailei saun lialun. Ala i pon hawane kako uke kawatan ti lengen Haeu.

⁴ Tuahae Haeu xuhai tatahan ma i waheni hawane kako. ⁵ Aile ape ti kako tutuen hahitake saun lialun, Haeu aile kako sohot seilon haun ti usian. Ti lalape soliaian i awai kako ti kawatan ti lialui woukako kumahe naake ti soliai puasakako. ⁶ Masin ti Haeu hamoiha Krais, tin i hamoiha aliakte kako lehe kako sohot seilon haun ti usian. Hoi i namiloiwen i hatona kako kapi Krais ti tesol tonan ti neiniae seilon naake kako pakata hetekiewen kapi Jises Krais.⁷ I aile ukek ien lehe teka seilon ti imuh laha paxai tioi lalape soliaian ti i aile kola hani kako usiwa puase Jises Krais.

⁸ Salan wanen, ti lalape soliai Haeu, Krais awai amuto ti kawatan ti lialui woumuto naake ti xoxoi namilomuto tetan kumahe ti soliai puasamuto. ⁹ I aile ukek ien lehe tap tel ti kako sameni aliakte i.¹⁰ Puki Haeu aile kako sohot seilon haun ti usian ti i pakateni kako hani kapi Krais Jises lehe lawe kako aile tatale waliko solian ti Haeu namiloiwen haniakako ailean.

Krais hukumini hetekie teka Ju ma teka kumahe Ju

¹¹ Teteka ti amuto takahama ti teka kumahe Ju, namiloi paxai aliakemua amuto ti imat lokon amuto tai soh ti Krais. Teka Ju axai amuto seilon tenen kumahe ti Haeu naake amuto tai aile teik kikilam, ti kotiai uli walikoumuto ti usiai saun ti laha. Saun tenen ien tuahe ailelei seilon ape i kum pon hasawialaha.¹² Lokon ien amuto pate xauxaun ti Krais ma tin melal ti teka Ju, teteka Haeu kikiliken tetan. Amuto kumahe leili namil ti Haeu xinotiwen kapi laha ukei waliko ti i kakawen i hani laha. Amuto tua toto tehu pon itan ie, tap titioamuto ti Haeu ma tap waliko solian ti na amuto mon ukean.¹³ Ti imat amuto pate xauxaun ti Haeu, tuahe aope ie amuto sohotuen seilon ti Krais. Ti i mat kaui kawatan ti lialui woumuto, i haxohi amuto hani kapi Haeu.

¹⁴ Puki Krais i aile hasolia wasolakako, teka Ju ma teka kumahe Ju ape i hukumini hetekie kako. I xaxaweni tenen saun ti he wawatak i seselai kako.¹⁵ Ti matean i oxoxi kako ti hahitake nauna ma saun ti teka Ju lehe teka Ju ma teka kumahe Ju ati kako hukuma hetekie kapin. Ti aweisal tewau ien wasolakako i sawi.¹⁶ Ti matean he kros, i hukumini teka Ju ma teka kumahe Ju ape i aile hasolia wasolakako hani Haeu. Aile ape i hatapo xaxaweni tenen saun ti he wawatak wasolakako.¹⁷ Ti Krais he tehu pon itan ie, i kakaxi meng solian ti hasolai wsole seilon ma Haeu. I kaxi hahani amuto teka kumahe Ju ma amite teka Ju.¹⁸ Aope ati kako, teka Ju ma teka kumahe Ju, i pon kako kak sawi hani kapi Haeu tel Tamakako usiwa waliko Krais aile haniwen kako. Pake Holi Spirit tenenawe i huhuali kako.

Teka kahikahin Jises Krais masin ingi Haeu

¹⁹ Aile ape amuto teka kumahe Ju, amuto ape kumahe melal ti teka seilon ti Haeu, amuto hukuma hetekiewen. Amuto ape akikin ahuma ti Haeu.²⁰ Kako teka kahikahin Jises Krais, kako masin tehu ing hahatuhiai teka aposel ma teka kuluiai kakai Haeu. Tehu kuku pate tuah se puki alia Jises Krais.²¹ Masin hatesol soxi tini tehu ing i pakata hani tehu kuku tuah, tin masin pakata-iakako hani Krais. Tehu ing ien i sohot ingi Haeu na namilokako ti Krais xox ahe. Ape Haeu paxai ukek kako seilon sawisawin.²² Ti kako pakata hetekie hani kapi Krais, i hukumini kako hani kapi teka kahikahin liai lehe ti pohe Holi Spirit kako hatesol sohot hanowi tehu ing Haeu ingangai.

3

Puase Pol ti hualiai teka kumahe Ju

¹ Nga Pol kalabusake kaxiai meng solian ti Jises Krais hani amuto teka kumahe Ju. ² Amuto tioiwen ka ti lalape soliai Haeu i hani nga ailei tenen puasain tuah ien ti hualiamuto. ³ Nga tai hahongoen amuto ka Haeu hatakei haniwen nga namilon ti sale puase Krais, ti imat teka seilon kumtioi. ⁴ Na amuto ridai waliko ti nga taiwen, amuto xeu waliko ti titioak sale tenen namili Haeu ien. ⁵ Kemuk Haeu tai hatakei tenen namilon ien hani teka seilon. Tuah aope, Holi Spirit kola hatakei haniwen teka aposel ma teka kuluiai kakai Haeu.

⁶ Tenen namil ien masin, amuto teka kumahe Ju tin amuto uke hatesol waliko solian ti Haeu hani amite teka Ju. Haeu hukumini hetekiewen kako, aile ape waliko ti i kakawen i hani teka Ju seilon tetan, tin i hani teka kumahe Ju. Kako uke tesol waliko solian ien nake kako hong soh meng solian ti Jises Krais ape kako pakata hehetekie kapin. ⁷ Tenen meng solian ien nga kaxi ahuti hahani teka seilon. Ti lalape soliai Haeu i hani nga ailei tenen puasain ien ti kui pohen.

⁸ Kalak nga tel seilon naun ti lawe seilon ti Haeu, i hani nga kaxi haniai teka kumahe Ju sale lawe waliko solian ti Krais hahani teka seilon tetan. Tesol waliko solian ien se tuah wanen, seilon kum pon kolongenian. ⁹ Haeu kilamiwen nga ti nexe haxewai namilon ti sale puase Krais hani lawe seilon. Ti imat, lilian ti Haeu tanomi lawe waliko, i tai kola hahatakei tenen namilon ien hani laha.

¹⁰ Haeu aile ukek ien lehe aope ie i aile kola lalape anesoan hani teka engel ma teka spirit liai pate pohen laha toto he maun. I kola hani laha ka ti lalape anesoan i kapiti hasolia hatesol seilon tetan. ¹¹ Tesol waliko ien Haeu namiloiwen ti imat wanen ape i hapuasa Jises Krais tel Masiwi ti kako aile haponowian.

¹² Aope awesalukako hani Haeu ape hean. I pon kako matut kakanean pake kako pakata hehetekie kapi Krais ma namilokiko xoxoan tetan. ¹³ Aile ape nga kamei amuto kum hahakawata tiamuto nake ti waliko lialun laha aile hahani nga. Kawatan ti nga kakau se hualiamuto.

Pol lotu huali ulea teka Epesus

¹⁴ Nake ti tesol waliko ien nga lokuhu lotu hani tel Tamakako Haeu. ¹⁵ Hatesol seilon tenen tenen ti patul ma itan ie

kaha kema hanawain ma axakaha ti tel Tamakako Haeu. ¹⁶ Kilan waliko solian ti Haeu haniai teka seilon tetan. Aile ape nga kamei i lehe Holi Spirit hakui leilomuto ti kui pohen. ¹⁷ Nga kamei hetekie i lehe Krais puas hamalum leilomuto nake namilomuto xoxoan tetan. Tin nga kamei hetekie Haeu ti hualiamuto lehe amuto waheni tatale i ma teka seilon liai. Na amuto aile ukek ien, amuto masin tea pata i wahai hani leilam ma tehu ing laha hatuhi he pekeun ailan. ¹⁸ Na masin ien, amuto hetekie teka seilon liai ti Haeu, amuto paxai tioi lalape wawahen ti Haeu, tap tel i pon kolongenian. I xoini lawe waliko ma tin tap tahii tapoan. ¹⁹ Kalak tap tel i pon tioi hatapoi wawahen ti Krais, nga lotu huali amuto lehe amuto ilameni tioi wawahen tenen ien. Nga kamei Haeu hualiamuto ti usi hatapoi namilon ma woun lehe amuto sohot seilon sawisawin tapein hanowi i.

²⁰ Kako sameniwa Haeu! I pon hawane ailei lawe waliko ti kui pohen ti i pupuas leilokako. Ailean tetan i xoini hawane ti na kako kamei ma namiloi. ²¹ Kako sameniwa Haeu ti lawe waliko solian Krais ma teka kahikahin ailele lehe lawe seilon ti aope ie ma telok imuh laha paxai tioi lalape pohen ma soliaian. Kako sameni tatalewa i lian tehue. Salan wanen.

4

Ti axe Krais teka kahikahin hukuma hetekie

¹ Nga, tetel nga kalabusake ailei puase Krais, nga kakane hawane amuto, puas usi hawanewa saun ti Haeu pahan nake i kilamiwen amuto seilon tetan. ² Lawe Paxai kewak seilon liai pamu tuah ape aile aluin haniwa laha. Ti usiai saun ti wawahen, kum leng kokosea na seilon aile talesi amuto. ³ Holi Spirit i pakateni hetekiewen amuto. Aile ape puas elielwi akeni konginiai soliai wawahen wasolamuto lehe amuto hukuma hamalum tatale.

⁴ Kako teka kahikahin Krais masin tupui seilon tel. Holi Spirit tenenawie i pupuas leilokako. Waliko solian ti kako monomon ukean tin tenenawie nake kako hatesol Haeu kilamiwen tetan. ⁵ Telaweh Masiwi ti kako. Meng ti Jises Krais tin tenenawie kako soh ma baptais tenenawie kako hatesol uke ti hahitakan. ⁶ Tin masin telaweh Haeu Tamakako. I Masiwi ti kako hatesol, i pupuas leilokako ma i hapuasa kako hatesol ti ailei puasan.

⁷ Tuahé Krais hani kako anesoin tenen tenen ti ailei waliko usiwa namilon. ⁸ Masin ti he leili pepai Haeu i ukek,

“Muhin ti i xoiniwa teka laha hil pahoi i, i kalabusi laha.

I lúa hani tesol ti patul wanen ape i hani teka seilon anesoin tenen tenen

ti ailei waliko.” *(Ps 68:18)*

⁹ Namiloi paxiwa teik kakain ti i ukek, “I lúa hani tesol ti patul wanen.” Ien i kola ka imat Krais mos hanimu tesol pate itan ti tehu pon ie. ¹⁰ Ape tetel i mos hanima itan he tehu pon ie, i tin tetel i lúa hani patul wanen lehe i hapono hatapo lawe waliko.

¹¹ Krais tetel i hani anesoin ti puasain tenen tenen. Teka laha sohot aposel, teka laha kuluiai kakai Haeu, teka liao laha kaxiai meng solian ti Jises Krais ape teka laha sohot seilon ti ngahatiai teka kahikahi Krais ma hanaualaha. ¹² Teka seilon ien laha apeseniai teka seilon ti Haeu ailei puasan lehe laha hukuma hetekie hahitake Krais ape namilolaha tetan i xox ahe tatale. ¹³ Na kako soh ti tel Nati Haeu ma kako tioi hawane i, Haeu hukumini hawane kako ape kako sohot unauai Krais wanen. Na masin ien, kako usi hahawane namilon ma saun tenen i pahan ape kako sohot seilon tenen hanowi aliake i.

¹⁴ Na i sohot ukek ien, teka hanauai waliko tenen puputa laha kum puluti uke kako. Kako kumahe masin akaik kokol lehe namilokako i sohisohia hanowi koap tenen laman ma aupol tua towi ahuanu ma na kai pata tenen aupol tua paxeni lalolal. ¹⁵ Kako teka kahikahi Jises Krais, kako kaxiwa kakain salan hetekiewa wawanen. Ape lawe waliko ti kako aile, kako hanowi hawanewa ti Krais, tel masin ka pat ti kapitiakako. ¹⁶ Krais hukumini hetekie teka seilon tetan masin soxi tini seilon i pakata hetekie hani tupuan. Na soxi tini seilon teik i puas alua, tupuan hatel i kui. Tin masin kako teka kahikahi Jises Krais, na kako he wawahen ma aile aluinu puasakako, namilokako ti Haeu i xox tatale ape puasakako i kau anan.

Saun tetenen teka seilon ti Haeu usiwa

¹⁷ Nga kakane hawane amuto ti hahitake axe Jises Krais tel Masiwi, kum aile hahanowi teka seilon laha kum soh ti Haeu. Namilolaha tap pupuasan. ¹⁸ Ti lialui woulaha laha kum xeu waliko tenen salan ma laha pate xauxauna ti Haeu. Patulaha pate ailan ti ukei kakain tenen sawisawin, aile ape laha kum tioi aweisali Haeu. ¹⁹ Laha

kum hienake ailei saun lialun. Laha tua aile usiusi isiai pahe tupualaha ape laha aile tatale saun lialun tenen tenen.

²⁰ Ien se kumahe saun tenen amuto kewen sale Krais. ²¹ Nga tioi amuto hongoen sale puase Jises Krais ma laha hanauen amuto saun tenen sawisawin tetan. ²² Laha honewen amuto lioi xaxaweniai woumuto ti imat, saun tetenen ti imat amuto to aileti ti lialui isiai pahamuto. Saun tenen ien i hasele amuto ti usiai Haeu. ²³ Amuto haniwa Holy Spirit towiahu namilomuto ma tiamuto. ²⁴ I aile amuto sohot seilon haun lehe amuto unauan wanen ti ailei waliko tenen sawisawin masin ti kakaian hahanau amuto. Na masin ien, amuto sohot hanowialiakie i.

²⁵ Aile ape amuto lioi xaxaweniwa saun ti puputa. Lawe kakawa kakain salan naake Krais hukuminiwen amuto hahitakan.

²⁶ “Na amuto leng, lepetawa uke lengeamuto i itini amuto hani saun lialun.” *(Ps 4:4)* Kum hahapeti lialui lomuto he tiamuto.

²⁷ Kum hahani Satan kapiti hakalala amuto.

²⁸ Na amuto seilon ti xuxuina, aile li-oiwa. Amuto puas elielawa lehe amuto pon ngahati amuto ape amuto huali uke teka tap soxi. ²⁹ Kum hahapusa kakain tenen i halilu seilon. Ailewa kakain tenen solian ti i huali laha ma i hakui namilolaha ti Krais.

³⁰ Kum ailele waliko tenen i hatahanaea Holi Spirit ti Haeu. Haeu hani amuto Holi Spirit ti kikilam ka amuto tetan wanen. Ape i pupuas leilomuto atengi tataen ti Haeu oxoxi tamusuke amuto ti lawe waliko lialun.

³¹ Aile ape kum wiwiliki seilon, kum leng lalolal, lomuto kum lialilu. Kum kak hilehil, kum kak alului seilon ma kum aile hahalialu laha. Lioi xaxaweni hatapoa tesol saun ien. ³² Amuto aile hasolia haniwa seilon, lawe kolawa saun ti tatahan hani laha. Oxoxiwa seilon ti kawatan ti waliko tenen lialun laha aile hani amuto masin ti Haeu oxoxiwaen kako ti kawatan ti lialui woukako usiwa waliko ti Krais aile haniwen kako.

Krais haxewa hani kako saun tenen kako usiwa

¹ Amuto ape natu Haeu pate i waheni. Aile ape lawe amuto aile usiwa saun tenen i pahan. ² Amuto kolawa saun ti wawahen leili nanahiamuto masin ti Krais waheni kako ape i mat ti ukei totonakako. Haeu amuke tehu matean ti hualiakako masin ti i

amuke waliko solian na kako aile nake kako waheni i.

³ Amuto ape seilon ti Haeu. Kum ailele saun lialun ti wawan hehin, kum ailele sikisiki tenen ti hienain ma kum halepelep. Na amuto kum aile, tap wanen laha misahi amuto ti tesol waliko ien. ⁴ Amuto kum ailele kakain tenen ti hienain, kakain tenen tap pupuasan ma kakain lialun ti wawan hehin. Amuto kak nonoa kemulik hani Haeu ti lawe waliko solian i hahani amuto.

⁵ Amuto tioiwa, na amuto to ailele saun lialun ti wawan hehin ma sikisiki tenen ti hienain, amuto kum uke waliko solian ti Haeu kakawen i hani ma tap totonamuto kapi Krais ma Haeu. Tin masin na amuto to ailele saun ti halepelep nake seilon tenen ien masin ka i lolotui waliko ti i halepelep waxian. ⁶ Kum hahani laha puluti amuto sale tesol waliko ien ti kakain tenen kumahe sawisawin. Ti lengei Haeu i axi kawatan hani teka laha tahi kakaian ma to ailele tesol saun ien. ⁷ Kum papalahah kapi seilon tenen masin ien.

⁸ Imat, ti amuto to ailele tesol saun ien, amuto masin leili tilokoan. Tuah ape amuto pakata hetekiewen kapi Jises tel Masiwi, amuto ape he xewan. Aile ape amuto aile kolawa saun solian ti Haeu. ⁹ Nga kak ukek nake seilon ti he xewan laha aile waliko tenen mewenae solian, sawisawin ma salan.

¹⁰ Amuto tohongi elielwa upiai waliko tenen Haeu tel Masiwi waheni na amuto aile. ¹¹ Kum huhukuma kapi teka laha ailele puasain ti tilokoan, saun tenen tap pupuasan. Hualiwa laha usiai aweisal solian lehe laha paxai tioi lialui woulaha.

¹² Waliko tenen lialun laha aile mumuneni, pate hahien kalak tuahe kaxian. ¹³ Tuahe kakain salan ti Haeu i kola hatakei lialui tesol waliko ien masin ti xewan i haxewa waliko ti he tilokoan. ¹⁴ Aile ape ti he xewan lawe waliko i sohot kouke. Masin ti leili pepai Haeu i ukek,

“Haiwa, teka masin ka amuto mamatih.

Xahatawa, teka masin ka amuto maten ti woumuto
ti lehe Krais i kapiti amuto ti he xewan.”

Haniwa Holi Spirit kapiti kako

¹⁵ Kamipetiwa sale nanahiamuto. Kum hanowи seilon tenen tap namilon. Namilmuto kewa solian ma xewan. ¹⁶ Ie se taun ti seilon to ailele saun tenen pate lialun. Aile ape amuto hapuasa aluiniva teik taun ti amuto hina ailei saun solian.

¹⁷ Kum tua ailele waliko hanowи seilon tenen

tap namilon, tohongi elielwa upiai waliko ti Haeu tel Masiwi pahan amuto ailewa.

¹⁸ Kum un taxitaxia nake i itini amuto ti ailei saun lialun. Haniwa Holi Spirit puas leilomuto lehe i kapiti amuto. ¹⁹ Na amuto apuhu hetekie, pakuiwa pak tenen tenen hani Haeu ti hakuiamuto. Pak amuu hawanewa ti leili atermuto. ²⁰ Ti lawe waliko kak kemulik haniwa Haeu tel Tamakako usiwa waliko ti Jises Krais tel Masiwi aile haniwen kako.

Nauna ti hanauи hahunatun

²¹ Amuto he huhualawa ma he hongohon-goa kakaiamuto tel tel. I kola ka amuto paxai tioi masiwai Jises Krais, tetel amuto hong usiusi.

²² Amuto hehin, hong usiwa axoamuto. I kola ka amuto hong usi Haeu tel Masiwi. ²³ Wawan i masin ka pat ti neiniai tel axoan masin Krais i pat ti neiniai teka kahikahin ape laha masin tupuan. Krais i tetel awiakako ti kawatan ti lialui woukako. ²⁴ Masin ti teka kahikahin Krais hong usiusi kakaian, tin masin teka hehin lawe hong usiwa kakai axoamuto.

²⁵ Amuto wawan, waheni hawanewa axoamuto masin ti Krais waheni hawane kaka teka kahikahin ape i mat ti ukei totonakako. ²⁶ I mat lehe kako sohot seilon tetan. Ti kako hong soh kakai Haeu ape kake uke baptais, Krais xaxaweni lialui woukako ape i aile kake sohot seilon haun ti usian. ²⁷ Pahan teka kahikahin paxaialaha soliaian tel hehin na i sal, tap teik wikiwikin ma lolo, tinun tanenan solian wanen. Pahan laha hani hatapoa i tupualaha ape tap tel i pon tienialaha ti tenen na waliko. ²⁸ Masin ti Krais waheni teka kahikahin, amuto wawan waheniwa axoamuto hanowi ti amuto waheni aliakte amuto. Tel wawan na i waheni tel axoan, tin i waheni aliakte i. ²⁹ Tap tel i watakai aliakte i, mewenae i ngahati aluiniva masin ti Krais ngahati aluiniva kaka teka kahikahin. ³⁰ Kako masin tupuan ti i ngangahati.

³¹ Masin ti leili pepai Haeu i ukek, “Tel wawan i salili taman tinan ape i hukuma hetekie hani tel axoan lehe lalu sohot hanowi ka seilon tel.” *(Gen 2:24)* ³² Teik kakain ien hahanau kako waliko tenen pate tuah sale hukumai Krais ma teka kahikahin. ³³ Tin i hahanau kako sale wawanen. Amuto wawan waheni hawanewa axoamuto hanowi ti amuto waheni aliakte amuto ape amuto hehin kolawa lomuto haniwa axoamuto.

6

Nauna ti hanau i akaik ma taman

¹ Amuto akaik, amuto hahitake Krais tel Masiwi. Aile ape hong usiwa kakai tamamuto ma tinamuto nake tenen saun ien i saun solian ti ala amuto ailewa. ²Haeu hani kako tenen nauna i ukek, "Hong tamaniwa kakai tamam ma tinam ape aile hasolia haniwa lalu." Tetenan nauna ien Haeu hani kako hetekie kakain i ukek, ³"Na amuto aile usi, amuto tunahi tonain solian ma tin amuto to welu he tehu pon ie." (Exod 20:12)

⁴ Amuto teka tame akaik, kum aile hahalenge natumuto. Amuto ngahati aluiniva ma hanau laha lehe laha lap hetekie saun ti Krais tel Masiwi.

Nauna ti hanau i masiwi ma unauan

⁵ Amuto teka unaui seilon, hong usi hawanewa teka masiwi ti amuto ti tehu pon ie. Aile aluinai hawanewa puasalato masin na amuto ailele puase Krais. ⁶Amuto puas aluawa kumahe mewenae na lato papaxai amuto lehe lato amuke. Ti leili tiamuto, ailewa waliko tetenen Haeu pahan nake amuto unaui Krais. ⁷Hana hatapoa tupuamuto ailei puasain hanowiwa ka amuto aile hahani Krais tel Masiwi kumahe tuahae seilon. ⁸Nameniwa ka Haeu tel Masiwi i kahui kako tel ti soliai puasakako, kako unaui seilon ma na kumahe.

⁹ Amuto teka masiwi, aile aluinai haniwa teka unauamuto. Kum aile hahamatau laha. Nameniwa ka ati amuto hahitake Masiwi telaweh Haeu, tetel i kum paxai nenexi seilon.

Pa ti Haeu hani hualia koko

¹⁰ Tiliao nauna tetak, tu xox tatalewa kapi Krais tel Masiwi lehe kui pohen i hakui amuto. ¹¹Masin tel seilon ti hile i hana hatapo waliko ti hilehile, tin masin kako uke hatapoa waliko ti Haeu haniwen hakuiakako ti hil pahoiai puase Satan, tel pulutiae seilon. ¹²Kumahe kako hihilei seilon, kako haeliel hawanewa hil pahoiai spirit lialun ma teka masiwi ti laha, teteka laha toto he maun neini halialui teka seilon ti tehu pon ie.

¹³ Aile ape hapuasa hatapoa waliko ti Haeu haniwen hakuiamuto ti hil pahoiai Satan lehe na kawatan tunahi amuto, i kum xoiri amuto nake amuto tu xox tatale ti Krais. Ape na amuto aile hatapoa puasamuto, tin amuto tu xoxox.

¹⁴Apeasawa! Akeni konginiwa kakain salan ti Haeu hanowi teik tah ti konginiai luhumuto. Lawe ailewa saun tenen sawisawin

lehe i awai amuto ti totohong ti Satan masin teik samen ti awaiai patanaweh seilon taun ti hile. ¹⁵Amuto soh tatalewa meng solian ti Jises Krais. I hatona hasolia tiamuto lehe amuto tu xox hawane masin tel seilon ti i hana su taun ti hile. ¹⁶Amuto soh tatalewa ti Jises Krais lehe i awai amuto ti Satan hanowi teik titieh i awai tel seilon ti inah leili hilehile. ¹⁷Amuto soh eliel hawanewa ka Haeu awaiwen amuto ti kawatan ti lialui woumuto masin tel seilon i hana tehu kapu samen awaiai patun taun ti hile. Ape hapuasawa kakai Haeu. I masin tea ngol weluwelun ti hile Holi Spirit haniwen paumuto. Aile ape amuto hapuasawa ti hil pahoiai Satan.

¹⁸Lawe lotu tatale haniwa Haeu masin ti Holi Spirit kakapiti amuto. Kameiwa Haeu hualiamuto ti lawe waliko. Na amuto lotu, hana hatapoa namilomuto haniwa Haeu. Lotu hualihu hatesol seilon ti Haeu ma kum lotu lilioa.

¹⁹Ape tin lotu hualima nga lehe Haeu hani nga kakain tenen ti na nga kak taen nga kaxi matuke haxewai meng solian ti Jises Krais hani teka seilon. Ti imat laha tai xeu tenen meng ien. ²⁰Haeu kilamiwen nga kaxiai meng solian ti Jises ape nga kalabusake tenen ien. Aile ape lotu hualima nga lehe Haeu hakui nga kaxi matuke tatalei meng solian ien masin ti i pahan.

Tiliao kakai Pol

²¹Tikikus tel soliai akikikako ti Krais, i kaxi hani amuto sale puasak lehe amuto tioi lawe waliko ti nga ailele. I tin i hani hahatapo tupuan ailei puase Krais. ²²Nga talo i hani kapimuto ti hahongoamuto sale pupuasamite ma tin haxoxoi namilomuto ti Krais.

²³Nga kamei Haeu tel Tamakako ma tel Masiwi Jises Krais lehe lalu hatona hasolia tiamuto ma hakui saun ti wawahen hetekie haxoxoi namilomuto ti Haeu. ²⁴Nga kamei hetekie Haeu aile hasolia hawane haniwa hatesol teka laha waheni Jises Krais tel Masiwi ti kako, wawahen ti tap tahai tapoan.

Pilipai

Teik pasi Pol hani teka kahikahi Jises Krais ti Pilipai

Kakain ti haxewai teik pepa ie

Pol tel aposel tai teik pas ie hani teka kahikahi Krais ti tehu taon Pilipai sai 32 ahang muhin ti Jises moih aliawa ape Haeu waxy i hani tesol tonan. Ti imat Pol i Pilipai, i kakaxi meng solian ti Jises Krais ape kilan seilon soh ti Jises. Tin i kaxi sawateni tenen meng ien hani teka seilon ti tesol tesol. Nake ti tenen ien laha hana i hani leili kakabus ti tehu taon Rom. Tuah i amuam tutuen ape i hone teka Pilipai ka mewenae laha amuamua nake ti waliko tenen Jises Krais aile haniwen lato. Pol kak kemulik hani teka kahikahi Krais ti Pilipai ti waliko lato hakau usima Epaprodaitus ti hualian i Pol. Pol hone lato ka kum usiusi teka laha neini hakalala seilon ti meng salan ti Jises Krais. Tin i hakui lato haxoxo tatalewa namilolato ti Jises Krais ma aile usiwa saun tenen Jises hahanau ma kolawen.

¹ Teik pas ie ti Pol ma Timoti hua unaui Jises Krais hani amuto hatesol teka kahikahi Jises Krais ti Pilipai hetekie teka maswi ti amuto ma teka hualialato.

² Nga kamei Haeu tel Tamakako ma Jises Krais tel Masiwi lehe lalu aile kola lalape soliaialalu hani amuto ma hatona hasolia tihamuto.

Pol lotu huali teka Pilipai

³ Na nga namiloiwa amuto, lawe nga kak kemulik hani Haeu tel Masiwi tetak. ⁴⁻⁵ Lawe lotu tetak ti hualiamuto hatesol, nga lotu hehetekie amuam nake huhual ti amuto hahani nga ti kaxi ahutiae meng solian ti Jises Krais se lilian ti amuto hong sohoa tenen meng ien hanima taen ape ie. ⁶ Ape nga soh hawane ka Haeu, tel i hutuiwen puasain solian leilomuto, i aile tatale atengi tilian, tataen ti Jises Krais aliama.

⁷ Nga teo nanamilo amuto ukek ien nake amuto tone atek wanen. Amuto tin masin nga, amuto ukewen solian ti Haeu ti nga leili kakabus ie ma ti nga melal kak papahoii teka laha kak wawatakai meng solian ti Jises Krais. Ape nga kaxi haxewa hani laha ka tenen meng ien se salan wanen. ⁸ Haeu tioi

ka pahak wanen nga paxai amuto nake nga waheni hawane amuto hanowi ti Jises Krais.

⁹ Nga kamei Haeu lehe wawahen ti wasolamuto i lap ahe tatale hetekie anesoamuto ti Haeu ma lehe paxai tioi aluiniai waliko.

¹⁰ Na i sohot ukek ieri, amuto tioi hawane waliko tenen tuah ma waliko tenen solian ti na amuto aile, ape amuto sohot seilon sawisawin ma tap tel i pon tieniamuto atengi tataen ti aliai Krais. ¹¹ Ape hetekie huhual ti Jises Krais amuto pon hasohotui kilan saun solian ti hasolai axe Haeu ma samenian.

Pol amuam ti laha kaxi ahuti meng solian ti Jises

¹² Tesol akikik ti Krais, pahak amuto tioiwa, waliko tenen i sohot hahani nga pate i huali sawateniai meng solian ti Jises Krais. ¹³ Aile ape hatesol seilon ie hetekie teka peteniai ingi teka masiwi ti Rom laha tioi ka nga kakalabus ie nake nga ailele puase Krais. ¹⁴ Nake ti xoxoi namilok ti Haeu kalak nga kakalabus, kilan teka kahikahi Krais kaxi mamatuwe menge Haeu, tap laha mamatia.

¹⁵ Salan teka laha kakaxi meng solian ti Jises nake pahahaha laha pamu tuah tetak ma xoiniak. Tuah teka liai laha ailele ti soliai namilolaha. ¹⁶ Teteka ien laha kakaxi meng solian ti Jises Krais nake laha waheni hawane nga ma laha tioi ka nga kakalabus ie nake ti kak pahoiai teka laha kak wawatakai tenen meng ien. ¹⁷ Tuah teka liai laha kakaxi menge Krais kumahe ti soliai namilolaha. Pahahaha seilon tua hong usiwa ma sameniwa laha. Laha sokok puasalahia ien i axi palahi aheheke nga kawatan ti nga leili kakabus. ¹⁸ Tuah nga kum namiloi waxy tesol waliko ien. I kum kongini uke kaxiai meng solian ti Krais. Nga amuam ti laha kaxi ahuhuti puase Krais na laha ailele ti soliai namilolaha ma na kumahe. Salan wanen nga amuam tatale.

¹⁹ Nga tioi ka Haeu awai nga ti waliko lialun nake amuto lotu huhualti nga ma Spirit ti Jises Krais lawe i hahakui nga.

Pol se unaui Krais wanen

²⁰ Ti xoxoi namilok nga tohongi eliel hawane nga kum aile waliko tenen i hahiena nga. Pahak wanen nga kaxi matuke tatale puase Krais lehe hatesol waliko nga aile ti nga moihin tutuen i haxawa axan ape kalak na nga mat, sale mateak tin i haxawa axan. ²¹ Solian ti nga moihin nake nga se unaui Krais tuah pamu

soliaian ti na nga mat nake ape nga to hawane kapin.²² Na nga to welu ahe he tehu pon ie, nga aile hakila puasain solian ti Krais. Nga kum tioi tetenen pamu nga waheni, tiliwen nga moihin ka na nga mat.²³ Namilok i uke huonen. Pahak wanen nga salili tehu pon ie lehe nga to hawane kapi Krais nake se pamu solian tetak.²⁴ Tuahe pamu solian ti amuto na nga tiliwen ie.

²⁵ Namilok xoxoan wanen nga tiliwen. Pate solian ti nga puas tatale wasolamuto ti hualiamuto lehe amuto hina amuam nake xoxoi namilomuto ti Krais i kui ahe.²⁶ Na masin nga tahia alia haniwa kapimuto, amuto sameni hawane Jises Krais ti lawe waliko i aile haniwen nga.

Pol hakui teka Pilipai ti tu xox tatalewa ti Krais

²⁷ Ape waliko tuah tetenen, sale woumuto kewak ka i usi hahawane waliko ti meng solian ti Krais hahanau nake amuto seilon ti Haeu. Na amuto aile ukek ien, kalak na nga kapimuto ma na nga tua hongohong sale pupuasamoto, nga tioi ka amuto hukuma hetekie hani Jises Krais ti namil teikawe ma amuto haeliel pahoia teka laha wawatakai meng solian tetan.²⁸ Amuto kum maamata teka laha hil pahoii amuto. Na amuto tu xox eliel ti Krais, ien se kolakol ka imuh Haeu axi laha kawatan ape i hani amuto tonain kapin ti tap tahi tapoan.²⁹ Tuahe Haeu hapohea amuto kumahe mewenae lehe amuto soh ti Krais, tin lehe amuto kau hetekie moloan ma kawatan nake amuto kahikihiin.³⁰ Kawatan ti ape amuto tutunahi se masin ti imat i tutunahi nga. Ape amuto tioi ka aope ie nga kakau tutuen tenen kawatan ien.

2

Teheniwa kako hanowi ti Krais teheni i

¹ Ti amuto hukuma hetekie hani kapi Krais, kaie i hakui amuto? Kaie wawahen tetan i hamatua amuto? Kaie amuto pakata hahani Holi Spirit? Kaie Krais kola hani amuto soliai tatahan tetan?² Na masin ien, kewa namilomuto teikawe, amuto he wawahenawa ma puas hetekiewa ti namil tenenaw. Na amuto aile tesol waliko ien, i hamuamua hawane nga.

³ Kum namiloi aliliakte mewenae amuto ma kum ailele waliko ti lehe seilon sameni amuto. Kum haxawa aliliakte amuto, namiloi kewak seilon liai pamu tuah ti amuto.⁴ Namiloiwa ailei waliko solian hani

seilon liai kumahe mewenae na solian ti amuto.

⁵ Ti lawe namilomuto, usi hatapo hawanewa namil Jises Krais.

⁶ Kalak i se Haeu,
i kum aka kongini tesol totone Haeu.

⁷ I aka lioi soliai totone Haeu
ape i teheni i hanowi tel tuahe unaui seilon lokon ti i sohotuma seilon.

⁸ Ti i he tehu pon ie, i teheni hawane i ti hong usiai namili tel Taman Haeu hani taen ti matean he kros hanowi seilon tenen woun lialun.

⁹ Aile ape Haeu haxawa hawane i
ape hana i pamu tuah ti lawe seilon.

¹⁰ Haeu aile ukek ien lehe teka patul he tonan, teka ti itan ie ma teka maten laha hatesol lokuha hani Jises Krais ti samenian.

¹¹ Ape lawe seilon kaxi hei ka
Jises Krais i tel Masiwi tapein.
Ti laha aile ukek ien,
se laha hahaxawa axe Haeu tel Taman.

Kako masin xewan ti haxewai seilon

¹² Tesol soliai akikik ti Krais, nga tioi lawe amuto hong usi Haeu. Aile ape amuto puas aka matainiwa ti ailei hatesol waliko solian hanowi seilon tenen Haeu awawai ti kawatan ti lialui woulaha. Amuto aile tatalewa kumahe mewenae na nga kapimuto, puas eliel ahewa kalak na nga tap.¹³ Puki Haeu pupuas leilomuto. I hanamiloa ma hapohea amuto ti ailei wa liko tenen i amuke.

¹⁴ Ti lawe puasain na amuto aile, kum aile hakikila kakain ma kum kak hapatapat.

¹⁵ Ti lawe waliko na amuto aile, hanowia ti teka seilon sawisawin lehe tap tel pon tieni amuto ti tenen na waliko. Amuto se nat Haeu, aile ape nahih alua hawanewa wasole teka seilon woulaha pate lialun lehe amuto masin xewan ti haxewaialaha hanowi kamaai kohot i haxewa maun.¹⁶ Soh elielia ma kaxi haniwa seilon liai meng ti sale ukei tonain kapi Haeu ti tap tahi tapoan lehe nga amuam hawane tataen ti Krais aliamna kake puasak ti nga ailele wasolamuto i tai xoina.¹⁷ Ape nga amuam akati amuto, kalak na nga mat ti kaui kawatan nake ti kaxiai meng solian ti Jises masin ti amuto kau kawatan nake ti hong sohoi tenen meng ien. Nga amuam nake kawatan ti nga kakau se hualiamuto.¹⁸ Amuto tin amuam aka tima nga.

Namili Pol ti taloi Timoti hani Pilipai

¹⁹ Na masin Jises tel Masiwi pahan, kumahe kuen ape nga talo Timoti hani kapimuto. Ti na i aliamia i hamuamua nga na i kaxi hani nga waliko solian ti i sosohot wasolamuto. ²⁰ Tap tel liai kapik ie i namiloi eliel hawane sale totonomuto hanowi ti Timoti. ²¹ Teka liai lawe laha namiloi aliake puki laha kumahe laha nanamiloi waliko ti Jises Krais pahan. ²² Tuahé amuto tioi ka Timoti kola hawanewen ka i tel unaui Krais wanen. I pupuas kapik kaxiai meng solian ti Jises. I huali nga hanowi tel akaik huali tel taman. ²³ Namilok wanen hakaui Timoti hani kapimuto tataen na nga tioiwa waliko tenen na i sohot hani nga ie. ²⁴ Nga soh hawane ka tel Masiwi tin pahan nga sohot paxai amuto. Kumahe kuen ape nga sohotua.

Pol hakau aliake Epaprodaitus hani kapi teka Pilipai

²⁵ Tuahé nga nanamiloi na imat nga hakau aliake hanimu amuto Epaprodaitus, tetel amuto taloma hualik ti tenen na nga tae. I tel akikik ti Krais, i puas pakata hahawane kapik ma i huhuali nga ti kak pahoiai teka laha kak wawatakai meng solian ti Jises Krais. ²⁶ Pahan wanen i alia hani tesol puki tonan ti paxaiamuto. Tian kawat hawane nake amuto hongoen ka i tinun. ²⁷ Salan wanen i tinun, sikole i mat. Tuahé Haeu kola hani i tatahan tetan ma tin hetekie hani nga nake na i mat haselawen i palahi aheke kawatan tetak.

²⁸ Aile ape namilok wanen ti hakau aliakean lehe amuto amuam alia na amuto paxaiwa i. Tenen ien i hapau lalape namilok ti amuto. ²⁹ Waxi auniwa i hetekie amuam nake i tel akikimuto ti Krais. Aile hasolia haniwa i ma teteka seilon laha masin i. ³⁰ I hani hatapo tupuan ailei puase Krais kalak kilan kawatan ape sikole i mat ti i huhuali nga waliko ti amuto kum aile uke nake amuto xauxaun tetak.

3

Waliko ti Krais aile pamu tuah ti lawe waliko

¹ Tesol akikik ti Krais, amuamua nake amuto pakata hehetekie hani Jises tel Masiwi. Nga kum waxi na nga to kaxi tuhi hahani amuto waliko ti imat nga kaxiwen. Nga ailele ti solian ti amuto.

² Lepeta hawanewa teka seilon laha lungei amuto ti ailei teik kikilam ti kotia uli walikoumuto ti usiai saun ti teka Ju.

Puasalahate pate lialun, i kum kau anan. Laha masin teka pahalaha koti xaxawenai soxi tini seilon. Kumahe salan laha soh hawane ti Jises Krais. ³ Se kako teteka seilon ti Haeu wanen, kumahe lato. Kako teteka ti Holi Spirit kakapiti ti lotuiai Haeu. Kumahe ka kako sameni aliake kako ti soliai puasakako. Kako kum kak ukekek kako sawisawin na koko aile saun solian. Kako se sameniai Jises Krais ti waliko i aile haniwen kako.

⁴ Puki nga, hina salangawan na nga sameni puasak, pamu i xoini teka liai. ⁵ Nga tel akiki Ju wanen, tel ti teka Israel. Nga nakuama ti Benjamin tel natu Jekop. Muhi ngain tepanim toluthu ti takahak, laha aile hani nga teik kikilam ti kotiai uli walikouk ti usiai saun ti teka Ju. Tamak tinak lalu Ju wanen ma nga se tin Ju wanen. Ti imat nga usi hatapo hahawane hatesol nauna ma saun ti teka Ju nake nga tel Parisi. ⁶ Namilok i eliel hawane ti ailei puase Haeu. Ti xoxoi namilok ien nga aile halialu teka kahikahi Krais nake nga sokok i hamuamua Haeu. Tap tel pon tieniak ti tenen na waliko nake nga usi hatapo hahawane hatesol nauna ma saun ti teka Ju.

⁷ Tuahé tesol waliko kemuk nga sokok pate tuah tetak, aope ie ape nga tioiwen ka tap pupuasan nake waliko ti Jises Krais aile i pamu tuah. ⁸ Salan, lawe waliko tap pupuasan na nga kolongeni hani solian ti tioiai Jises Krais tel Masiwi tetak. Nga paxai ukek waliko ien tuahé masin masiap. Nake ti Jises Krais, nga lioi hatapo tesol waliko ien lehe nga sohot hawane seilon tetan ape nga pakata xox hawane hani kapin. ⁹ Haeu namiloi ukek nga seilon sawisawin kumahe nake nga usi hahatapo nauna ma saun ti teka Ju tuahé nake ti xoxoi namilok ti Krais. Haeu namiloi ukek wasolakako hani kapin i sawi mewenae na koko soh hawane ti Krais. ¹⁰ Pahak wanen nga tioi hawane Krais. Pahak tenen pohe Haeu ti i hamoiba aliake Krais i puas hawane leilos ma tin nga tuai hawane Jises ti kaui kawatan hani tataen ti mateak. ¹¹ Ti aweisal tewau ien nga soh ka Haeu xahateni aliake nga ti mateak.

Tu xox tatalewa lehe kako sohot seilon tenen Krais pahan

¹² Kumahe nga ukek nga waxainiwen ailei tesol waliko ien ma na nga hoi liai seilon tenen sawisawin wanen. Tuahé nga eliel hawane lehe nga sohot seilon tenen ti Jises Krais pahan nake i kilami nga seilon tetan.

¹³ Tesol akikik ti Krais, nga kum namilo i ukek ka nga waxainiwen. Tuahé nga hana hatapo hawane kuik ti ailei waliko tetenen, nga kum namilo i waxy waliko ti i tamusuen, nga hana hatapo tupuak hani ailei waliko ti tutuen nga tai aisle. ¹⁴ Aile ape nga puas eliel tatale atengi tataen Haeu hani nga kahuk, ti i waxy nga hani tesol tonan nake nga pakata xox kapi Jises Krais.

¹⁵ Kako teteka kahikahi Jises wanen, kako hana hatapoa namilokako ti usiai waliko ti nga kakak. Na teka ti amuto laha namilo i watakai kakaiak, pake Haeu haxewa namilolah. ¹⁶ Tuahé waliko tuah teten, kako aile tatalewa waliko ti kako tioi ka Haeu pahan.

¹⁷ Tesol akikik ti Krais, amuto hatesol aile usiwa pupuasak ma tin paxai ukeneva saun ti teka laha aile usiusi woumite. ¹⁸ Tuahé kilan teka woulaha kola ka laha watakai meng ti matei Jises Krais he kros. Nga kaxi hakila haniwen amuto tenen ien ti imat ape nga kaxi ulei hani amuto hetekie lalape tatahan tetak. ¹⁹ Pahalahé mewennea hamuamui tupualaha. Laha sameni aliake laha ti ailei waliko tenen ala laha hienake. Namilolahé mewenae toi waliko ti tehu pon ie. Laha pake kane tesol ti kaui kawatan tap tahi tapoan. Tetesol ien Haeu aile halialu tamusuke laha. ²⁰ Tuahé hanima kako, totonakako wanen se tesol tone Haeu. Ape kako mon atetengi aliai Jises Krais tel Masiwi i toto ien. I tetel awaiakako ti kawatan ti lialui woukako. ²¹ I hina poh ti hana hatapoi lawe waliko hani hahitakan. Ape i hapuasa tenen poh ien ti sohiai tupuakako tenen aneso i lialu lehe kako uke tupuakako haun tenen tap tahi lialuan masin alia puki tupuan ti Haeu xahateni aliake i ti matean.

4

¹ Tesol soliai akikik ti Krais, tu xox tatalewa usiai Jises tel Masiwi. Nga waheni amuto ma pahak wanen paxiamuto. Nga sameni ma amuke hawane amuto nake so-liai puasamuto i kola ani pupuasak.

Nauna ti Pol

² Eudia ma Sintike, nga kamei eliel amulu ti hasawiai wasolamulu ma puas hetekie hanowiwia tuan solian nake ati amulu ti Krais tel Masiwi. ³ Ape nga kamei o, tel puas akatak wanen, hualwi lalu nake lalu puas eliel hahawane kapik ti kaxiai meng solian ti Jises Krais. Tin lalu puas akatiwen Klemen ma teka tuauk liai, teteka Haeu

hana konginiwen axalaha ti ukei tonain kapin ti tap tahi tapoan.

⁴ Lawe amuto amuamua nake ti Jises tel Masiwi. Nga kakane ulea amuto, amuam hawanewa! ⁵ Aile aluiniwa lawe seilon. Nameniwa ka Jises tel Masiwi i lawe xohixohin kapimuto.

⁶ Kum namilo i hahakila tenen na waliko, tuahé leili lotu ti amuto, kameiwa Haeu waliko tenen ti amuto tae ma kak kemulik haniwa i ti lawe waliko. ⁷ Na amuto aile ukek ien, Haeu hatona hasolia tiamuto. Ien se tuah wanen, soliaian seilon kum pon namilo i usian. Na masin kawatan tunahi amuto, i hakui namilomuto ma tiamuto nake amuto seilon ti Jises Krais.

⁸ Tesol akikik ti Krais, pahak amuto hana hatapoa namilomuto ti tesol waliko ie, waliko tenen salan, sawisawin ma solian, waliko tenen Haeu paxai ukek tuah ma saun tenen pate solian ti seilon paxai waheni ma sameni. ⁹ Ape aile usiwa waliko ti nga hananau amuto ti lawe kakaiak ma pupuasak. Na amuto aile ukek ien, Haeu, tel hatona hasoliai tiakako, i lawe kapimuto.

Pol kak kemulik hani teka Pilipai

¹⁰ Nga amuam hawane ma nga haxawa axe Jises tel Masiwi ti huhual ti amuto. I kola ka amuto nanamilo tutuen nga. Nga tioi ka lawe amuto nanameni nga tuahe ti imat amuto kum tunah tehu taun ti hualik.

¹¹ Kumahe nga kak ukek ien nake nga tae ti tenen na waliko. Nga ape maloan, kalak solian ma na lialun tunahi nga, nga amuam tatale. ¹² Hahuonen i tunahiwen nga, hina taun ti nga kilan soxi ma hina nga tae. Nga hanauen sale aweisal ti nga to amuam tatale, kalak nga hina an, soxi ma na tap.

¹³ Nga pon waxainiai lawe waliko nake Krais hakui nga. ¹⁴ Tuahé pate solian wanen ti amuto huali nga ti kawatan tetak.

¹⁵ Masin ti amuto teka Pilipai tioi, lokon ti uli amuto hongoa meng solian ti Jises ti nga lula salili Masedonia texux xuxumuto, tap teka kahikahi Jises liai hualwieng nga. Mewenae amuto hualwieng nga. ¹⁶ Ape ti nga tutuen Tesalonika, imat ti nga lula salili Masedonia, kumahe tehue hualwi amuto hakau hanima nga. ¹⁷ Kumahe nga kak ukek lehe amuto axi nga waliko. Pahak wanen Haeu aile hasolia haniwa amuto ti soliai puasamuto.

¹⁸Ti aope ie nga tapan wanen lawe waliko. Nga kewen huhual ti amuto haniima Epa-prodaitus haniak ape i akulaiwen waliko ti pahak. Haeu amuke hawane saun ti amuto aile hahani nga. Ien masin waliko tenen poun pate solian ti teka seilon kau hani Haeu. ¹⁹Ape Haeu tel Masiwi tetak tin i hapono hatapo amuto kilan waliko solian tetan nake amuto papakata kapi Jises Krais.

²⁰Kako haxawawa Haeu tel Tamakako lian tehue. Salan wanen.

Tiliiai kakai Pol

²¹Amuam tetak haniwa hatesol kahikahi Jises Krais ti Pilipai. Tesol akikikako ti Krais kapik tin lato hakaua amuam ti lato. ²²Ape hatesol kahikahi Jises liai tin laha hakaua amuam ti laha, kasinan teka laha pupuas leili ingi Sisa tel masiwi tapein ti Rom.

²³Ti tiliiai kakaiak nga kamei tel Masiwi Jises Krais ti aile hasolia hawane haniamuto hatesol.

**Kolosi
Teik pasi Pol hani teka kahikahi
Jises Krais ti Kolosi
Kakain ti haxewai teik pepa
ie**

Pol tel aposel tai teik pas ie hani teka kahikahi Krais ti tehu taon Kolosi sai 32 ahang muhin ti Jises moih aliawa ape Haeu waxy i hani tesol tonan. Lato soh ti Jises Krais ti lokon Epapras, tel tuai Pol, kaxi haniwa lato meng solian ti Jises Krais. Pol tai ningahai lato tuahe i to nanameni ma lotu huhual lato. Lokon ien i leili kalabus nake ti kaxi ahutia meng solian ti Jises Krais. Ti Epapras alia haniwa kapi Pol, i kakane i ka hina seilon leili teka kahikahi Krais ti Kolosi laha hahanau lato waliko kumahe sawisawin sale Jises Krais. Aile ape Pol tai teik pas ie. I nexi haxewa hani lato ka Jises Krais i masin alia Haeu. Sale namilalalu, pohelalu ma saun ti lalu tenenawe. Haeu hapuasa i ti tanomiai lawe waliko ape Jises Krais i tel Masiwi ti hatesol teka laha soh tetan. I tetel i awai seilon ma i hani laha tonain kapi Haeu ti tap tahi tapoan. Aile ape Pol pahan wanen teka Kolosi hana hatapoa tupualaha haniwa Jises Krais ma aile usiwa waliko ti i hahanau.

¹ Nga Pol tel aposel ti Jises Krais ti puki namili Haeu. Timoti tel akitikako ti Krais i kapik, amuam ti amili haniwa amuto.

² Teik pas ie hani amuto teka kahikahi Jises Krais ti Kolosi, teteka amuto hana hatapo tupuamuto ailei puase Haeu ma amuto unaui Krais wanen. Nga kamei Haeu tel Tamakako ti aile kola haniamuto lalape soliaian ma hatona hasoliai tiamuto.

Pol ma tesol tuaun lotu huali teka Kolosi

³ Ti amite teka kahikahi Krais lotu huali amuto, lawe amite kak kemulik hani Haeu ti amuto hatesol. I tel Tame Jises Krais tel Masiwi ti kako. ⁴ Amite kak kemulik hani Haeu nake amite hongoen xoxoi namilomuto ti Krais Jises ma lalape wawahen ti amuto hani lawe seilon ti Haeu. ⁵ Amuto sohot ukek ien nake namilomuto xoxoan wanen ka kahumuto i to aununa ti tone Haeu. Hoi amuto tioi tenen ien nake amuto hongoen kakain salan leili meng solian ti Jises Krais.

⁶ Tenen meng solian ien, kilan seilon ti tesol tesol laha soh ape laha aile usi saun ti

Haeu pahan masin ti i sosohot wasolamuto lilian ti uli amuto honga kakaian. Amuto xeu ka salan wanen Haeu awai kako nake ti lalape soliaian.

⁷ Epapras, tel soliai tuaumite ti ailei puase Krais, i hanauen amuto tesol waliko ien. I puas alua hahawane wasolamuto ueki totonamite. ⁸ I kaxi hani amite sale saun ti wawahen Holi Spirit hahani amuto.

⁹ Aile ape lilian ti amite honga sale puasamuto, lawe amite lotu huali amuto. Amite kamei Haeu haxewa haniamuto waliko ti pahan amuto ailewa ma haxewai namilomuto sale usiai aweisalun hetekie huuhal ti Holi Spirit. ¹⁰ Na masin ien, soliai puasamuto i haxawa axe tel Masiwi Jises ma lawe waliko ti amuto aile i hamuamua i. Amuto aile waliko solian tenen tenen ape titioamuto ti Haeu i lap ahe.

¹¹ Tin amite kamei Haeu ti hakui hawaneamuto ti lalape kui pohen lehe amuto tu xox tatale ape amuto kum aile loii puasan kalak kawatan tenen tenen tunahai amuto. ¹² Hetekiewa amuam amuto kak kemulik haniwa Haeu tel Tamakako. I aile ape amuto pon ukei waliko ti i kakanewen teka seilon tetan, teteka i neneini laha. Ape laha masin leili xewan. ¹³ Kemuk Satan neneini kako ape kako masin leili tilokoan. Tuahae aope ie Haeu oxoxiwen kako ti hahitake Satan ape i hani neiniakako tel Natun pati i waheni. ¹⁴ Krais tetel i oxoxi kako ti kalabus ti saun lialun ma ti kawatan ti lialui woukako.

Krais se Masiwi tapein ti lawe waliko

¹⁵ Kaha kum pon ningahiai Haeu tuahe ti lokon Jises Krais tel Natun sohotuma tel seilon, i kola hatake hani kaha Haeu tel Taman nake i tin masin tel Taman. I Masiwi tapein ti lawe waliko Haeu tanomi.

¹⁶ Hetekie tel Natun Haeu tanomi hatesol waliko ti patul ma itan ie, waliko ti i pon seilon ningahai ma kum pon ningahian, hatesol seilon tuah, teka masiwi ma teka engel pohen. Salan, hetekie Krais Haeu tanomi lawe waliko lehe hatesol waliko laha sameni Krais tel Natun. ¹⁷ Imat ti lawe waliko Krais hoi ien. I aile lehe lawe waliko puas he paho alua.

¹⁸ Krais tetel i neini teka seilon tetan masin pati seilon i kapiti tupuan. I tetel hanialaha tonain tuah kapi Haeu. I tin Haeu hamoihamu ti matemate lehe i sohot Masiwi tapein ti lawe waliko. ¹⁹ Nake ti puki namili Haeu, tel Natun hina lawe waliko

masin i, tel Taman. ²⁰ Krais tetel Haeu ha-puasa hasawiai lawe waliko hani i, hatesol waliko ti patul ma itan ie. Ti Krais mat he kros i hasawi hatesol waliko ien.

²¹ Kemuk amuto pate xauxaun ti Haeu. Amuto watakai hawane i nake ti lialui namilomuto amuto aile saun pate lialun.

²² Tuahe aope ie, Haeu hasawiwen wasola-muto kapin lokon ti tel Natun sohotuma seilon hanowi kaha ape i mat. Aile ape taeni ti Haeu hiniti lawe seilon, i namilo-i ukek amuto seilon sawisawin, amuto seilon tenen amuto hani hatapo i tupuamuto.

²³ I sohot ukek ien na amuto soh tatale ti Jises Krais. Aile ape tu xox hawanewa, kum hahani laha hakapaxea amuto waliko ti amuto to monomon atengian nake Haeu kakawen leili meng solian ti Jises ka i hani amuto. Tenen meng ien hoi amuto hon-goen ape i sawat hahani lawe xux. A nga Pol Haeu kilami ti kaxi ahutian.

Pol puas huali teka kahikahi Jises Krais

²⁴ Nga amuam ti nga kakau moloan ti hualiamuto. Ape nga kau tatale tesol kawatan ien masin ti Krais kauen kawatan lehe i huali teka seilon tetan, teteka ti Krais neneini masin ti pati seilon kapiti tupuan.

²⁵ Nga sohot tel ti hualiai teka kahikahi Jises Krais nake Haeu kilami nga ti ailei tenen puasain ien. Pupuasak nexi haxewa hatapo kakai Haeu hani amuto. ²⁶ Kue hawanewen namili Haeu kumahe xewan ti teka seilon tuahe aope ie i kaxi hatakei hani teka seilon tetan. ²⁷ Haeu ailewen namilon ti lehe teka seilon tetan tioi ka tin pahan i hani teka kumahe Ju waliko tenen pate solian. Waliko tenen solian ien se Krais i pupuas leilomuto lehe namilomuto i eliel hawane ti ukei waliko solian ti Haeu kakawen i hani.

²⁸ Aile ape amite kaxi sale puase Krais hani lawe seilon. Amite hone laha ti hong usiai Haeu ma amite hanau laha hetekie anesoan lehe i Paxai tioi ka namilolah tel tel xooxoan wanen ti Krais ma laha hani hatapo i tupualaha. ²⁹ Nga puas eliel hahawane ti ailei tenen puasain ien hetekie pohe Krais i pupuas leiloc.

2

¹ Pahak amuto tioiwa ka nga haeliel ha-hawane hualiamuto ma teka kahikahi Krais ti tehu taon Laodisia hetekie teka kahikahi Krais liai laha tai ningahai nga. ² Nga kamei Haeu ti hakuiai leilomuto lehe wawahen ti amuto tel tel hukumini hawane amuto.

Pahak wanen amuto tu xox tatalewa lehe amuto tioi aluini hawane menge Haeu ti sale puase Jises Krais. ³ Se pate tuah wanen na kako tioi hawane Jises Krais. Krais tel haxewaiakako lehe kako aneso alua hawane kakain tuah ti Haeu ma lawe waliko.

⁴ Nga kakane amuto ukek ien lehe amuto kum halali hani seilon puluti amuto, kalak na sale kakaialaha tangian pate solian.

⁵ Kalak na nga kumahe kapimuto, tiak tutuen toi amuto ape nga amuam hawane nake amuto puas pakata hehetekie ma namilomuto xoxoan tutuen ti Krais.

Krais oxoxi kako ti usiai nauna tenen puki ailelei seilon

⁶ Aile ape amuto hong usi tatalewa Jises Krais, tel amuto hanawen Masiwi ti amuto.

⁷ Masin pata ti i wahai hani leili hepekeun, amuto akeni haxoxoa namilomuto ti Krais lehe xoxoi namilomuto i kui ahe ti waliko amite hanauen amuto. Ape amuto kak kemulik tatale haniwa Haeu ti lalape waliko i aile hahani amuto.

⁸ Amuto lepetawa uke seilon hakalala amuto hani usiai kakain ti tenen kumahe salan sawisawin ti sale Haeu. Laha aile ti puki anesoi seilon, laha tua kak tanomi, tap salangawan. Laha hanau seilon usiai nauna tenen ti seilon tua aile tanomi, kumahe laha kema ti Krais. ⁹ Kum hong usiusi laha. Kalak Krais i sohotuma seilon hanowi kaha, i se Haeu wanen. ¹⁰ Krais se pamu patul ti lawe masiwi. Amuto kum tae tenen na waliko ti usiai namili Haeu nake amuto papakata kapin.

¹¹ Lokon ti amuto hana hatapo amuto hani Krais, tap tel i aile teik kikilam ti kotiai uli walikoumuto usiai saun ti teka Ju. Puki Krais aile hani amuto teik kikilam haun ti i oxoxi amuto ti hahitake saun lialun. ¹² Ti laha baptaisi amuto, ien masin ka amuto mat ohoiwen Krais. Ape amuto xahat ali-awen seilon haun ti usiai Haeu nake amuto hina namil xoxoan ti pohe Haeu, tetel i xahateni Krais ti matean.

¹³ Kemuk amuto hahitake saun lialun. Amuto masin teka maten nake amuto kum hani Holi Spirit neini amuto. Tuahe Haeu hamoiha aliakte amuto nake ti waliko ti Jises Krais aile haniwen amuto. Ape i oxoxi kako ti kawatan ti lialui woukako. ¹⁴ Ien masin ka Haeu susuni xaxaweniwen saun lialun ti kako ti laha tai kokongini suluiakako. I sohot lokon ti matei Jises Krais. Ti laha tahi hakea Krais he kros masin ka Haeu tahi hakea hetekiewen lialui woukako. ¹⁵ Ti

ien Krais xaxaweni kui teka spirit lialun ti neinai seilon ape i aile hahiena halialu laha ti puli lawe seilon ti i xoiniwa laha.

¹⁶ Aile ape amuto kum nam wawaxi teka laha howini amuto nake amuto kum usi saun tenen i halini aniai hina an ma unum. Tin amuto kum nanamiloi na laha kak wawatakai amuto nake amuto kum amuke akati laha ngain lapal ti laha, masin ti lawe suhui pangapang ma na usiai saun ti tehu ngain Sabat hanowi ti laha usiusi. ¹⁷ Tesol saun ti teka Ju i tuahe kolakol ti waliko tenen pamu tuah ti Haeu apesenewen i luluainima imuh. Krais tetel pamu tuah nake i hapoponowi hatapoi waliko ti Haeu kakawen i aile hani kako. ¹⁸ Hina seilon woinakon ka laha teheni laha ape laha lotui teka engel. Na laha lungei amuto ti aile usialaha, amuto kum aile usiusi uke amuto kum waxy kahumuto ti Haeu apesen i haniwen amuto. Teka seilon ien laha ukek ka Haeu hanamiloa laha ningahiai waliko tenen tuah i axi anesaloaha tetan. Tuahe waliko tenen laha hahanau teka seilon, i sohotuma ti puki namilolaha. Nake ti tesol waliko ien laha sameni aliake laha. ¹⁹ Laha aka lioi xoxoi namilolaha ti meng tenen sawisawin ti Krais tel neiniakako. Masin ti pati seilon i kapiti tupuan, tin masin Krais neini seilon tetan lehe laha hukuma hawane hanowi soxi tini seilon teik i pakata huhukuma ape i lap usi namil Haeu.

²⁰ Kako masin ka kako mat ohoiwen Krais. I mat oxoxiwen kako ti hahitake nauna tenen seilon ti tehu pon ie tua aile tanomi. ²¹ Aile ape amuto kum usiusi nauna tenen masin, "Kum hahapuasa tetenen, kum aniani tenen ie, kum aka sosoti waliko tenen hahalin." ²² Tesol waliko ien i kum to kue, hahuasaian tehue. Tetesol nauna ien laha hahanau seilon ti puki namilolaha. ²³ I woinakon ka solian na kako usi. Teka laha usiusi tesol nauna ien laha sokok laha aile hamuamua Haeu nake laha hahalin i laha hina waliko, laha teheni aliake laha ma laha aile halialu tupualaha ti kolakol ka laha hana hatapo tupualaha hani i. Tuahe ti usiai tesol nauna ien i kum huali laha ti tahiai isiai pahalahi ti ailei saun lialun.

3

Saun ti teka namilolaha xoxoan ti Krais

¹ Masin ti Haeu hamoiba Krais, tin i hamoiba aliake kako teka seilon haun ti usian. Aile ape hana hatapoa namilomuto haniwa waliko ti Krais, tetel i toto pape tepaun mini Haeu manau ti neiniakako.

² Hana hatapoa namilomuto ti waliko ien, kumahe waliko ti tehu pon ie. ³ Amuto aile kewak ien nake lialui woumuto ti amuto to ailele imat ape i tapoen. Aope amuto puas pakata hehetekie kapi Krais. Ape teteka seilon laha kum soh ti Haeu, laha kum xeu tenen saun haun ti amuto. ⁴ Tuah taen ti Krais aliamma, tetel haniamuto tonain tuah kapi Haeu, taen ien lawe seilon ningahi ka amuto se seilon tuah wanen tetan.

⁵ Aile ape lioi xaxaweni hawanewa saun lialun tenen amuto ailele ti isiai pahamuto. Kum ailele saun lialun ti wawan hehin, kum ailele sikisiki tenen ti hienain ma konginiwa isiai namilomuto ti tua sik lalal. Kum halepelep nake na namilomuto i eliel hawane waxiai waliko kilan tenen tenen, ien se masin ka amuto lolotui tesol waliko ien. ⁶ Teka laha tahi kakai Haeu ape to ailele tesol saun ien, ti lengean i axi laha kawatan. ⁷ Imat ti amuto soh ti Krais, amuto to ailele tesol waliko ien. ⁸ Tuah aope ie amuto lioi xaxaweniwa saun tenen lialun. Kum leng lalolal, lomuto kum liliyalu, kum ailele namil ti halialui seilon, kum kak hahalialu laha, kum kak alual ma kum puputa lalolal. ⁹ Kum ailele tesol waliko ien nake amuto ape kumahe seilon ti welli ailei saun lialun. Amuto lioi xaxaweniwen. ¹⁰ Aope ie amuto seilon ti ailei saun solian nake namilomuto xoxoan ti Krais. Haeu aile amuto sohot seilon haun ti usian ape i huali tatale amuto lehe titioamuto tetan lap ahe ma amuto sohot seilon ti usiai woun. ¹¹ Aile ape teka laha sohot kahikahi Krais, tap tel i pamu tuah ti liai tel. Tel Ju i aile usi saun ti kikilam ti kotiai uli walikoun i kumahe pamu tuah ti tel kumahe Ju, tetel i kum usi saun tenen ien. Tel unaui seilon i kumahe pamu naun ti tel i kumahe unaui seilon ape tel seilon kaliap i tin kumahe pamu naun ti tel seilon pono. Na amuto kahikahi Krais, tap liai tenen na amuto akiki xux liai ma na kumahe. Waliko tenen pamu tuah se Krais ape i pupus leili hatesol seilon tetan.

¹² Amuto hana hatapoen tupuamuto hani Haeu. Amuto seilon tetan i waheni hawane. Aile ape amuto hualiwa teka hina kawatan, aile hasolia haniwa seilon liai, kum aile hahanowi amuto pamu tuah ti laha, aile aluini haniwa seilon liai, kum leng kokosea ma kum aile lilioi puasamuto kalak kawatan tunahi amuto. ¹³ Lomuto kum liliyalu hani seilon liai. Na seilon aile waliko tenen lialul hani amuto, oxoxiwa i ti kawatan ti lialui woun ien. Masin ti Jises tel Masiwi oxoxi amuto ti kawatan ti lialui woumuto,

tin amuto oxoxiwa teka liai ti kawatan ti saun lialun laha aile hani amuto.¹⁴ Patul ti hatesol saun solian se saun ti wawahen nake i hukumini hawane hatesol kahikahi Krais. Aile ape waheniwa Haeu ma seilon.

¹⁵ Jises Krais hatona hasolia ti amuto, aile ape amuto elielawa ti hasoliai wasolamuto nake amuto hukuma hawanewen ape amuto sohot hanowiwen ka seilon tel. Ape lawe kak kemulik haniwa Haeu.¹⁶ Namiloi eliel hawanewa kakai Krais lehe i kapiti amuto na amuto hanau seilon ma nau laha ti hong usiai Haeu. Amuto aile aka mataliniwa. Ape pak hawanewa ti leili ate-muto pak tenen tenen ti sameniai Haeu ti lawe waliko i aile haniwen amuto.¹⁷ Ti lawe waliko amuto kak ma na aile, nameniwa ka amuto hahitake Jises tel Masiwi. Lawe kak kemulik haniwa Haeu tel Tamakako. Amuto pon ailean nake ti Jises Krais.

Nauna ti Pol hani teka lohe ing tehu tehu

¹⁸ Amuto hehin, hong usiwa axoamuto nake i se saun ti teka hehin laha hahitake Krais tel Masiwi.

¹⁹ Ape amuto wawan, waheni hawanewa axoamuto. Kum wawatakai ma aile halilau laha.

²⁰ Teka akaik, lawe hongoa kakai tamam tinam nake Haeu tel Masiwi amuke hawane saun tenen ien.

²¹ Amuto teka tame akaik, kum hah-hele loi natumuto uke xoxoi namilolah ti amuto i put. I hakawata tialaha ape laha kum aile waliko tenen solian.

²² Amuto teka unaui seilon, hong usi hatapoa masiwi ti amuto. Aile aluinwa puasamuto kumahe mewenae na i papaxai amuto. Puas hawanewa ti leili ate-muto, kumahe tuahe ti hamuamui masiwi ti amuto. Amuto ailewa ti sameniai Haeu.²³ Lawe waliko ti amuto aile, puas hawanewa ti leili ate-muto hanowiwa ka amuto pupuas ti Haeu tel Masiwi, kumahe ti teka tuahe seilon.²⁴ Nameniwa ka Jises tel Masiwi kahui hasolia amuto. Amuto se kahikahin, hatesol puasamuto tetan.²⁵ Tuah na tel ti amuto aile waliko lialun, Haeu kahui aliakte hani i. Ti na i paxai kolongeni woi seilon, tap i saupa ti tel.

4

¹ Amuto teka masiwi, kum hapuasa nenexi teka unaui amuto, ngahati aluinwa laha. Nameniwa ka amuto tin hahitake Masiwi tel. Amuto se hahitake Haeu.

Tu xox elielawa ti lotu

² Lotu tatalewa, kum lotu lilioa. Hana hatapoa namilomuto haniwa lotu ma kak kemulik haniwa Haeu.³ Ape tin lotu hualima amite lehe Haeu neini hani amite aweisal ti kaxi ahutiae puase Krais hani teka seilon. Ti imat Haeu tai haxewa hatapo hani laha. Ape nga kakalabusake ti kaxi ahutiae tenen meng ien.⁴ Lotu hualima nga ti kaxi haxewai sale puase Krais hani lawe seilon nake hoi liai puasak.

⁵ Na amuto kapi teka laha kum soh ti Jises Krais, lawe hapuasa aluinwa teik taun ien ti hualialah.⁶ Lawe kak hapau aka mataliniwa kakaiamuto lehe amuto pahoi hapoponow i kakai hatesol seilon.

Tilaii kakai Pol

⁷ Tikikus kaxi hani amuto nga. I tel tuauk nge waheni hawane, i hani hahatapo i ailei puase Krais.⁸ Nga taloa i hahongoamuto waliko ti i sohot hahani amite ie ma ti kak hakuiamuto.⁹ Nga talo hetekiewa Ones-imus, tel akikikako ti Krais amite waheni hawane. I tel ti amuto. Pate i puas eliel ailei puase Haeu. Ape lalu kaxi amite hani amuto.

¹⁰ Aristakus tel tuauk, tin i kakalabus kapik, i hakau amuam tetan haniwa amuto hetekie Mak tel ukale Banabas. Amuto kewen kakain ti aumai Mak na masin i tahia haniwa kapimoto.¹¹ Jises tetel axan liai tenen Justus, tin i hakau amuam tetan. Lato tolue Ju kahikahi Krais lato pupuas kapik ti kolai ka Haeu i tel neiniae seilon. Pate lato patahi hakui nga ti ailei puasak.

¹² Epapras, tel ti amuto, tin i hakau amuam tetan haniwa amuto. I tin unaui Krais Jises. Lawe i lotu eliel kameiai Haeu ti hualiamuto lehe namilomuto tel tel xox hawane ti Krais hetekie amuto hani hatapo i tupuamuto ma tin amuto tioi hawane waliko tenen Haeu pahan amuto ailewa.¹³ Nga kaxi hawane hani amuto ka i puas eliel hawane hualiamuto ma teka kahikahi Jises Krais ti huohu taon Laodisia ma Hierapolis.

¹⁴ Ape Luk tel dokta pate amite waheni ma Demas, tin lalu hakau amuam ti lalu.

¹⁵ Amuam tetak haniwa teka kahikahi Krais ti Laodisia, tel hehin masiwi axan Nimpa ma teka kahikahi Krais lawe laha apuha hani ingan ti ailei puase Haeu.

¹⁶ Muhi ridaiai teik pas ie, ridai ulea haniwa teka kahikahi Krais ti Laodisia ape tin amuto ridaiwa teik pas nga tai haniwen laha.

¹⁷ Honewa Akipus aile tinami hatapoa tenen puasain tel Masiwi Haeu haniwen i.

¹⁸ Tiliai teik pasuk puki tataiak nga Pol.
Nameniwa nga tel nga kalabusake ailei
puase Krais.

Nga lotu kamei Haeu lehe i aile hasolia
hawane hani amuto.

1 Tesalonika
Teik pasi Pol hani teka kahikahi
Jises Krais ti Tesalonika
Kakain ti haxewai teik pepa ie

Pol tel aposel tai teik pas ie hani teka kahikahi Krais ti Tesalonika lokon ti i totu tehu taon Korin. I sohot sai 20 ahang muhin ti Jises moih aliawa ape Haeu waxy i hani tesol tonan. Tesalonika tehu taon lalap peixux ti texux xux Masedonia. Kilan ti teka seilon ien laha kumahe Ju. Ti Pol Tesalonika, i kakaxi meng solian ti Jises Krais ape teka laha soh ti Jises (Apo 17:1-10). Teka maswi ti teka Ju laha namiloi halialu Pol ma tesol tuaun ape laha usi xaxaweni lato nake laha watakai teka Ju lotui Jises Krais. Imuh Pol talo Timoti puas hani kapi teka kahikahi Krais ti Tesalonika. Ti i aliamma i kaxi meng tenen i hamuamua Pol sale puasalato. Ti he teik pepa ie Pol kak kemulik hani Haeu nake teka Tesalonika tu xox ti Jises Krais kalak lato tunahi kawatan tenen tenen ma tin lato to nanameni i Pol hetekie wawahan. Tin i nexi hani lato sale xahatai seilon ti matemate ma hakui lato ti haxoxo tatalei namilolat ti Krais.

¹ Kakai Pol, Sailas ma Timoti hani teka kahikahi Jises Krais ti tehu taon Tesalonika, teteka amuto se seilon ti Haeu ma Jises Krais tel Masiwi.

Amite kamei Haeu aile kola haniamuto lalape soliaian ma hatona hasoliai tiamuto.

Pol kak kemulik hani Haeu ti xoxoi namili tekia Tesalonika

² Tapai na amite lotu huali amuto, lawe amite kak kemulik hani Haeu ti amuto hatesol. ³ Na amite lotu hani Haeu tel Tamakako, lawe i hanamena amite sale soliai puasamuto nake amuto soh hawane ti Krais. Amite namiloi hetekie sale puasamuto ti hualiai seilon liai nake amuto waheni hawane laha ma xoxoi tutuhamuto nake amuto monomon hawane atengiai Jises Krais tel Masiwi ti kako.

⁴ Teka akikimite ti Krais, amite tioi ka Haeu waheni hawane amuto ma i kilamien amuto tetan. ⁵ Amite tioi nake ti amite kaxi ahuti hani amuto meng solian ti Jises, kumahe tuah kakaiamite. Amite kaxi hehetekie kui pohe Holi Spirit ti i pupuwas wasolakako ape amuto soh hawane. Tin

amuto tioi ka ti amite toto kapimuto, lawe amite huali hasolia amuto. ⁶ Amuto puas usi hahawane amite ma Jises tel Masiwi. Kalak laha axi amuto kawatan tenen tenen, amuto hong usi tatale kakai Haeu hetekie amuamti ti Holi Spirit hahani amuto. ⁷ Aile ape amuto sohot seilon tetenen ala teka kahikahi Jises ti xux Masedonia ma Akaia puas usi.

⁸ Kumahe mewenae teka seilon ti Masedonia ma Akaia hongoen amuto kaxi ahuhuti meng solian ti Jises Krais. Seilon ti tesol tesol laha hongoen xoxoi namilomuto ti Haeu, aile ape amite kum kaxi aheke. ⁹ Teka seilon ien laha to kakak ka amuto hong soh kakaiamite ape amuto waxy auni amite. Tin laha kakaxi ti amuto tale tehitomuto hani lotuiai waliko tenen tenen ape amuto hana tupuamuto ailei puase Haeu wanen tel pate pohen. ¹⁰ Laha kakak hetekie sale monomon ti amuto atengiai tel Nati Haeu ti tesol tonan, tel ti Haeu hamoiba aliaikewen. I Jises Krais tetel awaiasi seilon ti kawatan ti lengai Haeu nake ti lialui woukaha.

2

Puase Pol ti leili Tesalonika

¹ Tesol akikimite ti Krais, puki amuto tioi ka tehu totonamite kapimuto i kum tua xoina. ² Amuto tioiwen, imat ti amite tahi hani kapimuto, amite kau hawanewen kawatan ti teka Pilipai aile hani amite. Tuah Haeu hakui amite ti kaxiai meng solian ti Jises hani amuto kalak hina seilon laha hil pahoi amite. ³ Ti amite kakaxi tenen meng ien hani amuto, kumahe amite tua kaxi tanomi ma kumahe amite pupulut amuto, tin kumahe amite kak hehetekie namil lialun.

⁴ Haeu paxai tioi leilomite ape i soh amite tapai kaxi ahutiai meng solian ti Jises Krais. Aile ape na amite kak, kumahe ka amite ailele ti lehe seilon amuke amite, mewenae ti hamuamui Haeu. I tetel paxai kolonigeniai namilomite ma woumrite. ⁵ Amuto tioi ti amite kapimuto kumahe amite ailele kakain paon ti itiniae namilomuto. Kumahe amite kaxi ahuhuti kakai Haeu ti atuhiai isiai pahamite ti ukei kahumite ti amuto. Haeu paxai tioi hawane ka kumahe amite aile ukek ien. ⁶ Kumahe amite ailele lehe amuto ma na seilon liai sameni amite.

⁷ Kalak amite se aposel ti Krais, amite tai ukek amuto aile hanima amite hanow seilon tenen pate tuah. Amite aile aluin

hawane hani amuto hetekie lalape wawa-hen masin na tel hehin i aile hani natun.⁸ Ti lalape wawahen ti amite hani amuto, amite amuke kaxiai meng solian ti Jises hani amuto ma tin hetekie ti hani hatapoi tupuamite hualiamuto. Amite aile ukek ien nake amuto pate tuah wanen ti amite.

⁹Tesol akikimite ti Krais, ala amuto namanen ka amite puas eliel hahawane ti amite kapimuto. Amite puas ngain hetekie ipong ti auniamite lehe amite kum hakawata amuto taen ti amite kaxi ahuti meng solian ti Haeu hani amuto.¹⁰ Amuto ma Haeu paxai tioi hawane ka amite ailele waliko tenen ti hamuamui Haeu. Amite ailele saun solian ti amite kapimuto teka amuto soh ti Jises Krais. Ape tap tel i pon tieniamite ti tenen na waliko.¹¹ Amuto tioi ka amite aile hahani amuto tel tel masin ti tel tame akaik solian i aile hani tel natun.¹² Amite kak hakui ma hamatua amuto ma kakane tatale amuto ti ailei saun tenen Haeu pahan. I ilowi amuto hani kapi teka seilon i neneini ti nenein tenen pate tuah wanen.

¹³ Tin amite kak kemulik tutuen hani Haeu nake ti amuto hongoa menge Haeu ti amite kakaxi, amuto hong waxi ka salan kakai Haeu kumahe tuahe ti seilon. A i se salan wanen kakai Haeu. I pupuas leilomuto teka amuto soh ti Jises Krais.

¹⁴Tesol akikimite ti Krais, waliko tetenen i sohot hahani teka laha soh ti Krais ti Judia tin i sohot hani amuto. Masin ti teka akikimuto axi amuto kawatan nake amuto soh ti Krais, tin masin teka Ju aile hani teka Judia laha soh ti Krais.¹⁵ Tin teteka Ju laha telei tel Masiwi Jises ma teka ti tesol kuluiak kakai Haeu. Tin laha usi xaxaweni amite ti amite kakaxi meng solian ti Jises. Laha watakai hawane seilon ape laha halenge hawane Haeu.¹⁶ Laha tohongi lali konginiamite ti kaxi haniai teka kumahe Ju ka Haeu pahan i awai laha ti kawatan ti lialui woulaha. Ti laha aile ukek ien, laha tua palahi aheheke saun lialun ti laha ailele. Aile ape ti lengei Haeu, imuh i axi laha kawatan.

Pol pahan wanen i paxai teka Tesalonika

¹⁷Tesol akikimite ti Krais, kukunui teik taun ti amite selaiwa ti amuto nake teka seilon usi xaxaweni amite, namilomite tutuen toi amuto. Amite tohongi elielip paxaiamuto nake amite hulol hawane ti amuto.¹⁸ Ape pahamite wanen amite alia hani kapimuto. Puki nga Pol, nga tohongi

hakilawen lehe nga alia hani kapimuto tu-ahe puase Satan titiehi nga.¹⁹ Pahamite wanen paxaiamuto nake amite soh ka namilmuto xoxoan wanen ti Jises Krais. Amuto aile hamuamua amite ape amite sameni amuto hani tel Masiwi Jises tataen ti i aliam. ²⁰ Salan wanen, amite sameni ma amuke hawane amuto.

3

¹Pahamite wanen amite tioi sale totonamuto. Amite namiloi ukek pamu ewian na nga tiliwen leili tehu taon Aten.² Ape amite hakaua Timoti ukei totonamite. I tel akikimite ti Krais, i pupuas ti Haeu sawateniai meng solian ti Krais. Amite taloa i ti hakuiamuto ma haxoxoi namilmuto ti Jises Krais.³ I aile ukek ien lehe xoxoi namilomuto ti Krais i kum put taun ti teka seilon axi amuto kawatan ma moloan. Amuto tioi hawane, hoi Haeu kilamiwen kako kauai tenen kawatan ien nake kako tetan.⁴ Ti amite tutuen kapimuto, amite kaxi haniwem amuto ka kako tunahi tenen kawatan ien. Amuto tioi hawane ka hoi i sohot.⁵ Nga kum kongini uke namilok ti amuto. Kaie amuto soh tutuen ti Krais? Aile ape nga taloa Timoti ti upia paxaian. Nga namiloi hawane uke Satan tohongi ha-puta namilomuto ti Krais. Na i sohot ukek ien, puase Haeu ti amite ailewen wasolamuto i tua xoina.

Timoti aliakema meng tenen i hamuamua Pol

⁶Tuahe ti Timoti aliam amite kapimuto i kaxi hani amite meng tenen i hamuamua amite sale xoxoi namilomuto ti Krais ma lalape wawahen ti amuto hani seilon liai. Tin i kakane amite ka amuto nam amuke hawane amite ape pahamuto wanen paxaiamite masin ti pahamite wanen paxaiamuto.⁷ Tesol akikimite ti Krais, kalak teka seilon axi amite kawatan ma moloan, xoxoi namilomuto ti Krais i hakui namilomite.⁸ Ape amite hanau hawane nake amuto tu xoxox ti Krais tel Masiwi.

⁹Ti amite lotu hani Haeu amite kum tioi kolongenial kemulik ti amite nake ti lalape amuam amite hina nakemuto.¹⁰ Ngain ma ipong amite kamei elielip Haeu ti lehe amite paxai uleimu amuto. Pahamite hapono ahekei waliko tenen amuto tae ti namilomito hani Krais.

¹¹Amite lotu kamei tel Tamakako Haeu lehe i ma Jises tel Masiwi hasawi taneni aweisalumite ti hani kapimuto.¹² Amite

kamei hetekie Jises tel Masiwi ti haxoxo ahekei wawahen ti leilomuto tel tel ma ti haniai teka seilon liai hanowi lalape wawahen ti amite hani amuto.¹³ Amite lotu ukek waxi i hakui hawane amuto lehe amuto sohot hawane seilon ti Haeu ape i paxai ukek amuto seilon sawisawin taun ti Jises tel Masiwi ti kako aliamma hetekie hatesol seilon tetan.

4

Kako ailewa waliko tenen i hamuamua Haeu

¹ Tesol akikimite ti Krais, ti amite kapimuto amite hanauen amuto saun tenen amuto usiwa lehe i hamuamua Haeu. Ape salan, amuto aile usi. Aope amite kamei eliel amuto hahitake axe Jises tel Masiwi ti hapono ahekei tenen saun ien.² Amuto tioi³ hawanewen nauna ti amite haniwen amuto hahitake axe Jises tel Masiwi.

³ Haeu lon al amuto hani hatapoa i tupuamuto. Poneniwa ailei saun lialun ti wawan hehin.⁴ Tel tel haelieliliwa tahiiai isiai namilon ti ailei saun lialun. Amuto kewa unaui Haeu wanen lehe i namiloi ukek woumuto pate sawisawin ape teka seilon hong waxi amuto.⁵ Kum hohongeni isiai pahamuto ti ailei saun lialun ti wawan hehin hanowi teka laha kum tioi Haeu.⁶ Kum xuuxuina axoi seilon liai. Haeu tel Masiwi i axi kawatan hani teka na laha aile saun tenen ien masin ti amite nau elieliven amuto.⁷ Kumahe Haeu kilami amuto tetan lehe ape amuto aile saun tenen lialun, i kilami amuto ti ailei saun solian.⁸ Aile ape tel na i tahi tesol nauna ti amite haniwen amuto, kumahe i tua tatahi nauna ti seilon, se i tatahi nauna ti Haeu, tetel i hani amuto Holi Spirit ti kapitiamuto.

⁹ Amite kum tai kakane amuto sale wawahen ti kako teka kahikahi Krais nake puki Haeu hanauen amuto lehe amuto aile kola saun ti wawahen wasolamuto.¹⁰ A salan wanen, amuto waheni hatesol kahikahi Jises ti Masedonia hatexux. Tuahe amite kakane eliel amuto ti aile ahekean.

¹¹ Masin ti amite hawanewen amuto, eliel hawanewa lehe amuto kum aile halialu wasole seilon, namiloiwa puki puasamuto, kum sosolonga waliko ti seilon liai ma puki amuto puas elieliva ti ngahatiamuto.¹² Na amuto aile ukek ien, teka laha kum soh ti Krais laha paxai waheni saun ti amuto ape laha hong amuto. Na amuto puas ti ngahati

aliakeamuto, amuto kum hakawata seilon liai.

Pol kakaxi sale aliai tel Masiwi Jises

¹³ Tesol akikimite ti Krais, pahamite amuto xeu aluawa sale teka seilon laha tapoen lehe amuto kum to tatale leili tatahan hanowi teka laha kum soh ka seilon moih alia.¹⁴ Kako soh ka Jises matewen ape i moih alianwen. Aile ape kako soh ka Haeu hamoiba aliake teka namilolaha xoxoan ti Jises Krais.

¹⁵ Waliko ti amite hahanau amuto ie, hoi tel Masiwi Jises kakawen. Tataen ti tel Masiwi Jises aliamma, kako teka moihin tutuen kum paxaimu i imat ti teka kahikahin laha matewen.¹⁶ Taen ien Jises mosulih ti tone Haeu ape i tilol hahongo lawe seilon. Teka seilon hong kinaxe tel engel masiwi ti teka liai ma laha hong tanggai suhusuh ti Haeu. Ape teka laha soh ti Krais laha moih aliamu imat.¹⁷ Muhin Haeu hukumini teka seilon ien hani kapi kako teka moihin tutuen ti tengenai tel Masiwi Jises patul he maun. Ape kako hatesol to kapin lian tehue.¹⁸ Aile ape amuto hakuwiw tel tel ti leilomuto tenen kakain ien.

5

¹ Tesol akikimite ti Krais, amite kum tai kakane aheke amuto sale aliai Jises Krais.

² Amuto tioi tehu ngain ien i sohot hanowi hawane seilon ti xuxuina i sohot ti ipong.

³ Tataen ien, na seilon ukek lawe waliko ape solian ma taun lialun kum tunahi laha, kawatan lalap sohot hahutua hani laha hanowi moloan ti hehin na i hatakaha akaia. Ape laha kum salia uke.

⁴ Tuahe amuto tesol akikimite ti Krais, amuto kumahe leili tilokoan ti saun lialun. Aile ape tehu ngain ien i kum sohot haonga amuto hanowi tel seilon ti xuxuina i sohot haonga tel tame ing.⁵ Amuto leili xewai saun solian. Kako teka kahikahi Jises, kako kum ailele saun lialun hanowi na kako toto leili tilokoan.

⁶ Aile ape kako kum hahanowi teka laha kum soh ti Krais. Laha masin seilon ti i mamatih, i kum tioi waliko ti i sosohot. Kum luhuluh uke waliko i sohot haonga amuto. Tahiwa isiai pahamuto ti ailei saun lialun.⁷ Ipong se taun ti seilon matih ma tin taun ti seilon un taxitaxia.⁸ Tuahe kako seilon ti ailei waliko tenen sawisawin. Aile ape kako tahiwa isiai pahakako ti ailei waliko tenen lialun. Namilokako kewa xoxoan hani Krais hetekie lalape wawahen. I awai kako masin

teik samen ti awaiai patanawe seilon leili taun ti hile. Tu xox tatalewa ti namilokako ka Jises i awai kako ti kawatan ti lialui woukako. Xoxoi tenen namil ien i awai kako masin tehu kapu samen seilon hapuasa awaiai patulaha taun ti hile.

⁹ Kumahae Haeu kilami kako ti ukei kawatan ti lengan. I namiloi ka Jises tel Masiwi awai kako ti kawatan ti lialui woukako. ¹⁰ Jises mat ti ukei totonakako lehe kako teka kahikahin, teka laha matewen ma teka moihin tutuen, kako hatesol to kapin. ¹¹ Aile ape hualiwa ma hakuwa amuto tel ti tu xoxoa ti Jises Krais masin ti hoi amuto ailele.

Tiliiai nauna ti Pol hani teka Tesalonika

¹² Tesol akikimite ti Krais, amite kamei eliel amuto ti hongoi kakai teka masiwi laha puas elieliel wasolamuto ma laha nanau amuto waliko tenen amuto teka kahikahi Krais usiwa. ¹³ Paxai tioiwa ka lato pate seilon tuah ape waheni hawanewa lato nake ti pupusalato. Kum hilehil ma he wawatak.

¹⁴ Tesol akikimite ti Krais, amite kamei amuto nau elielawa teka nunuxa ti ailei puasain, kakane hamatuawa teka laha mamata ma hienu, hualiwa teka tap kuilaha ma kum aile liloi hualialaha. Lomuto kum liliulu na seilon aile talesi amuto. ¹⁵ Kum kahui aliliake saun lialun ti seilon aile hahani amuto. Lawe aile hasolia haniwa amuto tel tel ma teka seilon liai.

¹⁶ Amuamua ti leili taun solian ma lialun. ¹⁷ Lawe lotu haniwa Haeu. ¹⁸ Kak kemulik haniwa i ti lawe waliko. Aile hatapoa tesol waliko ien nake Haeu pahan amuto teka kahikahi Jises Krais ailewa.

¹⁹ Kum kokongini puase Holi Spirit. ²⁰ Kum hong wawatakai kakain ti Holi Spirit hanamiloa teka kahikahi Jises kakaxi. ²¹ Hong kolongeni aluiniwa hatesol kakain. Uke auniwa kakain tenen sawisawin. ²² Saliniwa ailei hatesol waliko tenen lialun.

²³ Amite kamei Haeu, tetel i haewia hawane lelokako, ti aile hasohotuamuto seilon sawisawin tenen i amuke. Amite kamei Haeu hualiamuto lehe amuto salini tatale hatesol waliko tenen lialun waxi tap tel pon tieniamuto ti tenen na waliko tataen ti Jises tel Masiwi ti kako aliama. ²⁴ Haeu pahan amuto sohot seilon tenen pate i amuke. I huhuali amuto nake lawe i aile usi waliko ti i kakawen.

²⁵ Tesol akikimite ti Krais, tin amuto lotu hualima amite. ²⁶ Amuam hetekie wawahen ti amite haniwa hatesol akikimite ti Krais.

²⁷ Nga hone amuto ti hahitake axe Jises tel Masiwi ka ridaiwa teik pas ie haniwa hatesol kahikahi Jises Krais.

²⁸ Amite kamei Jises tel Masiwi ti kako ti aile hasolia hawane haniamuto hatesol.

2 Tesalonika

Teik pasi Pol liai hani teka
kahikahi Jises Krais ti
Tesalonika
Kakain ti haxewai teik pepa
ie

Lokon ti Pol tutuen tehu taon Korin, i tai ulea hani teka kahikahi Krais ti tehu taon Tesalonika. I sohot sai 20 ahang muhin ti Jises moih aliawa ape Haeu waxy i hani tesol tonan. Pol hongoen ka hina ti teka Tesalonika laha kapaxe aliai Jises Krais. Lato sokok Jises hoi i aliawen, aile ape lato puas lioa. Ti he teik pas ie Pol hahanau ka imat ti aliai Jises Krais, tel seilon pate lialun wanen sohot kouke, tetel i pahoxai Haeu ma watakai hawane hatesol nauna tetan. I itini teka seilon hani ailei saun lialun. Tuahemuh Jises Krais tel Masiwi aliamma ape hatesol seilon lialun laha uke kawatan ti lialui woulaha. Pol hakui teka Tesalonika akeni konginiai kakain salan ti Jises Krais. Tin i kakane lato ti usiai saun tenen ti Jises Krais hahanau lehe i halowi lato ailei waliko solian.

¹ Kakai Pol, Sillas ma Timoti hani teka kahikahi Jises Krais ti Tesalonika, teteka amuto se seilon ti tel Tamakako Haeu ma Jises Krais tel Masiwi.

² Amite kamei Haeu ma Jises Krais tel Masiwi ti aile kola haniamuto lalape soliaian ma hatona hasoliai tiamuto.

Pol kak hakui teteka Tesalonika seilon liai axi kawatan

³ Tesol akikimite ti Jises Krais, lawe mewenae amite kak kemulik hani Haeu ti amuto hatesol nake liai pupuasamite. Pate solian ti amite aile ukek ien nake xoxoi namilomuto ti Krais ma wawahen ti amuto tel tel i to xox tataele. ⁴ Aile ape amite to sasameni amuto hani teka kahikahi Krais liai. Amite kakaxi xoxoi tutuhamuto kalak kawatan ma totohong tenen tenen seilon liai aile hahani amuto nake amuto soh ti Jises Krais.

⁵ Tesol waliko ien i kola ka Haeu i lawe salan. Na i paxai kolongeni woi seilon, kolongenian tetan sawisawin wanen. I namiloi ukek i tapai na amuto uke tonain tuah kapin nake amuto tu xox tatale kalak

amuto kakau kawatan ti seilon liai aile hahani amuto. ⁶ Tuahemuh Haeu kahui ali-ake kawatan hani teka laha aile hahakawata amuto nake lawe i aile waliko tenen mewe-nae salan. ⁷ Ape i hapau hawane kako hatesol tataen ti tel Masiwi Jises tahiamma ti tone Haeu hetekie teka engel pate kuin ma xekei ah kakalini lato. ⁸ Tataen ien i axi hawane kawatan hani teka laha kum nam waxi Haeu ma teka laha kum hong usi meng solian tetan. ⁹ Tel Masiwi Jises axi laha kawatan tenen tap tahi tapoan. Teteke ien i selai xaxaweni laha tetan ape laha kum ningahi ma amuke pohen hetekie soliaian. ¹⁰ Hatesol waliko ien i sohot telao ti tel Masiwi Jises aliamma, ape teka namilolaha xooxan tetan laha sameni hawane i ma kaxi ahuti soliai pupuasan. Amuto tin leilolahna nake amuto soh waliko ti amite kaxi hani-wen amuto sale puase Jises Krais.

¹¹ Aile ape lawe amite lotu huali amuto. Amite kamei Haeu tel Masiwi ti kako hualiamuto ailei saun ma puasain solian ti pahan amuto usiwa. Amite kamei i ti axiamuto poh ti ailei lawe waliko solian ti pahamuto ma ti hualiamuto aile hatapoi waliko ien ti xoxoi namilomuto ti Jises Krais. ¹² Amite lotu kamei Haeu tesol waliko ien lehe teka seilon laha papaxai soliai puasamuto laha sameni Jises tel Masiwi ti koko. Ape Haeu namiloi ukek amuto seilon pate tuah. Amite kamei eliel lehe waliko ien i sohot ti lalape soliai Haeu ma tel Masiwi Jises Krais.

2

Waliko tenen i sohot imat ti aliai Jises Krais

¹ Tesol akikimite ti Krais, aope ie nga kaxi haxewa hani amuto sale aliai Jises Krais tel Masiwi ti kako tataen ti na kako apuha hani kapin. ² Amite kamei eliel amuto kum hahakila namilomuto ma hahakawata tiamuto na teka seilon hone amuto tehu ngain ti tel Masiwi Jises i tahiawen. Kumahe salan na laha ukek ka Holi Spirit hanamiloa amite ti hahongoamuto ukek ien. Tin kumahe amite hakouta kakain ien ani au ma na ani pas. ³ Kum hahani tel na seilon puluti amuto nake tehu ngain ien i kum sohotumu atengi tataen kilan seilon tale tehitolaha hani Haeu ti ailei saun lialun. Imat ti tehu ngain ien tin tel seilon pate lialun wanen i sohot kouke, tetel i pahoxai Haeu ma watakai hawane hatesol nauna tetan. Tetel seilon ien hoi liai kane tehot ah tap tahi pehoan, tetesol ti Haeu

aile halialu tamusuke i. ⁴I hil pahoxai lawe waliko ti teka seilon paxai tioi se Haeu ma hatesol waliko ti laha lolotui ape i ukek i pamu tuah ti laha hatesol. Tin i soh to hami Ingi Haeu ape i ukek i se Haeu.

⁵ Saka amuto nameni ka nga kaxi haniwen amuto waliko ien lokon ti nga kapimuto. ⁶Masin ti amuto tioi, hina waliko i titiehi sohotui tel seilon pate lialun wanen aope ie. I po sohot kouke tetehu taun ti hoi Haeu kilamiwen. ⁷Tuahe aope ie Satan hoi i pupuas leili teka seilon. Kumahe lawe seilon xeu ka i hanamiloa seilon ti watakai Haeu ma nauna tetan. Hina seilon i kokongini puasain ien atengi tataen puki i aile lioi. ⁸Tataen ien tel seilon pate lialun wanen i sohot kouke. Ape taen ti tel Masiwi Jises aliamma, i telei tel seilon ien ti tuahe kui pohe kakaian ma xewaian.

⁹ Taen ti tel seilon pate lialun wanen tahiamma, i hapuasa pohe Satan ailei kilan kolakol ma waliko tenen lalap wanen ti pulutiai teka seilon. ¹⁰I aile waliko kilan ti pulutiai teteka seilon laha hoi kane tesol ti kaui kawatan ti tap tahi tapoan nake laha tahi kakaian salan ti Haeu. Aile ape Jises Krais kum awai laha ti kawatan ti lialui woulaha. ¹¹Nake ti tenen ien Haeu lioi hawane laha lehe laha soh ti waliko tenen puputa. ¹²Aile ape teteka laha kum soh waliko tenen salan ti Jises Krais ape laha amuke ailei saun lialun, Haeu tieni laha ma axi laha kawatan.

Teka kahikahi Jises Krais tu xoxoa ti namilomuto tetan

¹³Tesol akikimate ti Jises Krais, Haeu pate i waheni hawane amuto. Lawe mewenae amite kak kemulik hani i ti amuto hatesol. Pate solian ti amite aile ukek nake Haeu kilamiwen amuto imat ti i tanomi lawe waliko lehe Jises Krais awai amuto ti kawatan ti lialui woomuto. I aile ukek ien na amuto soh hawane waliko tenen salan ti Jises Krais. Ape Holi Spirit huali amuto lehe amuto sohot hawane unaui Haeu, seilon tetenen Haeu amuke. ¹⁴I hapuasa amite ti kaxi ahutiai meng solian ti Jises Krais hani amuto lehe amuto soh tetan ma i namiloi ukek amuto pate tuah. Ape amuto tuai Jises tel Masiwi ti kako ti lalape pohen ma soliaian.

¹⁵Aile ape tu xoxoa ma hong konginiwa tesol kakain sawisawin ti amite hanauen amuto leili meng ti amite kaxiwen ma he pas ti amite tai haniwen amuto.

¹⁶Haeu tel Tamakako waheni hawane kako. I hakui kakapitini kako ma i haxoxo namilokako ti mon atengiai huhual tetan nake pate i ailes hasolia hani kako. ¹⁷Amite kamei i ma Jises Krais tel Masiwi ti kako lalu hakui ma haxoxo tatalewa amuto ti ailei lawe puasain solian ma kakain sawisawin.

3

Pol kamei teka Tesalonika ti lotu hualian hetekie tesol aposel liai

¹Tesol akikimate ti Jises Krais, tapeini kakaiamite ie. Lotu hualima amite lehe amite kaxi sawatenei aheke meng solian ti Jises Krais ma waxi teka seilon hong usi tenen kakain ien hanowi ti amuto. ²Lotu kameiwa Haeu awaiamite ti seilon tenen pate lialun nake kumahe lawe seilon soh ti Jises Krais. ³Tuahe tel Masiwi Jises lawe i aile waliko tenen na i kakawen. Aile ape i hakui ma awai amuto ti pupuase Satan. ⁴Namilomite xooaan ka tel Masiwi Jises huali amuto aile kapitiniai lawe waliko ti amite honewen amuto. ⁵Amite kamei tel Masiwi Jises ti haxewa hawanei lalape wawahen ti Haeu hani amuto ma hualiamuto ti tu xox hanowi ti Jises Krais kalak kawatan tenen tenen tunahai amuto.

Nauna ti Pol hani teka nunuxa ti ailei puasain

⁶Tesol akikimate ti Krais, amite hone hawane amuto ti hahitake axe tel Masiwi Jises, siawa ti teteka leilomoto laha nunuxa ailei puasain ma kum hong usi nauna ti amite hanauen amuto. ⁷Puki amuto tioi sale ukenei waliko solian ti amite ailele. Amite kumahe nunuxa ti lokon amite kapimuto. ⁸Kumahe pahamite amuto tua waxeni amite. Puki amite puas makeh ngain ma ipong lehe amite kum hakawata amuto. ⁹Kalak amite aile ukek ien, i pon amite kamea huhual ti amuto. Tuahe pahamite amuto puas usiwa saun ti amite ailele. ¹⁰Ti amite tutuen kapimuto, amite hone amuto ka kum axiaxi an hani teka nunuxa ti ailei puasain.

¹¹Amite kak ukek nake amite hong ka hina seilon leilomoto laha watakai ailei puasain ma laha tua solonga hani waliko ti seilon liai. ¹²Ti hahitake axe tel Masiwi Jises Krais, amite hone eliel seilon tenen ien ka laha puas alua kapitawa ma auni aliakewa laha. ¹³Tuahe tetesol akikimate ti Krais amuto kumahe masin ien, kum aile lilioi soliae pupuasamuto.

¹⁴ Na tel ti amuto kum hong usi nauna ti amite leili teik pas ie, kakane hahongoa tesol liai. Kum huhukuma kapin lehe i hienake lialui woun. ¹⁵ Tuahe kum tutumui i. Nau hasawiva i hanowiwa tel ti akikimuto wanen.

Tiliai kakai Pol

¹⁶ Nga kamei tel Masiwi Jises tetel i aile hasolia tiakaha, lehe lawe i aile haewia leilomuto ti sale haewian tenen tenen. Tel Masiwi Jises kapimuto hatesol.

¹⁷ Nga Pol tatai ti puki minak wanen, amuam tetak haniwa amuto. Meinak ti taiai pas se masin ie.

¹⁸ Nga kamei Jises Krais tel Masiwi ti kako ti aile hasolia hawane haniamuto hatesol.

1 Timoti

Teik pasi Pol hani Timoti

Kakain ti haxewai teik pepa ie

Pol tel aposel tai teik pas ie hani Timoti sai ahang 34 muhin ti Jises moih aliawa ape Haeu waxy i hani tesol tonan. Timoti i tel hualian ti ailei pupuasan ape Pol tiheli i tehu taon Epesus ngahatiai teka kahikahi Jises ien. Tel tinan i Ju a tel taman i Grik. Timoti hong soh ti Jises Krais lokon ti Pol kaxi ahuti meng solian ti Jises. Aile ape Pol axai i natun. Pol kakane hakui Timoti ti aka haxoi namilon ti Jises Krais ma usi kapitiniiai kakain salan ti Haeu nake kilan teka laha hanau hakalala seilon ti aweisali Haeu. I hananau sale nanahihi ti teka masiwi lehe lato neini aluini teka kahikahi Krais. Tin i nanau teka kahikahi Krais liai lehe lato aile saun tenen ti Haeu amuke. Pol pahan Timoti sohot hawanewa unaui Haeu tenen pate solian, tetel lawe i usi hatapo namili Haeu.

¹ Teik pas ie tataiak nga Pol tel aposel ti Jises Krais hani o Timoti. Haeu tetel awaikako ma Jises Krais, tetel i hasohotu lawe waliko ti kako to mon atetengi, lalu hauhua kilami nga aposel.

² Timoti, o masin natuk wanen nake o soh hawane kakai Haeu ti nga kaxi ahuti haniwen o. Nga kamei Haeu tel Tamakako ma Jises Krais tel Masiwi ti kako lehe lalu kola lalape soliaialalu hetekie tatahan ma hatona hasolia tiam.

Hahonghong ti sale teka hanau waliko kumahe salan

³ Timoti, o tiliwen Epesus, masin ti nga honewen o ti nga lua salili o hani texux xux Masedonia. Hina seilon laha hananau waliko tenen kumahe salan. Kakane elieliba laha kum ailele. ⁴Honewa laha kum kakaxi meng tenen kumahe salan ma lioiwa kakain weluvelun ti nenex. Waliko tenen ien hatanoi lungelunge ma halialui wasol. I kum huali uke seilon ailei puase Haeu. Mewenae na namili seilon xoxoan ti Haeu laha pon ailei waliko ti Haeu pahan.

⁵ Nga hani o tenen puasain ien nake Haeu pahan seilon he wawahenawa ti leili ate-laha. Laha pon kolai wawahen tenen ien na namilolaha xewan ti tioiai waliko solian ma lialun hetekie na namilolaha tin xoxoan

wanen ti Haeu. ⁶Hina seilon laha sel ti saun tenen ien ape laha to aile kakapitini kakain tenen tap pupuasan. ⁷Pahalahla lehe seilon paxai tioiwa ka laha teka hanau nauna ti Moses tuah laha kum xeu waliko ti laha kakak kalak laha kak mamatuke hanowi ka laha tioi.

⁸Kako tioi ka tesol nauna ien solian na seilon puas usi aluimi. ⁹Kumahe Haeu aile tanomi tetesol nauna hani teka laha hong tamani kakaian tuahe kane teka xaputiae nauna tetan ma tahaii kakaian, teka laha kum nam waxy i ma aile haweluvelu saun lialun, teka laha namiloi ukek i kumahe tuah ma laha kum lotui i, teka laha telei tamalaha ma tinalaha, ma teka laha telei seilon liai. ¹⁰Tesol nauna ien tin kane seilon tenen laha to ailele saun lialun ti wawan hehin, teka laha ailele sikisiki tenen ti pate hiemain, teka laha lungei waxy seilon ape hangaini hani unaui seilon liai, seilon ti weli puputa, teka laha putini laha aile waliko ma teka laha to ailele waliko liai tenen lialun. Na laha to ailele tesol waliko ien, laha pahoxai kakain salan i ahuma ti Haeu. ¹¹Tenen kakain salan ien kako tunahi leili tenen meng pate solian ti Jises. Haeu tel pate tuah hani ng aksi ahutian.

Pol kak kemulik nake ti lalape soliai Haeu

¹² Nga kak kemulik hani Jises Krais tel Masiwi ti kako, tetel i hakui nga ailei puasan nake i namiloi ukek nga unauan solian ma i kilami nga puas tetan. ¹³Kalak ti imat lawe nga kak saxuti Jises Krais ma aile halialu hawane teka kahikahin, ti lalape tatahan ti Haeu, i kum axi nga kawatan. Lokon ien nga tai soh ti Jises Krais ape waliko ti nga ailele, nga kum tioi ka lialun. ¹⁴Kalak wouk pate lialun, Haeu aile kola lalape soliaian hani nga ape i hani nga namil xoxoan ma wawahen tenen Jises Krais hina.

¹⁵Tenen kakain ie se pate salan wanen ma lawe seilon hong sohoa. Jises Krais sohot hanima tehu pon ie awaiai seilon ti kaui kawatan ti lialui woulaha. A nga tel pamu lialuan ti lawe seilon lialun. ¹⁶Tuahe kalak wouk lialun, ti lalape tatahan ti Haeu, i kum axi nga kawatan. Jises Krais i kum saxoh lengeiniak tel seilon pate lialun. I aile kola ka teka seilon lialun liai, tin i pon laha soh tetan ape laha pon ukei tonain kapi Haeu ti tap tahi tapoan. ¹⁷Aile ape kako haxawawa ma amukewa Haeu lian tehue, I tel Masiwi tapein, nenein tetan tap tahi tapoan. I tap

tahi matean. Tap tel ningahi uke i. Telawé i Haeu. Salan wanen.

Pol kak hakui Timoti

¹⁸ Timoti tel natuk, waliko ti nga hohone o ailean, masin ti teka kuluiak kakai Haeu kakawen imat sale puasam. Nga hanamena o lehe o puas hapoponowi kakaiatalo kalak hina seilon laha pahoxai o. Tu xoxoa masin tel seilon kuin leili hile. ¹⁹ Haxoxo tatalewa namilom ti Krais ape ailewa saun tenen o tioi ka sawisawin. Hina seilon laha lioiwen saun tenen ien ma xoxoi namilolaha i putawen, hanowi tea waian na i oh manan he hok. ²⁰ Leilolaha Himeneus ma Aleksanda. Hauhua nga hani lioiwen Satan lehe ti lalape kawatan ien lalu paxai tioi lialui woulala ape lalu aile tapeini kak halialui Haeu.

2

Pol hahanau sale lotuiai Haeu

¹ Nga kakane eliel o ma teka kahikahi Krais kapim, amuto lotu hualiwá lawe seilon. Kameiwa Haeu hualialaha tenen ti na laha tap ape kak kemulik haniwa i. ² Lotu hualiwá teka ngahat ma teka masiwi ti xux. Na laha nahike hasolia xux, totonakaha soli ape tap hilehile. Ape tap tenen waliko i kongini kaha ti lotuiai Haeu ma ailei tenen na Haeu pahan. ³ Saun tenen ien solian, i hamuamua Haeu tel awaiaakaha. ⁴ Pahan i awai hatesol seilon ti kawatan ti lialui woulala ma tin laha xewawa sale mengon. ⁵ Haeu telawé ti lawe seilon ape tin telawé hukuminiai Haeu ma seilon. I se tetel seilon Jises Krais. ⁶ Puki alia i kahui lialui woukaha hatesol. Jises Krais mat ti ukei totone lawe seilon. Tenen meng ien Haeu hani amite kaxi ahuti aope ie. ⁷ Aile ape Haeu kilami ngá tel aposel ma ti kaxi ahutiai mengon. Nga tel hanau teka kumahe Ju kakain salan sale Jises Krais. Kumahe nga tua kaxi putini. Kakain ien salan wanen.

⁸ Tapai tesol tesol amuto apuha ti lotu, pahek teka wawan tuliniwa minalaha lotuiai Haeu, tap lengelenge ma wasol lialui.

⁹ Tin pahek teka hehin puxui ma sosoi aluiniwa sosolaha lehe seilon kum paxai kapitini laha. Laha kum aile hahakila tenen tenen hani ukulaha ma hahakea waliko tenen pate tuah masin gol he tinulaha. Laha kum soosoi maia tenen kuhun pate lalap. ¹⁰ Nga kak ukek ien nake teka hehin laha lotuiai Haeu, laha solian ma tuah ti puli Haeu na laha aile puasain solian.

¹¹ Teka hehin hong aluiniwa ma puas usiwa hatesol waliko teka masiwi hahanau.

¹² Nga kum sowini hani teka hehin to masiwi ti teka wawan ma hanau alaha kakai Haeu ti puli lawe seilon. Laha kewa hong matainaiak kakain. ¹³ Pake Haeu tanomimu Adam tel wawan, ape imuh i tanomi Iv tel hehin.

¹⁴ Kumahe Adam tel Satan puluti, i puluti tel hehin ape i tahi kakai Haeu. ¹⁵ Tuah Haeu awai teka hehin ti kawatan ti lialui woulala na laha hehin tenen tinawi, na namilolaha xoxoan tetan, laha waheni seilon liai, laha hani hatapo Haeu tupualaha hetekie saun tenen i amuke.

3

Sale teka masiwi ti kahikahi Krais

¹ Na tel seilon pahan wanen i sohot masiwi ti teka kahikahi Krais, i namiloi kewak tenen puasain ien pate tuah wanen. Tenen kakain ngá kakak ie se salan wanen.

² Aile ape i kewa seilon tenen tap tel pon tienian ti tenen na waliko. I hamalumua kapi telawé axoan. I kewa seilon namilo ti tiahiai isiai pahan ti ailei saun lialun. I ailewa saun tenen ti seilon liai sameni. I kewa seilon tenen i amuke auniai soliwa ma tin i pon hanau seilon liai. ³ I kum un kakasia unum ailan, I kewa seilon ti watakaiai hilehile ma kak hapatapat kapi seilon liai tuah i kewa seilon ti hasoliai wasol. I kum halepelep moni. ⁴ I ngahati hasoliai teka lohe ingan. I hanau hasoliai natun ti hong tamaniai kakaian. ⁵ Na tel seilon kum pon ngahati hasoliai teka lohe tehu ingan, pamu i kum pon ngahati hasoliai teka kahikahi Krais. ⁶ Kewa i kumahe seilon ti i sosohotua kahikahi Krais pala aope uke i sameni aliakte i ka i sohot kosea masiwi. Na i aile ukek ien, Haeu axi i kawatan tenen ti i hanimu Satan. ⁷ Tel masiwi ti teka kahikahi Krais ailewa saun solian lehe teka seilon laha kum soh ti Krais laha kak sameni i. I kewa tap woun lialui lehe tap seilon misahi i ape i kum put hani totohong ti Satan.

⁸ Tin masin teka masiwi laha pupuas hahitake masiwi ti teka kahikahi Krais, laha ailewa saun tetenen ti teka liai sameni. Kewa laha seilon tenen kumahe leholaha huoka. Laha kum un kakasia unum ailan ma kum pupuluti seilon ukei moni.

⁹ Laha hana hatapo namilolaha ti usiai lawe kakain ti Haeu hatakei haniwen kako.

¹⁰ Imat ti laha kilami teka masiwi ti teka kahikahi Krais, paxai aluinimua woulala ma puasalah.

¹¹ Axoalaha tin kum kak hahalialu seilon liai. Laha kewa hehin tetenen seilon liai sameni. Laha tahiwa isiai pahalaha ailei saun lialun ma aile usiwa saun solian ti puki laha ukek laha aile.

¹² Tel masiwi i pupuas hahitake teka masiwi ti teka kahikahi Krais, i hamalumua kapi telawé axoan ma ngahati hasoliawa teka lohe ingan. ¹³ Teteka masiwi na puasalah seolian, teka liai namiloi ukek laha seilon pate tuah ape puki laha kak matut uke sale xoxoi namilokaha ti Krais.

Pol kaxi waliko ti Haeu hatakei sale Jises Krais

¹⁴ Pahak wanen nga tahia kosea hani kapim tuahé nga kum tioi aluini loke tahi-aiak. Aile ape nga tai tesol nauna ie hani o. ¹⁵ Na o ridaiwa teik pasuk ie, o tioi saun tenen ala teka kahikahi Krais aile nake laha seilon ti Haeu, tetel pate pohen. Masin ti tehu kuku tuah i sekui haxoxo tehu ing, tin masin teka kahikahi Krais laha tu xox ti meng salan ti Haeu lehe i puas ti teka seilon liai.

¹⁶ Lawe waliko ti Haeu hatakei hani seilon sale Jises Krais se pate tuah ma salan wanen. Masin ti tenen pak i ukek,

Jises Krais i sohot seilon wanen.

Holi Spirit kola hani kaha ka i tel Nati Haeu.

Teka engel ningahi i muhin ti Haeu xahateniwa i ti matean.

Ti Haeu waxi i hani tonan, i kola lalape pohen ma soliaian.

Teka kahikahi Krais kaxi sasawateni men-gon
hani teka seilon ti tesol tesol
ape kilan ti laha soh tetan.

4

Pol kakak teka mengolaha puputa

¹ Holi Spirit kak hahaxewa ka imat ti aliai Jises Krais hina seilon laha aka lioi namiloha ti usiai kakai Haeu ape laha hong usi teka laha hananau meng tenen puputa i ahuma ti spirit lialun. ² Tesol hanauai seilon ien leholaha huoka ma laha puluti seilon ka mengolaha salan. Nake ti lialui woulaha laha kum tioi waliko tenen solian ma na lialun.

³ Laha halini na seilon sal ma aniai hina an. Tuahé Haeu namiloi ukek ewi na seilon sal ma i tanomi hatesol an lehe teka laha

tioi ma soh kakaian laha amuke hahuonen ape kak kemulik hani i. ⁴ Lawe waliko ti Haeu tanomi se solian, kako kum wawatakai na tenen, waxy amukewa ma kak kemulik haniwa i. ⁵ Puki Haeu ukek lawe waliko i tanomi se solian ape na kaha kak kemulik hani i, namilokaha tin i ukek tesol waliko ien solian.

Tel unaui Krais solian

⁶ Timoti, na o hanau tesol nauna ien hani teka akikikako ti Jises Krais, o tel unaui Krais wanen, tetel i lap hetekiema kakain salan ti Haeu ma puas usi hatapoan.

⁷ Kum sohosoh leili kakain ti seilon tua aile tanomi ma tap pupuasan tuahé hanau elielawa o waliko tenen Haeu pahan. ⁸ Solian na seilon puas ti hakuai tupualaha tuahé pamu tuah na laha puas usi kakai Haeu nake i hani laha tonain solian ti aope ma ti imuh kapin, masin ti i kakawen.

⁹ Waliko ti nga kakak ie pate salan. Lawe seilon hong sohoa ma nameni konginiwa. ¹⁰ Kako teka kahikahi Krais puas eliel hahawane nake kako hana hatapoan namilokako hani Haeu, tetel pate pohen. I tetel awaiai lawe seilon ti kauai kawatan ti lialui woulaha kasinan teteka laha soh tetan.

¹¹ Hanaua teka seilon tesol waliko ien ma honewa laha puas usian. ¹² Kum hahani seilon liai nam teheni o nake o uluha. Ailewa saun solian lehe teka kahikahi Krais paxau ukene. Lawe kakawa ma ailewa waliko tenen solian, wahleniwa seilon liai ma kum ailele saun lialun. Hana hatapoan namilom haniwa Haeu. ¹³ Imat ti nga tahia hani kapimuto, lawe ridaiwa pepai Haeu hani teka kahikahi Krais, hanaua laha aweisali Haeu ma kak hakuiwa laha puas usian.

¹⁴ Aile tatalewa tenen puasain ien pake Haeu huali o ailean masin ti Holi Spirit hanamiloa teka masiwi kakaneam lokon ti laha hana minalaha patul tetam ti lotu hualiam. ¹⁵ Puas usi hawanewa tesol waliko ien ti atem wanen lehe lawe seilon ningahi ka wawahen tetam ma wasolamulu Haeu i to soli aheahewa. ¹⁶ Kanipetiwa nanahiam ma lawe pupuasam. Hanaua mewenae waliko tenen salan. Kum lilioi kakai Haeu lehe i awai o ma teka laha hong usi kakaiam ti kauai kawatan ti lialui woumuto.

5

Nauna ti Pol hani Timoti sale neiniae teka kahikahi Krais

¹ Kum tutumei tel wawan pamu salaimat tuahe kak hamalehua hasawian hanowi ti na o kakane tel tamam. Aile haniwa teka wawan uluha hanowiwa ka laha ukalam wanen. ² Aile haniwa hehin tenen pamu salaimat hanowi ti o aile hani tel tinam ape teka uluha masin ka laha tuam wanen, kum wawaleni laha.

³ Honewa teka kahikahi Krais ka laha au-niwa ma kolawa saun solian hani teka hehin axoalaha matewen a tap seilon aunialaha.

⁴ Tuahé na tel hehin axoan matewen a i hina natun, tesol natun kolawa woi Haeu ape auni kahui aliakewa tel tinalato. Saun tenen ien i hamuamua Haeu.

⁵ Hualiai teka hehin axoalaha matewen, namilolaha xoxoan ti Haeu a tap seilon aunialaha. Teka hehin ien laha lotu ngain ma ipong kameiai huuhal ti Haeu. ⁶ Tuahé teteka hehin axoalaha matewen a laha tua nam waxy hamuamuaialaha, laha masin seilon maten, laha kum hani Holi Spirit ti kapititalaha. ⁷ Kaxi kuluiwa nauna ie haniwa teka kahikahi Krais lehe laha puas usi ape tap tel i howini halialu laha.

⁸ Tel na i kum auni hasolia akikin, kasinan na i kum auni teka lohe ingan, i kola ka namilon kumahe xoxoan ti Haeu ma i tel seilon pamu lialuan ti teka laha kum soh ti Haeu.

⁹ Tai hanawa axe teteka hehin axoalaha matewen, ahangulaha kumahe itan ti 60 ma laha hahamalum kapi telawe axoalaha ti lokon axoalaha moihin tutuen. ¹⁰ Hualiai teka hehin ien na axalaha lalap ti soliai pupuasalaha. Puasain tenen masin ie: auni hasoliai natulaha, ngahatiai teka soliwa, teheni aliakealaha ti aile kolai saun ti wawahen hani teka kahikahi Krais, hualiai teka laha leili kawatan ma ailei saun solian tenen tenen hani seilon liai.

¹¹ Tuahé kum hahaha axe teka hehin axoalaha matewen a laha uluha tutuen, uke ti isiai tupualaha laha nam maluwe puasalaha ti Krais. ¹² Na i sohot ukek ien, laha hahitake lengi Haeu nake laha aka lioi tenen puasain ien ti kemuk laha kak tutuoha ailean. ¹³ Tin laha uke nunuxa ailei puasain ma lolia mimisah hani ing tehu tehu. Laha tua nihini laha hani waliko ti seilon liai ma kakak waliko ti ala kumahe ti laha kak. ¹⁴ Nauna tetak hani tesol hehin ien ukek, laha sal uleawa ma auni hasoliawa axoalaha ma natulaha lehe teka seilon watakaialaha kum howini halialu laha. ¹⁵ Nga kak ukek nake teka ti

laha talewen tehitolaha hani Haeu ape laha ailele waliko tenen Satan pahan.

¹⁶ Na tel hehin kahikahi Krais i hina akikin hehin ti axoan mat saliliwen, kewa i aunian lehe i kum hakawata teka kahikahi Krais liai. Laha hualiai teteka hehin axoalaha matewen ti tap seilon aunialaha.

¹⁷ Teka kahikahi Krais, aile aluinima ma kahui haponowiwa teka masiwi ti neini hasoliaiamuto, hanauamuto ma ti kaxi haniamuto meng solian ti Jises Krais.

¹⁸ Masin ti teik kakain he pepai Haeu ukek, "Kahui hasoliaawa teka seilon na laha pupuas." (Deut 25:4) Tin i ukek, "O kum xiotti mimingini awe tok bulmakau ti halinian aniai komem ti o hahapuasa i ailei tenen puasain ti seliai komem ti he ulin." (Deut 25:4)

¹⁹ Kum hong wawaxi na seilon telawe sului tel masiwi ti teka kahikahi Krais, mewena na seilon hua ma na tolu kakaxi ka lato ningahi i aile waliko tenen lialun. ²⁰ Na tel i aile waliko tenen lialun, kaxi hatakei haniwa teka kahikahi Krais lehe ape laha mamata ailei saun lialun.

²¹ Usi hatapoa hatesol nauna ien, kum aile nenexi seilon. Nga kak ukek ie ti puli Haeu, Jises Krais ma teka engel ti Haeu.

²² Kum saxohuxoh kilamiai masiwi ti teka kahikahi Krais, paxai aluinimua woulaha. Kum tutuai seilon ailei saun lialun a puki o haelieliwa lehe o hamalum seilon tenen ti Haeu amuke.

²³ Kum unuun mewenae kan, tin unua teik kokole waen hualiai tiam nake lawe o tinu.

²⁴ Nameniwa tetenen ie. Hina seilon saun lialun ti laha take kosea. Aile ape o tioi woulaha imat ti o paxai kolongeni laha. Tuahé teka liai, saun lialun ti laha seilon po tioi imuh. ²⁵ Tin masin, hina seilon saun solian ti laha take kosea. Tuahé teka liai, saun solian ti laha seilon kum paxai tioi hulutini, laha po tioi imuh.

6

¹ Teka kahikahi Krais laha unaui seilon, laha kolawa puasain solian ma hong usiwa teka masiwi ti laha lehe teka seilon liai kum kak teheni Haeu ma hanauan ti kako.

² Na teteka masiwi lato tin kahikahi Krais, tesol unaualato lato kum nanamilo ka ewi ti tahiai kakaialato. Laha nameniwa ka laha se hahitakalato. Ala pamu laha puas eliel ahewa nake laha pupuas hualiai seilon ti Haeu, teteka laha waheni.

Teka hanau waliko tenen puputa ma teka halepean ti moni

Timoti, hanaua teka kahikahi Krais tesol waliko ien ma kak hakuiwa laha aile usian.³ Tel na i hanau waliko liai tenen, i kum onoteni kakain salan ti Jises Krais tel Masiwi. Kumahe i huuhalia seilon ailei saun solian ti Haeu pahan. ⁴ Tel seilon ien i namiloi haxawa aliliake i. I sokok i tioi hatapo waliko tuahe tap wanen titioan. Pate i waheni kak hapatapat kapi seilon ma lungelung sale kakain. Tesol waliko ien i hasohotu tumetume ma aile seilon six lalolal ti namilialun hani seilon liai. Tin i aile laha kak halialu seilon ma namilola lawe lialun nake seilon liai xoini laha ti tenen na waliko. ⁵ Tin laha kum paxai tioi waliko tenen solian ma lialun ma lawe laha kak hilehil kapi seilon liai. Laha kum paxai tioi waliko tenen salan ma puputa. Laha sokok laha uke kilan soxi na laha hanau seilon sale Haeu.

⁶ Tuahae soxi kilan i kum hapono hasolia totonakaha. Mewenae na kaha hana hatapo namilokaha hani Haeu ma kaha amuke waliko tenen ti kaha hina, Haeu hapono kaha. ⁷ Pake tap tenen waliko kaha hina ti kaha takahama ape ti tap tenen waliko kaha waxi ti kaha ti kaha mat. ⁸ Aile ape na kaha hina an ma sosokaha, kaha amukewa waliko ien.

⁹ Teka pate pahalaha isian lehe laha kilan soxi, isian ti laha i aleheteni laha ape laha put ti ailei waliko tenen lialun. Tesol isialaha ien aile halialu laha ape laha lialu tautamus masin na tea waian i taxitax leili laman lapal. ¹⁰ Xoxoi namil ti moni se puole waliko lialun tenen tenen. Hina seilon laha hana hatapo namilola lawe ngahoii moni ape laha tale tehitolaha hani Haeu. Aile ape laha kau lamani kawatan masin seilon ti i tapuhi aliake i ngol.

Tapeini nauna ti Pol hani Timoti

¹¹ Tuahae o Timoti salini hatapoia hatesol waliko lialun ien nake o seilon ti Haeu. Haelielia ka o aile waliko mewenae sawisawin, lawe ailewa waliko tenen Haeu pahan hetekie xoxoi namilom tetan. Waheniwa seilon liai ma lawe aile aluinawa laha. Kum aka lilioi puase Haeu kalak kawatan tunahi o. ¹² Masin tel seilon leili lokolokoi wa, i hana hatapo namilon ti ukei kahun ti tehu lokoloko ien, tin masin o hana hatapoia namilom haniwa Haeu. Aka haxoa tonain kapi Haeu ti i haniwen o. Nameniwa o kak ahutiwen ka o soh hawane ti Jises Krais ti puli kilan seilon. ¹³ O tioi

kewak, nga hahani o tesol nauna ien ti puli Haeu, tetel i axi hanawain hani lawe waliko moihin. Jises Krais tin i papaxai. I tetel i kaxi ahuti xoxoi namilon ti Haeu hani Pontius Pailat. ¹⁴ Usi hatapo hawanewa tesol nauna ien lehe tap tel i pon tieniam ti tenen na waliko, atengi tataen ti Jises Krais tel Masiwi aliamma. ¹⁵ I po aliamma taun ti Haeu kilamiwen. Haeu se pate tuah ma sawisawin. Telawe i neini hahatapo lawe waliko. I Masiwi tapein ti lawe masiwi. ¹⁶ Mewenae i tap tahi matean. Lalape xewai totongan, tap tel xohi uke hani kapin. Tap tel ningahiwien i ma tin tap tel pon ningahian. Kako haxawawa axan ma sameniwa lalape pohen lian tehue. Salan wanen.

¹⁷ Honewa teka laha kilan moni kum hanasanas. Laha kum hana hahatapo namilola hani soxialaha nake i kum pon hualialaha. Hana hatapoia namilola hani Haeu. I tetel i waxeni kako lawe waliko ti hamamuuaikako. ¹⁸ Honewa laha hapuasawa moniulaha ti hualiai seilon liai. Lawe aile hakilawa waliko tenen solian ma laha kewa ongawi ti axiai soxi hani teka seilon laha tae ti tenen na waliko. ¹⁹ Na laha aile ukek ien, laha masin seilon tenen laha ahingini waliko tenen solian ti hapuasai imuh ma totonalaha uke he tuah nake puki Haeu neneini nanahialaha.

²⁰ Timoti, ngahati hasoliawa hatesol waliko ti Haeu hani o ngahatian. Kum tutuai teka ailei kakain tenen tap pupuasan, tetenen i teheni axe Haeu ma i pahoxai kakain salan tetan. Laha namiloi ukek laha pamu anesoan tuahe tetenen ti laha hahanau kumahe anesoin wanen. ²¹ Hina seilon laha soh tetenen ien ape laha aka lioi puas usiai kakai Haeu.

Tiliai kakaiak nga kamei Haeu lehe i aile hasolia hawane hani amuto hatesol.

2 Timoti

Teik pasi Pol liai hani Timoti

Kakain ti haxewai teik pepa ie

Pol tel aposel tai teik pas ie sai ahang 34 muhin ti Jises moih aliawa ape Haeu waxi i hani tesol tonan. I tai lokon i kakalabus ti Rom ti lehe laha telei i. Laha kalabusi i nake i tel kahikahi Jises ma tin i kaxi ahuti meng solian ti Jises. Timoti i tel hualian ti ailei pupuasan ape Pol tihieli i tehu taon Epesus ngahatiai teka kahikahi Jises ien. Timoti hong soh ti Jises Krais ti Pol kaxi ahuti meng solian ti Jises. Aile ape Pol axai i natun. Pol kak haxoxo Timoti ti aile tatalewa puase Haeu kalak kawatan tenen tenen tunahi i. Tin i hone Timoti tu matuhawa ti kakain salan nake hina seilon woinakon hanauai kakai Haeu.

¹ Nga Pol tel aposel ti Jises Krais ti puki namili Haeu. Haeu kilami nga kaxi haniai teka seilon sale tonain kapin ti tap tahi tapoan. Tenen tonain ien, Haeu kakawen i hani teka laha sohot kahikahi Jises Krais, teteka laha hong usi nauna tetan.

² Teik pas ie nga tai hani o Timoti. O masin wanen natuk pate nga waheni.

Nga kamei Haeu tel Tamakako ma Jises Krais tel Masiwi ti kako lehe lalu aile kola tatahan ma lalape soliaialalu hani o ma hatona hasolia tiam.

Pol hahaxoxo namili Timoti ti Jises Krais

³ Ngain ma ipong ti na nga lotu, nga nameni o ma kak kemulik hani Haeu ti xoxoi namilom tetan. I tetel nga ailele pupuasan ti leili atek masin ti teka seilon tetan ti matahaun. ⁴ Nga nameni tangiam ti nga ku salili o ape pahak wanen nga paxai uleamu o lehe nga amuam hawane.

⁵ Nga nameni ka xoxoi namilom ti Jises Krais salan wanen masin ti tel tini tel tinam Lois ma tel tinam Unis. Ape nga soh hawane namilom tutuen masin ien. ⁶ Aile ape pahak o hapuasa eliel ahekewa pohe Holi Spirit ti o kewen lokon ti nga lotu hana minak patul tetam. ⁷ Pake Holi Spirit ti Haeu kum aile ukek ka kako seilon tenen ti mamata. I hapohea kako aile puasan, i hani kako wawahan ti wahenai seilon liai ma i huali kako tahiiai isiakako ti ailei saun lialun.

⁸ Aile ape kum nonomuha ti kaxi haniai seilon liai waliko ti o tioi sale Jises tel Masiwi ti kako ma kum hien pupuluhini nga ka nga kakalabusake ailei puase Jises. Kalak seilon liai axi o kawatan nake o tel kahikahi Jises, tu xoxoa pake Haeu hapoheawen o. ⁹ I awai kako ti kawatan ti lialui woukako ma kilami kako seilon tetan, teteka laha hani hatapo laha ailei puasan. I aile kumahe nake ti soliai puasakako tuahe nake liai i namiloiven ma ti lalape soliaian. Imat ti i tanomi lawe waliko ti tehu pon ie, liai i namiloiven i aile kola hani kako lalape soliaian ti i taloma Jises Krais mat huaikako. ¹⁰ Aile ape kako tioi ka Haeu waheni kako nake i hani kako Jises Krais tel awaiakako ti kawatan ti lialui woukako. Jises waxaini pohe matemate ape i hei aweisalukaha seilon ukei tonain kapi Haeu ti tap tahi tapoan na kaha hong soh meng solian tetan. ¹¹ Ape Haeu kilami nga tel ti hanauai seilon ma tel aposel ti kaxi ahutiai meng solian ien. ¹² Nake ti tenen ien laha axi nga kawatan. Tuahne nga kum hien puluhini ka nga leili kalabus nake nga tioi tetel namilok xoxoan tetan. Nga tioi hawane ka Haeu ngahati tenen meng solian ti i hani nga kaxi ahutian atengi ngain ti i hiniti hatesol seilon.

¹³ Akeni konginiwa kakain ti nga hanauen o nake se salan wanen. Tu eliel tatalewa ti xoxoi namilom ti Jises Krais ma ti wawahen tetam hani seilon liai. O pon ailean nake o kahikahi Jises Krais ma o usi eliel nauna tetan. ¹⁴ Hetekie huuhal ti Holi Spirit tel i kakapiti kako teka kahikahi Jises, ngahatiwa nauna salan ti Haeu haniwen o.

¹⁵ O tioi ka kilan kahikahi Jises ti texux xux Asia hetekie Pigelus ma Hemogenes, lato tale tehitolato hani nga.

¹⁶ Nga kamei Haeu tel Masiwi ti aile kolai soliaian hani Onesiporus hetekie tesol lohe ingan nake lawe i aile hakui nga. I kum hien puluhini ka nga leili kalabus. ¹⁷ Ti i tahiawa Rom i upia eliel nga atengi taen i tunahi. ¹⁸ Nga kamei Haeu tel Masiwi ti aile kolai soliaian hani i tataen ti hinitiai hatesol seilon. Pate o tioi ka Onesiporus huali hakilawen nga ti tehu taon Epesus.

2

Unaui Jises Krais ti Haeu amuke

¹ Timoti tel natuk, nga kakane ulea o tu xoxoa nake wawahen ti Haeu kapim ma o se kahikahi Jises Krais wanen. ² Waliko ti nga

hanauen o sale Jises Krais ti puli teka seilon, kaxi haniwa teteka seilon o tioi ka laha pon kaxi hakouta haniai teka liai.

³ O tioi nga leili kawatan nake nga ailele puase Haeu. Kalak seilon axi o kawatan nake o kahikahi Jises, puas tatalewa unaun wanen. ⁴ Masin tel unaui tel masiwi, pahan tel masiwi amukewa i. Aile ape i puas matuha ti tel masiwi tetan. ⁵ Tin masin tel ti leili lokoloko, i kum uke kahi lokoloko na i kum aile usi saun ti tehu lokoloko ien. ⁶ Tin masin tel na i puas eliel ahiwiai kin ma seinian. I tetel imat ti waxiai an he kin. ⁷ Nam paxaiwa waliko ti nga kakak pake Jises tel Masiwi haxewa hani o lawe waliko.

⁸ Namiloi kapitiniwa Jises Krais masin ti nga hanauen o ti nga kaxi ahuhuti meng solian tetan. I tel kahi nati David tel masiwi. I xahat aliawen ti matean. ⁹ Nake ti nga kaxi tenen meng solian ien, nga kau kawatan hetekie laha xiotti kongini nga ani sen hanowi seilon tenen woun lialun. Tuahae tap tel kongini uke kaxiai kakai Haeu. ¹⁰ Aile ape tap nga aile lioi puase Haeu kalak kawatan tunahi nga nake pahak nga huali teka seilon ti Haeu kilamiwen tetan. Nga aile tatale tenen puasain ien lehe Jises Krais awai lato ti kawatan ti lialui woulato ape lato uke tonain pate tuah kapi Haeu ti tap tahi tapoan.

¹¹ Teik kakain ti kako teka kahikahi Jises kakaxi, salan wanen ti i ukek,
Na kako mat ailei puasain ti Jises Krais
pahan kako ailewa,
kako to kapin lian tehue.

¹² Na kako kum nomuha kaui kawatan ti ailei puase Haeu,
imuh kako neini teka seilon kapi Jises Krais.

Na kako aile hanowi ka kako kum paxai tioi i,
Jises tin i kum paxai tioi kako.

¹³ Na kako tale tehitokako hani nauna tetan, i hamalum kapita ti nauna ien nake i kum pulutti aliaike i.

¹⁴ Timoti, hanamenawa teka kahikahi Jises Krais teik kakain ien. Hahitake axe Haeu honewa lato kum ailele saun tenen ti he hapatapat sale salangawe kakain tenen tenen. Tap solian tetan, i tua halialu teka laha hongohong. ¹⁵ Eliel hawanewa hasolaii pupuasam lehe Haeu amuke. Hanau aluinawa kakain tenen salan ti Jises Krais.

¹⁶ Siawa ti kakain tenen tap pupuasam ma xauxaun ti Haeu. Kakain tenen ien i hasele aheke seilon ti usiai nauna tetan.

¹⁷ I pate masin naxon tenen lialun i sawat kosea hawane. Masin kakai huhua seilon Himeneus ma Piletus, lalu hahanau waliko tenen kumahe salan. ¹⁸ Lalu kakaxi ka Haeu kum hamoiba aliake kako telok imuh, lalu ukek ka liai i hamoihawen kako ti kako sohot seilon haun ti usian. Kakaialalu kumahe salan ape i haputa namili seilon ti Jises Krais.

¹⁹ Tuahae kakai Haeu salan wanen ma tap tel pon halialuan. Leili kakai Haeu huonen kakain tuah i ukek, "Haeu tioi teteka laha seilon tetan" ma "Teka laha ukek ka Haeu se tel Masiwi ti neinialaha, laha lioiwa lawe saun lialun." (*Num 16:5; Isa 52:11*)

²⁰ Leili tehu ing lalap hina pelet tenen tenen. Hina pelet tuah laha tanomi ani kalas, seilon hapuasa ti angian ti ngain lalap ma hina pelet naun laha tanomi ani kapa, seilon hapuasa ti tuahe ngain. ²¹ Tin masin teka seilon laha lioi saun lialun, Haeu namiloi ukek laha seilon tuah. I hapuasa laha ti ailei pupuasam nake laha hani hatapo laha usiai nauna tetan ma laha hawi ti ailei lawe saun tenen solian.

²² Tahiwa isian ti ailei saun lialun tenen hina teka uluha aile usiusi. Puas elielia ti ailei saun tenen Haeu pahan hetekie xoxoi namilom tetan. Waheniwa seilon liai ma wasolam kapi laha kewa solian hetekiewa kapi teteka lato hana hatapo namilolato hani Haeu tel Masiwi.

²³ Kum sausa kapi teka seilon ti laha kak he hapatapat lalolal nake i tua aile hahile seilon. ²⁴ Teka unaui Jises tel Masiwi kewa lato kum hihilei seilon liai. Lato aile hasolia haniwa laha ma hanau aluinawa teka seilon ape kum hanau liloi kalak seilon pahoxai lato. ²⁵ Lato kak hamalehua hasawiae teka laha pahoxai hanauan ti lato. Pake uke Haeu sohi namilolaha lehe laha tioi hawane kakaian. ²⁶ Laha aile waliko ti Satan pahan laha ailewa nake i kapiti toheni namilolaha. Tuahae pake uke Haeu huali laha ti paxai tioiai lialun ti laha ailele ape laha oxoxa uke ti nenein ti Satan.

3

Lialui woi seilon imat ti tapoi tehu pon ie

¹ Timoti, paxai tioiwa. Imat ti Jises Krais aliamta ti tapoi tehu pon ie, kilan saun lialun tenen tenen seilon aile. ² Seilon namiloi aliake puki laha, halepelep ti moni, hanasanans ma sameni aliake puki laha, kak halialu teka liai, tahi tamalaha tinalaha, kum nam waxi waliko solian seilon liai aile hani laha ma laha tale tehitolahia hani Haeu. ³ Laha kum

aile kola wawahen hani seilon liai, pahalahalaha kum is hasawiai wasolalaha kapi seilon, misahi putini seilon liai, laha usi isialaha ti ailei saun lialun, molei seilon liai ma laha watakai ailei saun solian.⁴ Seilon tetenen laha hangaini lohulaha hani seilon liai aile halialu, laha kum nam matalinimu ape laha tua aile larlol lawe waliko ma laha namiloi ka mewenae laha pate tuah. Kumahe laha waheni Haeu, laha waheni waliko tenen i hamuamua aliake laha.⁵ Laha woinakon seilon ti lotui Haeu nake waliko ti laha ailele i kola ka laha kumahe seilon tetan. Laha kum usi nauna tetan ma laha tap pohe Haeu. Kum huhukuma kapi seilon tenen ien.

⁶ Seilon tenen ien, laha nahih soh hani leili ing tehu tehu ape laha kapiti hasele teka hehin namilolo kumahe xoxoan ti Jises Krais. Teka hehin ien lato nam hien-ake kilai saun lialun ti lato ailewen ma tin lato tua hongeni isialato.⁷ Lawe lato hongohong hanauan ti seilon liai tuah lato tai tahiama ti tenen kakain salan ti Haeu.⁸ Masin ti huhua seilon James ma Jamberes lalu papahoxai Moses, tin pate masin teka woinakon hanauai kakai Haeu laha pa-hoxai nauna sawisawin tetan. Namilolaha xuhai tilokoan ma xoxoi namilolaha ti Jises Krais i tae hawane.⁹ Puasalaha i kum to haweluvelu nake teka seilon paxai tioi ka waliko ti laha hanauan tap anan, masin ti i sohot hani James ma Jamberes.

Nauna ti Pol hani Timoti

¹⁰ Tuahé hanauan tetak kumahe masin ien. Timoti, o tioi sale wouk ma isiaik ti ailei waliko tenen tuah ti Haeu. O tioi hawane xoxoi namilok ti Jises Krais hetekie nga aile tatale puase Haeu kalak seilon axi nga kawatan. O ningahiwen wawahen tetak hani seilon liai hetekie nga kum nomuha ailei puasak ti kawatan tunahi nga.¹¹ O tioi ka seilon axi nga kawatan nake ti tenen puasain ien ma tin nga kau hehetekie kawatan liai. O nanameni lawe waliko ti i sohot haniwen nga ti Antioik, Ikonium ma Listra. Laha aile halialu hawane nga tuahé nga tu xoxox tutuen ti ailei puasak ape Haeu tel Masiwi awai tatale nga ti hatesol waliko ien.¹² Kumahe mewenae nga kau kawatan tenen ien. Tel tel na pahan i aile usi saun ti Jises Krais, laha axi i kawatan.¹³ Ape teka seilon pate lialun ma teka woinakon hanauai kakai Haeu, saun ti

laha i lialu ma lialu hawane ti laha puluti teka seilon liai ma puki alia laha.

¹⁴ Tuahé o Timoti tu xox tatalewa ti anesoam ma xoxoi namilom sale Jises Krais nake o tioi ka amite tesol hanauam amite hanauen o waliko salan.¹⁵ Lilian ti o kokol o kema anesoin ti kakai Haeu leili pepaun. I pon kaxi haxewa haniam sale Haeu awai kaha ti kawatan ti lialui woukahna na namilokaha xoxoan ti Jises Krais.¹⁶ Hatesol kakain leili pepai Haeu, Holi Spirit hanamiloa teka seilon tetan taian. Kakai Haeu huali kaha hanau seilon waliko salan sale Haeu. I kaxi hatakei saun lialun ma i haxewa sale hasawian. I hanau kaha lehe kaha sohot seilon sawisawin ti ailei waliko tenen Haeu pahan.¹⁷ I apesenai hawane kaha lehe kaha sohot unaui Haeu ti ailei lawe waliko tenen solian.

4

¹ Taen ti Jises Krais tel Masiwi aliam neiniae lawe seilon, i hiniti teka seilon moi-hin hetekie teka maten. Aile ape ti puli Haeu ma Jises Krais nga kakane eliel o ailei tetenen.² Kaxi ahutiwa meng solian ti Jises Krais, kakal laha hong ma na laha kum hong waxy, ti leili taun solian ma na lialun. Kak hasawi elielia teteka laha ailele saun lialun tuahé kum leng kokosea. Kak hax-oxoa teka seilon ti o hanau mamathuhini laha sale Jises Krais.

³ Ngain i luluainima ti seilon hong watakai nauna sawisawin ti Haeu ape laha hong waheni mewenae teteka seilon lato hanau waliko tenen i onoten iisai namilolaha.⁴ Laha tale tehitolaha hani kakain salan ti Haeu ape laha hong waxi kakain tenen seilon tua kaxi tanomi.

⁵ Tuahé o Timoti kewa namilom ti Krais i hahamalum, leili taun solian ma lialun. Tu xoxoa kalak na o tunahi kawatan. Kaxi tatalewa meng solian ti Jises ma ailewa lawe puasain ti Haeu kilami haniwen o nake o unauan.

⁶ Nga tel unaui Haeu ti lehe laha telei nake nga ailele pupuasan. Mateak ape i xohi hawanewen.⁷ Nga eliel hawanewen ti ailei puasak. Nga aile hatapoen hatesol puasain ti Haeu haniwen nga masin tel seilon leili lokoloko i kiliwau usi welui kiliwain. Ape xoxoi namilok ti Haeu nga tai aka lioi.⁸ Aile ape Haeu apesenai kahi pupuasak, tetenen i hani teka laha aile waliko ti i pahan. Tetenen kahi pupuasak ien Jises tel Masiwi hani nga ngain ti i hiniti lawe seilon. Pake

paxai kolongenian tetan ti woi seilon se sawisawin. Tuah kumahe mewenae nga, tin i hani teka seilon tetan liai, teteka laha atengi hahawane aliaian.

Nauna tapeinan ti Pol hani Timoti

⁹ Timoti, tohongi koseniwa sakaloi aweisalum ti lua hanima kapik. ¹⁰ Demas ku saliliwen nga hani tehu taon Tesalonika nake i namiloi halapa waliko ti itan ie. Kresenes i lua haniwen texux xux Galasia ape Taitus lua haniwen texux xux Dalmatia. ¹¹ Mewenae Luk tutuen kapik. Uxani hetekiema Mak nake i pate tuah hualiak ti ailei pupuasak. ¹² Tikikus nga hakau haniwen tehu taon Epesus. ¹³ Uxani hetekiema tehu atuhiae puxuauk nga titiheli kapi Karpus ti tehu taon Troas ma tin tesol pepauk luminian tuahе pahak wanen tetenen pepauk laha tanomi ari uli manihuh.

¹⁴ Aleksanda tel i hapuasa samen tanomiae waliko, i aile halialu hawane nga. Pake Haeu kahui aliakte hani i. ¹⁵ Puki o kanipetiwa i nake i pahoxai hawane meng solian ti Jises Krais kako kakaxi.

¹⁶ Lokon ti uli laha suluiwa nga, tap tel sipainiwen nga. Lato hatesol sia tamus tetak. Tuahе naga kamei Haeu kum aile kakahui kawatan hani lato. ¹⁷ Puki Haeu huali nga ma hakui nga ti kaxi hatapoi kakaian lehe teka kumahe Ju, tin laha hong kakaian. Ape Haeu awai nga ti teka teleiak.

¹⁸ Haeu tel Masiwi hasalia tatale nga ti pohe Satan ma teka spirit lialun tetan ape imuh i waxy hahamahuli nga hani tonan, tetesol i neneiniwa lawe seilon tetan. Kaha sameniwa Haeu telao ma telao. Salan wanen.

Tiliak kakai Pol

¹⁹ Amuam tetak haniwa Prisila, Akila ma Onesiporus hetekie hatesol seilon ti lohe ingan. ²⁰ Erastus tutuen tehu taon Korin, Tropimus i tinun ape nga titiheli i tehu taon Miletus.

²¹ Tohongi kewak o tahiamma imat ti taun ti waiwain. Ubulus, Pudenes, Linus, Klaudia ma teka kahikahi Jises liai, lato hatesol nanameni o.

²² Nga kamei Haeu ti aile kolai lalape soliaian hani o. Haeu tel Masiwi kapimuto hatesol.

Taitus

Teik pasi Pol hani Taitus

Kakain ti haxewai teik pepa ie.

Pol tel aposel tai teik pas ie hani Taitus sai 34 ahang muhin ti Jises moih aliawa ape Haeu waxy i hani tesol tonan. Taitus kumahe Ju, i Grik. I soh ti Jises Krais lokon ti Pol kaxi ahuhuti meng solian ti Jises. Hina ngain i huali Pol ailei puase Haeu. Lalu puas tesol tesol haniwa tataen texux xux Krit ape Pol tiheli Taitus ngahatiai teka kahikahi Jises ien. Leili teik pepa ie Pol kakak sale kilamiai masiwi ti teka kahikahi Jises leili Krit. I hahongo Taitus ka kanipetiwa teka woinakon hanau kakai Haeu. Tin i kaxi haxewa hani Taitus saun tenen na Taitus hanau teka kahikahi Jises.

¹ Teik pas ie tataiak nga Pol tel unaui Haeu ma tin tel ti tesol aposel ti Jises Krais. Haeu kilami nga haxoxoi namili teka seilon i kilamien tetan. Nga hanau laha lawe waliko salan ti hahanau Jises Krais lehe laha sohot seilon sawisawin tenen Haeu pahan. ² Na namilolaha xoxoan ti Haeu ma laha hong usi nauna ti Jises, pon laha mon ti atengiai tonain kapi Haeu ti tap tahi tapoan. Masin ti Haeu kaxi haniwen teka seilon tetan ti kuewen wanen. Kako tioi ka salan nake Haeu malang puputa. ³Haeu tel awaikakko hoi i kilamiwen tehu taun ti teka seilon hong tioi kakaian. Aile ape i unau nga kaxiai meng solian ti Jises Krais.

⁴Nga tai hahani o Taitus. O masin natuk wanen nake nga huali o soh ti Jises Krais usiwa xoxoi namilokako teka kahikahin.

Nga kamei Haeu tel Tamakako ma Jises Krais tel awaikakko aile kola haniam lalape soliaialau ma hatona hasolai tiam.

Nauna ti Pol hani Taitus sale kilamiai masiwi ti teka kahikahi Jises Krais

⁵ Nga hana hamalumini o texux xux Krit lehe o aile tinami puasain leili teka kahikahi Jises Krais ti ien. Kilami ngahoia teka masiwi ti neinialaha leili taon tehu tehu ti Krit masin ti nga nauen o. ⁶Nameniwa, tel tel masiwi ti kahikahi Jises Krais, i kewa seilon sawisawin ti tap tel pon suluhan. I kewa seilon tenen lawe i hahamalum kapi tel axoan. Natun tin kewa namilolaha xoxoan ti Jises Krais lehe seilon

liai paxai tioi laha akaik tenen malang pikipik ma malang tahiai kakai taman tinan. ⁷ Tel tel masiwi ti kahikahi Jises i kewa seilon sawisawin nake Haeu hani i ailei puasain tenen pate tuah. I kewa kumahe seilon ti hanasanas ma lengean kosenan. I kewa kumahe seilon ti unum ailan ma hileiai seilon liai. I kewa malang pisiai seilon liai ti ukei soxialaha.

⁸ I ke nonoa seilon tenen i waxi amuke auni seilon liai hani leili ingan ma i waheni saun solian. Namilon kewa xewan ma lawe i aile saun sawisawin hani seilon liai. I elielia usiai nauna ti Haeu ma tahiai isian ti ailei saun lialun. ⁹Teka masiwi ti kahikahi Jises o kilami, lato tu xoxoa ti meng solian ti Jises Krais masin ti lato hongoen nake i salan wanen. Na lato aile ukek ien lato pon hawane hualiai seilon liai lehe laha usi hawane nauna tenen sawisawin. Ape teka laha kak wawatakai nauna sawisawin ti Jises, lato pon nexi hasawi hanialaha ka kakaialaha kumahe salan.

Pol kakak sale teka laha hahanau seilon waliko tenen puputa

¹⁰ Nga kak ukek ie nake kilan seilon ien tale tehitolaha hani nauna tenen sawisawin. Lato hahanau seilon waliko tenen kumahe tuah ma tap pupuasan tuahe ti pulutialaha lehe laha soh kakaialato. Lato ukek ka hatesol kahikahi Jises puas usiwa saun ti teka Ju ailei kikilam ti kotiai uli walikoulaha lehe i kola ka laha seilon ti Haeu. ¹¹ Haliniwa lato hanau teka kahikahi Jises nake hanauan ti lato i halilu xoxoi namili kilan seilon ti Jises Krais. Hatesol seilon ti ing tehu tehu namilolaha ti Jises Krais i put. Lato hanau puluti teka seilon tuahe ti waxiai moni. ¹²Masin ti tel seilon anesoan lalap i toto Krit ti kuewen kakak sale teka akikin ti Krit i ukek, “Teka seilon ti Krit weli puputa ma seilon tenen tap wanen lolaha. Tin pate nunuxa tuahe weli angiang.” ¹³Teik kakai tel seilon ien salan wanen. Aile ape hasawi elielia teka kahikahi Krais lehe lato tu xox ti nauna tetan. ¹⁴Lato kum hong sohosoh meng ti teka Ju tua aile tanomi ma nauna ti teka laha watakai waliko tenen salan ti Jises Krais.

¹⁵ Teka seilon sawisawin laha usi hahatapo kakai Haeu, tap tenen waliko laha aile i pon nakaxui haloloa laha. Tuahe teka seilon pate lialun laha kum soh ti Jises Krais, lawe waliko laha aile i nakaxui haloloa laha. Laha seilon tenen namilolaha mewenae lialun ma laha kum tioi waliko

tenen ewi ma na lialun.¹⁶ Laha ukek laha tioi Haeu tuahe puasalaha ma woulaha kola ka laha kum nam waxi i. Laha tahi kakai Haeu, tap tenen waliko laha aile solian. Aile ape Haeu nam watakai hawane laha.

2

Pol nau Taitus sale hanau teka kahikahi Jises Krais

¹ Tuah o Taitus hanaua teka kahikahi Jises lawe waliko tenen i usi hahawane nauna ti Jises Krais. ² Naua teka wawan salaimat ailei saun solian lehe teka seilon hong kakaialaha. Namilolaha kewa xewan ma lawe laha tahiwa isialaha ti ailei saun lialun. Namilolaha kewa xoxoan ti Haeu, laha waheniwa seilon liai ti leili atelaha ape kalak laha tunahai kawatan tenen tenen, laha tu xoxoa usiai Jises Krais.

³ Tin masin naua teka hehin salaimat ailei saun tenen i kola ka laha puas usi ma sameni Haeu. Laha kum misahi puputini seilon liai ma kum pupuhe unum ailan. Laha ke nonoa hanaua seilon liai ailei saun solian. ⁴ Na laha sohot hehin tenen ien, laha pon hanaua teka hehin uluhai ti waheniae teka axoalato ma natulato. ⁵ Tin laha pon hanaualato sale tahiia isialato ti ailei saun lialun lehe lato aile hawane saun solian wanen. Na i sohot ukek, teka hehin uluhai soli hawane ti ngahatiae tonalato, lato hong usi kakai axoalato ma aile hasolia hani seilon liai. Na lato puas usi hatapo tesol nauna ie, tap tel seilon i pon kak teheniae kakai Haeu.

⁶ Hanau hetekiewa teka wawan uluhai tahiia isialato ti ailei saun lialun. ⁷ Taitus, puki o ailewa saun solian ti lawe waliko o aile lehe seilon liai paxai ukene. Ti na o hanau teka kahikahi Jises, hanau hawanewa laha ti leili atem wanen kumahe tuahe ti ukek kahum. Hanau aluiniwa seilon lehe laha hong matainai kakaiam. ⁸ Lawe ha-puasawa kakain salan lehe laha kum howini halilau kakaiam. Na o aile ukek ien, teka laha hil wawatakai puasakako laha tahuons nake laha kum pon tunahiae lialun ti kako teka kahikahi Jises.

⁹ Hanaua teka unaui seilon sale hong usi hatapoi kakai teka masiwi ti lato. Lato puas elielwa lehe teka masiwi amuke lato. Lato kum ailele tenen kak pahopah. ¹⁰ Lato kum xuuwuina soxiao teka masiwi ti lato, lato kolawa ka lato malang pipis lehe teka seilon liai paxai waheni saun solian ti lato ape pahalahia is eliel hongoi meng solian ti Haeu tel awaiakako.

¹¹ Nga hone o hanaua seilon ukek ien nake Haeu kola haniwen lawe seilon wawahen tetan ti i awai kaha ti kawatan ti lialui woukaha. I awai kaha nake ti lalape soliaian, kumahe nake ti soliae puasakah.

¹² Ti soliaian Haeu hanau kaha ka kum ailele saun tenen i watakai ma kum hahaxoxo namilokaha ti ailei waliko tenen lialun. Tuahe ti kaha tutuen he tehu pon ie, kaha tahiwa isiakaha ti ailei saun lialun ape ailewa saun tenen sawisawin ti Haeu amuke. ¹³ Ti kaha puas usiusi nauna ien, kaha mon amumuke aliai Jises Krais hetekie lalape xewaian ma pohen. I Haeu tel Masiwi ti kaha ma awaiakaha. ¹⁴ Jises Krais mat oxoxiakaha ti hahitake nenein ti saun lialun ma nuhi hauniai leilokaha lehe kaha sohot seilon tetan, teteka pate isian ailei saun solian ti Haeu pahan.

¹⁵ Taitus, pahak o hanaua teka kahikahi Jises Krais hatesol waliko ien. Hualiwa laha ti tu xox usiai nauna ti Haeu ma hasawi elieliwa teka laha kum puas usi waliko ti o hanau. Aile kewak ien nake o masiwi ti laha. Aile ape kum hahalali tel na seilon kak tehenie kakaiam.

3

Nauna ti Pol sale saun ti teka kahikahi Jises Krais

¹ Hanamena kapitiniwa teka kahikahi Jises ti Krit paxai tioiai nenein ti teka masiwi nahikei xux ma taon tehu tehu ma hong usialaha. Lato kewa hahawian ti aile hasolia haniai seilon liai. ² Naua lato kum misahi puputini ma kum hihilei seilon liai, lato namiloi hetekiewa laha ma paxai tioiwa laha pate seilon tuah.

³ Nameniwa ka imat ti kako sohot kahikahi Jises kako tap namilokako. Kako tahi kakai Haeu ma hina seilon laha neini hasele kako ti Haeu. Kako ateini ailei saun lialun, pahakako amukean ma ailean. Namilokako lialun hani teka seilon nake laha hina waliko tenen kako tap ma kako aile halilau seilon liai. Lawe laha tumui hawane kako ma kako tumui hawane laha.

⁴ Ti woukako pate lialun tutuen, Haeu aile kola soliaian hetekie wawahen tetan hani kako. ⁵ I awai kako ti kawatan ti lialui woukako kumahe nake kako aile saun sawisawin tuahe nake i tahane kako. I haniwen kako Holi Spirit ti nuhi hauniai leilokako lehe kako lioi saun lialun. Aile ape aope ie kako seilon haun, kako sohotuen seilon ti Haeu. ⁶ Nake Jises Krais mat awaiakako ti kawatan ti lialui woukako, Haeu

hani halapa kako Holi Spirit ti kapitiakako.
⁷Ti lalape soliaian Haeu hasawi wasolakako kapin. I aile ukek ien lehe kako sohot natun ape kako mon ti ukei tonain kapin leili tonan ti tap tahi tapoan. ⁸Kakain ti nga kaakane o salan wanen. Aile ape hanau matuhiniwa teka kahikahi Jises tesol nauna ien lehe lato hani hatapo lato ailei saun solian. Tesol nauna nga hahanau o, puasan pate solian ti lawe seilon.

⁹Siawa ti teka lawe laha heheitoh lalolal, kakak kasia sale nenex ti matahaun ma laha kak hapatapat sale nauna ti Moses. Saun tenen ien kumahe solian ma tap pupuasan,
¹⁰Na hina seilon i hatano wasolamuto tesol kahikahi Jises, kakane hasawiwa lato. Na lato kum hong, halini tuhiwa lato. Muhin ien na lato kum hong ulea, kum huhukuma kapi lato. ¹¹Seilon tenen ien namilon i sel hawane ti Haeu ape puki lialui woun sului i.

Tiliai kakai Pol

¹²Ti na nga taloa tel ti Atemas ma na Tikikus haniwa kapim saitiam, eliel nga-hoa nonoam hanima kapik ti tehu taon Nikopolis. Nga ailewen namilok ka nga to ien ti taun ti waiwain. ¹³Apolos ma tel seilon anesoan lalap ti nauna ti teka Rom axan Senas, na lalu tahiawa Krit, eliel iwa hualialalu. Na lalu lua ulea, potongeniwa lalu waliko tenen ti lalu tap. ¹⁴Tiliai kakaiak, hanaua teka kahikahi Jises ti hani hatapoi tupualato ailei saun solian lehe lato pon hualiae teka laha kamekam huhual. Na lato aile ukek ien, soliae nanahialato i kau anan.

¹⁵Nga ma teka kahikahi Jises kapik, amite ukek ngain solian haniwa amuto. Amuam ti amite haniwa tesol kahikahi Jises ti Krit lato waheni amite.

Solian ti Haeu kapimuto hatesol.

Pilemon

Teik pasi Pol hani Pilemon ma teka kahikahi Jises Krais kapin Kakain ti haxewai teik pepa ie

Pol tel aposel tai teik pas ie hani Pilemon sai 32 ahang muhin ti Jises moih aliahu ape Haeu waxi i hani tesol tonan. Pilemon i tel seilon kilan soxi. I tel ti teka kahikahi Jises Krais ti tehu taon Kolosi. Lokon ti taun ti Pilemon mela, teka masiwi ti kili-wakei xux hana tenen nauna ti tua hapuasa unaualaha tap kahulaha. Kilan seilon laha aile ukek ien. Ape Pilemon i uke unauan tel seilon axan Onesimus. Salangawe tenen ax Onesimus i masin "hina pupuasan." Imuh Onesimus i ox ti Pilemon tel masiwi tetan. I lua hani Rom. Ti ien i tunahi Pol i kakal-abusake ti kaxi ahutiae meng solian ti Jises Krais. Ti sale kakaalalalu i aile ape Onesimus towiahu ti lialui woun ape i soh ti Jises Krais. Pol ma Onesimus hukuma hehetekie tuah pahani Onesimus alia haniwa kapi Pilemon ti hasawiai wasolalalu. Aile ape Pol tai teik pas ie hani Pilemon. Pol kamei i ti waxi aliakei Onesimus hetekie amuam, kumahe hanowi tel tuahe unauan nake ape ati lalu soh ti Jises Krais. Aope ie lalu uke he akikin ti Krais.

¹ Teik pas ie tataiak nga Pol, tel nga kakalabusake ti kaxi ahutiae meng solian ti Jises Krais.

Amuam ti amili Timoti, tel akikikako ti Krais haniwa Pilemon, tel i puas akakati amili pate amili waheni. ²Tin amili hakau amuam haniwa Apia i masin tel tuamili, hetekie Akipus tel i haeliel hawane kaxiae meng solian ti Jises ma tin haniwa teka kahikahi Jises liai, teteka lawe laha apupuha leili ingam ti ailei lotu.

³Nga kamei Haeu tel Tamakako ma Jises Krais tel Masiwi lehe lalu aile kola lalape soliaalaluu hani amuto ma hatona hasolia tihamuto.

Pol lotu huali Pilemon

⁴⁻⁵Pilemon, tapai na nga lotu huali o, nga kak kemulik hani Haeu tel Masiwi tetak nake nga to hongohong xoxoi namilomti Jises tel Masiwi ma wawahen tetam hani hatesol seilon ti Haeu. ⁶Nga kamei Haeu hualiam lehe o hukuma eliel ahe kapi teka

laha soh ti Jises hanowi o ma waxi o paxai tioi hawane hatesol waliko solian ti Haeu haniwen kako teka kahikahi Krais.

⁷Tel ukalak, wawahen tetam hamuamua hawane nga ma i hakui nga nake o hewi hawane tiai teka seilon ti Haeu.

Kamekame ti Pol hani Pilemon

⁸Aile ape nga matut kameiam ailei waliko tenen solian. Se sawisawin wanen ti na o aile. Ala i pon nga tua hone o ailean nake nga kakak hahitake axe Krais. ⁹Tuahe pahak nga kamei eliel o nake ti soliai luhuloh ti kalu ma wawahen ti kalu hani seilon liai. Hongoa kamekame tetak nga Pol, tel salaimat. Aope ie nga leili kalabus nake ti ailei puase Jises Krais.

¹⁰Nga kamei o ti aile aluini haniwa Onesimus, tel unauam. I masin natuk nake i sohot kahikahi Jises lokon ti nga kaxi hahani i meng solian ti Jises ti nga leili kalabus ie. ¹¹Ti imat Onesimus pupuasan tetam kumahe pate tuah, tuahe ti aope ie pate hina pupuasan ti kalu hauhua. ¹²I tel ti he atek wanen tuahe nga hakau aliake i hani kapim.

¹³Pahak wanen nga akeni kongini i kapik lehe i uke totonam hualiak ti nga kakal-abusake kaxiae meng solian ti Jises Krais.

¹⁴Tuahe nga tai aile nake nga kum tioi ka o sowini. Kumahe pahak o aile waliko solian hani nga ti lungelungeak, mewenae na puki paham. ¹⁵Sohin Onesimus ox salili o ti teik taun kukunun lehe imuh o waxi aliake tamusuke i. ¹⁶I ape kumahe tuahe unauam, i masin tel ukalam wanen. I pate tuah tetak, tuahe haniwa o i pamu tuah. I ape tel akikim ti Krais ma tin tel unauam.

¹⁷Aile ape ti na o paxai ukek nga tel tuaum, waxi amukewa i hanowiwa ka o waxi amumuke nga. ¹⁸Na masin i aile tales o na tenen ma na i waxi hina waliko tetam, hanima nga hasawian. ¹⁹Ie puki minak wanen nga Pol tatai ka nga hasawi hani o. Tuahe kum mamaluhé ka ti huhal tetak o sohot kahikahi Krais.

²⁰Tel ukalak, aile ape nga kamei eliel o, hamuamuwa nga ti ailean nake ati kalu kahikahi Krais. ²¹Nga tatai teik pas ie ti kameiam nake nga soh hawane ka o aile tenen waliko ien ma tin pamu o aile akulai waliko ti nga kakamei o.

²²Tin nga kamei hetekie o ti apesen haniwa nga tesol ti na nga to nake namilok i eliel hahawane ka Haeu i hong kamekame

ti amuto teka kahikahi Krais ma nga sohot
paxai ulea amuto.

Tiliai kakai Pol

²³Epapras, tel i kalabus akakati nga nake
ti kaxi ahutiai meng solian ti Jises, i hakau
hani o amuam tetan. ²⁴Tin hetekie Mak,
Aristakus, Demas ma Luk, tesol puas aka-
tiak.

²⁵Nga kamei tel Masiwi Jises Krais ti aile
hasolia hawane haniamuto hatesol.

Hibru

Teik pas hani teka Ju kahikahi
 Jises Krais
 Kakain ti haxewai teik pepa
 ie

Sai 35 ahang muhin ti Jises moih aliawa ape Haeu waxy i hani tesol tonan, laha tai teik pas ie hani teka Ju kahikahi Jises Krais. Teka Ju jak kakai Arameik ma kakai Hibru, aile ape tin seilon axai laha Hibru. Teka Ju kahikahi Krais, seilon liai axi lato kawatan nake ti xoxoi namilolato tetan ape teka ti lato to nanamiloi ka pamu ewian na lato tai sohot kahikahin. Pahalato usi tatalei aweisalulato teka Ju, tetenen lawe lato usiusi ti hasawiai wasolalato hani kapi Haeu. Aile ape teik pas ie i kakaxi ka na kaha soh ti Jises Krais ma usi aweisalun, se pamu tuah ti usuai saun ti teka Ju. I kola ka Krais se pamu masiwian ti teka engel, Moses ma teteka Ju masiwi ti hukuminiai seilon ma Haeu nake puki i se Haeu. A i tin seilon masin kaha, i ilameni tioi kawatan ti kaha tutunahi. Tenen namil haun ti Haeu xinoti kapi seilon se pamu tuah ti tenen namil ti i xinotimu kapi teka Ju. Hahitake tenen namil haun ien Jises Krais i se tel tuhai wasolakaha ma Haeu. I se tel masiwi tapein ti hukuminiai seilon ma Haeu. Aile ape mewenaen na namilokaha xoxoan ti Jises Krais ma kaha usi hawane i, Haeu namiloi ukek kaha seilon tetan. Tel taiai teik pas ie i hahakui seilon ti tu xox hawanewa ti Jises Krais hanowi kilan seilon ti imat laha tai tale tehitolaha hani Haeu kalak seilon liai aile halialu laha.

Jises i tel Nati Haeu

¹ Ti kuewen Haeu hapuasa teka kuluiai kakaian kakanei teka matahaun ti kaha. Taun telok telok lato hapuasa aweisal tenen tenen kakanealaha. ²Tuahe tetelok ti ngain tapeinan ti tehu pon itan ie, i hapuasa tel Natun kakaneakaha. Haeu kilami i tame lawe waliko. I hapuasa tel Natun tanomiai tehu pon ie ma lawe waliko ti heihon. ³Puki alia Jises hina lalape pohe Haeu ma soliaian. Lawe namilon, woun ma pupuasan kola hawane ka puki i se Haeu. Lawe waliko i soli hamalumti ti tuahe pohe kakaiun. I tetel i mat awaiakaha ti kawatan ti lialu woukaha lehe kaha sohot seilon haun ti usuai nauna

ti Haeu. Muhin i to sai manau ti Haeu tel pate pohen, tetesol totone Masiwi.

Jises Krais pamu masiwian ti teka engel

⁴Aile ape Haeu hana i pamu masiwian ti teka engel. I hani Jises ax tenen pamu lapan ti axalato. ⁵Haeu tai kaakane tel na engel ukek,

“O se Natuk. Nga kilamiwen o ailei puasain tuah.” *(Ps 2:7)*

Tin Haeu tai kaakane tel na engel ukek,

“Nga tel Tamam

a o tel Natuk.” *(2 Sam 7:14)*

⁶Lokon ti Haeu taloma tel Natun pate tuah hani tehu pon ie i ukek,

“Hatesol engel tetak haxawawa axan.” *(Deut 32:43)*

⁷Ti Haeu kakak sale teka engel i ukek,

“Nga tanomi teka engel unauak.

Nga hapuasa lato hanowi ti nga hapuasa aupol ma ah ailei waliko ti pahak.” *(Ps 104:4)*

⁸Tuahe ti Haeu kakane tel Natun i ukek,

“O se Haeu, o tel Masiwi tapein lian tehue. Nenein tetam lawe pate sawisawin.

⁹O waheni lawe waliko solian ma watakai hatesol waliko lialun.

Aile ape o tunahi amuam lalap ti nga tel Haeu tetam

kilami o pamu masiwian ti teka tuaum.” *(Ps 45:6-7)*

¹⁰Tin i ukek,

“Tel Masiwi, ti hutuiai lawe waliko o tanomi tehu pon itan

ape ti puki minam wanen o tanomi hatesol waliko patul.

¹¹Tesol waliko ien tapo tamus tuahe o hamalum kapita.

Laha masin maia, aneso i wasa.

¹²O sohi laha hanowi na tel seilon sohi tehu puxuaun watata.

Tuahe o tap tahi sohiaiam ma tap tahi mateam.” *(Ps 102:25-27)*

¹³Haeu tai kaakane tel na engel ukek,

“Toma papak tepaun manau ti neiniae seilon

atengi tataen nga hanawa teka seilon laha pahoxai o

hani hahitakam.” *(Ps 110:1)*

¹⁴Teka engel se tuahe unaui Haeu. Laha se spirit solian Haeu talo hualai teka seilon tetan, teteka Jises awai ti lawe waliko lialun lehe laha to kapi Haeu lian tehue.

2

Tu xoxoa ti kakai Haeu

¹ Aile ape kako tu xoxoa ti kakain salan koko hongoen, uke kako hanowi waian na i sel he aweisal ape i oh manan. ² Kako tioi ka kakain ti teka engel kaxiwen se kakai Haeu wanen. Tel na i kum hong tamani kakai lato ma i xaputi tenen na nauna, liai Haeu axiwen i kawatan, ³ Ape lehe amuto ukek kako pon saliniai kawatan ti kako kum nam waxy soliai puase Jises Kris tel awaiakako? Puki i kakawen sale Haeu awai seilon ti kawatan ti lialui woulaha ape teteka laha hong, laha kaxi hakouta hani kaha. ⁴ Haeu kola hawanewen ka kakain ien se salan. Ti haxoxoan i aile kilan kolakol ma walikou tenen lalap ti pohen. Tin i hani hetekie Holi Spirit lehe i hapohea seilon tetan ti ailei puasain tenen tenen usiai namilon.

Jises sohot seilon hanowi kaha

⁵ Tuai tesol waliko ien, tehu pon itan ti imuh ti kako teka kahikahi Kris kakak, kumahe ka teka engel Haeu hana masiwi ti tehu pon ien. ⁶ Masin ti David kakak leili pepai Haeu,

“Haeu, seilon waliko la lehe o to nanamilo?

Seilon pate naun tuahe o to ngangahati.

⁷ Kalak leili teik taun kukunun
o teheni i hani pamu itan ti teka engel,
muhin o hana i seilon tuah ma hani i ax
lalap.

⁸ Ape o hana lawe waliko hahitakan.”
(Ps 8:4-6)

Tap tenen waliku kumahe i ngangahati. A aope ie kaha tai ningahi na i ngahati lawe waliku. ⁹ Tuahe kako paxai tioi sale masiwai Jises. Kalak leili taun kukunun i pamu itan ti teka engel, Haeu hana i pate tuah ma hani i ax lalap nake i mat hualiai seilon. Ti soliai Haeu hani kaha, i hani lioi Jises kau kawatan ape i mat ukei kahi lialui woi lawe seilon. ¹⁰ Tenen waliku ti Haeu ailewen ien, liai pate sawisawin wanen. I tetel i tanomi lawe waliku tetan ma hasolia hahamalumini. Ti Jises uke kawatan ti kaha, i sohot tel Masiwi pate solian neiniai kilan seilon hani Haeu lehe laha soh hawane tetan ma laha uke tonain tuah ti tesol tonan.

¹¹ I aile hasawi laha lehe laha sohot seilon tenen Haeu amuke hawane. Ape Jises ma teka seilon ien Tamalato telawé. Aile ape i kum nomuha na i axai lato talin. ¹² Masin ti i kakanewen tel Taman leili pepaun,

“Nga kaxi sameni soliaiam hani teteka amite talin.

Nga haxawa axam ti amite apuha hetekie.”
(Ps 22:22)

¹³ Tin i ukek,
“Namilok pate xoxoan ti Haeu.” (Isa 8:17)
Ape tin i kak ulea ukek,
“Hongoa! Nga ma teka ti Haeu hana hani hahitake

ngangahat tetak masin natuk wanen,
ati amite aile usiusi namilon.” (Isa 8:18)

¹⁴ Nake kako teka nati Haeu se seilon, Jises tin i takah hanowi kaha seilon lehe pon i mat ukei totonakaha. Ti matean i halialu tamusuke Satan, tetel nenein tetan mewena kane matemate. ¹⁵ Ti aweisal tewau ien Jises oxoxi teka laha mamata hawane na laha mat ape mataualaha to titinoi laha ti hatehu totonalah.

¹⁶ Kako hatesol tioi ka kumahe Jises luama ti hualiai teka engel. I luama hualiai teka kahi nati Abraham. ¹⁷ Aile ape tap tewau aweisal liai. Jises sohot hawane seilon hanowi kako, teteka masin ka ukalan ma tuan wanen lehe i sohot masiwi tapein ti hukuminiai Haeu ma seilon. I masiwi tenen i ilameni tioi kawatan ti seilon ma i tahane hawane kaha. I hana hatapo tupuan ailei lawe waliku ti Haeu kilamiwen i ailean. I tetel i mat ukei kahi lialui woukah. ¹⁸ I pon hualiai seilon ti Satan tohongi haputa xoxoi namilolaha ti Haeu nake puki i tunahiwén kawatan ti totong tenen ien.

3

Jises pamu masiwiyan ti Moses

¹ Tesol soliai akikik ti Kris, Haeu kilamiwen amuto puas usiai aweisalun ma tonai kapin lian tehue. Nam paxai aluiniwa sale Jises. Kako soh ma kakaxi ka i se tel aposel tuah ti Haeu ma tel masiwi tapein ti hukuminiai Haeu ma seilon. ² I aile matuhini puasain ti Haeu kilamiwen i ailean. Tin masin Moses i aile matuhini puasain ti Haeu haniwen i ti hualiai teka seilon tetan, laha masin ingi Haeu. ³ Tuahe Jises axan pamu lapan ti Moses, pate masin tel seilon ataiai tehu ing. Sawisawin na seilon sameni i akulai tehu ing meinan. ⁴ Lawe ing hina teka ataien tuahe Haeu tetel i aile hasohotu lawe waliku.

⁵ Moses ngahati hasolia hawane teka seilon ti Haeu a i tuahe unauan. Pupuasan kola waliku tenen ti na Haeu kaxi haxewa

imuh. ⁶Tuahe Jises Krais i se Natun wanen ma masiwi ti hatesol seilon ti Haeu hetekie i aile lawe waliko ti Haeu pahan. Kako teka kahikahi Krais kako se ingi Haeu na kako aka kongini xoxoi namilokako tetan ma ti angiamataiakako kako kola kakapitini pakataiakako hani Krais hetekie tin koko mon atetengi lawe waliko solian Haeu kakawen i hani kako.

Kakain ti lepeteniai kakapax

⁷Aile ape kako hong matainiwa waliko ti Holi Spirit kakaxi leili pepai Haeu. I ukek, “Aope ie Haeu kaakane amuto.

Hong tamaniwa kakaian.

⁸Kum hahailaia patumuto hanowi ti teka matahaun ti amuto. Laha pahoxai nenein ti Haeu leili taun ti totohong

ti laha luluawa he lohong.

⁹Kalak ti leili ahang 40 Haeu to ailele kilan waliko lapoh ti pohen ti laha ningahiwen,

laha hahele hawane i ti lialui woulaha.

¹⁰Aile ape lon lialun wanen ti tesol seilon ien
nake namilolaha lawe i kalal sel ti usiai
namilon.

Laha kum nahih matuha aweisal ti i

neneini.

¹¹Ti lengei Haeu i tuoha ka tap laha po uke tonain ti hanawain wanen kapin.” (Ps 95:7-11)

¹²Tesol akikik ti Krais, kolongeni kewak ka tap tel ti amuto hina namil lialun ti kakapax tenen i kapiti hasale amuto ti Haeu tetel lawe i to papaxai woukaha. ¹³Haxoxoa tel tel ti amuto lawe ngain ti amuto hina taun tutuen lehe saun lialun kum neini hakalala amuto ti waliko salan ape amuto pahoxai namili Haeu. ¹⁴Na namilokako xooxan ti Haeu hani tataen kako mat hanowti uli kako sohotua seilon tetan, kako uke tuai Krais lawe waliko. ¹⁵Aile ape nameni konginiwa teik kakain ti leili pepai Haeu, “Aope ie Haeu kaakane amuto.

Hong tamaniwa kakaian.

Kum hahailaia patumuto
hanowi ti teka matahaun ti amuto
lokon ti laha pahoxai nenein ti Haeu.”

(Ps 95:7-8)

¹⁶Kaie amuto ukek aita tesol seilon laha hongoen kakai Haeu ape laha pahoxai nenein tetan? Se tetesol Moses neini ahutima ti Igip! ¹⁷Kaie Haeu lelengeini aita leili ahang 40? Se tetesol laha to ailele

saun lialun ape laha mat ti laha tutuen he lohong. ¹⁸Kaie Haeu tuoha hahani aita ka tap laha po uke tonain ti hanawain wanen kapin? Se tetesol laha tahi nauna tetan. ¹⁹Se ape kako tioi ka laha tai uke tonain ien nake laha kapaxe Haeu.

4

Teka seilon ti Haeu laha uke tonain ti hanawain wanen

¹Aope ie Haeu ilolowi tutuen kako ukei tonain ti hanawain wanen kapin. Tuahe kanipeti aluiniwa woukako uke Haeu halini kako ukean. ²Kako tin kako hongoen meng solian ti Haeu hanowi teka seilon lokon ti Moses. Tuahe i kum aile uke tenen na solian hani laha nake laha kapaxe Haeu.

³Mewenae teka namilolaha xooxan ti Haeu laha uke tonain kapin ti i hatoria hanawai hawane seilon. Tuahe teka laha kapaxe i, liai teik pepaun kakawen i ukek, “Ti lengei Haeu i tuoha ka

tap laha po uke tonain ti hanawain wanen kapin.” (Ps 95:11)

I kak ukek kalak tonain ien liai hoi apesanen lokon ti Haeu tanomi tehu pon ie.

⁴Kako tioi ka tesol ti he pepai Haeu i kak sasati sale hanawai Haeu ti i ukek, “Telao ngain tepanim huohu i hanau ti puasain ti tanomiai waliko.” (Gen 2:2)

⁵Tuahe teik kakain liai leili pepai Haeu i ukek, “Tap laha po uke tonain ti hanawain wanen kapin.” ⁶Teka seilon lokon ti Moses laha kum uke tonain ien nake laha tahi kakai Haeu. Tuahe hina seilon laha pon ukean. ⁷Aile ape Haeu axi tatale taun hani seilon lehe waxy kaha uke tonain ien. Masin ti David tel masiwi kakaxi leili pepai Haeu, kuewa muhin ti Josua neiniwa teka Israel hani texux xux ti Haeu hani laha. I ukek, “Aope ie Haeu kaakane amuto.

Hong tamaniwa kakaian.

Kum hahailaia patumuto.” (Ps 95:7-8)

⁸Texux xux ti Josua neini haniwen teka Israel, kumahe tetesol ti laha tunahi tonain tenen ti i kakaxi ie, tetenen tonain ti hanawain wanen kapi Haeu. Na masin laha tunahiwen, Haeu tai ukek ka hina taun tutuen ti seilon uke tenen tonain ien. ⁹Aile ape Haeu ilolowi tutuen teka seilon tetan ukek tonain ti hanawain wanen kapin. ¹⁰Teka seilon ti Haeu hatona hanawai hawane laha, tesol seilon ien se ape laha hanau hawane nake laha ailewen lawe waliko ti Haeu pahan, masin ti Haeu hanau telao ngain tepanim huohu muhin

ti i tanomiwa lawe waliko. ¹¹ Aile ape kako haelielowi lehe Haeu hatona hanawai hawane kako. Na tap, namilokako ti Haeu i put hanowi teka matahaun ti kako lokon ti Moses, teteke laha tahi kakai Haeu.

¹² Kakai Haeu hina poh ma pupuasan. I akulai puase ngol tenen hahupaua pate angian i koti hawalohu uke tupui manixux ma kelai hetekie tataen wekin ma kuin. Tin masin kakai Haeu i soh taponga hawane hani leili namilokaha ti kola hatakeiai isiai pahakaha ma woukaha. ¹³ Tap tenen waliko likohenan ti Haeu, lawe waliko takean ti he pulan. I tioi hawane lawe waliko ti seilon ailele. I tetel imuh kako tel el tuke woukako hani i.

Jises tel masiwi tapein ti hukuminiai Haeu ma seilon

¹⁴ Aile ape kako aka kongini haxoxoa namilokako ti Jises Krais tel Nati Haeu. I tel masiwi tapein ti hukuminiai Haeu, tetel ape i tahiya kewen tone Haeu. Tap tel ulea pamu masiwi. ¹⁵ Tel masiwi ti kako ien, i ilameni tioi lawe waliko tenen kako tae ti usiai namili Haeu nake puki i tunahiwén totohong hanowi kako, tetenen ti haputai seilon hani saun lialun. Tuahé i tai hongeni ailei tenen na waliko lialun. ¹⁶ Aile ape ti pakataikako kapi Jises Krais, hamatuawa kako kakanei Haeu. Ti lalape soliaian i huali kako na kako tae ti tenen na waliko. Na kako aile waliko tenen lialun, kako kameiwa i oxoxiakako ti kawatan ti saun tenen ien ape i kola hani kako tatahan tetan.

5

¹ Lawe masiwi tapein ti hukuminiai Haeu ma seilon lato se seilon masin kaha. Haeu kilami lato ailei puasain wasolan ma seilon. Ti teka seilon kau hani Ingi Haeu waliko tenen i kahui lialui woulaha, lato tuke awalahi hani Haeu. ² Lato pon aile hamalehu hani teka seilon laha talesiai nauna ti Haeu nake puki lato se seilon masin kaha ape tin lato tunahí totohong.

³ Aile ape tin lato kau hani Haeu waliko tenen i kahui puki lialui woulato, kumahe mewenae ti teka seilon lialui.

⁴ Tap tel i tua sohot masiwi tapein ti hukuminiai Haeu ma seilon ti xoxoi isiai pahan. Puki Haeu kilami i ailei tenen puasain tuah ien masin ti lokon ti kilami Aron.

⁵ Tin masin Jises Krais, kumahe i soxosox ukei tehu tonain pate tuah ti masiwi tapein ti hukuminiai Haeu ma seilon. Puki Haeu kilami Jises lokon ti i kakane i ukek,

"O se Natuk. Nga kilamiwen o ailei puasain tuah." ^(Ps 2:7)

⁶ Masin ti Haeu kakawen ti tesol liai leili teik pepaun, i ukek,

"O to lian tehue masiwi tapein
ti hukuminiai Haeu ma seilon,
tetel ti Melkisedek tu kikilami." ^(Ps 110:4)

⁷ Lokon ti Jises toto he tehu pon ie, lawe i lotu hani Haeu. Ti lehe ape i kau kawatan lalap, i lotu eliel hani Haeu ti leili tangitangi ma kawate tian. I lotu eliel hani tetel i pon awaian ti tehu matemate. Nake ti Jises hong tamani kakai Haeu, Haeu hong waxi lotu tetan a i aile hapoponowu puki namilon. ⁸ Kalak Jises i tel Nati Haeu, i soh leili kaui kawatan ape kawatan ien hanau i hong tamaniai namili tel Taman. ⁹ Aile ape Haeu paxai ukek i tel seilon sawisawin tapein ape i sohot tel awaiai tetesol seilon ti kawatan ti lialui woulaha ti laha hong tamani nauna tetan. Ape laha to kapi Haeu lian tehue. ¹⁰ Haeu hatona hakouke Jises tel masiwi tapein ti hukuminiai Haeu ma seilon hanowi Melkisedek.

Teka seilon ti Haeu titioalaha ma xoxoi namilolaha tetan ala i lap ahe

¹¹ Kilan waliko tutuen kakaneamuto sale meng ie tuahé ailan ti nexi haniamuto nake amuto seilon tenen pate kuen tioiai aweisali Haeu. ¹² Amuto sohot kuwen kahikahi Krais, aope ie ala amuto hahanau teka seilon liai. Tuahé tin tapai tutuen seilon liai hanau amuto waliko ti laha hanau teka seilon sale Haeu ti uli laha sohotua kahikahi Krais. Amuto masin aakaik pate kokol i susus tutuen ma kum ani uke an tenen ailan. ¹³ Teka laha susus laha aakaik tutuen, laha kum pon paxai tioi aluinai waliko tenen sawisawin. ¹⁴ An tenen ailan, kumahe aakaik kokol anian. Tin masin mewenae teka seilon titioalaha sale Haeu ma xoxoi namilolaha tetan lap aheahela, laha puas eliel ukei anesoin ti waliko tenen solian ma waliko lialun ape laha aile usi waliko tenen sawisawin.

6

¹ Kako kum hamalam hahanowi ka uli kako huhutuiwa. Ti kako sohotua kahikahi Krais, kako towiahuen ti saun lialun ti i seselai kako ti Haeu ape kako hutui soh tetan. Tuahé aope ie kako haxexe ahekewa anesoakako ma xoxoi namilokako ti Haeu lehe kako sohot seilon tenen usiai woi Krais. ² Hoi kako kewen nauna ti sale baptais, sale hanai min patul ti seilon kameiái

huhual ti Holi Spirit, sale xahatai seilon ti matemate ma ti Haeu axi teka seilon lialun kawatan ti tap tahi tapoan.³ Aile ape kako puas eliel ahewa ti usiai woi Krais hetekie huhual ma nenein ti Haeu.

⁴ Teka seilon laha tale tamusuke tehitolaha hani Krais ma nauna tetan, i kum pon na laha soh ulea ti Krais. Teka seilon ien, kemuk laha tioiwen kakain salan ti Haeu. Laha ilameniwen lalape soliai Haeu ma puase Holi Spirit.⁵ Tin laha paxai tioiwen soliai kakai Haeu. Laha ilameniwen waliko tenen lalap Haeu aile ti pohen. Poh tenen ien tin i hapuasa telok ti luluainima.⁶ Tuahé tin laha tale tamusuke tehitolaha hani Krais. Seilon tenen ien i kum pon na laha hana ulea namilola hani tel Nati Haeu nake masin ka puki laha tahi hakea ulei i hani he kros ma soxeni hawane i ti puli lawe seilon.

⁷ Namiloi paxaiwa huonen hepekeun. Hepekeun tenen i uke hakila kani akah, i haxexe hakila an solian hani teka seinian. Haeu aile hasolia hani tesol hepekeun ien.⁸ Tuahé hepekeun tenen, kalak i uke hakila akah, i haxexe xon ma pahoah lialun, tap solian tetan. Teka seilon paxai ukek ka tap pupuasan ape laha lui lioi.

⁹ Tesol soliai akikik ti Krais, kalak nga kakane amuto sale tesol hepekeun lialun, nga kum ukek amuto masin ien. Nga soh ka amuto se seilon tenen soliai woumuto kokola ka amuto se teteka ti Krais awaiwen ti kawatan ti saun lialun.¹⁰ Haeu lawe i aile waliko sawisawin. I kum pax akulai soliai puasamuto ma wawahen ti amuto kola han-hani i, hetekie huhual ti amuto hahani teka kahikahi Krais liai.¹¹ Pahak wanen tel tel ti amuto hik hawanewa usiai saun solian atengi tataen mateamuto lehe lawe waliko solian ti Haeu, i sohot hani amuto masin ti amuto mon atetengi.¹² Nga watakai amuto sohot seilon tenen nunuxa ti usiai aweisali Haeu. Aile ape hanowiwa teteka seilon laha uke tesol waliko solian ien ti Haeu kakawen i hani nake laha hina namil xoxoan hani i ma tap wanen kakapax ti ukean.

Waliko ti Haeu ukek i aile, liai i sohot

¹³ Ti Haeu kakanewa Abraham waliko solian i aile hani i, i tuoha alia ti puki axan. I kum tuoha ti axe tel liai nake tap tel pamu masiwi.

¹⁴ I ukek, “Nga kak kuinake ka nga aile hasolia hawane hani o ape o lupini hakila teka laha nakuama tetam.”
(Gen 22:17)

¹⁵ Abraham mon atengi hahawane ape i uke waliko ti Haeu kakawen i aile hani i.

¹⁶ Seilon kak kuinake ti axe teka pamu tuah ti laha. Laha aile ukek ien lehe i hakui ka waliko ti laha kakawen se salan, tap kakapax ma he lungelung.¹⁷ Tin masin na Haeu ukek i aile waliko solian hani teka seilon tetan, i kak kuinake ti puki axan lehe i kola hawane ka salan i sohot nake Haeu kum sohi waliko ti i namiloien.¹⁸ Kako tioi ka Haeu malang wanen puputa. Ti i ukek i aile tenen waliko ape i kak kuinake ti puki axan, huonen waliko ie kola hani kako ka kakaian se salan. Tenen ien haxoxo kako ti upiai huhual tetan ma mon atengi hawanei waliko ti i kakawen i aile.¹⁹ Masin ti teik xuot, i hapeti kongini tea wa lehe waxi i kum man, tin masin na kako mon atengi hawanei waliko ti Haeu kakawen i aile, i haxoxo namilokako tetan ma kako pakata hamalum kapin. I neini kako hani tesol Tuah Tapein ti Haeu ti kako soh nonoa he teik maia.²⁰ Jises hoi i sohoen imat ti hualis hasohoakao nake i tel masiwi tapein ti hukuminiai Haeu ma seilon lian tehue. I tetel Melkisedek tu kikilami.

7

Melkisedek tu kikilami tetel masiwi tapein ti hukuminiai Haeu ma seilon lian tehue

¹ Melkisedek tel ti imat. I masiwi ti Salem tehu taon lalap ma tin masiwi tapein ti hukuminiai Haeu ma seilon. I ailele puase Haeu tel axan lalap tapein. Ti Abraham aliliama ti hile, muhin ti i xoiniwa tesol hin-nalo masiwi lato neneini lawalawai seilon, Melkisedek nahih tengeni i ape kamei Haeu aile hasolia hanian.² Abraham hani i tehu ti huopanip ti hatesol waliko i waxyi ti i waxainiwa hilehile. Melkisedek, salangawe axan se “tel masiwi pate sawisawin.” Tin i ukek, “tel masiwi ti hatona hasoliai seilon” nake salangawe tenen ax Salem se masin, “hatona hasoliai seilon.”³ Tap tel tioi taman tinan ma sale nenex tetan. Tin laha kum tioi loke takahan ma matean. Tap tel tai konginiwen lokon ti i tapo pupuasan ti hukuminiai Haeu ma seilon, aile ape masin ti tel Nati Haeu, i to masiwi tapein ti hukuminiai Haeu ma seilon lian tehue.

⁴ Namiloi paxaiwa lalape axe Melkisedek. Tataen Abraham, tel matahaun ti kako Haeu namiloi ukek pate tuah, tin i hani Melkisedek tehu ti huopanip ti hatesol waliko i waxyi ti i waxainiwa hilehile.⁵ Teteka masiwi ti hukuminiai Haeu ma seilon lato

nakuama ti Livai, lato waxy apuhini tehu ti huopaniam ti hatesol waliko ti teka seilon. Kalak laha hatesol nakuama ti Abraham, tin lato aile saun tetenen usiai nauna ti Moses.⁶ Melkisedek kumahe i nakuama ti Livai, tuahe tin i uke tehu ti huopaniam ti hatesol waliko ti Abraham kalak Abraham se tel matahaun ti kako pate tuah ukek lawe waliko solian ti Haeu tuohawen. Ape Melkisedek tin i kamei Haeu ti aile hasolia hanian.⁷ A kako tioi ka tetel Haeu hani i poh ti aile hasolia haniai tel seilon liai, i se pamu masiwian ti tetel seilon ukei tesol waliko ien.

⁸ Teteka masiwi ti hukuminiai Haeu ma seilon lato nakuama ti Livai, lato kum akeni haweluvelu tenen puasain ien nake aneso lato mat. Tuahe Melkisedek tu kikilami seilon tetel masiwi tapein ti hukuminiai Haeu ma seilon lian tehue.⁹ Tuai tesol waliko ien, i pon kaha ukek ka lokon ti Abraham hani Melkisedek tehu ti huopaniam ti lawe waliko, hanowi ka puki Livai ailele.¹⁰ I sohot ukek nake kalak Livai tai takah lokon ien, Abraham lupinima i.

Jises tel masiwi tapein ti hukuminiai Haeu ma seilon

¹¹ Lokon ti Moses hani teka seilon nauna ti Haeu, i kilami Aron ma teka laha nakuama tetan masiwi ti hukuminiai Haeu ma seilon. Lato paxai kolongeni ka seilon usiusi tesol nauna ien. Tuahe pupuasalato i kum pon aile hasawiai seilon lehe laha sohot seilon sawisawin tapein. Aile ape Haeu kilami tel seilon liai ti hukuminiai seilon hani kapin masin Melkisedek, kumahe masin Aron tetel i nakuama ti Livai.

¹² Nake Haeu kilami tel seilon liai ti hukuminiai seilon hani kapin, tesol nauna ti sale neini hasawiai seilon tin i sohia.¹³ Jises se tetel liai Haeu kilami ti hukuminiai seilon hani kapin. Teka Ju lawe laha kilami teteke seilon ti hukuminiai Haeu ma seilon, lato ahuma ti Livai. Tuahe Jises, kumahe i nakuama ti Livai.¹⁴ Kako tioi ka Jises tel Masiwi ti kako i nakuama ti Juda. A Moses tai kilami tuahe na tel ti i nakuama ti Juda akeniai puasain ti hukuminiai Haeu ma seilon. Tap tel ti lato i ailelewen puasain ti haniai Haeu waliko tenen i kahui'lalui woi seilon.

¹⁵ Ti Haeu kilamiwa Jises ti hukuminiai seilon hani kapin masin Melkisedek, i kola haxewa ka tesol nauna ti sale neini hasawiai seilon tin i sohia.¹⁶ Jises sohot masiwi ti hukuminiai Haeu ma seilon kumahe ti usiai nauna ti sale kilamialato ka lato ahuma

mewenae tehu nenex ti Livai. I uke tesol tonain ien ti lalape poh, tetenen ti i aile Jises moihin lian tehue. Aile ape puasan ti hukuminiai Haeu ma seilon tap i po tapo.¹⁷ Masin ti Haeu kakanewen tel Natun leili teik pepaun, i ukek,
“O to lian tehue masiwi tapein
ti hukuminiai Haeu ma seilon,
tetel ti Melkisedek tu kikilami.” (Ps 110:4)

¹⁸ Salan wanen. Haeu talaheniwen tewau aweisal ti hukuminiai seilon hani kapin hahitake nauna ti Moses nake pate i kum puas ti hasawi tamusukei seilon.¹⁹ Aile ape Haeu hei tenen aweisal liai ti hukuminiai seilon hani kapin. Na kaha hani namilokaha usiai tenen aweisal ien kaha pakata hawane kapin.

²⁰ Ti Haeu kilamiwa Jises Krais masiwi ti hukuminiai seilon hani kapin, i kak kuinake ti puki axan ka salan i sohot hawane. I tai kak kuinake ti teka liai sohot masiwi ti hukuminiai seilon hani kapin.²¹ Jises Krais sohot masiwi tapein ti hukuminiai Haeu ma seilon usiai tutuoh ti Haeu. Haeu kakanewen i leili teik pepaun, i ukek,
“Nga tel Masiwi ti lawe waliko,

nga kak kuinake ka o to masiwi tapein
ti hukuminiai seilon hani kapik lian
tehue.

Namil ti nga ailewen ie tap nga po
sohi.” (Ps 110:4)

²² Ti Haeu kak kuinake ka Jises Krais sohot masiwi tapein ti hukuminiai seilon hani kapin, i xinoti namil haun kapi teka seilon. Hahitakan, Jises Krais sohot tel seilon ti thuai wasolakaha ma Haeu. Ape tenen aweisal ti hukuminiai Haeu ma seilon ien, i xoini hawane tenen aweisal ti hahitake nauna ti Moses.

²³ Ti laha usiusi tenen aweisal ti hahitake nauna ti Moses, laha to kilami sosohi teka masiwi ti hukuminiai Haeu ma seilon nake lawe lato mat ape tel liai saiti lato.²⁴ Tuahe Jises Krais tap tahi matean. I to masiwi tapein ti hukuminiai Haeu ma seilon lian tehue.²⁵ Aile ape i tel awai hatapoi teteke seilon laha hana i neinialaha hani Haeu. I awai laha ti kawatan ti lialui woulaha lehe waxy laha to kapi Haeu lian tehue nake i moihin lian tehue ape lawe i lotu huhuali teka seilon ien.

²⁶ Jises tapai hawane ailei puasain ti hukuminiai hani Haeu nake i tel sawisawin tapein. Woun solian tapein, i seliai ti ailei hatesol saun lialun ape i hana hatapo tupuan ti ailei pupuase Haeu. Aile

ape Haeu hani i tonain pate tuah tapein ti tesol tonan.²⁷ I kumahe masin teka liai, teteka masiwi tapein ti hukuminiai Haeu ma seilon. Lawe ngain lato hani Haeu waliko tenen i kahuimu puki lialui woulato ape muhin ti teka seilon liai. Tuahé Jises Krais kahui lialui woi seilon tehue wanen lokon ti i mat ukei totonakaha.²⁸ Teteka masiwi tapein ti hukuminiai Haeu ma seilon lato pupuas hahitake nauna ti Moses, lato kumahe sawisawin tapein. Lato tuahé seilon masin kaha, hina waliko tenen lato tae ti usiai namil Haeu. Tuahé kuewa muhin ti Moses ukewa tesol nauna ien, Haeu kilami puki tel Natun masiwi tapein ti hukuminiai seilon hani kapin. Ti i kilami Jises Krais ukei tenen tonain ien, i kak kuinake ka i sohot hawane. Jises Krais liai tenen wanen ti lato. I se tel sawisawin tapein ti hukuminiai Haeu ma seilon lian tehue.

8

Hahitake tenen namil haun ti Haeu xinoti kapi teka seilon, Krais sohot tel tuhai wasolaka ma Haeu

¹Tuah wanen ti tesol kakain ie i ukek ka Jises Krais se tel masiwi tapein ti hukuminiai akaha hani Haeu, tetel i toto ti tesol tonain pate tuah ti tone Haeu neiniai teka seilon.² Ti ien se tehu Ingi Haeu wanen, kumahe atataiai seilon, puki meini Haeu tel Masiwi. Tetesol ien Jises Krais ailele tenen puasain ti hukuminiai akaha hani Haeu.

³Lawe masiwi tapein ti hukuminiai Haeu ma seilon ti laha kilami he tehu pon ie, lato lelei manihuh ti teka seilon kauma haniai Haeu ti kahuai lialui woulaha. Aile ape Jises Krais tel masiwi tapein ti hukuminiai akaha hani Haeu tin i axi Haeu waliko.⁴ Na masin i tutuen tehu pon itan ie, i kum uke tenen tonain ti masiwi ti hukuminiai Haeu ma seilon. Hoi hina seilon ailele puasain ti haniai Haeu waliko lehe i kahui lialui woi seilon usiai nauna ti Moses.⁵ Lato pupuas leili tetehu Ingi Haeu i tua ukeke totone tehu Ingi Haeu wanen ti tesol tonan. Aile ape lokon ti Moses apepeas tanomiai tehu ing sosoxope ti Haeu masin kolakol ka Haeu kapi teka seilon tetan, Haeu kakane Moses ukek, "Aile tanomiwa lawe waliko masin ti nga kola haniwen o he Maunt Sainai." (Exod 25:40)

⁶Tuahé puase Jises Krais ti hukuminiai Haeu ma seilon i xoini hawane pupuase teteka masiwi ti hukuminiai Haeu ma seilon lato pupuas hahitake nauna ti Moses.

Jises Krais sohot tel seilon ti tuhai wasolaka ma Haeu usiai tenen namil haun ti Haeu xinotiwen kapi teka seilon. Pate i xoini tenen namil ti i xinotimu nake lokon ti i xixinoti tenen namil haun, i ukek ka i aile waliko tenen pamu soliaian hani teka seilon tetan.

⁷Na tenen namil ti Haeu xinotimu imat i puasala, Haeu tai aile tenen namil haun.

⁸Tuahé tahitah ti teka seilon, laha xaputi tenen namil ien. Aile ape Haeu tieni hawane laha. Masin ti tel kuluai kakai Haeu kakawen leili pepaun,

"Haeu tel Masiwi ukek, 'Taun i luluainima ti nga xinoti tenen namil haun kapi teka seilon tetak,
teka Israel ma teka Juda.'

⁹I kumahe masin tenen namil nga xinotimu kapi teka matahaun ti lato lokon ti nga neini ahuti lato ti texux xux Igip.

Tahitah ti lato, lato xaputi tenen namil ien ape nga tale tehitok hani lato.

¹⁰Tuahé imuh nga xinoti tenen namil haun kapi teka seilon tetak.

Nga hana kongini nauna tetak leili namilolo, nga aile tesol nauna tetak i sohot tone atelato wanen.

Ape nga sohot hawane Masiwi ti lato ma lato sohot hawane seilon tetak.

¹¹Tap tel i po nau tuahé na tel ti teka seilon tetak sale tioiak nake ti pakataialato kapik lato tioi hawanewen nga, hutuima teka naun hani teka axalahalalap.

¹²Tap wanen nga po tumui laha ti waliko lialun laha aile.

Nga oxoxi laha ti kawatan ti lialui woulaha.'"

(Jer 31:31-34)

¹³Puki Haeu kaxi haxoxo tenen namil haun ti i xinoti kapi teka seilon tetan. Aile ape i hatapo tamusuke tenen namil ti i xinotimu imat nake i kum puas. Masin waliko tenen puasan ape i pupatalih, imuh i tapo tamus.

9

Sale hukuminiai seilon ma Haeu ti imat

¹Hahitake tenen namil ti Haeu xinotimu imat kapi teka Israel, i hani lato nauna ti sale lotuian. Tesol tone lotuian he tehu pon ie tatanomiai seilon.² Tesol ien se tehu ing sosoxope ti Haeu masin kolakol ka i kapi seilon tetan. I selia uke he huaok. Tewaok ti leilon tehu tutuhi lul tuah ma

tehu sau hetekie bret tenen ti laha kilami-wen haniai Haeu. Tetesol ien laha axai Pate Tuah ti Haeu. ³Tewaok liai tehit teik maia akeak, laha axai Tuah Tapein ti Haeu. ⁴Tesol tone luiai sanda hani Haeu ti laha tanomiwen ani gol, i tutu sai melal, tuah pupuasan i pakata hani tesol Tuah Tapein ti Haeu. Leilon tehu lohe kakain tuah ti Haeu xinotiwen kapi teka seilon tetan. Tehu lohe kakain tuah ien laha pakati atuhu hatehu ani gol. Leilon tehu patula ani gol hetekie tenen an axan mana ma teik kuai Aron i tanomu kaun hetekie huaik pot tenen manamanahan ti Haeu tatai huopanim nauna tetan. ⁵Patul ti tehu lohe kakain tuah ti Haeu, hua engel axalalu Kerubim laha tanomi ani gol ti kolakol ka Haeu kapi teka seilon tetan. Paulalu i kakalaui matan, tetesol tone sapoxiai kake manihuh ti kolakol ka Haeu oxoxi teka seilon ti kawatan ti lialui woulaha. Aope ie nga kum nexi aheke tesol waliko ien.

⁶Ti laha apesen kewa lawe waliko ien, teka masiwi ti hukuminiai Haeu ma seilon, lawe ngain lato soh hani tesol Pate Tuah ti Haeu ailei puasalato. ⁷Tuah mewenae tel masiwi tapein ti hukuminiai Haeu ma seilon i soh hani tesol Tuah Tapein ti Haeu. I soh hani ien tehue ti leili ahang tehu hetekie kake manihuh ti i telei. I sapoxi kaka ien hani he mate tehu lohe kakain tuah ti Haeu lehe Haeu oxoxi i ma hatesol seilon liai ti kawatan ti tetenen saun lialun ti laha ailewen a tap titioalaha ka lialun. ⁸Ti sale usiai saun tesol ien, Holi Spirit haxewa hani kaha ka hahalin ti teka seilon soh hani tesol Tuah Tapein ti Haeu nake laha tutuen hahitake tenen aweisal ti hukuminiai seilon hani Haeu usiai nauna ti Moses. A tehu ing sosoxope ti Haeu i tu kikilami tenen aweisal ien.

⁹Holi Spirit hahanau kaha ie waliko tenen pate tuah. Sale hukuminiai Haeu ma seilon hahitake nauna ti Moses i kum tapai. Waliko ti teka masiwi ti hukuminiai Haeu ma seilon hahani Haeu ti kahuiai lialui woi seilon i kum pon hauni hawanei leilolaha lehe namilohaha heh ti kawatan ti lialui woulaha. ¹⁰Masin ti tesol saun ti nuhi hauniai seilon, i tuahe saun ti hauniai melal ti tupui seilon. Tesol nauna ti Moses sale an ma unum tin masin ien. Tesol saun ien laha aile atengi taen ti Haeu haniwa tenen aweisal haun ti hukuminiai seilon hani kapin.

Aweisal haun ti hukuminiai seilon hani

Haeu

¹¹Ti Haeu haniwa kaha tenen aweisal haun ien, Jises Krais sohot tel masiwi tapein ti hukuminiai Haeu ma seilon. Nake ti pupuasan, kako teka kahikahin kako uke waliko tenen pamu soliaian. Jises soh hani tetesol Tuah Tapein ti Haeu ti tesol tonan kumahe tetehu meini seilon ti laha tanomi he tehu pon itan ie. ¹²Ti Jises soh hani tesol ien, kumahe i hapuasa kake meme ma bulmakau ti haniai Haeu. I hani puki kakaun wanen ti i mat kahuiai lialui woi seilon lehe waxy laha pon ukei tonain kapi Haeu ti tap tahi tapoan. I aile ukek ien tehue wanen.

¹³Hahitake tenen aweisal ti hukuminiai seilon hani Haeu ti hahitake nauna ti Moses, kake meme ma bulmakau hetekie palonge bulmakau uluha luan, i tapai nuhi hauniai melal ti tupui seilon. ¹⁴Tuah kake Jises Krais i xoini tesol waliko ien. Ti pohe Holi Spirit tel tap tahi matean, Jises tel sawisawin tapein i hani lioi i mat ukei totonakako. I nuhi hauni hawane leilokako ape i hahe namilokako ti saun tenen lialun ti i neini kako hani matemate. I aile ukek lehe kako sohot seilon ti ailei waliko ti Haeu tel Masiwi tapein ti kako pahan. ¹⁵Aile ape hahitake tenen namil haun ti Haeu xinoti kapi teka seilon, Jises Krais se tel tuhai wasolakaha ma Haeu. Jises Krais mat ti kahuiai lialui woi lawe seilon ma oxoxialaha ti hahitake saun lialun, tin hetekie teteka laha ailewen saun lialun lokon ti laha tutuen hahitake tenen namil ti Haeu xinotimur imat. Aile ape hatesol seilon teteka laha sohot natu Haeu, laha uke lian tehue lawe waliko ti Haeu kakawen i hani.

¹⁶Masin ti tel seilon i uke hatesol soxi muhi matei tel taman. ¹⁷I tamai hatesol soxi mewenae na tel taman mat. I kum pon tamaiai hatesol soxi ien ti tel taman moihin tutuen.

¹⁸Tin masin tenen namil ti Haeu xinotimur imat kapi teka seilon, ala i kum puas na tap kaka ti kolai ka tehu matemate sohotuen. ¹⁹Muhin ti Moses haniwa teka seilon hatesol nauna ti Haeu, i waxy kake bulmakau ma meme hetekie kan. Ape i hapuasa ngaxe tenen pata axan hisop ma ole sipsip tenen laha wexoi hakakaiwen ti sapoxiai teik pepa hina nauna ti Haeu ma hatesol seilon kapin. ²⁰Ti i aile tenen ien, i ukek, "Tesol kaka ie i kola ka Haeu xinotiwen tenen namil kapimuto ape pahan amuto aile usiwa." (Exod 24:8)

²¹Tin i waxy kaka sapoxiai tehu ing sosoxope

ti Haeu hetekie lawe waliko leilon ti laha hapuasa ailei lotu. ²²Ti salan wanen, hahitake nauna ti Moses sikole ka lawe waliko laha uke sapoxi nuhi haunian kaka. Na tap matemate ma kaka ti haniai Haeu, i kum oxoxi seilon ti kawatan ti lialui woulaha.

²³Aile ape laha waxy kake manihuh ti nuhi hauniai tesol waliko ien. Tuah lato tua ukekene tesol waliko ti tone Haeu. Kaha kum uke lawe waliko solian ti Haeu na Jises Krais tai mat ti nuhi hauniakaha ti lialui woukaha. Kake Jises Krais xoini hawane kake manihuh.

²⁴Kumahe Jises soh to hani tehu ingi Haeu meini seilon ti i tua ukekene tetehu ti tone Haeu. I soh to hani tesol tuah ti Haeu ti tesol tonan ape i tuke kaha hani Haeu. ²⁵I kumahe masin tel masiwi tapein ti hukuminiai Haeu ma seilon, lawe ahang i soh hani tesol Tuah Tapein ti Haeu leili tehu Ingan ti he tehu pon ie ti haniai Haeu kake manihuh ti kahuiai lialui woi seilon. Kumahe i soh tuhituhi hani tesol Tuah Tapein ti Haeu ti tesol tonan haniai Haeu kakaun ti kahuiai lialui woukaha. ²⁶Na hina huan ti aisle ukek ien, kiae ala i mat hakilawen lilian ti tanomiai tehu pon ie. Tuah aope, imat ti tapoi tehu pon ie, Jises luama ape i mat ti oxoxiakaha ti hahitake saun lialun tehue wanen.

²⁷Mateakaha seilon tehue ape muhin Haeu kahui kaha usiusi sale woukaha. ²⁸Tin masin Jises Krais matean tehue. I mat ti ukei totone seilon ti kaui kawatan ti lialui woulaha. Ti aliaian i kum mat ulea ti kahuiai saun lialun ti kaha. Tataen ien teteka seilon laha mon atetengi i, laha uke lawe waliko solian ti Haeu ape laha to kapin lian tehue.

10

I tua ponoa tehue kawatan ti Jises Krais kauen ti nuhi hauniakaha ti lialui woukaha

¹Nauna ti Moses i tuahe kolakol ti waliko solian ti ape Jises Krais aile haniwen kako. Ahang tehu ma tehu teka masiwi ti hukuminiai Haeu ma seilon laha to aisle hahani Haeu waliko ti xaxaweniai kawatan ti saun lialun ti teka seilon. Tuah tesol waliko ien i kum pon hasawiai teka laha nahima lotuiai Haeu lehe laha sohot seilon sawisawin tapein ti pulan. ²Na masin i pon, kiae laha kum aisle tuhituhi. Na waliko ti teka hukuminiai Haeu ma seilon aisle hahani Haeu i nuhi hauni tamusukewen leili tiai teka seilon, ala laha kum namilo hienake tutuen saun lialun ti laha ailewen.

³Waliko ti teka hukuminiai Haeu ma seilon ailele ahang tehu tehu, lawe i tua hanamena teka seilon saun lialun ti laha ailewen. ⁴Kake meme ma bulmakau ti laha hani Haeu i kum pon wanen xaxaweniai lialui woulaha. ⁵Aile ape imat ti Krais lua hanima tehu pon ie, i kakane tel Taman Haeu ukek,

“Waliko ti laha to aile hahani o, i kum hewi tiam.

Aile ape o aile hasohotu tupuak lehe nga hani hatapo o.

⁶I kum hewi uke o ti laha hani o manihuh luian
ma na kakaun ti xaxaweniai lialui woulaha.

⁷Aile ape nga kakane o, ‘Nga ie ti ailei waliko ti paham.

Masin ti laha tai kaxiwen nga ti leili pepaum.’”

(Ps 40:6-8)

⁸Namilo paxaiwa. Ti imat Jises Krais ukek, “I kum hewi uke o ti laha hani o manihuh luian ma na kakaun ti xaxaweniai lialui woulaha.” I kak ukek ien kalak tesol waliko ien i usima nauna ti Moses. ⁹Muhin Jises Krais ukek, “Nga ie ti ailei waliko ti paham.” Ien i kola ti Haeu hatapo tamusukewen aweisal ti hukuminian ma seilon ti hahitake nauna ti Moses ape i aisle aweisal haun. ¹⁰Ie se waliko ti namili Haeu. Jises Krais nuhi hauni lelokako ti i mat ukei kawatan ti lialui woukako. Matean tehue wanen ti kau kawatan ien. I tua ponoa tehu matean ien.

¹¹Ti hahitake nauna ti Moses, ngain tehu ma tehu teka masiwi ti hukuminiai Haeu ma seilon laha aisle pupuasalah. Laha to hani tuhituhi Haeu waliko lehe i xaxaweniai kawatan ti lialui woi seilon. Tuah i kum pon hawane. ¹²Tuah Jises Krais i se tel masiwi tapein wanen ti hukuminiai Haeu ma seilon. I mat tehue ti xaxaweniai kawatan ti lialui woi teka seilon. Tiliuai puasan i to hani sai manau ti Haeu ti neiniae seilon. ¹³Ti ien i atengi tataen Haeu hana hatapoa teka laha hil papahoi i hani hahitakan. ¹⁴Kau i kawatan ti Jises Krais ti ukei totonakako tehue wanen ien, i hasawi hawanewen kako, teteka kako hani Haeu tupuakako. Soliae tenen puasain ti Jises ien, i kum tapo lian tehue.

¹⁵Puki Holi Spirit kola ka waliko ien salan. Ti kuewen i hanamiloa Jeremaia tel kuluiai kakai Haeu i ukek,

¹⁶“Haeu tel Masiwi ukek, ‘Imuh nga xinoti tenen namil haun kapi teka seilon tetak.

Nga aile tesol nauna tetak i sohot tone atelato wanen.

Nga hana kongini nauna tetak leili namilolato.” (Jer 31:33)

¹⁷ Ape imuh i ukek,

“Tap wanen nga po tumui lato ti lialui woulato

ma saun tenen i pahoxai nauna tetak.” (Jer 31:34)

¹⁸ Haeu oxoxiwen kako ti kawatan ti saun lialun ti kako. Aile ape tap pupuase waliko ti kako hani Haeu ti hasawiai lialui woukako.

Tu xoxoa ti Jises Krais kalak na hina kawatan

¹⁹ Tesol akikik ti Krais, se ape kako tioi ka kako pon tonai kapi Haeu ti tesol Tuah Tapein leili tonan nake Jises Krais mat ti ukei kawatan ti lialui woukako. ²⁰I hei hani kako tewau aweisal haun ti hani Haeu. Ti matei Jises Krais teik maia leili Ingi Haeu ti i ak titiehi aweisali seilon hani Haeu, i lexia. Lexai teik maia i kola ka ape i pon seilon to kapi Haeu. Aile ape kako uke tonain kapi Haeu ti tap tahi tapoan.

²¹ Jises Krais se tel masiwi tapein wanen ti hukuminiakako Haeu, tel i neneini hatesol seilon tetan. ²²Aile ape kako xohi haniwa kapi Haeu ti he ateakako wanen ma hana hatapoa namilokako haniwa i. Kako aile kewak ien nake Jises Krais xaxaweniwen hienaiakako ti i nuhi hauni kako ti lialui woukako. Ien masin na tel i nuhi hauni tupui tel liai ani kan tenen haun wanen.

²³ Ti xoxoi namilokako ti Krais kako mon eliel tatalewa ukei waliko ti lehe Haeu hani kako nake lawe i aile waliko ti i kakawen. ²⁴Kako namiloi eliel hawanewa sale hualhai tel tel. Kako he hahikahikawa aile kolai saun ti wawahen ma aile hasolia haniwa seilon liai. ²⁵Kako kum aile lilioi saun tenen ti hukuma hetekie, hanowi ti teka laha aile lioiwen. Kako haeliel ahewa hakuai tel tel ti hukuma hetekie nake ngaini ti alai Jises Krais tel Masiwi i xohiwen.

²⁶ Kako teteka kako hong sohoen puase Jises Krais. Tuahne na kako tale tehitokako hani Krais ma to aile tatale saun lialun, tap tewau aweisal tutuen i pon xaxaweniai kawatan ti lialui woukako. ²⁷Na masin ien, mewenae liai kako tunahi mamata lalap nake hoi Haeu hani kako kawatan. Teka laha hil pahoi Haeu, i towi laha hani tesol ti kaui kawatan ti tap tahi tapoan. Ti ien laha ilameni moloan lalap masin na seilon lua he ah.

²⁸ Namiloi paxaiwa teka laha hahitake nauna ti Moses. Na tel i tale tehiton hani tesol nauna ien, laha telei i na masin hua ma na tolu lato ukek ka salan. Tap wanen tatahan ti teleian. ²⁹Na masin ien, kawatan tenen pamu lapan i tunahi teka na laha tale tehitolaha hani tel Nati Haeu. Teka seilon ien laha aile hanowi ka matei Jises Krais tuahe waliko naun, kumahe tuah kalak i se tewau aweisal haun Haeu haniweni kako lehe kako sohot seilon sawisawin ti pulan. Lialui woulaha ien i teheni hawane Holi Spirit, tetel lawe i aile hasolia hakila hani kako. ³⁰Kako tioi ka Haeu kakawen ukek,

“Nga tetel axiai kawatan hani seilon.

Nga kahui aliakse saun lialun ti laha.” (Deut 32:35)

Ti he pepai Haeu tin i ukek,

“Haeu tel Masiwi paxai kolongeni woi teka seilon tetan.” (Deut 32:36)

³¹ Pate lialun wanen ti teteka Haeu tel pate pohen axi laha kawatan.

³² Nameniwa lokon ti uli amuto sohoa ti Jises Krais. Amuto tunahi taun lialun ma kau hakilawen kawatan tuahe amuto uke he kuin. ³³Taun hina, seilon kak soxeni halialu amuto ma axi amuto kawatan. Hina, amuto huai teka laha kakau kawatan tenen ien. ³⁴Amuto hina tatahan ti teka laha kakalabus. Amuto xuhai amuam, kalak seilon tua waxi soxihamuto. Amuto tioi ka hina waliko pamu tuah i atetengi amuto tone Haeu, waliko tenen pamu soliaian, tap tahi lialuan.

³⁵ Aile ape amuto kum aka lilioi xoxoi namilomuto ti Jises Krais. Na amuto tu xox tatale, amuto uke soliai kahumuto. ³⁶Akeri kongini tatalewa aweisal ti Krais kola haniwen amuto kalak na hina kawatan. Na amuto aile hatapo waliko ti Haeu pahan, amuto uke waliko ti i kakawen i hani. ³⁷Leili pepai Haeu i kak ukek,

“Tetel ti Haeu ukek i luainima,

kum kue i tahiamta. Tap i talitalia.

³⁸ Teka seilon ti Haeu laha aile waliko ti pahan,

xoxoi namilolaha i kapiti nanahialaha.

Tuahne na laha tale tehitolaha hani Haeu, i kum amuke laha.” (Hab 2:3-4)

³⁹ A kako kumahe masin teteka laha tale tehitolaha hani Haeu. Teka seilon ien laha kane tesol ti kaui kawatan ti tap tahi tapoan. Kako teteka namilokako xoxoan ti Haeu, kako kane tesol tonain kapi Haeu ti tap tahi tapoan.

11

Xoxoi namilokako ti Haeu se tuah wanen

¹ Na namilokako xoxoan wanen ti Haeu, kako tioi ka i hani kako waliko ti kako to monomon. Na masin ien, kako soh hawane ka waliko ti kako tai ningahi liai i sohot. ² Namiloai paxawai teka seilon ti matahaun. Haeu amuke teteka namilola ha xooan tetan.

³ Xoxoi namilokako ti Haeu kako tioi ka i tanomi hatesol waliko ti tuahe kakain. I hapuasa waliko ti kaha kum pon ningahian tanomiai waliko ti kaha niningahi.

⁴ Sale xoxoi namili Abel ti Haeu, waliko ti i hani Haeu pamu Haeu amuke ti tesol waliko Kein hani i. Aile ape Haeu paxai ukek Abel seilon sawisawin. Abel matewen tuahe xoxoi namilon ti Haeu i hahanau tutuen kaha.

⁵ Xoxoi namili Enok ti Haeu, Haeu waxi hasawi i hani tesol tonan ti i moihin tutuen. I tai tunahi matemate. I tua kaluta hahutua. Imat ti Haeu waxy i, Haeu amuke hawane i ti pupuasan. ⁶ Tap tel i po aile hamuamua Haeu na i tap namil xooan hani i. Tel na pahan i xohi hawane hani kapi Haeu i soh hawanewa tetan ma tin i sohoa ka Haeu kahui hasolia teka laha hani hatapo i tupualaha.

⁷ Xoxoi namili Noa ti Haeu, i hong usi kakaian ape i aile tea waian lalap lehe i, axoan ma natun lato kum lialu taun ti kan hutomi lawe xux. I soh ka i sohot kalak i tai sosohot ti imat. Ti aweisal tewau ien i kola lialui woi teka seilon ti tehu pon ie na ke laha tahi kakai Haeu ape laha lialu tamus. Haeu paxai ukek Noa seilon sawisawin na ke namilon xooan tetan.

⁸ Xoxoi namili Abraham ti Haeu, i hong usi kakaian ape i nahih salili texux xuxun wanen hani tesol ti Haeu kakawen i hani tetan. I aile usi kalak i tai tioi tutuen ka lehe i nahih hani ia. ⁹ Ti i tiahawa tetesol Haeu kakawen i hani i, xoxoi namilon ti Haeu i to ien kalak i kumahe akiki teka ien, i tua to akeak. I ingangai ing tenen ti sosoxope masin ti imuh Aisak ma tel natun Jekop ailele. Waliko ti Haeu kakawen i hani Abraham tin i hani lalu. ¹⁰ Abraham aile ukek ien na ke i mon atetengi tesol tonain leili tehu taon puki atataiai Haeu. Tehu taon ien i tu hamalum lian tehue.

¹¹ Xoxoi namili Abraham ma Sara ti Haeu, lalu tan tel akaik kalak lalu salaimat kasiawen a Sara i hehin tenen liekeh. Abraham

soh hawane ka Haeu aile hapoponowi walihi ti i kakawen. ¹² Aile ape kalak i salaimat kasiawen ti hatanoi akaik, kilan seilon laha nakuama tetan. Kilaialaha mongohuan kohot ti he maun ma puli hepekeun ti peixux.

¹³ Abraham, Aisak ma Jekop xoxoi namilolato ti Haeu hahamalum atengi lato mat. Tuah lato tai uke waliko ti Haeu kakawen i hani lato. Lato tioi ka pake lato uke ma lato amuam. Lato to hahaxe ngain tetehu ti ukean. Lato ilameni ukek tehu pon ie kumahe tonalato wanen. Lato kum to latuha uke. ¹⁴ Seilon teka laha aile ukek ien, i kola ka namilola i eliel hahawane ti ukei tesol totonalaha wanen. ¹⁵ Na tolul seilon ien namiloi ukek xuxulato wanen texux xux ti lato ahuma, kaie ala lato aliawen ien. ¹⁶ Tuahe namilolato i eliel hahawane ti ukei tesol totonalato ti pamu soliaian, tetesol kapi Haeu. Aile ape Haeu amuke ti lato namiloi ukek i Haeu Masiwi ti lato. Ape i apeseni hani lato tesol tonain tuah kapin leili tehu taon tetan.

¹⁷ Abraham namilon xoxoan wanen ti Haeu, lokon ti Haeu tohongi lali i. Ti Haeu hone i hanian tel natun hanowu manihuh ti laha telei ape hani i, Abraham apeas hahawane. Kalak i se tel seilon Haeu kakawen ti hanian waliko solian, tin lehe i telei tel natun ape hani Haeu. Natun se telawee ien. ¹⁸ I kum nomuha ailean kalak Haeu kakanewen i ukek, "Teka nakuan tetan laha ahuma ti Aisak." (Gen 21:12) ¹⁹ Abraham tioi ka Haeu pon hamoihai teka maten. I namiloi ukek na Haeu pahan, i hamoiha aliake Aisak. Lokon ti Haeu hakongu i ti teleiai Aisak, masin ka Abraham waxi aliake i ti matean.

²⁰ Xoxoi namili Aisak ti Haeu, i kakane hua natun Jekop ma Iso waliko solian ti Haeu aile hani lalu imuh.

²¹ Xoxoi namili Jekop ti Haeu, i kamei Haeu ti aile hasolia haniai hua nati Josep wawan. Ape i lotu sameni Haeu. I pate ape salaimat, sikole i mat. Ti i lolotu ien i tua sesekua he teik kuaian.

²² Ti ape i xohiwa taun ti matei Josep, xoxoi namilon ti Haeu, i kakak ka Haeu oxoxi teka Ju ti Igip ma i hone laha kau hetekiewa kuin nake i soh ka Haeu neini ahuti lato ti Igip.

²³ Tel tame Moses ma tel tinan, xoxoi namilolatu ti Haeu, lalu muneni tel natululu pangapang tolulu muhi takahan. Lalu kum mamata waliko ti na Fero tel masiwi ti Igip aile hani lalu. Lalu paxai tioi ka i akaik tuah.

²⁴Ti Moses lapawa, xoxoi namilon ti Haeu i noseni ka laha kum aile hahani i hanowi ka i tel seilon tuah kakak i ape nati tel hehin nati Fero. ²⁵Aile ape i namiloi ka pamu ewian na i kau kawatan kapi teka seilon ti Haeu. Kumahe pahan tuah hamuamui tupuan i ahuma ti ailei saun lialun. Tenen amuam ien tuahe ti teik taun kukunun. ²⁶I hana hatapo namilon hani kahun ti i luluainima imuh. I xoini hatesol waliko solian ti Igip. Aile ape i namiloi ukek, pamu ewian na i kau kawatan ti laha teheni halialu i. Tenen saun ien tin laha aile hani Krais imuh. ²⁷Xoxoi namilon ti Haeu Moses kum mamata lengei Fero tel masiwi ti i salili Igip. I uke he angiamat ape i kum lioi namil ti i ailewen nake i hana haxoxo hawane namilon hani Haeu. I soh ka Haeu kakapiti i kakak tap tel ningahiwen Haeu. ²⁸Xoxoi namil Moses ka Haeu oxoxi teka seilon tetan ti Igip, i hone laha teleiai tok sipsip wawan uluha ma sapoxiaiakauna hani he aweing ti ingalah. I aile ukek ien lehe tel engel ti teletele Haeu taloma, i kum telei teka akaik wawan pamu ti teka Israel, teteke seilon ti Haeu.

²⁹Xoxoi namil teka Ju ti Haeu, laha hong usi kakai Moses ape laha nahih koti Kanitax Kakan hani sai liai tepaun he tewau aweisal Haeu aile ti i tikele kanitax. Ti teka seilon ti Igip tohongi lali tewau aweisal ien, kanitax atuhi lato ape hatesol waut mat.

³⁰Xoxoi namil teka Ju ti Haeu, laha hong usi kakai Josua ape laha nahih kakalini titieh pot ti tehu taon Jeriko leili ngain tapanim huohu. Muhi tesol ngain ien, titieh tua put manan.

³¹Rahab tel hehin ti aweisal, xoxoi namilon ti Haeu, i auni muneni hua seilon Josua taloa ti palini paxaiai xux ti kakalini Jeriko. I tai mat tuai teka laha tahi kakai Haeu.

³²Pate ape kilan meng nga kaxi haniwen amuto sale teka seilon hina namil xoxoan ti Haeu. Laha tin pate kilan tutuen masin Gidion, Barak, Samson, Jepta, David, Samuel ma teka kuluihai kakai Haeu. Pate kilan kasia na nga to kaxi hatapo. ³³Xoxoi namilolato ti Haeu lato aile waliko tenen tenen. Teka lato waxaini ti lato hil waxi xux. Teka lato masiwi ti seilon neinialaha ailei waliko sawisawin ape lato uke waliko ti Haeu kakawen i hani lato. Teka lato kongini laion ti hamangei seilon. ³⁴Teka ti lato pon tipehiah ah ti i xek lengeleng ape i kum pon hamangealato. Lato kuosel hakilawen

ti teka seilon tohongi lali teleialato. Lokon ti tap kuilato, Haeu aile hakui lato. Lato uke he kuin ti hilehile ape teka seilon ti hile ti xux liai nomuha lato. ³⁵Teka hehin lato hana namilolato hani Haeu, i hamooha aliake teka akikilato.

Tuahe teka ti lato, seilon liai hani lato moloan lapap. Ala i pon lato salia na masin lato ukek lato kum soh ti Haeu. Lato tai aile ukek ien nake lato mon atetengi tonain pamu soliaian ti Haeu hani lato. ³⁶Teka lato kau kawatan ti seilon kak soxeni ma heti hamange lato ape teka ti lato laha xinoti ani sen ape kalabusi. ³⁷Teka ti lato, seilon liai hokai telei ani pot, teka laha koti tupualato uke huaok ma teka laha telei ani ngol weluwelun. Teka lato sos ahahu hani tesol tesol, lato sosoi tale uli sipsip ma meme nake lato pate tap soxi. Teka seilon laha kum soh ti Haeu laha aile halialu lato ma axi lato kawatan tenen tenen. ³⁸Ti husele soliai woulato, i kum tapai hawane na laha to akati lato. Lato tua to sosoxope he lohong, he maunten, he wawe pot ma leili wal ti he hepekeun.

³⁹Haeu amuke lato hatesol nake lato soh tetan. Tuahe lokon ti lato tutuen he tehu pon ie, tap tel ti lato kewen waliko ti Haeu kakawen i hani lato. ⁴⁰Haeu namiloi pelewan ka waliko ti i hani lato ma kako imuh pamu soliaian. Aile ape i tai hani hulutini lato. Pahan ati kako hatesol sohot seilon tenen sawisawin tapein.

12

Haeu nau hasawi teka natun

¹Kilan wanen seilon laha kola haniwen kako xoxoi namilolaha ti Haeu. Laha masin teka seilon ti matamata ti hakuiai teka lato lokoloko wa. Masin ti lato hana hatapo tupualato hani tehu lokoloko ien, kako hana hatapoa tupuakako hani usiai Haeu. Aile ape kako lioi xaxaweni hatapoa waliko tenen i kokongini kako. Kako aile lioiwa saun lialun ti i titiehi kako ailei saun ti Haeu pahan. ²Kako hana hatapoa namilokako haniwa Jises. Nake i, kako soh ti Haeu ma xoxoi namilokako ti Haeu i lap ahe tatale. I kau kawatan he teik kros nake ti amuam i uke imuh. I kum nam waxi hienain ti sale matean he kros. Aoape ape i toto tesol tonain pate tuah kapi Haeu. ³Namiloi paxaiai Jises Krais. I kau hakila kawatan ti teka seilon lialun aile halialu i. Tuahe i tu eliel tatale. Amuto hanowita tetan lehe waxi namilomuto kum put ma tin amuto kum aka lioi puase Haeu.

⁴ Amuto hahaeliel hileiai saun lialun tu-
ahe amuto tai mei kewa pahoiai saun lialun
ti na laha telei amuto. ⁵ Kaie amuto maluhe
teik kakain leili pepai Haeu ti i kak hakui
amuto teka natun? I ukek,
“Tesol natuk, hong aka matainawa
na nga tel Masiwi kola hani amuto
waliko tenen kumahe sawisawin
amuto ailele.
Amuto kui kewa na nga nau hasawi
amuto.

⁶ Nga nau hasawi teka ti nga waheni.
Nga axi kawatan hani teka natuk
ti na lato tahi kakaiak.” (Prov 3:11-12)

⁷ Haeu aile hani kako hanowi ka natun wa-
nen. Aile ape tu xoxoa leili taun ti kawatan
nake i hanau hasasolia kako. Tame akaik
tenen lahan na i kum nau natun? ⁸ Haeu
lawe i nau hasawi teka natun. Teteke na i
kum nau, kumahe salan natun. Laha masin
tuahenati aweisal. “Kako hina lokako hani
tamakako ti lato nanau kako. Ala pamu
kako hani hatapoa tel Tamakako Haeu
tupuakako, tetel i hani kaha hanawain. Na
kako aile ukek ien kako to kapin lian tehue.

¹⁰ Teka tamakaha nau kaha ti kaha tutuen
hahitakalah. Laha haeliel hawane ti nau
hasawiakaha. Tuahenauan ti Haeu mewe-
nae i hasasolia kako lehe kako sohot seilon
tenen i kola hawane woun i Haeu. ¹¹ Ti
Haeu nau hasasawi kako, kako kum amuke,
tiakako i kawat. Tuahen hina solian tetan.
Na kako nam waxi hasawian ti Haeu, kako
sohot seilon tenen i usiusi saun ti i pahan
ape tiakako i eng soli.

¹² Aile ape na namilomuto lehe i put
hanowi tel seilon tenen aen ma minan pate
pusoan, kui kewa. ¹³ Aile hasawiwa nanahia-
muto lehe teka namilolaha kumahe xoxoan
ti Haeu, pupuasakako i hakui aliake laha.
Ape namilolaha i kum put hanowi seilon
tenen waxosi putaian pate malimun.

Kako hong usiwa kakai Haeu

¹⁴ Haelielwa ka wasolamuto kapi hatesol
seilon lawe solian ma hani hatapoa Haeu
tupuamuto nake tap tel po ningahi Haeu
na i kum hani hatapo i tupuan. ¹⁵ Lepetawa
uke amuto sel ti waliko solian ti Haeu. Ka-
nipetiwa nanahiamuto uke i hakawata ali-
ake amuto ma i haputu halialu kilan seilon.
Ien hanowi mahe, pata tenen maxaian na i
xexex leilomuto. ¹⁶ Kolongeniwa ka tap tel ti
amuto i put ti ailei saun lialun hanowi ti Iso.
I kum nam waxi Haeu ape i aka lioi waliko
ti ala i tel pamu ukean tuahe ti angain
tehu. ¹⁷ Masin ti amuto tioi, imuh pahan i

uke waliko solian ti i aka lioiwen tuahe tel
taman kapitini. Kalak i tang tahane soliai
tesol waliko ien, tap aliakean. Tap aweisal
ti i pon ukean.

¹⁸ Namiloi paxaiwa sale xohiamuto hani
Haeu. Liae tenen ti teka matahaun ti amuto.
Laha nahih hani tehu Maunt Sainai ti i
kum pon laha soti. Ti ien laha ningahi
maunten hatehu i xekexek. Axuan pate
lalap kakkalini i. Aupol pate kuin hetekie
akah. Maun hatehu i tilok. ¹⁹ Laha hong
lalape tangjai waliko masin suhusuh ape
Haeu kakak kapi laha. Ti laha hongoa, laha
kamei eliel i ka kum kak ukekek ien. ²⁰ Laha
kum pon hawane. Pate laha mamata ti
Haeu kak ukek, “Kalak na tuahe manihuh
i nahih hani he tehu maunten ie, amuto
hokai teleiwa ani pot.” (Exod
19:12-13) ²¹ Waliko ti i sosohot Maunt Sainai,
hamatau hawane seilon. Puki alia Moses i
ukek, “Nga mamata xexex hawane.” (Deut
9:19)

²² Tuahe amuto, sale xohiamuto hani
Haeu pate liai tenen wanen. Amuto hanowi
ka amuto nahih hani tehu Maunt Saion,
tehu Jerusalem haun, tetehu taon ti Haeu
tel pate pohen. Ien masin ka amuto kapi
Haeu ti tesol tonan. Ti ien kilan
kilan wanen engel lawe lato apuha amuam.

²³ Amuto ape soh akatiwen teka kahikahi
Krais. Amuto ape nati Haeu ukei waliko
ti i kakawen i hani teka natun. Haeu tai
konginiwen axamuto ti ukei tonain kapin ti
tap tahi tapoan. Amuto seilon ti Haeu tel
paxai kolongeniai woi lawe seilon. Amuto
tuai teka seilon ti imat laha hani hatapo
Haeu tupualaha ape laha sohot seilon tenen
i paxai ukek laha sawisawin. ²⁴ Amuto hahita-
take Jises Krais tetel tuhai wasolakako hani
Haeu, ti Haeu xinoti tenen namil haun ti
hukuminiai seilon hani kapin. Amuto soh
hawane ka Krais mat he kros ti awaiamuto
ti kawatan ti lialui woumuto. Le pamu tuah
ti na Abel mat nake muhin ti Kein teleiwa i,
Haeu axi Kein kawatan.

²⁵ Haeu lawe i kakak kapimuto. Kolon-
geniwa ka amuto kum hong watakai kaka-
ian. Teka ti matahaun ti koko laha tahi
kakai Haeu ti teka seilon tetan kaxi hahani
lahe hanowi ti Moses. Laha kum salini
uke kawatan. Na masin ien, teteke kaha
tale tehitokaha hani Haeu, tetel ape i kak
sawi hani kaha, pamu lapan kawatan i axi
kaha. ²⁶ Lokon Haeu kaakane teka mata-
haun ti kako ti laha kapi Maunt Sainai,
lalape kinaxon i nuei tehu pon ie. Tuahe

imuh i ukek, "Tuen tehu kumahe nga nuei mewenae tehu pon itan, hetekie maun ti patul." ^(Hag 2:6) ²⁷ Teik kakain ien salangawan masin, hatesol waliko ti Haeu tanomi, i nuei xaxaweni tenen ti i kum to kue. I hamalumini mewenae waliko tenen i to lian tehue.

²⁸ Aile ape, nake kako ukeke tehu tonain kapi Haeu ti tap tahi tapoan, kako kak kemulik haniwa i tel neiniakako. Kako sameniwa ma haxawawa axan ti aweisal tenen i amuke. Kola hawanewa lomuto haniwa i ma kanipetiwa nanahiamuto uke amuto aile waliko ti i watakai. ²⁹ Haeu axi kawatan hani teka laha kum nam waxi i hanowi ah ti i lui hatapo waliko.

13

Tilaii kakain

¹ Amuto he wawahen tatalewa ti leili ate-muto hanowiwa ti Krais. ² Aile kapitiniwa saun ti waxi auniai seilon ti xux liai laha lua hani kapimoto. Hina seilon laha waxi auniwen teka engel hani leili ingalah a laha kum tioi. ³ Nameniwa hualiai teka leili kalabus. Aile haniwa laha hanowi na amuto kapi laha. Tin masin nameniwa teka laha kakau kawatan. Aile haniwa laha hanowi ka tin amuto kakau kawatan.

⁴ Hua na lalu sal, lalu hamalum kapitawa lalu. Paxai kewak ka pate tuah. Haeu axi kawatan hani teka laha xuina axoi seilon liai ma teka laha ailele saun lialun ti wawan hehin.

⁵ Kum halelelep ti ngahoi moni. Amukewa waliko ti amuto hina. Haeu kakawen i ukek,

"Tap wanen nga po salili amuto."

Tap wanen nga paxai lioi amuto."
(Deut 31:6)

⁶ Aile ape i pon kako kak hawane ukek,
"Haeu tel Masiwi i se hualiak.

Nga kum mamata ti tenen
na seilon aile hani nga." ^(Ps 118:6)

⁷ Nameni aliaikemua teka masiwi ti amuto, teka laha kaxi hahani amuto kakai Haeu. Paxaiwa ani pupuasalahua ape puas usiwa xoxoi namilohala ti Haeu.

⁸ Jises Krais i kum sohisohia. I tin ma-masin titihah, tetelao ma lawe. ⁹ Kum ha-hani tel na seilon neini hakalala amuto ti Haeu ti laha hahanau waliko tenen haun ti i hahataxina seilon. Usuai nauna tenen tenen ti sale an i kum huali kaha. Teka laha usiusi nauna ti an tenen ewi kaha ani ma na kumahe, laha kum uke tenen na

solian tetan. Haxoxoa namilokako ti lalape soliai Haeu nake tenen i hakui hawane koko. ¹⁰ Kako nameniwa soliai tehu matei Jises Krais ti oxoxiakako ti kawatan ti lialui woukako. Teka laha usi kakapitini saun tenen ti laha lelei manihuh hani Haeu nake laha sokok i hasawi laha hani kapin, laha kum pon ukei solian ti matei Krais.

¹¹ Usiai saun ti teka Ju, tel masiwi tapein ti hukuminiai Haeu ma seilon i kau kake manihuh hani tesol Tuah Tapein ti haniai Haeu kahuiiai lialui woi seilon. Tuahetupui manihuh ien laha lui hani melal ti toan.

¹² Jises tin i kau kawatan ape i mat melal ti tehu taon Jerusalem. Puki i mat ti kahuiai lialui woukaha lehe kaha hani hatapo Haeu tupuakaha. ¹³ Aile ape kako hana hatapoia xoxoi namilokako haniwa Krais tel awa-iakako ti kawatan ti lialui woukako. Kako kum nomonuha ti ukei hienain hanowi ti Krais kauen. ¹⁴ Nameniwa ka he tehu pon ie kumahe tonakako lian tehue. Kako mon atetengi tehu tonain kapi Haeu i luluainima imuh.

¹⁵ Aile ape nake ti puase Jises Krais, lawe kako sameniwa Haeu. Ie se waliko ti kako hani i, tetel kako ukek Masiwi ti kako. ¹⁶ Kum aka liloi ailei waliko solian ma hualiai teka tonalaha lialun. Saun tenen ien i hamuamua Haeu. Ie se waliko ti Haeu pahan kako aile haniwa i.

¹⁷ Hong usiwa teka masiwi ti amuto laha neneini amuto ti aweisali Haeu. Ailewa waliko ti laha kakane amuto ailean. Nameniwa ka imuh Haeu paxai kolongeni puasalahua ti ngahatiamuto. Hong tamaniwa kakaialaha lehe laha aile amuke puasalahua. Na tap, i hakawata tialaha ape amuto kum tunahi solian tetan.

¹⁸ Lotu hualima amite teka kaxi ahutiai meng solian ti Jises. Namilomite i eliel ha-hawane ka Haeu kum paxai watakai amite. Amite is hawane ti puas leili atemite lehe waxi nanahiamite lawe i hamuamua Haeu. ¹⁹ Puki alia nga, kamekame tetak hani amuto ti lotu elielawa lehe kum kue nga sohot paxai ulea amuto.

²⁰ Jises Krais i masin tel ngahatiai sipsip solian. I waxeni, i awai ma i neini kako. Haeu tel i hatona hasolia tiakako, i hamoiha Jises tel Masiwi ti kako ti tehu matean he kros. Ti aweisal tewau ien, i hapoponowi tenen namil haun ti i xinotiwen kapi kako lian tehue. ²¹ Aile ape nga kamei Haeu ti hanihamuto hatesol waliko solian ti i huali amuto ailei waliko tenen i pahan. Nga

kamei hetekie i ti puas tatalei leilocako teka hahitake Jises Krais lehe kako sohot hawane seilon tenen i amuke. Kako haxawawa axe Jises Krais lian tehue. Salan wanen.

²² Tesol soliai akikik ti Krais, nga kamei eliel amuto ti hong auniai kakain ie ti hualiamuto pake teik pasuk kumahe pate weluvelun.

²³ Pahak amuto tioiwa ka Timoti tel akikikako ti Krais i ahutawen ti kalabus. Na i tapau tunahima pala aope, nga uke i kahitiak na nga lua paxai amuto.

²⁴ Amuam tetak haniwa hatesol teka masiwi ti amuto ma hatesol teka kahikahi Krais. Teka kahikahi Krais ti texux xux Itali, tin lato hakaua amuam hani amuto.

²⁵ Solian ti Haeu haniwa amuto hatesol.

Jeims

Nauna ti Jeims hani teka kahikahi Jises Krais

Kakain ti haxewai teik pepa ie

Jeims tai teik pas ie sai ahang 30 muhin ti Jises moih aliawa ape Haeu waxy i hani tesol tonan. Jeims i tel masiwi ti teka kahikahi Jises ti Jerusalem. Kilan seilon ukek i tel ti ukale Jises. I tai teik pas ie hani teka kahikahi Jises lato toto tesol tesol ti tehu pon ie. Lato sos silahota nake teka laha watakai Krais axi lato kawatan tenen tenen. Aile ape Jeims tai hakui lato lehe namilolato i xox tatale ti Haeu. Jeims tin i kakak sale saun ka kaha teka kahikahi Jises puas usiwa. I hanamena kaha ka namilokaha hani Haeu salan xoxoan na kaha kola soliai pupuasakah.

¹ Teik pas ie tataiak nga Jeims tel unaui Haeu ma Jises Krais tel Masiwi.

Amuam tetak haniwa amuto teka kahikahi Jises, amuto to sisilahota tesol tesol ti tehu pon itan ie.

Haxoxoa namil hani Haeu leili taun ti totong ma kawatan

² Teka akikik ti Jises Krais, na totohong ma kawatan tenen tenen tunahi amuto, amuke hawanewa. ³ Amuto tioi kewak, na amuto waxaini hatesol totohong ma kawatan ien hetekie amuam he tiamuto, i hakui aheke xoxoi namilomuto ti Haeu. ⁴ Aile ape xoini tatalewa tesol waliko ien lehe namilomuto i xox eliel hawane ti Haeu ape amuto sohot seilon sawisawin wanen haponowiai namilon.

⁵ Na tel ti amuto tap anesoan ti aweisali Haeu ma i kum tioi sale xoiniai totohong ma kawatan na i tunahi i, kameiwa Haeu, i kum kahilol. Lawe i amuam ti haniamuto. ⁶ Ti na o kamei Haeu, namilom kewa xoxoan, tap namil ti kakapax. Seilon tenen ti kakapax i masin topang tua usiusi tuhi aupol. ⁷ Ti na o seilon ti kakapax, kum nam ukek Haeu axi o tenen waliko ti na o kamei i. ⁸ O seilon tenen namilom huaik. O kum hamalum uke ti lawe waliko na o aile.

⁹ Amuto teteke kahikahi Jises tap soxi teka seilon liai paxai wasi amuto, amuamua. Haeu namiloi ukek amuto seilon tuah nake amuto tetan. ¹⁰ Ape amuto teka kahikahi Jises Krais kilan soxi, amuamua ti

Haeu teheni amuto ti amuto hanasanasa ke kilai soxi ien. Pake amuto tapo masin palawai pata ti i aiol. ¹¹ Ti alon kekewa i mani haiole teik palawa. Solian tetan i tapo ape i put. Tin masin tel seilon ti kilan soxi, i to puas luhuluh ti i mat salili hatapo hatesol soxian.

¹² Amuamua na amuto angiamat ti kaui kawatan ma totohong nake i kola hani Haeu ka namilomuto xoxoan tetan. Ape Haeu hatona amuto kapin lian tehue. Ien se kahi teka laha waheni i.

¹³ Na tel seilon pahan ailei waliko tenen lialun, i kum ukek Haeu totohonggi i. Haeu kumaha pahan ailei saun lialun ma tin i kum tohongi haputai seilon ti ailei saun lialun. ¹⁴ Puki lialui isiasi namilokaha i tohongi kaha. ¹⁵ Lialui namilokaha i neini kaha ape na kaha to ailele saun lialun, i selai xaxaweni kaha ti nenein ma wawahen ti Haeu.

¹⁶ Teka soliai akikik ti Krais, kum halati hahani teka liai puluti amuto ka Haeu totohonggi amuto ailei saun lialun. ¹⁷ Haeu pate sawisawin wanen, aile ape hatesol waliko solian wanen i ahuma tetan. Haeu tel i tanomi lawe waliko xewan he maun. Hatesol xewan ien i sohisohia tuahe Haeu i kum soshobia. ¹⁸ Ti soliai namilon i hani kako kakain salan lehe kako sohot natun masin ti hehin hatakaha natun. Ti lawe waliko Haeu tanomiwen, kako se teka i kilamiwen tetan lehe kako hana hatapo kako hahitake nenein tetan.

Hong matainiae kakai Haeu ma puas usian

¹⁹ Teka soliai akikik ti Krais, nameni konginiwa. Lawe hong aluawa seilon liai. Namiloi matainimua imat ti o kak. Kum leng kokosea. ²⁰ Lengelenge i kum hasohotu uke saun solian ti Haeu pahan. ²¹ Aile ape lioiwa saun tenen lialun ma hahien. Saun tenen ien pate kilan he tehu pon ie. Puas usiwa kakai Haeu ti i hanawen leilom. Na o aile ukek ien, kakai Haeu awai o ti kawatan ti lialui woum.

²² Kum tua hong lilioi kakai Haeu, puas usiwa. Tel na i hong kakai Haeu a kum puas usi, i tua puluti aliliakte i. ²³ Tel seilon na i hong kakai Haeu ape i kum aile usi, i masin tel seilon i paxai hosaua he kalas tuahe i kum aile na tenen hasolai tanoman. ²⁴ Ti i paxai kewa, i nahih maluhu hatapo en tanoman. ²⁵ Tuahe tel seilon na i paxai aluini kakai Haeu, kakain ien hei aweisal ti usiwa namili Haeu. Na tel seilon aile tatale

ukek ien, tap tahi maluheki kakai Haeu ape i puas usi, Haeu aile hasolia hani i.

²⁶ Na tel ukek i seilon ti lotuiai Haeu tuahe i kum kapiti uke lehon ailei kakain solian, i tua puluti aliliake i nake lotu tetan kumahe salan. ²⁷ Na tel i ngahati hasolia teka akaik tap taman tinan ma hehin ti axoan matewen ma i huali laha kaui kawatan ape i kum aile saun lialun hanowi teka laha tahi kakai Haeu, tel seilon ien salan wanen i lolotui Haeu. Ape tel Tamakako Haeu namiloi ukek i seilon tuah ma lotu tetan pate salan.

2

Kum aile nenexi seilon

¹ Teka akikik ti Krais, amuto se kahikahi tel pate tuah tapein, tel Masiwi ti kako Jises Krais. Aile ape kum nenexi seilon ti na amuto aile hasolia hani laha.

² Namiloi paxaiwa na o aile tehu apuhain ape hua seilon nahima. Tel seilon kilan soxi puxuaun pate solian ma tel i tap soxi puxuaun pate lialun. ³ Lalu, pamu o aile aluin hani tel puxuaun pamu solian. O ukek, “Toa he tehu totoan tuah.” A o hone tel puxuaun lialun ukek, “O tu talewa sai io.” Ma na o ukek, “Toa itan kapi aek.” ⁴ Na amuto aile saun tenen ien i axi wasolamuto. Ti lialui namilomuto amuto namiloi ukek ka seilon teka, laha pamu tuah ti teka liai.

⁵ Teka akikik ti Krais, hong matainiwa! Teteke seilon tap soxi teka liai paxai wasi laha, Haeu kilami laha lehe namilolaha xox tetan. Teka seilon ien Haeu neneini laha masin ti i kakanewen teka laha waheni i. ⁶ Tuah amuto kum aile aluin hani laha, amuto aile aluin mewenae hani teka kilan soxi. A teteke seilon ien aile halialu amuto. Laha lungei xoti amuto ape sului amuto hani teka masiwi ti axiamuto kawatan. ⁷ Laha tin teteke laha kak halialu soliai axe Jises Krais, tetel Masiwi solian amuto kahikahin.

⁸ Sawisawin wanen na amuto puas usi tenen nauna pate tuah ti Haeu tel Masiwi ti i ukek, “Waheniwa seilon liai hanowi ti o waheni aliake o.” (*Lev 19:18*) ⁹ Tuah na amuto aile hasolia hani teka seilon kilan soxi i xoini ti amuto aile hani teka liai, amuto ailewen saun lialun nake amuto xaputi tenen nauna ien.

¹⁰ Na tel seilon i hong usi nauna ti Haeu tuahe i xaputi tenen, Haeu nam paxai ukek i masin tel i xaputiwien hatesol nauna. ¹¹ Haeu tel i ukek, “Kum ailele saun lialun ti wawan hehin” ape tin i ukek, “Kum tetelei

seilon.” (*Exod 20:13-14*) Kalak amuto tai aile saun lialun ti wawan hehin tuahe na amuto ulini ape telei seilon, amuto sohotuen tel ti xaputiai hatesol nauna ti Haeu.

¹² Nameniwa, na kakaiamuto ma puasamuto i kola tatahan hani seilon liai, Haeu tin i kola tatahan tetan ti i nam kolongeni saun ti amuto. Na amuto aile ukek ien, Haeu kum axi amuto kawatan ti lialui woumuto. ¹³ Tuah na amuto kum kola tatahan hani seilon liai, Haeu tin i kum kola tatahan tetan ti i nam kolongeni saun ti amuto ape i axi amuto kawatan ti lialui woumuto. Tatahan i xoini nam kolongeniai saun ti seilon, aile ape teka laha kola tatahan hani teka liai laha kum mamata taen Haeu nam kolongeni woulaha.

Xoxoi namil hani Haeu ma puasain solian

¹⁴ Teka akikik ti Krais, na teka seilon ukek namilolaha xooaan ti Jises Krais tuahe pupuasalahi i kum kola, teik namilolaha i kum huali laha. Haeu kum awai seilon tenen ien ti kawatan ti lialui woulaha.

¹⁵ Namiloi paxaiwa na tel ti amuto tap puxuaun ma anan. ¹⁶ Na masin o hone i ukek, “Haeu kapim ma i axi o puxux ma an,” tuahe o kum huali i, tap waliko solian o ailewen. ¹⁷ Tin masin na namilom xooaan ti Jises Krais tuahe pupuasam i kum kola, namil ti o hina tap pupuasan masin seilon maten.

¹⁸ Tuah teka ti amuto uke amuto namiloi ukek, “Seilon teka namilolaha xooaan ti Jises Krais ape seilon teka puasalahi solian.” Nga kak pahoi ukek ka nga kum paxai tioi xoxoi namilomuto na amuto tap puasain solian. Tuah nga kola uke hani amuto xoxoi namilok ti pupuasak.

¹⁹ Amuto soh ka Haeu i telaweh, kewak? Salan wanen. Tuah teka spirit lialun tin laha soh ma laha mamata xexex Haeu. ²⁰ Tap patumuto na masin amuto kum paxai tioi ka namilomuto ti Haeu tap pupuasan na puasamuto kum kola. Nga kola hani amuto ka namilomuto kumahe salan.

²¹ Ala amuto tioi ka Abraham, tel tamakako ti matahaun, Haeu namiloi ukek i tel seilon sawisawin nake ti waliko ti i aile lokon ti i hani Haeu tel natun Aisak ape lehe i telei hani Haeu. ²² Aile ape paxai tioiwa ka xoxoi namili Abraham hani Haeu ma waliko ti i aile, lalu puas hukuma. Ti sale pupuasan i kola ka xoxoi namilon ti Haeu i poponow hawane. ²³ Len se i kola ka kakain he pepai Haeu pate salan wanen ti i ukek, “Haeu namiloi ukek Abraham seilon sawisawin

nake namilon xoxoan tetan." (Gen 15:6) Ape ti leili pepai Haeu tin laha axai i lohi Haeu.²⁴ Ape amuto tioiwen ka Haeu namiloi ukek kaha seilon sawisawin na kaha kola hani i xoxoi namilokaha hetekie pupuasakaha.

²⁵ Tin ala amuto tioi ka kalak Rahab tel hehin ti aweisal, Haeu namiloi ukek i sawisawin nake i muneni teka unaui Josua ti awaialato uke laha telei. I kola hani lato aweisal ti lehe lato alia mamahul.²⁶ Aile ape masin tupuakaha tap hanawaian na kaha mat, xoxoi namilokaha ti Jises se masin seilon maten tap pupuasan na tap puasain solian.

3

Sale hamaloinai lehokaha

¹Teka akikik ti Krais, amuto tioi ka Haeu nam kolongeni woi teka hanauai seilon i xoini ti i nam kolongeni woi teka liai. Aile ape amuto kum soxosox teka ti hanauai seilon.²Kaha hatesol hina kaha sel ti saun tenen Haeu pahan. Tuahé na tel seilon i pon kapiti hasolai kakaiyan, tin i pon kapiti hasolai hatesol woun.

³Masin tehu kokole hoiho seilon hapanua ti kapitiae tea huhuna.⁴ Tin masin waian. Kalak aupol kuin, kokolei kapitun i pon kapitiae waian usuai namili tel huniwa.⁵ Ape lehokaha tin masin, i pon kapitiae kakain. Kalak i pate kokol i pon aile halialui seilon na kaha kak kakain lialun. Masin teik kokole nawal xoan i pon luiai lemaux hatehu.

⁶Lehokaha tin masin ah. Masin ti ah pon lui halialui hatehu lemaux, lehokaha i pon ailei kakain ti halialui seilon. Masin teik kokole nawal xoan pon i aile tehot ah lalap ape i lui hatehu lemaux, tin masin Satan hahika lehokaha ailei kakain lialun ape i kapiti halialui hatapo namilokaha ma pupuasakaha.

⁷ Kaha pon hamaloinai manihuh ma manixux tenen tenen ti ixux ma itax.⁸ Tuahé tap tel seilon i pon hamaloinai lehon halik na Haeu huali i. Seilon kum lioi uke kakain lialun na Haeu kum huali laha. Masin suhasus i pon aile halialui seilon, kakain lialun tin i pon aile halialualaha.⁹Hina kaha hapanua lehokaha same-niai tel Masiwi Tamakaha ape hina kaha hapanua ti sai halialui seilon liai kalak Haeu tanomi seilon hetekie waliko ti lelokaha puki masin alia ti leilon.¹⁰Aile ape sameniai Haeu ma sai halialui seilon i ahutama he au tehue. Teka akikik ti Krais, tenen saun ien kumahe wanen ewi.¹¹Kan ti unum ma kan

ti kanitax kumahe lalu ahutama tesoloe.¹²Tea pau kum hahuama laku ape tea maia kum hahuama ul. Tin masin kanitax i kum hasohotu uke kan ti unum. Aile ape hapanuasawa lehokaha ti ailei kakain solian ti hualiai seilon.

Namil tenen xewan salan i ahuma ti Haeu

¹³ Na amuto ukek namilomuto xewan ma amuto seilon aneso, amuto kolawa ti pupuasamuto. Na amuto kum hanasanasake waliko ti amuto ailele, salan wanen namilomuto xewan.¹⁴ Tuahé na amuto lohaini seilon liai ma lawe amuto halepelep alia amuto, kum hanasanas ka namilomuto xewan nake woumuto kola puputa ti amuto.¹⁵Saun ti halepelep ma loloha, Haeu kum namiloi ukek i ahuma ti namil xewan. Seilon teka laha usi lialui namilolaha lawe laha aile saun tenen ien. Laha namiloi ma aile waliko masin wanen ti spirit lialun.¹⁶Seilon tenen ien lawe laha ahuxai namlili Haeu ma aile saun lialun tenen tenen.

¹⁷ Tuahé teteka laha hani Haeu kapiti namilolaha, i namiloi ukek namilolaha xewan ma laha seilon sawisawin wanen. Lawe laha aile hasolia wasole seilon, laha namiloi waximu seilon liai, laha hean ti lawe seilon, laha tahane seilon liai ma aile aluimi hani laha, laha kum aile nenexi seilon ma aile pipisi.¹⁸Seilon teka laha aile hasolia wasole seilon, laha sawateni saun tenen ien ape ti sale puasalah kilan seilon aile saun solian.

4

Hani hatapoia Haeu tupuamuto

¹Hilehile ma kakain ti hapatapat wasolamento i sohotuma ia? I sohotuma ti lialui isiai pahamuto. Tesol waliko ien i he hilehil leili namilomuto ma i ahuxai namlili Haeu.

²Lawe amuto nahaini waliko tuahé amuto kum waxy uke, aile ape amuto telei teka laha titiehi amuto. Pahamuto isian wanen waliko ti seilon liai hina tuahé amuto kum waxy uke, aile ape amuto kak hapatapat ma amuto hil. Amuto kum uke nake amuto kum kamei Haeu.³Tuahé Haeu kum hani amuto waliko tenen amuto kakamei i nake amuto kamea tuahé ti hamuamuaamuto.

⁴Amuto teka amuto kum usi haeliel saun ti Haeu pahan, ala amuto tioiwa ka teteka seilon laha waheni ailei saun lialun laha watakai hawane Haeu. Aile ape na tel ti amuto namiloi eliel usuai saun lialun i tin tel i watakai hawane Haeu.⁵Kum nanamilo i ka kakai Haeu ti he pepaun tap salangawan ti i

ukek ka Haeu pahan wanen kaha hana hat-apoa namilokaha ma kuikaha hani hahitake nenein tetan. ⁶Teka Haeu neini laha, i huali laha ti usi hawanei saun tenen i pahan. Aile ape ti he pepai Haeu i kak ukek,
“Haeu namiloi watakai teka seilon ti hanasanas,
ape i huali eliel teka laha teheni aliake laha
ti usiai namilon.” *(Prov 3:34)*

⁷Aile ape hana hatapoa amuto hani Haeu. Tu eliel hawanewa pahoiai Satan lehe i aile lioi haputiamuto ti ailei saun lialun. ⁸Towiahua ti lialui woumuto ape hong usiwa nauna ti Haeu lehe i sohot tel ngahatiamuto. Kum ailele saun lialun ti amuto ailele. Tu matuhawa ti Haeu, amuto teteke namilomuto uke huaik ti usian. ⁹Tang tahanewa nake ti lialui woumuto. Kum tua amumuke waliko ti tehu pon ie tuahue towiahua ti lialui woumuto ape usiwa Haeu. ¹⁰Teheniwa amuto lehe amuto usi hawane aweisali Haeu tel Masiwi ti kako ape i namiloi ukek amuto seilon tuah.

Kumahe pupuasakako nam kolengenai woi seilon

¹¹Teka akikik ti Krais, kum kak hahalialu tel tel ti amuto. Na tel ti amuto howini halialu tel akikin ahuma ti Krais, ien se i papahoxai nauna ti Haeu ma i namiloi ukek ka ewi na kaha kum usi nauna tetan. Na amuto ukek ka ewi na amuto kum aile waliko ti Haeu hahanau kaha, kumahe amuto hong usiusi Haeu ma amuto hana amuto nam kolengenai woi seilon liai. ¹²Haeu se tetel haniakaha nauna ti usian ma nam kolengenai woukaha. I pon awaiakaha ti kawatan ti lialui woukaha ma axiakaha kawatan. Aile ape kumahe pupuasamuto nam kolengenai woi seilon liai.

Kum hanasanas

¹³Hongoa! Teka ti amuto kak hanasanas ukek, “Letu nga ku hani tehu taon lalap ape nga to ien ahang tehu lehe nga puas hasohotu hakila moni.” ¹⁴Kalahai o kak ukek ien? O kum tioi waliko ti i luluainima letu ma tin o kum tioi welui totonom ti tehu pon ie. Welui totonom masin axi ah. ¹⁵Amuto kak kewak, “Na Haeu pahan, nga to ahemu he tehu pon ie lehe nga aile tetenen ma na tenen io.” ¹⁶Tuahne na amuto kak hanasanas sale puasamuto, amuto ailewen saun lialun.

¹⁷Na tel seilon i kum aile saun tenen i tioi ka sawisawin tin i ailewen saun lialun.

Teteka kilan soxi a laha kum nam waxi nauna ti Haeu

¹Hongoa! Seilon teka kilan soxi a laha kum nam waxi nauna ti Haeu, laha tang mamatawa nake kawatan lalap tunahi laha. ²Waliko solian ti laha i lialu hatapo ape sosolaha kokoros ani haliwalu. ³Moniulaha kake samen ien sului aliake laha nake i kola ka laha apuhini kueiniwen soxi ti laha halepelep. Masin ti ah lui hatapo waliko, tin Haeu axi laha kawatan. Kalak ape sikole Haeu kahui laha ti lialui woulaha, laha apuhini tatale soxialaha. ⁴Laha tai kahui teka puase leili kinelaha. Tangiae teka seilon ien ti upiai huuhal i meiwen kapi Haeu, tel Masiwi tapein.

⁵Totonalahe ti tehu pon ie xuhai waliko tenen tenen tuahe ti hamuamaialaha. Masin pou ang haxuxu i, a i kum tioi ka imuh seilon telei i, tin masin laha apuhini hakila soxi a laha kum paxai tioi ka imuh Haeu axi laha kawatan. ⁶Laha sului teka seilon ti tap huan hani teka masiwi. Ape sulusulu ti laha aile hina seilon sawisawin mat kalak teka seilon ien kum hil pahoi laha.

Kalak kawatan tunahi o, haxoxo tatalewa namilom ti Haeu

⁷Teka akikik ti Krais, kalak amuto tunahi kawatan, tu xox tatalewa atengi aliai tel Masiwi Jises Krais. Namiloi paxawai tel seilon seiniai an. I to atetengi taun ti ahang lehe akah ux haxexei an he kinen.

⁸Amuto tin masin, atengi tatalewa ape hana hatapoa amuto hani Jises tel Masiwi nake aliaian ape i xohiwen.

⁹Teka akikik ti Krais, kum he wiwilik alia amuto lehe Jises tel Masiwi kum axi amuto kawatan. I tetel nam kolengenai woi seilon ape sikole i aliamia.

¹⁰Nameniwa teka kuluiai kakai Haeu. Lato kakaxi waliko hahitake axe Haeu tel Masiwi. Kilan seilon aile halialu lato tuahue lato tu xox tatale usiai namili Haeu. Hanowiwia ti lato! ¹¹Amuto tioi ka Haeu amuke teka laha tu xox kalak kawatan tunahi laha. Amuto hongoen sale Job. Kalak i tunahi kawatan tenen tenen, xoxoi namilon ti Haeu i kum tapo ape imuh Haeu axi i waliko solian. Tetesol waliko ien i kola ka Haeu tahane hawane kaha seilon ma i se tel hualiaakahua.

¹²Teka akikik ti Krais, tuai tesol waliko nga kakawen, nga kaxi haxewa hani

amuto sale tuohain. Na amuto tuoha, kum kak ukekek kuinakei Haeu ma na kuinakei tamamoto tinamuto ma waliko liai. Lawe kakawa kakain salan. Ti na amuto namiloi ukek "se," tua kakawa "se," ma na amuto namiloi ukek "kumahe," tua kakawa "kumahe." Na amuto kum aile usi, Haeu axi amuto kawatan.

Haeu hong teka namilolaha xoxoan tetan

¹³Na amuto hina kawatan, kameiwa Haeu huhual! Na amuto amuam, pak sameniwa il! ¹⁴Na amuto tinun, ilowiwa teka masiwi ti amuto lehe laha lotu huali amuto. Ape ti hahitake axe Krais hoi liai laha ahui amuto wel. ¹⁵Kameiwa Haeu hetekiewa xoxoi namilomuto ti Krais ape amuto ewi. Jises tel Masiwi haewia amuto. Na amuto tinu ti puki lialui woumuto, kola haniwa Haeu ka amuto watakai hawanewen tenen saun ien. Na amuto aile ukek ien Haeu oxoxi amuto ti kawatan ti lialui woumuto.

¹⁶Aile ape na amuto aile saun lialun ma talesi wasolamuto, amuto kak hasawi hetekiewa tatahan he tiamuto. Ape amuto lotu he huhualawa. Na amuto aile ukek ien, Haeu haewia leilomuto hetekie tupuamuto. Haeu hong teka laha aile usi saun tenen pahan na laha lotu kamei i huhual. ¹⁷Masin Elaja. I tuahe seilon masin kaha. Ti i lotu kamei eliel Haeu konginai akah, i sohot usi kamekame tetan. Haeu kongini akah ti leili ahang tolahu tewaak. ¹⁸Imuh i lotu kamea hauxai akah ape salan akah ux. Taen ien hatesol an ti kin hua.

Neini aliakema tetel i tale tehiton hani Haeu

¹⁹⁻²⁰Teka akikik ti Krais, namiloi paxaiwa na tel tale tehiton hani Haeu. Amuto ti oi kewak, na tel ti amuto neini aliake i, ti sale pupuasan tel seilon ien i kum selaia ti Haeu lian tehue ape Haeu oxoxi i ti kawatan ti mongohe lialui woun.

1 Pita

Teik pasi Pita hani teka kahikahi Jises Krais Kakain ti haxewai teik pepa ie

Pita tel aposel tai teik pas ie hani teka kahikahi Krais ti tesol tesol lokon ti i toto tehu taon Rom. I sohot sai 34 ahang muhin ti Jises moih aliawa ape Haeu waxy i hani tesol tonan. Teka kahikahi Krais tunahi kawatan tenen tenen hahitake teka masiwi ti Rom nake lato usiusi saun ti Jises Krais. Aile ape Pita kak hahakui lato lehe lato tu xox tatale ti Krais hetekie amuam. I kakaxi hani lato sale Krais i awai lato, xoxoi namili Krais kalak kawatan tunahi i ma sale aliaian. Pahan lato nameni konginiwa tesol waliko ien ma haxoxoa namilolato ti Krais. Tin i hone lato woulato kolawa ka lato se nati Haeu.

¹ Teik pas ie tataiak nga Pita, tel aposel ti Jises Krais.

Nga tai hani amuto teka seilon Haeu kilamiwen tetan, teteka amuto ti xux liai to sisilahota leili xux Pontus, Galasia, Kappadosia, Asia ma Bitinia. ² Ti imat wanen hoi tel Tamakako Haeu namiloiwens ka i kilami amuto seilon tetan. Holi Spirit aile, ape amuto hani hatapo Haeu tupuamuto. Aile ape Jises Krais nuhi haumi amuto ti lialui woumuto nake i mat hualiamuto. Ape amuto pon usiai kakaian.

Nga kamei Haeu aile kola hawanei lalape soliaian hani amuto hetekie hatona hasolai tiamuto.

Teka kahikahi Krais mon atetengi tonain kapi Haeu ti tap tahi tapoan

³ Kako haxawawa axe Haeu, tel Tame Jises Krais tel Masiwi ti kako. Ti lalape tatahan tetan i aile, ape kako sohot seilon haun ti usiai nenein tetan. Haeu xahateni Jises Krais ti matean, aile ape namilokako i xox hawane ti mon atengiai tonain kapin ti tap tahi tapoan. ⁴ Nake ti tenen ien, kako soh hawane ka kako uke kahukako ti i to aununa tone Haeu. Tesol waliko ien tap tahi kalutaiyan ma lialuan. Lawe i hamalum kapita haun ma solian. ⁵ Waliko ien tetakako, teteka seilon namilokako xoxoan tetan. Aile ape ti lalape pohe Haeu i awawai kako atengi tataen ti Jises Krais aliama. Taen ien Haeu oxoxi hatapo kako ti lawe waliko

lialun ape i hatakei hani kako lawe waliko ti i aunini tetakako.

⁶ Aile ape amuamua, kalak aope ie kako ilalameni moloan ti totohong ma kawatan tenen tenen leili teik taun kukunun. ⁷ Tesol kawatan ien i kola na namilokako xoxoan ti Haeu ma na kumahe, masin ti laha lui gol he ah ti haunian lehe i kola ka i se gol wanen. Gol pon i lialu tuahe namilokako ti Haeu i xox tatale na kako waxaini tesol totohong ma kawatan ien. Na i sohot ukek ien, Haeu namiloi ukek kako seilon tuah ma i sameni kako taen ti Jises Krais aliama.

⁸ Saka amuto waheni Jises Krais, kalak amuto tai ningahi i. Tin amuto soh tetan, kalak aope ie amuto kum ninginah i. Amuam lapal wanen leili tiamuto. ⁹ Haeu awawai amuto ti kawatan ti lialui woumuto nake namilomuto xoxoan ti Jises Krais.

¹⁰ Teka kuluiai kakai Haeu ti imat laha eliel hawane upia matainai ti sale Haeu awai kako. Laha kakaxi ka Haeu aile ukek ien ti lalape soliaian kumahe nake ti soliai puasakako. ¹¹ Laha eliel hawane tioi aluinai tesol waliko ien ti Spirit ti Krais hanamiloa laha kak kilamiai lalape moloan ma matei Krais hetekie lawe waliko pate solian muhin.

¹² Holi Spirit haxewa haniwen laha ka kakain ti laha kak kukului, kumahe ti huali aliakealaha tuahe ti hualiamuto. Ti aope ie hina seilon tin laha kaxi ahuti hahani amuto tenen kakain ien ti pohe Holi Spirit, tetel Haeu taloma. Kalak teka engel ti Haeu tin pahalato wanen tioi matainai sohotui tesol waliko ien.

Haeu pahan kako sohot seilon pate sawisawin

¹³ Aile ape awaiwa namilomuto lehe i kum kapiti halialu nanahiamuto. Haxoxoa namilomuto ukei lawe waliko solian ti Haeu hani amuto ukean taen ti Jises Krais aliama. ¹⁴ Amuto se nati Haeu ti hong usiai kakaian. Aile ape kum usiusi isiamuto ti ailei saun lialun masin ti amuto ailemu lokon ti amuto tai tioi Haeu. ¹⁵ Haeu i sawisawin tapein. Pahan wanen amuto hana hatapoa tupuamuto hahitake nenein tetan lehe waxy amuto sohot seilon tenen pate sawisawin. ¹⁶ Puki i kakawen leili teik pepaun i ukek, "Sohot elieliwa seilon tenen sawisawin tapein nake nga tel sawisawin tapein."

(Lev 11:44-45)

Kahi lialui woukako pate lalap wanen

¹⁷ Amuto axai Haeu Tamamuto, aile ape nameniwa ka tehu pon itan ie kumahe xuxumuto wanen. Aile kolawa ka amuto hong tamani kakaian nake amuto paxai tioi ka i tel Masiwi ti amuto ma i kum nexi seilon na i paxai kolonganen woukaha. ¹⁸ Amuto tioi ka Haeu tai hapuasa waliko tenen aneso i tapo masin moni kahui oxoxiakako ti hahitake saun tenen tap pupuasan, tetenen i koutama ti teka matahaun. ¹⁹ Puki Jises Krais i mat kahuiai lialui woukako kalak i sawisawin tapein. I tap wanen teik waliko lialun masin tok sipsip wawan uluha pate huliwi ti teka Ju telei ape hani Haeu. ²⁰ Imat ti Haeu tanomi lawe waliko, hoi i kilamiwen Krais ti ailei tenen puasain ien. Tuahen ti solian ti kaha, Haeu taloma i aope ie, imat ti tapoi tehu pon itan ie.

²¹ Amuto soh ti Haeu nake ti pupuase Jises Krais. Haeu tetel i xahateni Krais ti matean ma hani i ax lalap. Aile ape amuto hina namiloi xoxoan ti Haeu ma amuto mon atetengi ukei waliko ti i kakawen i hani teka seilon tetan.

²² Amuto ape haun ti lialui woumuto nake amuto hong usiusi kakain salan ti Haeu ma amuto hina wanen wawahen hani teka akikimuto ti Krais. Aile ape he wawahenawa ti leili atemuto.

²³ Aile kewak ien nake amuto ape natu Haeu. I hani amuto tonain haun ti tap tahi tapoan nake amuto soh kakaian ti i hamalum lian tehue. Kumahe masin totone teka laha kum nam waxi Haeu. ²⁴ Masin ti tel kuluiai kakai Haeu kakawen, "Seilon masin pahoah i mat kosea.

Lawe waliko solian ti laha i tapo hanowi palawa tenen i tuhuawen. Pahoah lawe i aiol, palawa i pingox.

²⁵ Tuahen kakai Haeu tel Masiwi tap tahi tapoan." *(Isa 40:6-8)*
Kakain ien se tenen meng solian ti teka akikimuto ti Krais kaxi hahani amuto.

2

¹ Amuto ape pate haun, aile ape kum aile hahalalu seilon, kum pupuluti laha, kum namiloi wawatakai seilon ti laha xoini amuto, kum kak sasaxuti seilon ma kum ukeke seilon tenen lehon huoka. Lioi xaxaweni hatapoa tesol saun ien. ² Masin ti akaik tenen pate kokol i hitoloke hawane sus, amuto hitolokewa kakain salan ti Haeu lehe amuto pakata tatale kapin ma amuto tu xox usiai Jises Krais. ³ Aile kewak ien paket amuto ilameni paxaiwen solian ti Haeu tel Masiwi.

Kako ape nati Haeu nake kako soh ti Jises Krais

⁴ Amuto pakatawen kapi Jises Krais, tetel masin tehu kuku pate tuah ti Ingi Haeu. Teka seilon tale tehitolaha hani i tuahen Haeu namiloi ukek i pate tuah ma tin i kilami i ailei puasan.

⁵ Amuto tin masin tehu kuku tuah Haeu hapuasa ataiai tehu ingan. Tehu ingan ien se kako teka kahikahi Krais, Haeu aile ukek ien lehe waxi kako sohot seilon tenen i hani hatapo Haeu tupuan. Haeu amuke tenen saun ien kumahe nake ti soliae puasakako tuahen nake ti pupuase Jises Krais. ⁶ Masin ti Haeu kakawen leili teik pepaun. I ukek, "Nga hatuhu tehu kuku pate tuah leili Jerusalem.

Tehu kuku ien nga kilamiwen ataiai ingak.

Teka seilon laha soh tetan
tap wanen laha po namiloi tahane ali-
ake." *(Isa 28:16)*

⁷ Aile ape teka laha soh tetan, laha paxai tioi ka tehu kuku ien se pate tuah wanen. Tuahen teka laha kum soh tetan, teik kakain leili pepai Haeu i kak ukek sale teka ien, "Tehu kuku teka ataiai ing hilisa,

Haeu aile ape i sohot kuku
tetehu pamu tuah ti kuku liai." *(Ps 118:22)*

⁸ Leili pepai Haeu tin i ukek,
"Tehu kuku ien tin masin tehu hat he
aweisal
seilon nahih tuhuke ape laha put." *(Isa 8:14)*

Teka seilon ien namilolaha ti Jises Krais i put nake laha tahi kakai Haeu. Ti imat wanen Haeu namiloiwen tenen waliko ien i sohot hani teka laha kum hong usi kakaian.

⁹ Tuahen amuto kumahe masin teka seilon ien. Haeu kilamiwen amuto seilon tetan. Amuto seilon sawisawin ti ailei puase Haeu, amuto hana hatapo tupuamuto hani i tel Masiwi ti amuto. Amuto seilon ti Haeu lehe amuto kaxi ahuti hani teka seilon lalape solian tetan, tetel i neini ahuti amuto leili tilokoan ti saun lialun hani leili soliae xewaian. ¹⁰ Masin ti tel kuluiai kakai Haeu kakawen ka imat amuto kumahe seilon ti Haeu tuahen ti aope ie amuto ape natu Haeu. Imat Haeu tai kola tatahan hani amuto tuahen ti aope ie amuto kewen tatahan tetan.

¹¹ Teka soliae akikik ti Krais, nameniwa ka tehu pon itan ie kumahe xuxumuto wanen. Aile ape amuto tahiwa isiamuto ti ailei saun

lialun nake i pahoxai amuto ti ailei saun solian.¹² Lawe ailewa waliko tenen mewenae sawisawin. Na amuto aile ukek ien, teka laha kum soh ti Haeu ma kak sasaxuti amuto, laha paxai tioi soliai woumuto ape laha haxawa axe Haeu taen ti Jises aliamta hinitiai seilon.

Lawe hongoa kakai teka masiwi ti amuto

¹³ Haeu tel Masiwi pahan amuto paxai tioiwa ka amuto hahitake masiwi tenen tenen ti tehu pon itan ie.¹⁴ Amuto hongoa kakai tel masiwi tapein ti xuxumuto ma teteka masiwi ti i kilami. I talo laha axiai kawatan hani teka ailei waliko lialun ma sameniai teka ailei waliko solian.

¹⁵ Haeu pahan amuto ailewa saun solian lehe seilon tenen tap namilolaha ma anesoalaha ti Haeu, laha monga kak halialuamuto.¹⁶ Nameniwa, amuto ape seilon tenen oxoxain, tuahe kumahe i hakouke amuto ailei lawe waliko ti pahamuto. Woumuto kolawa ka amuto unaui Haeu.¹⁷ Waheniwa teka akikimuto ti Krais ma aile aluinawa lawe seilon. Amuto kewa hina lomuto ti Haeu ma hongoa kakai tel masiwi tapein ti xuxumuto.

¹⁸ Amuto teka unaui seilon, kewa hina lomuto hani teka masiwi ti amuto. Hong usiwa kakaialaha, kumahe mewenae na laha aile aluin amuto, tin hetekie na laha ahian.¹⁹ Se saun solian ti na amuto tolomike lioi ahiai saun ti teka masiwi nake amuto seilon ti Haeu.²⁰ Na amuto aile ukek ien, hina salangawan ti sameniai amuto ma Haeu amuke amuto. Tuahe na amuto kau kawatan ti lialui woumuto, tap salangawan ti sameniai amuto.

²¹ Amuto se teka kahikahi Krais, tetel i kauen kawatan ti hualiamuto ape Haeu pahan amuto usiwa soliai woun kalak na amuto tunahi moloan.²² Jises Krais tai aile wanen tenen na waliko lialun ma tin i tai pupulutel na seilon. (*Isa 53:9*)

²³ Ti teka seilon kak alui i, i kum kak halialu aliake laha. Ti i kau kawatan laha hani i, i kum kak hamatua laha ka i kahui aliake. I hani lioi tesol kawatan ien hani mini Haeu, tetel lawe sawisawin ti paxai kolongenai woi seilon.²⁴ Puki Jises Krais hani tupuan lehe i mat he kros ti kau kawatan ti lialui woukaha. I aile ukek lehe kaha lioi xaxaweni saun tenen lialun ma kaha hana namilokaha ti ailei waliko tenen sawisawin. Nameniwa, Haeu haewiawen amuto nake Jises Krais uke totonamuto ti kau kawatan.²⁵ Kermuk amuto masin teka

sipsip laha nahih mitaxia. Tuahe ti aope ie amuto tohea alia haniwen kapi Jises Krais tetel ngahati amuto. I awawai namilomuto lehe waxi amuto hamalum hahitake nenein ti Haeu.

3

Nauna hani teka hehin salawen

¹ Tin masin amuto teka hehin, amuto paxai tioiwa ka amuto hahitake axoamuto. Ape na lato tahi kakai Haeu, aile tatalewa saun solian hani lato. I xoini kakaiamuto ti itiniai namilolato usiaw aweisali Haeu.² Na lato ningahi amuto puas usi kakai Haeu hetekie soliai woumuto, tin lato soh kakaiam.

³ Kum namiloi elielil hasoliai tanome tupuamuto nake tanomamuto kumahe i kola soliai leilomuto. Kum aile hahakila tenen tenen hani ukumuto ma hahakea waliko tenen pate tuah masin gol he tinumuto. Kum soosoia maia tenen kahun pate lap.⁴ Soliaiamuto wanen i ahuma ti soliai woumuto. Haeu namiloi ukek amuto hehin tuah na amuto aile aluin teka seilon liai ma teheni aliake amuto ti usiaw namilon. Tenen saun ien se soliaiamuto wanen ti tap tahi lialuan.⁵ Lokon ti kuewen, teka hehin ti Haeu tin laha aile saun tenen ien ti kolai solian ti laha. Laha hina namil xooaan ti Haeu ma laha hong usi axoalaha.⁶ Masin Sara, i hong usi kakai Abraham tel axoan ma aile hani i hanowi ka tel masiwi. Amuto kola ka amuto masin Sara na amuto aile waliko ti Haeu ukek sawisawin hetekie tap matauamuto kalak na axoamuto ma na seilon liai axi amuto kawatan.

Nauna hani teka wawan salawen

⁷ Tin masin teka wawan, amuto aile aluinawa axoamuto. Namiloi tioiwa ka amuto pamu kuin ti lato. Aile hasoliai axoamuto nake ati amuto uke tonain kapi Haeu ti tap tahi tapoan, tetenien i hani amuto ti lalape soliaian. Na amuto aile ukek ien, Haeu hong waxi kamekame ti amuto ti leili lotu.

Nauna hani hatesol kahikahi Krais

⁸ Tilai nauna tetak, amuto hatesol kewa namilomuto teikawe, kolawa tatahan hani tel tel, he wawahenawa ti atemuto wanen ma namiloi kewak seilon liai pate tuah.⁹ Na teka seilon kak alui ma na aile halialu amuto, kum kahui aliliake. Aile hasolia haniwa laha nake Haeu pahan amuto ailewa saun tenen ien. Ape i tin i kola soliaian hani amuto.¹⁰ Masin teik kakain he pepai Haeu i ukek,

"Na pahamuto amukei kilan ngain solian
ma soliai totonamuto,
kum kakak kakain lialun
ma kum pupulut seilon.
¹¹ Saliniwa ailei saun lialun ape ailewa wa-
liko tenen solian.
Lawe puas elielawa hasoliai wasola-
muto.
¹² Aile kewak ien nake Haeu tel Masiwi
lawe i ngahati teka seilon sawisawin
ma hong waxy lotu ti laha.
Tuahe lawe i puas pahoxai teka ailei saun
lialun." *(Ps 34:12-16)*

*Teka kahikahi Krais kau kawatan ti ailei
saun solian hanowi i*

¹³ Na amuto hik hawane ailei saun so-
lian, kaie teka seilon aile halialu amuto?
¹⁴ Tuahe na amuto kau moloan ma kawatan
nake ti ailei waliko tenen solian, amuamua.
Tanusik amuto. Kum namiloi hahalapa na
seilon liai hamatau amuto. Kum maamata
teteka uke laha aile halialu amuto. ¹⁵ Ti
atemuwanen haxawawa axe Krais tel
Masiwi ti amuto. Na teka seilon kamei
amuto sale xoxoi namilomuto ti Krais, kewa
namilomuto lawe i apepeas ti haxewaian.
¹⁶ Tuahe aile hasoliawa ma hamalehua kak-
iamuto hani laha. Kanipetiwa sale nanahi-
amuto lehe waxy namilomuto kum sului
aliakte amuto. Ape na laha kak saxuti
amuto, laha tahunos ti laha paxaiwa soliai
woumuto ti Krais. ¹⁷ Nameniwa, na Haeu
pahan kaha kau kawatan nake ti ailei saun
solian, tenen ien i pamu ewian ti na kaha
kau kawatan nake ti lialui woukaka.

¹⁸ Kum tataxini nake Krais tin i kauen
lalape moloan. I mat ti kau kawatan ti
lialui woukaha ape matean tapai tehue.
I tel sawisawin tapein i mat ukei totone
teka seilon lialun lehe i hasolia wasolakaha
seilon ma Haeu. Kalak teka seilon telei
tupuan, Haeu xahateni aliakte i ape tap tahi
matean.

¹⁹ Ape i kaxi ahuti kakaian hani teteka
Haeu akeni kongini laha atengi taun ti i
hiniti lawe seilon. ²⁰ Ti kuewen wanen laha
tale tehitolaha hani Haeu. I sohot lokon ti
Haeu to mon atetengi na seilon towiahu ti
lialui woulaha. Telok ien Noa tanomi tea
waian lalap nake Haeu hauxa akah huto-
miae xux. Mewenae tepanim tolu seilon
soh hani leili tea waian ape lato kuosel
ti tenen kawatan ien. ²¹ Telok somui kan
ien i kilami baptais ti kako uke aope ie ti
awaiakako ti kawatan ti lialui woukaka na

kako kaxi ahuti tenen saun ien. Saun ti bap-
tais kumahe ti xaxaweniai lolo he tinukako.
Leilon ti kako uke baptais, kako kamei Haeu
ti nuhi hauniakako ti lialui woukako. Imat
ti baptais, kako masin seilon maten tuah
Haeu hamoiba aliakewen kako. I aile ukek
nake i xahateniwen Jises Krais ti matean.

²² Jises Krais i ape tone Haeu, i toto sai
tepaun minan manau. Haeu hana i Masiwi
ti teka engel spirit solian ma lawe spirit
lialun.

4

Woumuto kolawa ka amuto nati Haeu

¹ Krais kau moloan ti i he tehu pon itan
ie. Aile ape kum nonomuha kau kawatan
masin ti i kauen. Na amuto kau kawatan
nake amuto kahikahi Krais, i kola ka amuto
talewen tehitomuto hani saun lialun. ² Ape
moxe ngainumuto he tehu pon itan ie,
amuto kum usi lialui isisiaamuto, amuto usi
namili Haeu. ³ Imat ti amuto sohot kahikahi
Krais, amuto aile hakilawen saun tenen ti
teka laha kum tioi Haeu ailele. Laha is eliel
waliko tenen lialun, sale sikisiki ti laha pate
hienain wanen, lawe laha un taxitaxia ape
laha amuke ailei saun tenen tenen ti pate
lialun. Tin laha lotui waliko tenen kumahe
Haeu, a saun tenen ien i halenge hawane
Haeu.

⁴ Laha nam tataxini ti amuto kum tuai
laha aile tesol waliko lialun ien ape laha
kak halialu amuto. ⁵ Tuahe imuh laha tu
ti sulusulu mateiwai Haeu, tetel i paxai
kolongeni woi lawe seilon, teka moihin ma
teka maten. ⁶ Nake ti tetenen, teka kahikahi
Krais kaxi ahutiwen meng solian ti Haeu
hani teka aope ie laha maten. Kalak laha
mat hanowi lawe seilon, hanawaialaha tap
tahi matean masin hanawai Haeu.

⁷ Tapoi tehu pon itan ie ape i xohi-
wen. Aile ape namilomuto kewa xewan
ma tahiwa lialui isisiaamuto lehe i huali
lotu ti amuto. ⁸ Amuto he wawahenawa
ti atemuwanen. Saun tenen ien pate
tuah. Na amuto waheni seilon liai amuto
pon oxoxialaha ti kawatan ti waliko lialun
laha aile hani amuto. ⁹ Lawe amukewa waxi
auniai seilon hani leili ingamuto.

¹⁰ Haeu axiwen amuto anesoin ti ailei wa-
liko tenen tenen. Aile ape amuto hapuasa
aluiniwa ti hualiae seilon lehe waxy i kola
soliai Haeu. ¹¹ Na amuto hina anesoin ti ailei
kakain solian, hapuasawa ti kaxi ahutiai
kakai Haeu. Na amuto huali teka seilon
liai, hani hatapoa kuimuto ti Haeu axiwen
amuto lehe laha sameni i nake ti waliko

Jises Krais aile haniwen laha. Haeu i tetel tuah wanen ma pate poh lian tehue. Salan wanen.

Teka kahikahi Krais kum salia ti kau i kawatan

¹² Teka soliai akikik ti Krais, kum ong tataxini na kawatan tunahi amuto. I to-hongi xoxoi namilomuto ti Krais. Kum namiloi ukek waliko ien ala i kum tunahi amuto. ¹³ Amuamua nake i aile amuto tuai Krais ti kau i kawatan. Ape tataen ti lawe seilon paxai tioiwa lalape masiwan, amuam ti amuto lap ahe.

¹⁴ Na teka seilon kak halialu amuto nake amuto kahikahi Krais, amuamua nake Spirit ti Haeu kapimuto. I tel pate tuah.

¹⁵ Tuah kumahe nga kakak kawatan tete-nen laha axi amuto na amuto telei seilon, amuto xuxuina ma na amuto tua nihini amuto hani soxiao seilon liai. ¹⁶ Nga kakak kawatan tetenen laha axi amuto nake amuto kahikahi Krais. Na i sohot hani amuto, kum hihienake. Kak kemulik haniwa Haeu ti laha axai amuto kahikahi Krais. ¹⁷ Haeu hutuiwen hinitiai seilon. Imat, i paxai kolongenimu woukako teka seilon tetan. Ape na i aile hani kako teka natun, lalapai kawatan i axi teka laha kum hong usi meng solian tetan. ¹⁸ Masin ti leili pepai Haeu i ukek,

“Na teka seilon sawisawin kau kawatan imat ti Haeu awai tinami laha ti lawe waliko lialun,
pamu lialuan kawatan ti i tunahi teka laha kum soh ti Haeu,
teteke laha weli ailei saun lialun.”
(Prov 11:31)

¹⁹ Aile ape na Haeu pahan amuto kau kawatan, aile tatalewa waliko tenen solian. Hana hatapoa amuto hahitake ngangahat ti Haeu nake puki i tanomi amuto. Na amuto hina namil xoxoan ti soliai ngangahat tetan, amuto kum nam tahane aliake.

5

Nauna hani teka masiwi, teka wawan uluha ma hatesol kahikahi Krais

¹ Nga ape hina kakain hani amuto tesol masiwi ti teka kahikahi Krais. Nga tin masiwi masin amuto ma ti puki pulak nga paxaiwen ti Krais kau moloan. Ape taen i aliama, nga tuai hawane i ti lalape pohen ma soliaian ti lawe seilon paxai tioi imuh. ² Pahak amuto ngahati aluiniwa teka seilon ti Haeu kapimuto. Lawe waheniwa ailei

tenen puasain ien masin ti Haeu pahan amuto ailewa. Kum pupuas tuahe ti ukei kahumuto, puas kolawa ka amuto unaui Haeu wanen. ³ Kum tua hone lulungei teteka Haeu hana hahitake ngangahat ti amuto. Kolawa soliai woumuto lehe waxi lato aile usi. ⁴ Na amuto aile ukek ien, Haeu hani kahumuto waliko tenen pate solian ti tap tahi lialuan, tataen ti Jises Krais tel ngahat tapein aliama.

⁵ Teka wawan uluha, hong usiwa kakai teka masiwi ti amuto. Ape amuto hatesol kahikahi Krais, ti amuto ailele puasain tenen tenen, lawe paxai tioiwa ka seilon liai pate tuah. Ti leili pepai Haeu i ukek, “Haeu lawe i teheni teka seilon laha haxawa aliake laha,
ape lawe i aile kola soliaian hani teka laha paxai tioi
ka seilon liai pate tuah.” (Prov 3:34)

⁶ Aile ape teheniwa amuto hani hahitake ngangahat ti Haeu tel pohen wanen, lehe i haxawa amuto, taun ti puki i kilamiwen.

⁷ Kum namiloi hahakila tenen na waliko. Lioi haniwa Haeu nake i tel ngahat solian ti amuto.

⁸ Kewa namilomuto xewan ma kanipetiwa Satan tel pahoxaiamuto. I masin tok oha lengean na i sasaxax teleiai anan.

⁹ Haxoxoa namilomuto ti Haeu lehe waxi amuto pon pahoiai Satan. Nameniwa, kumahe mewenae amuto, teka akikimuto ti Krais tesol tesol tin laha kau kawatan nake laha seilon ti Haeu.

¹⁰ Tuahe malehe lalape solian ti Haeu. Pahan i hani amuto solian tetenen tap tahi tapoan nake amuto pakata xox kapi Jises Krais. Aile ape muli kau i kawatan, Haeu haewia aliake amuto, hakui amuto ma haxoxo namilomuto lehe waxi amuto soh hamalum hawane ti soliai ngahat tetan. ¹¹ I tel Masiwi tapein pate pohen lian tehue. Salan wanen.

Tililai kakai Pita

¹² Nga tatai teik pas ie hetekie huuhal ti Sailas, tel akikikako ti Krais. I tel unaui Haeu wanen. Kilan tutuen kakain ti i tapai nga hone amuto tuahe nga tua tai kemuk ie ti hakuiamuto. Nga hone hawane amuto, lawe waliko nga tatai sale lalape soliai Haeu se salan wanen. Aile ape tu xox tatalewa tetan kalak na kawatan tunahi amuto.

¹³ Amuam ti teka kahikahi Krais ie haniwa amuto. Lato toto tesol ti kumahe xuxulato wanen. Masin amuto, Haeu kilamiwen lato seilon tetan. Amuam ti Mak tin haniwa

amuto, tetel i masin natuk wanen.¹⁴ Kolawa
amuam hetekie wawahen haniwa tel tel ti
amuto.

Nga kamei Haeu ti hatona hasoliai tia-
muto hatesol, teka seilon ti Krais.

2 Pita

Teik pasi Pita liai hani teka kahikahi Jises Krais

Kakain ti haxewai teik pepa ie

Pita tel aposel tai teik pas ie hani teka kahikahi Krais ti tesol tesol lokon ti i toto tehu taon Rom. I sohot sai 34 ahang muhin ti Jises moih aliawa ape Haeu waxy i hani tesol tonan. Teka kahikahi Krais ien, lato toto xux tesol tesol ti kilan seilon laha hahanau waliko tenen kumahe sawisawin sale Jises Krais. Pita hahongo lato ka kum sohosoh kakaialaha. Teka seilon ien laha putini ka saun lialun se solian. Tin laha kaxi sasawatemi ka Jises Krais kum aliamra. Pita hanamena teka kahikahi Krais waliko tenen salan lehe lato tu xox tatale ti Jises Krais. I kaxi haxewa hani lato ka Haeu hataliamu aliai Jises Krais nake pahan wanen hatesol seilon towiahumua ti lialui woulaha ape laha sohoa ti Jises Krais.

¹ Teik pas ie tataiak nga Saimon Pita, tel aposel ma unaui Jises Krais. Nga tai hani amuto teka hina namil xoxoan ti Jises Krais hanowi amite tesol aposel. Jises Krais tel Haeu ti kako ma awaiakako ti kawatan ti saun lialun, i hanamiloa kako ape kako soh tetan nake i tel sawisawin tapein.

² Nga kamei Haeu haxoxo tatalei namilomuto ti pakata kapita kapin ma Jises tel Masiwi ti kako lehe Haeu kola' hawane lalape soliaian hani amuto ma hatona hasolia tiamuto.

Kolawa ka kako kahikahi Krais wanen

³ Kako papakata kapi Krais, aile ape ti puki pohen i hani kako lawe waliko ti hualikakako lehe totonakako i soli ma kako aile usi saun tetenen Haeu pahan. Lalape axan ma soliaian i itiniwen kako hani kahikahi. ⁴ Nake ti tesol waliko ien, Haeu hani kako waliko pate tuah ti i kakawen ma kako pon salinial lawe waliko lialun ti tehu pon ie tenen i ahuma ti isiai seilon. Ape woukako soli ahe tatale ma kako sohot seilon pate sawisawin hanowi i.

⁵ Amuto soh ti Krais tuahe tin puas elielia ailei lawe waliko solian ma upia halape ahekewa anesoin. ⁶ Tahiwa isiamuto ti ailei saun lialun, kum leng kokosea, kum aile lilioi puasamuto kalak kawatan tunahi

amuto ma kewa amuto unaui Haeu wanen. ⁷ Aile hasolia haniwa tel tel ti amuto ma kolawa saun ti wawahen haniwa lawe seilon. ⁸ Na amuto aile tatale tesol waliko ien, anesamuto ti Jises Krais tel Masiwi ti kako i lap ahe ape puasamuto kau hawane anan. ⁹ Tuaheseilon teka laha tap tesol saun ien, laha masin seilon pulaxa, laha kum paxai tioi waliko tenen solian ma lialun. Laha maluhewen ka Haeu nuhi hauniwen laha ti lialui woulaha.

¹⁰ Teka akikik ti Krais, puas eliel kolawa ka salan Haeu kilamiwen amuto seilon tetan ma amuto kahikahi Krais wanen. Na amuto aile ukek, amuto kum tale uke wanen tehitomuto hani Haeu. ¹¹ Ape Haeu waxy amuke amuto hani tonan, tetesol ti amuto to lian tehue kapi Jises Krais tel Masiwi ti kako ma awaiakako.

Kakain leili pepai Haeu pate tuah ma salan wanen

¹² Salan amuto tioiwen tesol waliko ien ma amuto tu xoxox ti nauna ti Haeu. Tuah pahak nga hanamena kapitini amuto. ¹³ Ti nga moihi tutuen pamu ewian na nga kakane tuhi amuto lehe waxy amuto kum nam maluhe. ¹⁴ Nga tioi ka tai kue ape nga mat nake Jises Krais tel Masiwi ti kako haxewa hanawieng. ¹⁵ Aile ape nga puas eliel hawane hanauamuto lehe waxy lawe amuto nameni kongini kalak na nga matewen.

¹⁶ Ti amite tesol aposel kaxi hahani amuto sale aliai Jises Krais tel Masiwi ti kako hetekie pohen, kumahe amite kakaxi meng ti seilon liai tua aile tanomi. Ti tange pulamite wanen, amite ningahiweng lalape xewaian. ¹⁷ Amite ien ti Haeu tel Tamakako sameni hawane i. I sohot lokon ti Haeu tel Masiwi tapein wanen ukek, "Tetel se Natuk pate nga waheni ma amuke hawane i." (*Mt 17:5; Mk 9:7; Lk 9:35*) ¹⁸ Amite kapi Krais he tetehu maunten ti lotuiai Haeu, ti amite hong tenen kakain ien ahuma ti tone Haeu.

¹⁹ Aile ape kakaiamite sale puase Krais i kola' hawane ka waliko ti teka kuluiakakai Haeu kakawen se pate salan. Amuto nam waxixa kakaialaha nake i huali amuto paxai tioi waliko tenen salan masin ti xewai al i haxewa aweisalumuto. Ape taun ti aliai Jises Krais, i haxewa hawane lawe waliko hani amuto masin ti tehu kohot towisaian i hatapo tilokoan. ²⁰ Pate tuah wanen ti amuto tioi ka waliko ti teka kuluiakakai Haeu taiwen he leili pepaun, kumahe puki kakaialaha. ²¹ Kumahe laha usiusi tuahe

namili seilon. Holi Spirit hanamiloa laha hakoutai kakai Haeu.

2

Teka woinakon hanaui seilon ma kawatan ti laha uke

¹ Ti imat tin hina teka woinakon kuluai kakai Haeu lelokako teka Ju. Seilon tenen ien tin i sihila kapimuto. Laha anesoke hawane sale hanau pulutiamuto waliko tenen i haputa xoxoi namilomuto ti Krais. Laha kum nam waxi masiwai Jises Krais, tel i mat ukei kawatan ti lialui woulaha, aile ape laha uke koseni kahulaha tenen pate lialun wanen. ²Kilan teka kahikahi Krais usiusi lialui woulaha ma kak teheni kakain salan ti Haeu. ³Teka seilon ien laha kaxi hani amuto meng tenen laha tua aile tanomi nake laha pate halepean ukei moniumuto. Ti imat wanen hoi Haeu namiloiwen kahuiai saun lialun ti laha ape salan wanen imuh i axi laha kawatan tenen pate lialun.

⁴Kalak puki teka engel tetan, laha kum salia kauai kawatan ti laha tahi kakaian ma aile saun lialun. Haeu tiehi kongini laha leili tesol pate tilokoan ti kau molon atengi ngain tapeinian ti paxai kolengenai woi lawe seilon. ⁵Teka seilon telok ti Noa, tin laha tai salia kauai kawatan. Laha kum hong waxi kakai Haeu ti Noa kaxi ahuti hani laha ape Haeu hauxa akah hutomiae xux. Mewenaes Noa ma tepanim hua seilon kuosel ti tenen kawatan ien. ⁶Imuh Haeu tin i kahui aliake lialui woi teka seilon ti Sodom ma Gomora. I lui hatapo huohu taon ien. Kawatan ti i tunahai teka seilon ien se kolakol hani seilon waliko ti na i sohot hani teka laha tale tehitolahai hani Haeu ma aile hakila saun lialun. ⁷Tuah Haeu hasalia Lot, tel seilon pate sawisawin. Namili Lot kawat hawane nake teka seilon ien weli xaputiae nauna ti Haeu ma laha aile hakila saun lialun tenen pate hienain. ⁸I toto leili teka seilon ien ma lawe ngain i nininghai lialui woulaha ma hongohong lialui kakaialaha ape hatesol waliko ien i hamolo hawane patun nake i se seilon sawisawin.

⁹Ape amuto tioi ka Haeu awai teka seilon sawisawin ti kawatan ape i axi tatale kawatan hani teka seilon lialun atengi taen i hiniti lawe seilon. ¹⁰Tuah i axi kawatan pamu lialuan hani teka laha usiusi isiai tupualaha ailei saun lialun tenen pate hienain ma laha watakai hawane nenein ti Haeu masin teka woinakon hanaui seilon laha sisihila kapimuto. Laha seilon ti hanasanas

ma laha angiamat ailei lawe waliko lialun. Tin laha kum nomuha kak halialui teka laha toto tone Haeu. ¹¹Tuah teka engel kum sului laha hani Haeu tel Masiwi kalak lato pamu poheian ti laha.

¹²Teka woinakon hanaui seilon laha kak halialu waliko ti tap titioalahai. Laha tap namilolaha masin manihuh i tui usi isiai tupuan ma seilon tua nokoi telei. Haeu tin i aile halialu teka woinakon hanaui seilon masin ti seilon aile hani manihuh. ¹³Haeu axi laha kawatan nake puasalahai i aile halialu seilon liai. Laha amuke saun ti tua to angiang ma unuun ngain hatehu. Lawe laha aile ukek ien ti laha ang akati amuto ape tenen saun ien i halialu paxaiamuto ma teheni axamuto. ¹⁴Namilolaha lawe ti ailei saun lialun ti wawan hehini ma laha kum aile lioi uke waliko tenen lialun. Laha puluti teka namilolaha kumahe xoxoan ti Haeu ma itini laha hani ailei waliko lialun. Laha kuin wanen ti halepelep waxiai tenen na pahalaha. Hoi Haeu namiloiven ka imuh laha kau hawane kawatan ti lialui woulaha. ¹⁵Teka seilon ien selewen ti aweisali Haeu ape laha usiusi aweisali Balam, tel nati Beo, tetel pate halepean ti moni. Sikole i aile saun lialun ti ukean. ¹⁶Tuah Haeu hapuasa tok donki i kikiliwaki ti kahiloloian. Haeu hanamiloa tok donki kakanei Balam tel kuluai kakaian ape tenen ien hakongu i ti aile usiai lialui namilon.

¹⁷Teka woinakon hanaui seilon lato masin kan wal tenen paxepaxen ma masin maun tenen i kum hauxa akah nake aupol kuin paxeni xoini. Aile ape hoi Haeu namiloiven ka totonalato leili lalape tilokoan. ¹⁸Ti lato hahanau seilon, tap solian ti kakaialato. Lato hapuasa kakain ti hanasanas itiniae namili seilon. Lato kakane seilon ka ewi ti aile usiai isiai tupualaha ti ailei waliko na pahalaha. Aweisal tenen ien lato aleheteri aliake teteka laha lilioiwa saun lialun pala aope, tetenen ti teka laha kum tioi Haeu lawe ailele. ¹⁹Lato ukek ka ewi na seilon aile waliko ti na pahalaha nake laha kumahe hahitake tenen na waliko, tuah puki lato hahitake nenein ti lialui isiaialato. Tioi kewak, seilon i sohot unaui waliko tenen i kakapiti namilon. ²⁰Teka seilon laha tioi Jises Krais tel Masiwi ma awaiakako, laha kuosel ti lialui seilon ti tehu pon ie nake Krais kapiti namilolaha. Tuah na laha soh tuai aliake teka ailei saun lialun ma laha hahitake nenein ti lialui isiaialaha, laha ape pamu lialuan ti lokon laha tai

sohot kahikahi Krais. ²¹ Pamu solian ti laha na laha tai tioi aweisali Haeu nake ti laha tioiwen, ape laha tale tehitolaha hani nauna tetan ti teka kahikahi Krais hanauen laha. ²² Woulaha i kola ka salan ti teka seilon kak ukek, "Sinen ani aliake mutuan." Ape tin teik ulea ukek, "Kalak na o kikanomieni tok pou, i halolo aliake tinun." (Prov 26:11)

3

Namiloiwa aliai Jises Krais tel Masiwi

¹ Teka soliai akikik ti Krais, teik pasuk ie usiai teik nga tai hanimu amuto imat. Hahuika hanameniamuto waliko ti teka kahikahi Krais hahanau lehe waxyi i kungati namilomuto ti usiai namil sawisawin.

² Pahak amuto nameni konginiwa waliko ti teka seilon ti Haeu teteka kuluiai kakaian hanauen amuto hetekie nauna ti tel Masiwi ma awaiakako ti tesol aposel kakanewen amuto.

³ Pate tuah wanen ti na amuto tioi ka imat ti aliai Jises Krais hina seilon laha soxeni kako teka kahikahin ma laha usi lialui sisialaha. ⁴ Laha sosoxen ukek, "Ia tel Jises i ukek i aliaama? Paxaiwa, i tap. Lilian ti tehu pon itan ie tanoma, tap tenen sohiawen, lawe waliko tin mamasin."

⁵ Tuah kakaialaha kumahe salan. Laha kum nam waxyi ka ti kuewen wanen Haeu tua kak ape maun aheah tan. Ape Haeu apuhini hatesol kan ape i hapake hepekeun.

⁶ Imuh Haeu hapuasa kan ti hutomi halialui lawe xux. ⁷ Tin ti kakaian, maun aheah ma tehu pon itan ie tua atetengi na ah lui hatapo lalu. I sohot tataen Haeu paxai kolongeni woi lawe seilon ape i halialui hawane teka laha kum nam waxyi.

⁸ Tuah amuto, teka soliai akikik ti Krais, amuto kum mamaluhe ka Haeu tel Masiwi i kum namiloi welui taun hanowi ti kaha seilon. Ti Haeu, ngain tehu masin 1,000 ahang, a 1,000 ahang masin ngain tehu.

⁹ Hina seilon laha ukek ka Haeu tel Masiwi hatalia kueini aliai Jises Krais. Kumahe. Ti tatahan tetan i atengi haweluvelu na lawe seilon towiahua ti lialui woulaha nake i watakai hawane na tuah tel i mat hetekie saun lialun. ¹⁰ Tehu ngain ti Jises Krais aliaama i sohot hahutuia hanowi tel seilon xuxuina. Ngain tehu ien teka seilon hong lalape tangiai ah ti i lui lawe waliko he maun aheah ape maun aheah ma tehu pon itan hetekie lawe waliko i tapo kaluta hawane.

¹¹ Na Haeu hatapo lawe waliko ukek ien, namiloiwa sale woumuto. Kewa amuto seilon sawisawin, ailewa saun tenen Haeu waheni amuto aile. ¹² Na kako aile ukek ien, i haxe koseni tehu ngain Haeu kilamiwen ti aliai Jises Krais, tetehu kako to mon atetengi. Ngain tehu ien, maun aheah i xek ape kekei ah i hamanunu hatapo lawe waliko ien. ¹³ Tuah kako teka kahikahi Krais, kako mon atetengi maun aheah ma xux haun ti Haeu kakawen i hani kako. Ti tesol ien seilon aile mewenae saun solian.

¹⁴ Teka soliai akikik ti Krais, ti haliwei tesol waliko ien sohot, puas elieliba ailei lawe waliko solian lehe waxyi Haeu namiloi ukek amuto seilon pate sawisawin ma tap tel i pon tieniamuto ti tenen na waliko. Kewa wasolamuto Haeu pate solian.

¹⁵ Nameniwa ka Haeu hatalia aliai Jises Krais nake pahan lawe seilon towiahmuu ti saun lialun lehe waxyi i awai laha ti kawatan ti lialui woulaha. Tin tuah masin kakai Pol, tel soliai akikikako ti Krais, i kakanewen amuto hetekie anesoin ti i ahuma ti Haeu. ¹⁶ Waliko tin tetenen ien i kakak leili hatesol pasun ti i tai hani teka kahikahi Krais. Tuah hina kakaian pate ailan ti seilon xeu. Teteka seilon anesoalaha i tae sale puase Haeu ma namilo-laha tetan kumahe pate xoxoan, laha hulo towiahu kakai Pol hetekie kakain liai ti he pepai Haeu. Puki katekatealaha ukei kawatan tenen pate lialun.

Tiliai kakai Pita

¹⁷ Teka soliai akikik ti Krais, amuto tioi-wen ka imuh tesol waliko ien i sohot. Aile ape kanipetiwa teka seilon laha kum usi nauna ti Haeu lehe laha kum neini puluti amuto. Na amuto hongeni laha, i putupa soliai xoxoi namilomuto ti Krais. ¹⁸ Pahak amuto aile tatalewa waliko ti Haeu waheni lehe waxyi pakataiamuto kapi Jises Krais tel Masiwi ma awaiakako i xox ahe ape tin i axi halapa soliaian hani amuto.

Kaha hatesol haxawawa axan ti aope ma lian tehue. Salan wanen.

1 Jon

Teik pasi Jon hani teka kahikahi Jises Krais

Kakain ti haxewai teik pepa ie

Jon tel aposel tai teik pas ie hani teka kahikahi Krais sai 60 ahang muhin ti Jises moih aliawa ape Haeu waxy i hani tesol tonan. Jon kakaxi sale tonain wanen, tetenan ti seilon tunahi na laha usi aweisali Jises Krais. I kakane hakui teka kahikahi Krais ti wahenian seilon liai hanowi ti lato waheni Haeu. Tin i hahongo lato ti kanipetiai teteka laha hahanau meng tenen kumahe salan sale Haeu. Laha kakaxi ka Jises Krais i kumahe tel Nati Haeu. Laha ukek i kum sohot seilon hanowi kaha ma i kum aliam. Jon kokola puputa ti laha ti hualiae teka kahikahi Krais lehe lato tu matuhu ti kakain salan ti Haeu ma ti xoxoi namilolato ti Jises Krais tel Nati Haeu.

Puki i Jises Krais se kakai Haeu

¹Nga tai hani amuto sale Jises Krais, tetel puki i kakai Haeu hani seilon ma tel hani-akaha tonain tuah kapi Haeu. I hoi imat ti lawe waliko Haeu tanomieni. Amite tesol aposel paxaiwen i ma pupuasan he tange pulamite. Amite hongoen kakaian ma sotiwen i he minamite wanen. ²Jises tel haniakaha tonain tuah i sohot seilon hanowi kaha ape Haeu talo i hani tehu pon itan ie. Puki amite ningahiwien i ape amite kaxi ahuti hani amuto ka i to kapi tel Taman Haeu lian tehue ma i hani kaha tonain kapin ti tap tahi tapoan. ³Aile ape waliko ti amite ningahiwien ma hongoen, amite kaxi hani amuto lehe amuto tuai amite ti xoxoi namilomite ti Haeu ma kako pakata xox hetekie. Ape tin ati kako pakata xox hawane kapi tel Tamakako Haeu ma tel Natun Jises Krais. ⁴Nga tai tesol waliko ie lehe ati tiakako tunahi hawane xuhal amuam.

Na nanahiakako solian kako leili xewan ti Haeu

⁵Tenen kakain ie amite hongoen ti Jises Krais ape amite kaxi hani amuto ka Haeu se solian tapein masin xewai alon, tap wanen lialun tetan. ⁶Na kako ukek kako pakata xoxox kapin tuahe kako to aile tatale saun tenen lialun, kako puputawen. Kako masin

leili tilokoan. Kumahe kako aile usiusi kakain salan ti Haeu. ⁷Tuahe na nanahiakako leili xewan hanowi ti Haeu i leili xewan, i hukumini hawane kako ape Jises tel Natun, tel i mat ukei kahi lialui woukako, i nuhi hauni hatapo leilokako.

⁸Na kako ukek kako kum aile wanen saun lialun, kako puluti aliliak e koko ape kum paxai tioi waliko salan ti Haeu. ⁹Na kako kaxi ahuti saun lialun ti koko, Haeu oxoxi koko ti kawatan ti lialui woukako ma i aile hasawi wasolakako kapin nake i aile usi waliko ti i kawaken i aile hani koko ma lawe i aile waliko tenen sawisawin. ¹⁰Na kako ukek kako tap wanen saun lialun, tin kako namiloi ukek Haeu seilon ti puputa. I kola ka koko kum nam waxi kakaian.

2

¹Teka soliai natuk, tesol waliko ie nga tatai lehe amuto kum aile saun lialun. Tuahe na tel i aile saun lialun, tel seilon tukei awakako hani tel Taman Haeu ti awaikako. Tel seilon ien se Jises Krais, tetel sawisawin tapein. ²I tetel i mat ukei kawatan ti lialui woukako. Kumahe mewenea ti koko, hetekie lawe seilon ti tehu pon ie.

³Na kako hong usi nauna tetan, i kola ka koko tioi hawane Haeu. ⁴Na tel i ukek i tioi hawane Haeu tuahe i kum hong usi nauna tetan, i tel seilon ti puputa, i kum paxai tioi waliko salan ti Haeu. ⁵Tuahe teteka laha aile waliko ti Haeu pahari, laha kola hawane ka laha waheni i ma tin laha pakata xox kapin. ⁶Teteka laha ukek laha seilon tetan wanen, laha usi hawanewa woi Jises Krais.

Nauna ti wawahen

⁷⁻⁸Teka soliai akikik ti Krais, tenen nauna ti wawahen nga tai hahani amuto, kumahe kakain haun. Amuto hongoen lokon ti amuto sohot kahikahi Jises Krais. Tuahe Jises haxewa ahekewen sale usi hapoponowi hatapoi nauna tenen ien. Sale pupuasan ma woun hetekie kako teka kahikahiin, i kola ka salan wanen nake kako kumahe leili tilokoan, saun lialun ti koko i tap ahuhua. Ape soliai puasakato ti Krais, i masin xewan ti hani seilon haxewai waliko tenen salan ti Haeu.

⁹Na tel ukek i leili xewai nenein ti Haeu tuahe i watakai seilon liai, tel seilon ien tutuen leili tilokoan. ¹⁰Tel na i waheni seilon liai, i hamalum leili xewai nenein ti Haeu, i tap namil ti kapiti halialuan ailei saun lialun. ¹¹Tuahe tel na i watakai seilon

liai, i masin leili tilokoan. Lialui woun hapulaxa i. I masin seilon tenen i nanahiah leili tilokoan ape i kum paxai uke aweisalun.

¹² Teka soliai natuk, nga tatai ti hanamena iamuto ka

Haeu oxoxiwen amuto ti kawatan ti lialui woumuto.

I aile ukek nake ti pupuase Jises Krais.

¹³ Nga tatai ti nauamuto teka wawan matutu ma salaimat, teteka amuto tioiwen Jises Krais, tel tel i hoi imat ti lawe waliko Haeu tanomi.

Tin nga tatai ti nauamuto teka wawan uluha, teteka amuto tahi waxainiwen nenein ti Satan.

¹⁴ Nga tatai ti nauamuto teka soliai natuk, teteka amuto tioi hawane tel Tamakako Haeu.

Nauna tetak nga haniweng amuto teka wawan matutu ma salaimat, teteka amuto sohot kuewen kahikahi Krais, tel tel i hoi imat ti lawe waliko Haeu tanomi.

Nga nau hehetekie amuto teka wawan uluha, teteka namilomuto xoxoan ti Haeu, teteka lawe amuto usi kakaian ma amuto tahi waxainiwen nenein ti Satan.

Kum usiusi saun tenen Haeu watakai

¹⁵ Kum nanamusini waliko lialun ti tehu pon ie. Kum aile usiusi nanahiah tekaseilon laha pahoxai namili Haeu. Na amuto aile ukek ien, amuto tap wawahen hani tel Tamakako Haeu. ¹⁶ Na seilon aile usi waliko lialun ti tehu pon ie, laha aile waliko tuahe ti hamuamui tupualaha, laha haisi aliake hawane laha lawe waliko ti laha ninginhai ma laha hanasanasake sozialaha ma puasalaha. Saun tenen ien kumahe kaha kema ti tel Tamakako Haeu. ¹⁷ Lawe isiai tupui seilon ma tehu pon ie, i tapo ahauhua. Tuahe teteka laha hong usi namili Haeu laha to lian tehue.

Kanipetiwa teka pupuasalaha pahoxai Jises Krais

¹⁸ Teka soliai natuk, tapoi tehu pon itan ie ape i xohiwen. Amuto hongoen ka tel seilon pupuasan i pahoxai puase Krais i luluainima. Ti salan tetan kilan ti laha tahiawen ape i kola ka tapoi tehu pon itan ie pate i xohiwen. ¹⁹ Teteka seilon ien laha ox salili kako. I kola ka laha kumahe

teka kahikahi Krais wanen ma tin kumahe tuaukako. Na laha tuaukako laha tai ox salili kako.

²⁰ Tuahe amuto kumahe masin laha. Amuto kewen Holi Spirit ti kapitiamuto ape amuto tioi hawanewen kakain salan ti Haeu. ²¹ Aile ape nga tai hani amuto kumahe nake amuto kum tioi kakain salan ti Haeu tuahe nake amuto tioi hawane. Nga tai hani amuto nake amuto tioi ka tap wanen putain i ahuma ti waliko salan. ²² A aita tel seilon ti puputa? Seilon tel na i eliel hawane ka Jises kumahe Krais tel Haeu taloma. Seilon tenen masin ien laha pahoxai puase Krais nake laha tale tehitolaha hani tel Tamakako Haeu ma tel Natun. ²³ Tel na i tale tehiton hani tel Nati Haeu, i kum pakata uke kapi tel Taman. Tuahe tel na i kum kaxi puluhin xoxoi namilon ti Krais, hoi liai i pakatawen kapi tel Taman.

²⁴ Aile ape amuto tu xoxoa ti lawe kakain salan amuto hongoen ti amuto sohot kahikahi Jises Krais. Na amuto aile ukek, tin amuto tu xoxo kapi tel Nati Haeu ma tel Taman. ²⁵ Na masin ien, amuto uke tonain tuah ti tap tahi tapoan masin ti Jises kakkawen i hani amuto.

²⁶ Nga tai hani amuto tesol waliko ien lehe amuto kanipeti teka laha neini hasese seilon ti kakain salan ti Haeu. ²⁷ Tuahe amuto kewen Holi Spirit ti kapitiamuto. I lawe kapimuto, tapai mewenae i hanauamuto nake waliko ti i hahanau mewenae salan, tap wanen puputa leilon. Aile ape tu xoxoa kapi Jises Krais masin ti Holi Spirit kakanewen amuto.

²⁸ Teka soliai natuk, kako pakata xox hawanewa kapi Jises Krais lehe na i aliamaka kum mamata nake tap tenen na waliko lialun i hahieno kako ti puli Haeu.

²⁹ Amuto tioi ka Jises Krais sawisawin tapein. Aile ape na tel seilon woun pate sawisawin, i se nati Haeu.

3

Woi teka nati Haeu

¹ Namiloi paxaiwa lalape wawahen ti Haeu. Ti wawahen tetan i axai kako natun. Ape salan kako se natun. Teka seilon kumahe ti Haeu, laha kum ukek ka kako natun nake laha kum paxai tioi i. ² Teka soliai akikik ti Krais, kako tioi ka aope ie kako nati Haeu tuahe kako kum xeu kako sohot seilon tetenen taun ti Jises Krais aliamaka. Taen aliaian ien kako tioi hawane Jises Krais ape kako sohot hanowi i. ³ Teteka pahalahana wanen sohot hanowi Jises Krais,

laha kanipetiwa laha ti ailei saun lialun nake Jises Krais sawisawin tapein, i tap wanen tenen na lialun.

⁴ Seilon teka laha to ailele saun lialun, laha xaputi nauna ti Haeu nake saun lialun i ahuxai nauna tetan. ⁵ Amuto tioi ka Haeu talo Jises Krais hani tehu pon ie lehe i mat ukei kawatan ti lialui woukako, tuahe puki i, tap wanen tenen na lialun i ailewen. ⁶ Aile ape teka na laha pakata kapita kapin, laha kum wangiti ailei saun lialun. Teka laha aile tatale saun lialun, laha kum paxai tioi Jises Krais ma tap titioalaha tetan.

⁷ Teka soliai akikik ti Krais, kum hahani tel na seilon hanau puluti amuto. Haeu namiloi ukek ka mewenae teteka laha aile saun solian hanowi Jises Krais laha seilon sawisawin. ⁸ Seilon tetel na i to aile tatale saun lialun, tel seilon ien se nati Satan, tetel i aile saun lialun lilian ti i tahiwa Haeu. Tuahe Haeu talo Jises Krais hani tehu pon itan ie ti halialu tamusukei pupuase Satan. ⁹ Teteka na laha nati Haeu, laha kumahe welli ailei saun lialun nake laha aile usiusi namilon. Laha kum pon aile tatalei saun lialun nake laha ukene wen woi Haeu. ¹⁰ Tataen ie ape kako paxai tioi teteka nati Haeu ma teteka nati Satan. Teteka na laha kum aile waliko tenen Haeu pahan ma laha kum kola wawahen hani seilon, laha kumahe nati Haeu.

He wawahenawa

¹¹ Lokon ti uli kako sohotua kahikahi Jises Krais, kako hongoen kakai Haeu sale wawahen. I ukek kako he wawahenawa. ¹² Kako kum hahanowi woi Kein, tetel i usi woi Satan ape i telei tel ukalan Abel. I aile ukek ien nake puki woun pate lialun ma i watakai soliai woi tel ukalan.

¹³ Teka akikik ti Krais, ala kako kum taxatini na seilon watakai kako. ¹⁴ Na kako waheni teka akikikako ti Krais, i kola ka kako tapeini aile usiai saun lialun ma kako ukewen tonain tuah kapi Haeu. Teka laha tap saun ti wawahen, laha masin seilon maten nake laha kum hani Holi Spirit kaptialaha. ¹⁵ Teteka laha watakai seilon liai, Haeu namiloi ukek laha masin teka welli teleiai seilon. A amuto tioi ka seilon tenen ien laha kum uke tonain kapi Haeu ti tap tahi tapoan. ¹⁶ Kako tioiwen wawahen wanen. Ti Jises mat ukei totonakako, i kola hani kako saun wanen ti wawahen. Aile ape kako waheni seilon liai kalak na kako mat ti hualialaha. ¹⁷ Na tel seilon kilan soxi tuahe i kum nam waxi hualiai teka

totonalahalaha pate lialun, kaie i hina wawahen wanen ti Haeu?

¹⁸ Teka soliai natuk, wawahen kumahe i sohotuma mewenae ti kakaiakako. Kako kola hawanewa wawahen wanen ti soliai pupuasakako. ¹⁹⁻²⁰ Na kako aile ukek ien, kako tioi hawane ka salan kako nati Haeu, teteka usiai kakaian. Tenen wawahen ti kako ien i hatona hasolia tiakako ape kako pon kak matut kapi Haeu kalak na namilokako sului aliakae kako. Nameniwa ka anesoi Haeu ti tioiakako i xoini anesoakako nake i tioi hatapo leilokako ma lawe walik.

²¹ Teka soliai akikik ti Krais, na tap waliko lialun i aile namilokako tieni aliakae kako, kako kum mamata Haeu ma kako matut lotuian. ²² Ape i aile hani kako waliko tenen na kako kamei i nake kako hong usi kakaian ma aile waliko tenen pate i waheni.

²³ Nauna ti Haeu ukek, haxoxoa namilomuto ti tel Natun Jises Krais ma he wawahenawa masin ti i honewen amuto. ²⁴ Teteka laha hong usi nauna ti Haeu, laha pakata xox kapin ape i pakata xox kapi laha. Kako tioi ka i papakata kapi kako nake Holi Spirit tetel ti Haeu haniwen kako, i haxoxo tenen namilokako ien.

4

Hong kolongeniwa kakai seilon

¹ Teka soliai akikik ti Krais, kum hong sosohomu seilon na laha ukek Holi Spirit hahanamiloa laha ti kakaialaha. Hong kolongeniuwa kakaialaha nake kilan seilon laha woinakon kuluiai kakai Haeu. ² Kako tioi ka laha hahitake nenein ti Holi Spirit na laha ukek ka Jises Krais i sohot hawane seilon he tehu pon ie. ³ Tuahe tel na i ukek ka Jises Krais i kum sohot seilon hanowi kaha, tetel ien kumahe Holi Spirit neneini i. I usiusi namili tel seilon pahoxaiai puase Jises Krais, tetel amuto hongoen i lua kemak ape i hoi ie.

⁴ Tuahe amuto, teka soliai natuk, amuto seilon ti Haeu. Amuto tahi waxainiwen kakai teka woinakon kuluiai kakai Haeu nake Holi Spirit tel kapitiamuto i pamu masiwian ti Satan tel kapiti halialui seilon ti tehu pon ie. ⁵ Teka woinakon kuluiai kakain salan, laha kum tioi Haeu. Laha hahanau waliko tenen i ahuxai Haeu ape seilon ti laha kum tioi Haeu hong usi kakaialaha. ⁶ Tuahe kako seilon ti Haeu. Teteka laha tioi Haeu laha hong usi kakaiakako. Teteka laha kumahe ti Haeu laha kum hong usi kakaiakako. Tenen ien i kola na laha kema

kakain salan ti Holi Spirit ma na laha kema
kakain puputa ti Satan.

Saun ti wawahen wanen

⁷ Teka soliai akikik ti Krais, kako he wawahen tatalewa nake saun ti wawahen i ahuma ti Haeu. Teteka laha waheni seilon liai laha se nati Haeu ma laha tioi hawane i. ⁸Tuahe teteka laha tap saun ti wawahen, laha kum tioi Haeu nake puki Haeu lawe i waheni hawane seilon.

⁹ Haeu aile kola haniwen kaha wawahen tetan ti i talo telawé Natun hanima tehu pon itan ie. I aile ukek ien lehe kaha pon ukei tonain kapin ti tap tahi tapoan nake ti soliai puase tel Natun Jises Krais. ¹⁰Haeu kolamu wawahen wanen imat ti kako waheni i. I aile ukek ien ti i talo tel Natun mat ukei kawatan ti lialui woi lawe seilon.

¹¹ Teka soliai akikik ti Krais, na lalape wawahen ti Haeu masin ien, kako tin he wawahenawa hanowi ti i waheni kako. ¹² Tap tel ningahiwen Haeu, tuahe na kako he wawahen, Haeu pakata xox kapi kako ape wawahen ti kako i sohot hawane hanowi wawahen tetan.

¹³ Haeu hani kako Holi Spirit, aile ape kako tioi ka Haeu pakata xoxox kapi kako ma kako hani kapin. ¹⁴ Amite tesol apostol paxai hawanewen Jises Krais ma pupuasan ape aope ie amite kakaxi ka Haeu talo i tel Natun awaiakaha ti kawatan ti lialui woukaha. ¹⁵ Tel na i Paxai tioi ma kaxi ka Jises se Nati Haeu, i pakata xox kapi Haeu ma Haeu pakata xox kapin. ¹⁶ Kako tioi ma soh hawane ka Haeu waheni kako.

Haeu lawe i waheni hawane seilon. Tel na lawe i aile kola saun ti wawahen, i pakata xox kapi Haeu ma Haeu hani kapin. ¹⁷ Na kako waheni kapitini Haeu ma seilon, kako kum mamata tehu ngaini ti Haeu paxai klongeni woi seilon pake woukako hanowigen woi Jises Krais ti kako he tehu pon ie.

¹⁸ Tel na i hina saun ti wawahen wanen, i kum mamata nake wawahen wanen i xaxaweni mamatauna. Na kako mamata ka Haeu axi kako kawatan, i kola ka kako tap wawahen wanen ti Haeu. ¹⁹ Kako pon waheniai Haeu ma seilon nake Haeu waheni nonomo kako.

²⁰ Na tel seilon ukek i waheni Haeu tuahe i watakai teka akikin ti Krais, i seilon tenen puputa. Tel na tap wawahen hani seilon ti pulan ningahi, pamu i kum pon waheniai Haeu tetel ti i kum ningahi. ²¹ Puki Haeu nauen kako ka tin waheniwa seilon liai, kumahe mewenae i.

Jises salan wanen Nati Haeu

¹ Teteka laha soh ka Jises i tetel Krais ti Haeu taloma, laha se nati Haeu. Na kaha waheni tel na seilon, tin kaha waheni hetekie natun. ²Tin masin na tel seilon waheni Haeu ma hong usi nauna tetan, kako tioi ka tin i waheni teka natun. ³ Salan wanen kako waheni hawane Haeu na kako aile usi waliko ti pahan kako usiwa. Pake kumahe pate ailan ti usiwa nauna tetan. ⁴ Lawe nati Haeu laha pon xoiniai waliko lialun tenen tenen ti tehu pon ie nake namilolaha xoxoan ti Jises Krais. ⁵ Tap tel seilon i pon xoiniai waliko lialun ti tehu pon ie, mewenae tetel na i soh hawane ka Jises se tel Nati Haeu.

⁶ Tetel Jises ien, Haeu haxewa haniwen kako ka i tel Natun wanen, lokon ti Jon baptaisi i he kan ma ti matean. I kola ka i tel Nati Haeu kumahe mewenae ti Jon baptaisi i, tuahe hetekie ti i mat ukei kawatan ti lialui woukaha. Ape Holi Spirit nexi ka salan wanen nake lawe i aile waliko tenen mewenae salan. ⁷ Aile ape tolunen waliko i kola ka Jises se tel Nati Haeu. ⁸ Holi Spirit, baptaisi ti Jises ma matean, lato hatesol kola ka Jises se Nati Haeu. ⁹ Na seilon kaxi hani kaha waliko tenen kaha tioi ka salan, kaha soh kakaialaha. Aile ape pamu kaha sohoa Haeu. Puki i haxewa haniwen kaha tel Natun. ¹⁰ Tel na i soh ka Jises se tel Nati Haeu, i tioi hawane ka waliko ien salan. Tel na i kum soh waliko ien, tin i ukek Haeu seilon tenen puputa nake i kapaxe waliko ti Haeu kaxiwen sale tel Natun Jises.

¹¹ Waliko ti Haeu haxewa haniwen kako sale tel Natun, i pate tuah wanen. Haeu hani kako tonain kapin ti tap tahi tapoan nake ti puase tel Natun Jises. ¹² Aile ape tel na i pakata xox kapi tel Natun, i uke tonain kapi Haeu ti tap tahi tapoan. Tuahe tel na i kum pakata kapi tel Natun, i kum uke tonain tenen ien kapi Haeu.

Tilai kakai Jon

¹³ Nga tai tesol waliko ien hani teteka amuto soh hawane ti Jises tel Nati Haeu lehe amuto tioi ka amuto ukewen tonain kapi Haeu ti tap tahi tapoan. ¹⁴ Aile ape kako pon ti lotu matut hani Haeu. Ape i aile hani kako waliko tenen ti kako kakamei i, na kamekame ti kako i poponowi ti namilon. ¹⁵ Kako tioi ka Haeu hong kamekame ti kako. Aile ape tin kako tioi i hani kako waliko tenen na kako kamea.

¹⁶ Na tel kahikahi Krais ningahi tel seilon aile saun lialun, i lotu kameiwa Haeu

hualian lehe Haeu hani i tonain kapin ti tap tahi tapoan. Tuahe kumahe nga ukek lotu hualiwa teka laha aile saun lialun tenen i aile laha sohot hanowi seilon maten, teteka ti Holi Spirit kum kapiti laha. Saun lialun tenen ien i selai laha ti Haeu.¹⁷ Lawe waliko seilon aile ti i pahoxai Haeu se saun lialun. Tuahe kumahe lawe saun lialun i aile laha sohot hanowi seilon maten, teteka ti Holi Spirit kum kapiti laha ape laha selaia ti Haeu.

¹⁸ Kako tioi ka teka nati Haeu laha kum aile tatale saun lialun nake Jises tel Natun i awai laha lehe Satan kum kapiti halialu laha. ¹⁹ Kako tioi ka kako se nati Haeu a teka seilon laha kumahe tetan, laha se hahitake nenein ti Satan. ²⁰ Ape tin kako tioi ka tel Nati Haeu i lua hanima tehu pon itan ie ape i kaxi haxewa hani kako lehe kako nam tioi tel Haeu wanen. Ape ape ie kako pakatawen kapi tel Haeu wanen nake kako papakata kapi Jises Krais tel Natun. I se Haeu wanen ma tetel haniai tonain tuah ti tap tahi tapoan.

²¹ Teka soliai natuk, hana hatapoa namilomuto haniwa Haeu. Kum hahana waliko liai pamu tuah tetan.

2 Jon

Teik pasi Jon liai hani teka kahikahi Jises Krais Kakain ti haxewai teik pepa ie

Jon tel aposel tai teik pas ie hani teka kahikahi Krais sai 60 ahang muhin ti Jises moih aliawa ape Haeu waxy i hani tesol tonan. Jon ukek i tai teik pas ie hani tel hehin pate tuah ma tesol natun. Lato tu kikilami teka kahikahi Krais. I kakane hakui lato lehe lato tu xox ti kakain salan ma hong usi nauna ti Haeu. I hahongo lato ti kanipetiai teka laha hakalala seilon ti usiae aweisali Haeu. Tin i nanau lato ti waheniai Haeu ma seilon.

*Jon kak kolihini teka kahikahi Krais hani tel
hehin pate tuah ma teka natun*

¹ Teik pas ie tataiak nga Jon, tel kahikahi Krais pamu salaimat ti amuto. Nga tai hani o tel hehin pate tuah Haeu kilamiwen tetan ma teka natum. Nga ma teka laha tioi kakai Haeu, amite waheni hawane amuto. ² Amite waheni amuto nake ati kako akeni konginiwen kakain salan ti Haeu ape i hamalumuen kapi kako.

³ Nga kamei Haeu tel Tamakako ma Jises Krais tel Natun lehe lalu hatona hasolia tiakako ma kola lalape soliaialalu hetekie tatahan hanima kako, teteka kako he wawahen ma aile usiusi kakain salan ti lalu.

Tu xoxoa ti kakain salan ti Krais

⁴ Nga amuam hawane ti nga upia tunahi ka teka natum aile usiusi kakain salan masin ti tel Tamakako Haeu nauen kako.

⁵ Tel soliai hehin tuah, nga hanamena o ka kako he wawahenawa. Tenen nauna ti wawahen kumahe haun, Haeu haniwen kako ti uli kako sohotua kahikahi Krais.

⁶ Kako salan hina saun ti wawahen na kako hong usi nauna ti Haeu. Puki i honewen kako waheniae seilon lokon ti kako sohotua kahikahi Krais.

⁷ Nga kak ukek ien nake ape kilan teka woinakon hanaui seilon kakai Haeu. Laha kum paxai tioi ka Jises Krais i sohot hawanewen seilon hanowi kaha ti i he tehu pon ie. Laha pupuluti seilon ma pahoxai puase Jises Krais. ⁸ Kanipeti hawanewa lehe amuto uke kahi soliai pupuasamuto. Puas elieliai wa ti Haeu lehe i kahui hapoponowi

amuto. ⁹ Tel na i kum tu xox ti waliko Jises Krais hanauen ma i hasea ma na hatae waliko ti puki namilon, i kum pakata wanen kapi Haeu. Tel na i puas usi aluin kakain salan ti Krais, i pakata xox kapi lalu hauhua, Haeu tel Tamakako ma tel Natun Jises.

¹⁰ Na tel seilon hanau amuto waliko tenen kumahe salan ti Krais, kum waxi amumuke i hani leili ingamuto. Tin kum hahani i amuam ti Haeu. ¹¹ Tel na i amuke seilon tenen ien, i tel tuaun ti lialui pupuasan.

Tiliai kakai Jon

¹² Kilan kakain tutuen ti kakaneamuto tuahe nga kum tai he teik pasuk ie. Pakak wanen nga lua hani kapimuto pala aope lehe nga kakane amuto ti awak wanen. Ape tiakako hatesol amuam hawane.

¹³ Amuam ti amite teka akitimuto ti Krais Haeu kilamiwen tetan haniva amuto hatesol.

3 Jon

Teik pasi Jon liai ulea Kakain ti haxewai teik pepa ie

Jon tel aposel tai teik pas ie hani Gaius tel kahikahi Krais sai 60 ahang muhin ti Jises moih aliawa ape Haeu waxi i hani tesol tonan. Jon kak sasameni Gaius nake lawe i waxi auni teka unaui Haeu. I kakane hakui Gaius ti aka haxoi namilon ti Jises Krais. I kakaxi sale huhua seilon, tel unaui Krais wanen axan Demetrius ma Diotrepes tetel i kum hong usi nauna ti Haeu ape i ailele waliko lialun. Jon pahan Gaius puas usiwa waliko tenen solian.

¹ Nga Jon, tel kahikahi Krais pamu salaimat tetam, nga tai teik pas ie hani o Gaius, tel soliai lohuk nga wahleni hawane.

²Tel soliai akikik ti Krais, nga kamei Haeu aile hasoliai totonam. Nga tioi ka wasolam kapin pate solian ape tin nga kamei i hasolia kapitiniwa tupuam. ³Nga amuan hawane ti tesol kahikahi Krais lua hanima kapik ape kaxi hani nga ka tutuham xooaan ti kakai Haeu. Nga soh ka salan. ⁴Waliko liai kum hamuamua nga hanowi lalape amuan tetak ti nga amuke teka natuk ti Krais nake lato aile usiusi kakain salan ti Haeu.

Hualiwa teka ailei puase Haeu

⁵Tel soliai akikik ti Krais, solian wanen pupuasam ti o huali auniai teka kahikahi Krais kalak teka ti pate o kum tioi. I kola ka o tel unaui Haeu wanen. ⁶Teka ti lato kaxi haniwen amite teka kahikahi Krais ie sale wawahen tetam. Pate solian wanen na o huali tatale lato. Axiwa lato tenen na lato tae ti nanahialato. O kewa ongawi lehe i hamuamua Haeu. ⁷Teka seilon ien lua hani tesol ti ailei puase Jises tel Masiwi ma lato kum uke huhual ti teka laha kum soh ti Haeu. ⁸Aile ape kako auniai lato. Na kako aile ukek ien i kola ka kako tuaulato ti ailei puase Haeu ape seilon liai tioi kakain salan tetan.

⁹ Nga taiwen teik pas liai hani teka kahikahi Krais kapim sale auniai seilon tuahe tel seilon axan Diotrepes i kum nam waxi nauna tetak. Pahan seilon hong usiwa mewenae i. ¹⁰Na nga tahia haniwa kapim, nga kaxi ahuti hani teka kahikahi Krais waliko ti Diotrepes ailele. I misahi halialu nga

hani seilon liai. Tuahe kumahe mewenae tenen ien. I kum waxi auni teka kahikahi Krais lawe laha lua hani tesol ape tin i halini ti hualialaha. Na teka tahi kakaian ape huali teka seilon ien, i xaxaweni lato ti leili teka kahikahi Krais.

¹¹ Tel soliai akikik ti Krais, kum ukekene saun lialun, ukenewa saun solian. Tel i welli ailei saun lialun i kum tioi wanen Haeu a tel na i aile tatale saun solian i kola ka i nati Haeu. ¹²Masin Demetrius, tetel teka kahikahi Krais kak sasameni nake i aile usiusi kakain salan ti Haeu. Nga tin nga ukek i seilon sawisawin ape o tioi lawe nga kakaxi kakain salan.

Tilai kakai Jon

¹³Kilan kakain tutuen ti kakaneam tuahe nga kum tai he teik pasuk ie. ¹⁴Pahak wanen nga lua hani kapim pala aope lehe kalu he kakak ti awakalu wanen.

¹⁵ Nga kamei Haeu hatona hasoliai tiam. Amuam ti teka akikim ti Krais ie haniwa o. Ape tetak haniwa tel tel teka akikikalui ti Krais ien.

Jud

Nauna ti Jud hani teka kahikahi Jises Krais

Kakain ti haxewai teik pepa ie

Jud tel aposel tai teik pas ie hani teka kahikahi Krais sai 50 ahang muhin ti Jises moih aliawa ape Haeu waxy i hani tesol tonan. Jud i tel ti ukale Jises Krais komuh. I hahongko teka kahikahi Jises Krais ti kaniptetiai teteka laha hahanau meng tenen kumahe salan ti kum pahowi hani waliko ti Jises ma tesol aposel hahanau. I kakane lato ka lotu tatalewa, pakata kapitawa kapi Jises Krais, hualiwia seilon liai ma watakaiwa ailei saun lialun lehe lato he sekusek ma tu xox ti kakain salan ti Haeu.

¹ Teik pas ie nga Jud tel unaui Jises Krais ma ukale Jeims, nga tai hani amuto hatesol kahikahi Krais. Nameniwa ka Haeu tel Tamakako waheni hawane amuto ma amuto hahitake ngangahat ti Jises Krais.

² Nga kamei Haeu aile kolai lalape wawanen ma tatahan tetan hani amuto ma tin hatona hasolia hawanei tiamuto.

Teka woinakon hanau seilon

³ Teka soliae akikik ti Krais, pahak wanen nga tai hani amuto sale tenen tonain haun Haeu haniwen kako ti i awai kako kauai kawatan ti lialui woukako. Tuahem namilok pamu xooxan ti tai hukuiamuto lehe amuto aka kongini ma sawateni kakain salan ti Haeu ti kako soh hawanewen. Tenen kakain ien i hani kako teka tetan wanen, teteka kako hani hahatapo i tupuakako. Kakain salan ti Haeu seilon kum sosohi. ⁴ Nga kak ukek nake hina seilon kumahe ti Haeu laha sihilawen kapimuto ape laha hahanau ka ti lalape soliae Haeu, i kum paxai waxy na koko aile saun tenen pate lialun. Tuahem teteka ien, hoi Haeu namiloi kueiniwen i axi laha kawatan nake laha tale tehitolahana hani Jises Krais, tel telawé Masiwi ma neiniakako.

⁵ Nga hanamena aliake amuto, kalak amuto tioi waliko ie. Salan ka Haeu huali teka Ju ti i waxy aliake laha ti Igip, tuahem imuh i halilu tamusuke teteka xoxoi namilolaha tetan i put. ⁶ Nameniwa teteka engel laha helein i poh ti Haeu haniwen laha ape laha lioi tonalahana kapiñ lian tehue. Aile ape Haeu hamalumini laha xinotan

leili tilokoan atengi ngain tetehu ti i hiniti lawe seilon. ⁷ Tin nameniwa teka seilon ti Sodom ma Gomora ma teka seilon leili taon ti kakalini lalu. Laha aile hakila saun lialun ti wawan hehin ma saun ti sikisiki tenen pate hienain. Haeu lui hatapo tesol taon ien. I kola ka seilon tenen weli ailei saun lialun, laha kau kawatan leili ah ti tap tahi pehoan.

⁸ Tin masin teka woinakon hanau kakain ti Haeu, laha namiloi tanomi ka laha masiwi, laha aile kilan saun lialun ti sikisiki, laha kum nam waxy nenein ti Haeu ma laha soxen pohe teka engel, spirit solian tetan. ⁹ Tuahem Maikel, tel engel pate tuah ti Haeu, i kum kak halilu Satan ti Satan pahan i waxy tupui Moses. I tua ukek, "Puki Haeu tel Masiwi tumeam." ¹⁰ Tuahem teteka woinakon hanau seilon, laha kak saxuti lawe waliko tenen laha kum xeu. Masin manihuh, tap namilolaha ma laha aile walikoh tenen i halilu aliake laha. ¹¹ Haeu axi hawane laha kawatan. Laha masin Kein tetel i telei tel ukalan. Masin tel masiwi Balam, laha aile tenen tenen hani seilon ti ukei moni. Tin masin tel seilon axan Korah, laha tale tehitolahana hani Haeu ape laha mat hetekie kawatan ti lialui woulaha.

¹² Teteka woinakon hanau seilon ien, masin axatan ti he puxux, ti lialui woulaha i halilua amuto leili tehu angiai na laha ang kapimuto ti nameniai wawahen ti Jises tel Masiwi. Tap wanen hienai alaha. Laha nam waxy mewenae laha ma laha kum pon wanen ngahatiae seilon liai. Laha masin maun aupol tua paxeni ahuahu a tap akahun. Laha masin pata tenen i kum hua, kalak taun ti huai pata. Laha tin masin pata tenen wahan sohutan ape i mat tamus. ¹³ Masin laman lalap ti i atihinima masiab tenen lialun, laha sawateni saun tenen ti hienain. Laha masin kohot tenen i nahih sel ti tone nanahian. Haeu apeseni totonalaha leili lalape tilokoan ti kauai kawatan ti lialui woulaha.

¹⁴ Enok tel ti kahi Adam, i tepanim tel ti muhi Adam, i kak peleawen imat sale teka seilon ien. I kakaxi sale aliai Jises Krais ukek, "Hongoa, i aliamma hetekie teka lawalawai engel, spirit solian ti Haeu. ¹⁵ I paxai kolongeni woi lawe seilon. I sului teka seilon laha kum nam waxy i, teteka laha aile hakila saun lialun ma kak saxuti i."

¹⁶ Teka seilon ien weli hakumekum ma titingok. Laha aile usi isiai pahalahi ailei saun lialun. Laha kak hanasanas ma laha

aile kakain paon lehe seilon lawe hongeni laha.

Tu xoxoa ti usiai kakai Haeu

¹⁷ Tuahé amuto teka soliai akikik ti Krais, nameniwa waliko ti tesol aposel ti Jises Krais tel Masiwi ti kako kak peleawen.

¹⁸ Lato kakane amuto ka imat ti tapoi tehu pon ie, hina seilon laha soxeni Haeu ma teka seilon tetan ma laha waheni usiat isian ti laha ailei saun lialun. ¹⁹ Laha seilon ti hatanoi wasol leilomuto. Laha tua usiusi namili seilon, laha kum hani Holi Spirit ti kapititalaha.

²⁰ Tuahé amuto teka soliai akikik ti Krais, he huhualawa haxoxoi namilomuto ti Haeu tel tuah tapein ma lawe haniwa Holi Spirit neiniae lotu ti amuto. ²¹ Nanahiamuto kolawa ka amuto soh hawane Haeu waheni amuto. Haxoxoa namilomuto ti atengiai Jises Krais tel Masiwi ti kako lehe i hani amuto tonain kapi Haeu ti tap tahi tapoan. I aile ukek ien ti lalape tatahan tetan.

²² Kolawa wawahen haniwa teka namilo-laha kumahe xooaan ti Haeu. ²³ Huali elielawa teka seilon laha kane ah ti tap tahi tapoan nake ti lialui woulaha. Aile hasoliawa laha tuahe kanipetiwa waliko ti laha ailele. Watakai hawanewa saun lialun hanowi ti amuto watakai waliko tenen ko-han.

Kaha sameniwa Haeu

²⁴ Haeu tetel i pon awaiamoto ti leili kawatan ma totohong lehe namilomuto tetan i kum put. I aile amuto sohot seilon sawisawin lehe amuto tapai ti soh haniai lalape xewaian hetekie amuam ape tap tel i pon tieniamuto ti tenen na waliko. ²⁵ I telawe Haeu awaiakaha seilon. I talo Jises Krais awaiakaha ti kaui kawatan ti lialui woukaha. Kaha haxawawa axe Haeu ma sameniwa soliaian. I tetel lalape pohen ma masiwan, liai lilian ti imat hanima aope ma lian tehue. Salan wanen.

Hahatakei Haeu

Waliko tuah ti Haeu kola
hatakei hani Jon tel aposel
Kakain ti haxewai meng ti
he teik pepa ie

Jon tel aposel tai teik pepa ie sai ahang 65 muhin ti Jises moih aliawa ape Haeu waxi i hani tesol tonan. Lokon ien laha to aile hahalialu teka kahikahi Krais nake ti xoxoi namilolato ti Jises Krais tel Masiwi ti lato. Teka ti lato, wawahen ti lato wawakulewa ape kumahe lato usiusi saun tenen ti Jises hahanau. Jon to hahakui lato ma pahan lato hani hatapo Haeu tupualato. Jon kakaxi waliko tenen hahataxin pate tuah ma pate lapal ti Haeu hatakei hani i. I kola ka kilan waliko lialun po sohot he tehu pon ie ma puase Satan i to lap aheahelle. Tuahe Haeu hapuasa Jises Krais ti xoini hatapoi hatesol teka laha to papahoxai i ma tin i kahui hasolia teteka laha hong soh tetan. Ape laha to kapin lian tehue. Kalak pate kuwen wanen ti Jon tai teik pepa ie, tin i hanau hetekie kaha teka ti aope waliko ti Haeu namilowen i sohot hani seilon. Kako teka seilon ti Haeu lawe pakata kapitawa kapi Jises Krais ma tu xoxoa kalak na kawatan tener tenen tunahi kako. Kako kum aka lilioi wanen xoxoi namilokako tetan. Pake puki Haeu huhuali kako ape tap tahi maluhei teteka laha hana hatapo namilolaha hani i. Kako lawe nameni hawanewa ka Jises Krais se tel Masiwi pate pohen, tetel i xoini hatapo lawe waliko lialun.

Hutuan

¹ Haeu hatakei hani Jises Krais waliko ti he teik pepa ie lehe i kola hani teka laha soh tetan waliko ti lehe i sohot. Aile ape i talo tel engelaun kola haniak nga Jon, tel unauan. ² Ape nga kakaxi hatesol waliko ti nga ningahiwен. Tesol waliko ien salan kakai Haeu kola haniakako sale Jises Krais.

³ Haeu aile hasolia hani teka laha ridai ma hong auni tesol kakain i ahuma tetan ti nga tatai ie nake taun ti sohotui tesol waliko ie ape i xohiwen.

Amuam ti Jon haniwa teka kahikahi Jises ti tepanim huohu taon

⁴ Nga tai hahani teka kahikahi Jises Krais laha leili tepanim huohu taon ti texux xux Asia.

Nga kamei Haeu, Holi Spirit ma Jises Krais kola haniamuto lalape soliaialato ma hatona hasoliai tiamuto. Haeu hoi liai ti imat, aope ma tin i luluainima tutuen ma Holi Spirit liai lawe kapin, tetel neiniae lawe waliko. ⁵ Jises Krais i tetel Haeu hamolihum imat. Waliko ti i kakak sale Haeu mewenae salan ma i tin pamu masiwan ti lawe masiwi ti tehu pon ie.

Jises Krais waheni hawane kaha ape i mat ti awaiakaha ti kawafan ti lialui woukaha. ⁶ I aile ape kako sohot seilon ti hahitake nenein tetan, teteka ti lawe kako aile waliko ti Haeu tel Taman kilami haniwi kako. Aweisalukako hani Haeu mewenae hean. Kako haxawawa axe Jises Krais lian tehue, tetel pohen hetekie soliaian pate lalap. Salan wanen.

⁷ Hongoal! I luama he maun

ape hatesol seilon ningahi i
hetekie tataen teka teleian.

Tataen ien seilon ti lawe xux tang hawane nake ti lialui woulaha.
Salan wanen.

⁸ Haeu tel Masiwi ukek, “Nga se Alfa ma Omega, tetel ti hutuiai ma tiliai lawe waliko. Nga hoi liai ti imat, aope ma tin nga luluainima tutuen. Nga tel poh tapein.”

Holi Spirit hanamiloa Jon ti ningahiai Jises Krais

⁹ Nga Jon tel akikimuto ti Krais, nga tel tuaumuto ti ailei puase Haeu hahitake nenein tetan. Tin masin amuto, nga kau lungi tatale kawatan nake nga kahikahi Jises Krais. Laha hakau xaxaweni nga hani texux xux kokol axan Patmos nake nga kaxi ahuti kakai Haeu ma lawe waliko tenen salan ti puase Jises. ¹⁰ Tehu ngain ti kako teka kahikahi Krais nameni xahatai Jises, Holi Spirit hanamiloa nga ape nga hong lalape kinax tenen masin tangai suhusuh i wixima sai tehitok. ¹¹ I ukek, “Waliko ti ape o ningahi, tai konginiwa ape hakau haniwa teka kahikahi Krais leili tepanim huohu taon ie: Epesus, Simirna, Pergamum, Tiatira, Sadis, Piladelpia ma Lao-disia.”

¹² Nga towiahu paxai ape nga ningahi tepanim huohu tutuhi lul ani gol.

¹³ Wasolalato tel seilon i pupuxui tehu puxux weluwelun, teik tah gol he patanawan. Tanoman masin ka i tel Nati Seilon. ¹⁴ Patun ma ukun paxaxuan ole olawik ma poke mau. A pulan i kamakam hanowi xekei ah. ¹⁵ Titi aen talepalep

hanowi semen tenen laha lui hauniwen. Kinaxon masin tonui tainiai mau lalap.¹⁶ I akekeni tepanim huohu kohot he tepaun minan manau ma tea ngol hahupaun angian sohotuma he awan. A kawan i kamakam hanowi alon ti lalape ngain.

¹⁷ Ti nga paxaiwa i, nga haputa lioi nga hani he titi aen masin tel seilon maten. Tuahé i hana tepanua minan manau patul tetak ape i ukek, "Kum maamata. Nga tetel ti hutuiai ma tiliai lawe waliko."¹⁸ Nga tetel lawe moihin. Nga matewen tuahé nga ape moihin lian tehue. Nga tel masiwi ti akeniai matemate ma ti teka laha matewen.

¹⁹ "Aile ape tai konginiwa waliko ti o paxai, waliko ti i sosohot aope ma i po sohot imuh."²⁰ Tesol tepanim huohu tutuhi lul ani gol o ningahiven, i kikilami teka kahikahi Krais leili tepanim huohu taon ape tesol tepanim huohu kohot he tepanua minak manau i kikilami tesol engel lato ngangahati teka kahikahi Krais ien."

2

Kakain hani teka kahikahi Krais ti Epesus

¹ Ape imuh i kakane nga ukek, "Tai haniwa tel engel ngahatiai teka kahikahik ti Epesus kewak. Ie se kakai tetel i akekeni tepanim huohu kohot he minan manau ma i tau nanahih wasole tesol tepanim huohu tutuhi lul ani gol.

² "Nga tioi waliko ti amuto ailele. Nga paxai tioi lalape puasamuto ti amuto to aile kakapitini kalak kawatan tenen tenen tutuhami amuto. Nga tioi amuto kum tua paxai lioi saun lialun ti seilon ma amuto tohongi paxai teka laha ukek laha aposel ti Krais ape amuto upia tunahiven ka laha tuahé woinakon."³ Saka amuto kau lungi tatale kawatan tenen tenen ti seilon hani amuto nake amuto kahikahik. Saka amuto kum aka lioi puasamuto.

⁴ "Tuahé hina waliko nga kum amuke wasolamuto. Wawahen ti amuto hani nga kumahe xoxoaiyan ti imat. ⁵ Namiloai kapitiniwa xoxoi wawahen ti amuto ti ape i wakulewen. Sohiwa woumuto ape aile aliakewa waliko ti amuto ailele imat. Na tap, nga luama xaxawenianai tehu tutuhi lul ape amuto silahota tautamus, amuto kum hukuma uke hanowi teka kahikahik. Nga kum aile ukek ien mewennea na amuto towiahu. ⁶ Tuahé hina waliko ti nga waheni leilomuto. Amuto

watakai hawane lialui puase teka Nikolaitan hanowi ti nga watakai.

⁷ "Na amuto hina taxing ti hongoi kakain, amuto hong matainiwa waliko ti Holi Spirit kaakane hatesol kahikahik. Tel na i waxaini saliniai totohong ma lawe waliko lialun, nga hani i aniai huai pata ti i xexex he kini Haeu ti tesol soliai tonan. Teteka laha ani huai pata ien, laha to kapi Haeu lian tehue."

Kakain hani teka kahikahi Krais ti Simirna

⁸ Ape imuh i kakane nga ukek, "Tai haniwa tel engel ngahatiai teka kahikahik ti Simirna kewak. Ie se kakai tetel ti hutuiai ma tiliai lawe waliko, tetel i mat ape i moih aliawen.

⁹ "Nga tioi kawatan tenen tenen ti laha hahani amuto ma tin ti amuto tap soxi. Tuahé amuto xuhai waliko ti Haeu. Nga tioi hina seilon laha kaxi sawateni kakain puputa sale puasamuto. Tin laha ukek laha se Ju teka seilon ti Haeu tuahé salan tetan laha seilon ti Satan. ¹⁰ Kum maamata tesol kawatan lehe ape i tunahí amuto. Hongoa! Satan hanamiloa teka seilon ti kalabusiamuto ti tohonggai xoxoi namilomuto tetak. Amuto kau kawatan ien ti teik taun kukunun. Amuto tu xox tatalewa tetak kalak na laha telei amuto. Ape nga hani kahumuto tonain tuah kapi Haeu ti tap tahi tapaoan.

¹¹ "Na amuto hina taxing ti hongoi kakain, amuto hong matainiwa waliko ti Holi Spirit kaakane teka kahikahik. Tel na i waxaini saliniai totohong ma lawe waliko lialun, i kum uke tehu kawatan imuh ti tap tahi tapaoan."

Kakain hani teka kahikahi Krais ti Pergamum

¹² Imuh i kakane nga ukek, "Tai haniwa tel engel ngahatiai teka kahikahik ti Pergamum kewak. Ie se kakai tetel tea ngolun hahupaun angian.

¹³ "Nga tioi amuto toto leili taun ti Satan neini hahawane kilan seilon. Tuahé saka amuto hamalum tatale kahikahik wanen ma amuto tai aka lioi xoxoi namilomuto tetak. Kalak ti lokon laha telei tel unauk patle solian axan Antipas leili tehu taon ti amuto, amuto tu xoxox tutuen tetak.

¹⁴ "Tuahé hina palaiai waliko nga kum amuke leilomuto. Teka ti amuto usiusi waliko ti Balam hahanau. I itini namili

tel masiwi Balak ti aleheteniai teka Israel ti aniai an tenen laha ailewen pali hani haeu tenen kumahe salan ma ailei saun lialun ti wawan hehin.¹⁵ Tin masin teka ti amuto usiusi waliko lialun ti teka Niko-laitan hahanau.¹⁶ Aile ape towiahua ti tesol waliko ien. Na tap, kum kue nga luama ti hil pahoxaiamuto tea ngol he awak i se kakai Haeu pate tuah.

¹⁷ “Na amuto hina taxing ti hongoi kakain, amuto hong matainiwa waliko ti Holi Spirit kaokane teka kahikahik. Tel na i waxaini saliniai totohong ma lawe waliko lialun, nga axi i an tuah ti Haeu alolomeni hani kahun. Tin nga hani i tehu hat papaxaxun hina tenen ax haun ti Haeu taiwen. Tap tel seilon tioi tenen ax ien, mewenae tetel ukei tehu hat.”

Kakain hani teka kahikahi Krais ti Tiatira

¹⁸ Imuh i kakane nga ukek, “Tai haniwa tel engel ngahatiai teka kahikahik ti Tiatira kewak. Ie se kakai tel Nati Haeu, tetel pulan i kamakam hanowi xekei ah ma titi aen i talepalep hanowi samen tenen laha lui hauniwen.

¹⁹ “Nga tioi waliko ti amuto ailele. Nga tioi wawahen ti amuto, xoxoi namilomuto tetak, soliai puasamuto ma ti amuto tu xox tatale kalak ti kawatan tutunahi amuto. Solian ti amuto ailele aope ie, i xoiniwen ti imat.

²⁰ “Tuahé hina waliko nga kum amuke leilomuto. Teka ti amuto paxai lioi saun lialun leilomuto, tetenen ti tel hehin ti imat axan Jesebel ailele, tetel i putini ukek ka i tel kuluiak kakai Haeu. Teka ti amuto usiusi tutuen lialui woun ape i neini hasele teka unauk ailei saun lialun ti wawan hehin ma aniai an ti laha ailewen pali hani waliko tenen kumahe salan Haeu.²¹ Nga axiwen amuto taun ti na amuto towiahu ti tesol saun lialun ien tuahé kumahe pahamuto.

²² “Aile ape teteka ti amuto to ailele saun lialun ti wawan hehin masin ti Jesebel hahanau, nga hatinu halialu amuto ape nga axi amuto kawatan tenen lalap, halik na amuto towiahu ti lialui woumuto.²³ Nga telei xaxaweni teteka laha usiusi saun tenen ti Jesebel hahanau. Ape teka kahikahik paxai tioi ka nga tetel nga tioi hatapo namil hetekie isiai pahe seilon. Nga kahui hapoponowii hani amuto usiwa waliko ti amuto ailele.

²⁴ “Tin hina kakaiak hani amuto teka liai leili Tiatira, teteka ti kumahe amuto usiusi tenen saun ien ma waliko ti laha ukek kakain tuah ti Satan hatakei hani teka unauan. Nga kum hakawata aheke amuto na tenen.²⁵ Tuahé aile kapitiniwa soliai puasamuto ma tu xoxoa ti namilomuto tetak atengi taen nga aliam.

²⁶ “Teteka laha waxaini saliniai totohong ma lawe waliko lialun ma laha aile usi nauna tetak atengi taen matealah, nga hani laha neiniae teka seilon ti xux tenen tenen.

²⁷ “Nga hani lato poh ti neiniae seilon masin ti nga kema ti Haeu tel Tamak. Nenein ti lato ahian wanen kane teka seilon laha tahi kakai Haeu. Lato aile halialu teka ien hanowi patula kalas

ti i put ape i takel wikawika.’ (Ps 2:8-9)

²⁸ “Nga hani hetekie lato tehu kohot towisaian ti kolakol ka lato waxainiwen lawe waliko lialun.

²⁹ “Na amuto hina taxing ti hongoi kakain, hong matainiwa waliko ti Holi Spirit kaokane hatesol kahikahik.”

3

Kakain hani teka kahikahi Krais ti Sadis

¹ Imuh tel masiwi kakane nga ukek, “Tai haniwa tel engel ngahatiai teka kahikahik ti Sadis kewak. Ie se kakai tetel i akekeni tesol tepanim huohu kohot ma i xuhai Holi Spirit.

“Nga tioi waliko ti amuto ailele. Seilon sokok namilomuto xoxoan tetak tuahé salan wanen, xoxoi namilomuto tetak i tapoen.² Kanipetiwa sale woumuto. Waliko solian ti amuto ailele imat, i tapo kakalutawa. Haxoxo aliakewa nake nga kum namiloi ukek puasamuto pate sawisawin usiwa namlili Haeu.³ Aile ape nameni aliakewa kakai Haeu ti amuto hongoen. Towiahu ti lialui woumuto ape puas usiwa tenen kakain ien. Na amuto kum towiahu, nga lua hanowima tel seilon xuxuina, amuto kum tioi hawane loke tahiaiak.

⁴ “Tuahé hina teka ti amuto ti Sadis, amuto kum ailele saun tenen i halolo amuto. Amuto uke puxux tenen papaxaxun ma amuto xohixohin wanen kapik nake ti soliai woumuto.⁵ Hatesol seilon laha waxaini saliniai totohong ma lawe

waliko lialun, puxualaha tin papaxun. Nga kum susuni wanen axalahia ti Haeu tai konginiwen ti ukei tonain kapin ti tap tahi tapoan. Ti puli Haeu tel Tamak ma teka engelaun nga kaxi ahuti ka teka seilon ien se tetak.

⁶ “Na amuto hina taxing ti hongoi kakain, hong matainiwa waliko ti Holi Spirit kaakane hatesol kahikahik.”

Kakain hani teka kahikahi Krais ti Piladelpia

⁷ Imuh i kakane nga ukek, “Tai haniwa tel engel ngahatiai teka kahikahik ti Laodisia kewak. Ie se kakai tetel i lawe salan. I tel unaui Haeu wanen ma waliko ti i kakak sale Haeu mewenae salan. Nake ti i, Haeu tanomi lawe waliko.

⁸ “Nga tioi waliko ti amuto ailele. Nga tioi ka ti puli teka seilon liai axamuto kumahe lalap. Tuah amuto akeni kokongini tutuen nauna tetak ma amuto tai puluhini ka amuto tetak. Nga hei haniwen amuto tewau aweisal ti tap tel pon konginian. ⁹ A teka laha putini laha seilon ti lotuiai Haeu, tuah salan tetan laha seilon ti Satan, nga aile lehe laha lokuha lakua hani aemuto ape laha hatesol paxai tioi ka nga waheni amuto.

¹⁰ “Masin ti nga honewen amuto, saka amuto tu xox tatale tetak kalak kumahe malimum ti usian. Aile ape nga awai amuto ti tehu kawatan i luluanima ti lehe Haeu tohongi paxai woi lawe seilon.

¹¹ Luaiak hani kapimuto xohiwi. Aile kapitiniwa soliai puasamuto ma tu xoxoa ti namilomuto tetak lehe amuto kum lioi soliai kahumuto ti Haeu apesenewen. ¹² Teteke na laha waxaini saliniai toto-hong ma lawe waliko lialun, nga aile laha sohot hanowi kuku tuah ti leili Ingi Haeu. Laha hamalum hawane kapi Haeu. Ape nge tai axe Haeu tel Tamak he kawalaian kolaian ka laha ti Haeu. Nga tai hetekie axe tehu taon ti Haeu axan Jerusalem haun i ahuma ti tonan, kolaian ka laha to tehu taon ien lian tehue. Tin nga tai hetekie tenen axak haun, kolaian ka laha pakata xoxoen kapik.

¹³ “Na amuto hina taxing ti hongoi kakain, hong matainiwa waliko ti Holi Spirit kaakane hatesol kahikahik.”

Kakain hani teka kahikahi Krais ti Laodisia

¹⁴ Imuh i kakane nga ukek, “Tai haniwa tel engel ngahatiai teka kahikahik ti Laodisia kewak. Ie se kakai tetel i lawe salan. I tel unaui Haeu wanen ma waliko ti i kakak sale Haeu mewenae salan. Nake ti i, Haeu tanomi lawe waliko.

¹⁵ “Nga tioi waliko ti amuto ailele. Nga tioi ka amuto kumahe ahian ma na wawaxixin ti ailei lawe puasak. Nami amuto kewa tenen ti lalu. ¹⁶ Tuah amuto kumahe ahian ma na wawaxixin, amuto tuahe patatal. Amuto woinakon ailei lawe puasak. Tap wanen anan. Aile ape nga tale tehitok hani amuto. ¹⁷ Amuto ukek ka amuto tapai hawanewen ti lawe waliko. Tuah amuto kum paxai tioi ka amuto tae hawane waliko ti Haeu pahan. Amuto seilon tenen tap wanen amuam. Amuto masin teka pulaxa ma makahul. Ala amuto hienake aliakewa woumuto.

¹⁸ Na pahamuto wanen lehe amuto tapai hawane, haelielwa usiak ti haxoxoi namilomuto ti Haeu. Ien se pate tuah masin gol laha lui hauniwen. Amuto usiwa soliai wouk lehe amuto sosoi maia papaxaxun i kola ka amuto ape haun hanowi seilon tenen i sosoi maia atuhian ti i makahul. Hong matainiwa kakaiak lehe amuto xeu hawane ti lawe waliko salan hanowi seilon tenen i hana marasin hani he pulan lehe i paxapax alua.

¹⁹ “Teteke nga waheni, nga tumei ma nau hasawi ti laha tahi kakaiak. Towiahua ti lialui woumuto ape hahiawa ailei puasak.

²⁰ “Hongoa! Lawe nga tu kiikini kahip ti aweingamuto. Na amuto hong kinaxok ape hei aweing, nga soh ape kako to ang he lawalau.

²¹ “Teka laha waxaini saliniai totohong ma saun lialun, nga hani laha to kapik ti neiniai seilon masin ti nga waxainiwen ape nga kapi Haeu tel Tamak neiniai seilon.

²² “Na amuto hina taxing ti hongoi kakain, hong matainiwa waliko ti Holi Spirit kaakane hatesol kahikahik.”

suhusuh. I wix ukek, "Lua hanima kapik patul lehe nga kola hani o waliko ti na i sohot muhin." ² Tuhan tehue Holi Spirit kapiti namilok ape nga ningahi tehu totoan pate tuah ti tone Haeu ti tel seilon toto. ³ Tanome tel seilon ien i talepalep hanow waliko tenen pate i kamakam. Kakalini tehu totoan ien tehu poto, lalape xewaana masin leili sup ti i tai unauna na alon hokai hatalepalepa. ⁴ Tin 24 totoan tuah liai kakalini i hetekie 24 masiwi toto ien. Puxuulato papaxaxun ma patulato hin tah tenen ani gol. ⁵ Ahuma he tehu totoan tuah xepai usil ma tangiai kuhuh. Mateiwaun tepanim huohu lul kamakam. Lato kikilami Holi Spirit, tetel pate pohen. ⁶ Mateiwaun tin masin kanitax tenen na pate tanenan ma xewan.

Hinalo seilon tutu kapi tehu totoan ien, hua papan teapaun ape hua liai teapaun. Kilan pulalato, sai matalato ma tehitolato. ⁷ Tel ti lato tanoman masin tok pusi lalap axan laion, tel liai masin tok bulmakau, tel ulea kawan masin kawe seilon ma tel tapeinan masin tok keihat paun holaian. ⁸ Lato tel tel hina paulato masin pai manixux tuahe paulato tepanim tehu. Kilan pulalato he paulato, patul ma hahitakan. Ngain ma ipong lato to kakak ukek, "Haeu tel Masiwi i sawisawin tapein ma tel poh tapein.

I hoi liai ti imat, aope ma tin i luluainima tutuen!"

⁹⁻¹⁰ Tapai na tesol hinalo seilon ien kak kemulik ma haxawa axe tetel i toto he tehu totoan tuah, tesol 24 masiwi lawe lato lokuha lakua mateiwaun ape lotui i, tetel tap tahi matean. Tesol tah he patulato ti kolai masiwialato, lato hana xaxaweni hani mateiwi tehu totoan pate tuah. Ape lato ukek,

¹¹ "Haeu tel Masiwi ti amite,
tapai hawane amite haxawa axam
ma sameni lalape pohem
nake o tetel tanomiai lawe waliko.
Lawe waliko ti o tanomiwen
i ahuma ti puki namilom."

5

Teik pepa tuah ma tok sipsip uluha

¹ Muhiin nga ningahi teik pepa tuah lumenan he min manau ti tetel i toto he tehu totoan tuah. Taian papan hahupau a pakatan, tepanim huohu papakat uke konginian. ² Ape nga ningahi tel engel pate pohen i tilol kamekam, "Aita tel i sawisawin

ti puli Haeu i tapai tosei tesol papakat ma heiai teik pepa ie?" ³ Tuahé tap tel seilon ti tone Haeu, tehu pon ie ma na hahitakan i tapai heiai teik pepa tuah ien ma paxaian.

⁴ Nga tang welu hawane nake tap wanen tel tapai. ⁵ Ape tel ti tetesol masiwi i hone nga ukek, "Kum tangitang! Hongoa! Tetel masiwi pate pohen i nakuama ti teka Juda ti tel masiwi David, i waxaini xoiniai lawe waliko lialun. I tapai hawane tosei tesol papakat ti teik pepa tuah ien ma paxaian."

⁶ Muhiin nga ningahi tok sipsip uluha tanoman masin ka totok laha teleimu. I tutu kapi tehu totoan tuah, kakalini i tetesol hinalo seilon ma tetesol 24 masiwi. He patun tepanim huohu sulaun ma tepanim huohu pulan lato kikilami Holi Spirit tel pate pohen ti Haeu talo hani hatesol xux he tehu pon ie. ⁷ I kiheta waxi teik pepa tuah he min manau ti tetel i toto he totoan tuah. ⁸ Ti i akeniwa, tetesol hinalo seilon ma tetesol 24 masiwi lato lokuha lakua mateiwi tok sipsip uluha ien. Tel tel ti lato akekeni tehu harp, waliko ti wexoiai tangiai pak. Tin lato akekeni hetekie kapi ani gol. Leilon sanda tenen poun pate solian i kikilami lotu ti teka seilon ti Haeu. ⁹ Lato pakui tenen pak haun ukek,

"O tapai hawane waxiai
teik pepa tuah
ma tosei papakat
ti heian
nake laha telei o
ape ti mateam o uke
kahilalui woi seilon.
O aile ukek ien lehe teka
seilon ti lawe xux
ma nenex,
kakaialaha tenen tenen, laha sohot
unaui Haeu wanen.

¹⁰ O aile ape laha sohot seilon ti hahitake
nenein ti Haeu,
teteka laha aile hatapo waliko ti i kil-
ami haniwen laha
ma aweisalulaha hani i mewenae
hean.
Ape laha neini teka seilon ti tehu pon
ie."

¹¹ Ti nga to papaxap nga hong kinaxe teka kilai engel, mongohualaha kaha kum pon wanen wexeian. Laha tu kakalini tehu totoan tuah, tetesol hinalo seilon ma tetesol 24 masiwi. ¹² Laha pak ausisini ukek, "Tok sipsip uluha ie se totok laha teleimu.

I tapai hawane kako sameni lalape po-
hen,
anesoan ma kuin.

I pono wanen ti lawe waliko.
Kako haxawawa axan."

¹³ Ape nga hong lawe seilon ma manihuh ti tone Haeu, he tehu pon ie ma hahitakan hetekie ti itax, laha pak ukek,
"Kako sameniwa lalape pohe tetel i toto
he tehu totoan tuah
hetekie tok sipsip uluha.
Kako haxawawa axalalu lian tehue."

¹⁴ Tetesol hinalo seilon kak ukek, "Salan
wanen!" Ape tesol 24 masiwi lokuha lakua
lotuialalu.

6

Tetesol papakat ti teik pepa tuah

¹ Muhin nga ningahi tok sipsip uluha
ien i tose tehu ti tesol tepanim huohu pa-
pakat ti he teik pepa tuah. Ape nga hong
tel ti tetesol hinalo seilon i tilok hanowi
tangiai kuhuh ukek, "Kiliwama!" ² Ti nga
paxawa, nga ningahi tok hos papaxauxun
tutu matak. Tel seilon i toto patul tetan i
akekeni tehu ponar. Ape Haeu hana teik
tah tuah he patun kolaian ka i masiwi. Ti
i kiliwawa, i waxaini kilan hilehile atengi
tataen i xoiniwa lawe waliko lialun.

³ Ti tok sipsip uluha tosewa tehu papakat
liai, nga hong tel liai ti tetesol hinalo seilon
ukek, "Kiliwama!" ⁴ Ape tok hos kakan
wanen kiliwawa. Tel seilon patul tetan,
Haeu sowini hani i hatanoi wasol lehe teka
seilon he teletel. Aile ape Haeu hani i tea
ngol weluwelun ti hile.

⁵ Ti tok sipsip uluha tosewa tehu papakat
liai, nga hong tel liai ti tetesol hinalo seilon
ukek, "Kiliwama!" Ti nga paxawa, nga
ningahi tok hos polopulu tutu matak. Tel
seilon patul tetan akekeni waliko ti kolon-
geniai kawate an. ⁶ Ape nga hong tenen
kinax i ahuma ti tetesol hinalo seilon i ukek,
"Kilo teawok suka ma kilo tehu komem
kahun pate lalap. Hapuasa aluiniwa wel ma
waen uke i tae."

⁷ Ti tok sipsip uluha tosewa tehu papakat
liai, nga hong tel tapeinan ti tetesol hi-
nalo seilon i ukek, "Kiliwama!" ⁸ Ti nga
paxawa, nga ningahi tok hos tutu matak.
I papaxauxui nalenalen, tanoman i tinun.
Tel kiliwakean axan. Matemate ma tel liai
kapin axan Hades i kikilami tesol tone
teka maten. Haeu sowini hani lalu teleiai
teka seilon laha toto tenon ti tehu pon ie.
Lalu hapuasa ngol weluwelun ma manihuh
tenen tumun kalimen hetekie lalu hahitolu
ma hatinu seilon.

⁹ Ti tok sipsip uluha tosewa tehu papakat
liai, nga ningahi tesol tone waliko ti seilon
kau hani Haeu. Hahitakan nga ningahi
teteka seilon ti kemuk teka liai telei nake
lato kaxi ahuti kakai Haeu ma lato tu xox ti
kakain salan tetan. ¹⁰ Lato tilok eliel hawane
ukek, "Haeu tel Masiwi tapein, tel sawi-
sawin tapein ma salan wanen, malehe ape
kuehuan ia na o paxai kolongeni woi lawe
seilon ti tehu pon ie ape o kahui aliakte hani
teka laha telei amite?" ¹¹ Ape tel tel ti lato
uke tehu puxux papaxaxun a weluwelun.
Muhin Haeu hone lato ka nutomu atengi
tataen ti teleiai teka akikilato ti Krais, teka
tilok ailei puase Haeu mongohualato i
meiwa ti Haeu kilamisen.

¹² Imuh nga ningahi tok sipsip uluha ien
tose tehu papakat liai ti teik pepa tuah. Ti i
tosewa, xixx sua eliel hawane. Alon i kum
kam ape i tilok hawane. Pangapang sohia
hahutuia hani kakan masin wanen kaka.
¹³ Kohot ti he maun put hani itan hanowi
huai pata ti aupol huei haputa. ¹⁴ Maun tapo
hanowi na teik tah i lumina alia. Hatesol
xux ma maunten laha naxia ti tutuhalaha.

¹⁵ Ape teka masiwi tenen tenen ti tehu
pon ie hetekie teka masiwi ti hile, teka
seilon kilan soxi, teka axalahalalap, teka
laха unaui seilon ma teka laha kumahe
unaui seilon, laha hatesol munia hani wal ti
he pot ma wasole pot he maunten. ¹⁶ Laha
tilok eliel hahani maunten ma pot ukek,
"Put atuhu munenima amite ti puli tetel i
toto he tehu totoan tuah ma ti lengei tok
sipsip uluha kapin. ¹⁷ Tehu ngain lialun ti
lengealalu tahiawen. Tap tel i kuosel ti
tenen kawatan ien."

7

Teteka seilon hina kikilam ti Haeu

¹ Muhin nga ningahi hinalo engel lato tu
tapaiwen hinalosumun ti tehu pon ie. Lato
kokongini hinalosol ahoi aupol lehe i kum
ah hani xux, kanitax ma tea na pata. ² Haeu
hani lato poh ti aile halialui xux ma kanitax.
Tuahe tel engel liai i sohotuma sai angiba.
I akekeni waliko ti hanai kikilam ti Haeu
tel tap tahi matean. I tilok eliel hani tesol
hinalo engel ukek, ³ "Kum aile hahalialumu
xux, kanitax ma na pata atengiwa taen
amite hana kewa kikilam ti Haeu he kawe
teka unauan."

⁴ Ape nga hong ka mongohe teteka seilon
laха hina kikilam ti Haeu 144,000 seilon ti
lawe nenex ti Israel.

- ⁵ Teteka laha ahuma tehu nenex ti Juda
12,000 seilon,
tehu ti Ruben 12,000,
tehu ti Gad 12,000.
⁶ Tehu nenex ti Aser 12,000 seilon,
tehu ti Naphtali 12,000,
tehu ti Manase 12,000.
⁷ Tehu nenex ti Simeon 12,000 seilon,
tehu ti Livai 12,000,
tehu ti Isaka 12,000.
⁸ Tehu nenex ti Sebulun 12,000 seilon,
tehu ti Josep 12,000
ma tehu ti Benjamin 12,000.

Teka kilai seilon puxuaulaha papaxaxun a weluwelun

⁹ Muhin nga ningahi teka kilai seilon mongohualaha kaha kum pon wexeant. Laha ti lawe xux, nenex tehu tehu ma kakai laha tenen tenen. Laha tutu matei wai tetel Masiwi i toto he tehu totoan tuah ma totok sipsip uluha kapin. Puxuaulaha papaxaxun a weluwelun ma laha akekeni kai hatoh. ¹⁰ Ape laha tilol eliel ukek, “Haeu tel Tamakaha, tetel i toto he tehu totoan tuah
ma totok sipsip uluha kapin, lalu se awaiakah.”

¹¹ Hatesol engel laha tu kakalini tehu totoan tuah, tetesol 24 masiwi ma tetesol hinalo seilon. Laha lokuhu lakua hani itan matei wai tehu totoan tuah ien ape laha lotu sameni Haeu. ¹² Laha ukek,
“Salan wanen. Kako sameniwa lalape pohe Haeu,
anesoan ma kuin.

Kako haxawawa axan ma
kak kemulik hanira i lian tehue.
Salan wanen.”

¹³ Ape tel ti tesol 24 masiwi kamei nga, “Aita tesol seilon ie puxuaulaha papaxaxun a weluwelun? Laha ahuma ia?”

¹⁴ Nga pahoi ukek, “Tel masiwi, nga kum tioi, puki o tioi.”

Ape i kakane nga, “Teteka seilon ie laha waxainiwen kaui kawatan lalap. Puxuaulaha papaxaxun nake ti matei tok sipsip uluha i nuhi hauniwen laha ti lialu woulaha.

¹⁵ “Aile ape laha hahamalam kapi Haeu
mate tehu totoan tuah tetan
ape ngagain ma ipong laha ailele puasan
leili tehu Ingan.

Ape ngangahat tetan i kalauhi laha.

¹⁶ Tap hitolo ti tenen na waliko tunahi ulei laha.

- Kekei alon ma na waliko liai tin i kum keti laha.
¹⁷ I sohot ukek ien nake totok sipsip uluha kapi Haeu
i ngangahati ma neneini laha hani Haeu
masin ti na kinawe seilon pate paxepaxen
ape tel i neini laha hani tehu kan.
Ape tatahan kum hatangi ulei laha
nake Haeu xaxaweni hatapo lawe kawatan.”

8

Tehu papakat tapeinan ma tehu sanda poun pate solian

¹ Ti tok sipsip uluha ien tosewa tehu papakat tapeinan, sai leili aua tewaok tap wanen tangai tenen na waliko ti tone Haeu.

² Ti nga paxawa, nga ningahi tepanim hua engel tutu mate Haeu. Tel tel ti lato uke tehu suhusuh.

³ Muhin tel engel liai nahir tu matei wai tehu totoan tuah kapi tesol tone waliko ti haniai Haeu. I akekeni tehu kapi ani gol ti lohiai sanda tenen poun solian. I uke kilan tenen sanda ien lehe i hani Haeu hetekie lotu ti teka seilon tetan, patul ti tesol tone hanian waliko. Tesol tone waliko ien ani gol. ⁴ Ti sonda ien lulua, axuan i hok sawile he tehu kapi ti tel engel akekeni hani Haeu hetekie lotu ti teka seilon tetan. ⁵ Muhin tel engel waxy nawal xoan he tesol tone waliko ti haniai Haeu, i lohi hani tehu kapi ape i towi hani tehu pon itan. Ti i towiwa, i hatano lalape tonui kuhuh, xepai usil ma xux i nua eliel.

Tepanim huuah engel ma tepanim huohu suhusuh

⁶ Muhin, tesol tepanim huuah engel lato akekeni suhusuh, lato apepeas kuinian.

⁷ Ti tel engel imat kuiniwa tehu suhusuhauh, lalape puli akah tenen pate waiwain ma ah hetekie kaka, i put hani tehu pon itan. I lui tenon ti tehu pon itan hetekie tenon ti pata ma hatesol pahoah.

⁸ Ti tel engel usian kuiniwa suhusuhauh, tenen waliko masin maunten lalap i xek towia hani itax. Tenon ti kanitax kolita hani kaka. ⁹ Tenon ti lawe waliko moihin ti itax mat ma waian ti langalang, tenon ti laha manan.

¹⁰ Ti tel engel liai kuiniwa tehu suhusuhauh, tehu kohot lalap i xekexek hanowi lul, i putalih he maun hani tenon ti kan ti unum he tehu pon itan. ¹¹ Tehu kohot

ien axan Maxaian. I hamaxaia tenon ti kan ape kilan seilon laha mat ti unumian.

¹² Ti tel engel liai kuiniwa tehu suhusuhaun, tenen waliko i aile halialu tenon ti alon, pangapang ma kohot. Aile ape al tai kam tenon ti ngain tehu ma pangapang hetekie kohot tin i tai kam tenon ti ipong tehu.

¹³ Ti nga to paxapax, nga hong tok keihat ngongong he maun patul, i tilol eliel ukek, "Taun pate lialun i luluainima. Sikole wanen tolu engel liai kuini suhusuhaulato ape kawatan pate lalap tunahi teka seilon ti tehu pon itan."

9

¹ Ti tel engel liai kuiniwa tehu suhusuhaun, nga ningahi tehu kohot kemuk patul he maun ape i put haniwen he tehu pon ie. I moih hanowi seilon. Haeu sowini hani i heiai mate tewau wal pate walawalan wanen. ²Ti i heiwa, axuan kilakilan wanen ahutale masin na kaha lui kai pata moihin. Lalape axuan ien i hatiloko kamai al ape xux i tilok.

³ Ti leili axuan ien kilan wanen kukanalel ahuta hani tehu pon ie. Laha pon wasi halialui seilon hanowi mini anepapap. ⁴Haeu halini laha ti aile halialui pahoah, pata tenen tenen ma lawe waliko ti i xexex he hepekeun. Laha aile halialu mewenae teteka seilon tap kikilam ti Haeu he kawalaha. ⁵Haeu kum sowini hani laha teleiai teka seilon ien tuahe ti axialato moloan lalap ti leili pangapang tepanim. Moloan ti lato lalamani masin na mini anepapap wasi seilon. ⁶Leili tesol ngain ien, lato aile ngah aweisal lehe lato mat tuahe lato kum mat uke. Pahalato wanen lato mat xaxau tuahe matematek kum tunahi lato.

⁷ Paxaiai teka kukunalel ien masin teka hos seilon apeseniven ti hile. He patuhala tah tenen ani gol a kawalaha masin kawe seilon. ⁸Ukulaha weluwelun masin uki hehin a nisulaha masin nisi oha. ⁹He patanawalaha hina titieh ti hile ani saman ma tangiai paulaha masin tonui kilai hos kikiliwau ti hilehile. ¹⁰Kolohelaha masin ti anepapap hina minun ape laha ha-puasa ti halialui teka seilon leili pangapang tepanim. ¹¹Tel masiwi neinialaha i tetel engel ngahatiai tewau wal walawalan wanen. Ti kakai Hibru axan Abadon ma ti kakai Grik axan Apolion. Salangawe tenen ax ien i ukek, "Tetel halialui waliko ien."

¹² Kawatan tehu ape i tamusuen tuahe huonen kawatan luluainima tutuen.

¹³ Ti tel engel liai kuiniwa tehu suhusuhaun, nga hong tenen kinax i ahuma hinalosumun ti tesol tone waliko ti haniai Haeu. Tesol ien se ani gol i tutu mate Haeu.

¹⁴ Tenen kinax ien kakane tetel i kuku-tehu suhusuh ukek, "Ooxi liowia tetesol hinalo engel xinotan he tehu kan lalap axan Epratis." ¹⁵Tesol engel ien hoi liai Haeu apeseniven lehe i hapuasa ti tehu ngain ie. Ape tel engel oxoxi lioi lato ti teleiai tenon ti teka seilon ti tehu pon ie. ¹⁶Tetesol hinalo engel lato neiniae teka seilon ti hile he hos. Nga hong ka kilaialaha sai 200 milion.

¹⁷Ti paxapaxa tetak, titieh ti he patanawete teketa seilon ti hile kakani masin xekei ah, ati polui axaxawan ma tin angoangoi ati polun. Tanome pati teka hos masin pati laion manihuh tenen tumun pate kalimen. Ah ma axuan ahutama he awalaha hetekie salfa, waliko tenen na i lua poun telei seilon. ¹⁸Totolunen waliko i ahutama he awe hos se pate lialun wanen, i telei tenon ti teka seilon ti tehu pon ie. ¹⁹Pohelaha ti halialui seilon i ahuma he awalaha ma kolohelaha. Tanome kolohelaha masin weiko tenen ti atalahi hamangei seilon.

²⁰Teteka seilon ti tolulen waliko ien tai telei laha, tin laha tai totowiahu ti lialul woulaha. Laha lotui kakapitini spirit lialun ma waliko tenen laha tua tanomi ani gol, silva, brons, pot ma pata. Tesol waliko ien kum pon i paxapax, hong ma tin kum nahih uke tuahe laha lotui hanowi ka Haeu. ²¹Tin laha tai aile lilioi teleiai seilon, apelaha ti hilihil, saun lialun ti wawan hehin ma saun ti xuxuina.

10

Tel engel ma teik pepa liai

¹Muhin nga ningahi tel engel liai pate pohen i momosulih tesol tone Haeu. I pux-upuxua leili maun hetekie tehu poto onote patun. Kawan kamakam hanowi xame alon a aen masin kuku na i xekexek. ²I akekeni teik pepa tuah luminan a ape holaihan he minan. I hatuhi tepaun aen manau hani itax ape tepaun kalamau ixux. ³I tilol eliel hawane. Lalape kinaxon masin uhuhai laion, manihuh tenen tumun kalimen. Ti i tiloa, tepanim huohu kuhuh wixile.

⁴Pahak nga tai waliko tenen ti kuhuh kakak tuahe tenen kinax i ahuma ti tone Haeu i ukek, "Kum tatai. I tai meiwa taun ti kaxi hatakeiai waliko ien."

⁵ Muhin tetel engel nga ningahi i tutu itax ma ixux, i tulini teapaun minan manau hani tone Haeu. ⁶ Ape i kak kuinake ti axe Haeu tel i moihin lian tehue, tel i tanomi maun aheah, tehu pon ie, kanitax ma hatesol waliko heihon. I ukek, "Haeu kum hatalia aheke waliko ti i namiloiven." ⁷ Taen ti na tel engel tapeinan kuiniwa tehu suhusuhaun, hatesol waliko ti Haeu tai hatakei hani seilon ape i sohot poponowi masin ti i kakanewen teka unauan ti kuluiai kakaian."

⁸ Ape tenen kinax ahuma ti tone Haeu kakane ulea nga i ukek, "Waxixa teik pepa tuah he mini tel engel i tutu itax ma ixux."

⁹ Nga nahih haniwa kapi tel engel ape nga kamei na i hani nga teik pepa tuah. I hone nga ukek, "Waxixa ape ania. I aile hamaxaia leili ti am tuah namuni ti he awam paoaian suka." ¹⁰ Nga waxixa teik pepa tuah he minan ape nga ani. Namun ti he awak paoaian wanen suka tuahe ti nga tolomiwa i hamaxaia hawane leili tiak.

¹¹ Ape i hone nga ukek, "Kaxi ahuti tatalewa kakai Haeu. Kaxi hatakeiwa waliko na i sohot hani teka seilon tenen tenen ti xux tesol tesol, kakaialaha tenen tenen hetekie teka masiwi ti laha."

11

Hua seilon kuluiai kakai Haeu

¹ Muhin nga uke teik pata ti kolongenai welui waliko ape Jises hone nga ukek, "Nahih kolongenija tehu Ingi Haeu ma tesol tone hanai waliko ti hanian ape wexewa mongphe seilon laha lolotu ien.

² Tuahem kum kokolongenija soxi tini Ingi Haeu sai melal nake ien Haeu haniniwena teka laha kum tioi i. Imuh, leili 42 pangapang, laha aile halialu teka seilon ti Jerusalem tehu taon pate tuah ti Haeu. ³ Ape nga hapohea hua seilon kaxiai menge Haeu lehe lalu kului kakaian leili 1,260 ngain. Telok ien lalu puxui puxus tetenen i kola lalape tatahan."

⁴ Huhua seilon ien lalu masin hua pata tenen oliv ma huohu tutuhi lul ti i tutu mateiwi Haeu tel Masiwi ti tehu pon ie.

⁵ Na tel tohongi hamangealalu, xekei ah i pusuama he awalalu teleian. Teka laha watakai lalu ma aile halialu lalu, laha mat ti xekei ah ien. ⁶ Lalu hina poh ti konginai maun lehe akah kum ux leili taun ti lalu kukului kakai Haeu. Tin lalu pon kolitiniiai lawe kan hani kaka ma hatanoi kawatan

tenen tenen hani tehu pon ie tuahe telao ti na pahalalu.

⁷ Tataen na lalu tiliwa kaxi ahutiai kakai Haeu, tel spirit lialun tanoman masin manihu tenen tumun pate kalimen i sohotule he tetewau wal walawalan wanen. I pamu kuiaria ape i telei lalu. ⁸ Ti ngain tololu twaok tupualalu tua engeeng maten he aweisali tetehu taon lalap ti laha telei Jises tel Masiwi ti lalu. Tehu taon ien laha kolongenija hani Sodom ma Igip. ⁹ Leili taun ien, seilon ti lawe xux ma nenex, kakaialaha tenen tenen laha paxai kakapitini tupualalu ma laha halini tihinialalu. ¹⁰ Teka seilon ti tehu pon ie laha amuke hawane matealalu. Ti amuamuaialaha laha aile angiai lanap ma laha he axiax soxi. Laha amuam hawane nake huhua kuluiai kakai Haeu ti axialaha kawatan, lalu ape maten.

¹¹ Tuahe muhi ngain tololu twaok, hanawai Haeu soh hani leilolalu ape i hamoiha aliake lalu. Ti lalu tule, hatesol seilon ox tuhi hawane laha ti waliko laha papaxai. ¹² Muhin lalu hong tenen kinax tiloma tesol tone Haeu, "Lua hanima patul." Ape teteka seilon watakialalu laha papaxai ti lalu luluainiwa he teik maun hani tesol tone Haeu.

¹³ Tataen ien wanen, xux nuea eliel. Teik ti huopanim ti lawe waliko leili tehu taon lalap i manan ape 7,000 seilon mat. Teteka laha kuosel ti tenen kawatan ien, ti mataualaha laha haxawa axe Haeu tel pate tuah.

¹⁴ Kawatan huonen ape i tamusuen. Tenen kawatan i luluainima tutuen, sikole ape i tahiia.

Tehu suhusuh tapeinan

¹⁵ Ti tel engel tapeinan kuiniwa tehu suhusuhaun, kilan kinax tiloma tesol tone Haeu, laha ukek, "Haeu tel Masiwi ti kaha ma Krais tetel i taloma,

lalu sohot Masiwi tapein ti tehu pon ie ape lalu neini lawe seilon lian tehue."

¹⁶ Taen ien tetesol 24 masiwi lato toto he tesol totuan tuah mateiwi Haeu, lato lokuha lakua hani itan ape lotui Haeu.

¹⁷ Lato ukek, "Haeu tel Masiwi tel pohen tapein, tetel ti imat ma aope ie, amite kak kemulik hani o nake ti lalape pohem

o hutuiwen neiniai lawe waliko.

¹⁸ Teteka seilon laha kum lotui o, laha lengeini o

tuahe taun ti o leng pahoi lato ape i tahiawen.
 Aope ie se taun ti o paxai kolongeni woi lawe seilon ti laha matewen.
 Ape o khui hasolia
 teka unaauam ti kuluiai kakaiam,
 teteka laha haxawa axam ma hatesol seilon
 tetam
 kalak axalaha lalap ma na kumahe.
 Ape o aile halialu tamusuke teteka laha aile
 kahalialu
 lawe waliko ti tehu pon ie.”
¹⁹ Muhin tehu Ingi Haeu ti tesol tonan i hea ape lawe seilon pon ningahiae tehu lohe kakain tuah ti Haeu xinotiwem kapi teka seilon tetan. Ape usil xepaxep, kuhuh tonuton, xux nuea eliel ma puli akah lalap tenen pate waiwain i put hahani itan.

12

Tel hehin ma tok loloma lalap

¹ Imuh tenen waliko pate lalap ma hataxin wanen sohotuma tesol tone Haeu. Nga ningahie tel hehin alon pupuxui i ma tehu pangapang hahitake aen. Teik take patun se huopanum huohu kohot. ² Tel hehin ien tian hina akaik. I tang aleleke moloan nake sikole i hatakaha tel akaik.

³ Muhin tenen waliko liai tin pate lalap sohotuma tesol tone Haeu. Nga ningahie tok loloma kakan pate lalap wanen tepanim huohu patun. Tesol patun hina tah ani gol ma huopanum sula. ⁴ I xai wakoteni kolohen ape i haputa tenon ti kohot he maun hani itan. I tu mate tel hehin apepeas halekei tel akaik tataen ti na i ahutama.

⁵ Ape tel hehin hatakaha tel akaik wawan. Tuahie ti lehe tok loloma lalap tapei tel akaik, laha taxaxeiti i hani Haeu, kapi tehu totoan tuah tetan. Tel akaik ien imuh i tel neiniae lawe seilon ti xux texux texux ma tap tel pon hil pahoian. ⁶ Tel hehin ox hanie lohong, tetesol Haeu apesenii haniwen i. Ti ien i aununa leili 1,260 ngain.

⁷ Tehu hilehile sohot hahutua ti tesol tone Haeu. Maikel tel engel ma tesol engel hahitakan lato hilei tok loloma lalap ien ape tok loloma ma tesol tuaun hil pahoian. ⁸ Tuahie laha kum pon waxainiai Maikel ma tesol engel hahitakan ape lato usi xaxaweni laha ti tesol tone Haeu. ⁹ Tok loloma lalap ien i se Satan, tetel hoi i pupuas ti imat wanen, lokon ti i tanoma hanowei weiko. Lawe i neini hakalala seilon ti ailei saun lialun. Ape muhi tehu hilehile, laha towi ahuti i ma tesol tuaun hani tehu pon itan ie.

¹⁰ Muhin nga hong tenen kinax lalap ti tone Haeu ukek,
 “Taun ape i tahiawen ti Haeu awai seilon
 ti lawe waliko lialun.
 I kola lalape pohen ma soliai nenein tetan.
 Ape Krais, tetel i taloma, i tel Masiwi ti
 lawe waliko.
 Satan ape laha towi ahutiwen ti tone Haeu.
 I tel kemuk i tutu mate Haeu sului
 teka kahikahi Krais lawe ngain ma
 ipong.
¹¹ Lato waxaini Satan nake Jises Krais mat
 ukei
 kawatan ti lialui woulato.
 Tin lato waxaini i ti lato kaxi ahuhuti
 kakai Haeu.
 Ape lato kum nomuhini matealato
 ti kolai xoxoi namilolato ti Jises Krais.
¹² Aile ape amuto tetesol toto ti tone Haeu,
 amuamua!

Tuahie lehe ape lialui lawe waliko ti
 tehu pon itan ma kanitax
 nake Satan ape i mos haniwen ien.
 Lon pate lialun nake i tioi ka
 ngainun pate ape kukanun.”

¹³ Ti tok loloma lalap tioiwa ka i laha towi xoini haniwen he tehu pon itan, i usi nimai tetel hehin i hatakaha tel akaik wawan.
¹⁴ Tuahie tel hehin uke hupaun pai houn ape i ngong hani he lohong, tetesol Haeu apesenii haniwen i. Ti tesol ien i auna ti ahang tolulu tewaok ape tok loloma lalap kum pon aile halialuan.

¹⁵ Imuh tok loloma lalap pusuni hasomu kan lehe i manuke xaxaweni tel hehin.
¹⁶ Tuahie hepekeun huali tel hehin. I keliai ape kan ti tok loloma pusuniwa i xiweu hatapo hani leilon. ¹⁷ Tok loloma lalap lon lialu hawane ti tel hehin. Ape i lua hilei tetesol laha nakuama ti tel hehin. Laha teteka laha hong usiusi nauna ti Haeu ma tu xoxox ti Jises Krais.
¹⁸ Muhin tok loloma lalap tu ulea ngixi peixux.

13

Tok manihuh tumun kalimen ahutama itax

¹ Muhin nga ningahie tok manihuh tenen tumun pate kalimen i ahuhutama itax. Patun tepanim huohu ma huopanum su-laun. Patul he tesol sulaun tah ani gol. Ti he patun tehu tehu hina ax tenen i sosoxeni Haeu. ² Tanome tok manihuh ien masin tok lepet tuahie aenei aen masin aneie ae ber a awan masin awe laion. Tok loloma lalap axi i poh ma hana i tel masiwi.

³ Tehu ti pati tok manihuh tehu mahe naxon lalap ti ala i mat tuahe i mahuen. Teka seilon ongake hawane ape kilan ti laha sameni ma hong usi tok manihuh ien. ⁴Laha lotui tok loloma lalap nake i hanawen tok manihuh tel masiwi ape tin laha lotui tok manihuh ien. Laha ukek, "Tap tel ulea kuin i akulai tok manihuh ie. Tap tel po tike i."

⁵ Haeu paxai lioi ti i to tel masiwi leili 42 pangapang. Ape tok manihuh kak hanasanas ma i ukek ka i se Haeu. ⁶ I kak saxuti Haeu ma halialu hetekie axan. Tin i kak halialu hetekie tesol tonan ma teka laha toto ien. ⁷I uke poh ti hil tikei seilon ti Haeu. Ape i to tel masiwi ti kakaialaha tenen tenen. ⁸Kilan wanen seilon lotui i, tuahe teka seilon ti Haeu kum aile ukek ien. Laha teteka Haeu tai konginiwen axalaha imat ti i tanomi lawe waliko lehe laha uke tonain kapin ti tap tahi tapoan. Laha uke tenen tonain ien nake ti laha telei tok sipsip uluha, i mat ukei kawatan ti lialui woi seilon.

⁹Na amuto seilon ti hongoi kakain, amuto hong matainiwa.

¹⁰Teteka seilon ti Haeu namiloiven kane kalabus, laha xoti ma kalabusi lato.

Teteka seilon ti Haeu namiloiven lato mat nake ti usiai nauna tetan, laha telei lato.

Aile ape, tu xoxoa kahikahi Krais kalak kawatan tunahi amuto.

Tok manihuh tumun kalimen sohotule hep- ekeun

¹¹Muhin nga ningahi tok manihuh liai tin tumun pate kalimen i sohotule leili hep- ekeun. Huohu sulaun he patun masin ti tok sipsip uluha tuahe sale kakaian masin ti tok loloma lalap. ¹²I sohot masiwi hanowi totok ti i ahuma itax. I puas hahitake axe tok ien. I lungei teka seilon lotuiai tok manihuh naxonaun mahuen. ¹³I aile hasohotu waliko tenen lalap tataen hamosui ah ti he maun patul hanima tehu pon ie ti puli lawe seilon.

¹⁴Lokon ti i aile tesol waliko lalap ien ti hahitake axe totok manihuh i ahutama itax, i neini hakalala teka seilon. Ape i lungei laha tanomiai tok manihuh hanowi tanome totok i ahutama itax, totok laha hamangani ngol tuahe i moihiin tutuen. ¹⁵Tok manihuh i sohotule leili hepekeun, i uke poh ti axiai hanawain hani hosai tok manihuh i ahutama itax lehe i kak uke. Ape tel na i watakai lotuiai hosau, i hani laha telei.

¹⁶Totok manihuh i sohotule leili hep- ekeun i lungei teka seilon ukei teik kikilam ti he minalaha manau ma na kawalah. I lungei seilon tenen tenen, teteka axalaha lalap ma teka tap axalaha, teteka kilan soxi ma teka tap, teteka unaui seilon ma teka kumahe unaui seilon. ¹⁷Tap tel pon hangaini ma kahui tenen na waliko, mewena na i hina teik kikilam ien. Teik kikilam ien se axe totok manihuh i ahutama itax ma tin wexewex ti i kilami axan. ¹⁸Mewena seilon aneso i xeu tetenen ie. Teteka namilolaha xewan, kewak laha nam nexi tenen wexewex ien nake i kikilami axe tel seilon. Wexewex ti kilamai totok manihuh i ahutama itax se 666.

14

Tok sipsip uluha ma 144,000 seilon

¹Ti nga to paxapax nga ningahi tok sipsip uluha tutu patul he Maunt Saion kapi tesol 144,000 seilon. Hina axe tok sipsip uluha ma axe tel Taman Haeu taian he kawalato.

²Ape nga hong tenen kinax ti tone Haeu masin tangiai tainiai mau ma tonui kuhuh. Tangian masin wanen na kilan seilon xaxai harp.

³Tesol 144,000 seilon ien lato tu papukai tenen pak haun mateiwai tehu totoan tuah ti Haeu ma tetesol hinalo seilon hetekie tetesol 24 masiwi. Tap tel seilon liai pon pakuan, mewena tesol 144,000 ien, tetesol Haeu awaiwen lehe lato sohot seilon tetan ti leili teka seilon ti tehu pon ie. ⁴Lato tetesol lato hani hatapo tupualato usiai nauna ti Haeu ma aile hawanei pupuasan. Haeu kahui ahutiwen lato ti lialui woulato leili teka seilon liai ti tehu pon ie. Lato masin waliko tenen solian tapein ti pahalaha hani Haeu ma tok sipsip uluha. Lato halini puki lato ti ailei tuahe tenen na waliko lialun ape alomeni tupualato ailei lawe waliko ti Haeu pahan. Lato kahiti tok sipsip uluha tesol tesol na i neini lato. ⁵Tap wanen lato po puputa. Tap tel pon tienialato ti tuahe na tenen.

Tolu engel

⁶Imuh nga ningahi tel engel liai ngongong patul he maun. I kaxi ahuhuti meng solian ti Haeu tenen tap tahi sohiaian hani teka seilon ti lawe xux ma nenex, kakaialaha tenen tenen ti tehu pon ie. ⁷I kak eliel ukek, "Kolawa lomuto haniwa Haeu ma haxawawa axan nake taun i xohiwen ti i paxai kolongeni woi lawe seilon ma i axi kawatan hani teka seilon

lialun. Lotu sameniwa i, tel i tanomi maun aheah, tehu pon itan, kanitax ma lawe kan ti tehu pon ie.”

⁸ Muhin nga ningahi tel engel usian. I kak ukek, “Babilon, tehu taon lalap i manan lialuen. Lehe ape lialui teka seilon ti Babilon! Laha neini hakalala seilon ti xux texux texux ti husele lialui woulaha.”

⁹⁻¹⁰ Muhin nga ningahi ulea tel engel liai i kak eliel ukek, “Teka laha lolotui totok manihuh tumun kalimen i ahutama itax hetekie tok hosaua ma laha uke kikilam tetan he min manau ma na he kawalahaa, ti lialui loi Haeu i lengeini laha ape i axi laha kawatan. Laha ilameni moloan pate lalap nake laha lua leili ah ti hina salfa, waliko tenen poun i telei seilon. Tenen ien i sohot ti puli teka engel ti Haeu ma tok sipsip uluha. ¹¹ Tehot ah ti luialaha tap tahi pehoan. Tap wanen hahei moloan hani teteka laha lolotui tok manihuh ien hetekie tok hosaua ma laha uke kikilam tetan.” ¹² Aile ape, teteka ti amuto hong usiusi nauna ti Haeu, tu xoxoa kahikahi Krais kalak kawatan tenen tenen tunahai amuto.

¹³ Imuh nga hong tenen kinax ti tone Haeu i kak ukek, “Tai kewak, tataen ie ahua, tanusik teteka seilon laha mat ti laha unaui Haeu tel Masiwi.”

Ape Holi Spirit kak ukek, “Salan wanen. Pake laha uke hanawain solian kahi puasain ma kawatan ti laha kau. Haeu paxai tioi soliae pupuasalah.”

Sale hinitiai seilon ti ngain tapein

¹⁴ Imuh nga ningahi tel seilon toto he teik maun papaxaxun. Tanoman masin ka i tel Nati Seilon. He patun teik tah ani gol ma i akekeni tea pole pate angian.

¹⁵ Muhin tel engel liai sohotuma he tehu Ingi Haeu ti tesol tonan ape i tilol eliel hani tetel i toto he teik maun. I ukek, “Hapusawa tea pole ape apuhiniwa lawe an ti liai apesenan he tehu pon itan.” ¹⁶ Ape tetel i toto he teik maun i wakoti nami tehu pon ie tea pole ape lawe an ti liai apesenan i apuha.

¹⁷ Muhin tel engel liai ahutama he Ingi Haeu ti tesol tonan. Tin i akekeni tea pole pate angian. ¹⁸ Ape tel engel liai ulea i ahutama he tesol tone waliko ti haniai Haeu. I tel masivi ngahatiai tehot ah. I tilol eliel hani tetel i akekeni tea pole pate angian, i ukek, “Hapusawa tea pole koti saluhiai tenen pata greip he tehu pon

itan ape apuhiniwa huan nake ape i pamuen.” ¹⁹ Tel engel wakoti tehu pon itan tea pole ti koti apuhiniai huai greip ape i towi greip hani leili tesol tone pisihiai huai pata. Hunuiai kani greip i kilami lalape lengei Haeu. ²⁰ Laha pexi hunui huai greip ien melat ti taon lalap. Ape ti laha pepexi, kaka xiweu ahutama. I som hanowi somui mat sai huohu mita ma welui xiweewan sai 320 kilomita.

15

Paki Moses ma tok sipsip uluha

¹ Imuh tenen waliko pate lalap ma tuah wanen sohotuma tesol tone Haeu. Nga ningahi tepanim hua engel ti axiai tepanim huohu kawatan tiliai lengei Haeu. ² Muhin nga ningahi tenen waliko paxaan hanowi kanitax tenen masin kalas i talepalep hanowi xekei ah. Hina seilon tutu ngixi kanitax ien. Lato tetesol lato waxainiwen tok manihuh tumun kalimen i ahutama itax ma tok hosaua ma lato tai uke kikilam tetan. Lato akekeni tesol harp ti Haeu haniwen lato wexoiai tangiai pak. ³ Ape lato papakui tenen paki Moses tel unaui Haeu ma tok sipsip uluha i ukek,

“Tel Masiwi Haeu tel pohen tapein,
soliae lalape pupuasam.

Tel Masiwi ti hatesol seilon,
woum, kakaiam ma pupuasam
lawe sawisawin ma salan.

⁴ Lehe aita tel na tap lon tetam?
Lehe aita tel na kum haxawa axam?
Mewenae o tetel sawisawin tapein.

Hatesol seilon lotu sameni o
nake laha ningahiweng sawisawiai
pupuasam.”

*Tepanim huohu kapi hetekie tepanim
huohu kawatan*

⁵ Muhin Ingi Haeu ti tesol tonan i hea ape nga ningahi tesol Pate Tuah ti Haeu.

⁶ Tesol tepanim hua engel ti axiai tepanim huohu kawatan lato sohotuma leili Ingi Haeu. Puxualato papaxaxun ma i talehaleh. Patanawalato tahaian teik tah ani gol. ⁷ Kakanua, tel ti tetesol hinalo seilon ien hani tesol tepanim huuha engel tepanim huohu kapi ani gol. Waliko ti leilon i kikilami lengei Haeu, tel tap tahi matean. ⁸ Ape axuan i xuh tesol Pate Tuah ti leili Ingi Haeu. I kola ka Haeu tel pohen ma axan lalap. Tap tel i soh uke hani ien atengi tataen tepanim huuha engel axi hatapoa tesol tepanim huohu kawatan.

16

Tesol engel xingini tepanim huohu kapi

¹ Muhin nga hong tenen kinax lalap ahuma tehu Ingi Haeu, i kakane tesol tepanim huuha engel ukek, "Lua tihiva lialui loi Haeu he tesol tepanim huohu kapi haniwa tehu pon itan."

² Ti tel engel imat lua tihiva lohe tehu kapieun haniwa tehu pon itan, naxon tenen pate lialun ma moloan i tan hani tetesol lato hina kikilam ti tok manihuh tumun kalimen ma lolotui hosaua.

³ Ti tel engel usian tihiva lohe tehu kapieun haniwa itax, kanitax kolita hani kaka tenen ati polun a patoto ape lawe waliko moihin leili kanitax laha mat.

"Ti tel engel liai tihiva lohe tehu kapieun haniwa lawe kan ti unum ti tehu pon itan, lawe kan kolita hani kaka. ⁵ Ape nga hong tel engel masiwi ngahatiai lawe kan ti tehu pon itan ukek,

"Haeu, tel sawisawin tapein, o hoi liai ti imat ma apeo.

Haniai tesol kawatan ie se sawisawin
nake
paxai kolongenian tetam ti woi seilon
se sawisawin.

⁶ Teka seilon lialun teleiwen tesol kului
kakaim
ma seilon tetam liai.

Ti matealato kakaulato kukumim hawane,
aile ape Haeu hamakaka lawe kan ti
unum
kahai tesol teletele ien."

⁷ Lokon ien nga hong tenen kinax wixima
tesol tone waliko ti haniai Haeu, i ukek,
"Haeu tel Masiwi tel pohen tapein,
salan wanen ka paxai kolongenian
tetam
ti woi seilon se sawisawin.
Aile ape tesol kawatan o hahani ie se
sawisawin."

⁸ Muhin tel engel liai tihiva lohe tehu
kapieun hani he puli al ti hakekeian
lehe i mani hawane seilon ti kuiai keke-
ian. ⁹ Ti laha lulua he kekei alon, laha to
kak sasaxuti Haeu, tel Masiwi haniai tesol
kawatan ien. Tin laha kum towiahu ti lialui
woulaha ma laha kum haxawa lalape axan.

¹⁰ Ti tel engel liai tihiva lohe tehu
kapieun haniwa tehu totoan tuah ti tok
manihuh tumun kalimen i ahuma itax,
tilokoan atuhu hahutua i ma teka seilon i
neneini ape ti lalape moloan laha atalahi
hamekimeki nisulaha. ¹¹ Laha kak saxuti
tatale Haeu tel Masiwi nake ti lalape moloi

naxon he tinulaha. Tuahe tin laha kum
nam tahane lialui woulaha ma laha tale
tutuen tehitolaha hani Haeu.

¹² Ti tel engel liai tihiva lohe tehu
kapieun haniwa tehu kan axan Epratis, i
nun paxe apesenai aweisali tesol masiwi
ti angiba. ¹³ Muhin nga ningahi tolu spirit
lialun lato tanome kek tenen lalap. Lato
tit ahuhutama he awe tok loloma lalap, tok
manihuh tumun kalimen ma tok unauan
pupuas hahitakan, totok i sohotule leili
hepekeun. ¹⁴ Tetesol spirit ien lawe lato
ailele waliko tenen lalap ti neini hakalalai
seilon ape lato lua hani tesol tesol apuhiniai
teka masiwi ti lawe xux ti tehu hilehile. I
sohot ti ngain lalap ti Haeu tel pohen tapein
ti i hiniti lawe seilon.

¹⁵ Tataen ien Jises tel Masiwi kak ukek,

"Hong matainiwa! Tahiaiak seilon kum
amemene masin tel seilon ti xuxuina!
Amuam hani teteka lawe taun laha mon
atetengi tahiaiak. Laha masin tel seilon
tenen puxuaun mewenae apesenan lehe
i kum tunahi hienain ti uke na laha Paxai
i makahul."

¹⁶ Ape tetesol spirit lialun apuhini teka
masiwi kane tehu hilehile hani tesol ti
kakai Hibru laha axai *Amagedon*.

¹⁷ Ti tel engel tapeinan tihiva lohe tehu
kapieun haniwa he maun, tenen kinax lalap
wixima ti tehu totoan tuah ti Haeu leili
Ingan. I ukek, "Ape i tilawen." ¹⁸ Tataen
ien usil repaxep, muhuhui kuhuh i tonuton
hahawane ma xux nuea eliel. Lalape tehu
nueai xux ien i tai sosohot lilian ti uli
seilon nakuama. ¹⁹ Teka taon ti lawe xux
manan. Babilon tehu taon lalap, i kelia
uke he tolunon. Haeu tai maluhe lialui
woi teka Babilon ape i hani laha an wakin
ti kolai lalape lengean. ²⁰ Ape lawe xux ti
itax hutoma kaluta ma lawe maunten matit
manah. ²¹ Lalape puli akah putalih he maun
tuuhuke pexi teka seilon. Tesol puli akah ien
pate waiwain a kawate tehu tehu i mei kewa
sai 50 kilo. Ape ti lalape lialui kawatan ien,
teka seilon to kak sasaxuti Haeu.

17

*Tel hehin ma totok manihuh tumun kali-
men ti i ahutama itax*

¹ Imuh, tel ti tepanim huuha engel lato
ti tepanim huuha kapi, i nahih hani kapik
ape i ukek, "Kahitima nga. Nga kola hani o
sale Haeu axi kawatan hani tel hehin axan
lalap ti ailele saun lialun i tu kikilami tehu
taon lalap xohixohin kapi tesol kan tenen i

kikiliwau.² Teka masiwi ti xux texux texux laha akati tel hehin ien ailei lawe waliko ti Haeu watakai. Ape teka seilon liai ti tehu pon ie laha hana hatapo tupualaha ailei saun lialun ien nake ti xoxoi isiai pahalaha.”

³ Muhin tel engel kapiti namilok lehe nga ningahi waliko ti i sosohot he lo-hong. Ti ien tel hehin heihoi tok manihuh kakan tumun kalimen, totok i ahutama itax. Patun tepanim huohu ma huopanim sulaun. Hatehu tupuan hina ax taian tenen i sosoxeni Haeu.⁴ Tel hehin pupuxui puxus tenen kakai xewan ma kakai ati polun. Paxai-an solian wanen. He tinun hina pis ani gol ma hat tenen pate tuah. I akekeni tehu kapi ani gol tuahle leilon xuhai waliko pate lialun masin waliko tenen kohan. I kola lalape lialui woi tel hehin ien.⁵ He kawan hina kakain i kikilami lialui pupuasan, i ukek,

“Nga se Babilon tehu taon lalap.

Nga tel tini teka weli ailei saun lialun ma lawe waliko ti Haeu watakai hawane seilon aile.”

⁶Tel hehin ien amuke hawane ti laha telei teka seilon ti Haeu, teteka lato tu xoxox ti usiai woi Jises. Paxai-ai tel hehin masin tel seilon ti i un taxitaxiawen. Nga ong mama-ta hawane ti nga ningahiwa saun tenen ien.

⁷ Tel engel kakane nga ukek, “Kum nam tataxini. Nga kaxi haxewa hani o sale pupuase tel hehin ma tok manihuh i heihon, totok patun tepanim huohu a huopanim sulaun.⁸ Tok manihuh tumun kalimen ien ti o ningahia, i kumahé moi-hin aope ie. Ti imat i moihin ape imuh tin i moih alia. I sohotule leili tewau wal pate walawalan wanen. Tuahé ti tapeinan Haeu telei tamusuke i. Kilan seilon laha ongake hawane taen ti laha paxaiwa tok manihuh ien. Laha se teteka seilon Haeu kum tai kongini axalahá lílian ti tonomiai lawe waliko lehe laha kum uke tonain kapin ti tap tahi tapoan. Laha ongake hawane nake kemuk tok manihuh ien moihin, muhin i mat ape i moih alia uleawen.

⁹“Mewenae seilon aneso i xeu sale tete-nen ie. Tesol tepanim huohu pati tok mani-huh ien i kikilami tepanim huohu maun-ten ti tehu taon lalap, tetesol ti tel hehin neneini seilon. Tetesol patun tin i kikilami tepanim hua masiwi.¹⁰ Tepanim ti lato laha hatapo-en ti masiwi, tel toto tutuen masiwi ma tel ulea i po sohot masiwi tuahé nenein tetan teik kukunun.¹¹ Totok manihuh ke-muk i moihin tuahé aope i maten, i tin

se masiwi masin tepanim huuah liai ape imuh i to ulea masiwi. Tuahé ti tapeinan Haeu telei tamusuke i.¹² Tesol huopanim sulaun o ningahia, i kikilami huopanim masiwi tuahé lato tai hutui nenein ti lato. Taen ti lato ukewa tonain ti masiwi, nenein ti lato kapi tok manihuh tumun kalimen tuahé ti teik taun kukunun.¹³ Lato neneini seilon hetekie namil teikawé ma lato hong usi hawane tok manihuh tumun kalimen.¹⁴ Lato hil pahoi tok sipsip uluha tuahé tok sipsip hetekie teka seilon tetan, teteka unauan wanen ti i kilamiwen, lato waxaini tetesol masiwi ien ma tok manihuh tumun kalimen. Lato waxaini tehu hile nake tok sipsip uluha i se Masiwi ti lawe masiwi, i Masiwi tapein ti neiniae lawe masiwi.”

¹⁵Tin tel engel kakane nga ukek, “Tetesol kan ti tel hehin ailei saun lialun toto, i kikilami seilon ti lawe xux kakaialaha tenen tenen.¹⁶ Tok manihuh tumun kalimen ma tetesol masiwi ti teku sula tu kikilami, imuh lato watakai ma pahoxai tel hehin ailei saun lialun. Lato waxi lungéi hatapo soxian ape i makahul wanen ti lawe waliko. Lato aile halialu tamusuke i masin na oha nimai anan. Ape lato towi i hani he ah.¹⁷ I sohot ukek usiwa namili Haeu. I hani tok manihuh tumun kalimen to masiwi atengi tataen hatesol kakaian sohot ponowiwa.¹⁸ Tel hehin o ningahia i tu kikilami teteka ti tehu taon lalap laha neneini teka masiwi ti tehu pon ie.”

18

Sale mananai Babilon

¹Muhin nga ningahia tel engel liai momo-sulih tone Haeu. I pate pohen ma lalape xewaian haxewa hawane tehu pon itan ie.² I ausini eliel hawane,

“Babilon tehu taon lalap i manan lialuen. Malehe ape lialui teka seilon ti Babilon!

Tehu taon ien sohot tetesol ti kilai spirit lialun
ma manixux tupuxa tetenen hahalin ti seilon ani ingai.

³Teka Babilon neini hakalala seilon ti xux texux texux
usiai kilai lialui woulato.

Ape laha hani hatapo tupualaha ailei saun lialun ien

nake ti xoxoi isiai pahalaha.

Teka masiwi ti xux texux texux laha akati teka Babilon
ailei lawe waliko ti Haeu watakai.

Ape teka hangainiai soxi uke hakila hawane moni
ti hamasamas ti teka Babilon.”
⁴Muhin nga hong tenen kinax liai luainima tone Haeu, i ukek,
“Teka seilon ti Haeu, ahuta saliliwa Babilon lehe amuto kum tuai lato ailei saun liaulun
ma amuto kum uke kawatan ti lehe Haeu axi lato.
⁵Ti husele lialui woulato i hamanomano loi Haeu
ape i kum paxai lioi tenen saun ti lato ien.
⁶Haeu, o aliake haniwa lato masin ti lato aile haniwen teka seilon liai.
Haniwa lato kawatan uke he huohu ti waliko lialun lato aile haniwen laha.
Haniwa lato an wakin tenen poxan i xoini ti lato haniwen seilon liai.
⁷Axiwa lato moloan lalap ma aile hatahaneawa lato
lapan masin wanen ti lato sameni ali-ake lato
ma amumuke soliai totonalato.
Lato hanasanus ukek ka lato to masiwi ma tatahan kum tunahi lato hanowi teka seilon axoalahma matewen.
⁸Aile ape Haeu axi hulutini lato kawatan, tenen masin matemate, tatahan ma hitolo.
Ape Babilon i lua he ah atengi tataen tuahe palong.
I sohot ukek nake Haeu tel sulualato se Masiwi tapein.”
⁹“Tetesol masiwi ti pon itan ie lato tuaiteka Babilon ailei saun lialun ma amumuke soliai totonalato, lato tang tahane Babilon ti lato ningahi axui ah tule ti i lulua.¹⁰Lato tu siasia nake sale lalape moloan ti teka Babilon uke, i hamatau lato. Lato eseini ukek,
“Malehe ape lialui teka Babilon!
I tehu taon axan lalap tuahe ti teik taun pate kukunun ape lato kewen kawatan.”
¹¹“Teka hangainiai soxi ti tesol tesol laha tang tahane nake tap ulea seilon kahuiwai sozialaha.¹²Tap wanen seilon kahuiwai waliko tenen masin gol, silva, hat tuah, maia pate solian wexoan tenen tenen, pata tuah tenen poun solian ma waliko tenen laha tanomi ani nisi elefen, samen, pata tenen kahun lalap, brons ma pot tenen pate solian.¹³Kemuk lato hahangaini waliko ti hanamui an, tesol waliko poun solian masin

sanda, mer ma frankinsens, waen, wel, palawa ti an, komem, bulmakau, sipsip, hos ma karis. Lato hangaini hehetekie tataen seilon.

¹⁴“Aope ie laha kakane teka Babilon, ‘Hatesol waliko solian ti lomuto al ape i tapo tamusuen. Lawe kilai soxihamuto tenen tuah ma kahun lalap ape i tapo kalutawen. Amuto kum pon uke aliakean.’

¹⁵“Ape teteka seilon totonalato soli ti hangainiai soxi hani teka Babilon, lato tu siasia nake sale lalape kawatan ti teka Babilon i hamatau lato. Lato tang tahane ukek,

¹⁶“Malehe ape lialui teka Babilon!
Kemuk i tehu taon axan lalap.

Soliai tanoman masin tel hehin i pupuxui maia wexowexon tenen kahun lalap ma pis tenen i kamakam ma hat pate tuah.

¹⁷Tuahe ti teik taun pate kukunun laha hamanañha hatapo kilai soxihamuto!”

“Hatesol huniwai waian, teka mahoh, teka kukuoxi laha ma teka laha waxeni totonalaha puasain ti itax, tin laha tu siasia.

¹⁸Ti laha ningahiwa axui ah tule ti Babilon lulua, laha kak tang eliliel ukek, ‘Tap tehu taon soliaian tetehu ie lilian ti imat hanima aope.’¹⁹Laha towi pekeun hani he patuhala kolai lalape tatahan. Laha tang kakak tutuen ukek,

“Malehe ape lialui teka Babilon!
Kemuk i tehu taon axan lalap.

Teka huniwai waian lawe uke halapa moni ti hangaini hanialato soxi.

Tuahe ti teik taun kukunun laha hamanañha kalutini hatehu taon.”

²⁰Ape tenen kinax ti tone Haeu kak tatale ukek,

“Amuto teka ti tone Haeu, amuamua.

Teka kuluiai kakaian, teka aposel ma teka seilon ti Haeu liai, amukewa waliko tetenen ien.

Haeu ape i kahui aliake hani teka Babilon lawe waliko lialun lato aile haniwen amuto.”

²¹Muhin nga ningahi tel engel pate pothen akeni lauti tehu pot lalap pate kawatan. I hok towi hani itax ape i ukek, “Xoxoi tehu hokahoka ie pate masin ti

Haeu hamanañha hawane Babilon ape kaha kum ningahi ulea tehu taon ien.

²² Tap kaha po hong ulea tangiai kita,
kawakau,
suhusuh ma seilon pakupak.
Puasain ti tanomiai waliko ma apeseniai an,
tin tap i po sohot ulea.
²³ Hatehu Babilon to leili tilokoan
nake tap tenen i hahaxewa leilon.
Tap amamuam tenen masin ti salasala
i po sohot ulea ien.
Haeu hani tesol kawatan ien
nake teka hangainiai soxi leili Babilon
laha uke ax lalap
ti mongohe hamasamas ti teka seilon
ti Babilon.
Tin kilan teka Babilon lato ailele saun ti
pipis
ape lato neini hakalala teka seilon ti
xux texux texux.
²⁴ Teka Babilon kau kawatan tenen ien
nake lato sa ti teleiai teka kuluiiai kakai
Haeu
ma teka seilon ti Haeu liai ti xux texux
texux."

19

Kakain ti sameniai Haeu

¹ Muhin nga hong masin kinaxe seilon
kilan ti tesol tone Haeu lato kak eliel ukek,
"Kako haxawawa axe Haeu!"
I tel Masiwi ti kaha, tel awaikaha pate
pohen
ma solian tapein.
² Paxai kolongenian tetan ti woi seilon
se salan ma sawisawin.
I axi hawane kawatan hani Babilon
nake laha masin tel hehin weli ailei
saun lialun.
Laha neini hakalala kilan seilon ti ailei wa-
liko
ti Haeu watakai.
I kahui aliakte hani laha nake laha telei teka
unauan."
³ Lato tilol tuhituhi ukek,
"Kako sameniawa Haeu!"
Babilon i lulua nake ti lialui woulaha.
Kawatan ien tap tahi tapoan."
⁴ Tetesol 24 masiwi ma tetesol hinalo
seilon, lato lokuba lakua hani itan lotuiai
Haeu ti i toto he tehu tonain tuah. Lato kak
eliel ukek,
"Salan wanen. Kako haxawawa axe Haeu!"
⁵ Ape tenen kinax ahuma ti tehu tonain
tuah ti tone Haeu, i ukek,
"Hatesol unaui Haeu,
teteka axamuto lalap ma teteka tap
axamuto,
amuto teteka hina lomuto ti Haeu,

sameniwa i."

⁶ Muhin nga hong ulea masin kinaxe
seilon kilan. Tangian masin tangiai tainiai
mau ma tonui kuhuh. Lato tilol eliel ukek,
"Kako haxawawa Haeu!"

I tel Masiwi ti kako pohen tapein,
i neini lawe waliko.

⁷ Kako mal amuam hawanewa ma
haxawawa lalape axan!
Tehu ngain lalap ti salai tok sipsip uluha i
tahiawen.

Ape tel hehin lehe i uke axoan apeas ten-
geniwen i.

Tel hehin ien tu kikilami hatesol seilon
laha soh ti Jises Krais.

⁸ I pupuxui maia solian tenen pate papax-
axun
ma i talehaleh."

Puxuaun ien i kikilami soliai woi seilon
ti Haeu.

⁹ Ape tel engel kakane nga, "Taiwa tete-
nen, 'Haeu amumuke teka i ilowi hani tehu
angiaiin lalap ti salai tok sipsip uluha.' Tin
i ukek, 'Tesol kakain ien se kakain salan i
ahuma ti Haeu."

¹⁰ Ti nga hongoa, nga lokuba lakua hani
itan lotuian tuahae i kakane nga, "Kum ailele
ukek ien! Haeu tetel ala o lotui. Nga tuahae
unaui Haeu masin o ma teka akikikalbu ti
Krais, teteka laha tu xoxox usiai kakain
salan tetan. Na seilon hong auni tenen
kakain ien, lawe waliko ti laha kaxi ahuhuti
se kakain salan i ahuma ti Haeu."

Tel seilon kiliwakei tok hos papaxaxun

¹¹ Muhin maun aheah i hea ape nga
ningahi tok hos papaxaxun ti tone Haeu.
Tel kiliwakean axan Namil Xooan ma
Salan. Paxai kolongenian tetan ti woi seilon
ma hilehile tetan pahoiai teka watakai,
se sawisawin. ¹² Pulan kamakam hanowu
xekei ah ma kilan tah ani gol he patun.
Tenen ax taian he tinun tuahae tap tel i
tioi salangawan, mewenae i. ¹³ I pupuxui
puxux weluwelun a pate kaka. Axan liai
tenen Kakai Haeu. ¹⁴ Teka seilon ti hile ti
tone Haeu kakahiti i. Tin lato kikiliwake
hos papaxaxun. Lato pupuxui maia solian
pate papaxaxun tenen i talehaleh. ¹⁵ He awe
tel neinilato tea ngol ahutama pate ang-
gian i uke ti lehe i waxaini teka watakai.
Nenein tetan hani laha pate ahian. Ti kolai
lalape lengei Haeu i aile halialu laha masin
tel i towi huai greip hani leili teik pipisih
ape pexi hunui kanun. ¹⁶ He tehu puxuaun
ma he kasope aen tenen taian ukek:

Tel Masiwi ti lawe masiwi.

Tel Masiwi tapein neiniai lawe masiwi.

¹⁷ Ape nga ningahi tel engel tutu he alon. I tilol hani teka manixux tenen analaha xixioi teka maten, i ukek, "Ngong apuhama ti tehu angiaian lalap ti Haeu apepeseni." ¹⁸ Ngongoma ani xixioi masiwi ti xux, masiwi ti teka seilon ti hile, teka hahitakalaha, xixioi hos ma teka kiliwakealaaha ma xixioi lawe seilon, teka unaui seilon ma teka kumahe unaui seilon, teka axalahaa lalap ma teka tap axalahaa."

¹⁹ Ape nga ningahi tok manihuh tenen tumun pate kalimen i ahutawen ti itax ma teka masiwi ti xux hetekie teka seilon ti hile laha apupuha ti hilelai tel seilon kiliwakei tok hos ma teka seilon tetan ti hile. ²⁰ Tuah tel seilon ien pohi kongini tok manihuh ien hetekie tok manihuh i sohotule leili hepkeun, totok kemuk i aile hasohotu waliko tenen lalap hahitake axe totok manihuh i ahutama itax. Tesol waliko lalap ien i aile ti neini hakalalai seilon, teteke laha uke teik kikilam ti tok manihuh i ahutama itax ma laha lolotui hosaua. Ape atti lalu laha towi hahamoiba hani he ah ti hina salfa, waliko tenen poun i telei seilon. ²¹ Hatesol seilon ti lalu ti hile, tel kiliwakei hos uke tea ngol weluwelun i ahutama he awan telei hatapoalato. Ape teka manixux ang xuh hawane xixiolaha.

20

Satan xinoti konginan ti 1,000 ahang

¹ Imuh nga ningahi tel engel mosulih ti tone Haeu, tetel Haeu sowini haniwen i heiai mate tewau wal pate walawalan wanen. I akekeni teik sen samen. ² Ape i pohi xinoti tok loloma lalap. I se Satan, tetel hoi i pupuas ti imat wanen, lokon ti i tanoma hanowi weiko. ³ Tel engel towi xoini i hani leili tewau wal pate walawalan lehe i kum pon puluti ulea teka seilon. Tel engel matai kongini tewau wal ape i hana teik papakat ti kolaian ka tap tel seilon pon heian. Satan to leilon ahang 1,000 ape muhin tel engel oxoxi i ti teik taun kukanun.

⁴ Ape nga ningahi tesol totoan tuah. Teka seilon toto ien Haeu hana lato masiwi ti hinitiai seilon. Nga paxai tioi ka lato tetesol kemuk laha telei nake lato tu xoxox kahikahi Krais ma kaxi ahuhuti kakai Haeu. Lato tai lotui totok manihuh i ahutama itax ma na hosaua. Tin lato tai uke kikilam tetan he kawalato ma na he minalato. Lato moih alia ape lato sohot masiwi neiniai

seilon kapi Krais ti 1,000 ahang. ⁵ Ien se uli moihai seilon. Teka maten liai laha kum xahat atengi tataen 1,000 ahang tamusua. ⁶ Amuam lalap hani tetesol unaui Haeu lato moih aliamu imat. Tenen kawatan ti luai leili ah ti tap tahi pehoan i kum tunahi lato. Lato aile hatapo waliko ti Haeu ma Krais kilami haniwen lato ma aweisalulato hani Haeu mewenae hean. Ape lato neini seilon kapi Krais ti 1,000 ahang.

Tapoi Satan

⁷ Ti 1,000 ahang tamusua, tel engel oxoxi Satan ti tewau wal pate walawalan. ⁸ Ape Satan puluti tatale teka seilon ti lawe xux. Laha axai teka seilon ien Gog ma Magog. I apuhini apeseni laha ti tehu hilehile lalap. Kilaialaha masin puli hepekeun, kaha kum wexe uke. ⁹ Laha luama tesol tesol kaliniai tehu taon Haeu wahleni, tetehu ti teka seilon tetan toto. Tuah ah ahulih ti tone Haeu ape i lui telei laha.

¹⁰ Ape laha towi xoini Satan tel pulutiai seilon hani leili ah ti hina salfa, waliko tenen poun i telei seilon. Ien tetesol ti laha towiwen totok manihuh i ahutama itax ma totok manihuh i sohotule leili hepkeun. Ape lawe ngaini ma ipong lato lamani moloan tenen tap tahi tapoan.

Taun ti Haeu hiniti seilon

¹¹ Muhin nga ningahi Haeu toto he tehu totoan pate tuah a papaxaxun. Ti lehe i hiniti seilon, ape tehu pon itan ma maun aheah i man kaluta huluta lian tehue. ¹² Nga ningahi teka laha matewen, teteke axalahaa lalap ma teka tap axalahaa, laha tutu mateiwal tehu totoan tuah. Ape teka engel hei tesol pepa hina woi hatesol seilon. Muhin lato hei teik pepa liai hina axe teka seilon ukei tonain kapi Haeu ti tap tahi tapoan. Ape Haeu hiniti hatesol seilon usiwa saun ti laha ailewen, taian leili tesol pepa ien.

¹³ Hatesol seilon ti laha matewen, laha tu hahitake hinitian ti Haeu, teteke laha mat ti itax, teka li leili amal ma teteka ti tesol Hades, tetesol tone teka maten. Tel tel ti laha Haeu paxai kolongeni woulaha ape axi kahulaha usiwa waliko ti laha ailewen.

¹⁴ Ape Haeu aile halialu tamusuke pohe matemate ma tesol tone teka maten. Teka ti Haeu paxai ukek laha seilon pate lialun, laha kau kawatan leili ah ti tap tahi pehoan.

¹⁵ Hatesol seilon ti tap axalahaa leili teik pepa ukei tonain kapi Haeu ti tap tahi tapoan, i towi laha hani tehot ah ien.

21

Tehu Jerusalem haun

¹ Muhi Haeu hiniti kewa seilon, nga ningahi maun aheah ma tehu pon itan haun nake ti imat ati lalu kalutawen hetekie lawe kanitax. ² Ape nga ningahi tehu taon ti Haeu, i ape tehu Jerusalem haun. I mosulih ti tone Haeu. Soliai tanoman masin tel hehin i apepeas ti tehu salaian.

³ Ape tenen kinax ahuma ti tehu totoan tuah ti tone Haeu, i kak eliel ukek, "Hongoa! Tataen ie ahua, Haeu aile tonan kapi tekaseilon tetan ape i to hamalum kapi laha. I neini laha ape laha pakata xox kapin.

⁴ Ape tatahan kum hatangi ulei laha nake Haeu xaxaweni hatapo lawe kawatan. Tap matemate, tap tatahan, tap tangitangi ma tap moloan ulea nake sale totone seilon ti imat ape i tamusuen."

⁵ Ape tetel i toto he tehu totoan tuah ukek, "Nga aile sohi hauni hahatapo lawe waliko." I kakane nga, "Taiwa tesol kakain ien nake se salan ma pon hawane ti seilon soh."

⁶ Tin i kakane nga ukek, "Ape i tilawen. Nga se Alfa ma Omega, tetel imat ma tetel tapeinan, tetel ti hutuiai ma tiliai lawe waliko. Tel na pahan is hawane nga tel ngahatian, ti soliai ongak nga aile hasolia totoran. Ien masin na tel seilon kinawen paxepaxen ti tel seilon liai neini axi hakila unuman kan ape timun i xux. ⁷ Tesol soliai waliko ien ukean teka laha waxaini salinai totohong ma saun lialun. Teteka seilon ien, nga ngahati hahawane ape laha sohot natuk wanen.

⁸ "Tuahe teka laha mamata ailei pupuasak, teka laha tale tehitolaha hani nga, teka laha to ailele waliko tenen ti hahien, teka teleiai seilon, teka ailei saun lialun ti wawan hehin, teka laha hapuasa apelaha hiliasi seilon, teka laha lotui waliko liai kumaha Haeu ma teka seilon ti puputa, laha hatesol kane ah ti hina salfa, waliko tenen poun i telei seilon. Pate tap tahi tapoi kauai kawatan ien."

⁹ Muhin tel ti tesol tepanim huuah engel lato hina tepanim huohu kapi xuhai tepanim huohu tapeini kawatan, i kakane nga ukek, "Kahitima nga lehe nga kola hani o tehu Jerusalem haun, i kikilami tel hehin i apepeas ti sal hani tok sipsip uluha."

¹⁰ Tataen ien Holi Spirit kapiti namilok ape tel engel neini nga hani he tehu maunten patul wanen. I kola hani nga Jerusalem,

tehu taon ti Haeu, i mosulih tesol tonan.

¹¹ I xuhai xewai Haeu. I talehaleh masin tehu hat tuah ma talepaian hanowi na alon hokai kanitax. ¹² I hina titieh pate xawaxawan ma tiatian ani pot hetekie huopanim huowau aweing. Ti tewau tewau, tel engel petenian. He kahip ti tesol aweing ien hina axe huopanim huosol nenex ti teka seilon ti Israel. ¹³ Toluwau aweing lato sai angiba, toluwau sai tola, toluwau sai haiup ma toluwau sai ahang. ¹⁴ Titieh ti tehu taon, laha atai patul he huopanim huohu pot Lalap. Tehu tehu pot hina axe tel tel ti tesol aposel ti tok sipsip uluha.

¹⁵ Tel engel i kaakane nga i akekeni teik pata ani gol ti kolongenai lape tehu taon, tehu tiehan ma aweingun. ¹⁶ Hahinalopaun ti tehu taon welualato se tenenawé. Weluan tin masin tiaun. Ti tel engel kolongenawa lapan, i tunahi ka weluan sai 2,220 kilomita. Tiaun ma xawaian lapan tin masin weluan. ¹⁷ Tin i kolongeni lape tehu tiehan ape i tunahi ka xawaian sai 66 mita. I usi aliake sale kolongenian ti teka seilon ti lokon ien.

¹⁸ Tehu tiehan laha uke ataian tenen pot tuah axan jaspa ma hatehu taon laha uke ataian ma tanomian gol tenen pate xewan masin malewai kalas haun. ¹⁹ Tesol huopanim huohu pot Lalap tutuhi tehu titieh ti tehu taon, ti hasoliai tanome tehu tehu laha uke pot tuah tenen tenen. Axe tesol pot tuah ien se jaspa, saparia, agate, emerald, ²⁰ oniks, karnelian, krisolit, beril, topas, krisopras, jasint ma ametist.

²¹ Tesol huopanim huowau aweingi tehu taon laha uke tanomian hat tenen pate tuah a Lalap. Lalape tehu ti tesol hat ien i pon tanomiai tewau ti tesol aweing. Hatesol aweisal leili tehu taon se ani gol, xewaian masin malewai kalas haun.

²² Nga tai ningah tunah tehu na ingi lotuleili tehu taon ien nake Haeu tel Masiwi pohen tapein ma tok sipsip uluha lalu se ien ti lehe seilon lotui. ²³ Leili taon tap pupuase alon ma pangapang haxewaian nake xewai Haeu i haxewa hawane ien ma tok sipsip uluha se masin xewai alon i haxewa lawe waliko. ²⁴ Teka seilon ti xux texux texux laha waxa ti xewaialalu ma teka masiwi tenen tenen laha kau kilan soliai soxialaha hani leili tehu taon ma sameni hahawane Haeu. ²⁵ Tap tahi konginai tesol aweingi tehu taon nake tap ipongoan. ²⁶ Hatesol seilon ti tehu pon itan tin laha kau kilan

soliai soxialaha ma laha haxawa axe Haeu ma tehu taon tetan.²⁷ Hatesol waliko lialun se hahalin leili tehu taon ien. Tap tel ailei waliko tenen ti hahien ma puputa pon soh hani leilon, mewenae teteka seilon axalaha taian leili teik pepai tok sipsip uluha ti ukei tonain kapi Haeu ti tap tahi tapoan.

22

Tehu kan tuah i kikilami tonain kapi Haeu

¹ Imuh tel engel kola hani nga tehu kan i xiwewema ti tehu totoan tuah ti Haeu ma tok sipsip uluha. I pate xewan ma i talepalep. I se tehu kan tuah i kikilami tonain kapi Haeu ti tap tahi tapoan.² I kikiliwau patalal ti tewau aweisal lalap ti tehu taon ti Haeu. Pape tehu kan hahu-paun hina pata tenen i waxeni haweluvelu totone seilon. Lawe i hua tapai pangapang tehu tehu, a kaun haewia seilon hanowi ti marasin.

³ Tap tenen na waliko ti Haeu watakai i po to leili tehu taon. Tehu totoan tuah ti Haeu ma tok sipsip uluha ien ape teka unaui Haeu sasameni i. ⁴Hina axan taian he kawalato ape tataen ien lato pon paxaiai Haeu. ⁵Tap wanen ipong leili tehu taon, Lato kum hapuasa tenen na kamaialato. Tin tap pupuase kamai alon nake puki Haeu tel Masiwi se haxewaialato. Ape nenein ti lato tap tahi tapoan.

⁶ Muhiin tel engel kakane nga ukek, "Hatesol kakain ie salan wanen. Pon hawane lawe seilon soh. Haeu tel Masiwi, tel i hanamiloa teka kuluiai kakaian, i taloma tel engel tetan kaxi haniai teka unauan waliko ti lehe i sohot."

Jises tahiaian ape i xohiwen

⁷ Jises ukek, "Hongoal! Tahiaiak kapimuto i xohi hawanewen. Haeu amuke teteka laha hong tamani kakain taian leili teik pepa ie ti i kakaxi waliko ti i sohot imuh."

⁸ Nga Jon, nga hong ma ningahi tesol waliko ien. Ti nga hong ma paxai kewa, nga lokuha lakua hani itan lotuiai tel engel i kola hani nga tesol waliko ien. ⁹Tuahe i kakane nga, "Kum ailele ukek ien. Haeu tetel ala o lotu. Nga tuahe unauan masin o hetekie teka tuaum kuluiai kakaian ma teka laha hong tamani kakain taian leili teik pepa ie."

¹⁰ Ape i kak ulek ukek, "Kum pupuluhini meng ti he teik pepa ie nake taun ape i xohiwen ti lawe waliko ti i kakaxi i sohot.¹¹ Imat

ti tahiai Jises, teka seilon woulaha lialun laha aile aheheke saun lialun. Teteka ailei waliko ti hahien laha sohot lialu hawane. Teka seilon solian laha soli aheahewa. Ape teka laha hana hatapo tupualaha ailei puase Haeu laha xox ahe tatale."

¹² Jises ukek, "Hongoal! Tahiaiak kapimuto i xohi hawanewen. Nga kahui hapoponowi hani amuto usiwa waliko ti amuto ailewen.¹³ Nga se Alfa ma Omega, tetel imat ma tetel tapeinan, tetel ti hutuiai ma tiliai lawe waliko."

¹⁴ Haeu amuke teka seilon laha hong tamani nauna tetan. Teteka ien Haeu sowini hani laha soh hani leili taon tetan ma aniai huai pata tenen i waxeni haweluvelu totonalaha.¹⁵ Melal ti tehu taon ti Haeu, teka seilon pate lialun wanen, teteka laha hapuasa apelaha hiliae seilon, teka ailei saun lialun ti wawan hehin, teka teleiai seilon, teka laha lotui waliko ti kumahe Haeu ma teka laha wangiti saun ti puputa.

¹⁶ Ape Jises kak ulek ukek, "Nga talo tel engel hahitake axak kaxi ahutiai tesol waliko leili teik pepa ie lehe hatesol kahikahik laha tioi hawane. Nga kahi nati David tel Masiwi, nga nakuama tetan. Nga masin tehu kohot towisaian pate xewan."

¹⁷ Ape Holi Spirit ma teka seilon ti Haeu ukek, "Nahima!" Lawe seilon laha hong soh kakain leili teik pepa ie, tin laha ukek, "Nahima!" Tel na pahan is hawane Haeu tel ngahatian, nahima ape ti soliai ongan i aile hasolia totone tel seilon ien. Ien masin na tel seilon kinawen paxepaxen ti tel seilon liai neimi axi hakila unuman kan ape tinun xux.¹⁸ Nga Jon, nga hahongo hawane tel tel ti teka laha ridai kakain taian leili teik pepa ie. Na tel i hasea meng liai tenen ti leili teik pepa ie, tin Haeu axi hasea i kawatan ti teik pepa ie kakaxi.¹⁹ Ape tel na i hataea tuahe tenen na meng leili teik pepa ie, Haeu kapitini tetan lawe waliko solian ti teik pepa ie kakaxi. Na masin ien, Haeu kum sowini hani i soh hani leili tehu taon tetan ma aniai huai pata tenen i waxeni haweluvelu totone seilon.

²⁰ Jises, tel i ukek ka hatesol kakain leili teik pepa ie se salan, i kak ukek, "Salan, tahiaiak pate ape i xohiwen!"

Jises tel Masiwi, lua hanima kapimite!

²¹ Lalape soliai Jises tel Masiwi haniwa amuto teka seilon ti Haeu. Salan wanen.

Holi Spirit

Kakain ti sale waliko tenen
tenen leili pepai Haeu

Angiain ti nameniai matei Jises Krais

1 Kor 10:14-221 | Kor 11:17-34

Baptais

Mt 28:18-20	Apo 8:12, 36-38	Apo 19:1-7	Jn 3:16-21; Jn 7:13-17; Jn 14:15-17	Apo 15:28	Gal 3:2-5	1 Pi 1:2;
Jn 3:22	Apo 10:44-48	Apo 22:12-16	Jn 7:13-17; Jn 22:19-22	Apo 16:7-10	Gal 4:6	2 Pi 1:20
Jn 4:1-2	Apo 16:14-15	Rom 6:1-4	Jn 14:15-17	Apo 19:1-7	Gal 5:16-18	1 Jn 2:20
Apo 2:37-42	Apo 16:31-33	Gal 3:26-27	Jn 14:26	Rom 5:5	Gal 5:22-25	1 Jn 3:24
			Jn 15:26	Rom 7:6	Epe 1:13-14, 17	1 Jn 4:13
			In 16:7-15	Rom 8:9-16	Epe 3:16	1 Jn 5:6

Haeu

Hong tamaniai Haeu

Mk 10:27	Apo 17:22-31	1 Ti 6:15-161	Jn 4:7-12				
Mk 12:29-30	Rom 1:18-23	Hib 4:13 Joh 14:15, 21	Jn 4:16 15:10-17	1 Pi 1:14-16	1 Jn 3:22-24		
Lk 1:37	Rom 11:33-36	Hib 10:30 14:23-24 Jud 1:13	Jn 15:13-8-10	1 Jn 2:3-8	2 Jn 5-6		
Lk 6:35-361 Kor 8:4-6	Jms 1:17	HH 4:8-11					
Jn 4:242	Kor 1:3	1 Pi 1:14-17	HH 15:3-4				
Apo 14:14-17	1 Ti 1:17	1 Jn 1:5	Huatai seilon liat				

Haeu hanonoakaha

<i>Haeu haponoakaha</i>	Mt 6:1-4	Lk 6:38	2 Kor 9:1-15	Hib 13:1-3
	Mt 7:12	Apo 11:27-30	Gal 6:9-10	Jms 1:27
	Mt 25:31-46	1 Kor 10:24	Pil 4:14-19	Jms 2:15-17
Mt 6:25-34	Apo 14:15-17	Rom 11:36	Hib 13:10-11	2 Kor 8:1-15
Mt 10:29-31	Rom 8:28	Ko 1:17	Ims 4:13-16	Hib 10:24
				1 Jn 3:16-17

Halinjai an ti hualjai lotu

	Mt 24:29-44	Kol 3:4	2 Te 2:l-4	2 Pi 3:1-13
Mt 6:16-18	Mk 2:18-20	Apo 13:1-3	Apo Jn 12:1-3	1 Te 1:9-10
			Apo 1:10-11	1 Te 3:13
			Apo 3:19-21	1 Te 4:13-5:11
<i>He lilioa</i>			Pil 3:20-21	2 Te 1:6-10

Mt 19:

Mt 19:3-9		Mt 8:1-15	Mt 15:32-38	Lk 5:4-8	Jn 4:46-54
Hinitiai seilon		Mt 8:23-33	Mt 17:14-18	Lk 7:11-15	Jn 5:5-9
		Mt 9:1-7	Mt 20:29-34	Lk 13:10-13	Jn 9:1-7
		Mt 9:18-33	Mt 21:18-22	Lk 14:1-4	Jn 11:11-40
Mt 7:21-23	Apo 17:30-31	1 Kor 4:5	Mt 18:10-17,22	Mk 1:21-28	Lk 17:12-14 Jn 21:4-6
Mt 16:24-27	Rom 2:1-11	2 Kor 5:9-10	Mt 14:15-17,32	Mk 7:32-37	Lk 22:50-51 Apo 2:22
Mt 25:31-46	Rom 14:10-12	2 Te 1:5-10	Mt 15:1-2,5-8	Mk 8:22-25	Jn 2:1-11
Jn 3:18-21	1 Kor 3:10-15	Hib 9:27-28	HH 20:11-15		
Jn 5:24-29				Jises alfa hanitone Haeu	

Kakain ti sale kemulik

Lk 24:50-51	Rom 8:34	Hib 1:3-11	Hib 7:25-26
Apo 1:9-11	Epe 1:20-23	Hib 2:9	Hib 10:12-14
Apo 2:32-36	Pil 2:9-11	Hib 4:14-16	1 pk 3:22 1-19
Apo 5:30-31			Jn 6:11

Epe 5:20	Kol 3:17	1 Ti 2:1
Pil 4:4-7	Kol 4:2	1 Ti 4:4-5
Rom 1:21	Kol 2:7	1 Te 5:18

Jises hanau seilon ma haewia teka tinun

Kau i kawatan nake ti usiai Jises Krais

Mt 4:23-25	Mt 9:35-36	Lk 4:14-44	Apo 10:36-38				
Mt 7:28-29	Mt 11:1-6	Jn 20:30-31	Mt 5:10-12	Rom 8:35-37	2 Kor 12:10	Hib 10:32-33	
			Mk 13:9-13	Rom 12:12-14	Pil 1:28-29	Hib 12:3-4	
			Lk 12:4-9	Rom 12:17-21	2 Te 1:4-8	1 Pi 3:13-14	
			Jn 15:18-21	1 Kor 4:11-13	2 Te 3:2-4	1 Pi 4:12-13	
			Jn 16:1-4	2 Kor 4:8-11	2 Ti 3:10-13	HH 2:10	
Mt 11:27-30	Jn 11:25-27	1 Kor 3:11	Hib 5:14				
Mt 16:13-17	Jn 14:5-11	2 Kor 4:4-6	Hib 7:26-28				
Lk 1:35	Jn 17:1-5	2 Kor 5:21	1 Jn 2:1-2				
Jn 1:1-18	Jn 20:26-31	Gal 4:4-5	Jn 5:20				
Jn 5:19-29	Apo 3:13-16	Pil 2:5-11	HH 1:12-18				
Jn 6:35-40	Apo 4:10-12	Kol 1:15-20	Hib 10:8-12	2 Kor 1:4	Jms 1:2-4	1 Pi 2:19-21	
Jn 8:58	Rom 1:3-4	Kol 2:9-10	Rom 8:28	2 Kor 4:16-18	1 Pi 1:6-9	1 Pi 5:8-10	

Tahi hakeai Jises he kros

Lotu

Lotu ti seilon hani Haeu

Mt 27:32-56	Mk 15:21-41	Lk 23:26-49	Jn 19:17-37				
			Mt 11:25-26	Jn 11:41-42	Rom 10:1-2		
Tel Nati Haeu takahama seilon masin kaha			Mt 14:23	Jn 17:1-26	Rom 15:30-33		
			Mt 19:13-15	Apo 4:24-31	2 Kor 12:7-101 Te 3:9-13		
			Mk 1:35	Apo 16:25	Epe 1:15-20		
Mt 1:18-25	Lk 1:26-38	Jn 1:14	Lk 5:16	Apo 20:36	Epe 3:14-21		
Mt 2:1-23	Lk 2:1-20	Gal 4:4-5	Hib 2:14-16	Apo 21:5	Epe 6:19-20		
			Lk 22:32, 39-46	Rom 1:9-10	Pil 1:3-5, 9-11		

Tihiniae Jises

Nauna ti sale lotu

Mt 27:57-66	Mk 15:42-47	Lk 23:50-56	Jn 19:38-42				
Xahatai Jises ma takean hani teka liai.			Mt 6:5-13	Jn 14:13-14	Pil 4:6-7	Jms 1:5-8	
			Mt 7:7-11	Jn 15:7	Kol 4:2	Jms 4:2-3	
			Mt 18:19-20	Jn 16:23-26	1 Te 5:17	Jms 5:13-14	
			Mk 11:24-25	Rom 8:26-27	1 Ti 2:1-4, 8	1 Pi 4:7	
Mt 28: 1-20	Apo 2:24-32	Apo 13:29-39	Lk 10:1-13 25	Rom 12:12	1 Ti 4:4-5	1 Jn 3:21-24	
Mk 16:1-8	Apo 3:15	Apo 17:2-3	Lk 18:1-8 15:3-8	Eph 2:18	Hib 4:16	1 Jn 5:14-17	
Lk 24:1-49	Apo 4:10, 33	Apo 17:30-31	Lk 24:1-12 15:12-24	Eph 6:18	Hib 10:19-22		
Jn 20:1-21:14	Apo 10:39-43	Rom 1:4	HH 1:18				
Apo 1:3-8							

Lotuia waliko ti kumahe Haeu ma hapuasai pohe Satan ti ailei waliko

Xotiae Jises ma namil ti teleian

Mt 26:47-68	Mk 14:43-65	Lk 22:63-23:25	Mt 4:10	1 Kor 5:11	2 Kor 6:14-18
Mt 27:1-2	Mk 15:1-20	Jn 18:1-14	Apo 18:49-24	1 Kor 6:9-11 Gal 5:19-21	HH 21:8
Mt 27:11-13	Lk 22:47-53		Apo 18:28-39 16:1	1 Kor 8:1-131 Te 1:9-10	HH 22:15

Hahatakei Haeu 22:21

320

Hahatakei Haeu 22:21

*Masiwi ti teka kahikahi Krais
Lokaha hani laha*

*Namil xoxoan ti Jises Krais
Sale xoxoi namil hani Krais ti awaiakaha*

1 Kor 9:14	1 Te 5:12-13	1 Ti 5:17-22	Hilj 13:21-27	Jn 6:47	Apo 4:12	Rom 10:9-10
Gal 6:6			Jn 3:15-18	Jn 14:6	Apo 16:30-31	Gal 2:16

Sale kilamialaha

Sale xoxoi namil hani Krais ti nanahiakaha

Apo 6:1-6	Apo 14:23	1 Ti 3:1-13	Tai 1:5-9
-----------	-----------	-------------	-----------

Waliko ti laha ailewa

Mk 11:22-25	Rom 5:1-2	2 Kor 5:6-7	Jms 1:2-8
Lk 17:5-6	Rom 14:22-23	Gal 5:6	Jms 2:14-20
Jn 14:1	1 Kor 13:13	Hib 11:1-40	1 Pi 1:3-9

Mt 28:18-20	1 Te 2:1-12	2 Ti 2:1-26	Tai 2:7-8
Lk 22:24-27	1 Ti 4:1-16	2 Ti 3:10-4:5	Oxoxiai laian lialun
Apo 20:17-35			Sale Haeu oxoxi kaha ti kawatan ti lialui woukaha

Masiwi ti nahikei xux

Mt 22:15-22	Rom 13:1-7	Tai 3:1	1 Pi 2:13-17	Mt 26:28	Apo 10:43	Kol 1:13-14	Hib 10:17-18
Apo 5:27-29	1 Ti 2:1-4			Mt 11:25-26	Apo 26:18	Kol 2:13-14	1 Jn 1:8-2:2

Matei Jises Krais ti oxoxiakaha ti kawatan ti lialui woukaha lehe kaha sohot seilon haun ti usiai Haeu

Sale oxoxiai seilon liai ti kawatan ti saun lialun laha aile hani kaha

Mt 26:26-29	Rom 5:9-10	Hib 9:11-14	Mt 6:12-15	Mk 11:25	Lk 17:3-4	Epe 4:31-32
Rom 3:25	Epe 1:71	Jn 1:6-7	Mt 18:21-35	Lk 6:37	2 Kor 2:5-11	Kol 3:13

Pepai Haeu

Matemate

Jn 6:39-40	Rom 8:38-39	Pil 1:20-24	Mt 4:1-4	Apo 20:32	1 Te 2:13	1 Pi 1:22-25
Jn 11:17-27	Rom 14:7-9	1 Te 4:13-18	Mt 17:21-24	Rom 15:4	1 Te 4:13	2 Pi 1:19-21
Jn 14:1-4	1 Kor 15:12-58	Hib 2:14-15	Mt 17:21-24	Rom 16:26	2 Ti 3:14-17	2 Jn 9-10
Rom 8:10-11	2 Kor 5:1-10		Mt 17:21-24	Kol 3:16	Hib 4:12	HH 1:3

Meng Solian ti Jises Krais

Sale awaiakaha ti kawatan ti lialui woukaha

Apo 20:24	1 Kor 15:1-7	Pil 1:27	2 Jn 12:16-17	Rom 5:1-11	Epe 2:1-10	1 Ti 2:3-7
Rom 1:2-4	Gal 1:6-12	Kol 1:5-6	2 TAp 28:21-29:39	Rom 10:9-13	1 Ti 1:15-16	1 Pe 1:3-5
Rom 1:16-17	Epe 1:13	1 Te 1:5	2 TAp 28:410-12			
1 Kor 1:17-25			Jn 20:31			

Sale haewai seilon

Moni ma soxi

Mt 6:19-21	Lk 12:32-34	1 Ti 6:6-10	Mt 4:23-25	Apo 8:4-8	1 Kor 12:9	1 Ti 5:23
Mt 6:24-34	Apo 20:35	Hib 13:5-6	Jn 19:35	Apo 19:11-16	1 Kor 12:29-30	2 Ti 4:20
Lk 12:13-21	1 Ti 6:17-19		Jn 19:25	Apo 28:8-9	2 Kor 12:7-10	Jms 5:14

Hahatakei Haeu 22:21

321

Hahatakei Haeu 22:21

Sale hasawiai wasole seilon ma Haeu

Satan

Apo 13:38-39	Rom 3:21-26	Rom 5:18-19	Mt 13:36-37	Jn 8:42-44	Epe 2:2	1 Jn 3:19
Rom 1:16-17	Rom 5:1, 9-10	Gal 2:16	Mt 13:37	2 Kor 2:10-111 Te 2:18	HH 12:7-12	
			Lk 4:1-13	2 Kor 4:4	2 Te 2:9-12	HH 2:1
			Lk 22:3-4	2 Kor 11:13-15	1 Pi 5:8-9	

Sale hukumain ti teka kahikahi Jises Krais

Mt 18:19-20	Rom 12:4-8	Epe 4:11-16	Saun lialun
Apo 2:41-47	Epe 1:22-23	Kol 3:15-17	Hib 10:24-25

Sale sameniaiakaha ma teheni aliakeakaha

Jn 8:7-9	Rom 3:23	Gal 3:22	1 Jn 1:8-10
Rom 3:9-20	Rom 5:12		

Mt 5:3-12	Lk 18:9-14	Pil 2:3-11	Jms 4:5-10
Mt 18:1-5	Epe 4:2	Kol 3:12-13	1 Pi 2:7
Lk 14:7-11			Sale kauai kawatan ti lialui woukaha na namloka ha kumahe xoxoan ti Jises Krais

Sale teka kahikahi Jises

Mt 10:28	Rom 1:18-19	2 Te 1:7-9	1 Pi 4:3-5
Mt 13:41-42	Rom 6:23	Hib 9:27	Jud 7
Jn 3:18-20, 36	Gal 6:7-8	Hib 10:26-31	HH 20:11
Mt 16:13-20	1 Kor 12:12-30	Epe 4:1-16	Apo 17:30-31
Apo 2:41-42	Epe 1:22-23	Kol 1:18	Hib 19:5-10
Rom 12:4-8	Epe 2:19-22	Hib 10:24-25	Sale pupuanan

Sale teka nati Haeu

Jn 1:12-13	Gal 4:6-7	Hib 12:5-11	1 Jn 3:19-21	Rom 1:18-32	Epe 2:1-3	Kol 3:5-10	1 Pi 4:3
Rom 8:14-17				Rom 8:5-8	Epe 5:3-5	Jms 4:17	1 Jn 3:4-5

*Sale totone hahunatun
Akaik*

Mt 5:27-30	1 Kor 5:9-11	Epe 5:3	Hib 13:4
Jn 8:2-11	1 Kor 6:9-20	Kol 3:5-6	Jud 7
Rom 13:8-10	Gal 5:19	1 Te 4:1-8	

Hahunatun

Saun ti teka kahikahi Jises Krais

Mt 19:4-6	Epe 5:21-33	Tai 2:3-5	1 Pi 3:1-7
1 Kor 7:1-16	Kol 3:18-19	Hib 13:4	Jn 14:27

Hehin ti axoalaha matewen

Sulusulu ma hong paxaiai kakain

Apo 6:1	1 Kor 7:39-40	1 Ti 5:3-16	Jms 1:27
Rom 7:2-3			Mt 5:25-26

Mt 5:38-42

Taman tinan

Epe 6:4	Kol 3:21	1 Ti 3:4-5
---------	----------	------------

Tatanomiai Haeu

Wawahen

Mt 19:4	Apo 17:24-26	Kol 1:15-16	Wawahen Hahatakei Haeu
Jn 1:3	1 Kor 8:6	Hib 1:2	HH 4:11
Apo 14:15			

Mt 22:37-38	Jn 14:21	1 Pi 1:8	1 Jn 5:3
Mk 12:28-30			

Tehu angiai tapeinan ti Jises kapi tesol aposel

Wawahen ti Haeu

Mt 26:26-30	Mk 14:22-26	Lk 22:14-20
-------------	-------------	-------------

Jn 3:16	Rom 5:8	Epe 2:4-5	1 Jn 4:9-10
---------	---------	-----------	-------------

Teleiai manihuh hani Haeu ti kahuiai saun lialun

Saun ti he wawahen

Mt 9:13	Mk 12:33	Rom 12:1	Hib 9:6-10	Mt 5:43-48	Rom 12:9-10	Gal 5:13-14	1 Jn 2:9-11
				Mt 22:39	Rom 13:8-10	1 Te 4:9-10	1 Jn 3:11-18
				Jn 13:34-35	1 Kor 13:1-13	1 Pi 4:8	1 Jn 4:7-21
				Jn 15:12-17	1 Kor 16:14		

Tesol kauai kawatan ti tap tahi tapoan

Mt 10:28	Mt 13:47-50	Lk 16:23-26	Kawatan Hahatakei Haeu
Mt 13:41-42	Mt 25:41	2 Te 1:9	HH 21:8

Tonain kapi Haeu ti tap tahi tapoan

Mt 4:1-11	1 Kor 10:12-13	1 Te 3:5-8	Jms 4:7
Mt 6:13	1 Kor 16:13	2 Te 3:3	1 Pi 1:5
Lk 22:31-32	2 Kor 12:7-10	2 Ti 1:7-8	1 Pi 5:8
Jn 17:14-19	Epe 3:20-21	Hib 2:18	1 Jn 4:4
Mt 19:16-30	Jn 14:6	Rom 8:10-17	Kawatan
Lk 10:25-28	Jn 17:2-3	2 Kor 5:17	Mt 10:11-39
Jn 3:1-16	Jn 20:31	Gal 2:20	Mt 10:12
Jn 5:19-29	Rom 5:21	Epe 2:1-6	Mt 10:19-20
Jn 10:10	Rom 6:5-14	Kol 2:13	1 Pi 1:23
Jn 11:25-26			1 Jn 5:11-13

*Kakain ti sale waliko tenen tenen leili pepai Haeu Angiai ti nameniai matei Jises Krais**Tone Haeu*

1 Kor 10:14-22	1 Kor 11:17-34
----------------	----------------

Lk 12:32-34	Pil 1:23	HH 4:1-11	HH 21:22-22:5
Jn 14:1-3	Kol 3:1	HH 21:1-4	Baptisan
2 Kor 5:1-8	1 Pi 1:4-5		

Towiahuin ti lialui woukaha hani Haeu

Mt 28:18-20	Apo 8:12, 36-38	Apo 19:1-7	Ga
Jn 3:22	Apo 10:44-48	Apo 22:12-16	Ko
Jn 4:1-2	Apo 16:14-15, 31-33	Rom 6:1-4	1 P
Apo 2:37-42			

Mt 4:17	Lk 24:45-47	Apo 17:29-31	2 Kor 7:8-11
Mk 6:12	Apo 2:37-40	Apo 20:21	2 Pi 3:9
Lk 13:1-5	Apo 3:19-20	Apo 26:19-20	Haeu
Lk 15:1-31			HH 9:20-21

Un taxitaxia	Mk 10:27	Apo 17:22-31	1 Ti 6:15-16	1 Jn 1:5
	Mk 12:29-30	Rom 1:18-23	Hib 4:13	1 Jn 4:7
	Lk 1:37	Rom 11:33-36	Hib 10:30-31	Jud 24-2
	Lk 6:35-36	1 Kor 8:4-6	Jms 1:17	HH 4:8
Rom 13:13	1 Kor 6:9-11	Epe 5:18	2 Kor 1:3	1 Pi 1:14-17
1 Kor 5:11	Gal 5:19-21	1 Ti 3:1-3	1 Pi 1:14-17	HH 15:3
		1 Pi 1:14-17	1 Ti 1:17	

Hahatakei Haeu 22:21

323

Hahatakei Haeu 22:21

Haeu haponoakaha

Mt 6:1-4	Lk 6:38	2 Kor 9:1-15	Hib 13:1-3
Mt 7:12	Apo 11:27-30	Gal 6:9-10	Jms 1:27
Hib 12:31-46	1 Kor 10:24	Pil 4:14-19	Jms 2:15-17
Jn 3:10-16	2 Kor 8:1-15	Hib 10:24	1 Jn 3:16-17

Haliniai an ti hualiai lotu

*Jises Krais
Aliai Jises*

Mt 6:16-18	Mk 2:18-20	Apo 13:1-3	Apo Mt 24:29-44	Kol 3:4	2 Te 2:l-4	2 Pi 3:1-13
			Jn 14:1-3	1 Te 1:9-10	1 Ti 6:13-15	1 Jn 3:1-3
			Apo 1:10-11	1 Te 3:13	2 Ti 4:8	HH 1:7
			Apo 3:19-21	1 Te 4:13-5:11	Hib 9:28	HH 22:12
			Pil 3:20-21	2 Te 1:6-10		

He lilioa

Mt 5:31-32	Lk 16:18	Rom 7:2-3	1 Kor 7:10-16	Jises alle kilan waliko lalap ti kui pohe Haeu.
Mt 19:3-9				

Hinitiai seilon

Mt 8:1-15, 23-33	Mt 20:29-34	Lk 7:11-15	Jn 4:4
Mt 9:1-7, 18-33	Mt 21:18-22	Lk 13:10-13	Jn 5:5
Mt 12:9-14, 22	Mk 1:21-28	Lk 14:l-4	Jn 9:1
Mt 14:15-32	Mk 7:32-37	Lk 17:12-14	Jn 11:1
Mt 15:33-38, 32-38	Mk 8:22-25	Lk 22:50-51	Jn 21:1
Mt 17:10-18	Lk 5:4-8	Jn 2:1-11	Apo 2
Jn 3:18-21	1 Kor 3:10-15	Hib 10:26-31	
Jn 5:24-29	1 Kor 4:5	Jises alia hani tone Haeu	

Holi Spirit

Lk 24:50-51	Rom 8:34	Hib 1:3-11	Hib 7:25-26
Apo 1:9-11	Epe 1:20-23	Hib 2:9	Hib 10:12-14
Apo 2:32-36	Pil 2:9-11	Hib 4:14-16	1 Pi 3:22
Mt 28:19	Jn 20:19-23	1 Kor 2:4-19, 16-31	Epe 6:17-18
Mk 1:9-11	Apo 1:4-5, 8	1 Kor 3:16	1 Te 1:5-6
Mk 3:28-30	Apo 2:1-18, 38-39	1 Kor 6:11, 19	Jises hanau seilon ma haewia teka tinun
Lk 1:35	Apo 4:31	1 Kor 12:1-13	1 Te 5:19
Lk 3:16	Apo 5:3-5	2 Kor 1:1-22, 23-25	Mt 9:23-36
Lk 4:1	Apo 8:14-17	2 Kor 5:5-11	Mt 16:6
Lk 11:13	Apo 10:44-48	2 Kor 13:14	Hib 2:4
Lk 12:12	Apo 13:2-4	Gal 3:1-28	Nati Haeu
Jn 1:32-34	Apo 15:28	Gal 4:6	1 Pi 1:2, 11
Jn 3:5-8	Apo 16:7-10	Gal 5:16-18, 22-25	2 Pi 1:19-27
Jn 7:37-39	Apo 19:1-7	Epe 1:12-14, 17	Mt 2:20
Jn 14:15-17, 26	Rom 5:5	Epe 1:16-17, 21-26	1 Jn 1:1-11
Jn 15:26	Rom 7:6	Epe 4:3-7, 10-13	1 Jn 1:1-11
Jn 16:7-15	Rom 8:9-16, 26-27	Epe 5:18-20, 1:1-18	2 Kor 4:4-6
		Jn 5:19-29	2 Kor 5:21
		Jn 6:35-40	1 Jn 2:1-2
		Jn 8:58	Gal 4:4-5
		Rom 1:3-4	1 Jn 5:20

Hong tamaniai Haeu

Tahi hakeai Jises he kros			
Jn 14:15, 21, 23-24	Rom 13:8-10	1 Jn 2:3-8	2 Jn 5-6
Jn 15:10-17	1 Pi 1:14-16	1 Jn 3:22-24	Mt 27:32-56

Tel Nati Haeu takahama seilon masin kaha

Hualiai seilon liai

Nauna ti sale lotu

Jn 1:14	Mt 1:18-25	Mt 2:1-23	Pil 2:6-7
Lk 1:26-38	Lk 2:1-20	Gal 4:4-5	Hib 2:14-18

Tihiniae Jises	Mt 6:5-13	Jn 14:13-14	Pil 4:6-7	Jms 1:5-8
	Mt 7:7-11	Jn 15:7	Kol 4:2	Jms 4:2-3
	Mt 18:19-20	Jn 16:23-26	1 Te 5:17	Jms 5:13-14
Xahatai Jises ma takean hani teka liai.	Mk 11:24-25	Rom 8:26-27	1 Ti 2:1-4, 8	1 Pi 4:7
	Jn 19:38-42 Lk 17:1-13	Rom 12:12	1 Ti 4:4-5	1 Jn 3:21-22
	Lk 18:1-8	Epe 2:18	Hib 4:16	1 Jn 5:14-15
Xahatai Jises ma takean hani teka liai.	Lk 21:36	Epe 6:18	Hib 10:19-22	

Mt 28: 1-20	Apo 1:3-8	Apo 10:39-43	Rom 4:24-25
Mk 16:1-8	Apo 2:24-32	Apo 13:29-39 <i>Lotutai waltko ti kumahae Haeu ma hapuasai pohe Satana tatei waltko</i>	Jn 15:3-12 Kor 12:21 Pi 1:18
Lk 24:1-49	Apo 3:15	Apo 17:2-3, 30-31	Jn 1:18
Jn 20:1-21:14	Apo 4:10, 33	Rom 1:4	

Xotiae Jises ma namil ti teleian

Mt 4:10	1 Kor 5:11	2 Kor 6:14-18	1 Jn 5:2
Apo 13:4-12	1 Kor 6:9-11	Gal 5:19-21	HH 21:8
Apo 17:22-31	1 Kor 8:1-13	1 Te 1:9-10	HH 22:1
Mt 26:47-68	Apo 19:1-20, 14, 16-24, 30-32	1:22	
Mt 27:1-2, 11-31	Mk 14:43-65	Lk 22:47-53	Jn 18:28-19:16

Kakain ti sale kemulik

Masiwi ti teka kahikahi
Krais Lokaha hani laha

Lk 17:11-19	Epe 5:20	Kol 3:17	1 Ti 2:1
Jn 6:11	Pil 4:4-7	Kol 4:2	1 Ti 4:4-5
Rom 1:21	Kol 2:7	1 Te 5:18	Gal 6:6

Kaui kawatan nake ti usiai Jises Krais

Sale kilamialaha

Mt 5:10-12	Apo 5:41	2 Kor 12:10	Apo 6:1-6, 10-13, 39-42	Apo 14:23	1 Ti 3:1-13	Tai 1:5-9
Mk 13:9-13	Rom 8:35-37	Pil 1:28-29	Hib 12:3-4			
Lk 12:4-9	Rom 12:12-14, 17-21	2 Te 1:18	<i>Waltko ti kahia polawa</i>			
Jn 15:18-21	1 Kor 4:11-13	2 Te 3:2-4	1 Pi 4:12-19			
Jn 16:1-4	2 Kor 4:8-11	2 Ti 3:10-13	HH 2:10	Mt 28:18-20	1 Te 2:1-12	2 Ti 2:1-26
Kawatan ti i tunahi kaha				Lk 22:24-27	1 Ti 4:1-16	2 Ti 3:10-4:5
				Apo 20:17-35	1 Pi 5:1-4	

Rom 8:18-25, 28	2 Kor 4:16-18	1 Pi 1:6-9	1 Pi 5:8-10
2 Kor 1:4	Jms 1:2-4	1 Pi 2:19-21	<i>Masiwi ti nantikei xux</i>

Lotu
Lotu ti seilon hani Haeu

Mt 22:15-22	Rom 13:1-7	Tai 3:1	1 Pi 2:13-17
Apo 5:27-29	1 Ti 2:1-4		

Mt 11:25-26	Jn 11:41-42	Rom 10:1-2	Kol 1:9-12
Mt 14:23	Jn 17:1-26	Rom 15:30-32	<i>Matet i kahia ti oxoxiakaha ti kawatan ti halui Kol 1:9-12 lehe kaha sohot seilon haun ti usiai Haeu</i>
Mt 19:13-15	Apo 4:24-31	2 Kor 12:7-10	Jn 3:9-13
Mk 1:35	Apo 16:25	Epe 1:15-20	2 Te 1:11-12
Lk 5:16	Apo 20:36	Epe 3:14-21	2 Te 3:1-5
Lk 6:12	Apo 21:5	Epe 6:19-20	Mt 26:16-29
Lk 22:32, 39-46	Rom 1:9-10	Pil 1:3-5, 9-11	Rom 13:23-25
			Epe 1:7
			1 Jn 1:6-7

Hahatakei Haeu 22:21

325

Hahatakei Haeu 22:21

Matemate

Pepai Haeu

Jn 6:39-40	Rom 14:7-9	Pil 1:20	Mt 14:1-4 Mt 18:17-20 Mt 15:1-2 Mt 15:2-9 Mt 15:32	HH 14:1-4 HH 2:1-4 Kol 1:1-3 Kol 1:1-3 Kol 3:16	Apo 20:32	1 Te 2:13	1 Pi 1:22-25
Jn 11:17-27	1 Kor 15:12-58	1 Te 4:1-13	Mt 18:17-20 Kol 1:1-3 Kol 1:1-3	HH 2:1-4 Kol 1:1-3 Kol 1:1-3	1 Te 4:13	2 Pi 1:19-21	
Jn 14:1-4	2 Kor 5:1-10	Hib 2:1-4	Mt 15:2-9 Mt 15:32	HH 2:1-4 Kol 1:1-3 Kol 1:1-3	16:26	2 Ti 3:14-17	2 Jn 9-10
Rom 8:10-11, 38-39			Jn 8:31-32	Kol 3:16	Hib 4:12		HH 1:3
			Jn 20:31				

Meng Solian ti Jises Krais

Sale awaiakaha ti kawatan ti lialui woukaha

Apo 20:24	1 Kor 15:1-7	Pil 1:27	Jn 14:1-4 Jn 14:1-4 Jn 14:1-4	Rom 5:1-11	Epe 2:1-10	1 Ti 2:3-7
Rom 1:2-4, 16-17	Gal 1:6-12	Kol 1:5-6	Apo 2:1-10 Apo 2:1-10 Apo 2:1-10	Rom 10:9-13	1 Ti 1:15-16	1 Pe 1:3-5
1 Kor 1:17-25	Epe 1:13	1 Te 1:5	Apo 2:1-10 Apo 2:1-10 Apo 2:1-10			

Moni ma soxi

Sale haewiai seilon

Mt 6:19-21, 24-34	Apo 20:35	Hib 1:1-2	Mt 4:23-25 Mt 8:35 Mt 11:2-5	Apo 3:1-6 Apo 8:4-8 Apo 19:11-16	Apo 28:8-9 1 Kor 12:9, 29-30 2 Kor 12:7-10	1 Ti 5:2 2 Ti 4:1 Jms 5:1
Lk 12:13-21, 32-34	1 Ti 6:6-10, 17-19	Jms 2:1-2				

Namil xoxoan ti Jises Krais / Sohoin hani Jises Krais

Sale hasawiai wasole seilon ma Haeu

Sale xoxoi namil hani Krais ti awaiakaha

Jn 1:12	Jn 14:6	Apo 16:30-31	Gal 2:16	Apo 13:38-39	Rom 3:21-26	Gal 2:16	Tai 3:6-9
Jn 3:15-18, 36	Jn 20:31	Rom 3:20-22	Epe 2:8-9	Rom 1:16-17	Rom 5:1, 9-10, 18-19	Gal 3:6-9	
Jn 6:47	Apo 4:12	Rom 10:9-10	Sale hukumain ti teka kahikahi Jises Krais				

Sale xoxoi namil hani Krais ti nanahiakaha

Mt 18:19-20	Rom 12:4-8	Epe 4:11-16	1 Ti 4:13
Apo 2:41-47	Epe 1:22-23	Kol 3:15-17	Hib 10:24-25

Mk 11:22-25	Rom 5:1-2	2 Kor 5:6-7	Jms 1:2-8	Sale sampanakaha ma teheni aliakeakaha
Lk 17:5-6	Rom 14:22-23	Gal 5:6	Jms 2:14-20	
Jn 14:1	1 Kor 13:13	Hib 11:1-40	1 Pi 1:3-9	

Oxoxiai saun lialun

Sale Haeu oxoxi kaha ti kawatan ti lialui woukaha

Mt 5:3-12	Lk 18:9-14	Pil 2:3-11	Jms 4:5-10
Mt 18:1-5	Epe 4:2	Kol 3:12-13	1 Pi 5:5-7
Lk 14:7-11			

Sale teka kahikahi Jises

Mt 26:28	Apo 10:43	Kol 1:13-14	Hib 10:17-18			
Mk 11:25-26	Apo 26:18	Kol 2:13-14	1 Jn 4:1-20	1 Kor 12:12-30	Epe 4:1-16	1 Pi 2:4-
Apo 5:31	Epe 1:7		Apo 2:41-42	Epe 1:22-23	Kol 1:18	HH 19:5
			Rom 12:4-8	Epe 2:19-22	Hib 10:24-25	

Sale oxoxiai seilon liai ti kawatan ti saun lialun laha aile hani kaha

Sale teka nati Haeu

Mt 6:12-15	Mk 11:25	Lk 17:3-4	Epe 4:1-16	Jms 4:5-10	Gal 4:6-7	Hib 12:5-11	1 Jn 3:1-3
Mt 18:21-35	Lk 6:37	2 Kor 2:5-11	Kol 3:12-13	Kol 3:12-13	Hib 10:24-25		

Hahatakei Haeu 22:21

326

Hahatakei Haeu 22:21

*Sale totone hahunatun
Akaik*

Saun lialun ti wawan hehin

Mt 15:3-6	Epe 6:1-3	1 Ti 5:4, 8	Hib 12: 7, 11, 18, 2 -11	Mt 5:27-30	1 Kor 5:9-11	Epe 5:3	Hib 13:4
Lk 2:51	Kol 3:20			Rom 13:8-10	Gal 5:19	1 Te 4:1-8	Jud 7

Hahunatun

Saun ti teka kahikahi Jises Krais

Mt 19:4-6	Epe 5:21-33	Tai 2:3-5	1 Pi 3, 11, 13, 17, 18, 24 -34-35	Rom 12:9-13	Kol 3:12-17	1 Te 5:16-18
1 Kor 7:1-16	Kol 3:18-19	Hib 13:4	Jn 14:27	Gal 5:22-26		

Hehin ti axoalaha matewen

Sulusulu ma hong paxaiai kakain

Apo 6:1	1 Kor 7:39-40	1 Ti 5:3-16	Jms ~~1, 11, 12, 13, 14, 15, 16, 17, 18, 19, 20, 21, 22, 23, 24, 25, 26, 27, 28, 29, 30, 31, 32, 33, 34, 35, 36, 37, 38, 39, 40, 41, 42, 43, 44, 45, 46, 47, 48, 49, 50, 51, 52, 53, 54, 55, 56, 57, 58, 59, 60, 61, 62, 63, 64, 65, 66, 67, 68, 69, 70, 71, 72, 73, 74, 75, 76, 77, 78, 79, 80, 81, 82, 83, 84, 85, 86, 87, 88, 89, 90, 91, 92, 93, 94, 95, 96, 97, 98, 99, 100, 101, 102, 103, 104, 105, 106, 107, 108, 109, 110, 111, 112, 113, 114, 115, 116, 117, 118, 119, 120, 121, 122, 123, 124, 125, 126, 127, 128, 129, 130, 131, 132, 133, 134, 135, 136, 137, 138, 139, 140, 141, 142, 143, 144, 145, 146, 147, 148, 149, 150, 151, 152, 153, 154, 155, 156, 157, 158, 159, 160, 161, 162, 163, 164, 165, 166, 167, 168, 169, 170, 171, 172, 173, 174, 175, 176, 177, 178, 179, 180, 181, 182, 183, 184, 185, 186, 187, 188, 189, 190, 191, 192, 193, 194, 195, 196, 197, 198, 199, 200, 201, 202, 203, 204, 205, 206, 207, 208, 209, 210, 211, 212, 213, 214, 215, 216, 217, 218, 219, 220, 221, 222, 223, 224, 225, 226, 227, 228, 229, 230, 231, 232, 233, 234, 235, 236, 237, 238, 239, 240, 241, 242, 243, 244, 245, 246, 247, 248, 249, 250, 251, 252, 253, 254, 255, 256, 257, 258, 259, 260, 261, 262, 263, 264, 265, 266, 267, 268, 269, 270, 271, 272, 273, 274, 275, 276, 277, 278, 279, 280, 281, 282, 283, 284, 285, 286, 287, 288, 289, 290, 291, 292, 293, 294, 295, 296, 297, 298, 299, 300, 301, 302, 303, 304, 305, 306, 307, 308, 309, 310, 311, 312, 313, 314, 315, 316, 317, 318, 319, 320, 321, 322, 323, 324, 325, 326, 327, 328, 329, 330, 331, 332, 333, 334, 335, 336, 337, 338, 339, 340, 341, 342, 343, 344, 345, 346, 347, 348, 349, 350, 351, 352, 353, 354, 355, 356, 357, 358, 359, 360, 361, 362, 363, 364, 365, 366, 367, 368, 369, 370, 371, 372, 373, 374, 375, 376, 377, 378, 379, 380, 381, 382, 383, 384, 385, 386, 387, 388, 389, 390, 391, 392, 393, 394, 395, 396, 397, 398, 399, 400, 401, 402, 403, 404, 405, 406, 407, 408, 409, 410, 411, 412, 413, 414, 415, 416, 417, 418, 419, 420, 421, 422, 423, 424, 425, 426, 427, 428, 429, 430, 431, 432, 433, 434, 435, 436, 437, 438, 439, 440, 441, 442, 443, 444, 445, 446, 447, 448, 449, 450, 451, 452, 453, 454, 455, 456, 457, 458, 459, 460, 461, 462, 463, 464, 465, 466, 467, 468, 469, 470, 471, 472, 473, 474, 475, 476, 477, 478, 479, 480, 481, 482, 483, 484, 485, 486, 487, 488, 489, 490, 491, 492, 493, 494, 495, 496, 497, 498, 499, 500, 501, 502, 503, 504, 505, 506, 507, 508, 509, 510, 511, 512, 513, 514, 515, 516, 517, 518, 519, 520, 521, 522, 523, 524, 525, 526, 527, 528, 529, 530, 531, 532, 533, 534, 535, 536, 537, 538, 539, 540, 541, 542, 543, 544, 545, 546, 547, 548, 549, 550, 551, 552, 553, 554, 555, 556, 557, 558, 559, 5510, 5511, 5512, 5513, 5514, 5515, 5516, 5517, 5518, 5519, 5520, 5521, 5522, 5523, 5524, 5525, 5526, 5527, 5528, 5529, 55210, 55211, 55212, 55213, 55214, 55215, 55216, 55217, 55218, 55219, 55220, 55221, 55222, 55223, 55224, 55225, 55226, 55227, 55228, 55229, 552210, 552211, 552212, 552213, 552214, 552215, 552216, 552217, 552218, 552219, 552220, 552221, 552222, 552223, 552224, 552225, 552226, 552227, 552228, 552229, 5522210, 5522211, 5522212, 5522213, 5522214, 5522215, 5522216, 5522217, 5522218, 5522219, 5522220, 5522221, 5522222, 5522223, 5522224, 5522225, 5522226, 5522227, 5522228, 5522229, 55222210, 55222211, 55222212, 55222213, 55222214, 55222215, 55222216, 55222217, 55222218, 55222219, 55222220, 55222221, 55222222, 55222223, 55222224, 55222225, 55222226, 55222227, 55222228, 55222229, 552222210, 552222211, 552222212, 552222213, 552222214, 552222215, 552222216, 552222217, 552222218, 552222219, 552222220, 552222221, 552222222, 552222223, 552222224, 552222225, 552222226, 552222227, 552222228, 552222229, 5522222210, 5522222211, 5522222212, 5522222213, 5522222214, 5522222215, 5522222216, 5522222217, 5522222218, 5522222219, 5522222220, 5522222221, 5522222222, 5522222223, 5522222224, 5522222225, 5522222226, 5522222227, 5522222228, 5522222229, 55222222210, 55222222211, 55222222212, 55222222213, 55222222214, 55222222215, 55222222216, 55222222217, 55222222218, 55222222219, 55222222220, 55222222221, 55222222222, 55222222223, 55222222224, 55222222225, 55222222226, 55222222227, 55222222228, 55222222229, 552222222210, 552222222211, 552222222212, 552222222213, 552222222214, 552222222215, 552222222216, 552222222217, 552222222218, 552222222219, 552222222220, 552222222221, 552222222222, 552222222223, 552222222224, 552222222225, 552222222226, 552222222227, 552222222228, 552222222229, 5522222222210, 5522222222211, 5522222222212, 5522222222213, 5522222222214, 5522222222215, 5522222222216, 5522222222217, 5522222222218, 5522222222219, 5522222222220, 5522222222221, 5522222222222, 5522222222223, 5522222222224, 5522222222225, 5522222222226, 5522222222227, 5522222222228, 5522222222229, 55222222222210, 55222222222211, 55222222222212, 55222222222213, 55222222222214, 55222222222215, 55222222222216, 55222222222217, 55222222222218, 55222222222219, 55222222222220, 55222222222221, 55222222222222, 55222222222223, 55222222222224, 55222222222225, 55222222222226, 55222222222227, 55222222222228, 55222222222229, 552222222222210, 552222222222211, 552222222222212, 552222222222213, 552222222222214, 552222222222215, 552222222222216, 552222222222217, 552222222222218, 552222222222219, 552222222222220, 552222222222221, 552222222222222, 552222222222223, 552222222222224, 552222222222225, 552222222222226, 552222222222227, 552222222222228, 552222222222229, 5522222222222210, 5522222222222211, 5522222222222212, 5522222222222213, 5522222222222214, 5522222222222215, 5522222222222216, 5522222222222217, 5522222222222218, 5522222222222219, 5522222222222220, 5522222222222221, 5522222222222222, 5522222222222223, 5522222222222224, 5522222222222225, 5522222222222226, 5522222222222227, 5522222222222228, 5522222222222229, 55222222222222210, 55222222222222211, 55222222222222212, 55222222222222213, 55222222222222214, 55222222222222215, 55222222222222216, 55222222222222217, 55222222222222218, 55222222222222219, 55222222222222220, 55222222222222221, 55222222222222222, 55222222222222223, 55222222222222224, 55222222222222225, 55222222222222226, 55222222222222227, 55222222222222228, 55222222222222229, 552222222222222210, 552222222222222211, 552222222222222212, 552222222222222213, 552222222222222214, 552222222222222215, 552222222222222216, 552222222222222217, 552222222222222218, 552222222222222219, 552222222222222220, 552222222222222221, 552222222222222222, 552222222222222223, 552222222222222224, 552222222222222225, 552222222222222226, 552222222222222227, 552222222222222228, 552222222222222229, 5522222222222222210, 5522222222222222211, 5522222222222222212, 5522222222222222213, 5522222222222222214, 5522222222222222215, 5522222222222222216, 5522222222222222217, 5522222222222222218, 5522222222222222219, 5522222222222222220, 5522222222222222221, 5522222222222222222, 5522222222222222223, 5522222222222222224, 5522222222222222225, 5522222222222222226, 5522222222222222227, 5522222222222222228, 5522222222222222229, 55222222222222222210, 55222222222222222211, 55222222222222222212, 55222222222222222213, 55222222222222222214, 55222222222222222215, 55222222222222222216, 55222222222222222217, 55222222222222222218, 55222222222222222219, 55222222222222222220, 55222222222222222221, 55222222222222222222, 55222222222222222223, 55222222222222222224, 55222222222222222225, 55222222222222222226, 55222222222222222227, 55222222222222222228, 55222222222222222229, 552222222222222222210, 552222222222222222211, 552222222222222222212, 552222222222222222213, 552222222222222222214, 552222222222222222215, 552222222222222222216, 552222222222222222217, 552222222222222222218, 552222222222222222219, 552222222222222222220, 552222222222222222221, 552222222222222222222, 552222222222222222223, 552222222222222222224, 552222222222222222225, 552222222222222222226, 552222222222222222227, 552222222222222222228, 552222222222222222229, 5522222222222222222210, 5522222222222222222211, 5522222222222222222212, 5522222222222222222213, 5522222222222222222214, 5522222222222222222215, 5522222222222222222216, 5522222222222222222217, 5522222222222222222218, 5522222222222222222219, 5522222222222222222220, 5522222222222222222221, 5522222222222222222222, 5522222222222222222223, 5522222222222222222224, 5522222222222222222225, 5522222222222222222226, 5522222222222222222227, 5522222222222222222228, 5522222222222222222229, 55222222222222222222210, 55222222222222222222211, 55222222222222222222212, 55222222222222222222213, 55222222222222222222214, 55222222222222222222215, 55222222222222222222216, 55222222222222222222217, 55222222222222222222218, 55222222222222222222219, 55222222222222222222220, 55222222222222222222221, 55222222222222222222222, 55222222222222222222223, 55222222222222222222224, 55222222222222222222225, 55222222222222222222226, 55222222222222222222227, 55222222222222222222228, 55222222222222222222229, 552222222222222222222210, 552222222222222222222211, 552222222222222222222212, 552222222222222222222213, 552222222222222222222214, 552222222222222222222215, 552222222222222222222216, 552222222222222222222217, 552222222222222222222218, 552222222222222222222219, 552222222222222222222220, 552222222222222222222221, 552222222222222222222222, 552222222222222222222223, 552222222222222222222224, 552222222222222222222225, 552222222222222222222226, 552222222222222222222227, 552222222222222222222228, 552222222222222222222229, 5522222222222222222222210, 5522222222222222222222211, 5522222222222222222222212, 5522222222222222222222213, 5522222222222222222222214, 5522222222222222222222215, 5522222222222222222222216, 5522222222222222222222217, 5522222222222222222222218, 5522222222222222222222219, 5522222222222222222222220, 5522222222222222222222221, 5522222222222222222222222, 5522222222222222222222223, 5522222222222222222222224, 5522222222222222222222225, 5522222222222222222222226, 5522222222222222222222227, 5522222222222222222222228, 5522222222222222222222229, 55222222222222222222222210, 55222222222222222222222211, 55222222222222222222222212, 55222222222222222222222213, 55222222222222222222222214, 55222222222222222222222215, 55222222222222222222222216, 55222222222222222222222217, 55222222222222222222222218, 55222222222222222222222219, 55222222222222222222222220, 55222222222222222222222221, 55222222222222222222222222, 55222222222222222222222223, 55222222222222222222222224, 55222222222222222222222225, 55222222222222222222222226, 55222222222222222222222227, 55222222222222222222222228, 55222222222222222222222229, 552222222222222222222222210, 552222222222222222222222211, 552222222222222222222222212, 552222222222222222222222213, 552222222222222222222222214, 552222222222222222222222215, 552222222222222222222222216, 552222222222222222222222217, 552222222222222222222222218, 552222222222222222222222219, 552222222222222222222222220, 552222222222222222222222221, 552222222222222222222222222, 552222222222222222222222223, 552222222222222222222222224, 552222222222222222222222225, 552222222222222222222222226, 552222222222222222222222227, 5~~

Towiahuin ti lialui woukaha hani Haeu

Mt 4:17	Lk 24:45-47	Apo 17:29-31	2 Kor 7:8-11
Mk 6:12	Apo 2:37-40	Apo 20:21	2 Pi 3:9
Lk 13:1-5	Apo 3:19-20	Apo 26:19-20	HH 9:20-21
Lk 15:1-31			

Un taxitaxia

Rom 13:13	1 Kor 6:9-11	Epe 5:18	Tai 1:7
1 Kor 5:11	Gal 5:19-21	1 Ti 3:1-3	1 Pi 4:3-5

Wawahen
Wahenai Haeu

Mt 22:37-38	Jn 14:21	1 Pi 1:8	1 Jn 5:3
Mk 12:28-30			

Wawahen ti Haeu

Jn 3:16	Rom 5:8	Epe 2:4-5	1 Jn 4:9-10
---------	---------	-----------	-------------

Saun ti he wawahen

Mt 5:43-48	Rom 12:9-10	Gal 5:13-14	1 Jn 2:9-11
Mt 22:39	Rom 13:8-10	1 Te 4:9-10	1 Jn 3:11-18
Jn 13:34-35	1 Kor 13:1-13	1 Pi 4:8	1 Jn 4:7-21
Jn 15:12-17	1 Kor 16:14		

Xoiniai Satan ma kawatan

Mt 4:1-11	1 Kor 10:12-13	1 Te 3:5-8	Jms 4:7
Mt 6:13	1 Kor 16:13	2 Te 3:3	1 Pi 1:5
Lk 22:31-32	2 Kor 12:7-10	2 Ti 1:7-8	1 Pi 5:8-11
Jn 17:14-19	Epe 3:20-21	Hib 2:18	1 Jn 4:4
Rom 8:31-39	Epe 6:10-18	Hib 4:14-16	1 Jn 5:3-5
Rom 12:12	Pil 4:13	Heb 12:1-2	HH 12:7-12
Rom 16:19-20			

Haxewai hina kakain ti teik pepa ie

Abel (*Matiu 23:35; Luk 11:51; Hibru 11:4, 12:24*)

Abel nati Adam, i tel ukale Kein komuh. Kein telei i. (*Genesis 4:1-8*).

Abraham

Abraham i tel seilon ti matalauhaun. Hatesol seilon ti Israel nakuama tetan. Haeu hone i ti sos salilai xuxun hani texux xux ti Haeu neini haniwen i. Abraham hong usi. Ahang kilan wanen i to luluawa atengi taen ti i tunahiwa texux xux ien ape i tonai. Xux tetexux ape ie axan Israel. Haeu xinoti namil kapi Abraham ka teka laha nakuama tetan se seilon ti Haeu ape na masin laha tu xox tetan i ngahati laha. (*Genesis 15; Rom 4; Hibru 6:13-15*)

Abraham uke axoan tel hehin axan Sara. Lalu kum tan akaik nake Sara lieheh. Ti lalu ape pate salaimat, Haeu axi lalu tel akaik wawan. Lalu axai i Aisak. Aisak uke axoan tel hehin axan Rebeka. Lalu hanatuale hua akaik wawan sangasang, Iso ma Jekop. Jekop axan tenen liai Israel. Nake ti tel seilon ien laha axai teka Ju seilon ti Israel. Teka laha nakuama ti Iso laha pahoxai teka laha nakuama ti Jekop. Jekop uke axoan hahutuan Lea ma Rakel. I uke hetekie hua hehin liai. Natun huopanim hua akaik wawan. Huopanim huosol seilon ti Israel ahuma ti tesol natun ien. Axalato taian leili pepai Haeu (*Hahatakei Haeu 7:4-8*). Kilan wanen seilon laha nakuama ti lato. Laha hatesol seilon ti Israel.

Adam (*Luk 3:38; Rom 5:14; 1 Korin 15:22, 45; 1 Timoti 2:13-14; Jud 1:14*)

Adam tel seilon Haeu tanomi imat ti lawe seilon. Haeu uke hepekeun tanomian. Adam ma tel axoan lv lalu hahuwa ti hutuia tahiak kakai Haeu. Hutui taen ien lawe seilon aile saun lialun. Aile ape nake ti tahitah ti Adam, saun lialun ma matemate i tunahi kaha hatesol. Tuahenake ti matei Jises Krais, kaha pon ukei tonain kapi Haeu ti tap tahi tapoan na namilokaha xoxoan

ti Jises Krais. I tel awaiakaha ti kau i kawatan ti lialui woukaha.

Aisaia (*Matiu 3:3; Aposel 8:30; Rom 9:27-29*)

Aisaia i tel ti teka masiwi ti kuluiakakai Haeu. Ti kuwen wanen, imat ti Jises Krais lua haniima tehu pon ie, Aisaia kak kilamiwen waliko ti na i sohot hani Jises. (Paxaiwa teik pepa Aisaia)

Alfa (*Hahatakei Haeu 1:8, 21:6, 22:13*)

Alfa se hutuia alfabet ti kakai Grik, masin "A" i se hutuia alfabet ti kakai Seimat. Jises Krais i tetel ti hutuia lawe waliko, aile ape laha kolongeni i Alfa ti leili pepai Haeu.

Aposel

Jises kilami aposel tetesol huopanim huhua seilon ti uli lato sohotua kahikahin (*Matiu 10:1-4; Mak 3:13-19; Luk 6:12-16; Aposel 1:21-22*). Tesol seilon ien lawe kapin ma i to hanau lato. Ti Jises mat ape i moih alia, lato ningahi i ti pulalato wanen. I talo lato ti kaxiai lawe waliko ti lato ningahiwan ma kaxi ahutia meng solian tetan. Lato sohot masiwi ti teka kahikah Jises. Leili pepai Aposel, Pol, Banabas, ma teka liai, lato tin aposel. Lato tin kikilamiai Jises Krais ti ailei puasan. Tenen kakain "aposel" salangawan ukek, "tetel laha talo."

Aron (*Luk 1:5; Aposel 7:40; Hibru 5:4, 7:11, 9:4*)

Aron tetel ukale Moses pamu. Aron nakuama ti Livai, tel ti tesol huopanim hua nati Jekop. Aron tetel uli i sohotua masiwi ti hukuminiai Haeu ma seilon. Haeu ukek ka ti wasole teka Ju, mewenae teka laha nakuama ti Aron laha sohot masiwi ti hukuminiai Haeu ma seilon.

Baal (*Rom 11:4*)

Ti kuwen wanen imat ti teka Ju tonai texux xux Israel, teka seilon ti ien laha lolotui Baal tel kumahe salan Haeu. Taun hina teka Ju kum lotui Haeu, laha lotui non Baal. Nake ti tenen saun ien Haeu lengeini hawane laha.

Babilon

Babilon i tehu taon pate lalap. Ti imat wanen, teka seilon ti ien hilei teka Israel ape laha tike. Laha waxi kilan ti lato hani Babilon ape lungi lato ailei puasain kawatan ti tap lato uke

kahun. Teka Israel to ien leili ahang 70 (*Matiu 1:11-12, 17; Aposel 7:43*). Leili teik pepa ie Babilon uke i tu kikilami tehu taon Rom ti kilan seilon laha lolotui waliko ti kumahe salan Haeu ma teteka ti aope laha kum nam waxi Haeu. (*Hahatakei Haeu 14:8, 17:5, 18*)

Balam (2 *Pita 2:15; Jud 1:11; Hahatakei Haeu 2:14*)

Balam tel ti kuluiak kakai Haeu. Telao teka Moab hilei teka Israel. Balak tel masiwi ti laha pahan Balam saiwa teka Israel lehe i xoini lato. I kakane Balam ka i uke kahun. Kemuk Balam watakaimu tuahe imuh i sowini nake i pate halepean ti moni. Ti i luluainiwa lehe i aile, tel engel tiehi aweisalun. Tok donki kikili-wake Balam tuahe ti i ningahiwia tel engel, i kum kiliwau ahe kalak Balam xaxai i. Tok donki wixile ape i tumei Balam. Balam Paxai tioi ka Haeu pahan i aile hasolia haniwia teka Israel, aile ape i kum sai lato. (*Numbers 22-24*)

Baptais

Baptais se kolakol ka seilon i sohotuen kahikahi Jises Krais. Laha hana hatapo namilolah hani i ma laha hong tamani kakai. Jon baptaisi kilan seilon he tehu kan Jodan. I hone laha towiahua ti lialui woulaha ape i baptaisi laha ti puli teka seilon.

David

David i tel ti teka masiwi ti ngahatia teka Ju. I tetel nati Jesi tapeinan. Imat ti i to tel masiwi, lawe i ngangahati sipsip tupi tel taman. Lokon ti i uluha tutuen, i hilei telei tel seilon pate larap axan Goleat tel ti teka laha hil pahoxai teka Ju. Wawahen ti David larap wanen hani Haeu. I aile tanomi kilan pak ti haxawai Haeu. Pakun ien laha axai Salm. Jises takah nonoma ti kahi nati tel David ie (*Rom 1:3; Hahatakei Haeu 22:16*). Ti kuewen wanen Haeu kakawen ka Krais tel i taloma, i nakuama ti tel masiwi David.

Elaija (*Matiu 11:14; Mak 9:4; Rom 11:2; Jeims 5:17*)

Elaija i tel ti teka masiwi ti kuluiak kakai Haeu. I aile kilan kolakol larap ti kui pohe Haeu (*1 Kings 17:19-22; 2 Kings 2:11-12*). Elaija se tetel Jises

kak kokolongeni Jon Baptis hani i. (*Matiu 17:9-13; Mak 9:9-13; Luk 1:17*)

Engel (Kakai Inglis: angel)

Teka engel se spirit solian ti Haeu laha kapin ti tesol tonan. Laha kumahe seilon masin kaha. Kaha kum pon ningahiae tupualaha tuahe i pon laha sohot take hani kaha. Haeu talo teka engel ailei pupusasan. Laha ngangahati teka seilon ti Haeu (*Aposel 12:6-11, 27:23; Hibru 1:14*). Taun hina Haeu talo laha ti kaxi haniai seilon kakain tuah tetan. Tel masiwi ti hatesol engel axan Maikel (*Jud 9*). Tel engel masiwi liai axan Gabriel. (*Luk 1:19, 26*)

Grik

Teka Grik totonai texux xux Akaia. Aope ie Akaia axan Gris. Tehu taon lalap ti Gris se Aten. Tehu taon Korin tin leili texux xux ien. Lokon ti tesol aposel, teka Grik seilon aneso ma pate teka liai sameni laha. Kilan seilon kakak kakai Grik. Salan tetan, lokon ti Jises, hatesol seilon laha sukulawen, laha pon kak kakai Grik. Meng solian ti Jises, imat laha taimu ti kakai Grik.

Haga (*Galasia 4:21-31; Genesis 16*)

Haga i unaui Sara tel axoi Abraham. Lokon ti Sara liegeh tutuen i talo Haga eng akati Abraham. Sara aile ukek ien lehe Haga hanatua axi i ma Abraham akaik waxy hina seilon nakuama ti lalu. Ape salan, Haga hatakahaka tel akaik wawan axan Ismael. I kumahe akaik tetel Haeu kakawen i hani Abraham ma Sara. Aile ape teka laha nakuama ti tel akaik ien, laha kum uke waliko solian ti Haeu kakawen i hani teka laha nakuama ti Abraham. Imuh Sara hatakahaka tel akaik axan Aisak. I se tetel akaik Haeu kakawen i hani lalu Abraham. Muhiin ti Sara hatakahawa Aisak, i leng ape usi xaxaweni Haga. Haga sos to xohi hani Maunt Sainai. Se maunten tetehu ien Haeu kakak kapi Moses ape hani i tesol nauna tetan ti haniai teka Ju. Nake ti tenen ien, leili pepai Galasia Pol ukek ka Haga, tel unaui Sara, tu kikilami teka seilon laha hahitake tesol nauna ien. Seilon tenen ien laha soh ka mewenae na seilon usi hatapo hatesol nauna ien,

Haeu paxai ukek i seilon sawisawin. Aile ape laha kum soh ka mewenae na namilokaha xoxoan ti Jises Krais, Haeu paxai ukek kaha seilon sawisawin.

Herod

Leili teik pepa ie, hinalo seilon axalato Herod.

- 1) Herod tel laha axai Lalap, i tel masiwi ti Judia lokon ti Jises takah. I tetel ailei teik namil ti teleiai Jises lokon ti Jises kokol. (*Matiu 2:1-22; Luk 1:5*)
- 2) Herod Antipas i tetel nahikei Galili ti ape lokon Jises kaxi ahuhut kakai Haeu ma ailele kilan waliko lapap ti kui pohe Haeu. Se i tetel i sowini ape laha koti kinawé Jon Baptis nake tel axoan hehin Herodias watakai Jon. Ti lokon laha xoti Jises, Pailat talo i hani Herod tetel ien lehe i hong paxai waliko ti teka masiwi ti teka Ju susului Jises. (*Mak 6:14-29; Luk 23:6-12*)
- 3) Herod Agripa I (tetel imat) i se tetel i axi kawatan hani teka laha soh ti Jises Krais. Tin i sowini ape laha telei Jeims tel ukale Jon. (*Matiu 10:1-4; Aposel 12:1-23*)
- 4) Herod Agripa II (tetel usian) i nati Agripa I. Ti laha sului Pol, i tetel hong kolongenian ape i talo Pol hani Rom lehe i tu ulea mateiwai tel masiwi Sisa. (*Aposel 25:13-26:2, 26:19, 27-32*)

Hibru

Teka Ju axalahia tenen Hibru. Laha nakuama ti Abraham. Tenen ax "Hibru" i ahuma ti Eber, tel ti teka matalauhun ti laha. Teka Ju kak kakai Hibru ma kakai Arameik.

Holi Spirit

Holi Spirit i se Spirit ti Haeu. Holi Spirit, Jises ma tel Taman, kakal lato seilon tolu, lato se Haeu telawé (*Matiu 28:19*). Holi Spirit i pupuas leili teka seilon laha soh ti Jises Krais. Sale pupuasan masin:

- 1) I haxewa seilon tioiai waliko tenen salan. (*Jon 16:13; 1 Korin 2:10-13*)
- 2) I lotu kamei Haeu ti hualiae teka kahikahi Jises Krais. (*Rom 8:26*)
- 3) I neneini teka seilon ti Haeu lehe laha tioi sale usiai aweisalun. (*Aposel 13:2, 16:6-7*)
- 4) I axi seilon tetan poh ti kaxi ahutia kakai Haeu ma ti ailele puasan. (*1 Korin 2:4-5*)

5) Kahikahi Jises Krais tel tel i axi laha poh ti ailei puasain tenen tenen ti hakuiai hatesol seilon ti Haeu. (*1 Korin 12,14*)

Igip (*Aposel 7:34-40; Hibru 11:27*)

Igip se texux xux xohixohin Israel.

Leili 400 ahang teka Israel toto Igip ape teka Igip hapuasa halialu laha. Tuahé Haeu oxoxi laha ti ien (*Exodus 12-14*). I hapuasa Moses neini ahutialaha hani Keinan, tetexux xux ti i kilami haniwen laha.

Ingi Haeu (Ti kakai Inglis axan *Temple* ma na *House of God*)

Ingi Haeu i leili Jerusalem, tehu taon lapap ti Israel. Ing tetehu teka Ju apuha ti lotuiai Haeu ma amukei ngain lapap ti laha. Teka masiwi ti hukuminiai Haeu ma seilon lawe laha ailele puasalaha ien. Seilon teteka kumáhe Ju, hahalin ti na laha soh hani leili tehu Ingi Haeu ien. Patalal ti leili Ingi Haeu se tesol Tuah Tapein ti Haeu. Mewenae tel masiwi tapein ti hukuminiai Haeu ma seilon i pon soh hani ien, tehue ti leili ahang tehu. I kaua kake manihuh hani ien xaxaweniai puki lialui woun hetekie lialui woi seilon ti Israel. Teik maia lapap i ak titiehi aweingi tesol Tuah Tapein ti Haeu. Se maia teteik ien i lexáti patul haniwa taen itan lokon ti Jises mat (*Matiu 27:51; Mak 15:38; Luk 23:45*). I kola ka taen ien Jises heiwen aweisalukaha hani Haeu na masin kaha soh ti Jises Krais. Aile ape kaha teka kahikahi Jises Krais kaha masin ingi Haeu nake Holi Spirit i pupuas leilokaha (*1 Korin 3:16-17*). (Paxaiwa hosai Ingi Haeu leilon ie he tetepap 140).

Ing sosoxope ti Haeu (Kakai Inglis: *Tabernacle*) (*Aposel 7:44; Hibru 9:2, 9:21*)

Ti kuewen wanen lokon teka Ju luluainiwa he lohong, Haeu hone Moses ailei tehu ing sosoxope ti lotuian. I hapuasa maia pate solian ma uli manihuh ailean, hanowi hawane ti Haeu nexi hahani i. Leili tehu ing sosoxope ien laha hahana tehu lohe kakain tuah ti Haeu. Teka Ju lawe laha lolotui Haeu ien. Tin ien teka masiwi ti hukuminialaha ma Haeu laha ailele puasain ti hasawiai waso-

lalahā kapi Haeu. Laha hapuasa ing sosoxope tenen ien atengi taen tel masiwi Solomon ataiwa tehu Ingi Haeu leili Jerusalem. (Paxaiwa hosesai ing sosoxope ti Haeu leilon ie imat ti tetepap 441).

Iso (*Rom 9:13; Hibrū 11:20, 12:16-17*)

Aisak tel nati Abraham i hanatua hua akaik wawan sangasang, Iso ma Jekop. Iso i tetel pamu tuahé telao ti pate i hitol, i aka lioi waliko ti ala i tel pamu ukean. Tuahe ti angain tehu i sowini hani Jekop ukei walikosolian ti tel tamalalu. (*Genesis 25*)

Israel

Israel se axe Jekop liai tenen ti hahainai Haeu. I tel ti hua nati Aisak ma Rebeka. (*Paxaiwa Genesis 32:22-28*) Hatesol teka laha nakuama ti huopanim hua nati Jekop laha se seilon ti Israel. Tin seilon axai laha teka Ju ma teka Hibrū. Tetexux xux ti teka Israel totonai tin axan Israel. Aope ie tin laha axaxai axan Palestain. Ti kuewen axan Keinan, xux tetexux Haeu hani teka seilon ti Israel muhín ti laha ox saliliwa Igip.

Iv (*2 Korin 11:3; 1 Timoti 2:13*)

Iv se tetel axoi Adam. Ti Haeu tanomiwa tehu pon ie, Adam tetel Haeu tanomi imat ti lawe seilon. I uke tea kui pope Adam ape i tanomi Iv. Iv tetel uli Satan puluti waxainiwa. I aní huai pata ti Haeu haliní ape tin i axi hetekie aní Adam. Aile ape lalu huhua matekalang wanen ti tahaii kakai Haeu. Hutui taen ien ape seilon aile saun lialun. Iv hanatuale tolu natulalu, Kein, Abel ma Set.

Jekop

Jekop i nati Aisak tetel nati Abraham. Axan liai tenen Israel. Natun wawan huopanim hua. Huopanim huosol seilon ti Israel i ahuma ti lato.

Jeremaia (*Matiu 2:17, 16:14, 27:9*)

Jeremaia i tel ti teka masiwi ti kuluiai kakai Haeu. Ti kuewen i kak kilami kilan waliko ti i sohotuen lokon ti Krais he tehu pon ie, tel awaiakaha ti Haeu taloma. (Paxaiwa teik pepa Jeremaia)

Jesi (*Matiu 1:6; Luk 3:32; Aposel 13:22; Rom 15:12*)

Jesi i tame tel masiwi David tetel Jises

Krais nakuama tetan. Ti kuewen, Aisaia tel kuluiai kakai Haeu tai kaxiwen ka Krais nakua ahuma ti Jesi ma David.

Jises

Jises se axe tel Nati Haeu. Ti kakai Hibrū salangawé tenen ax Jises i ukek, "Awaiakaha" (*Matiu 1:21*). Jises tin laha axai i Krais, tel Nati Haeu, tel Nati Seilon, Emanuel ma tel nati David.

Jona (*Matiu 12:39-41, 16:4; Luk 11:29-32*)

Jona i tel ti kuluiai kakai Haeu. Telao Haeu talo i hani tehu taon axan Niniva ti kaxiakakaian. Tuahe Jona pahan kum is ape i ku he tea waian hani texux xux liai. Ti i luluainiwa, Haeu hatano tehu ahon lalap. Teka seilon he tea waian tioi ka nake Jona, aile ape laha hok xoimi i hani itax. Tok xixi lalap tolomi i ape i to leili tian ngain tolulu. Muhiñ tok xixi kaloli i hani ngixi peixux. Taen ien Jona hong tamani Haeu ape i lua hani Niniva ti kaxi ahutiai kakai Haeu. (Paxaiwa teik pepa Jona).

Josua (*Aposel 7:45; Hibrū 4:8*)

Josua i tetel i to masiwi ti teka Israel muhi matei Moses. I neini laha hani Keinan, tetexux xux Haeu kilami haniwen tetalaha. Laha waxaini hileiai teka seilon ti ien ape se laha tonai Keinan. Josua sei teik hepekeun ien hani huopanim tesol seilon ti Israel. Tuahe tesol lato nakuama ti Livai lato to masiwi ti hukuminiai Haeu ma seilon, aile ape lato tap puase hepekeun. Josua i tel masiwi tuah ti neiniai teka Israel. I haeliel hawanei ti kolai saun ti usi hawanei Haeu.

Ju

Seilon teteka axalaha Ju, se teka laha nakuama ti Abraham. Salangawé tenen ax Ju i ukek, "seilon teteka lato totonai texux xux Juda." Lato nakuama ti Juda, tel ti huopanim hua nati Jekop. Lato se tesol ti tetesol huopanim huosol seilon ti Israel. Imuh, tenen ax Ju i kalauhi hatesol seilon ti Israel. Tuahe leili teik pepa ie na i ukek "teka Ju," kumahe ka lawe i kakak hatesol teka Ju, hina i kakak mewenae teka masiwi ti laha.

Juda (*Hibrū 7:14, 8:8; Hahatakei Haeu 5:5, 7:5*)

Juda i tel ti tesol huopanim hua nati

Jekop. Teteka laha nakuama tetan laha se tesol ti teka seilon ti Israel laha axai Juda. Lokon ti Jises, texux xux teka laha nakuama ti Juda totonai, axan Judia. Tehu taon Jerusalem se leili texux xux ien. Jises Krais i takah ahuma ti teka laha nakuama ti Juda.

Kahikahi Jises Krais (Kakai Inglis: Disciple / Follower)

Teka kahikahi Jises se teteka seilon namilolaha xooaan tetan ma laha hong tamani kakaian. Laha se ukalan ma tuan ti hahitake axe Krais. Leili pepai Matiu, Mak, Luk ma Jon, i kakak sale tesol huopanim huhua kahikahi Jises. Lato se tetesol seilon i kilami ti hamalum kapita kapin. Iaxai lato aposel ape i talo lato ti kaxi ahutiae meng solian tetan, masin ti i kakak leili pepai Matiu 10:1-4.

Kein (Hibru 11:4; 1 Jon 3:12; Jud 11)

Kein i tel nati Adam ma Iv pamu. Abel tel ukalan komuh, i telei tok sipsip ape i hani Haeu. Kein hani Haeu an ti kin. Haeu amuke waliko ti Abel hani i, tuahe i kum paxai amuke waliko ti hahaniai Keiri. Aile ape Kein leng telei Abel. Nake ti tenen saun ien, Haeu ukek Kein tap tahi to matuhaian. (*Genesis 4:1-16*)

Keinan (Aposel 7:11, 13:19)

Keinan se axe texux xux Haeu kilami haniwen ti teka seilon ti Israel. Aope ie axan Israel. Hina laha axai Palestain.

Krais

Krais tin axan tenen Mesaia. Tenen kakain Krais i ahuma ti kakai Grik ape tenen kakain Mesaia i ahuma ti kakai Hibru. Huonen kakain ien i ukek, "seilon tel laha tih i wel hani he patun." Ie se saun ti kuewen lawe teka Ju ailele. Na Haeu kilami tel seilon masiwi ti teka Israel, tel kuluiak kakai Haeu tih i wel hani he patun ti kola haniai seilon ka i se kikilamiai Haeu. Tuah Jises, Holi Spirit kola ka i Krais. Haeu kakawen i taloma tel awaiakaha, tetel i neini kaha usiai saun ti Haeu. Se Jises tetel Krais. I tetel Haeu kilamiwen ka i taloma. Hatesol teka Ju laha to monomon ti Krais tuahe ti Haeu taloma Jises, pate palai teka laha soh ka i Krais.

Kros

Ie se saun tenen ti teka Rom. Na tel i aile waliko tenen pate lialun masin teleiai seilon ma na aile halialu-alaha ti waxiai soxi, laha hakea telei i he kros. Laha tahi haholo huaik pata. Imuh laha tahi seilon hani he teik pata ien. Hina laha tua uke tal xinotian. Laha lauti hatuhi teik kros ape tiliwen tel seilon tua ak mat. Tel ti na i mat ukek ien, pate i lamani hawanemu moloan. Teteik kros laha hakea Jises, laha tanomi ani pata. Lokon ti Jises, matein tenen ien se pate hienain wanen.

Lalape soliai Haeu (Kakai Inglis: Grace)

Hatesol seilon aile saun lialun. Aile ape tap puki solian ti kaha ti i pon na Haeu aile hasolia hani kaha. Haeu taloma telawé Natun awaiakaha ti kawatan ti lialui woukaha. I aile ukek nake i waheni hawane kaha, kumahe nake ti soliai pupuasakah (Rom 2:24; Taitus 3:4-5; Epesus 2:8). Lawe ngain kilan waliko solian i aile hani kaha. Tenen saun ti Haeu ien i haxewa ka Haeu hahani kaha larape soliaian kalak kaha kum tapai wanen ukean.

Livai (Hibru 7:5, 9, 10; Hahatakei Haeu 7:7)

Livai i tel ti tesol huopanim hua nati Jekop. I hanakuama tesol ti teka seilon ti Israel. Teka laha pupuas leili Ingi Haeu, laha nakua ahuma ti Livai. Teka masiwi ti hukuminiai Haeu ma seilon laha kilami ahuma ti Aron, tetel tin i nakuama ti Livai. Matiu, tel ti tesol aposel ti Jises axan tin Livai. (Matiu 9:9-13; Mak 2:14; Luk 5:27-29)

Lot (Luk 17:28-32; 2 Pita 2:7-8)

Lot i tel nati Haran tetel ukale Abraham komuh. Ti Abraham lua hahaniwa texux xux ti hahaniai Haeu, Lot tin lua usiwa i. Ti lalu ape hoi liai ien, Lot lua to hani tehu taon Sodom. Teka seilon ti ien laha aile kilan waliko tenen pate lialun. Saun ti laha aile ape Haeu ukek ka i aile halialu hawane Sodom. I talo tel engelaun ti hahongoi Lot ka ox saliliwa tehu taon ien. Muhin ti Lot hetekie axoan ma natun oxawa, Haeu lui hatapo kalutini Sodom. Tel engel hone Lot ka kum pax alilia ti lato ox sasaliliwa taon. Tuah tel axoi Lot i tohea pax alia ape lokon

ien wanen tupuan i tanoma hanowi patotoi sol. (*Genesis 18-19*)

Mana (*Jon 6:31, 49; Hibr 9:4*)

Lokon ti teka seilon ti Israel ox saliliwa Igip, laha luluainiwa he lohong leili ahang 40. Ti ien Haeu hani laha tenen an axan mana. Lawe ngain mana putama patul ape laha ani. (*Exodus 16:13-36*)

Masiwi ti hukuminiai Haeu ma seilon (Kakai Inglis: *Priest*)

Teka seilon ien laha kilami ti tukei awe teka Israel hani Haeu. Lato telei manihuh ti hani Haeu hasawiai wasele seilon hani kapin. Lokon ti Jises lato ailele tenen puasain ien leili Ingi Haeu ti Jerusalem. Lato ahuma ti Aron, tetel i nakuama ti Livai. Tel masiwi tapein ti hukuminiai Haeu ma seilon i se tetel pamu tuah ti lato hatesol. Laha kilami i masiwi ti leili ahang tehue, muhin laha sohi ulei. Telawe masiwi ien i soh hani tesol Tuah Tapein leili Ingi Haeu ti kahuiai lialui woun ma ti teka Ju liai. Tin hina teka masiwi tuah ti hukuminiai Haeu ma seilon. Leilolato teka seilon tenen pamu masiwian, teka kemuk laha masiwi tapein ti hukuminiai Haeu ma seilon ma tin teka akikilaha seilon tuah. Leili pepai Hibr i ukek ka Jises Krais se tel masiwi tapein ti hukuminiai Haeu ma seilon lian tehue. Puki i wanen kahui lialui woukaha ti i mat he kros lehe teka namilokaha xoxoan ti Jises Krais Haeu namiloi ukek kaha seilon tetan ma kaha to kapin lian tehue. (*Paxaiwa Hibr 5-10* ma hosai tel masiwi tapein ti hukuminiai Haeu ma seilon he tetepap 579.)

Meng solian (Kakai Inglis: *Gospel ma na Good News*)

Jises talo tesol aposel tetan ti kaxiai meng solian hani lawe seilon (*Mak 16:15*). Meng solian se tetenen ie. Haeu taloma tel Natun Jises Krais hanima tehu pon itan ie. I mat ukek kawatan ti lialui woukaha. Na kaha towialuh ti saun lialun ape hana hatapo namilokaha hani Jises, kaha ape kumahe hahitake lengei Haeu. Na masin ien, kaha tunahi tonain tuah ape kaha to kapi Haeu lian tehue. (*Paxaiwa Jon 3:16*)

Moses

Moses tel ti teka masiwi tuah ti teka seilon ti Israel. Lokon ti teka Igip hapuasa hahalialu laha, Haeu kilami i ti neinialaha lehe laha ox salili Igip hani tetexux xux i kilami haniwen laha. Haeu sohot hani Moses ti tenen aweisal ie. Moses ningahi teik kokole sisihan i xekekex tuahe i kum lua. Leili teik sisihan ien Haeu kakak kapi Moses. (*Paxaiwa hosaua he tetepap 313*.) Ti ien i kilami Moses neini ahutiai teka seilon tetan ti Igip. Moses aile kilan waliko lalap ti kui pohe Haeu (*Exodus 4-17*). I seilon tetel Haeu hani i nauna ti haniai teka seilon ti Israel. Moses tai kilan kakain leili pepai Haeu ti laha axai *Genesis*, *Exodus*, *Leviticus*, *Numbers* ma *Deuteronomy*.

Namil ti Haeu xinoti kapi seilon tetan (Kakai Inglis: *Covenant*)

Tenen namil Haeu xinotimu imat: *Luk 1:72; Aposel 3:25, 7:8; Galasia 3:17; Hibr 9:1*

Tenen namil Haeu xinoti imuh: *Matiu 26:28; Mak 14:24; Luk 22:20; Rom 11:27; 1 Korin 11:25; 2 Korin 3:6; Hibr 7:22, 8:6-13, 9:15, 10:16, 12:24, 13:20*

Tel seilon na i xinoti tenen namil kapi tel liai, i kak hahawane ka i aile hani tel seilon ien waliko ti i kakak. Ape tel liai tin masin. Ti Haeu xinoti tenen namil kapi teka Israel, i kak hahawane ka i Tamalato ma Masiwi ti lato na lato hong tamani kakaian. Huonen namil Haeu xinoti kapi teka seilon tetan. Tenen ti Haeu xinoti kapi Moses, i ukek ka teka laha usi nauna ti Haeu laha hamalum seilon tetan (*Exodus 19:4-6*). Tuahe tap tel i pon usi hapoponowi hatapoi tesol nauna ien, aile ape tap tel i pon sohot seilon sawisawin ti puli Haeu na i tohongi lali tewau aweisal ien. Tenen namil Haeu xinoti imuh, i ukek ka na tel seilon namilokaha xoxoan ti Jises Krais ma i usi hawane i, Haeu paxai ukek i seilon sawisawin.

Nauna ti Moses (Kakai Inglis: *Law*)

Nauna ti Moses hahaniai Haeu lato se leili tesol tepanim pepa leili pepai Haeu. Tesol nauna ien Haeu hani Moses he tehu Maunt Sainai ti haniai teka Ju. Laha sokok ka

na laha usi hatapo tesol nauna ien, Haeu paxai ukek laha seilon sawisawin. Tuahe tap tel i pon usi hapoponowian. Aile ape kaha teka kahikahi Krais kumahe hahitake nauna ien. Kaha hahitake nenein ti Krais ape lalape soliaian i kakalauhi kaha. Haeu pahan kaha wahlen hawanewa i ma seilon liai. Huonen nauna ien pate tuah wanen. I se salangawe hatesol nauna ti Haeu. (*Matiu 5:17; Jon 1:17, 15:1-17; Aposel 13:39, 15:24-28; Rom 5:18, 10:4; Galasia 2:6; Epesus 2:15; Kolosi 2:14; Hibru 7*)

Ngain lalap ti teka Ju (*Leviticus 23*)

Hina ngain lalap ti teka Ju lawe laha apuha amuam leili ahang tehu tehu. Ngain ien se taun ti nameniai lalape soliai Haeu ti i aile hahani teka matahaun ti laha.

Ngain lalap ti nameniai taun ti waxi aliakei Ingi Haeu (Kakai Ingilis: *Festival of the Dedication of the Temple*) (*Jon 10:22*)

Taun tehu ien teka Ju nameni lokon ti kuewen Judas Makabeus malai taneni aliake tehu Ingi Haeu ape i apeseni lehe teka seilon lotui Haeu ien. I aile ukek nake teka Siria laha hil papahoxai teka Ju, laha hapuasa halialu tehu Ingi Haeu ape uke lotuwaliko ti kumahe Haeu. Ngain lalap ien tin teka Ju axai "Ngain ti xewan i kam." Nake ti tenen ien Jises ukek, "Nga masin xewai alon nga haxewa lawe seilon" (*Jon 9:5*). Ngain lalap ien teka Ju axai Hanukah.

Ngain lalap ti Pasova (Kakai Ingilis: *Festival of the Passover*) (*Matiu 26:2, 5, 17-19*)

Ngain lalap ti Pasova se pate ngain tuah ti teka Ju. Teik kakain "Pasova" ukek "salini." Taun tehu ien teka Ju nameni lokon ti kuewen teka matahaun ti laha ox salili texux xux Igip. Ti lokon ien Haeu talo tel engelaun ti teleiai lawe akaik wawan pamu ti hatesol ingi teka Igip. Tuahe i hone teka Ju ka teleiwa tok sipsip wawan uluha ape kewa kakaun ahui kilamiae lawe kahip ti ingalah. Ti tel engel ningahiwa kaka, i salini tehu ing ien ape i kum telei akaik wawan pamu leili ing (*Exodus 12:23*-

27). Nake ti tenen ien ing tehu tehu ti teka Ju laha telei tok sipsip wawan uluha ape laha ang amuam leili ngain lalap ti Pasova. Ape teka kahikahi Krais ukek ka Jises Krais se tok sipsip wawan uluha ti Pasova nake tel na i soh tetan, i ape kumahe hahitake lengei Haeu. Ngain lalap ien teka Ju axai Pesah.

Ngain lalap ti aniai bret tenen tap ist (Kakai Ingilis: *Festival of Unleavened Bread*) (*Matiu 26:17; Luk 22:1; 1 Korin 5:6-8*).

Teka Ju amuke tehu ngain lalap ien leili ngain ti Pasova. Ti teka Ju ox sasalili Igip tap taun ti atengiai bret na i xiu lehe laha hunai. Aile ape laha ani bret tenen tap ist. Leili teik pepa ie, ist tu kikilami saun lialun. Ngain lalap ien teka Ju axai Hag Hamatzot.

Ngain lalap ti ataiai houha (Kakai Ingilis: *Festival of Shelters / Festival of Tabernacles / Festival of Booths*) (*Jon 7:2-52*).

Ti ngain lalap ien teka Ju amuam nake taun ti apuhiniai an ti he kin. Laha atai houha ape laha ingai ti leili puasain tehu. (*Leviticus 23:33-36; Deuteronomy 16:13-15*). Laha nameni lokon ti teka matahaun inggangai tuah houha ti laha luluanini he lohong leili ahang 40, imat ti laha tahia hani texux xux Haeu kakawen i hani laha. Ngain lalap ien teka Ju axai Sukot.

Ngain lalap ti Pentekos (Kakai Ingilis: *Festival of Pentecost*) (*Aposel 2:1-4, 20:16; 1 Korin 16:8*).

I sohot 50 ngain muhi Pasova. Teik kakain "Pentekos" ukek "50." Ti ngain lalap ti Pentekos teka Ju amuam nake taun ti apuhiniai an ti he kin axan wit. Tin laha nameni lokon ti kuewen Haeu hani Moses nauna tetan ti he Maunt Sainai ti haniai teka Ju.

Aope ie, Pentekos se taun ti teka kahikahi Krais nameni lokon ti uli Holi Spirit puasawa leili teka namilolaha xoxoan ti Jises Krais. (Paxaiwa hosai teka kahikahi Jises he tetepap 298) Ngain lalap ien teka Ju axai Savuot.

Noa (*Matiu 24:37-38; Luk 3:36, 17:26-27; Hibru*

11:7; 1 Pita 3:20; 2 Pita 2:5)

Noa takah muhi tepanim tolu seilon ti laha nakuama ti Adam. Lokon ti Noa, seilon aile kilan saun tenen tenen ti pate lialun. Nake ti tenen ien, Haeu ukek i hasomu kan ti aile halialualaha ma hatesol waliko ti tehu pon ie. Tuahé Noa i tel seilon sawisawin, i hong tamani kakai Haeu. Aile ape Haeu hone i tanomiwa tea waian lalap, waxiwa tel axoan, tolu natun ma axoalato ape ku haniwa he tea waian hetekie manihuh ma manixux tenen tenen, he pahoa tok wawan ma tok hehin. Noa hong usi waliko ti Haeu kakane i. Muhi ti Noa ma tesol seilon kapin ku haniwa he tea waian, Haeu hauxa akah lalap ape kan i som atuhî tehu pon ie. Kan hutomi tataen maunten. Hatesol seilon ti tehu pon ie laha waut mat, meweneae Noa ma tesol seilon kapin lato moih. Kilan pangapang tamusua ape kan i nun, hepekeun i paxe alia. Noa ma tesol seilon kapin ahuta he tea waian. Ape Noa haxawa axe Haeu nake i awai lato. Haeu kakane Noa ka i kum hasomu ulei kan hanowi tetehu ien. (*Genesis 6-9*)

Oliv (*Jon 1:1, 26; Hahatakei Haeu 11:4*)

Oliv se tenen pata ti hina huan. Teka Ju lawe laha hapuasa huan ti ailei wel. Wel ti oliv laha uke hunai ai an ma ailei kilan waliko liai. I se tuah wanen ti teka Ju. Kilan wanen pata oliv xexex he tehu maunten xohixohin Jerusalem. Aile ape laha axai Maunt Oliv. Hosai tenen pata oliv leilon ie muhi tetepap 120.

Omega (*Hahatakei Haeu 1:8, 21:6, 22:13*)

Omega se tiliai alfabet ti kakai Grik, masin "X" i se tiliai alfabet ti kakai Seimat. Jises i tetel ti hutuiai lawe waliko. I tin tetel tiliai lawe waliko.

Parisi

Teka Parisi laha se seilon tuah leili teka Ju. Puasalahala pala masin puase teka hanau nauna ti Moses. Laha tioi hawane tesol nauna ien tuahe tin laha hanau kilan saun ma nauna ti puki laha tua tanomi. Kewi laha hanasanans nake laha sokok laha pamu ewian ti teka liai. Kewi taun leholaha i uke huoka nake waliko ti laha hanau, puki laha kum puas usi. Teka Parisi pahoxai Jises ape laha

tohongi lali teleian. Puki aposel Pol i tin tel Parisi imat ti i sohot tel kahikahi Jises Krais.

Rom

Rom se tehu taon lalap leili texux xux Itali. Lokon ti Jises he tehu pon ie, teka Rom hil waxy kilan xux hani hahitakalaha. Texux se Israel, lato tin hahitake nenein ti teka Rom. Nake ti tenen ien, teka Ju watakai hawane laha ape pahalato usi xax-awenialaha ti xuxulato. Ti lokon ien Sisa tel masiwi ti teka Rom, i tel masiwi tapein ti kilan xux ti tehu pon ie. (Paxaiwa hosai Rom muhi tetepap 408)

Sabat

Ti leili pepai Haeu i kak ukek ka leili ngain tepanim tehu Haeu aile tehu pon ie. Ape ti telao ngain tepanim huohu, i hanau nake i hat-apoen tenen puasain ien (*Genesis 2:1-3*). Aile ape Haeu ukek ka seilon tin laha puasawa ngain tepanim tehu ape telao ngain tepanim huohu laha hanauawa. Teka masiwi ti teka Ju laha tanomi palahi kilan nauna sale Sabat, aile ape ailan wanen ti teka seilon usian. Teka Parisi leng hawane ti Jises haewia seilon telao Sabat ma ti tesol kahikahin asahi ani huai kon ti tehu ngain ien. Laha ukek ka lato xaputiwen nauna ti Haeu tuahé kumahe salan. (*Luk 6:1-11, 13:10-17, 14:1-5*)

Sadusi

Teka Sadusi se teka seilon tuah ti leili teka Ju. Laha hanau seilon usi hatapoi nauna ti Moses ma saun ti teka Ju. Namilolahala pala masin ti teka Parisi tuahé lawe laha kak hapatapat kapi lato ti sale seilon maten. Teka Parisi lato soh ka Haeu hamoiha aliake seilon maten tuahe teka Sadusi laha kapaxe hawane.

Sainai (*Aposel 7:38; Galasia 4:21-31*)

Sainai se tehu maunten ti Haeu hani Moses tesol nauna tetan ti haniai teka Ju. (Paxaiwa hosai Maunt Sainai muhi tetepap 280.)

Saion (*Matiu 21:5; Jon 12:15; Rom 9:33, 11:26; 1 Pita 2:6*)

Saion se axe tehu ti tesol maunten ti tehu taon Jerusalem tutu. Tehu Ingi Haeu se patul he tehu maunten ien. Hina na laha kakak Saion laha kakak

Jerusalem hatehu ma na tehu taon ti Haeu. Saion tin i tu kikilami teka kahikahi Jises Krais ma tone Haeu. (Paxaiwa Hibrus 12:22; Hahatakei Haeu 14:1)

Salan wanen (Rom 1:25, 9:5; Galasia 1:5; Hibrus 13:21)

Ti kakai Hibrus teik kakain "amen" i ukek, "salan wanen." Ti na tel seilon lotu, teka liai tili ukek, "salan wanen" ti hakuiai lotu.

Salm (Kakai Inglis: Psalm)

Teik pepa Salm se pepai pak ti haxawai Haeu. David ma teka liai tai tesol pak ien ti kolai wawahanen ti lato hani Haeu ma ti samerian. Tin lato kamei Haeu huhual ma kaxi ililam ti lato.

Samaria

Samaria se texux xux wasole Judia ma Galili. Ti kuewent teka matahaun ti teka Samaria laha se Ju tuahe laha sal ahuhu hani teteka laha kum soh ti Haeu. Saun ti xuxulaha i sohia ape i selai laha ti teka Ju. Aile ape teka Ju paxai teheni teka Samaria. (Luk 10:25-37; Jon 4:4-42)

Samuel (Aposel 3:24, 13:20; Hibrus 11:32)

Samuel i tel ti teka masiwi ti kuluiak kakai Haeu. I tetel i tihii wel hani pati David ti kilamian ka i masiwi ti Israel. Samuel i tel ti teka masiwi tuah ti neiniae teka Israel.

Sara (Rom 4:19, 9:9)

Sara i tel axoi Abraham. Kalak i liekeh atengi salaimataun i hatakaha Aisak tel akaik wawan. I hapoponowu kakai Haeu ti i kakanewen Abraham ka kilan seilon nakuama tetan.

Satan (Kakai Inglis: Satan, Devil ma na king of this world)

Satan i tel masiwi ti teka spirit lialun. Imat wanen i se tel ti teka engel ti Haeu tuahe i pahoxai Haeu. Aile ape Haeu xaxaweni i ti tesol tonan. I puluti hakila seilon ape i tohongi eliel i haputaiala ailei saun lialun. I hanamena kapitini teka kahikahi Krais saun lialun ti laha ailewen lehe xoxoi namilolaha ti Jises Krais i put. Tuahe Jises i pamu kuiaina ti Satan. I xoini pohe Satan ape imuh i halialu tamusuke i. (Hahatakei Haeu 20)

Sipsip (Paxaiwa hosai tel ngahatiai sipsip muhi tetepap 248)

Sipsip se tenen manihuh lawe teka Ju tupui. Le se hina saun ti sale ngahatiai sipsip lokon ti Jises:

- 1) Seilon tel i tupi kilan sipsip. Laha kum hahamalum leili taon ma toan. Tel ngahatian lawe i nahike ahuti hani tesol ti kilan pahoah analaha.
- 2) Teka ngahatiai sipsip lawe laha heuta xohixohin kapi sipsip. Laha paxai peteni lehe manihuh lengean kum telei. Teka seilon ien laha tioi hawane tupulahe sipsip. Laha ila tioi tok tok ti lato. Teka sipsip hong tioi hawane tel ngahatiai lato ma lawe lato nahih usi i. (Jon 10)
- 3) Tel ngahatiai sipsip i aile ngah tiehialaha. Na ipong i hasoho laha hani leilon ti awaialaha. I eng peteni laha he aweing. Taun hina, seilon ti xuxuina laha han soh hani leilon xuina sipsip.
- 4) Taun hina teka Ju laha uke sipsip wawan uluhu ape laha telei hani Haeu ti kahuiai lialui woulaha. Tuahe kake sipsip i kum hasawi uke laha ti puli Haeu. Jises se masin tok sipsip wawan uluhu nake i mat ti kahuiai saun lialun lehe Haeu oxoxi kaha ti kawatan ti lialui woukaha ma wasolakaha kapi Haeu i sawi na namilokaha xoxoan ti Jises Krais. (Jon 1:29, 36; Hahatakei Haeu 5:13, 22:1)

Sisa

Sisa i tel masiwi tapein ti teka Rom. Lato hil waxi kilan xux hani hahitakan. Lokon ien tenen ax Sisa laha axai hani axe lawe masiwi tapein ti teka Rom.

Sodom (Matiu 10:15, 11:23-24; Luk 17:29; Hahatakei Haeu 11:8)

Sodom se taon tetehu Lot toto. I tel nati Haran tetel ukale Abraham komuh. Tehu taon liai xohixohin ien axan Gomora. Teka seilon ti Sodom ma Gomora laha to ailele kilan saun tenen pate lialun. Nake ti lialui woulaha Haeu lui halialu tamusuke huohu taon ien. (Genesis 13:12-13; 18:20, 19:24)

Solomon (Matiu 1:6-7, 6:29, 12:42; Luk 11:31, 12:27; Aposel 7:47)

Solomon i tel nati David. I se tel ti teka masiwi tuah ti teka Israel. Telao Haeu sohot hani Solomon ti he paxangoan ape kamei i waliko tetenen ti na pahan. Solomon

kamei Haeu ti axian namil xewan lehe i pon neini aluiniae teka seilon. Ape salan, Haeu hani i namil xewan wanen. Tin Haeu hani i kilan waliko ape i sohot tel seilon ti kilan soxi. Tehu Ingi Haeu matekalang se atataiai Solomon. Tanome tehu Ing ien solian tapein wanen. Imat ti i atai tehu Ingi Haeu, teka Ju lolotu leili ing sosoxope.

Spirit lialun (Kakai Inglis: Evil spirit)
(Matiu 17:18; Mak 5:1-20; Luk 4:33-36; 1 Timoti 4:1)

Teka spirit lialun laha se kahikahi Satan. Laha elifiel halialui seilon ma haputai alaha lehe laha tahi kakai Haeu ape usi Satan. Spirit lialun pon i soh hani seilon ti kapiti halialualaha. Kasinan wanen i sohot hani teteka laha hani tupualaha ailei puase Satan ma waliko tenen pate lialun. Tuahe kui pohe Haeu i xoini hawane pohe spirit lialun. (1 Jon 4:4)

Synagog

Lawe taon ma toan ti teka Ju hina synagog. I se tehu ing ti apuhai alaha, kasinan telao Sabat. Leili ing ien teka Ju lawe laha lotu, ridai kakai Haeu ma hanau nauna tetan. Lokon ti Jises, leili tehu ing ien, tin laha hong papaxai kakain ti na seilon he sulusul.

Tatahan ti Haeu kola hani seilon (Kakai Inglis: Mercy) (Matiu 5:7; Mak 5:19; Luk 1:78; Rom 11:31-32)

Haeu tel Masiwi i Haeu ti tatahan nake i waheni hawane kaha. I kola hani kaha tatahan tetan ti na kaha tunahi kawatan tenen tenen ma ti na kaha sihimalil ape kaha kum tioi tenen na kaha aile. Ti i kum axi kaha kawatan ti lialui woukaha kalak ala i tapai ti kaha uke, ien se i kokola lalape tatahan ti Haeu. I atetengi tutuen na kaha towiahu ti lialui woukaha ape kaha hong usi kakaian.

Tehu lohe kakain tuah ti Haeu (Kakai Inglis: Ark of the Covenant) (*Hibru 9:4; Hahatakei Haeu 11:19*)

Tehu lohe kakain tuah ti Haeu laha tanomi ani pati ape laha pakati atuhi hatehu ani gol. Leilon tehu patula ani gol hetekie tenen an

anax mana, teik kuai Aron ma huai pot tenen mamanahan ti Haeu tatai huopanim nauna tetan. Tehu bokis ien teka Israel to kau usiusi laha ti he lohong. Lawe laha hana leili tehu ing sosoxope ti Haeu ape imuh laha hana leili tehu Ingi Haeu. Tehu bokis ien ma lawe waliko ti leilon se pate tuah wanen nake lato tu kikilami tenen namil ti Haeu xinotiwen kapi teka Israel. (Paxaiwa hosau he tetepap 588)

Teik kikilam ti kotiai uli walikoi akaik wawan (Kakai Inglis: Circumcision)
(Aposel 15; Rom 2:25; 1 Korin 7:18-19; Galasia 6:15)

Saun ti teka Ju lawe laha koti uli walikoi akaik wawan tataen ngain tepanim tolulu kewa muhi takahan. Haeu tetel i hone Abraham ti aile kewak ien. (Genesis 17:9-14.) Ien se kikilam ka laha Ju ma seilon ti Haeu. Lokon ti uli seilon kaxiwa meng solian ti Jises Krais, hina ti teka Ju laha kak ukek ka tel na pahan i sohot kahikahi Krais i kotiuma uli walikoun. Ien se kolakol ka i se ape tel Ju. Pol namilon kumahe masin ien. Ti leili tesol pasun i kakaxi ka kumahe ti kotiai uli walikoi seilon, laha sohot kahikahi Krais. I hahanau ka aweisal tewawawe na seilon pahan Haeu paxai ukek ka i sawisawin. I soh hawaneawa ti Jises Krais ma hong usiwa kakaian.

Teka hanaui nauna ti Moses (Kakai Inglis: Teachers of the Law)

Hina ti teka Ju puasalahana hanaui seilon nauna tetesol Haeu hani Moses ti haniai teka seilon ti Israel. Kilan ti laha puasalahana pala masin puase teka Parisi. Teka hanaui nauna ti Moses, kewi laha pahoxai Jises Krais.

Teka kuluiai kakai Haeu (Kakai Inglis: Prophet)

Tel kuluiai kakai Haeu i se tetel Haeu kaxi hani i kakain lehe i kului hani seilon. I tukei awe Haeu hani teka seilon. Ti kuewen Haeu taloma kilan teka kuluiai kakaian masin Elaija, Aisaia ma Jeremaia. Kewi kakain ien i kakak ka seilon towiahua ti saun lialun ti laha, Tin Haeu hapuasa lato ti kaxi hatakeiai

Haxewai... Teka kumahe Ju 338 Haxewai... Tone waliko ti haniai Haeu ma Tone luiai sanda

waliko ti na i sohot imuh. Kilan wanen ahang imat ti takahé Jíses, lato kak kilami sohotuan, waliko ti i aile ma waliko tenen ti na i sohot hani i. Tin lato kakaxi waliko ti na i sohot ti tapoi tehu pon ie, imat ti Jíses Krais aliamá ape i paxai kolongeni woi lawe seilon.

Teka kumahe Ju (Kakai Inglis: *Gentile*)

Ti kakai Grik teik kakain “Gentile” ukek “hatesol teka kumahe Ju.” Teka Ju pate laha haneke aliake laha nake Haeu kilami laha seilon tetan. Laha paxai teheni seilon ti xux liai ma namiloi ukek ka teka ien kum tioi wanen Haeu. Tuahé Jíses Krais mat ti xaxaweni hetekieiai tenen saun ti wawatak ien. Aile ape i pon na teka Ju ma teka seilon liai he aunaun na masin laha hahitake nenein ti Haeu. (*Rom 3:29-30; Epesus 2:11-18, 3:6-7*)

Teka waxiai moni ti teka Ju (Kakai Inglis: *Tax collectors*) (*Matiu 5:46; Mak 2:14; Luk 3:12*)

Teka seilon ien se teteka Ju ti teka Ju liai lawe paxai watakai hahawane nake lato waxy moni ti teka akikilato ape hani teka Rom a lawe lato waxy hasea. Lato tap wanen tatahan hani teka seilon. Teka liai namiloi ukek lato seilon lialun nake lato huhualí teka akiki xux liai laha kikulake xuxulato teka Ju. Sisa tel masiwi tapein ti Rom i sowini hani teka seilon tuah ti xux texux texux ti hahitake Rom ti apuhiniae moni ti teka akikila. Laha aile kolongeni ka teka seilon hani.

Tel Nati Seilon (Kakai Inglis: *Son of Man*) (*Matiu 9:6; Mak 2:28; Luk 9:22; Jon 3:13-15; Aposel 7:56*)

Ti kuewen Daniel tel kuluiai kakai Haeu i hapuasa tenen ax “Nati Seilon” ti i kakaxi tel Masiwi tuah ti Haeu taloma. (*Daniel 7:13-14*) Salangawe tenen ax ien se Krais tetel Haeu taloma. Jíses axai aliake i tel Nati Seilon. Ti i kak ukek ien, i kola ka i se Krais, i tel Masiwi hina pohe Haeu. Jíses tel Nati Seilon i se seilon masin kaha a i tin Haeu.

Tesol kaui kawatan ti tap tahi tapoan (Kakai Inglis: *Hell*)

Seilon teka laha kum soh ti Jíses Krais, tap tel tutuen i awai laha ti lengéi

Haeu nake ti lialui woulaha (*Aposel 4:12*). Aile ape ti na laha mat, laha uke kahulaha ti tesol tonain pate lialun leili ah ti tap tahi pehoan. (*Mak 9:47-48; Hahatakei Haeu 19:20, 20:11-15*). Ti ien laha ilameri hawane lalape moloan tuahe tap tel po huali laha. (*Luk 16:19-31*)

Tesol tuah tapein ti Haeu (Kakai Inglis: *The Most Holy Place*) (*Híbru 9:3-4, 7-8, 11, 25; 10:19, 13:11*)

Tesol ien se patalal wanen ti leili Ingi

Haeu ma ti leili tehu ing sosoxope ti Haeu. Tehu lohe kakain tuah ti Haeu laha hahana ien. Mewenae tel masiwi tapein ti hukuminiae Haeu ma seilon i pon soh hani tesol ien. I aile tehue ti leili ahang tehu lehe i kahui lialui woun ma ti teka seilon ti Israel. (Paxaiwa hosai tesol tuah tapein ti Haeu imat ti tetepap 441.)

Tonain kapi Haeu ti tap tahi tapoan (Kakai Inglis: *Eternal life*) (*Matiu 16:25; Mak 10:17; Luk 18:30; Jon 1:4; Aposel 11:18*)

Tel na namilon xoxoan ti Jíses Krais i sohot seilon haun ti usiai Haeu ape i to kapin lian tehue (*Matiu 25:46; Luk 10:25-28; Jon 3:14-16, 36, 5:24, 39-40, 6:40, 47, 11:25-26*). Tuahé tonain kapi Haeu kumahe mewenae ti tesol tonan, pon kaha uke ti kaha tutuen he tehu pon ie (*Jon 10:10, 28, 17:1-3, 20:31*). Aile ape kaha pon lioiai lialui nanahiakaha ma ti hong tamaniai kakai Haeu. (*2 Korin 5:17; Epesus 4:22-24*)

Tone Haeu (Kakai Inglis: *Heaven*) (*Matiu 6:20; Mak 12:25; Luk 12:33*)

Tone Haeu se tesol toan solian tapein wanen. Jíses Krais i salili tesol ien. I sohot seilon masin kaha ape i lua hanima tehu pon ie. Sohotuan i takah hanowi kaha seilon (*Jon 3:13; Pilipai 2:5-7*). Taen ngainukaha teka kahikahin tapo, kaha to lian tehue kapi Haeu tel Tamakaha ti tesol tonan (*Matiu 5:12; Jon 14:1-3; 2 Korin 5:1; Pilipai 3:20*). Jon tel aposel i ningahi waliko ti i sosohot tone Haeu ape i tai kakaxi sale tesol waliko ien. (Paxaiwa Hahatakei Haeu).

Tone waliko ti haniai Haeu ma Tone luiai sanda (Kakai Inglis: *Altar*) (*Matiu 23:35; Luk 1:11; 1 Korin 9:13; Híbru 9:4; Hahatakei Haeu 8:3*)

Haxewai... Tone waliko ti haniai Haeu ma Tone luiai sanda339Haxewai... Tone waliko ti haniai Haeu ma Ton

Teka Ju laha kau waliko ti hani Haeu
ti hasawi hamaluminiai wasolalaha
hani kapin. Laha uke pot tanomiai
tone waliko ien. Teka masiwi ti
hukuminiai Haeu ma seilon lato

telei manihuh tenen masin sipsip,
meme ma na bulmakau patul tetan.
(Paxaiwa hosai tone waliko ti hani
Haeu leilon ie imat ti tetepap 579.)